

WATTI'U ALĀLUASSA APAN NIAPASINGKATTI MATIUS

WISARA TAĀAANE

Wuke *Matius* namasingkatta siite Watti'u Alāluassa manungku Mawu Yesus uddewe Ratu m Punnu Saḷamatta apan nipa'ire Mawu Ruata. Sulalummu Mawu Yesus udde Mawu Ruata napatipussu apa apan suete nipa'ire-Ne sulalummu Paaire Tabbe su aḷarḷanang-Nge. Manimbe Mawu Yesus inasungkangnga wuassu walagu taumata n Yahudi wuḷḷu nabbiakka ere taumata n Yahudi, arawe Watti'u Alāluassa udde walineuwe tumba'u su pabbawalagu Yahudi sassane ewe'e lai su aḷawo'u pabbawalaga su ahewallu runia.

Wuke *Matius* indi niatokka ringannu mapia; nitattakka wuassu inasungkangngu Mawu Yesus, wua udde su ola'u pananaḷḷani see wawono'a apan niapendaman-Ne, see su ola'u pammamanara-Ne su Galilea. Isudde Itou nannase, mangngaḷḷa'a wuḷḷu mapaapia n taumata. Wua udde wuke indi nabbatti'e ng kaamattu Mawu Yesus wuassu Galilea nabatukku Yerusalem, wuḷḷu apa apan suete nariaddi su pabbiarḷannu Mawu Yesus sulalummu sangkamisa panginsueannu wiakke su runia indi na'oma n su papate-Ne wuḷḷu pabbawangun-Ne.

Wuke *Matius* indi mangke mappanaungngu sambau inolaanna apan mannemakka manungku Mawu Yesus uddewe Huru apan wahewa, apan mangngaḷḷa'a manungku Mawu Ruata mamarenta ere sangkatou Ratu. Mawu Yesus lai pia sarḷaungnge mannaḷa'a atappasannu Tita Mawu Ruata. Anamboanne wuassu aḷarḷa'u Mawu Yesus udde suete niammulla naola'a lima ng kawageanganna eteudde: (1) Nase su wuidda matatarḷḷino su pallalagu, tanggumanna, manga pussa'a, wuḷḷu tudda m pabbiarḷannu aḷarḷana'u Mawu Ruata (addoanne 5-7); (2) manga tatantiro su sire mapuḷo dua mallalarḷrenggennu Mawu Yesus su ipa'ola'a manara (addoanne 10); (3) manga sasumandingnga su ola'u tempone Mawu Ruata mamarenta ere sangkatou Ratu (addoanne 13); (4) aḷarḷa'a matatarḷḷino su ereapa maola'a mallalarḷrenggennu Mawu Yesus (addoanne 18); (5) aḷarḷa'a matatarḷḷino su ola'u tempo m panginsueanne wuḷḷu su daranta n Ana'u Taumata (addoanne 24-25).

Lalorrone

Manga arannu iupungngu alāmona Mawu Yesus	
Kristus wurru اساسungskange	1:1-2:23
Manara n Yohanes Mananaṛṛani	3:1-12
Sasaṛṛani wurru wawono'a su Mawu Yesus	3:13-4:11
Pammamanara Mawu Yesus su pattangngannu	
taumata su leta'u Galilea	4:12-18:35
Wuassu Galilea watukku Yerusalem	19:1-20:34
Misa panginsueanne su Yerusalem wurru	
su wanua maranine	21:1-27:66
Pabbawangunnu Mawu Yesus wurru naipasilo m	
batangan-Ne	28:1-20

**Manga arannu iupungngu aḷamona Mawu
Yesus Kristus**
(*Luk. 3:23-38*)

1 Ete indi arannu iupungngu aḷamona Mawu Yesus Kristus, papapulunni Daud, papapulunni Abraham. Wuassi Abraham na'oma n sara Daud, arannu manga iupungngu aḷamona n Mawu Yesus Kristus ereindi:

^{2-6a} Abraham,

Ishak,

Yakub,

Yehuda wuṛṛu manga tuṛrangnge,

Peres wuṛṛu Zerah (inangngi mangitou aranne Tamar),

Hezron,

Ram,

Aminadab,

Nahason,

Salmon,

Boas (inangngene Rahab),

Obed (inangngene eteudde Rut),

Isai,

wuṛṛu Ratu Daud.

^{6b-11} Wuassi Daud na'oma n sara tempo m balahannu Israel niṛṛuumanna su Babel nawoṛṛetta manga aranna ereindi:

Salomo (inangngene eteudde inawaḷuanni Uria),

Rehabeam,

Abia,

Asa,

Yosafat,

Yoram,

Uzia,

Yotam,

Ahas,

Hizkia,

Manasye,

Amon,

Yosia,

Yekhonya wuṛṛu manga tuṛrangnge.

¹²⁻¹⁶ Wuassu tempo m balahannu Israel niṛṛuumanna su Babel na'oma n sara asasungkangngu Mawu Yesus, nawoṛṛetta manga aranna ereindi:

Yekhonya,

Sealtiel,

Zerubabel,
 Abihud,
 Elyakim,
 Azur,
 Zadok,
 Akhim,
 Eliud,
 Eleazar,
 Matan,
 Yakub,
 Yusuf awingngi Maria.

Wuṛru wuassi Maria uddewe nasungkangke Mawu Yesus apan isassaggo lai Kristus.

¹⁷Nariaddi wuassi Abraham na'oma n sara Daud, sarang-kanambone mapuḷo appatta su wageangnge, wuassi Daud na'oma n sara pabbawalagu Israel niṛruumanna su Babel, udde lai mapuḷo appatta su wageangnge. Wuassu tempo n Israel niṛruumanna su Babel na'oma n sara asasungkangngu Mawu Yesus Kristus udde lai mapuḷo appatta su wageangnge.

Asasungkangngu Mawu Yesus Kristus

(Luk. 2:1-7)

¹⁸Ereindi watti'a su ola'u asasungkangngu Mawu Yesus Kristus. Inangngene eteudde Maria, uatatonanga n Yusuf. Arawe su tempo imangitou taambe naawingnga, niasingkatanna Maria plate illoṛṛo. Yusuf ta'e waga manungku Maria plate illoṛṛo ana waugu taṛṛino n Ghaṛṛaho Mawu Ruata. ¹⁹Yusuf tunangane udde, eteudde sangkatou apan sidutu tuttuṛṛutta tita n agama. Nariaddi itou mappulute mamassutta patatunanga n tarua, arawe ringannu maḷanna-ḷannaba, tadea'u Maria tawe masili su saruannu awadaalla. ²⁰Tantalanna Yusuf maṛṛingiddu olangnge udde, itou nabaliawa. Sulalummu baliawane udde, itou naasilo sangkatou mala'ekattu Mawu nabbisara sitou, "Yusuf papapulunni Daud, arie paata'utta maawingngi Maria; ana waugu ana'a apan sulalummu illoṛṛone udde nariaddi wuassu taṛṛino n Ghaṛṛaho Mawu Ruata. ²¹Maria sarun mangunsiwe n sangkatou ana'a esakka. I'o sarun managgo n arannu ana'a udde Yesus, ana waugu Itou sarun maḷamatta alaṛṛanang-Nge wuassu rosa mangitou."

²²Sarangkanambone udde mariaddi aroddi, tadea'u matipusse apa apan suete niwisara Mawu sulalummu nabi-Ne, eteudde, ²³"Sangkatou maṛṛuala sarun mangilloṛṛo wuṛru mangunsiwe n sangkatou ana'a

esakka. Ana'a udde sarun isaggo aranne Imanuel." (Immanuel eteudde wisara n Ibrani atappasanne, "Mawu Ruata su sampunna ringanni ite".)

²⁴Napawe Yusuf napu'ote, itou tinumuṛṛutte su ereapa apan suete niwatti'u mala'ekattu Mawu sitou. Itou naawingke Maria. ²⁵Arawe tantaḷanna Maria taambe nangunsiwe n ana'a udde, Yusuf taambe naammulli Maria. Wuṛṛu napawe ana'a udde nasungkangke, Yusuf nanaggote n ana'a udde Yesus.

Manga raho wuassu Ra'i

2 Mawu Yesus inasungkangnga su soa m Betlehem su wanua Yudea, su tempo pamamarenta n Ratu Herodes. Su tempo udde manga pira mapapande n anumpitanna wuassu ra'i nirumanta su Yerusalem. ²Imangitou ma'iwaḷo su aḷawo'u tampa, "Suapanete ana'a udde, apan nasungkangnga maola'a ratu n taumata n Yahudi? Iami naasilo anumpitanna nasabangnga wuassu samba'a ra'i, wuṛṛu iami nirumanta mas-subba Sitou."

³Napawe Ratu Herodes naaringikka olangnge udde, itou niṛṛumoro atonna, aroddi lai anambo n taumata su Yerusalem. ⁴Ne itou nandolokke n anambo n imam tembonanne wuṛṛu manga huru n agama taumata n Yahudi rumanta maammulla. See itou naiwaḷote simangitou, "Suapa sarun masungkangnga Ratu apan suete nipa'ire Mawu Ruata?"

⁵Imangitou sinumimbakka, "Su soa m Betlehem su wanua Yudea. Ana waugu ereindi niwoṛṛettu sangkatou nabi,

⁶I'o Betlehem, su wanua Yehuda,

i'o atonna-tonna waḷinewe addio'anne su wallattu aḷawo'u soa ahunanne su Yehuda.

Ana waugu inasabanganne wuassi'o sarun rumanta sangkatou piarṛangnge,

apan sarun mangehetta aḷarṛana-U Israel.'"

⁷Napawe suete naasomba taḷaane aroddi, Herodes namaggote manga mapapande n anumpitanna wuassu samba'a ra'i udde, ringannu maḷannaba. Wua udde itou naiwaḷote simangitou, ro'e n angngera iamiu nanattakka naasilo anumpitanna udde. ⁸Wua udde itou nandolokke mangitou watukku Betlehem ringannu tanatane indi, "Roote, rea'ete ana'a udde ringannu ma'uduppa. Wuṛṛu amungkangngu iamiu maa-somba Sitou, waḷoa'a sia'u, tadea'u ia'u lai inai massubba Sitou."

⁹⁻¹⁰Wua udde imangitou inaita. Imangitou naasilo lai anumpitanna apan suete niasiloanni mangitou rorone su samba'a ra'i. Lembo n lullua-ssa imangitou naasilo anumpitanna udde! Anumpitanna udde nalliu roro wuassi mangitou, wua udde nattaalla su lantakku tampa n ana'a udde.



Ranna n alu amania (2:11)

¹¹Imangitou sinumutta sulaḷummu waḷe udde wuṛṛu naasilote ana'a udde ringanni Maria, inangngene. Imangitou inumaḷintuda wuṛṛu nassubbate ana'a udde see namu'ate tampa n darotongngi mangitou wuṛṛu nangong-golle n sasamba Sitou wuḷawanna, amania wuṛṛu mur. ¹²Mawu Ruata napanaungnga simangitou sulaḷummu waḷiawa tadea'u imbarrangnga imangitou mabelengnga ringanni Herodes. Nariaddi imangitou napuḷete niumamatta su laḷanna waine.

Tinumalaṅnga watukku Mesir

¹³Napawe manga mapapande n anumpitanna udde napuḷete, mala'ekattu Mawu naipasilo n batangane si Yusuf sulaḷummu waḷiawa. Mala'ekatta udde nabbisara, "Herodes pia pandumma madea'a ana'a udde pateanni tou. Ana waugu udde apu'ote, apira'e ana'a udde ringannu inangngene taḷanga'e watukku Mesir. Atana'e poiारoddi ma'oma n sara ia'u mabbaḷo si'o apia."

¹⁴Yusuf nabangunte, wuṛṛu ṛabbi udde lai itou nangapiddu ana'a udde ringannu inangngene tinumalaṅke watukku Mesir. ¹⁵Imangitou natana'a poiारoddi, na'oma n sara Herodes nate.

Aroddi nariaddite apa apan suete niwisara Mawu sulaḷummu nabi-Ne ereindi, "Ia'u mamaggo Ana'u wuassu Mesir."

Pamamate manga aḷarṛana'a

¹⁶Napawe Herodes naasingkatta manungku manga mapapande n anumpitanna wuassu ra'i udde namahia sitou, itou nasa'u atonna. Wua udde itou nandolokke mapapate n aḷawo'u ana'a esakka uukke rua tonna inawa su Betlehem wurru lai su wanua maranine. Udde nassuḷunggu taḷaane apan niaringirṛanna wuassu manga mapapande n anumpitanna udde su tempo anumpitanna udde niasiloanna.

¹⁷Aroddi nariaddite apa apan suete niwisara Nabi Yeremia, eteudde,
¹⁸"Su Rama niaringikka tingikku laḷallu,
 sasaliomanna wurru laḷuai.
 Rahel lulluai n aḷarṛanangnge;
 itou madiri limbatanna
 ana waugu aḷarṛanangnge natete."

Nabelengnga wuassu Mesir

¹⁹Napawe Herodes natete, tantara n Yusuf ta'e su Mesir sangkatou mala'ekattu Mawu naipasilo m batanganne si Yusuf sulaḷummu waḷiawa.
²⁰Mala'ekatta udde nabbisara, "Manga taumata apan mamate ana'a udde natete. Ana waugu udde pabbangunte apira'e ana'a udde ringannu inangnge wurru pabelengke su Israel." ²¹Ne Yusuf nabangunte, see nangapidde n ana'a udde wurru Maria nabelengke su Israel.

²²Arawe wua udde Yusuf naaringikka manungku Arkelaus, ana'i Herodes nalloḷossa iamangnge maola'a ratu su wanua Yudea. Nariaddi Yusuf matta'utta inai poiारoddi. Napawe itou suete naasomba tuḷadda Mawu panginsueanne sulaḷummu waḷiawa, itou inaita su wageangngu leta'u Galilea. ²³Isudde Itou natana'a su soa aranne Nazaret. Ringannu aroddi nariaddite apa apan niwatti'u manga nabi su ola'u ana'a udde: "Itou sarun isaggo taumata Nazaret."

Nase n Yohanes Mananarṛani

(Mrk. 1:1-8; Luk. 3:1-18; Yoh. 1:19-28)

3 Su tempo udde nirumantate Yohanes Mananarṛani su wadda'u Yudea wurru nanattakke mannase. ²"Awaḷute wuassu manga rosanu," wisarane, "ana waugu Mawu Ruata tate maḷannu lai mamarenta ere sangkatou Ratu!" ³Ete Yohanes udde taumata apan pappandumannu Nabi Yesaya sulaḷummu manga wisaraneindi,

"Pia taumata u'aljata su wadda'a,
 'Saddiaite laḷannu Mawu;
 rataṛṛa'e laḷanni Tou.'"

⁴Yohanes ualurre n laubba wuassu wambuḷu n unta. Paperrenne wuassu pisi m winatangnga wuṛṛu anni tou saṛṛapalanna wuṛṛu puḷa n ahuranganna. ⁵Manambo taumata wuassu Yerusalem, wuassu aḷawo'u wanua Yudea wuṛṛu wuassu wageangngu leta'u Saḷukku Yordan, nirumanta ringanni Yohanes. ⁶Imangitou nanga'u manga rosa mangitou, see Yohanes nanaṛṛanite simangitou su Saḷukku Yordan.

⁷Manambo lai taumata n Farisi wuṛṛu Saduki nirumanta ringanni Yohanes maisaṛṛani. Arawe su tempo itou naasilo simangitou nirumanta, itou nabbisara simangitou, "Iamiu taumata laḷeo! Isai suete nabbaḷo manungku iamiu maḷiudda wuassu ruumannu Mawu Ruata apan sarun rumanta? ⁸Pasiloa'e ringannu pallaḷagunu, manungku iamiu nawaḷute wuassu manga rosanu. ⁹Arie massunna manungku iamiu maḷiu wuassu ruumanna ringannu mabbisara manungku Abraham uddewe iupungngu aḷamona ng kamiu. Naunge, wuassu manga watu indi lai, Mawu Ruata wotongnge ma'ola'a papapulunni Abraham! ¹⁰Baḷiungnga nasaddiate ipanuwangnga alu, ma'oma n sara manga ramunne. Aḷawo'u alu apan tawe mabbua apan mapia sarun tuwanganna wuṛṛu iramme sulaḷummu putungnga. ¹¹Ia'u mannaṛṛani siamiu ringannu ua'e, udde mappaaḷiatta'a manungku iamiu nawaḷute wuassu paddarosa ng kamiu, arawe apan sarun rumanta saḷimmurine wuassia'u, sarun manaṛṛani siamiu ringannu Ghaṛṛaho Mawu Ruata wuṛṛu putungnga. Itou magge-waḷanna wuassia'u saran mangapiddu sapatune lai ia'u tawe su rinone. ¹²Su limane pia niṛṛu ipattappa aḷawo'u ammene ma'oma n sara mawaresi. Amme sarun iammulla sulaḷummu waḷingkakke, arawe anambo n waḷaane sarun tutunganna su putungnga apan tawe mappadumma."

Mawu Yesus nissaṛṛani

(*Mrk. 1:9-11; Luk. 3:21-22*)

¹³Su tempo udde Mawu Yesus inaite wuassu Galilea watukku Saḷukku Yordan. Poiaroddi Itou nirumanta ringanni Yohanes wuṛṛu naddorongnga maisaṛṛani. ¹⁴Arawe Yohanes maannamma mannoḷa'u darorongngi Tou udde. Yohanes nabbisara, "Ia'u indi rinone saṛṛanianni Iamangnga. Orassa indi'e Iamangnga nirumanta ringangu maisaṛṛani sia'u."

¹⁵Arawe Mawu Yesus nisumimbakka, "Wala'e aroddi su orassa indi. Ana waugu ringannu aroddi iite ma'ola'a aḷawo'u apa apan ipaapulu Mawu Ruata." Nariaddi Yohanes nanaṛṛanite Mawu Yesus.



Inaramannu taumata n Israel dorone marrae n ganduma wuassu walaane (3:12)

¹⁶Napawe suete nissarrani, Mawu Yesus maliha-lihakka sinumapputta wuassu ua'e n salukka udde. Inarrombanganne langitta nawu'a wurru Mawu Yesus naasilo Gharraho Mawu Ruata niumonto'a ere manu'a merpati niumarunna Sitou. ¹⁷Wua udde niaringikka tingikku Mawu Ruata nabbisara, "Ete indi Ana'u apan arangguanna, Itou maaluaassa naung-Ku."

Mawu Yesus niwono'anna

(Mrk. 1:12-13; Luk. 4:1-13)

4 Wua udde Mawu Yesus niehetu Gharraho Mawu Ruata watukku wadda'a, ana see iapawono'a su Setanna. ²Appattu pulo su allone appattu pulo su rabbine Mawu Yesus tawe umanna. Wua udde Itou naappendampe lunussa. ³Setanna nirumanta wurru nabbisara, "To Ana'u Mawu Ruata? Ana waugu udde dolorra'e manga watu indi maola'a roti."

⁴Mawu Yesus sinumimbakka, "Sulalummu Wuke Susi uaworretta: Taumata tawe tumba'u mabiakku roti sassane, arawe lai ringannu alawo'u wisara apan niapasingkattu Mawu Ruata."

⁵Wua udde Setanna nangapiddu Mawu Yesus watukku Yerusalem, soa na'ukkassa, wurru nangadote n Tou su wowo n salawo n Wale

Mawu. ⁶See Setanna nabbisara Sitou, "I'o Ana'u Mawu Ruata? Amung-kangngu aroddi, tumpate; ana sulalummu Wuke Susi uaworretta arendi, 'Mawu Ruata sarun mandolokku manga mala'ekanne mandiaga Si'o, imangitou sarun manalofo Si'o ringannu lima mangitou, tadea'u leddanu tawe mattu'a su watu.'"

⁷Mawu Yesus sinumimbakka, "Arawe sulalummu Wuke Susi uaworretta lai, 'Imbarangnga i'o mamono'a Mawu Ruatanu.'"

⁸Wua udde Setanna nangapidde Mawu Yesus su wuidda apan matanggakka atonna wurru tina'ete Sitou alawo'u araratuanna su runia ringannu alawo'u paa'alane. ⁹See Setanna nabbisara Mawu Yesus, "Sarangkanambone indi sarun ionggolla Si'o, amung-kangngu I'o umalintudda massubba sia'u."

¹⁰Mawu Yesus sinumimbakka, "Passaliu i'o mamamono'a! Sulalummu Wuke Susi, uaworretta: Passubbate Mawu Ruatanu, wurru pangimbete Sitou sassane!"

¹¹Panginsueanne Setanna nanantangke Mawu Yesus, wurru manga mala'ekan-Ne lai nappadantate nangimbe Sitou.

Mawu Yesus nanattakku manara-Ne su Galilea

(Mrk. 1:14-15; Luk. 4:14-15)

¹²Su tempo naaringikka manungku Yohanes nitarro sulalummu tut-tupanna, Mawu Yesus tinumalangke watukku Galilea. ¹³Itou nanantangke Nazaret, see natana'e su Kapernaum su winggi n Rano n Galilea su wageangngu leta'u Zebulon wurru Naftali. ¹⁴Ana waugu Mawu Yesus na'ola'a olangnge aroddi, nariaddite apa apan suete niwisara Nabi Yesaya:

¹⁵"Leta'i Zebulon wurru leta'i Naftali,
su lalanna watukku rano, su samba'a n Salukku Yordan,
Galilea, leta'u taumata waline Yahudi!

¹⁶Pabbawalaga apan mabbiakka sulalummu ararandumma,
suete naasilo asasemakka!

Su manga taumata apan uatana'a su wanua n ararandummu papate
nisabangante n asasemakka!"


¹⁷Nanattakke su tempo udde Mawu Yesus namasingkatta, "Awalute wuassu manga paddarosanu, ana waugu Mawu Ruata malihakke rumanta mamarenta ere sangkatou Ratu!"

Mawu Yesus namaggo sire appatta samakka

(Mrk. 1:16-20; Luk. 5:1-11)

¹⁸Su tempo Mawu Yesus u'amatta su apannu Rano n Galilea, Itou naasilo rua ng katou samakka, eteudde Simon (apan isassaggo lai Petrus) ringannu tuarine Andreas. Imangitou tantaḷanna mannoma inassa su rano udde. ¹⁹Mawu Yesus nabbisara simangitou, "Wette tantalongke Sia'u. Ia'u sarun mangarra'a siamiu manoma taumata." ²⁰Imangitou lapiddu nanantangngu soma, see tinuman-talongke Mawu Yesus.

²¹Mawu Yesus lapiddu inumamata, wua udde naasilote lai rua ng katou sangkatuṛrangnga apan waine, eteudde Yakobus wuṛru Yohanes, aḷarraṇa'i Zebedeus. Imangitou su sampunna ringanni iamangngi mangitou mannapia soma sulaḷummu saalanna. Mawu Yesus namaggo si-mangitou lai, ²²wuṛru imangitou lapiddu nanantangngu saalanna wuṛru iamangngi mangitou, see tinumantalongke Mawu Yesus.



Samakka su Rano n Galilea (4:18)

Mawu Yesus mangngarra'a, mannase, wurru mapaapia n taumata

(Luk. 6:17-19)

²³Su Galilea, Mawu Yesus namañiwutte ahewallu wanua wurru mangngarra'a su anambo n wale m pattatañramawuanna. Itou mabatti'u Watti'u Añaluassa manungku Mawu Ruata sarun mamarenta. Wurru Itou lai mapaapia n manga taumata apan maradda'a wurru pia sangkulle. ²⁴Watti'a su ola'u Mawu Yesus udde naddingikke su añawo'u wanua su Siria, na'oma n sara taumata nambo rudanta ringanni Tou. Imangitou uaapiddu manga taumata apan uatatañrangnga añawo'u hati n radda'a wurru asasusa. Manga taumata apan niasuttannu ghañraho lañeo, apan raddangnge pua, wurru lome, sarangkanambone udde nia-paapia Mawu Yesus. ²⁵Manambo atonna taumata apan tinumantalongnga Mawu Yesus su tempo udde. Piaddu nirumanta wuassu Galilea, pia lai wuassu Mapuñ Soa, wuassu Yerusalem, wuassu Yudea, wurru pia lai wuassu wanua su samba'a n Yordan.

Nase su wuidda

5 Su tempo Mawu Yesus naasilo taumata nambo udde, Itou sinumaate su wuidda. Napawe Itou ua'iante, manga mallañarñenggen-Ne nirumanta ringanni Tou, ²see Itou nanattakke mangngarra'a simangitou:

Lañumanna'a apan tutune

(Luk. 6:20-23)

- ³"Lañumanna'a su taumata apan uapendamma tawe atatohassa wurru tumba'u uaantimma Mawu Ruata sassane,
ete imangitou udde lañorñ n araratuannu Mawu Ruata!
- ⁴Lañumanna'a su taumata apan massusa naungnge;
Mawu Ruata sarun malluassa naungngi mangitou!
- ⁵Lañumanna'a su taumata apan naungnge mawawo;
Mawu Ruata sarun manipussa paaire-Ne simangitou!
- ⁶Lañumanna'a su taumata apan sidutu ma'ola'a apulu Mawu Ruata;
Mawu Ruata sarun manuungngu apulu mangitou!
- ⁷Lañumanna'a su taumata apan mandangngu taumata waine;
Mawu Ruata sarun mandangngu simangitou lai!

⁸Laḷumanna'a su taumata apan naungnge waresi;
imangitou sarun maaillaḷa Mawu Ruata.

⁹Laḷumanna'a su taumata apan mangapiddu paddarame su wallattu taumata;

Mawu Ruata sarun manga'u simangitou maola'a manga
aḷaṛṛanang-Nge!

¹⁰Laḷumanna'a su taumata apan uatataṛṛangnga sassansaranna ana
wangu ma'ola'a apulu Mawu Ruata;

ete imangitou udde laḷorṛo n araratuannu Mawu Ruata!

¹¹Laḷumanna'a siamiu amungkangngu iapaasaḷa sassansaranna wuṛṛu
aaddio'anna ana wangu Ia'u. ¹²Manga nabi apan nabbiakka su tempo
iamiu taambe su runia, nisansara lai ereudde. Luasse wuṛṛu lala'e, ana
wangu laḷantakke manambo nisaddia Mawu Ruata siamiu."

Asimma wuṛṛu semakka

(Mrk. 9:50; Luk. 14:34-35)

¹³"Ete iamiu uddewe asimmu runia. Amungkangngu asimma udde
nawaḷu maammi, apa wotongnge iapaapakkada apia? Tate gunane lai,
ewe'e iramme wuṛṛu ṛindannu taumata.


¹⁴Ete iamiu uddewe asasemakku runia. Soa apan uaaddo su wui-
dda tawe iawuni. ¹⁵Tawe taumata mande'omma soḷo, see soḷo udde luu-
wannu wensada. Itou sarun mangaddo n soḷo udde su tampane, tadea'u
mangagillu asasemakka su aḷawo'u taumata sulalummu waḷe. ¹⁶Aroddi
lai asasemakku ṛinone lai lumansiangnga su saruannu taumata, tadea'u
imangitou maasilo aḷawo'u pallaḷagunu apan mapia, wua udde padalote
Mawu Ruata su surga."

Aḷaṛṛa'a su ola'u tita n agama Yahudi

¹⁷"Ariewe massunna manungku Ia'u nirumanta mamappassa tita
Musa wuṛṛu aḷaṛṛa'u manga nabi. Ia'u nirumanta waḷine mamappa-
ssa tita udde, arawe sarun mangarṛa'u atappasanne apan su ṛinone.

¹⁸Naunge! Tantaḷanna langitta wuṛṛu runia ta'e indi, sambau worṛetta
ara'e titi'a apan addio'anne lai sulalummu aḷaṛṛa'a udde, tawe pap-
pasanna amungkangngu sarangkanambone udde taambe natipussa!

¹⁹Ana wangu udde, isai-sai tawe tumuṛṛutta manga parenta udde, ma-
nimbe parenta addio'anne, wuṛṛu mangngarṛa'a taumata waine ma'ola'a
aroddi lai, sarun maola'a addio'anne su wallattu aḷaṛṛana'u Mawu
Ruata. Arawe isai-sai apan tuttuṛṛutta manga parenta udde, wuṛṛu



Sofo wuṛru wensada tempo n dorone (5:15)

mangngarṛa'a taumata waine ma'ola'a aroddi lai, sarun maola'a wahewa su wallattu aḷarṛana'u Mawu Ruata. ²⁰Nariaddi, naunge: Iamiu tawe maola'a aḷarṛana'u Mawu Ruata, amungkangngu iamiu tawe manampaliu manga huru n agama wuṛru manga taumata n Farisi sulaḷummu ma'ola'a inolaanna ara'e apulu Mawu Ruata."

Aḷarṛa'a su ola'u asasa'u

(Luk. 12:57-59)

²¹"Iamiu masingkatta manungku su iupungngu aḷamona ng kite pia aḷarṛa'a ereindi: Arie pamate; isai-sai mamate, sarun parikisanna. ²²Arawe orassa indi Ia'u mabbisara siamiu, isai-sai masa'u su taumata waine, sarun parikisanna; wuṛru isai-sai mallela taumata waine sarun parikisanna su saruannu Mallaṛruungngu Agama. Wuṛru isai-sai mabbisara taumata waine, 'Tingngangnga,' sarun iramme sulaḷummu putungngu naraka. ²³Ana waugu udde, amungkangngu piaddu sangkatou wua-ssu wallatti amiu mangapiddu sasamba su Mawu Ruata, see naanaungnga manungku pia taumata massa'u sitou, ²⁴ṛinone itou manantangnga asuene sasambane su saruannu medda n sasamba see inai maddame n taumata udde. Wua udde, wotongngete itou mabelengnga wuṛru manantillu aonggolle su Mawu Ruata.

²⁵Amungkangngu pia taumata mangalae ng kamiu su mallaṛruungnga, paddamete n tou taḷabe ta'e pia tempone, tantaḷanna taambe na'oma su mallaṛruungnga. Amungkangngu tawe, taumata udde sarun manantilli amiu su mallaṛruungnga apan manantilli amiu su polisi. See

polisi sarun mapaasutta ng kamiu sulalummu tuttupanna. ²⁶Wurru paa-naunge: Natantuna iamiu tawe masabangnga wuassu tuttupanna udde, amungkangngu bawaekku pasasala ng kamiu taambe nasue m baekke.”

Su ola’u sasandaga

²⁷”Iamiu masingkatta manungku pia alarra’a ereindi: Arie sumandaga. ²⁸Arawe tempo indi Ia’u mabbalo siamiu: Isai-sai ma’ellega sangkatou wawine see ninumemma n tou, taumata udde suete sinumandaga ringannu wawine udde sulalummu naungnge. ²⁹Amungkangngu mata aikkatannu napaola’u rosa si’o, lasso’a wurru rammea’a mata udde! Mappianna awuliannu sambau su wallattu aola’u wadangngu wuassu ahewallu wadangngu iramme su naraka. ³⁰Amungkangngu limanu aikkatanna maarosa si’o, pototta wurru rammea’a limanu udde! Mappianne awuliannu lima samba’a wuassu ahewallu wadangngu mataro su naraka.”

Su ola’u patatalei

(*Mat. 19:9; Mrk. 10:11-12; Luk. 16:18*)

³¹”Pia lai alarra’a ereindi: su manga taumata esakka apan nanantangngu awingnge, sarun mangagillu surattu patatalei sitou. ³²Arawe tempo indi Ia’u mabbisara siamiu; isai-sai manantangngu awingnge manimbe wawine udde tawe sinumandaga, itou napaola’u awingnge udde sinumandaga, amungkangngu awingngi tou udde maawingnga apia. Wurru isai-sai maawingnga ringannu wawine apan suete nitantangnga udde, sinumandaga lai.”

Su ola’u pasasalu

³³”Iamiu masingkatta manungku iupungngu alamona ng kite pia alarra’a ereindi: Arie pangawusu. Apa apan suete nipa’irenu ringannu pasasalu su saruannu Mawu Ruata rinone udde olaannu. ³⁴Arawe orassa indi Ia’u mabbisara siamiu: arie massalu saran addio’a, mapia ete ringannu langitta, ana waugu langitta udde ramba’u Mawu Ruata, ³⁵aroddi lai ringannu runia, ana waugu runia udde apampakku ledde-Ne; ara’e ringannu Yerusalem, ana waugu eteudde soa n Ratu wahewa. ³⁶Arie lai massalu ringannu puanu ana waugu i’o sassane tawe maawalut utangngu maola’a mawira ara’e ma’itumma manimbe man sambua.

³⁷Tumba'u pabbisara: 'Ore' ara'e 'Tawe' – manampaliu wua isudde darantane wuassu Setanna."

Aḷarṛa'a su ola'u pabawalissa

(*Luk. 6:29-30*)

³⁸"Iamui masingkatta manungku pia lai aḷarṛa'a ereindi: mata hantiannu mata, isi hantiannu isi. ³⁹Arawe orassa indi Ia'u mabbisara siamui: arie pabbalissa sangkatou taumata apan ma'ola'a aḷaleo siamui. Apianne amungkangngu taumata mamero wambalanu aikkatanna; wala'a lai itou mamero wambalanu airri. ⁴⁰Wurru amungkangngu taumata mangalae ng kami su mallarṛuungnga wurru maddorongnga laungngu, onngoḷa'a lai sitou jubahnu. ⁴¹Amungkangngu sangkatou tembonanne mamata'i amui mamasanna luranni tou araune sangkilo, pasanna lai luranna udde araune rua kilo. ⁴²Amungkangngu manga taumata maddorongnga manga apa siamui, anggiḷa'e sitou. Wurru arie lai mapaawelengngu taumata apan maapulu mabballassa sarannapa si'o."

Umakkannu seetta

(*Luk. 6:27-28, 32-36*)

⁴³"Iamui masingkatta manungku pia lai aḷarṛa'a ereindi: pandangngute manga hawenu wurru passeette manga seennu. ⁴⁴Arawe orassa indi Ia'u mabbisara siamui: pandangngute manga seennu, wurru aḷiomana'a manga taumata apan mammate siamui, ⁴⁵tadea'u iamui maola'a aḷarṛana'u Iamangngi amui su surga. Ana waugu Mawu Ruata mapasabangngu matannallo su taumata apan mapia, wurru su taumata apan laḷeo lai. Itou napa'uranna su taumata apan ma'ola'a apapia wurru su taumata apan ma'ola'a aḷaleo lai. ⁴⁶Ana waugu amungkangngu iamui tumba'u mandangngu taumata apan mandangngu siamui, apa hunane su Mawu Ruata mabbalissa inolaanni amui udde? Waḷinewe manga maddarorongnga wose lai ma'ola'a aroddi? ⁴⁷Wurru amungkangngu iamui tumba'u mangngagillu tabea su manga hawenu sassane, apa lebbene? Manga taumata apan wagga ma'illala Mawu Ruata lai ma'ola'a aroddi! ⁴⁸Iamangngu su surga mandangngu aḷawo'u taumata ringannu asasuungnge. Iamui sarun pa'ola'a lai aroddi."

Aḷarṛa'a su ola'u aonggolla

6 "Naungete, arie iamiu ma'ola'a taturuttu agama su saruannu awa-daalla tadea'u ellehannu taumata. Amunkangkngu iamiu ma'ola'a aroddi, iamiu tawe onggolannu laḷantakke wuassu Iamangkngu su surga.

²Nariaddi, amunkangkngu iamiu mangagillu aonggolla su taumata asiangknga, arie mangke itattunggalla darangkngu udde, ere a'olaannu taumata lilangkamaḷe'a. Imangitou maapulu ma'ola'a udde sulaḷummu waḷe m pattataṛramawuanna, su laḷanna, tadea'u raloannu taumata. Naungete, imangitou suete nanengkamma laḷantakke. ³Arawe iamiu, amunkangkngu mangagillu aonggolla, anggiḷa'e ringannu maḷanna-lannaba, tadea'u tawedu maasingkatta. ⁴Wala'e pallalaḷagunu udde tawe asingkatannu taumata, tumba'u Iamangkngu su surga. Itou maasilo pallalaḷagunu apan uawuni udde wurru sarun mangonggolu laḷantakke siamiu."

Aḷarṛa'a su ola'u umaḷiomanna

(Luk. 11:2-4)

⁵"Amunkangkngu iamiu umaḷiomanna, imbarrangnga ere manga tau-mata ma'ola'a awusu. Imangitou u'aḷiomanna lapiddu uarisikka su waḷe m pattataṛramawuanna wurru su penga n daḷanna, tadea'u iasilo n tau-mata. Paanaunge, eteudde laḷantakke apan suete nisengkammi mangi-tou. ⁶Arawe amunkangkngu iamiu umaḷiomanna, suttate su wabbo'a wurru ruura'a ngara, see aḷiomante su Mawu Ruata Iamangknga apan tawe iasilo udde. Ne Iamangkngu apan maasilo pallalaḷagunu apan uawuni udde, sarun mangonggolu laḷantakke siamiu.

⁷Amunkangkngu iamiu umaḷiomanna, arie maḷo'e-lo'e ere su manga taumata apan tawe maaillaḷa Mawu. Imangitou massunna manungku darorongngi mangitou sarun daringiṛṛanna ana waugu aḷiomanni mangitou maḷo'e aroddi. ⁸Imbarrangnga ere imangitou udde. Iamangkngu masingkatte apa apan ipaapulu ng kami, salaiwe iamiu taambe na-ddorongnga. ⁹Nariaddi aḷiomante ereindi,

'Iamangngi ami su surga;

Ete I'o Mawu Ruata tumba'u sambau.

Antimanna I'o subbanna wurru wantuhanna.

¹⁰Ete I'o Ratu ng kami.

Antimanna I'o mamarenta su runia

wurru apulunu taturrutanna ere lai su surga.

- ¹¹Onggoḷaawe siami su allo indi pabbawiakka apan ipaapulu ng kami.
- ¹²Ampungewe iami wuassu passasaḷa ng kami, ere lai iami suete nangampungnga taumata apan nassaḷa siami.
- ¹³Ariewe mamala ng kami awuḷiannu pangangimanna su tempo iami wabaḷintongnganna ewe'e liua'a iami wuassu tarḷrino n aḷaḷeo. [Ete I'o Ratu apan uatarḷrino wuḷḷu mawantuga ma'oma n sara maḷannu-ḷannu. Amin.]
- ¹⁴Amungskangngu iamiu mangampungnga taumata apan nassaḷa siamiu, Iamangngu su surga lai sarun mangampungnga pasasaḷa ng kamiu.
- ¹⁵Arawe amungskangngu iamiu tawe mangampungnga pasasaḷa n taumata waine, Iamangngu su surga tawe lai mangampungnga pasasaḷa ng kamiu."

Aḷarḷa'a su ola'u mappuasa

¹⁶"Amungskangngu iamiu mappuasa, imbarḷrangnga massusa ere taumata apan apulune mammahia. Imangitou mammaḷu hatine tadea'u anambo n taumata maasingkatta manungku imangitou mappuasa. Paa-naunge, eteudde laḷantakke apan suete nisengkammi mangitou. ¹⁷Arawe amungskangngu iamiu mappuasa, rammusa hatinu wuḷḷu paarḷo paaḷeno-ḷeno utangngu, ¹⁸tadea'u tawedu maasingkatta manungku iamiu mappuasa, ewe'e tumba'u Iamangngi amiu apan tawe asiloanna udde, masingkatta. Itou maasiḷo pallaḷagunu apan uawuni udde, wuḷḷu sarun mangonggolu laḷantakke si'o."

Darotongnga su surga

(Luk. 12:33-34)

¹⁹"Ariewe mangammullu darotongnga huna m badangngu su runia, isudde wiangnga wuḷḷu tai n atta'a mandaleo wuḷḷu manana'o rumanta manna'o. ²⁰Apianne mangammullu darotongnga su surga, isudde wiangnga wuḷḷu tai n atta'a tawe maahohakka wuḷḷu manana'o tawe rumanta manna'o. ²¹Ana wangu suapa pia darotongngu uaaddo, isudde lai naungngu uarḷrundinganna!"

Semakka huna m badangnga

(Luk. 11:34-36)

²²”Mata eteudde soŕo m badangnga. Amungkangngu matanu matilangnga ahewallu wadangngu lai masema-semakka. ²³Arawe amungkangngu matanu maŕabukka, ahewallu wadangngu marandumma lai. Nariaddi amungkangngu soŕo sulalummu wadangnga udde marandumma, lembo nabbasa lai ararandumma udde!”

Mawu Ruata wurru darotongnga

(Luk. 16:13, 12:22-31)

²⁴”Tawe saran sangkatou taumata maamanara su rua ng katou mawu. Ana waugu itou sarun lembo marangngu sangkatou wuassu sangkatou apan waine. Ara’e itou lembo maturrutta su mawune apan sambau wuassu mawune apan waine. Aroddi lai matatarŕino siamiu. Iamiu tawe maappammanara manara su Mawu Ruata wurru su darotongnga lai.

²⁵Ana waugu udde naunge; arie passinggawangnga su ola’u wiakki amiu, eteudde apa apan sarun annananna wurru inumanni amiu, ara’e apa sarun ilurŕe ng kamiu. Waŕinewe wiakka nangillembo wuassu anna, wurru wadangnga nangillembo wuassu peddetta? ²⁶Pa’ellege manu’u winalanganna. Imangitou tawe massuanna, tawe mangitingnga wurru tawe lai mangammullu wua n sinuananne sulalummu waŕingkakka. Manimbe aroddi Iamangngu su surga mappaduŕi lai simangitou! Waŕinewe iamiu maareganne marau wuassu manu’u winalanganna? ²⁷Isai wuassu wallatti amiu apan ringannu asasinggawangnge mappalo’engngu uukke saran addio’a?

²⁸Anio iamiu susinggawangnga su ola’u peddennu? Panutukka manga wunga bakung apan tuttuwo su wadda’a. Anambo n wungane udde tawe mammanara wurru tawe mandadu’a; ²⁹arawe Ratu Salomo apan paa’alane aroddi anambone, tawe uapedetta ere aŕarŕamagu manga wunga udde! ³⁰Waŕabukka su wadda’a allo indi-tumuwo wurru tiŕrabbine tutunganna ma’oma n sara masue. Arawe Mawu Ruata mamedetta waŕabukka udde aroddi aŕramage. Lembonete iamiu! Arawe pangangimanni amiu mattuŕungnga! ³¹Arie passinggawangnga wurru mabbisara ’Apa apan sarun annananni ite’, ara’e ’apa apan sarun inumanni ite’, ara’e ’apa apan sarun ilurŕe ng kite’? ³²Sarangkanambone udde sidutu raddeaannu taumata apan tawe maailaŕa Mawu Ruata. Arawe Iamangngu su surga, masingkatta manungku iamiu maapulu n sa-

rangkanambone udde. ³³Nariaddi paddea'e dorone tadea'u Mawu Ruata mamarenta sulalummu wiakku wurru turutte apulu-Ne. Ne alawo'u darotongnga waine lai sarun ionggolu Mawu Ruata siamiu. ³⁴Ana waugu udde arie suminggawangnga su ola'u allo tirrabbu. Ana waugu tirrabbu lai pia asasinggawangnge sassane. Allo indi natipusse asasusane, wala'se tambanna apia."

Su ola'u maruungngu taumata waine

(Luk. 6:37-38, 41-42)

7 "Imbarangnga maruungngu taumata waine, tadea'u iamiu sassane lai tawe iruungngu Mawu Ruata. ²Ana waugu su ereapa iamiu maruungngu taumata waine, aroddi lai Mawu Ruata sarun maruungngi amiu. Wurru uurranna apan ipanguukki amiu su taumata waine sarun ipanguukku Mawu Ruata lai siamiu. ³Anio iamiu maasilo sampaddi alu sulalummu mata n turangngu, arawe salaba'u sulalummu matanu sassane tawe iatutukki amiu? ⁴Ereapa iamiu wotongnge mabbisara turangngu, 'Wette ia'u manabangngu alu sampaddi wuassu matanu,' arawe sulalummu matanu sassane pia salaba'u? ⁵Ei lilangkama'e! Sabbanga'e rorone salaba'u wuassu matanu sassane, wakkute udde i'o maasilo ringannu masemakka, wurru wotongngete mapaasabangngu alu sampaddi wuassu mata n turangngu.

⁶Arie mangonggolu sarannapa na'ukkassa su asu, tadea'u asu udde tawe mangawali'a mamangalo si'o. Wurru arie mangonggolu mutiara su wawi, tadea'u wawi udde tawe marinda mutiara udde."

Paddorongnga, paddea'a wurru panengkella

(Luk. 11:9-13)

⁷"Paddorongke, ne iamiu sarun manengkamma. Paddea'e, ne iamiu sarun maasomba. Panengkelle, ne iamiu sarun pamu'anna ngara. ⁸Ana waugu taumata maddorongnga sarun manengkamma; taumata madea'a sarun maasomba; wurru taumata mannengkella sarun wu'anna ngara. ⁹Su wallatti amiu, apa pia iamangnga mangngagillu watu su anangnge, amungkanngu itou maddorongnga roti? ¹⁰Ara'e mangagillu atoanna, amungkanngu itou maddorongnga inassa? ¹¹Salaiwe iamiu laleo, iamiu masingkatta lai mangagillu apa apan mapia su manga alarranangngu. Nangillembu Iamangngu su surga! Itou lembone lai sarun mangagillu apa apan mapia su taumata apan maddorongnga Sitou.

¹²Olaawe taumata waine ere iamiu lai maapulu olaanni mangitou. Eteudde laḷorḷo n aḷarḷa'i Musa wuḷḷu manga nabi."

Ngara apan maḷḷiputta

(Luk. 13:24)

¹³"Suttate su ngara maḷḷiputta, ana waugu ngara wuḷḷu laḷanna apan mattudda naraka wahewa wuḷḷu maḷoangnga, wuḷḷu manambo taumata apan umamatta isudde. ¹⁴Arawe ngara wuḷḷu laḷanna maḷḷiputta wuḷḷu masahada amatanne, mangapiddu taumata su pabbiaḷḷanna. Wuḷḷu tumba'u mattuḷungnga taumata maasomba udde."

Alu wuḷḷu wuane

(Luk. 6:43-44)

¹⁵"Paatehamma su manga nabi awusu. Imangitou nirumanta ringanni amiu, lihide ere domba, arawe imangitou ḷinone ere serigala apan maḷarḷaga. ¹⁶Iamiu sarun maailaḷa simangitou wuassu wua n inolaanne. Anggaḷḷumunanne tawe mabbua n anggore, wuḷḷu rapusi'a roaanna tawe mabbua n ara. ¹⁷Wuassu alu apan masuwukka, asombanganna wua apan mapia, wuḷḷu wuassu alu maḷḷisitta wua apan laḷeo. ¹⁸Alu apan masuwukka tawe mabbua wua laḷeo wuḷḷu alu maḷḷisitta tawe mabbua wua apan mapia. ¹⁹Su manga alu apan tawe mabbua wua apan mapia, tuwanganna wuḷḷu tutunganna. ²⁰Aroddi lai manga nabi awusu. Iamiu sarun maailaḷa wuassu pabbawua n inolaanni mangitou."

Pallaḷagu, waḷine tumba'u wisara

(Luk. 13:25-27)

²¹"Tawe anambo n taumata apan mammaggo Sia'u, 'Mawu, Mawu,' sarun maola'a laḷorḷo n araratuannu Mawu Ruata, arawe tumba'u manga taumata apan tuttuḷḷutta apulu n Iamangku su surga. ²²Su Allo ng Kiamatta manambo taumata sarun mabbisara Sia'u, 'Mawu, Mawu, waḷinewe ringannu arannu iami suete nabbaḷo n tanata Mawu Ruata? Wuḷḷu waḷinewe ringannu arannu Mawu lai iami suete nallimbuakka manga ghaḷḷaho laḷeo see na'ola'a anambo n aḷarḷindu'a?' ²³Arawe Ia'u sarun sumimbakka, 'Ia'u taambe saran paassa naailaḷa siamiu! Roote paarau wua isindi, iamiu apan ma'ola'a aḷaḷeo!'"



Wua n anggore (7:16)

**Maaola'a waḷe apan pande wuṛru, maaola'a
waḷe apan woddo**

(Luk. 6:47-49)

²⁴"Ei, taumata apan maaringikka wisara-U indi, wuṛru tuttuṛrutta, itou ere taumata pande apan napararisikku waḷene su wowo n watu.

²⁵Su tempo nanguranna, wuṛru nammanawangnga lapiddu anginna ma'ikkatta tinumiuppa maṛṛa'a n waḷe udde, waḷe udde tawe naṛṛa'a ana waugu niaparisikka su wowo m watu.

²⁶Wuṛru taumata apan maddaringikka wisara-U indi, arawe tawe tumuṛrutta, itou nassuḷungngu taumata woddo apan napararisikku waḷene su wowo n anne. ²⁷Su tempo nanguranna wuṛru nammanawangnga lapiddu anginna ma'ikkatta tinumiuppa su waḷe udde, waḷe udde naṛṛa'a. Wuṛru ahahohakke wahewalla atonna!"

Taṛṛino Mawu Yesus

²⁸Panginsueanne Mawu Yesus nangilloḷo mangngaṛṛa'a, wuṛru manga taumata apan isudde lembo naherangnga naaringikka alaṛrang-

Nge. ²⁹Ana waugu Itou mangngarra'a ringannu sarraungnge tawe ere manga huru n agama mangitou.

Mawu Yesus napaapia n sangkatou raddangnge paro apan maarantinna

(Mrk. 1:40-45; Luk. 5:12-16)

8 Mawu Yesus sinumossokke wuassu wuidda, wurru manambo tau-mata uatantalongnga Sitou. ²Su tempo udde nirumantate sangkatou apan pia raddangnge paro maata'utta. Itou inumalintuda su saruannu Mawu Yesus, see nabbisara, "Iamangnga, amungkangngu Iamangnga maapulu, Iamangnga wotongnge mapaapia'u."

³Mawu Yesus namita taumata udde lapiddu nabbisara, "Ia'u maapulu. Apiate!" Orassa udde lai raddangnge nawuli. ⁴See Mawu Yesus nabbisara sitou, "Naunge! Arie pabbatti'a sisai-sai. Arawe roote ringannu imam, wurru paddorongnga sitou manantunna manungku i'o napiate. Wua udde anggi'a'e sasamba apan suete nitita Musa, maola'a manga tatiala su taumata manungku i'o napiate atonna!"

Mawu Yesus napaapia mangangimbe n tembonannu tantara n Roma

(Luk. 7:1-10)

⁵Su tempo Mawu Yesus sinumutta su Kapernaum sangkatou tembonannu tantara n Roma nirumanta naisasomba n Tou, wurru naddorongnga tulunganna Sitou. ⁶"Iamangnga," unnu tembonanne udde, "mangangimbe'u maradda'a su wale. Itou ualallowangnga lome su antila wurru mangke uatatarangnga."

⁷Mawu Yesus nabbisara, "Ia'u sarun inai mapaapia n tou."

⁸"Lasa'e Iamangnga," sasimbakku tembonanne udde, "Ia'u tawe su rinone mapaaranta n Iamangnga su wale'u. Iamangnga pamarentate sia'u. Ana see mangangimbe'u mapiate. ⁹Ana waugu ia'u lai rinone massurubawa su tembonangku. Wurru mabbawoanna wuassia'u pia lai manga tantara apan sarun massurubawa su parenta'u. Amungkangngu ia'u mandolokku sangkatou tantara, 'Inaite!' itou sarun inai. Ia'u mabbisara su tantara waine lai, 'Wette isindi!' itou sarun rumanta; wurru amungkangngu ia'u mamarenta allangku, 'Ola'e indi!' itou sarun tumurrutta."

¹⁰Su tempo Mawu Yesus naaringikka apa apan niwalo n tembonannu tantara udde, Itou mangke naherangnga. Wua udde Itou na-

bbisara su manga taumata uatantalongnga Sitou, "Waḷine hampa taumata indi. Su wallattu taumata n Israel Ia'u taambe naasomba taumata pangangimanne aroddi ahewalle! ¹¹Atonna! Manambo taumata sarun rumanta wuassu samba'a n ra'i wuṛṛu waṛṛatta lulluassa su sampunna ringanni Abraham, Ishak wuṛṛu Yakub sulaḷummu Runia Waku Mawu Ruata. ¹²Arawe manga taumata apan ṛinone maola'a alaṛṛana'u Mawu Ruata sarun iramme su ararandumma su liudde. Isudde imangitou sarun lumuai wuṛṛu matataṛṛangnga asasusa." ¹³See Mawu. Yesu nabbisara su tembonannu tantara udde, "Apulete, apa apan sulaḷummu pangangimannu udde sarun mariaddi."

Wuṛṛu su orassa udde lai mangangimbe udde napiate.

Mawu Yesu napaapia manambo taumata

(Mrk. 1:29-34; Luk. 4:38-41)

¹⁴Mawu Yesu inaita watukku waḷe m Petrus. Isudde Itou naasilo la'iananni Petrus maradda'a saḷiubba su lallowanganna. ¹⁵Mawu Yesu namita limane lapiddu napaia saḷiubba udde. Itou nabangunna wuṛṛu nangimbete Mawu Yesu.

¹⁶Su tempo wawallote, taumata nangapidde mararadda'a apan niasuttannu gharraho laḷeo. Wuṛṛu ringannu tumba'u wisara sampaddi, Mawu Yesu nallimbuakka manga gharraho laḷeo udde wuṛṛu napaapia lai anambo n taumata apan maradda'a. ¹⁷Mawu Yesu na'ola'a sarangkanambone udde, wuṛṛu ringannu aroddi natipusse apa apan niwisara Nabi Yesaya, eteudde, "Itou mamasanna asasusa ng kite wuṛṛu mapapia n radda'i ite."

Manga taumata apan maapulu maola'a mallaṛṛenggennu Mawu Yesu

(Luk. 9:57-62)

¹⁸Manambo atonna taumata uapaḷiwutta Mawu Yesu. Su tempo Mawu Yesu naasilo simangitou nambo udde, Itou nandolokku mallaṛṛenggen-Ne malliu lumewessa rano. ¹⁹See sangkatou huru n agama nirumanta ringanni Tou wuṛṛu nabbisara, "Iamangnga Huru, ia'u maapulu tumantalongnga Iamangnga suapa n tampa Iamangnga umamatta!"

²⁰Mawu Yesu sinumimbakka, "Serigala pia lorṛangnge wuṛṛu manu'u winalanganna pia saḷakke, arawe Ana'u Taumata tawe tampa n lallallowanganne."

²¹See sangkatou mallalārrenggen-Ne waine nabbisara, "Iamangnga, wala'a ia'u mapule dorone mallabingngu iamangku."

²²Arawe Mawu Yesus sinumimbakka, "Tantalongke Sia'u, wurru wala'e taumata nate mallabingngu taumatane nate udde sassane."

Mawu Yesus napaalenakku tandi'a

(Mrk. 4:35-41; Luk. 8:22-25)

²³Mawu Yesus sinuma'ete saalanna wurru mallalārrenggen-Ne tinumantalongke su sampunna ringanni Tou. ²⁴Inarrombanganne tandi'a apan ma'ikkatta tinumiuppa su rano na'oma n sara saalanna ilalenggete n lua'a. Su tempo udde Mawu Yesus tanta'anna mattiilla. ²⁵Ne manga mallalārrenggen-Ne inaité ringanni Tou wurru namu'o Sitou. "Iamangnga! Ontole! Iite masilakate!" unni mangitou.

²⁶"Anio iamiu matta'utta?" unnu Mawu Yesus. "Pangangimanni amiu Sia'u mattulungnga!" Wua udde Mawu Yesus dirumarisikka wurru nandona anginna wurru rano udde. See rano udde nabbalite nalenakka atonna.

²⁷Manga mallalārrenggennu Mawu Yesus naherangnga. Imangitou nabbisara, "Taumata ereapa Itou indi, na'oma n sara anginna wurru lua'a tinumurrutta apulu-Ne!"

Mawu Yesus napaapia n rua ng katou apan niasuttannu gharraho laleo

(Mrk. 5:1-20; Luk. 8:26-39)

²⁸Mawu Yesus na'omate su samba'a n rano su wageangngu leta'u Gadara. Poiaroddi rua ng katou apan niasuttannu gharraho laleo nirumanta ringanni Tou. Rua ng katou udde tumanite marragissa, ana waugu udde tawe saran sangkatou warrani sumabbi isudde. ²⁹Imangitou sinumabangnga wuassu manga liangngu lalabinganna wurru mangngintuli, "Ana'u Mawu Ruata sarun olaannu ereapa iami? Apa I'o mappulute mannansara siami salaiwe taambe tempone?"

³⁰Tawe marau wua isudde, pia bawi manambo atonna tanta'anna madea'a anna. ³¹Manga gharraho laleo udde sinumalandete Mawu Yesus, "Amungkangngu I'o mandolokki ami sumabangnga, rolorra'a iami sumutta sulalummu manga wawi udde."

³²”Roote!” unnu Mawu Yesus. Manga gharraho laleo udde sinumabangke wuassu taumata darua udde, see sinumuttate sulaḷummu manga wawi. Wurru manga wawi udde lapiddu tinuma-ḷangnga wurru tinumumpa wuassu winggi n rampissa nabatukku rano, see nilumakkuba.

³³Mandariaga wawi udde tinumaḷangnga watukku soa, wurru nabatti’u anambo n arariadianna udde, wurru lai su ola’u taumata darua apan niasuttannu gharraho laleo udde. ³⁴Ne anambo n taumata su soa udde inaita naisasomba Mawu Yesus. Su tempo imangitou naasilo Mawu Yesus, imangitou sinumaḷande tadea’u Itou manantangngu wage-angngu leta’i mangitou.

Mawu Yesus napaapia n sangkatou lome

(Mrk. 2:1-12; Luk. 5:17-26)

9 Mawu Yesus sinuma’ete su saalanna, nalliu rano, nabelengnga watukku soa inariadianne. ²Isudde taumata nangapiddu sangkatou lome ringanni Tou apan uaḷallowangnga su wilatta. Su tempo Mawu Yesus naasilo manungku wahewa atonna pangangimanni mangitou udde, Itou nabbisara su taumata lome udde, ”Paasabare ana’u! Manga rosanu suete niampunganna.”

³Manga pira huru n agama apan isudde lai nabbisara sulaḷummu naungnga, ”Taumata indi mangngaḷuandaga Mawu Ruata!”

⁴Mawu Yesus masingkattu ringirḷanni mangitou, ne Itou nabbisarate, ”Anio ringirḷannu araḷeone aroddi? ⁵Suapa malluasanna: mabbisara, ’Rosanu suete niampunganna’, ara’e mabbisara, ’Darisikke wurru amatte’? ⁶Arawe orassa indi Ia’u mappaaḷiatta’a siamiu, manungku su wowo n runia indi Ana’u Taumata uataḷḷino mangampunga rosa.” See Mawu Yesus nabbisarate su taumata lome udde, ”Darisikke, lappute wilannu wurru apulete!”

⁷Taumata lome udde dirumarisikke wurru napulete su waḷene. ⁸Su tempo manga taumata naasilo olangnge udde, imangitou nata’utta wurru naddalote Mawu Ruata, ana waugu Mawu Ruata suete napaaḷiatta’u taḷḷino-Ne apan aroddi ahewalle su taumata.

Mawu Yesus namaggo si Matius

(Mrk. 2:13-17; Luk. 5:27-32)

⁹Wua udde Mawu Yesus nanantangke n tampa udde. Tantaḷanna u’amatta Itou naasilo sangkatou maddarorongnga wose, aranne Matius,

tantalanna ua'ianna su tampa mallaluru wose. Mawu Yesus nabbisara sitou, "Wette tantalongke Sia'u!"

Ne Matius nirumarisikke wuru tinumantalongke Mawu Yesus.

¹⁰Su tempo Mawu Yesus tantalanna u'anna su wale Matius, nirumantate manambo maddarorongnga wose wuru manga taumata apan sassunannu tumanangnge taumata laleo, u'anna su sampunna ringannu Mawu Yesus wuru mallalarrenggen-Ne. ¹¹Pia manga taumata n Farisi apan naasilo olangnge udde. See imangitou naiwalote mallalarrenggennu Mawu Yesus, "Anio hurunu u'anna su sampunna ringannu mallaluru wose wuru manga taumata laleo?"

¹²Mawu Yesus naaringikka aiwalo mangitou see sinumimbakka, "Taumata apan tawe maradda'a, tawe mappandumma doktere, tumba'u taumata apan maradda'a. ¹³Ringirra'o apa atappasannu wageangngu Wuke Susi indi: 'Ia'u mappandumma darangngu, waline sasamba wua-ssu winatangnga'. Ana waugu Ia'u nirumanta waline mamaggo taumata apan massunna ririne mapiate, ewe'e taumata apan sassunanna marusa'a."

Pattatatiakka su ola'u puasa

(Mrk. 2:18-22; Luk. 5:33-39)

¹⁴Wua udde mallalarrenggenni Yohanes Mananarani nirumanta ringannu Mawu Yesus. See imangitou naiwalo, "Anio iami wuru manga taumata n Farisi mappuasa arawe mallalarrenggenni lamangnga tawe?"

¹⁵Mawu Yesus sinumimbakka, "Ereapa su ringiranni amiu? Wotongngewe manga raho su andeangngu awingnga massusa naungnge amungkangngu maa'awingnga esakka ta'e udde su sampunna ringanni mangitou? Asinungka tawe! Arawe sarun a'omanna tempone maa'awingnga esakka udde alapanna wua dinganni mangitou. Su tempo udde nanattakke imangitou mappuasa.

¹⁶Tawe taumata mandappela laubba tabbe ringannu pirissu malarenessa wakku. Ana waugu malarenessa ipandappela udde sarun ma'urutta see manggesa'a laubba udde, see hesangnge maola'a lembo n wahewalla. ¹⁷Aroddi lai tawe taumata apan mandalinnu anggore wakku sulalummu pato'a m pisi tabbe. Ana waugu pato'a udde sarun mape-sangnga wuru mahohakka, see anggorene mabboso. Anggore wakku sarun ilalinna su pato'a apan wakku lai, tadea'u itarua sidutu mapia."

Ana'u piarra'u wale m pattatarramawuanna

Wawine apan nangindingnga Mawu Yesus

(Mrk. 5:21-43; Luk. 8:40-56)

¹⁸Tantalanna Mawu Yesus uahahatto ringannu manga malalarrenggenni Yohanes Mananarrani, nirumantate sangkatou piarra'u wale m pattatarramawuanna. Itou inumalintuda su saruannu Mawu Yesus wurru nabbisara, "Ana'u wawine wakkute nate. Arawe amungkangngu wotongnge, ranta'o wurru pamita sitou tadea'u itou mabiakka apia."

¹⁹Mawu Yesus dirumarisikke wurru inaita su sampunna ringannu mallalarrenggen-Ne mattudda n taumata udde.

²⁰⁻²¹Su pattangngannu lalanna sangkatou wawine apan maradda'a radda'u wawine mapulote dua su tonnane alannune, nirumanta nangundani Mawu Yesus wuassu liudde. Itou marringidda, "Sambaliate ia'u naa'indingnga jubahne, ia'u sarun mapia." See itou nangindingke pentakku jubah Mawu Yesus.

²²Orassa udde Mawu Yesus nanaile wurru naasilo wawine udde see nabbisara sitou, "Paatammuda, ana'u! Ana waugu i'o mangngimanna Sia'u, i'o mapiate!" Orassa udde lai wawine udde napia.

²³Wua udde Mawu Yesus na'omate su wale m piarra'u wale m pattatarramawuanna udde. Napawe itou naasilo mananalangngu musikku lumalalo wurru taumata nambo mangke maggio, ²⁴Itou nabbisara simangitou, "Sabangke iamiu sarangkanambone! Ana'a indi tawe nate; itou tumba'u mattiilla."

Imangitou sarangkanambone nilumage Mawu Yesus. ²⁵Napawe manga taumata udde sinumabangke, Mawu Yesus sinumutta sulalummu wabbo'a n ana'a udde wurru namita limane. See dirumarisikke ana'a wawine udde. ²⁶Watti'a udde tinumelengke su ahewallu wageangngu leta'a udde.

Mawu Yesus napaapia n rua ng katou wuta

²⁷Mawu Yesus nanantangke n tampa udde wurru su tangnga n dalanna pia rua ng katou wuta uatantalongnga Sitou. Itarua mangngintuli, "Ana'i Daud, akkanaawe iami!"

²⁸Napawe Mawu Yesus sinumutta sulalummu wale, taumata wuta darua udde nirumanta ringanni tou. Mawu Yesus naiwalo simangitou,

"Apa iamiu mangngimanna manungku Ia'u wotongnge mangapia si-raddua?"

"Mangngimanna Iamangnga!" Sasimbakki tarua.

²⁹See Mawu Yesus namita mata n tarua ringannu wisara-Ne, "Ana waugu iraddua mangngimanna, ariadite su ereapa aantimanni amiu."

³⁰Ne itarua naasilote. Mawu Yesus napanaungnga sitarua, tadea'u tawe mabbatti'u olangnge udde sisai-sai.

³¹Arawe imangitou inaitte nabbatti'u inolaannu Mawu Yesus su aławo'u wageangngu leta'a isudde.

Mawu Yesus napaapia n taumata mou

³²Su tempo rua ng katou udde napulete, sangkatou mou apan niasuttannu gharraho laleo niapidda ringannu Mawu Yesus. ³³Mawu Yesus nallimbuakke gharraho laleo udde wuṛru su orassa udde lai taumata udde naawisarate apia. Taumata nambo isudde nirumindu'a see nabbisara, "Iami taambe naasilo olangnge ereindi su Israel!"

³⁴Arawe manga taumata n Farisi nabbisara, "Ete manga tembonannu gharraho laleo nangagillu tarṛino Sitou mallimbuakka manga gharraho laleo udde."

Mawu Yesus inumakkanna naasilo taumata nambo

³⁵Aroddiwe Mawu Yesus inaitte namaliwutta wuassu soa sambau watukku soa waine wuṛru wuassu wanua sambau watukku wanua waine. Itou mangngarra'a su manga wale m pattatarṛamawuanna, wuṛru mam-masingkattu Watti'u Aḷaḷuassa su ola'u ereapa Mawu Ruata mama-renta ere sangkatou Ratu. Itou mapaapia n manga taumata apan uapendamma aławo'u radda'a wuṛru sangkullu wadangnga. ³⁶Su tempo Mawu Yesus naasilo taumata nambo udde, Itou inumakkanni mangitou, ana waugu imangitou tinumiangnga wuṛru lome, ere domba apan tawe mal-lalu'adde. ³⁷See Mawu Yesus nabbisara su manga mallalarṛenggen-Ne, "Pangitinganna manambo arawe mangangitingnge mattuḷungnga. ³⁸Ana waugu udde paddorongke su tatahuannu wailla udde tadea'u mando-lokku mangangitingnga iapa'itingnga."

Sire mapuŕo dua rasulle

(Mrk. 3:13-19; Luk. 6:12-16)

10 Su allo sambau Mawu Yesus namaggote mapuŕo dua mal-larŕenggen-Ne maammulla. See Itou nangonggolle n tarŕino si-mangitou mallimbuakka manga gharŕaho laŕeo wuŕru mangapia aŕawo'u hati n radda'a wuŕru aŕawo'u sangkullu wadangnga. ²Arannu sire mapuŕo dua rasulle eteudde: paarorone Simon (apan isassaggo lai Petrus) ringannu turŕangnge Andreas, see Yakobus ringannu turŕangnge Yohanes, eteudde aŕarŕana'i Zebedeus. ³Wua udde Filipus wuŕru Bartolomeus, see Tomas, see Matius, mallaluŕru wose, see Yakobus ana'i Alfeus, wuŕru Tadeus; ⁴see panginsueanne Simon, si Patriot wuŕru Yudas Iskariot apan nandaŕeo Mawu Yesus.

Manara manga rasulle

(Mrk. 6:7-13; Luk. 9:1-6)

⁵Sire mapuŕo dua rasulle udde nirolokke Mawu Yesus ringannu tatantiro ereindi, "Imbarŕangnga inai su wageangngu leta'u manga taumata apan waŕine Yahudi. Arie lai inai su manga soa taumata n Samaria. ⁶Arawe roote su wallattu taumata n Israel, nangillembosimangitou apan nialiŕwune. ⁷Waŕoa'e simangitou manungku Mawu Ruata malihakke lai mamarenta ere sangkatou Ratu. ⁸Paapia'e manga taumata apan maradda'a; pawanguna'e manga taumata apan nate; paapia'e manga taumata pia raddangnge paro apan maarantinna, wuŕru limbuarŕete manga gharŕaho laŕeo. Iamiu suete nanengkamma sarangkanambone udde ringannu tawe bawaekke. Nariaddi pangonggolla lai ringannu tawe maddorongnga bawaekke. ⁹Arie mangapiddu roitta wuŕlawanna, roitta saŕa'a, ara'e roitta witu'a. ¹⁰Arie lai mangapiddu pato'a m padaroronganna, ara'e laubba rua m parassa su amatannu, ara'e sapatu, ara'e ta'inna. Ana taumata apan mammanara sarun isuungnga hausanne.

¹¹Amungkangngu iamiu na'omate su soa ara'e su ampungnga, padea'e sangkatou apan maapulu manarimmatta siamiu. Atana'e ringannitou ma'oma n sara iamiu umamatta apia. ¹²Su tempo iamiu sumutta su waŕe, pabbisarate, 'Antimanna Mawu mangalamatta siamiu.' ¹³Amungkangngu manga taumata su waŕe udde manarimmatta siamiu, wala'e tabeanu udde matatana'a ringanni mangitou. Arawe amungkangngu imangitou tawe manarimmatta siamiu, welenga'a apia tabeanu udde. ¹⁴Amungkangngu pia baŕe ara'e soa apan madiri manarimmatti amiu

ara'e madiri maddaringikka siamiu, tantanga'a tampa udde wuṛṛu ton-tonga'a awu su paḷadu leddanu. ¹⁵Paanaunge! Su Allo ng Kiamatta, manga taumata n soa Sodom wuṛṛu Gomora malluasanna ampungannu Mawu Ruata wuassu manga taumata su soa udde!"


Pananansara apan sarun rumanta

(Mrk. 13:9-13; Luk. 21:12-17)

¹⁶"Daringirre paapia indi: Ia'u nandolokki amiu naal̃ihidda domba apan tawe auatanne su wallattu serigala maḷaṛṛaga. Iamiu rinone paatehamma ere atoanna wuṛṛu matuḷidda naungnge ere merpati. ¹⁷Paariaga, ana waugu iamiu sarun sametanna wuṛṛu iapaasaruanna su Mallar̃ruungngu Agama. Iamiu sarun sansaranna su manga waḷe m pattataṛṛamawuanna. ¹⁸Iamiu sarun iapidda su saruannu manga tembo-nanne wuṛṛu mararatu ana waugu iamiu mallalaṛṛenggeng-Ku. Wuṛṛu eteudde tempo ng kamiu mangagillu tatiala su ola'u riri'u si mangitou wuṛṛu su manga taumata apan tawe maaillaḷa Mawu Ruata. ¹⁹Arawe amungkangngu iamiu iapidda parikisanna, arie suminggawangnga su ola'u apa apan isimbakki amiu, ara'e ereapa iamiu sarun mabbatti'a. Ana waugu apa apan sarun iwisara ng kamiu udde, sarun iwaḷo siamiu su temponete. ²⁰Ana waugu mabbisara su tempo udde waḷinewe iamiu, arawe Ghar̃raho n Iamangnga su surga, uar̃rundiṅanna siamiu.

²¹Sarun mariaddi manungku taumata sarun manantillu tuṛṛangnge sassane iapapate. Wuṛṛu udde lai sarun mariaddi su wallattu iamangnga wuṛṛu anangnge. Al̃ar̃rana'a sarun lumawangnga hagurangnge, wuṛṛu manantilli mangitou iapapate. ²²Iamiu sarun iaarantinnu anambo n taumata ana waugu iamiu mallalaṛṛenggeng-Ku. Arawe taumata apan matataṛṛangnga ma'oma n sara panginsueanne sarun iapaaralukka. ²³Amungkangngu iamiu pappateanna su soa sambau, taḷangnga su soa waine. Ia'u mabbalo siamiu: Tantaḷanna iamiu taambe namaḷintaddu alaḷwo'u soa su Israel, Ana'u Taumata nirumantate.

²⁴Al̃ar̃rana'a si'ola tawe maasampaḷiu hurune, wuṛṛu mangangimbe tawe maasampaḷiu mawune. ²⁵Nar̃rinote amungkangngu sangkatou ana'a si'ola maola'a ere hurune, wuṛṛu sangkatou mangangimbe maola'a ere mawune. Amungkangngu pa'ihaguranganna su waḷe aranne ete ni-saggo Beelzebul, lembonete laḷor̃ro n waḷene. Imangitou sarun ong-goḷannu aranna araḷeoane lai!"



Manu'a sanggelokka (10:29)

Ata'utte Mawu Ruata

(Luk. 12:2-7)

²⁶"Ariewe paata'uttu taumata. Tawe apa apan uawuni, apan tawe asiloanna, wuṛṛu tawedu apa apan iaadappingnga apan tawe asingkatanna. ²⁷Apa apan Ta'u iwaḷo siamiu su marandumma, ṛinone isule ng kamiu apia su semakku allo. Wuṛṛu apa apan isasaḷimburingnga su taḷinganu, waḷoa'a udde su awadaalla. ²⁸Arie mata'utti mangitou apan mammate wadangnga, arawe tawe taṛṛino mamate niawa. Ata'utte Mawu Ruata apan uataṛṛino mamate, mapia ete wadangnga aroddi lai ṛimuudda sulaḷummu naraka. ²⁹Sangelokka darua aawalliannu sambau roitta apan addio'anne. Salaiwe aroddi tawe saran sambau manawo su leta'a amunkangngu tawe ipaapulu n Iamangngu. ³⁰Reengannu uta'a su puanu suete nireengnga anambone. ³¹Ana waugu udde, arie mata'utta! Iamiu lembo maareganne wuassu sanggelokka!"

Mangnga'u Mawu Yesus su saruannu awadaalla

(Luk. 12:8-9)

³²"Isai-sai manga'u su saruannu awadaalla manungku itou malalaṛṛenggeng-Ku, Ia'u lai sarun manga'u sitou su saruannu Iamangku su surga. ³³Arawe isai-sai massinaada su saruannu awadaalla manungku

itou mallalarřenggeng-Ku, Ia'u lai sarun massinaadi tou su saruannu Iamangku su surga."

Wařine paddarame ewe'e pasaseetta

(Luk. 12:51-53, 14:26-27)

³⁴"Arie iamiu massunna manungku Ia'u mangapiddu paddarame su runia indi. Ia'u tawe mangapiddu paddarame, arawe pasaseetta. ³⁵Ia'u nirumanta na'ola'a ana'a esakka lumawangnga iamangnge, ana'a wawine lumawangnga inangngene, wuřru mananambo lai wawine lumawangnga la'iananne wawine. ³⁶Ore, apa apan sarun maola'a seetta ahewalanne, eteudde lařorřo n waře udde sassane.

³⁷Taumata apan marangngu iamangnge ara'e inangngene manampaliu wuassia-U tawe maola'a mallalarřenggeng-Ku. Aroddi lai taumata apan marangngu anangnge esakka ara'e wawine manampaliu wuassia-U. ³⁸Wuřru taumata apan madiri mamasanna alu arussane wuřru tuman-talongnga Sia'u, tawe maola'a mallalarřenggeng-Ku. ³⁹Taumata apan tumba'u mattinau wiakke, sarun awuřianu wiakke, arawe taumata apan awuřianu wiakke ana waugu tuttuřrutta Sia'u, sarun maasomba wiakke."

Lařantakku pallařagu apan mapia

(Mrk. 9:41)

⁴⁰"Taumata apan manarimmatti iamiu, manarimmatta Sia'u lai. Wuřru taumata manarimmatta Sia'u, manarimmatta Sitou lai apan suete nandolo-U. ⁴¹Taumata apan nanarimmattu nabi ana waugu itou nabi, sarun manarimmattu lařantakke ere sangkatou nabi. Wuřru isai apan manarimmattu sangkatou apan mapia ana waugu itou mapia, sarun manengkamma lařantakku sangkatou taumata apan mapia. ⁴²Isai-sai mappa'inumma, salaiwe tumba'u ua'e tallangnga, su sangkatou su wal-lattu manga taumata asiangnga indi, ana waugu itou mallalarřenggeng-Ku, pangimanna itou sarun manengkamma lařantakke!"

Darolorřanni Yohanes Mananařrani

(Luk. 7:18-35)

11 Napawe Mawu Yesus suete nanantiro sire mapuřo dua mallalarřenggen-Ne, Itou nanantangke n tampa udde. Itou inaitē nangarřa'a wuřru nabbatti'u tanata Mawu Ruata su ařawo'u manga soa apan marani isudde.

²Yohanes Mananarrani apan tantaḷanna uarṛuumanna naaringikka su ola'u pamamanara Mawu Yesus Kristus. See itou nandolokke manga pira mallaḷarṛenggenne ringannu Mawu Yesus niapaiwaḷo, ³"Ete Ia-mangnga taumata apan sarun rumanta ere suete pina'ire Mawu Ruata, ara'e iami sarun marṛado lai taumata waine?"

⁴Mawu Yesus sinumimbakka, "Pabelengke ringanni Yohanes wuṛru waḷoa'e apa apan suete niaringiṛṛanna wuṛru niasiloanni amiu. ⁵Taumata wuta naasilo, taumata lome naa'amatta, taumata raddangnge paro napia, taumata wengella naaringikka, taumata nate nabbiakka apia, wuṛru Watti'u Aḷaḷuassa wuassu Mawu Ruata niapasingkatta su manga taumata asiangnga. ⁶Laḷumanna'a su taumata tawe pinangiananne su ipanola'u!"

⁷Napawe raloḷorṛanni Yohanes nabelengke, Mawu Yesus nannattakke nabbisara su taumata nambo su ola'i Yohanes, wisara-Ne, "Iamiu inai su wadda'a ma'ellega apa? Sangkuḷappa waḷabukka itat-talla'u anginna? ⁸Iamiu inai ma'ellega apa? Sangkatou apan uapedetta mapia? Manga taumata apan uapedetta aroddi uatana'a su tampa n araratuanna! ⁹Nariaddi anio iamiu inai su wadda'a? Inai ma'ellega sangkatou nabi? Atonna itou nangillembo wuassu sangkatou nabi. ¹⁰Ana waugu ete Yohanes udde apan isassaggo su wageangngu Wuke Susi ereindi,

'Ete indi raloḷorṛang-Ku, unnu Mawu Ruata,
Ia'u nandolokki tou dorone wuassi'o
tadea'u itou mamu'a laḷan-Nu.'

¹¹Naunge! Su runia indi taambe sangkatou taumata nangillembo wuassi Yohanes Mananarrani. Salaiwe aroddi taumata apan addio'anne wuassu wallattu aḷarṛana'u Mawu Ruata, nanampaḷiu wuassi Yohanes. ¹²Ro'e n Yohanes namasingkattu wattingnge udde na'oma n sara orassa indi, aḷarṛana'u Mawu Ruata ipaseettu manga taumata apan maapulu mamarenta ringannu ararṛagissa. ¹³Na'oma n sara raranta n Yohanes Mananarrani, anambo n tita Musa wuṛru manga aḷarṛa'u manga nabi namasingkatta su ola'u apa apan rinone mariaddi. ¹⁴Wuṛru amungkangngu iamiu mangngimanna, Yohanes uddewe Elia, apan darantane suete niapasingkatta. ¹⁵Amungkangngu pia taḷinga, paddaringikka!

¹⁶Ringannu apa sarun Ta'u isumandingnga manga taumata su tempo indi? Imangitou ere manga aḷarṛana'a apan ua'ianna su pasakka. Sambageanganna u'ui su ammuḷanna waine, ¹⁷'Iami mangngantari aantari n laḷuassa siamiu, arawe iamiu madiri massaḷaingnga. Iami mangngantari aantari n patatampungnga, wuṛru iamiu madiri lumuai!' ¹⁸Yohanes nirumanta – itou mappuasa wuṛru tawe ma'inumma anggore; wuṛru manga taumata mabbisara, 'Itou niasuttannu setanna!' ¹⁹Orassa indi Ana'u Taumata, nirumanta – Itou u'anna wuṛru ma'inumma; see manga tau-

mata mabbisara, 'Pa'ellega taumata udde! Waliu, tarra wu'anna, hawene maddarorongnga wose, wuṛṛu hawene taumata marosa.' Salaiwe aroddi, apapande Mawu Ruata niatialanna wuassu manga wuane."

Manga soa apan madiri mangngimanna

(Luk. 10:13-15)

²⁰See Mawu Yesus nanattakke mapaasala manga soa, suapa isudde Itou asokkanne ma'ola'a alaṛṛindu'a. Ana waugu manga taumata su soa udde madiri mawaḷu wuassu paddarosa mangitou. ²¹"Nasilakate iamiu Korazim! Wuṛṛu nasilakate lai iamiu, Betsaida! Unnu wisara manga alaṛṛindu'a apan niola'a su pattangnganni amiu suete niola'a su Tirus wuṛṛu Sidon, asinungka manga taumata poiarddi maḷannute nawaḷu wuassu paddarosa mangitou wuṛṛu suete nallurṛe n laubbu massusa, see nandenote n awu su pua mangitou. ²²Paanaunge, su Allo ng Kiamatta, manga taumata n Tirus wuṛṛu Sidon malluasanna ampungannu Mawu Ruata wuassi amiu. ²³Wuṛṛu iamiu, Kapernaum! Apa iamiu sarun iapaatangakka ma'oma n sara surga? Tawe! Ewe'e iamiu sarun iwontolla su naraka! Ana waugu unnu wisara manga alaṛṛindu'a apan niola'a su pattangnganni amiu udde suete niola'a su Sodom, saran orassa indi ta'e pia Sodom! ²⁴Paanaunge, su Allo ng Kiamatta, taumata n Sodom malluasanna ampungannu Mawu Ruata wuassi amiu!"

Rantate ringang-Ku

(Luk. 10:21-22)

²⁵Su tempo udde Mawu Yesus u'aliomanna, "Iamangnga Mawu apan uataṛṛino langitta wuṛṛu runia! Ia'u maadiangkamanna Si'o ana waugu sarangkanambone udde niadapping-Ngu wuassu manga taumata apan pande wuṛṛu pia asingkanne, arawe I'o manualaga su manga taumata apan tawe si'olane. ²⁶Eteudde maaluassa naungngu Iamangnga."

²⁷See Mawu Yesus nabbisara, "Sarangkanambone suete tinantillu Mawu Iamangnga Sia'u. Tawe sangkatou masingkattu Ana'a, tumba'u Mawu Iamangnga. Tawedu lai apan masingkattu Mawu Iamangnga, tumba'u Ana'a, wuṛṛu manga taumata, ete sisai Ana'a udde mamasingkattu Mawu Iamangnga.

²⁸Rantate ringang-Ku iamiu sarangkanambone apan nalotakke, wuṛṛu uapendamma winabbawa mawakkatta; Ia'u sarun mappaaule ng kamiu. ²⁹Turṛutte parenta-U wuṛṛu pattannote pallaḷagu-U. Ana waugu Ia'u indi masarṛionto'a wuṛṛu mawawo naungnge, ne iamiu sarun maa-

pendamma اساسunge atatahulandimma. ³⁰Ana waugu manga parenta-U maaluuassa, wuṛru winabbawa apan Ta'u iapapasanna si'o, marṛanna."

Aiwaḷo su ola'u allo n Sabatta

(Mrk. 2:23-28; Luk. 6:1-5)

12 Su sambau allo n Sabatta, su tempo Mawu Yesus sinumabbi sambau waillu gandumma, mallalarṛenggen-Ne nanatakke mangngitingnga gandumma, see niante ana waugu malunussa. ²Su tempo manga taumata n Farisi naasilo udde, imangitou nabbisara Mawu Yesus, "Pa'ellega! manga mallalarṛenggen-Nu lullawangnga tita n agama ng kite ringannu ma'ola'a inolaanna apan isassingada su allo n Sabatta."

³Mawu Yesus sinumimbakka, "Iamiu taambe naawasa saran paa-ssa su ola'u apa apan niola'i Daud su tempo itou wuṛru manga taumatane malunussa? ⁴Itou sinumutta sulalummu Waḷe Mawu Ruata; see inumanna roti apan suete niola'a sasamba su Mawu Ruata. Sumbaḷi tumuṛruttu tita n agama ng kite, itou wuṛru manga taumatane tawe wotongnge umanna roti udde – tumba'u manga imam udde wotongnge. ⁵Ara'e iamiu taambe naawasa sulalummu tita Musa manungku suapa n allo n Sabatta manga imam apan mammanara su Waḷe Mawu, lullawangnga atorannu allo n Sabatta, arawe tawe iapaasaḷa? ⁶Naunge apa apan iwabbisara-U indi: isindi pia nangillembo ahewaḷanne wuassu Waḷe Mawu. ⁷Sulalummu Wuke Susi uaworretta: Ete paa'akanna apan ipaapulu-U, waḷine sasamba wuassu winatangnga. Amungkangngu iamiu atonna-tonna maasunna wisara indi, natantuna iamiu tawe mapaasaḷa manga taumata apan tawe saḷane. ⁸Ana waugu Ana'u Taumata uaagassa allo n Sabatta."

Taumata limane lome samba'a

(Mrk. 3:1-6; Luk. 6:6-11)

⁹Mawu Yesus nanantangke n tampa udde see inaita su sambau waḷe m pattataṛramawuanna. ¹⁰Isudde pia sangkatou taumata limane lome samba'a. Manga pira taumata apan madea'a pasasaḷa Mawu Yesus, naiwaḷo Sitou, "Apa wotongnge mapaapia n taumata su allo n Sabatta?"

¹¹Mawu Yesus sinumimbakka, "Unnu wisara pia sangkatou wuassu wallatti amiu uatahuanna domba sambau, wuṛru su allo n Sabatta domba udde nanawo su loṛrangnga apan malaḷumma; apa tatahuannu domba udde tawe madea'a mamatunna domba udde wuassu loṛrangnga?"

¹²Ne, taumata maareganne wuassu domba! Nariaddi amungkangngu aroddi wotongnge mantulungngu taumata su allo n Sabatta.” ¹³Wua udde Mawu Yesus nabbisarate taumata apan limane lome samba’a udde, ”Uluṛṛa’e limanu.”

Taumata udde nangulukke n limane, see lima udde napiate ere lai limane samba’a. ¹⁴Arawe manga taumata n Farisi nanantangngu waḷe m pattataṛṛamawuanna udde, see na’irete mamate Mawu Yesus.

Raloḷoṛṛanna apan nipile Mawu Ruata

¹⁵Mawu Yesus masingkatte manungku manga taumata n Farisi udde pia ṛingiṛṛanna laḷeo su riri n Tou. Nariaddi Itou inaite wuassu tampa udde wuṛṛu manambo taumata uatantalongnga Sitou. See Itou napaapia n manga taumata apan maradda’a. ¹⁶Arawe Itou naningaddi mangitou mamasingkati Tou su taumata waine. ¹⁷Ringannu aroddi nariaddite apa apan suete niwisara Mawu Ruata si Nabi Yesaya,

¹⁸”Ete indi raloḷoṛṛang-Ku apan Ta’u pinile

taumata apan arangnguang-Ku wuṛṛu natataṛṛino su naung-Ku.

Ghaṛṛaho-U sarun ionggolla Sitou,

atatuḷi-U sarun iapasingkatta Sitou su manga pabbawalaga.

¹⁹Itou sarun tawe matatiakka ara’e mangngintuḷi,

ara’e mabbisara su manga laḷanna.

²⁰Iawanna apan uala’ukka tawe paddianni Tou,

soḷo apan u’odo’a tawe padduman-Ne.

Itou sarun mammanara ma’oma n sara atatuḷidda a’omanna;

²¹ aḷawo’u pabbawalaga sarun pia antimma Sitou.”

Mawu Yesus wuṛṛu Beelzebul

(Mrk. 3:20-30; Luk. 11:14-23)

²²Wua udde niapidda ringannu Mawu Yesus sangkatou wuta wuṛṛu mou ana waugu niintaṛṛoannu ghaṛṛaho laḷeo. Mawu Yesus napaapia n taumata udde na’oma n sara itou naawisarate wuṛṛu naasilote. ²³Anambo n taumata naherangnga wuṛṛu nabbisara, ”Asinungka Itou indi Ana’i Daud apan suete pina’ire udde?”

²⁴Su tempo manga taumata n Farisi naaringikka aroddi, imangitou sinumimbakka, ”Taumata indi tumba’u wotongnge mallimbuakka ghaṛṛaho laḷeo, ana waugu Beelzebul, tembonannu manga ghaṛṛaho laḷeo, suete nangagillu taṛṛino udde Sitou.”

²⁵Mawu Yesus naasingkatta ringirannu manga taumata n Farisi udde. Ne Itou nabbisarate si mangitou, "Amungkangngu sambau araratuanna nattaŕei naola'a pira ng kawageanganna apan sarun pasi passee-tta, araratuanna udde tawe maŕannu. Wuŕru sambau wanua ara'e laŕoŕro n waŕe sambau apan uataae wuŕru uasaseetta sangkatou ringannu sangkatou, sarun mawinasa. ²⁶Aroddi lai sulaŕummu araratuannu Setanna; amungkangngu wageangnge sambau mallimbuakka wageangnge waine, ne araratuannu Setanna udde natahiate wuŕru nahohakke. ²⁷Iamiu mabbisara manungku Ia'u mallimbuakka ghaŕraho laŕeo ana waugu taŕŕino n Beelzebul. Amungkangngu aroddi ringannu taŕŕino n sai mal-laŕaŕŕenggennu mallimbuakka ghaŕraho laŕeo. Mallaŕaŕŕenggennu udde sassane napaliatta'a manungku iamiu nassaŕa! ²⁸Arawe Ia'u mallimbuakka ghaŕraho laŕeo ringannu taŕŕino Mawu Ruata. Wuŕru udde atap-pasanne manungku Mawu Ruata mannattakke mamarenta su pattangnganni amiu.

²⁹Ereapa taumata wotongnge maasutta sulaŕummu waŕe n sangkatou apan matohassa wuŕru mangarŕo darotongnge, amung-kangngu itou tawe maŕrapussa dorone taumata matohassa udde? Wua udde itou wotongngete mangarŕo darotongnge.

³⁰Taumata apan tawe manamba'a Sia'u atonna-tonna itou lullawangnga Sia'u. Wuŕru taumata apan tawe mallaliima Sia'u atonna-tonna itou manggohakku manara-U! ³¹Ana waugu udde, ana see i'o masingkatta, amungkangngu taumata ma'ola'a rosa wuŕru mabbatti'u aŕuandaga, itou wotongnge aampunganna! Arawe amungkangngu itou mangngaddio'a Ghaŕraho Mawu Ruata, itou tawe aampunganna! ³²Amungkangngu taumata mabbisara wisara tatompola su Ana'u Taumata, itou wotongnge aampunganna, arawe amungkangngu itou mangngaddio'a Ghaŕraho Mawu Ruata, itou tawe aampunganna, mapia orassa indi ara'e lai su panginsueanne!"

Alu ringannu manga wuane

(Luk. 6:43-45)

³³"Tadea'u maasomba wua apan mapia, alune rinone masuwukka. Amungkangngu alune maŕŕisitta, wuane lai laŕeo. Masuwukka ara'e maŕŕisitta alu udde asingkatanna wuassu wuane. ³⁴Iamiu taumata laŕeo, ereapa wotongnge iamiu maasaggo n aŕawo'u inolaanna apan mapia amungkangngu iamiu laŕeo? Apa apan niwisara moŕŕongnga udde sinumabangnga wuassu laŕummu naungnga! ³⁵Taumata apan mapia mannaggo n inolaanna apan mapia, ana waugu itou napene n apapia.

³⁶Nariaddi, paanaunge: su Allo ng Kiamatta, sangkatou-sangkatou rinone sumimbakka manga wisara apan tawe gunane apan suete niwisara n tou. ³⁷Ana waugu wisara ng kamiu sassane apan sarun ipaatta iparrawessa apa i'o nassaḷa ara'e tawe."

Manga taumata n Farisi maddorongnga Mawu Yesus ma'ola'a aḷarḷindu'a

(*Mrk. 8:11-12; Luk. 11:29-32*)

³⁸Wua udde manga pira huru n agama wurru manga taumata n Farisi nabbisara, "Iamangnga Huru, iami maapulu ma'ellega Iamangnga Huru ma'ola'a aḷarḷindu'a."

³⁹"Araḷeo wurru aḷawangnga eteapa, manga taumata su tempo indi!" sasimbakku Mawu Yesus. "Iamiu maddorongnga Ia'u ma'ola'a aḷarḷindu'a? Iamiu tawe onggolannu sambau aḷarḷindu'a udde, tumba'u aḷarḷindu'a wuassi Nabi Yunus. ⁴⁰Yunus uatana'a tallu allo tallu ḷabbi sulaḷummu tiannu inassa masallaka. Aroddi lai Ana'u Taumata sarun matana'a tallu allo tallu ḷabbi sulaḷummu tiannu runia. ⁴¹Su Allo ng Kiamatta, laḷorḷo Niniwe sarun mabangunna su sambau ringannu manga taumata n tempo indi wurru mapaasaḷa mangitou. Ana waugu manga taumata Niniwe udde nawaḷu wuassu rosa mangitou, su tempo Yunus nannase simangitou. Arawe orassa indi pia maggewaḷanne wuassi Yunus! ⁴²Su tempo Allo ng Kiamatta, ratu wuassu wanua Timukka sarun mabangunna su sampunna ringannu manga taumata n tempo indi wurru mapaasaḷa mangitou. Ana waugu tadea'u maddaringikka aḷarḷa'i Salomo apan pande, ratu udde na'ola'a amatanna apan marau atonna wuassu pentakku runia. Arawe isindi orassa indi piaddu maggewaḷanne wuassi Salomo!"

Pabbawelengngu gharḷaho laḷeo

(*Luk. 11:24-26*)

⁴³"Napawe gharḷaho laḷeo nanantangke n sangkatou, gharḷaho udde namaḷiwutte manga tampa apan mamara, madea'a tampa pangngilloḷoanna arawe itou tawe naasomba. ⁴⁴Ana waugu udde itou nabbisara, 'Ia'u sarun mabelengnga su waḷe apan suete nitantangku.' Su tempo itou na'omate isudde, waḷe udde tawe lorḷone, waresi wurru uaa-tokka. ⁴⁵See itou inaita wurru nangapiddu pitu gharḷaho waine apan nangillembo n araḷeone wuassi tou. Wua udde imangitou sinumuttate sulaḷummu taumata udde, see natana'a isudde. Wurru panginsueanne

taumata udde niatambanna araḷeone wuassu paarorone. Udde lai sarun mariaddi su manga taumata laḷeo su tempo indi."

Inangnga wuṛṛu manga tuṛrangngu Mawu Yesus

(Mrk. 3:31-35; Luk. 8:19-21)

⁴⁶Tantaḷanna Mawu Yesus ta'e uahahatto ringannu taumata nambo udde, nirumantate inangnga wuṛṛu manga tuṛrang-Nge. Imangitou uarisikka su liudde lapiddu madea'a ana see wotongnge maahahatto n Tou.

⁴⁷Sangkatou wuassu wallattu taumata nambo udde nabbisara su Mawu Yesus, "Iamangnga, inangnga wuṛṛu tuṛrangngi Iamangnga wowa su liudde. Imangitou maapulu maggahatto n Iamangnga."

⁴⁸See Mawu Yesus sinumimbakka, "Isai inang-Ku? Isai manga tuṛrang-Ku?" ⁴⁹See Itou nanta'e manga mallalaṛṛenggen-Ne wuṛṛu nabbisara, "Indi inangnga wuṛṛu manga tuṛrang-Ku. ⁵⁰Taumata apan ma'ola'a apulu n Iamangku su surga, itou tuṛrang-Ku esakka, tuṛrang-Ku wawine wuṛṛu inang-Ku."

Sasumandingngu sangkatou mangangasi'a

(Mrk. 4:1-9; Luk. 8:4-8)

13 Su allo udde lai Mawu Yesus nanantangke. n waḷe udde see inaita su winggi n rano wuṛṛu inuma'iante isudde. ²Manambo atonna taumata uaammulla mamaḷiwutta Mawu Yesus, ana waugu udde Itou inaita inuma'ianna su saalanna, arawe taumata nambo udde pasirarisikka su apanne. ³See Mawu Yesus nangaṛṛa'e n aḷawo'u aḷaṛṛa'a simangitou ringannu sasumandingnga.

"Sangkatou mabbawailla inaita mangasi'u wualanna," aroddiwe Mawu Yesus nanattakku watti'i Tou. ⁴"Su tempo itou mangngasi'a, pia bualanna nanawo su laḷanna. See manu'a nirumanta wuṛṛu wualanna udde nianni tou na'oma n sara nasue. ⁵Pia laiddu nanawo su tampa mawatu, apan letangnge addio'a. Manga wualanna udde lapiddu tinumuwo ana waugu mattuḷungnga letangnge. ⁶Arawe su orassu matannallo matanggakke, manga tatuwo n wualanna udde mannattakke tinumolangnga, ana see naṛranggu wuṛṛu nate ana waugu ṛamunne tawe nusippa maḷaḷumma. ⁷Pia lai wualanna nanawo su tangnga n ahuranganna roaanna. Ahuranganna roaanna udde tinumuwo wuṛṛu namuḷissa tatuwo n wualanna udde na'oma n sara nate. ⁸Arawe pia lai wualanna apan nanawo su leta'a masuwukka, see nabbua; piaddu maṛṛasutta, piaddu anummu puḷo, wuṛṛu pia lai paatallu m puḷone anambone."



Wua n gandumma (13:4)

⁹Napawe suete nabbatti'u sasumandingnga udde, Mawu Yesus nabbi-sara, "Amunkangngu pia talinga paddaringikka!"

Anio Mawu Yesus mappaattu sasumandingnga

(Mrk. 4:10-12; Luk. 8:9-10)

¹⁰Wua udde mallalarrenggennu Mawu Yesus nirumanta naiwalo Sitou, "Anio Iamangnga mappaattu sasumandingnga amunkangngu mabbisara ringannu taumata nambo udde?"

¹¹Mawu Yesus sinumimbakka, "Ana waugu iamiu suete niongoḷannu alamatta ipani'attu addapingnga su ola'u ereapa Mawu Ruata mamarenta, arawe imangitou tawe niongoḷanna. ¹²Ana waugu taumata apan uatahuante, sarun ongoḷanna lai lembo n anamboanne, wurru itou sarun lebbeanna. Arawe taumata apan tawe tatahuananne, tumba'u addio'a lai sitou sarun anuanna. ¹³Ana waugu udde Ia'u mappaattu sasumandingnga amunkangngu maggahatto n taumata nambo, ana waugu imangitou ma'ellega, arawe ere taumata apan tawe maasilo; imangitou maddaringikka arawe ere taumata wengella, wurru tawe maasunna. ¹⁴Ringannu udde nariaddite apa apan suete niwalo Nabi Yesaya,

'Mawu Ruata nabbisara:

Imangitou sarun sidutu uararingikka

arawe tawe maasunna;
 imangitou sarun sidutu mannutukka
 arawe tawe maasingkatta apa apan nariaddi.
¹⁵Ana waugu ringirranu taumata indi nalumute
 talinga mangitou nabbengelle wuṛṛu mata mangitou tawe
 maasilo.
 Indi mariaddi tadea'u mata mangitou tawe maasilo
 talinga mangitou tawe maaringikka,
 ringirranni mangitou tawe maasunna
 wuṛṛu arie mabelengnga ringang-Ku,
 see Ia'u mapaapia mangitou.'"

¹⁶"Arawe auntunganna eteapa siamiu," unnu Mawu Yesus su
 mallalarṛenggen-Ne, "ana waugu iamiu atonna-tonna suete naasilo
 wuṛṛu naaringikka. ¹⁷Paanaunge, manambo nabi wuṛṛu taumata apan
 tuttuṛṛutta Mawu Ruata maapulu ma'ellega apa apan a'ellehanni amiu
 orassa indi, arawe imangitou tawe maasilo. Imangitou maapulu madda-
 ringikka apa apan raddaringirranni amiu su orassa indi, arawe imangitou
 tawe maaringikka."

Mawu Yesus mannaḷa'a n sasumandingngu sangkatou mangangasi'a

(Mrk. 4:13-20; Luk. 8:11-15)

¹⁸"Daringirrete apa atappasannu sasumandingngu sangkatou manga-
 ngasi'a udde. ¹⁹Wualanna apan nanawo su laḷanna isassumandingnga su
 taumata apan naaringikka watti'u Mawu Ruata mamarenta, arawe itou
 tawe naasunna. Setanna udde nirumanta wuṛṛu nangarṛo wualanna apan
 suete niasi'a sulaḷummu naungngi mangitou. ²⁰Wualanna apan nanawo
 su leta'a mawatu, isassumandingnga su taumata apan maddaringikka
 watti'a udde wuṛṛu lapiddu nangngimanna ringannu naungnga maḷuassa.
²¹Arawe watti'a udde tawe narṛamutta sulaḷummu naungngi mangitou,
 na'oma n sara tawe tinumuwo maḷannu. Aroddi imangitou naasomba
 asasusa ara'e asasansara ana waugu watti'a udde, imangitou lapiddu
 nassinaadda. ²²Wualanna apan nanawo su tangnga n ahuranganna
 roaanna, isassumandingnga su taumata apan uararingikka watti'a udde,
 arawe sussingawangnga su ola'u wiakki mangitou wuṛṛu maapulu
 mabbiakka su aḷaḷuassa. Ana waugu udde watti'a wuassu Mawu Ruata
 nawuḷi wuassu naungngi mangitou na'oma n sara tawe buane. ²³Wuṛṛu
 wualanna apan nanawo su leta'a masuwukka, isassumandingnga su
 taumata apan maddaringikka watti'a udde wuṛṛu maasunna. Imangitou



Nannaŋo pia larangne (13:22)

nabbua manambo, piaddu maŋrasutta, piaddu anummu puŋo wuŋru pia lai wuane paatallu m puŋo anambone.”

Sasumandingngu akke su wallattu gandumma

²⁴Mawu Yesus nabbatti’u lai sambau sasumandingnga su taumata nambo, wisara-Ne, ”Amunkangngu Mawu Ruata mamarenta, tuŋadane naŋihidda ere sasumandingnga indi: Sangkatou mabbawailla nangasi’u wualanna apan mapia su wawaiŋanne. ²⁵Su ɾabbi sambau, su tempo anambo n taumata mattiille, seettu mabbawailla udde nirumanta nangasi’u wualannu akke su wallattu gandumma udde, see napuŋe. ²⁶Su tempo sinuananna udde tinumuwote wuŋru manga raene nanattakke sus-sabangnga, niasiloante lai manga akke udde. ²⁷See manga taumata n sewa mabbawailla udde nirumanta su mawu n wailla udde wuŋru nabbisara, ’Mawu, talawe Mawu nangasi’u wualanna apan mapia su waillu Mawu? Naola’a ereapa na’oma n sara pia akke isudde?’ ²⁸Mabbawailla udde sinumimbakka, ’Udde inolaannu seetta.’ Ana see manga taumata n sewa udde naiwaŋo apia, ’Mawu maapulu, iami inai mallele akke udde?’ ²⁹’Arie,’ sasimbakku mawu udde, ’Ana waugu amunkangngu akke udde leleanna, gandumma lai maŋele. ³⁰Wala’e akke udde tumuwo su sampunna ma’oma n sara orassu pangangitingnga. Paŋrado ia’u mabbisara su manga taumata apan mangitingnga: Ammuŋa’a rorone manga akke udde, wa’issa see tutungnga. Wua udde ammuŋa’a gandumma, see sahi-punna sulaŋummu waŋingkakka.’”

Sasumandingngu watu n sawi

(Mrk. 4:30-32; Luk. 13:18-19)

³¹Mawu Yesus nabbatti'e n lai sambau sasumandingnga su taumata nambo, wisara-Ne, "Napawe Mawu Ruata mamarenta, olangnge ere sasumandingnga indi: Sambau wualannu sawi nianu n sangkatou, see nisuanne su wailli tou. ³²Watu n sawi eteudde wualanna apan addio'anne. Arawe amungkangngu tinumuwote, itou maola'a ahewalanne su wallattu alawo'u sinuananna. Itou maola'a alu, ma'oma n sara manga manu'u winalanganna massalakka su manga rannane."

Sasumandingngu ragi

(Luk. 13:20-21)

³³Pia sambau sasumandingnga waine, apan niwatti'u Mawu Yesus su taumata nambo. "Napawe Mawu Ruata mamarenta, olangnge ere ragi apan nipaattu sangkatou wawine see niompella ringannu taponna appattu pulo su literrene na'oma n sara nalukakka mapia!"

Anio Mawu Yesus mappaattu sasumandingnga

(Mrk. 4:33-34)

³⁴Sarangkanambone niarra'u Mawu Yesus su taumata nambo sidutu mappaattu sasumandingnga. ³⁵Ringannu aroddi nariaddite apa apan niwalo nabi,

"Ia'u mappaattu sasumandingnga amungkangngu
maggahatto mangitou;
Ia'u sarun mabbatti'u inolaanna apan uawuni
ro'e n arariadi n runia indi."

Mawu Yesus nana'a n sasumandingngu akke su wallattu gandumma

³⁶Wua udde Mawu Yesus nanantangke n taumata nambo udde. See sinumutta su wale. Mallalarrenggen-Ne nirumanta wurru nabbisara, "Tala'a'o siami sasumandingngu akke su wallattu gandumma udde."

³⁷Mawu Yesus sinumimbakka, "Taumata apan mangngasi'u wualanna apan mapia udde, eteudde Ana'u Taumata. ³⁸Wailla eteudde

runia indi. Wualanna apan mapia, eteudde manga taumata apan nasutta aḷarḷana'u Mawu Ruata. Ahuranganna akke, eteudde manga taumata uasamba'a Setanna. ³⁹Seetta apan nangasi'u akke, eteudde Setanna. Tempo mangitingnga eteudde Allo ng Kiamatta, wuḷḷu manga taumata apan mangitingnga, eteudde manga mala'ekattu Mawu Ruata. ⁴⁰Su ereapa manga akke iammulla wuḷḷu tutungannu putungnga, aroddi lai mariaddi su allo m panginsueanne. ⁴¹Ana'u Taumata sarun mandolokku manga mala'ekan-Ne mangammullu manga taumata su wallattu aḷarḷanang-Nge apan naola'a taumata marosa, wuḷḷu anambo n taumata waine lai apan ma'ola'a aḷaḷeo. ⁴²Imangitou sarangkanambone sarun iramme sulaḷummu sunggilla pia putungnge apan luḷḷenggamma, isudde imangitou sarun lumuai wuḷḷu matataḷḷangnga. ⁴³Wuḷḷu manga taumata apan ma'ola'a apulu Mawu Ruata sarun lumansiangnga ere matannallo sulaḷummu Runia Waku Mawu Ruata, lamangngi mangitou. Nariaddi, amungkangngu pia taḷinga paddaringikka!"

Sasumandingngu darotongnga apan uaaḷi

⁴⁴"Napawe Mawu Ruata mamarenta, olangnge ere sasumandingnga indi: Pia darotongnga uaaḷi su leta'a see niabaannu sangkatou taumata, wuḷḷu niaddo apia su leta'a. Wua udde ana waugu lulluassa, taumata udde inaitte nabbaḷu'u aḷawo'u darotongnge, see nabelengke wuḷḷu namalli leta'a udde."

Sasumandingngu mutiara apan maḷendappa

⁴⁵"Napawe Mawu Ruata mamarenta olangnge ere sasumandingnga indi: Sangkatou mabbawaḷu'a madea'a manga mutiara maarega. ⁴⁶Su tempo itou naasomba sambau mutiara apan nangillembo n maḷḷamaga, ringannu maḷihakka itou niumamatta wuḷḷu nabbaḷu'u aḷawo'u darotongnge, see namalli mutiara sambau udde."

Sasumandingngu soma

⁴⁷"Napawe Mawu Ruata mamarenta olangnge ere sasumandingngu soma apan ipannoma su rano, see naahau aḷawo'u hati ng kinassa. ⁴⁸Napawe soma udde napenete, soma niapidde manga samakka su ammaranne. Wua udde imangitou inuma'ianna wuḷḷu naḷḷaete manga inassa udde: Inassa apianne niaddo su wensada wuḷḷu inassa araḷeoanne ni-

ramme. ⁴⁹Ete aroddi olangnge su Allo ng Kiamatta, manga mala'ekatta sarun inai marrae manga taumata laleo wuassu manga taumata apan tutturutta apulu Mawu Ruata. ⁵⁰Wua udde manga taumata laleo udde iramme sulalummu sunggilla pia putungnge. Isuddewe imangitou sarun lumuai wurru matatarangnga."

Darotongnga wakku wurru darotongnga tabbe

⁵¹"Apa iamiu naasunna sarangkanambone udde?" aiwalo Mawu Yesus.

"Maasunna lamangnga!" sasimbakki mangitou.

⁵²See Mawu Yesus nabbisara, "Ana waugu udde manga huru n agama apan suete naola'a lalorro n araratuannu Mawu Ruata, udde ere sangkatou tatahuannu wale apan mappasabangngu darotongnge wakku wurru tabbe, wuassu pangadoanne."

Mawu Yesus tawe tinarimmatta su Nazaret

(Mrk. 6:1-6; Luk. 4:16-30)

⁵³Napawe Mawu Yesus suete nabbatti'u manga sasumandingnga udde, Itou nanantangke n tampa udde, ⁵⁴see nabelengke su wanua-Ne. Poi sindi Itou mangngarra'a su wale m pattatarramawuanna, wurru manga taumata apan maddaringikka Sitou isudde, mangke naherangnga. Imangitou nabbisara, "Wuassu apa taumata indi naasomba apande ereudde? Wurru wuassu apa Itou naasomba tarino ma'ola'a alarindu'a udde? ⁵⁵Walineuwe Itou ana'u wase ng kalu? Walineuwe Maria udde inangnge; wurru manga turangnge udde Yakobus, Yusuf, Simon, wurru Yudas? ⁵⁶Wurru walineuwe manga turangnge wawine uatana'a lai isindi? Wuassu apa Itou naasomba sarangkanambone udde?" ⁵⁷Ne imangitou nola'e Mawu Yesus. See Mawu Yesus nabbisara simangitou, "Sangkatou nabi aaddatanna su alawo'u tampa, tumba'u tawe su ampungnge wurru su wale sassane." ⁵⁸Ne ana waugu udde Mawu Yesus tawe na'ola'a alarindu'a manambo isudde ana waugu imangitou tawe mangngimanna.

Papate n Yohanes Mananaṛṛani

(Mrk. 6:14-29; Luk. 9:7-9)

14 Su tempo udde Herodes, ratu m wanua Galilea, naaringikka su ola'u Mawu Yesus. ²Herodes nabbisara su manga tepellene, "Natantunte indi Yohanes Mananaṛṛani nabbiakke apia wuassu papate! Ana waugu udde itou pia taṛṛino ma'ola'a alaṛṛindu'a."

³Ana waugu dorone Herodes nandolokka napasametti Yohanes wuṛṛu naṛṛapussa sitou see niapasutta sulaḷummu tuttupanna. Herodes na'ola'a aroddi ana waugu Herodias awingngi tuṛṛangngi tou sidutu, eteudde Filipus. ⁴Ana waugu Yohanes suete nabbisara si Herodes ereindi, "Tawe wotongnge i'o maawingngi Herodias!" ⁵Atonna Herodes maapulu mamate si Yohanes, arawe itou matta'uttu manga taumata, ana waugu imangitou masingkatta Yohanes udde nabi.

⁶Su tempo Herodes na'ola'a ramea n allo pananaunganna itou niasungkangnga Herodias anangnge wawine nassaḷaingnga su saruannu awadaalla. Saḷaingnge maaluassa naungngi Herodes, ⁷na'oma n sara Herodes naddiandi sitou ringannu nassalu, manungku alaḷawo'u apa apan dorongan, sarun ionggola.

⁸Ana waugu niaṛṛaannu inangnge, ana'a udde nabbisara, "Ia'u maddorongnga pua n Yohanes Mananaṛṛani onggola'a sia'u orassa indi su wowo m baki!"

⁹Naaringikka darorongnga udde, Herodes mangke nasusa atonna naungnge. Arawe ana waugu itou suete nassalu su saruannu rahone, itou namarenta tadea'u darorongngu ana'a wawine udde watu'anna. ¹⁰Itou nandolokku taumata inai watukku tuttupanna iapapototta pua n Yohanes. ¹¹Wua udde pua n Yohanes niapidde uarandangnga su baki see nionggole su ana'a wawine udde. See ana'a wawine udde nangapi-ddu lai inangnge. ¹²Wua udde mallaḷaṛṛenggeni Yohanes nirumanta nangaḷappa winaḷunanni Yohanes wuṛṛu see nilabingnga. See imangitou napuḷete wuṛṛu nabbaḷote olangnge udde su Mawu Yesus.

Mawu Yesus napaannu taumata lima ṛiwu su atoune

(Mrk. 6:30-44; Luk. 9:10-17; Yoh. 6:1-14)

¹³Su tempo Mawu Yesus naaringikka watti'a udde, Itou sinuma'ete saalanna sassane wuṛṛu nanantangke n tampa udde, see inaita su sambau tampa apan maḷannaba. Arawe su tempo manga taumata naaringikka olangnge udde, imangitou nanantangngu manga soa mangi-

tou inainte nananturutta Mawu Yesus inumamattu ammaranne. ¹⁴Su tempo Mawu Yesus nilumintukka wuassu saalanna wuṛṛu naasilote taumata manambo udde, Itou inumakkanni mangitou. See Itou napaapia n manga taumata maradda'a su wallatti mangitou.

¹⁵Wawallone, manga mallalarṛenggenṇu Mawu Yesus nirumanta wuṛṛu nabbisara Sitou, "Allo wawallote wuṛṛu tampa indi narṛae marau. Mappianne Iamangnga mandolokku manga taumata indi mapuḷe, tadea'u wotongnge mamalli anna su manga ampungnga."

¹⁶"Tawe wotongnge imangitou iapaapuḷe," unnu Mawu Yesus, "Iamiu sassane papaanni mangitou."

¹⁷"Iami tumba'u pia lima m bau roti wuṛṛu inassa rua m bua!" sasimbakku mallalarṛenggenṇu Mawu Yesus.

¹⁸"Apira'e udde isindi," unnu Mawu Yesus. ¹⁹Wua udde Itou nandolokku taumata nambo udde niapaa'ianna su leta'a. See Itou nanganute lima m bau roti wuṛṛu inassa rua m bua udde, see Itou naningngarate langitta wuṛṛu naadiangkamanna su Mawu Ruata. Wua udde Itou natahiate roti udde, ringannu lima-Ne wuṛṛu nianggila su mallalarṛenggen-Ne niapatahia su taumata nambo udde. ²⁰Imangitou sarangkanambone inumanna na'oma n sara naḷaidda. Wua udde mallalarṛenggenṇu Mawu Yesus nangammulle m lambe n anna udde: mapuḷo dua su uḷangnge napene-pene. ²¹Niumanna su tempo udde itatakasere lima ṛiwu su atoune, taambe nireengnga wawine wuṛṛu manga alaṛṛana'a.

Mawu Yesus inumamatta su wowo n ua'e

(Mrk. 6:45-52; Yoh. 6:15-21)

²²Wua udde Mawu Yesus nandolokku manga mallalarṛenggen-Ne sinuma'e saalanna wuṛṛu malliu ṛoro su samba'a n rano, tantaḷanna udde Itou nandolokku taumata nambo udde niapaapuḷe. ²³Napawe taumata nambo udde napuḷete, Mawu Yesus sinuma'a su sambau wuidda sassane ana umaḷiomanna. Allo ṛabbite arawe Mawu Yesus ta'e isudde sassane. ²⁴Tantaḷanna udde saalanna apan sasa'eannu mallalarṛenggenṇu Mawu Yesus, maraute su tangnga n rano. Saalanna udde mangke ia'untallu lua'a, ana wangu anginna uasomakka mona n saalanna. ²⁵Su wallattu puulla tatallu wuṛṛu puulla annumma ruaallo, Mawu Yesus nirumanta ringanni mangitou u'amatta su wowo n ua'e. ²⁶Su tempo mallalarṛenggen-Ne naasilo Sitou u'amatta su wowo n ua'e, imangitou niṛṛumoro atonna. "Setanna!" unni mangitou ringannu atata'unne.

²⁷Arawe Mawu Yesus lapiddu sinumimbakka, "Paatammuda! Ia'u indi, arie paata'utta!"

²⁸See Petrus nabbisara, "Amungkangngu atonna I'o Mawu Yesus, wala'a ia'u rumanta umamatta su wowo n ua'e."

²⁹"Rantate," sasimbakku Mawu Yesus. Aroddi Petrus naaring-ikka itou nilumintukka wuassu saalanna, niumamatta su wowo n ua'e wuṛṛu inaita ringannu Mawu Yesus. ³⁰Arawe su tempo Petrus naasilo ma'ikkatta atonna anginna su rano udde, itou nata'utta wuṛṛu nanat-takke nilumakkuba. "Mawu, ontole!" aintuḷine.

³¹Mawu Yesus lapiddu nanguḷukku limane wuṛṛu nanametta sitou, wuṛṛu nabbisara, "Petrus, Petrus, pangangimannu lome atonna. Anio i'o sussingawangnga Sia'u?"

³²See itarua sinuma'ete su saalanna udde, wuṛṛu anginna noḷote. ³³Ne manga mallalārrenggennu Mawu Yesus nassubbate Sitou. Imangi-tou nabbisara, "Atonna Mawu uddewe Ana'u Ruata!"

Mawu Yesus napaapia n taumata maradda'a su Genesaret

(Mrk. 6:53-56)

³⁴Napawe imangitou na'omate su samba'a n rano, imangitou ti-numuḷite su Genesaret. ³⁵Wuṛṛu napawe manga taumata isudde naa-silo manungku nirumanta udde Mawu Yesus, imangitou namasingkattu watti'a udde su ahewallu wageangngu leta'a su soa udde. See anambo n taumata maradda'a niapidda ringannu Mawu Yesus. ³⁶Wuṛṛu imangi-tou sinumaḷande Sitou tadea'u wotongnge mangindingnga jubah-Ne, sa-laiwe tumba'u pentakke. See sarangkanambone apan nangindingnga udde napiate.

Addatta inanaramannu iupungngu aḷamona

(Mrk. 7:1-13)

15 Sangkawageanganna taumata n Farisi wuṛṛu manga pira huru n agama wuassu Yerusalem nirumanta ringannu Mawu Yesus. Imangitou naiwaḷo Sitou, ²"Anio manga mallalārrenggennu niluma-wangnga addatta inanaramannu iupungngu aḷamona ng kite? Su tempo umanna, imangitou tawe mangukkassa lima rorone ere su atoranna!"

³Mawu Yesus sinumimbakka, "Wuṛṛu anio iamiu lai lullawangnga parenta Mawu Ruata, tumba'u ana waugu maapulu tuttuṛrutta addatta inanaramannu iupungngu aḷamona? ⁴Ana waugu Mawu Ruata nabbi-sara, 'Pangaddatta iamangngu wuṛṛu inangngu,' wuṛṛu 'Isai-sai apan ma-bbisara hagurangnge sarun iruumanna ma'oma n sara mate.' ⁵Arawe

iamiu mangngaṛṛa'a: amungkangngu taumata mabbisara hagurangnge, 'Apa apan ṛinone ta'u ionggola su hagurangnga, suete ta'u nionggola su Mawu Ruata,' ⁶ne taumata udde tate lai iapaaddatta hagurangnge. Aroddi ana waugu addatta inanaramannu iupungngu aḷamonanu, iamiu mangngaddio'a wisara Mawu Ruata. ⁷Iamiu taumata lilangkamaḷe'a! Tawe saḷane apa apan suete niwaḷo n Yesaya su ola'i amiu eteudde,

⁸Arendi wisara Mawu Ruata:

Manga taumata udde tumba'u massubba

Sia'u ringannu manga wisara,

arawe naungngi mangitou marau wuassia-U.

⁹Tawe gunane imangitou massubba Sia'u,

ana waugu atorannu taumata, iaṛṛa'i

mangitou, ere lai atorang-Ku.'"

Inolaanna apan maalaleo taumata

(Mrk. 7:14-23)

¹⁰Wua udde Mawu Yesus namaggo manga taumata wuṛṛu nabbisara rate simangitou, "Paddaringikka tadea'u maasunna! ¹¹Apan sinumutta su moṛṛongnga tawe maarosa taumata udde; tumba'u apan sinumabangnga wuassu moṛṛongnge eteudde maalaleo sitou."

¹²See manga mallalaṛṛenggennu Mawu Yesus nirumanta wuṛṛu naiwaḷo Sitou, "Iamangnga masingkatta manungku manga taumata n Farisi nasa'u su tempo naaringikka Iamangnga nabbisara aroddi?"

¹³Mawu Yesus sinumimbakka, "Manga sinuananna apan tawe nisuanu Iamangku su surga sarun abbutanna. ¹⁴Ariete maddaringikka manga taumata n Farisi udde. Imangitou udde mangngehetta taumata wuta; wuṛṛu amungkangngu taumata wuta mangehetta taumata wuta, itarua sarun manawo sulaḷummu loṛṛangnga."

¹⁵Petrus nabbisara, "Tulaṅga'a taḷaa'a sasumandingnga udde siami Iamangnga!"

¹⁶Mawu Yesus sinumimbakka simangitou, "iamiu taambe lai naasunna? ¹⁷Iamiu wagga, manungku apan sussutta sulaḷummu moṛṛongnga masutta lai su tianna wuṛṛu wua udde masabangnga apia? ¹⁸Arawe apan sinumabangnga wuassu moṛṛongnga, udde wuassu naungnga; wuṛṛu eteudde apan maalaleo taumata. ¹⁹Ana waugu wuassu naungnga sumabangnga manga ṛingiṛṛanna laḷeo, apan maaola'a taumata mammate, sussandaga, ma'ola'a aḷaleo, manna'o, mammahia, wuṛṛu ma'umbilangnga. ²⁰Manga inolaanna udde maarosa taumata, waḷine u'anna ringannu lima tawe ukkasanna."

Pangangimannu sangkatou wawine n Kanaan

(Mrk. 7:24-30)

²¹Wua udde Mawu Yesus nanantangke n tampa udde wurru inaita su wageangngu leta'a marani n soa Tirus wurru Sidon. ²²Sangkatou wawine n Kanaan wuassu wageangngu leta'a udde, nirumanta ringannu Mawu Yesus, lapiddu u'ui, "Ana'i Daud, akkana'a ia'u! Ana'u wawine, niasuttannu gharraho laleo. Raddangnge masadatta atonna."

²³Mawu Yesus tawe sinumimbakka wawine udde saran addio'a. See mallalarrenggennu Mawu Yesus nirumanta ringanni Tou wurru sussalande, "Iamangnga rolorra'e wawine udde mangingkatta. Itou tumba'u maggio su liuddi ite!"

²⁴Mawu Yesus sinumimbakka, "Ia'u nirolokka tumba'u su pabbawalagu Israel, nangillembo simangitou apan nialiwune."

²⁵Wawine udde nirumanta see inumalintuda su saruannu Mawu Yesus wurru nabbisara, "Tulunga'a ia'u Mawu."

²⁶Mawu Yesus sinumimbakka, "Tawe wotongnge manganu annu manga alarrana'a wurru ilombo su asu."

²⁷"Atonna Mawu," sasimbakku wawine udde, "arawe asu lai u'anna manga tarroto n anna wuassu medda mawune."

²⁸See Mawu Yesus nabbisara sitou, "Inangnga, matohassa atonna pangangimannu! Ariadite apa apan ipaapulunu!" Orassa udde lai ana'a wawine udde napia.

Mawu Yesus napaapia n manambo taumata maradda'a

²⁹Mawu Yesus nanantangke n tampa udde, see sinumallete su apannu Rano n Galilea. Wua udde Itou sinumaate su sambau wuidda see inuma'iante isudde. ³⁰Manambo taumata nirumanta ringanni Tou uaapiddu taumata perro, wuta, lome, mou, wurru manambo lai taumata maradda'a waine. Imangitou nangado n rumaradda'a udde su saruannu Mawu Yesus, ne Itou napaapiate manga rumaradda'a udde. ³¹Taumata nambo isudde, naherangnga atonna, su tempo imangitou naasilo taumata mou naawisara, taumata perro napia, taumata lome niumamatta, wurru taumata wuta naasilo. See imangitou nadalote Mawu Ruata m pabbawalagu Israel.

Mawu Yesus napaannu appattu riwu su atoune

(Mrk. 8:1-10)

³²Wua udde Mawu Yesus namaggo manga mallar̄r̄enggen-Ne see nabbisara, "Ia'u u'akkannu taumata nambo indi. Tallute allo al̄annune imangitou su sampunna ringang-Ku, wuṛṛu orassa indi imangitou inasue-ante n anna. Ia'u tawe mapaapuḷe mangitou maḷunussa, ar̄rombanganne imangitou mawantingnga su laḷanna."

³³See manga mallar̄r̄enggennu Mawu Yesus naiwaḷo Sitou, "Suapa iite wotongnge maasomba anna su wadda'a araune indi iapaanna su taumata anambone indi?"

³⁴"Sangkura roti siamiu?" Mawu Yesus naiwaḷo simangitou.

"Pitu," sasimbakki mangitou, "wuṛṛu manga pira inassa maradio'a."

³⁵Ne Mawu Yesus nandolokku taumata nambo udde inuma'ianna su leta'a. ³⁶See Itou nanganute roti pitu m bau wuṛṛu inassa, wua udde naadiangkamanna su Mawu Ruata. Wua udde Itou nattahiate roti wuṛṛu inassa udde ringannu lima-Ne sassane, see nionggola su mallar̄r̄enggen-Ne. Wuṛṛu imangitou nattahiate su taumata manambo udde. ³⁷Anambo n taumata udde inumanna na'oma n sara naḷaidda wua udde mallar̄r̄enggen-Ne nangammullu lambe n anna udde. Sarangka-nambone pitu ng kuḷa'a napene-pene. ³⁸Reengannu taumata esakka sassane apan inumanna su tempo udde appattu riwu su atoune, taambe na-reengnga wawine wuṛṛu manga al̄ar̄rana'a.

³⁹Wua udde Mawu Yesus nandolokke manga taumata udde niapa-puḷe. Itou sassane sinuma'e sangngassa saalanna wuṛṛu inaite watukku wageangngu leta'u Magadan.

Manga taumata n Farisi maddorongnga Mawu Yesus ma'ola'a al̄ar̄r̄indu'a

(Mrk. 8:11-13; Luk. 12:54-56)

16 Pia manga pira taumata n Farisi wuṛṛu Saduki nirumanta ringannu Mawu Yesus, pandumanne mapaasala n Tou. Imangitou maddorongnga Sitou ma'ola'a al̄ar̄r̄indu'a ipattiala manungku atonna Itou nirumanta wuassu Mawu Ruata. ²Mawu Yesus sinumimbakka, ["Amungkangngu matannallo mattatuppa, iamiu mabbisara, 'Hati m banua mapia, ana wagu langitta mar̄ramutta.' ³Wuṛṛu su ruaallo, iamiu mabbisara, 'Allo indi manguranna, ana wagu langitta mar̄ramutta wuṛṛu marandumma.' Ei, iamiu wotongnge mar̄rangngo n hati m banua

ringannu ma'ellega ola'u langitta, arawe manga tanda n tempo tawe iarrangngo ng kamiu!"] 4 "Tumanite n daleo manga taumata tempo indi. Iamiu maddorongnga Ia'u ma'ola'a alarrindu'a. Iamiu tawe onggolanna saran sambau alarrindu'a, tumba'u alarrindu'i Nabi Yunus."

Napawe suete nabbisara aroddi, Mawu Yesus nanantangke mangitou, see napulete.

Ragi manga taumata n Farisi wurru Saduki

(Mrk. 8:14-21)

⁵Su tempo manga mallalarrenggennu Mawu Yesus na'omate su samba'a n rano, imangitou wakkute naasingkatta manungku imangitou naabuli mangapiddu roti. ⁶Mawu Yesus nabbisara simangitou, "Paariaga su ragi n taumata n Farisi wurru Saduki."

⁷Naaringikka wisara Mawu Yesus aroddi, mallalarrenggen-Ne uahhattote sangkatou ringannu sangkatou, "Itou nabbisara aroddi ana waugu iite tawe nangapiddu roti."

⁸Mawu Yesus naasingkatta apa ipagahato mangitou udde. Nariaddi Itou nabbisara, "Anio iamiu uatatiakka su ola'u tawe roti? Pangangimanni amiu lome! ⁹Taambe lai naasunna iamiu? Apa iamiu tate naa-naungnga su ola'u lima m bau roti apan ta'u tinahia su lima riwu su atoune? Pira ng ku'a lambene roti apan niammulli amiu? ¹⁰Wurru ereapa lai ringannu pitu m bau roti apan tinahia su appattu riwu su atoune udde? Pira ng ku'a roti lambene niammulli amiu? ¹¹Anio na'oma n sara iamiu tawe maasunna manungku ia'u waline uahahatto ng kamiu su ola'u roti? Paariagai su ola'u ragi n taumata n Farisi wurru Saduki!"

¹²Panginsueanne mallalarrenggennu Mawu Yesus naasunnate manungku Mawu Yesus mammarenta simangitou paariaga walineuwe wuassu ragi apan ipappaatta ipa'ola'a roti, arawe su saruannu manga alarra'u taumata n Farisi wurru Saduki.

Panganga'u m Petrus su ola'u Mawu Yesus

(Mrk. 8:27-30; Luk. 9:18-21)

¹³Mawu Yesus inaita su wageangngu leta'a marani n soa Kaisarea Filipi. Isudde Itou naiwalo mallalarrenggen-Ne, "Unnu wisara n taumata, isai Ana'u Taumata udde?"

¹⁴Manga mallalarrenggen-Ne sinumimbakka, "Piaddu mabbisara Yohanes Mananarrani. Piaddu lai mab-bisara Elia. Waine lai mabbisara Yeremia ara'e su wallattu sangkatou nabi."

¹⁵"Arawe tumurruttu ringiranni amiu sassane, isai Ia'u indi?"

¹⁶Simon Petrus sinumimbakka, "Ete Iamangnga Ratu m Punnu Salamatta, Ana'u Mawu Ruata apan wiakka."

¹⁷"Auntunganna si'o Simon ana'i Yona!" unnu Mawu Yesus, "Ana waugu walineuwe taumata apan namasingkattu olangnge udde si'o, arawe Iamangku su surga. ¹⁸Ana waugu udde rinone iamiu masingkatta, i'o udde Petrus, watu apan matohassa. Wurru su wowo n watu indi ia'u sarun mapararisikku Gharreda-U apan tawe iahohakku taumata; salaiwe ete uasaruanna papate! ¹⁹Ia'u sarun mangonggolla siamiu a'unsi n Runia Waku Mawu Ruata. Apa apan isassingada su wowo n runia, udde lai isassingada su surga. Wurru apa apan iapaarrinonu su wowo n runia, udde lai mangke narino su surga."

²⁰Wua udde Mawu Yesus napaanaungnga su mallalarrenggen-Ne tadea'u imangitou tawe mamasingkatta sisai-sai manungku ete Itou udde Ratu m Punnu Salamatta.

Mawu Yesus namasingkattu asansarane wurru papate-Ne

(Mrk. 8:31-9:1; Luk. 9:22-27)

²¹Nanattakka wuassu orassa udde, Mawu Yesus nabbisara ringannu uahahati su mallalarrenggen-Ne, manungku Itou sarun inai su Yerusalem wurru mamendamma anambo n asasusa wuassu manga piararangnge, manga imam tembonanne, wurru manga huru n agama. Itou sarun pate-anna, arawe su allo atallune Itou sarun mabangunna apia.

²²See Petrus nangahete Mawu Yesus watukku sandiranne wurru namo'a Sitou, wisarane, "Antimanna Mawu Ruata mapaarau n olangnge udde, Mawu! Ariewe olangnge udde mariaddi su Mawu!"

²³Mawu Yesus nanaile see nabbisara si Petrus, "Roote passaliu wua isindi, Mamamono'a! I'o manalare Sia'u. Ringiddu udde ringirannu taumata; waline ringirannu Mawu Ruata!"

²⁴Wua udde Mawu Yesus nabbisara su mallalarrenggen-Ne, "Tau-mata apan mallalarrenggenna Sia'u, rinone tawe mannaungnga manarane, mamasanna arussane, wurru sidutu uatantalongnga Sia'u. ²⁵Ana waugu taumata apan maapulu mandalukka wiakke, sarun awulianu wiakke. Arawe taumata apan mamala m biakke ana waugu Ia'u sarun maasomba wiakka. ²⁶Apa auntunganne su sangkatou taumata, amung-

kangngu ahewallu runia indi maola'a darotongnge arawe itou awuḷiannu wiakke? Wotongnge wiakka udde saḷiuannu sambau darotongnga?

²⁷Tate maḷannu lai Ana'u Taumata, su sampunna ringannu manga mala'ekanne, sarun rumanta ringannu tarḡino n lamangnge. Su tempo udde Itou sarun mabbalissa manga taumata tumurḡuttu inolaannu sangkatou-sangkatou. ²⁸Asingkatawe! Wuassu wallatti amiu isindi pia-ddu tawe mate, tantaḷanna taambe naasilo Ana'u Taumata rumanta mamarenta ere sangkatou Ratu."

Mawu Yesus niwantuhanna

(Mrk. 9:2-13; Luk. 9:28-36)

17 Napawe annummu allo naḷiute Mawu Yesus nangapiddi Petrus, Yakobus wuḡḡu turḡrangnge Yohanes, nanginsassa su sambau wui-
dda apan matanggakka. ²Su saruanni mangitou, Mawu Yesus nawaḷu sarḡrene: Hati-Ne nabaḷi masemakka ere matannallo wuḡḡu laung-Nge mawira lullendapa. ³Wua udde sire tallu mallalḡrḡenggen-Ne udde naa-silo si Musa wuḡḡu Elia uahahatto Mawu Yesus. ⁴See Petrus nabbisara-
rate su Mawu Yesus, "Mawu, mapia atonna iite isindi. Amungkangngu Mawu maapulu, ia'u sarun mapararisikku rasanna tatallu isindi: sambau su Mawu, sambau si Musa, wuḡḡu sambau lai si Elia!"

⁵Tantaḷanna Petrus ta'e mabbisara, winabbawa apan mase-makka atonna nangooppa simangitou wuḡḡu wuassu winabbawa udde niaringiḡḡanna tingikka apan nabbisara, "Ete indi Ana'a arangnguang-Ku, Itou maaluassa naung-Ku. Daringiḡḡe Itou!"

⁶Su tempo manga mallalḡrḡenggen nu Mawu Yesus naaringikka ting-
ikka udde, imangitou nata'utta atonna, na'oma n sara hati mangitou na-duma'a su leta'a. ⁷Arawe Mawu Yesus nirumanta wuḡḡu nangerḡetta simangitou. "Pabbangunte," wisara-Ne, "arie mata'utta!" ⁸Napawe imangitou nanutudda, imangitou tawe naasilo sisai-sai tumba'u Mawu Yesus sassane.

⁹Su tempo imangitou sinumossokke wuassu wuidda udde, Mawu Yesus napaanaungnga simangitou, "Arie pabbatti'a sisai-sai, apa apan suete niasiloanni amiu tanginna, tantaḷanna Ana'u Taumata taambe niapawangunna wuassu papate."

¹⁰Manga mallalḡrḡenggen nu Mawu Yesus naiwaḷo Sitou, "Anio manga huru n agama mabbisara manungku Elia ḡinone rumanta dorone?"

¹¹Mawu Yesus sinumimbakka, "Atonna Elia rumanta wuḡḡu itou sarun manuungngu sarangkanambone. ¹²Arawe Ia'u mabbisara si amiu, Elia suete nirumanta, arawe manga taumata tawe maailala sitou;

imangitou ma'ola'a sitou ere su apulu mangitou sassane. Wuṛṛu aroddi lai imangitou sarun ma'ola'a Ana'u Taumata."

¹³See manga mallalaṛṛenggen-Ne naasunnate manungku Mawu Yesus uahahatto su ola'i Yohanes Mananarṛani.

Mawu Yesus napaapia n ana'a niasuttannu gharṛaho laḷeo

(Mrk. 9:14-29; Luk. 9:37-43a)

¹⁴Su tempo Mawu Yesus wuṛṛu sire tallu mallalaṛṛenggen-Ne nabe-lengke ringannu taumata nambo udde, sangkatou esakka nirumanta, nassubba su saruannu Mawu Yesus, ¹⁵wuṛṛu nabbisara, "Iamangnga, akkana'a ana'u. Raddangnge pua. Raddangnge pua udde tarṛa assa masadatta atonna ma'oma n sara itou tarṛa assa mabbantingnga su putungnga wuṛṛu tarṛa assa sulaḷummu ua'e. ¹⁶Ia'u suete nangapiddi tou ringannu mallalaṛṛenggeni Iamangnga, arawe imangitou tawe maapia sitou."

¹⁷Mawu Yesus sinumimbakka, "Waḷine hampa iamiu indi! Iamiu atonna tonna taumata apan wengkolla wuṛṛu tawe mangngimanna. Ma'oma n sara tingngera Ia'u rinone uatana'a ringanni amiu wuṛṛu manabare su alaḷeo ng kamiu? Apira'e ana'a udde inawarea!" ¹⁸See Mawu Yesus namarentate gharṛaho laḷeo udde sumabangnga wuassu laḷummu ana'a udde. Wuṛṛu gharṛaho laḷeo udde sinumabangnga, see ana'a udde napia su orassa udde lai.

¹⁹Wua udde manga mallalaṛṛenggen nu Mawu Yesus nirumanta ringanni Tou sassane wuṛṛu naiwaḷo Sitou, "Iamangnga, ana waugu apa iami tawe maalimbuakka gharṛaho laḷeo udde?"

²⁰Mawu Yesus sinumimbakka, "Ana waugu pangangimanni amiu lome. Naunge! Amungkanngu iamiu pia pangangimanna ere ahewallu watu n sawi, iamiu wotongnge mabbisara wuidda indi, 'Pangingkatta poiaronddi!' Ne atonna tonna wawone udde sarun ma'ingkatta. Tawe saran sambau manara apan tawe ia'ola'i amiu! [²¹Arawe gharṛaho laḷeo ereindi, tumba'u wotongnge limbuarṛannu aalimanna wuṛṛu mappuasa.]"

Mawu Yesus namasingkattu papate-Ne apia

(Mrk. 9:30-32; Luk. 9:43b-45)

²²Napawe manga mallalaṛṛenggen nu Mawu Yesus naammulle su Galilea, Mawu Yesus nabbisara simangitou, "Tate maḷannu lai Ana'u



Soa su wiwikku Rano n Galilea (17:22)

Taumata sarun itantilla su apulu n taumata. ²³Itou sarun pateanna, arawe su allo atallune Itou sarun iapawangunna.”

Ne manga mallalarrenggen-Ne mangke nasusa atonna.

Pamamaekka wose m Wale Mawu

²⁴Su tempo Mawu Yesus wurru mallalarrenggen-Ne na'omate su Kapernaum, manga maddarorongnga wose m Wale Mawu nirumanta ringanni Petrus wurru naiwalo, "Hurunu mammaekka wose Wale Mawu ara'e tawe?"

²⁵Petrus sinumimbakka, "Mammaekka!"

Napawe Petrus napulete, Mawu Yesus namo'a rorone, "Simon, ereapa su ringirranu? Isai rinone mamaekka wose su mararatu n runia indi? Tumanangnge ara'e taumata raho?"

²⁶"Taumata raho," sasimbakki Petrus.

"Amungkangngu aroddi," unnu Mawu Yesus, "tumanangnge ariete pamaekka. ²⁷Arawe arie iite mapaasusa naungngu manga taumata udde. Nariaddi, roote su rano pamarrungnga. Apira'a inassa paarorone niawarrungannu. Sulalummu morrongngu inassa udde, i'o sarun maa-somba roitta apan wotongnge ipamaekka wose ng kadua. Anute roitta udde wurru waerrete simangitou wose ng kite huna n Wale Mawu."

Isai ahewalanne?

(Mrk. 9:33-37; Luk. 9:46-48)

18 Su tempo udde mallalarrengennu Mawu Yesus nirumanta ringanni Tou wurru naiwalo, "Isai apan irararangno ahewalanne su wallattu alarrana'u Mawu Ruata?"

²Mawu Yesus namaggo sangkatou ana'a addio'a, wurru nia-pararisikka su saruanni mangitou. ³See Mawu Yesus nabbisara, "Pangimante! Tumba'u amungkangngu iamiu mawalu wurru maola'a ere alarrana'a, iamiu sarun maola'a lalorro n araratuannu Mawu Ruata. ⁴Taumata apan mappaawawo n ririne wurru maola'a ere ana'a addio'a indi, ete itou ahewalanne su wallattu lalorro n araratuannu Mawu Ruata. ⁵Wurru taumata apan manarimattu ana'a ereindi ana waugu Ia'u, udde ere lai nanarimmatta Sia'u."

Manga inolaanna apan maarosa taumata

(Mrk. 9:42-48; Luk. 17:1-2)

⁶"Isai napa'ola'a sangkatou taumata wuassu manga taumata apan maraddio'a indi madirite mangngimanna lai Sia'u, mappianne amungkangngu watu gahilinganna iwa'issa su ullekane see itou iwontolla su tahaloangnga malalumma. ⁷Silakawe eteapa runia indi ana waugu manga pallaagu apan maarosa taumata. Atonna manga inolaanna ereudde rinone pia, arawe nasilakate taumata apan pallaagune maarosa taumata waine!

⁸Amungkangngu limanu ara'e leddanu maarosa si'o, pototta wurru rammea'a. Mappianne i'o mabiakka ringannu Mawu Ruata tawe lima samba'a ara'e ledda samba'a wuassu i'o iramme sulalummu putungngu naraka ringannu limanu wurru leddanu rua m ba'a. ⁹Wurru amungkangngu matanu maarosa si'o, loetta wurru rammea'a. Mappianne i'o mabiakka ringannu Mawu Ruata tawe mata samba'a, wuassu i'o iramme sulalummu putungngu naraka ringannu matanu rua m ba'a."

Sasumandingngu domba apan nawuli

(Luk. 15:3-7)

¹⁰"Paatehamma! Arie pangaddio'a sangkatou wuassu wallattu taumata maraddio'a indi. Ana waugu naunge, manga mala'ekatti mangitou sidutu su saruannu lamangku su surga.

[¹¹Ana waugu Ana'u Taumata nirumanta manalamatta taumata apan nialiwune!]

¹²Ereapa su ringirannu? Unnu wisara pia sangkatou uatahuanna marasutta domba, see sambau su wallattu manga domba udde nawuli, apa sarun olaannu taumata udde? Itou sarun manantangngu domba sio m pulo sio udde su wuidda wurru inai maddea'a domba sambau apan nawuli udde. ¹³Wurru amungkangngu itou naasombate apia domba udde – pangimanna Sia'u – itou sarun lembo n lulluassa ana waugu domba sambau wuassu sio m pulo sio waine apan tawe nawuli. ¹⁴Aroddi lai lamangngu apan su surga, madiri saran sangkatou su wallattu manga taumata wakku mangngimanna Sia'u indi umaliwu."

Amungkangngu turrangngu marosa

¹⁵"Amungkangngu turrangngu ma'ola'a rosa su saruannu, roote ringanni tou wurru tantiroa'e passasane. Ola'e udde ringannu malannaba su wallatti raddua sassane. Amungkangngu itou tinumurrutta alawo'u wisaranu, i'o naauntungnga naasomba apia turrangngu udde mabelengnga. ¹⁶Arawe amungkangngu tawe, apira'e sangkatou ara'e rua ng katou lai. Ana waugu sulalummu Wuke Susi uaworretta, 'Mattingkatulungnga darua ara'e sire tallu sakassi pandumanne mapaliatta'u sangkatou niarriaannu pasasala.'

¹⁷Amungkangngu itou tawe naddaringikka tatantiro manga taumata udde, waloa'a hatto udde su tangnga n Jamaatta. Wurru panginsueanne, amungkangngu itou madiri maddaringikka tatantiro n Jamaatta, ellehete itou ere sangkatou maddarorongnga wose wurru ere sangkatou apan tawe maailala Mawu Ruata."

Apan isassingada wurru iapa'ola'a

¹⁸"Asingkatawe: Apa apan isassingadi amiu su runia, udde lai isassingada su surga. Wurru apa apan iapa'ola'i amiu su runia, iapa'ola'a lai su surga.

¹⁹Wurru asingkatawe lai: Amungkangngu su wallatti amiu su runia indi pia rua ng katou ua'ire alawo'u inolaanna, wurru iaaliomanna, aaliomanna udde sarun sengkamannu lamangku su surga. ²⁰Ana waugu suapa pia darua ara'e sire tallu uaammulla ana waugu Ia'u, Ia'u isudde su pattangnganni mangitou."

Sasumandingngu allangnga apan madiri mangampunga taumata

²¹Wua udde Petrus nirumanta ringannu Mawu Yesus wuṛṛu naiwaḷo, "Mawu, amungkangngu tuṛrangku ma'ola'a rosa su saruangu, ma'oma n sara paapira ia'u mangampunga sitou? Ma'oma n sara paapitu?"

²²Mawu Yesus sinumimbakka, "Tawe, waḷine paapitu, arawe paapitu m puḷo wuassu paapitu! ²³Ana waugu napawe Mawu Ruata mama-renta, olangnge ere sulaḷummu sasumandingnga indi: Sangkatou ratu maapulu mapawaekku aḷawo'u utangngu manga allangnge. ²⁴Su tempo itou nanattakke mamarikissa, niapaasaruanna sitou sangkatou allangnga apan pia utangnge ringannu jutane, ²⁵wuṛṛu tate maawaekka. Nariaddi, ratu namarentate tadea'u allangnga udde iwaḷu'a su sampunna ringannu aḷaṛṛanangnge wuṛṛu awingnge, wuṛṛu aḷawo'u manga rarotongnge ipa-maekka utangnge. ²⁶Allangnga udde inumaḷituda su saruannu ratu, wuṛṛu sinumaḷande, 'Mawu, ampunge allangngu. Allangngu sarun ma-maekka anambo n utangnga udde.' ²⁷Ratu udde inumakkanni tou, see itou namapasse aḷawo'u utangngu allangnga udde.

²⁸Su tempo allangnga udde sinumabangnga, nassombate n hawene; sangkatou allangnga lai apan pia utangnge sitou manga pira riwu. Itou nanamette hawene udde, nangattongnga, wuṛṛu nabbisara, 'Waerṛe aḷawo'u utangngu!' ²⁹See hawene udde inumaḷintuda su saruanni tou see sinumaḷande, 'Paasabare asuene hawe, sarangkanambone sarun ta'u waerṛanna!' ³⁰Arawe allangnga udde madiri. Ewe'e itou lai napasutta n tou sulaḷummu tuttupanna ma'oma n sara itou maawaekka utangnge udde. ³¹Su tempo manga allangnge waine naasilo apa apan suete nariaddi, imangitou nasusa wuṛṛu nangalae n olangnge udde su ratu. ³²Ne ratu udde namaggote allangnga apan laḷeo udde wuṛṛu nabbisara sitou, 'Allangnga laḷeo! Aḷawo'u utangngu tate ta'u niapawaekka ana waugu i'o sinumaḷande Sia'u. ³³Waḷinewe i'o lai umakkannu hawenu ere lai ia'u suete inumakkannu?' ³⁴Ratu udde mangke nasa'u. Allangnga apan laḷeo udde nitaṛṛo n tou sulaḷummu tuttupanna na'oma n sara itou maawaekka aḷawo'u utangnge."

³⁵Mawu Yesus nanginsue watingnge ringannu wisara indi, "Aroddi lai Iamanku su surga sarun ma'ola'a siamiu sangkatou-sangkatou ere udde, amungkangngu iamiu tawe mangampunga tuṛrangngu ringannu naungnga waresi."

Ałarɾa'u Mawu Yesus su ola'u pasasasindo

(Mrk. 10:1-12)

19 Napawe Mawu Yesus suete nabbatti'u sarangkanambone udde, Itou nanantangke n Galilea see inaite su wageangngu leta'u Yudea su samba'a n Sałukku Yordan. ²Manambo taumata uatantalongnga Sitou, wuɾɾu Itou napaapia mangitou isudde.

³See manga taumata n Farisi nirumanta madea'a sała-Ne Imangitou naiwało, "Tumuɾɾuttu tita n agama ng kite. wotongnge taumata masasindo n awingnge ringannu tawe pinangiananne."

⁴Mawu Yesus sinumimbakka, "Apa iamiu taambe nabbasa su-lalummu Wuke Susi manungku Mandariadi apan suete na'ola'a taumata, ro'e n paarorone na'ola'a simangitou esakka wuɾɾu wawine? ⁵Wuɾɾu wua udde Itou nabbisara, 'Ana waugu udde, esakka manantangke n higurangnge wuɾɾu naaukke ringannu awingnge, itarua naola'e wadangnga sambau.' ⁶Nariaddi itarua tate lai rua ng katou, arawe naola'e sambau. Ana waugu udde apa apan suete ni'aukku Mawu Ruata tate wotongnge iapasasindo n taumata."

⁷See manga taumata n Farisi naiwało Sitou, "Amungkangngu aroddi, anio Musa nandolokku taumata mangngagillu surattu pasasasindo su awingnge apan nisindoanne?"

⁸Mawu Yesus sinumimbakka, "Musa namala ng kamiu manindo awingngu ana waugu iamiu tumanite masahada pangarɾaanne. Arawe rinone wałine aroddi su paarorone. ⁹Nariaddi, daringiɾɾe indi: Isai manindo awingnge – wutte'e wawine udde tawe nassała su esakka waine – wua udde maawingnga apia ringannu wawine waine, taumata udde sinumandaga."

¹⁰Ne manga mallalaɾɾenggennu Mawu Yesus naiwało Sitou, "Amungkangngu hatto m paa'aukku sangkawinganna ereudde, mappianne arie paawingnga."

¹¹Mawu Yesus sinumimbakka, "Tawe anambo n taumata wotongnge maasengkamma manga wisara udde, tumba'u manga taumata apan suete tinantunnu Mawu Ruata. ¹²Ana waugu pia taumata apan tawe maawingnga, ana waugu imangitou niasungkangnga aroddi. Wuɾɾu pia lai namile sassane tawe maawingnga, tadea'u wotongnge mangimbe Mawu Ruata. Taumata apan wotongnge manengkamma ałarɾa'a indi, wala'e itou maddaringikka."

Mawu Yesus nanga lamatta manga alarrana'a

(Mrk. 10:13-16; Luk. 18:15-17)

¹³Pia manga taumata nangapiddu manga alarrana'a ringannu Mawu Yesus tadea'u Itou mangaddo n limane su pua n mangitou udde wurru mangaliomanni mangitou. Arawe mallalarrenggennu Mawu Yesus nasa'u su manga taumata udde. ¹⁴Ne Mawu Yesus nabbisarate su mallalarrenggen-Ne, "Wala'e manga alarrana'a udde rumanta ringang-Ku! Arie maningaddi mangitou, ana waugu manga taumata ere imangitou indi apan maola'a lalorro n araratuannu Mawu Ruata."

¹⁵See Mawu Yesus nangadote n lima n Tou su pua n manga alarrana'a udde wurru nanga lamatte simangitou, wua udde Itou nangingkatte wua isudde.

Taumata umbasanna apan ala

(Mrk. 10:17-31; Luk. 18:18-30)

¹⁶Su sambau allo sangkatou esakka nirumanta ringannu Mawu Yesus, "Iamangnga Huru," unni tou, "pallalagu mapia ereapa sarun ta'u olaanna tadea'u maatarimmattu wiakka tutune wurru ma'oma n sara malannu-lannu?"

¹⁷Mawu Yesus sinumimbakka, "Anio i'o naiwalo Sia'u su ola'u apa apan mapia? Tumba'u pia sambau apan mapia. Amunkangngu i'o maapulu mabiakka, i'o sarun tutturutta alawo'u parenta Mawu Ruata."

¹⁸"Parenta suapane udde?" aiwalo n taumata udde.

Mawu Yesus sinumimbakka, "Arie pamate, arie passandaga, arie panna'o, arie pangawusu, ¹⁹pangaddatta iamangngu wurru inangngu; wurru pandangngu taumata sansulungngu ere i'o mandangngu wadangngu sassane."

²⁰"Anambo n parenta udde suete tinurrutanku," sasimbakku taumata umbasanna udde. "Apa lai sarun olaanku?"

²¹Mawu Yesus nabbisara sitou, "Amunkangngu i'o maapulu maola'a taumata nasuungnga, roote walua'e manga darotongngu. Onggola'e roinne su taumata asiangnga, wurru i'o sarun masomba darotongnga su surga. Wua udde rantate tantalongke Sia'u!"

²²Naaringikka manga wisara udde, taumata umbasanna udde napulete ringannu naungnga massusa ana waugu itou taumata tumanite-nala.

²³See Mawu Yesus nabbisara su manga mallalarrenggen-Ne, "Ia'u mabbisara siamiu, masahada atonna taumata ala maola'a lalorro

n araratuannu Mawu Ruata. ²⁴Wurru indi lai Ta'u iwalō siamiu; malluassanne sambau onta sumutta su lorrangngu rararumma, wuassu sangkatou ala sumutta su Runia Waku Mawu Ruata."

²⁵Napawe manga mallalarrenggen-Ne naaringikka wisara Mawu Yesus udde, imangitou naherangnga. "Amungkanngu aroddi," unni mangitou, "isai wotongnge maasomba asalamatta?"

²⁶Mawu Yesus nanutudda simangitou see nabbisara, "Su taumata, olangnge udde tawe mariaddi! Arawe su Mawu Ruata sarangkanam-bone wotongnge mariaddi."

²⁷See Petrus nabbisara, "Pa'ellega, iami suete nanantangngu alawo'u darotongngi ami tadea'u manantalongnga Iamangnga. Wurru apa sarun asombanganni ami?"

²⁸Mawu Yesus nabbisara simangitou, "Pangimante: Su Runia apan Waku, Ana'u Taumata sarun uma'ianna su addera n araratuanna apan mawantuga. Su tempo udde iamiu mallalarrenggeng-Ku sarun uma'ianna su mapulo dua addera n araratuanna wurru makkuungnga mapulo dua pabbawalagu Israel. ²⁹Wurru manga taumata apan suete nanantangngu walene, ara'e turrangnge esakka ara'e wawine, ara'e inangnga iamangnga, ara'e manga alararangnge ara'e wawailanne ana wangu Ia'u, taumata udde sarun manengkamma apia paarrasutta su wageangnge. Wurru itou sarun manengkamma lai wiakka tutune ma'oma n sara malannu-lannu. ³⁰Arawe manambo taumata orassa indi apan paarorone sarun maola'a salimmurine, wurru su orassa indi salimmurine sarun maola'a paarorone."

Sasumandingngu mamamanara su wailu angore

20 "Napawe Mawu Ruata mamarenta, olangnge ere sasumandingga indi: Sangkatou tatahuannu wailu angore sinumabangnga su tempo ruaallo madea'a taumata iapamanara su wailu angorene. ²Napawe na'irete itou mamaekka simangitou allo massallo sambau roitta sala'a, itou nandolokke mangitou mammanara su wailu angorene. ³Puulla sio ruaallo, tatahuannu waila udde sinumabangnga apia wurru naasilo manga pira ng katou taumata uarisikka su pasakka tawe manarane. ⁴Ne nabbisarate itou simangitou, 'Roote iamiu pammanara su wailu angore'u. Ia'u sarun mamaekka siamiu ringannu lalantakke su rinone.' ⁵Ne imangitou inaita. Puulla mapulo dua allatune wurru lai puulla tatallu wawallo, itou sinumabangnga apia wurru na'ola'a inolaanna ereudde lai. ⁶Wurru irarangngo puulla lima wawallo, itou sinumabangnga lai wurru naasilo ta'e pia lai taumata tawe manarane. See itou naiwalō simangitou, 'Anio iamiu uarisikka allo massallo indi isindi

ringannu tawe mammanara?' ⁷Manga taumata udde sinumimbakka, 'Tawe taumata mapamanara ng kami.' 'Amunkangngu aroddi, unnu tatahuannu wailla udde, roote iamiu pammanara su waillu anggore'u.'

⁸Wawallone, tatahuannu waillu anggore udde, nabbisara su mandorene, 'Wagoite mamamanara udde wurru waerrete lalantakki mangitou sangkatou sangkatou, manattakka wuassu sinumutta panginsueanne ma'oma n sara sinumutta paarorone.' ⁹See nirumantate mamamanara apan nanattakka nammanara wuassu puulla lima wawallo. Imangitou sangkatou-sangkatou nanarimmattu roitta sala'a sangkatou sambau. ¹⁰Wua udde nirumantate lai mamamanara niapamanara ro'e n ruaallo. Imangitou marringidda, imangitou sarun manengkamma anamboanne. Arawe imangitou tumba'u inonggolannu lai sambau roitta sala'a. ¹¹Su tempo nanengkamma roitta udde, imangitou sussungkuta su tatahuannu wailla udde: ¹²'Mamamanara apan nirumanta panginsueanne udde tumba'u nammanara sangka orassa. Arawe iami nammanara allo massallo uawati su paddissu matannallo, arawe mawu namaekka simangitou ere lai siami!' ¹³Tatahuannu waillu anggore udde sinumimbakka su sangkatou wuassu wallatti mangitou, 'Hawe, ia'u tawe sala'u siamiu. Walinewe i'o na'ire manengkamma lalantakke roitta sala'a sambau su ipammanaranu allo massallo? ¹⁴Ne anute roinnu wurru apulete. Ia'u atonna maapulu mangagilla su taumata apan nammanara panginsueanne udde ringannu lalantakke apan nassulungnga ringannu ta'u nionggola siamiu. ¹⁵Anio ia'u tawe wotongnge ma'ola'a apulu'u su raro tongku? Ara'e i'o mannaungnga laleo ana waugu ia'u mandangngu?'"

¹⁶See Mawu Yesus nabbisara apia, "Aroddi lai su manga taumata apan salimmurine sarun maola'a paarorone, wurru manga taumata apan paarorone sarun maola'a salimmurine."

Mawu Yesus nabbisara atallune su ola'u papate-Ne

(Mrk. 10:32-34; Luk. 18:31-34)

¹⁷Su tempo Mawu Yesus mattudda n Yerusalem, su pattangngannu lalanna Itou namaggo mapulo dua mallalarrenggen-Ne maammulla suaddio'a sassane. See Itou nabbisarate simangitou, ¹⁸"Paddaringikka! Iite orassa indi mattudda n Yerusalem. Poiaroddi Ana'u Taumata sarun itantilla su manga imam tembonanne wurru su manga huru n agama. See Itou sarun iruumanna ma'oma n sara mate, ¹⁹wua udde itantilla su manga taumata waline Yahudi. Imangitou sarun manga luandaga Sitou, mannansara Sitou, wurru mangarussa n Tou. Arawe su allo atallune, Itou sarun iapawangunna apia."

Darorongngi inangngi Yakobus wurru Yohanes

(Mrk. 10:35-45)

²⁰Wua udde awingngi Zebedeus wurru manga alarṛanangnge nirumanta ringannu Mawu Yesus. Su saruannu Mawu Yesus itou inumalintuda ana piaddu doronganna.

²¹"Inangnga maapulu napa?" aiwaḷo Mawu Yesus.

Inangnga sinumimbakka, "Ia'u maapulu ana'u darua indi uma'ianna su samba'a airri wurru uanannu lamangnga su tempo lamangnga maola'a Ratu."

²²"Iamiu wagga apa apan raddoronganni amiu," wisara Mawu Yesus simangitou. "Wotongngewe iamiu ma'inumma wuassu mangko n asasusa apan sarun Ta'u inumanna?"

"Wotongnge," sasimbakki mangitou.

²³Mawu Yesus nabbisara, "Atonna iamiu sarun ma'inumma lai wuassu mangko-U udde. Arawe su ola'u isai apan sarun uma'ianna su airri wurru su uanang-Ku udde tawe Ia'u manantunna. Manga tampa udde, tampa manga taumata apan suete tinantunnu lamangku."

²⁴Su tempo sire mapuḷo mallalarṛenggen-Ne waine naaringikka hatto udde, imangitou nasa'u sitarua sangkatuṛrangnga udde. ²⁵Ana waugu udde Mawu Yesus namaggo simangitou sarangkanambone, see nabbi-sara, "Iamiu masingkatta manungku manga tembonannu pabbawalaga apan wagga Mawu Ruata mannansara tumanangnge. Wurru manga tembonanni mangitou mannasa'i mangitou. ²⁶Arawe iamiu tawe wotongnge aroddi. Arawe taumata apan maapulu maola'a wahewa su wallatti amiu, rinone maola'a mangangimbenu. ²⁷Wurru taumata apan maapulu maola'a paarorone su wallatti amiu, rinone maola'a allangngu. ²⁸Ere lai Ana'u Taumata udde, Itou nirumanta waline tadea'u imbeanna, arawe mangimbe, wurru manantillu niawa-Ne ipamallossu taumata nambo."

Mawu Yesus napaapia n rua ng katou wuta

(Mrk. 10:46-52; Luk. 18:35-43)

²⁹Su tempo imangitou nanantangngu Yerikho, manambo taumata uatantalongnga Mawu Yesus. ³⁰Pia rua ng katou wuta ua'ianna su winggi n dalanna. Su tempo itarua naaringikka manungku Mawu Yesus sumabbi, itarua inumui, "Ana'i Daud, akkanaawe iami!"

³¹Taumata nambo isudde namuḷo sitarua wurru nandolokki tarua mallanaba. Arawe itarua inumui lembo n aikkanne lai, "Mawu, Ana'i Daud, akkanaawe iami!"

³²See Mawu Yesus nattaalla wurru namaggo sitarua. "Apa ipaapulu n raddua Ta'u olaanna siraddua?" aiwalo Mawu Yesus.

³³Itarua sinumimbakka, "Mawu iami maapulu maasilo!"

³⁴Mawu Yesus inumakkanni tarua, see namita mata n tarua. Orassa udde lai itarua naasilote. See itarua tinumantalongke Mawu Yesus.

Mawu Yesus sinumutta su Yerusalem ringannu awawantuga

(Mrk. 11:1-11; Luk. 19:28-40; Yoh. 12:12-19)

21 Su tempo maranite n Yerusalem, imangitou na'omate su Betfage su Wuiddu Zaitun. Isudde Mawu Yesus nandolokku rua ng katou mallalarrenggen-Ne niapaliu roro. ²"Roote su ampungnga apan sasaruananna udde," tanata Mawu Yesus simangitou. "Iraddua sarun maasilo keledai sambau ua'iitta su sampunna ringannu anangnge. Wu'ate itarua wurru apira'e isindi. ³Amungkangngu pia taumata maiwalo, waloa'e sitou, 'Mawu mappandumma sitou.' Ne taumata udde malihalihakka mamala n keledai udde iapaapidda siraddua."

⁴Olangnge udde nariaddi tadea'u matipusse apa apan suete niapa-singkattu nabi ereindi,

⁵"Waloa'a su Sion,

Ratunu tantanna rudanta ringanni amiu

Itou masarriorito'a wurru uasa'e sambau keledai,

sambau ana'u keledai sarre n tumuwo."

⁶Wua udde rua ng katou mallalarrenggen-Ne udde inaita wurru na'ola'e su ereapa nitanata Mawu Yesus sitarua. ⁷Imangitou nangapiddu keledai udde ringannu anangnge. See imangitou nangampakke liuddu keledai darua udde ringannu jubah mangitou. Wua udde Mawu Yesus sinuma'ete. ⁸Manambo taumata poiarddi mammilattu manga jubah mangitou su lanna, tantanna taumata waine mangngitingnga manga ranna ng kalu wurru iaampakka su lanna. ⁹Taumata nambo apan u'amatta rorone, wurru su liuddu Mawu Yesus u'ui, "Awawantuga su Ana'i Daud! Nialamatanna Itou apan nirumanta ringannu arannu Mawu! Padalote Mawu Ruata apan Atanggaranne!"

¹⁰See, su tempo Mawu Yesus sinumutta su Yerusalem, anambo n lalloro n soa udde naggio. "Isai indi?" aiwalo manga taumata su soa udde.

¹¹"Itou Nabi Yesus, wuassu Nazaret su Galilea," sasimbakku taumata nambo apan uatantalongnga Mawu Yesus.



Lalanna marriputta su soa n Yerusalem (21:10)

Mawu Yesus sinumutta su Waḷe Mawu Ruata

(Mrk. 11:15-19; Luk. 19:45-48; Yoh. 2:13-22)

¹²Wua udde Mawu Yesus sinumuttate su Waḷe Mawu Ruata wuṛṛu nallimbuakka manga taumata apan uawawalli isudde. Itou na-maḷinsuangngu manga medda m pananu'aranna roitta, wuṛṛu manga wangko mabawaḷu'u merpati. ¹³See Itou nabbisara manga taumata isudde, "Sulaḷummu Wuke Susi uaworretta manungku Mawu Ruata nabbisara, 'Waḷe'u sarun isaggo waḷe tampa aaliomananna.' Arawe niola'i amiu waḷe udde saḷakku taumata laḷeo!"

¹⁴Manga taumata wuta wuṛṛu lome nirumanta ringannu Mawu Yesus su Waḷe Mawu Ruata, wuṛṛu Itou napaapia mangitou. ¹⁵Arawe manga imam tembonanne wuṛṛu manga huru n agama nasa'u naasilo manga alaṛṛindu'a niola'u Mawu Yesus. Wuṛṛu imangitou nasa'u lai naaring-ikka manga alaṛṛana'a mangke u'ui su Waḷe Mawu, "Awawantuga su Ana'i Daud!"

¹⁶Imangitou nabbisara Mawu Yesus, "I'o naaringikka apa apan iwabbisara mangitou?"

"Ore, Ia'u naaringikka," sasimbakku Mawu Yesus. "Iamiau taambe naawasa su wageangngu Wuke Susi ereindi: 'Manga alarṛana'a wuṛṛu alarṛana'a ro'e n wuassu arariadine suete niaṛṛaangku maddalo daralo apan nasuungnga?'"

¹⁷Wua udde Mawu Yesus nanantangngi mangitou, see sinumabangnga wuassu soa udde watukku Betania wuṛṛu nanaṛṛabbi poiaroddi.

Mawu Yesus namontoga alu ara

(Mrk. 11:12-14, 20-24)

¹⁸Tiṛṛabbine ruaallo, su amatanna mabelengnga watukku soa, Mawu Yesus niamalunusanna. ¹⁹Itou naasilo sangkalu alu ara su winggi n dalanna. Itou inaita su alungngu alu udde, arawe tawe naasomba wuane saran sambau, tumba'u rongngane sassane. See Mawu Yesus nabbisarate alu udde, "I'o sarun tate mabbua!" alu ara udde lapiddu tinumolangnga.

²⁰Su tempo mallalarṛenggenṛu Mawu Yesus naasilo inolaanne udde, imangitou naherangnga atonna. "Ereapa alu ara udde wotongnge lapiddu narṛangu?" aiwaḷo mangitou.

²¹"Atonna," sasimbakku Mawu Yesus, "Amungkangngu iamiau mangngimanna wuṛṛu tawe humago'a, iamiau maaola'a apa apan suete niola-U su alu ara indi, wuṛṛu tawe tumba'u udde sassane, ewe'e lai iamiau maawisara lai su wuidda indi, 'Awengkette wuṛṛu awontolle sulaḷummu tahaḷoangnga': ne olangnge udde sarun mariaddi. ²²Aḷawo'u apa apan raddoronganni amiau su aaliomanni amiau, iamiau sarun manengkamma, sambaliate iamiau mangngimanna."

Aiwaḷo su ola'u tarṛino Mawu Yesus

(Mrk. 11:27-33; Luk. 20:1-8)

²³Wua udde Mawu Yesus nabelengke su Waḷe Mawu Ruata see sinumuttate wuṛṛu mangngarṛa'e isudde. Su tempo Itou mangngarṛa'a, manga imam tembonanne wuṛṛu manga piaṛṛa'u Yahudi iirumanta ringanni Tou wuṛṛu naiwaḷo, "Apa pinangiananne na'oma n sara I'o ma'ola'a sarangkanambone indi? Isai nangonggolu tarṛino udde Si'o?"

²⁴Mawu Yesus sinumimbakka, "Ia'u lai maiwalo siamiu. Wuṛṛu amungkangngu iamiu sumimbakka, Ia'u sarun mabbalo siamiu ringannu taṛṛino n sai Ia'u ma'ola'a manga inolaanna indi. ²⁵Yohanes Mananaṛṛani ringannu taṛṛino n sai? Mawu Ruata ara'e taumata?"

See manga imam tembonanne wuṛṛu manga piaṛṛa'u Yahudi man-nattakke ma'ire, su wallatti mangitou. "Amungkangngu iite mabbisara, 'Ringannu taṛṛino Mawu Ruata,' Itou sarun mabbisara, 'Amungkangngu aroddi anio iamiu tawe mangngimanna Sitou?' ²⁶Arawe amungkangngu iite mabbisara, 'Ringannu taṛṛino n taumata', iite matta'uttu taumata nambo, ana waugu imangitou sarangkanambone, mangngantimma Yoha-nes udde sangkatou nabi." ²⁷Nariaddi imangitou sinumimbakka, "Iami wagga."

See Mawu Yesus nabbisara simangitou, "Amungkangngu aroddi Ia'u lai tawe mabbalo siamiu ringannu taṛṛino n sai Ia'u ma'ola'a ala'wo'u inolaanna indi."

Sasumandingu rua ng katou ana'a

²⁸"Su orassa indi ereapa ringiṛṛannu su olangnge indi?" unnu Mawu Yesus. "Pia sangkatou iamangnga pia anangnge rua ng katou esakka. Timmade udde inaite ringannu anangnge pahuḷu wuṛṛu na-bbisara, 'Ana'a, roote pammanara su waillu anggore allo indi.' ²⁹Ia'u madiri,' sasimbakku ana'a udde. Arawe wua udde ringiṛṛanne nawaḷu wuṛṛu nanute su waillu anggore udde. ³⁰Wua udde hagurangnge inaite ringannu anangnge aruane, wuṛṛu nabbisara lai aroddi. 'Ore, Iamang-nga,' sasimbakku ana'a aruane udde. Arawe itou tawe nanu su wailla. ³¹Ne su wallattu ana'a darua indi, suapane apan tinumuṛṛutta apulu n ia-mangnge?"

"Iapa pahuḷune," sinimbakku manga imam tembonanne wuṛṛu piaṛṛa'u Yahudi udde.

Ne Mawu Yesus nabbisarate simangitou, "Pangimante: Madda-rorongnga wose wuṛṛu manga wawine masandaga sarun maola'a laḷoṛṛo n araratuannu Mawu Ruata rorone wuassi amiu. ³²Ana waugu Yoha-nes Mananaṛṛani nirumanta, wuṛṛu namasilo siamiu ola'u mabbiakka apan ipaapulu Mawu, arawe iamiu madiri mangngimanna alaṛṛang-Nge; arawe manga mallaluṛṛu wose wuṛṛu manga wawine masandaga mang-ngimanna Sitou. Arawe salaiwe iamiu suete naasilo sarangkanambone udde, iamiu tawe namaḷu ringiṛṛanni amiu wuṛṛu tate mangngimanna lai Mawu."

Sasumandingngu mamamanara su waillu anggore

(Mrk. 12:1-12; Luk. 20:9-19)

³³"Daringirre sasumandingnga sambau indi lai," unnu Mawu Yesus. "Sangkatou tatahuannu leta'a nassuanna su sambau waillu anggore. Itou na'ola'a paggala pinamaliwutta, wuṛṛu naali, loṛrangnga pangado-annu pamamakannu anggore, wua udde niapararisikke wale m panda-riaganna. Wua udde itou napasewate m waillu anggore udde su mama-manarane, see itou nangingkatte su wanua waine. ³⁴Napawe nia'omante pangangitingngu wua n anggore udde, tatahuannu leta'a nandolokku manga raloṛṛanne ringannu mamamanara m wailla udde, iapatarim-matta wageangnge. ³⁵Arawe manga mamamanara m wailla udde na-nametta manga raloṛṛannu tatahuannu leta'a udde. Sangkatou ni-puulla, waine nipate wuṛṛu waine lai niwaretannu watu. ³⁶Tatahuannu leta'a udde nandolokke apia lai raloṛṛanne waine lai tinambanna anambone wuassu paarorone. Arawe imangitou niola'a lai ere ingana'a rorone. ³⁷Panginsueanne tatahuannu leta'a udde nandolokku anangnge sassane. 'Imangitou sarun mangaddatta ana'u,' irarṛingiddi tou. ³⁸Arawe su tempo mamamanara m wailla udde naasilo ana'u tatahuannu leta'a udde, imangitou uawawisara sangkatou ringannu waine, 'Ei, indete itou apan manahuanna. Wette iite mamate sitou tadea'u iite maasomba wa-geangnge!' ³⁹Ne ana'a udde sinamette niramme su liudde, see nipate."

⁴⁰Mawu Yesus naiwalo, "Ei, amungkangngu tatahuannu waillu ang-gore udde mabelengnga, itou sarun ma'ola'a apa su mamamanarane udde?"

⁴¹Imangitou sinumimbakka, "Itou sarun mamate manga taumata laleo udde, see mapasewate m waillu anggore udde su taumata waine apan maapulu mangagillu hessi n leta'a udde su tempone."

⁴²Ne Mawu Yesus nabbisarate simangitou, "Iamiu taambe naawasa apa apan uaworretta sulaṛummu Wuke Susi?"

'Watu apan tawe ipaattu maaola'a wale
naola'e watu apan paarorone.

Ete indi inolaannu Mawu;
tumanite marṛamaga atonna!"

⁴³"Nariaddi paanaunge," unnu Mawu Yesus, "anambo n tarṛino su alaṛṛana'u Mawu Ruata sarun uṛeanna wuassi amiu wuṛṛu iong-golla su pabbawalaga apan mapaamattu manga parenta Mawu Ruata. [⁴⁴Taumata apan nema'a su watu udde, sarun mapussa'a; wuṛṛu taumata apan niaemaannu watu udde, sarun ataṛingianne maola'a awu.]"

⁴⁵Su tempo manga imam tembonanne wuṛṛu manga taumata n Farisi naaringikka sasumandingngu Mawu Yesus udde, imangitou naasingkatta

manungku Mawu Yesus mabbatti'i mangitou. ⁴⁶Nariaddi imangitou mangke mappandumma manametta Sitou. Arawe imangitou matta'uttu taumata nambo, ana waugu taumata nambo udde ma'ellega manungku Mawu Yesus ere sangkatou nabi.

Sasumandingngu andeangngu awingnga

(Luk. 14:15-24)

22 Mawu Yesus nabbisara apia su taumata nambo ringannu sasumandingnga, ²wisarane, "Amungkangngu Mawu Ruata marenta, olangnge ere sasumandingnga indi: Sangkatou ratu na'ola'a andeangngu awingngu anangnge esakka. ³Ratu udde nandolokku manga ralolorranne inai iapasaŋoho manga taumata apan suete niwaŋoanna su andeangnga udde. Arawe manga taumata apan niwaŋoanna udde madiri rumanta. ⁴Wua udde ratu nandolokku lai manga ralolorranne waine. Wisarane simangitou: 'Waŋoa'a su taumata apan suete niwaŋoanna udde: Imbe su andeangnga nasaddiate. Sapi wurru manga ana'u sapi'u apan apianne suete nipototta. Sarangkanambone nasaddiate. Ringannu addatta rantate su andeangngu awingnga!' ⁵Arawe manga raho apan niwaŋoanna udde tawe nirumanta. Imangitou nabatukku manga manara mangitou sambau-sambau – sangkatou inaita su waille, waine su tampa n pammanaranne; ⁶wurru waine lai nanametta manga ralolorrannu ratu udde see namuulla wurru namate simangitou. ⁷Su tempo ratu udde naaringikka olangnge udde, itou nasa'u atonna. Itou nandolokku tantarane iapapate manga tarra pate udde, wurru iapatutungnga soa mangitou. ⁸Wua udde itou namaggote mangangimbene, see nabbisara, 'Andeangngu awingnga nasaddiate, arawe manga taumata apan suete niwaŋoanna tawe nirumanta. ⁹Orassa indi roote watukku manga laŋanna maŋoangnga, waŋoite anambo n taumata apan wotongnge rumanta su andeangngu awingnga indi.' ¹⁰Ne manga ralolorranne udde inaita. Imangitou inaita su manga laŋanna wahewa see nangammulle n manga taumata apan nassomba mangitou poiaronddi apan maŋpia ara'e laŋeo. Ne nape-nete andeangngu awingnga udde ringannu aŋawo'u raho.

¹¹Wua udde ratu sinumuttate ma'ellega manga raho. Itou naasilo pia sangkatou su andeangnga udde apan tawe ualurre n laubbu andeangnga. ¹²See itou naiwaŋote taumata udde, 'Hawe, ereapa i'o wotongnge sumutta isindi tawe ualurre n laubbu andeangnga?' Taumata udde tawe naawisara sara n addio'a. ¹³See ratu udde nabbisara su manga ralolorranne, 'Rapussa leddane wurru lima n taumata indi, wurru rammea'a itou su liudde su tampa apan marandumma. Poiaronddi pia laŋuai wurru asasusa.'"

¹⁴See Mawu Yesus nanginsue sasumandingnga udde ereindi: "Manambo apan wagoanna, arawe mattulungnga atonna apan mapile."

Su ola'u pamamaekka wose

(Mrk. 12:13-17; Luk. 20:20-26)

¹⁵Wua udde manga taumata n Farisi inaita ma'ire su sampunna su ola'u ereapa imangitou wotongnge mapaasala Mawu Yesus ringannu manga aiwalo. ¹⁶Ne imangitou nandolokku mallaarreggenni mangitou ringannu Mawu Yesus su sambau ringannu manga pira taumata wua-ssu samba'a n Herodes. Manga taumata udde nabbisara Mawu Yesus, "Iamangnga Huru, iami masingkatta iamangnga tawe mangawusu. Iamangnga mangngarra'a masema-semakka su ola'u apulu Mawu Ruata su taumata, tawe maddaringikka adapatti sai-sai. Ana waugu iamangnga tawe mamile taumata. ¹⁷Ana waugu udde, waloa'e siami iamangnga: Tumurruttu atorannu agama ng kite, wotongngewe mamaekka wose si Kaisar ara'e tawe?"

¹⁸Mawu Yesus masingkattu pandumanni mangitou apan laleo udde, aroddi Itou nabbisara, "Ei, manga taumata lilangkama'e'a! Anio iamiu maapulu madea'a sala'u? ¹⁹Pantingira'a Sia'u hati n roitta apan ipappaatti amiu ipammaekka wose!"

See imangitou nangagille Sitou sambau roitta sala'a. ²⁰Mawu Yesus naiwalo simangitou, "Hambaranna wurru aranni sai indi?"

²¹"Kaisar," sasimbakki mangitou.

Ne Mawu Yesus nabbisara simangitou, "Amungkanngu aroddi, ongo'a'e si Kaisar apa apan tatahuananni Kaisar wurru ongo'a'e su Mawu Ruata apa apan tatahuannu Mawu Ruata."

²²Su tempo imangitou naaringikka talaane aroddi, imangitou mangke naherangnga. Ne imangitou inaita nanantangngu Mawu Yesus.

Su ola'u pabbawangunna wuassu papate

(Mrk. 12:18-27; Luk. 20:27-40)

²³Su allo udde lai, manga pira taumata n Saduki nirumanta ringannu Mawu Yesus. Imangitou udde wageangngu taumata apan pia adapanne manungku taumata nate tawe mabiakka apia. ²⁴"Iamangnga Huru," unni mangitou, "Musa mangngarra'a arendi: Amungkanngu sangkatou esakka nate wurru itou tawe ana'a, turrangnge sarun maawingngu inawaluane udde, tadea'u maasomba papapulunna su taumata apan natete udde. ²⁵Suete nariaddi su sire pitu sangkaturangnga apan

uatana'a isindi. Pahulune naawingnga wua udde nate tawe ana'a. Ne inawaluanne tinantangke su turrangnge. ²⁶Turrangnge udde see nate lai tawe ana'a. Olangnge udde nariaddi lai su turrangnge atallune, see naalisansunna na'oma n sara appitune. ²⁷Panginsueanne wawine udde lai nate. ²⁸Ne su tempo taumata nate iapawangunna apia, awingngi sai wawine udde? Ana waugu sire pitu udde suete naawingngi tou."

²⁹Mawu Yesus sinumimbakka, "Iamiu nialiwwune, ana waugu iamiu tawe maasunna Wuke Susi, wurru tarriino Mawu Ruata. ³⁰Ana waugu napawe taumata mate iapawangunna apia, imangitou tate maawingnga apia, arawe imangitou sarun mabiakka ere mala'ekatta su surga. ³¹Iamiu taambe naawasa apa apan niapasingkattu Mawu Ruata su ola'u taumata nate iapawangunna apia? Mawu Ruata nabbisara, ³²'Ete Ia'u Mawu Ruata n Abraham, Mawu Ruata n Ishak wurru Mawu Ruata n Yakub.' Mawu Ruata udde walineuwe Mawu Ruata n taumata nate. Itou Mawu Ruata n taumata wiakka!"

³³Napawe taumata nambo udde naaringikka tala'a Mawu Yesus, imangitou mangke naherangngu alarang-Nge udde.

Parenta ahewalanne

(Mrk. 12:28-34; Luk. 10:25-28)

³⁴Su tempo manga taumata n Farisi naaringikka manungku Mawu Yesus suete na'ola'a manga taumata n Saduki tawe naawisara sara n addio'a, imangitou naammulla. ³⁵Sangkatou wuassu wallatti mangitou, eteudde sangkatou huru n agama, maannamma mapaasala Mawu Yesus ringannu sambau aiwalo. ³⁶"Iamangnga Huru," wisarane, "parenta suapane apan ahewalanne sulalummu atorannu agama?"

³⁷Mawu Yesus sinumimbakka, "Pandangngu Mawu Ruatanu ringannu ahewallu naungngu wurru ahewallu apulunu wurru ringannu alawo'u apandenu. ³⁸Eteudde parenta apan paarorone wurru ahewalanne! ³⁹Parenta aruane nassulungngu paarorone eteudde: Pandangngu sansulungngu taumata ere i'o mandangngu ririnu sassane. ⁴⁰Anambo n tita n agama apan nionggoli Musa wurru alarra'u manga nabi, rapappake ete su parenta darua udde."

Hatto n Ratu m Punnu Salamatta

(Mrk. 12:35-37; Luk. 20:41-44)

⁴¹Tantalanna manga taumata n Farisi ta'e uaammulla isudde, Mawu Yesus naiwalo simangitou, ⁴²"Apa adapatti amiu su ola'u Ratu m Punnu Salamatta? Papapulunni sai Itou?"

"Papapulunni Daud," sasimbakki mangitou.

⁴³"Amungkangngu aroddi," aiwaŋo Mawu Yesus, "anio Gharraho Mawu Ruata nangarra'a si Daud managgo n Ratu m Punnu Saŋamatta 'Mawu'? Ana waugu Daud nabbisara,

⁴⁴'Mawu nabbisara su Mawu'u:

a'iante su samba'a uanang-Ku,

ma'oma n sara Ia'u ma'ola'a manga seennu massurubawa Si'o.'

⁴⁵Nariaddi amungkangngu Daud, mannaggo n Ratu m Punnu Saŋamatta udde 'Mawu', ereapa wotongnge itou papapulunni Daud?"

⁴⁶Tawe saran sangkatou wotongnge naasimbakka Mawu Yesus. Wurru nanattakka allo udde, tawedu lai warrani maiwaŋo manga apa Si-tou.

Iapaanaungnga, tadea'u paatehamma su manga huru n agama wurru manga taumata n Farisi

(Mrk. 12:38-39; Luk. 11:43, 46, 20:45-46)

23 See Mawu Yesus nabbisarate taumata nambo udde wurru su mallarŋenggen-Ne, ²"Manga huru n agama wurru manga taumata n Farisi naasomba tarŋino manala'a n tita Musa. ³Ana waugu udde turutte wurru ola'e sarangkanambone apan iradolokki mangitou. Arawe imbarŋangnga ma'ola'a apa apan a'olaanni mangitou, ana waugu imangitou tawe tutturutta apa apan iaarra'i mangitou. ⁴Imangitou mangngatokku manara masahada wurru mawakkatta, arawe imangitou tawe mantulungngu taumata ma'ola'a manarane. ⁵Sarangkanambone apan niola'i mangitou tumba'u iapa'ellega su taumata. Imangitou mallurŋe n tali n aaliomanna apan malala-lalakka wurru maŋo'engnga uatungkele su jubah mangitou! ⁶Imangitou maa-pulu n tampa apianne su manga andeangnga, wurru addera apianne su manga waŋe m pattatarŋamawuanna. ⁷Imangitou lulluassa amungkangngu aaddatannu taumata su manga pasakka wurru wabbagoanna 'Iamangnga Huru'. ⁸Arawe iamiu, ariewe maapulu wagoanna 'Iamangnga Huru', ana waugu Hurunu tumba'u sambau wurru iamiu sarangkanambone sangkatuŋrangnganna. ⁹Wurru arie lai iamiu mamaggo saran sangkatou su runia indi 'Iamangnga', ana waugu Iamangngu tumba'u sambau, eteudde Iamangnga apan su surga. ¹⁰Wurru arie lai iamiu maa-pulu wagoanna 'Piarŋangnge', ana waugu piarra'i amiu tumba'u sangkatou, eteudde Ratu m Punnu Saŋamatta apan suete pina'ire Mawu Ruata. ¹¹Taumata apan ahewaŋanne su wallatti amiu rinone maola'a mangangimbe ng kamiu. ¹²Taumata apan mannanggakku watanganne

sarun iapaawawo, wuṛṛu taumata apan sussallungngu watanganne sarun itanggakka.”

Mawu Yesus mapaasaḷa pallaḷagu n lilangkamaḷe’a

(Mrk. 12:40; Luk. 11:39-42, 44, 52, 20:47)

¹³”Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe’a. Iamiu mannaḷawa’a taumata maapulu maola’a laḷorṛo n araratuannu Mawu Ruata. Iamiu sassane madiri maola’a laḷorṛo n araratuannu Mawu Ruata, wuṛṛu taumata waine apan maapulu, sassaḷawaanni amiu.

[¹⁴Nasilakate iamiu manga huru n agama wuṛṛu manga taumata n Farisi: Iamiu tarṛa lilangkamaḷe’a. Iamiu mangngawusu manga wawine waḷu wuṛṛu mangngarṛo waḷene wuṛṛu tadea’u maawuni n aḷaḷeo udde, iamiu u’aliomanna maḷo’e-ḷo’engnga. Ana waugu udde ṛuumanni amiu saḷimmurine awakkatanne!]

¹⁵Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe’a! Iamiu inai massenggotta marau-rau nilumewessa tahaḷoangnga, wuṛṛu mammaḷiwutta ammaranne, tumba’u madea’a sangkatou taumata sumutta su agamanu. Wuṛṛu napawe taumata udde uasuttate su agamanu, iamiu ma’ola’a sitou taumata naraka, apan aḷaḷeone paarua wuassu aḷaḷeo ng kamiu sassane!

¹⁶Nasilakate iamiu manga piaṛrangnge apan wuta! Iamiu mangngarṛa’a ereindi, ’Amungkangngu taumata massalu ringannu arannu Waḷe Mawu, taumata udde tawe aiitannu sasalune; arawe amungkangngu itou nassalu ringannu arannu wuḷawanna sulaḷummu Waḷe Mawu, itou aiitannu sasalune udde.’ ¹⁷Iamiu manga taumata woddo apan wuta! Suapa ahunanne: Wuḷawanna, ara’e Waḷe Mawu apan na’ola’a wuḷawanna udde na’ukkassa? ¹⁸Iamiu mangangarṛa’u indi lai, ’Amungkangngu sangkatou nassalu ringannu arannu tampa n sasamba, taumata udde tawe aiitannu sasalune; arawe amungkangngu itou nassalu ringannu arannu sasamba su wowo n tampane udde, itou aiitannu sasalune udde.’ ¹⁹Tumanite m wuta iamiu! Suapa ahunanne? Sasamba ara’e tampa n sasamba apan na’ola’a sasamba udde na’ukkassa? ²⁰Ana waugu udde, amungkangngu sangkatou massalu ringannu arannu tampa n sasamba, udde atappasanne itou nassalu ringannu arannu tampa n sasamba, wuṛṛu ringannu arannu aḷawo’u sasamba apan uarandangnga isudde. ²¹Wuṛṛu amungkangngu sangkatou massalu ringannu arannu Waḷe Mawu, udde atappasanne itou nassalu ringannu arannu Waḷe Mawu, wuṛṛu ringannu arannu Mawu Ruata apan uatana’a isudde. ²²Wuṛṛu amungkangngu sangkatou massalu ringannu arannu surga,

udde atappasanne itou nassalu ringannu arannu addera n araratuannu Mawu, wuṛṛu ringannu arannu Mawu Ruata apan ua'ianna su addera udde. ²³Nasilakate iamiu manga huru n agama wuṛṛu manga taumata n Farisi! Iamiu lilangkamaḷe'a. Rampa-rampa ere selasi, adassa mate-mangnga, wuṛṛu jintan, nionggoli amiu sambau wuassu mapuḷo wage-angnge su Mawu Ruata. Arawe apa apan nangillembu wua isudde sulalummu alaṛṛa'u agama ere tuladane: Atatulidda, darangngu, wuṛṛu tatuṛṛutta tawe olaanni amiu. Sumbali eteudde apan rinone olaanni amiu, ringannu tawe manantangngu alaṛṛa'a waine lai. ²⁴Iamiu manga piaṛrangnge apan wuta! Lango sulalummu ua'enu, iaatapissi amiu, wutte'e unta aallupanni amiu!

²⁵Nasilakate iamiu manga huru n agama wuṛṛu manga taumata n Farisi! Iamiu taṛṛa lilangkamaḷe'a! Manga mangko wuṛṛu manga lama'i amiu niukkassa waresi-warese su liudde, arawe sulalumme nalaluhuranna ringannu alaṛṛo'u apa apan niasombanganni amiu ringannu araṛragissa wuṛṛu awawaḷiu. ²⁶Farisi wuta! Ukkassa asuene paawaresi laḷummu manga mangko wuṛṛu manga lamangngu, tadea'u liudde mawaresi lai!

²⁷Nasilakate iamiu manga huru n agama wuṛṛu manga taumata n Farisi! Iamiu taṛṛa lilangkamaḷe'a! Iamiu naalihilidda ere manga holangnga apan niwuṛṛannu mawira; su liudde elle-hanna maṛṛansangnga, arawe sulalumme napene n duṛṛi wuṛṛu sarangkanambone apan mawuku'a. ²⁸Aroddi lai iamiu. Wuassu liudde iamiu ellehanna taumata mapia; arawe sulalumme, iamiu napene n awusu wuṛṛu alaṛṛo'u laḷawangnga."

Mawu Yesus namasingkatta su ola'u ruumannu manga huru n agama wuṛṛu manga taumata n Farisi

(Luk. 11:47-51)

²⁹"Nasilakate iamiu manga huru n agama wuṛṛu manga taumata n Farisi! Iamiu taṛṛa lilangkamaḷe'a! Iamiu napararisikku holangnga apan maṛṛansangnga su manga nabi, wuṛṛu nallogakka manga pale m pananaunganna su manga taumata apan mabbiakka matulidda. ³⁰Wuṛṛu iamiu mabbisara, 'Unnu wisara iami mabiakka su tempo n iupungngu alaḷamona ng kami dorone, iami tawe tinumantalongnga ringanni mangitou namate manga nabi.' ³¹Nariaddi iamiu mangnga'u sassane manungku ete iamiu papapulunnu manga taumata apan namate manga nabi! ³²Amungkangngu aroddi sidutua'e wuṛṛu insuete manga rosa apan suete tinattakku iupungngu alaḷamona ng kami udde! ³³Iamiu laḷeo wuṛṛu papapulunnu taumata laḷeo! Ereapa iamiu wo-

tongnge manalamatta wadangngi amiu wuassu ruumanna su naraka? ³⁴Paddaringikka paapia-pia: Ia'u sarun mandolokku manga nabi ringanni amiu, taumata pande, wuṛṛu manga huru; sangkaadoanna wuassu mangitou sarun pateanni amiu, wuṛṛu sangkaadoanna waine lai sarun iarussa ng kamiu. Piaddu sansaranni amiu lai sulaḷummu manga waḷe m pattataṛṛamawuanna, wuṛṛu iamiu a'enggenanna wuassu soa sambau watukku soa apan waine. ³⁵Ana waugu udde, iamiu sarun iṛruumanna ana waugu pamamate apan niola'a su manga taumata apan tawe saḷane – nanatakka wuassu pamamate si Habel apan tawe saḷane, na'oma n sara pamamate si Zakharia ana'i Berekia apan nipate ng kamiu su wallattu Waḷe Mawu wuṛṛu tampa n sasamba. ³⁶Pangimante: sarangkanambone udde sarun maola'a winabbawa manga taumata su tempo indi!"

Mawu Yesus inumakkannu Yerusalem

(Luk. 13:34-35)

³⁷"Yerusalem, Yerusalem! Manga nabi suete nipatenu. Manga raloloṛṛannu Mawu Ruata suete tinuntungannu watu na'oma n sara nate. Paapirate Ia'u maapulu mangammullu tumana'u soa naaḷihidda ere inangngu manu'a mangooppa alaṛṛanangnge sulaḷummu papaidde, arawe iamiu madiri! ³⁸Ana waugu udde Mawu Ruata tate lai maṛṛundinganna siamiu. ³⁹Paasingkate: Manattakka wuassu orassa indi, i'o tate lai maasilo Sia'u ma'oma n sara i'o mabbisara, 'Niaḷamatanna Itou apan nirumanta ringannu arannu Mawu.'"

Mawu Yesus nabbatti'u ahahohakku

Waḷe Mawu

(Mrk. 13:1-2; Luk. 21:5-6)

24 Su tempo Mawu Yesus nanantangngu Waḷe Mawu, manga mal-laḷaṛṛenggen-Ne nirumanta ringanni Tou nanta'e watukku manga Waḷe Mawu. ²Mawu Yesus nabbisara simangitou, "Apa iamiu maasilo sarangkanambone udde? Asingkate, tawedu saran sambau watu wuassu manga waḷe udde sarun matana'a uatokka su tampane. Sarangkanambone sarun iapaahohakka."

Asasusa wuṛṛu pananansara

(Mrk. 13:3-13; Luk. 21:7-19)

³Wua udde Mawu Yesus inaita watukku Wuiddu Zaitun, wuṛṛu tantalaṇṇa Itou ua'iana, mallalaṛṛenggen-Ne nirumanta maggahatto n Tou sassane. "Waḷoa'e siami tingnera sarangkanambone udde sarun mariaddi," unni mangitou Sitou. "Manga tanda apa apan mamasingkattu daranta n Iamangnga wuṛṛu pangudusannu runia indi?"

⁴Mawu Yesus sinumimbakka, "Paatehamma, arie ma'oma n sara iamiu awahianna. ⁵Ana waugu manambo taumata apan rumanta ringannu arang-Ku see mabbisara, 'Ia'u Ratu m Punnu Saḷamatta!' Imangitou sarun mamahia taumata nambo. ⁶Iamiu sarun maaringikka manga tingikku pangalo wuṛṛu manga watti'u pasaseetta, arawe arie iamiu mata'utta. Ana waugu sarangkanambone udde sarun mariaddi, arawe udde tawe wawaḷo manungku tempo ng kiamatta nia'omante. ⁷Pabbawalaga sambau sarun mamangalo lumawangnga pabbawalaga waine, wuṛṛu araratuanna sambau sarun mamangalo araratuanna waine. Su alaḷawo'u tampa sarun mariaddi alaḷunussa wuṛṛu linukka. ⁸Sarangkanambone udde wakkute panattaṛṛanne, ere radda'a apan niapendamannu sangkatou wawine su tempo mangunsiwe.

⁹Wua udde iamiu sarun sametanna wuṛṛu itantilla iapasansara wuṛṛu pateanna. Ahewallu runia sarun marantinni amiu, ana waugu iamiu mallalaṛṛenggeng-Ku. ¹⁰Su tempo udde manambo taumata sarun massinaadu Mawu, wuṛṛu mandaleo see masaseetta sangkatou ringannu sangkatou. ¹¹Manambo manga nabi awusu sarun rumanta, wuṛṛu mangawusu taumata nambo. ¹²Alaḷeo sarun rumite aroddi ahewalle ma'oma n sara manambo taumata tate lai maddarangngu. ¹³Arawe taumata apan matataṛṛangnga saran pangudusanne, sarun masalaḷamatta. ¹⁴Wuṛṛu Watti'u Alaḷuassa su ola'u ereapa Mawu Ruata mamarenta sarun iapasingkatta su ahewallu runia, tadea'u anambo n taumata maddaringikka. Wua udde rumantate kiamatta."

Alaḷeo apan maahohakka

(Mrk. 13:14-23; Luk. 21:20-24)

¹⁵"Iamiu sarun maasilo 'Alaḷeo apan maahohakka', ere suete niapasingkatti Nabi Daniel, uarisikka su tampa susi. (Iapasingkatta su mabbawasa: Ringira'a apa atappasanne!) ¹⁶Su tempo udde taumata uatana'a su Yudea sarun tumalaṇṇa watukku panenteanna. ¹⁷Taumata apan

roso su wowo n atuppu wale, arie pasossokka manganu sarannapa sulalummu wale. ¹⁸Taumata apan su wailla arie pabelengnga manganu jubahne. ¹⁹Tumanite maata'utta manga allo udde su wawine apan pia illorro, wurru su inangnga apan ta'e mappasusu n anangnge. ²⁰Aalimante tadea'u iamiu tawe tumalangnga su tempo manguranna ara'e su allo n Sabatta! ²¹Su manga allo apan maata'utta udde sarun pia asasusa wahewa ere apan taambe nariaddi ro'e n panattarannu runia na'oma n sara orassa indi, wurru tate lai mariaddi apia. ²²Unnu wisara, Mawu Ruata tawe mangalihakku tempone; tawe saran sangkatou apan wotongnge masalamatta. Arawe ana waugu alarranang-Nge, Mawu Ruata nangautta tempone udde.

²³Su tempo udde amungkangngu pia sangkatou mabbisara siamiu, 'Pa'ellega Ratu m Punnu Salamatta isindi!' ara'e 'Itou isudde!' – arie pangimanna taumata udde. ²⁴Ana waugu sarun rumanta manga mananamatta awusu wurru manga nabi awusu. Imangitou sarun ma'ola'a alawo'u inolaanna apan wahewalla, wurru manga alarrindu'a ipangawusu, amungkangngu wotongnge, alarrana'u Mawu Ruata lai. ²⁵Nariaddi paanaunge! Ia'u suete namasingkatta siamiu paarorone tantanna olangnge udde taambe nariaddi.

²⁶Amungkangngu taumata nabbisara siamiu, 'Pa'ellega Itou poiarddi su wadda'a!' – arie iamiu inai. Ara'e amungkangngu imangitou mabbisara, 'Pa'ellega, Itou uaimbuni sulalummu wabbo'a isindi!' – arie pangimanna ²⁷ana waugu raranta n Ana'u Taumata semakke ere sawallo ma'ilatta wuassu punnu ra'i, wurru semakke na'oma n sara punnu warratta.

²⁸Suapa pia winatangnga nate, isudde lai pia manu'a u'inassa winalunannu winatangnga nate udde."

Daranta n Ana'u Taumata

(Mrk. 13:24-27; Luk. 21:25-28)

²⁹"Tawe nalannu wuassu asasusa su tempo udde, matannallo sarun maddandumma, wurru wulanna tate lai semakke. Manga anumpitanna sarun manawo wuassu langitta, wurru manga tembonannu winalanganna sarun massaliawukka. ³⁰Wua udde tanda n Ana'u Taumata sarun iasilo su langitta. Su tempo udde manga pabbawalaga su runia sarun lumuai. Imangitou sarun maasilo Ana'u Taumata rumanta wuassu winabbawa ringannu tarino wurru awawantuga apan wahewa. ³¹Trompeta wahewa sarun tiupanna wurru Ana'u Taumata sarun mandolokku manga

mala'ekanne mangammullu alarṛanang-Nge wuassu pi'u n runia appatta, wuassu punnu langitta sambau ma'oma n sara punnu langitta waine."

Alarṛa'a wuassu alu ara

(Mrk. 13:28-31; Luk. 21:29-33)

³²"Pattannote alarṛa'a wuassu alu ara. Amungkangngu manga ranane nangelompe wuṛṛu lullaukke, wuṛṛu maddannate, iamiu masingkatte manungku tempo m paddissa maranite. ³³Aroddi lai amungkangngu iamiu maasilo manga olangnge udde mariaddi, iamiu masingkatta manungku tempone maranite atonna. ³⁴Asingcate! Manga olangnge udde sarun mariaddi, tantaḷanna manga taumata wiakka orassa indi taambe nate abbi. ³⁵Langitta wuṛṛu runia sarun mawuḷi, arawe wisara-U ma'oma n sara maḷannu-ḷannu."

Tawedu masingkatta allone wuṛṛu oranne

(Mrk. 13:32-37; Luk. 17:26-30, 34-36)

³⁶"Tawedu masingkatta allone wuṛṛu oranne, manga mala'ekattu Mawu su surga lai wagga, Ana'u Mawu Ruata lai wagga, tumba'u lamangnga sassane masingkatta. ³⁷Napawe Ana'u Taumata rumanta olangnge naalihidda ere su tempo Nuh dorone. ³⁸Su miallo-miallo taambe nammanawangnga wahewa udde, manga taumata u'anna wuṛṛu ma'inumma wuṛṛu maawingnga. Aroddiwe naola'a na'oma n sara su allo Nuh sinumutta su apalla. ³⁹Su tempo manawangnga udde nangelekki mangitou sarangkanambone, wakkute udde imangitou naatutukka su ola'u apa apan tantaḷanna nariaddi udde. Aroddi lai olangnge sarun mariaddi amungkangngu Ana'u Taumata rumanta. ⁴⁰Su tempo udde pia rua ng katou apan mammanara su wailla: Sangkatou sarun iapidda, wuṛṛu sangkatou lai itantangnga. ⁴¹Rua ng katou wawine tantaḷanna manggilingngu gandumma: Sangkatou sarun iapidda, wuṛṛu sangkatou lai itantangnga. ⁴²Nariaddi, paatehamma, ana waugu iamiu wagga tingnera Mawunu sarun rumanta. ⁴³Paanaunge indi! Unuu wisara tatahuannu waḷe masingkatta puulla sangkura su tempo ṛabbi manana'o rumanta, itou tawe matiilla, tadea'u manana'o tawe maasutta sulaḷummu waḷene. ⁴⁴Ana waugu udde, iamiu lai ṛinone uariaga. Ana waugu Ana'u Taumata sarun rumanta su orassa apan tawe iaṛrangngo ng kamiu."

**Mangangimbe maturrutta wurru mangangimbe
malawangnga**
(Luk. 12:41-48)

⁴⁵Mawu Yesus nabbisara apia, "Amunkangngu aroddi, mangangimbe suapane apan maturrutta wurru pande? Ete itou sarun itenegu mawune maola'a tembonannu manga mangangimbe waine, tadea'u itou mangagillu anna simangitou su tempone. ⁴⁶Laluassa eteapa su mangangimbe udde napawe mawune nabelengke, wurru naaratingnga sitou tanta'anna mammanara manarane. ⁴⁷Pangimante, mawu udde sarun manantillu paa'alane su mangangimbe udde. ⁴⁸Arawe amunkangngu mangangimbe udde laleo, itou sarun mabbisara sulalummu naungnge, ⁴⁹'Mawu'u ta'e malannu mabelengnga,' see itou nanattakke mammuulla manga mangangimbe waine wurru u'anna, ma'inumma ringannu manga taumata wu'anna. ⁵⁰Wua udde mawune sarun mabelengnga su allone wurru oranne apan tawe iarangngo. ⁵¹Ne mangangimbe udde sarun puulannu mawune wurru iramme su tampa manga taumata lilangka-male'a. Imangitou sarun lumuai wurru matatarangnga poiaroddi."

Sasumandingngu sire mapulo marjuala

25 "Napawe Ana'u Taumata rumanta ere Mawu, olangnge ere sulalummu sasumandingnga indi: Sire mapulo marjuala mamantuga maa'awingnga, sangkatou-sangkatou nanganu solo, see inai manaloho maa'awingnga esakka.

²Sire lima su wallatti mangitou woddo, wurru sire lima waine pande. ³Sire lima marjuala apan woddo uaapiddu solo, arawe tawe nangapiddu walunna lana. ⁴Sire lima marjuala pande uaapiddu solo ringannu walunne lana. ⁵Maa'awingnga esakka udde malannu mirumanta, nariaddi manga marjuala udde miamatiilanna wurru natiille.

⁶Matangnga n allorane, wakku udde inaringikka aintuli, 'Maa'awingnga esakka mirumantate! Wette manaloho Sitou!' ⁷Sire mapulo marjuala udde napu'ote wurru nande'ompe solo mangitou. ⁸Manga marjuala woddo udde nabbisara su marjuala pande, 'Onggolewe lana ng kami addio'a siami, ana waugu solo ng kami mappadumpe.' ⁹'Tawe wotongnge!' simimbakku manga marjuala pande udde, 'ana waugu takka lana tawe mattiudda siite nambo. Roote pamalli su mabbawalua.' ¹⁰Ne manga marjuala apan woddo udde inaita namalli lana. Tanta'anna inaiaroddi, mirumantate maa'awingnga esakka. Sire



Soŋo wuṛṛu tampa n lana (25:4)

lima maṛṛuala apan nasaddiate udde sinumuttate su sampunna ringannu maa'awingnga esakka su tampa n andeangnga, wuṛṛu ngara niṛruudde!

¹¹Wua udde manga maṛṛuala apan woddo nabelengke. Imangitou uu'ite, 'Mawu, Mawu, wu'awe ngara siami.' ¹²Arawe maa'awingnga esakka udde sinumimbakka, 'Ia'u wagga ng kamiu!' "

¹³See Mawu Yesus nanginsuete sasumandingnga udde arendi, "Ana waugu udde paariaga, ana waugu iamiu wagga allone ara'e oranne."

Sasumandingngu sire tallu mangangimbe

(Luk. 19:11-27)

¹⁴"Napawe Ana'u Taumata nirumanta ere sangkatou Mawu olangnge ere lai sulaḷummu sasumandingnga indi. Sangkatou esakka maapulu inai massenggotta su tampa apan marau. Itou namaggo manga mangangimbene niapariaga darotongnge. ¹⁵Su sangkatou-sangkatou mangangimbe udde itou nangagilla tumuṛṛuttu auatannu sangkatou-sangkatou. Su sangkatou itou nangagillu lima ṛiwu roitta wuḷawanna. Wuṛṛu su waine lai itou nangagillu rua ṛiwu roitta wuḷawanna. Wuṛṛu su sangkatou lai itou nangagillu saṛṛiwu roitta wuḷawanna. See itou nasseng-gote. ¹⁶Mangangimbe apan nanengkamma lima ṛiwu roitta wuḷawanna udde naḷiha-ḷihakka inai nabbaḷu'a, see naasomba auntunganne lima ṛiwu roitta wuḷawanna. ¹⁷Aroddi lai mangangimbe apan nanengkamma rua ṛiwu roitta wuḷawanna udde, naasomba auntunganne lai rua ṛiwu.



Roitta wuławanna (25:15)

¹⁸Arawe mangangimbe apan nanengkamma sarriwu roitta wuławanna udde, inaita naali lorrangnga, see namunite n roittu mawune isudde.

¹⁹Małannu atonna wua udde, mawu manga mangangimbe udde napulete, wuŗru nanattakke na'ola'a reenganna ringanni mangitou.

²⁰Mangangimbe apan nanengkamma lima řiwu roitta wuławanna udde nirumanta wuŗru nanantillu mapuło řiwu. 'Mawu,' wisarane, 'Mawu nanantillu lima řiwu roitta wuławanna sia'u. Pa'ellege, ia'u naasomba auntunganna lai lima řiwu.' ²¹'Mapia,' unnu mawu udde, 'ete i'o mangangimbe apan mapia wuŗru maturrutta. Ana waugu i'o apangimananna ringannu apan addio'a, ia'u sarun manantillu anamboanne si'o. Suttate wuŗru lalluasse ringanku!'

²²See mangangimbe aruane apan nanengkamma rua řiwu roitta wuławanna udde nirumanta wuŗru nabbisara, 'Mawu, Mawu suete nanantillu rua řiwu roitta wuławanna sia'u. Pa'ellege, ia'u naasomba auntunganne rua řiwu lai.' ²³'Mapia,' unnu mawu udde, 'i'o mangangimbe apan mapia wuŗru maturrutta. Ana waugu i'o apangimananna ringannu apan addio'a, ia'u sarun mangagillu anamboanne si'o. Suttate wuŗru lalluasse ringanku!' ²⁴Wua udde mangangimbe apan nanengkamma sarriwu roitta wuławanna udde nirumanta wuŗru nabbisara, 'Mawu, ia'u masingkatta i'o mawu sangkatou apan marřagissa. Mawu mangngitingnga wuane su tampa mawu tawe nassuanna, wuŗru mmmurutta wuane su tampa mawu tawe nangasi'u wualanna. ²⁵Ia'u matta'utta aroddi ia'u inai namuni n roittu mawu sulałummu leta'a. Indete roinnu Mawu.' ²⁶'I'o mangangimbe apan laleo wuŗru malassa!' unnu mawune udde. 'Wařinewe i'o masingkatte manungku ia'u mangngitingnga su tampa ia'u tawe massuanna, wuŗru mmmurutta su tampa ia'u tawe mangasi'u wualanna? ²⁷Amungkangngu aroddi i'o řirone manga-

ddo n roi'u su pangangadoannu roitta, tadea'u su tempo ia'u mapuḷe, ia'u manengkamma roi'u apia udde ringannu wungane. ²⁸Ana waugu udde, anute roitta wuassi tou wuṛṛu onggola'e su taumata apan uatahuanna mapuḷo roitta wuḷawanna udde. ²⁹Ana waugu taumata apan piaṭe, sarun onggolaṇnu lai lembo n anamboanne wuṛṛu itou sarun pia lebbene. Arawe taumata apan tawe darotongne, addio'a apan ta'e sitou, sarun uḷeanna lai. ³⁰Wuṛṛu mangangimbe apan tawe gunane udde, rammea'e sulaḷummu ararandumma su liudde. Poiaroddi itou sarun lumuai wuṛṛu matataṛrangnga asasusa!"

Parikissa su Allo ng Kiamatta

³¹"Napawe Ana'u Taumata rumanta ere sangkatou ratu tatantalongannu anambo mala'ekan-Ne, Itou sarun uma'ianna su addera n araratuanna apan mawantuga. ³²Aḷawo'u pabbawalaga sarun iammulla su saruan-Ne. See Itou sarun maṛṛae mangitou maola'a rua ng kadoananna ere mallalu'adda domba maṛṛae n dombane wuassu ambingnga. ³³Manga taumata apan tuttuṛṛutta apulu Mawu Ruata sarun iammulla su samba'a uanan-Ne, wuṛṛu waine su samba'a n airri-Ne. ³⁴Wua udde ratu sarun mabbisara su manga taumata su samba'a uanan-Ne, 'Wette iamui apan niaḷamatannu Iamangku. Suttate sulaḷummu araratuanna apan suete pinassaddia ro'e n panattarṛannu runia. ³⁵Ana waugu su tempo Ia'u maḷunussa, iamui nangagillu anna Sia'u, wuṛṛu su tempo Ia'u marou, iamui nangagillu ua'e Sia'u. Ia'u sangkatou raho, iamui nanarimmatta Sia'u su waḷenu. ³⁶Ia'u tawe laubba, iamui nangagillu laubba Sia'u. Ia'u maradda'a iamui nangundamma Sia'u, Ia'u su ruumanna, iamui nantuluṅ-Ku.'

³⁷See manga taumata udde sarun mabbisara, 'Mawu, angngerate iamui naasilo Mawu maḷunussa see iamui napaannu Mawu, ara'e marou see iamui napa'inummu Mawu? ³⁸Angngerate iamui naasilo Mawu ere sangkatou taumata raho, see iamui nanaḷoho Mawu su waḷe ng kami? Su tempo suapa Mawu tawe laubba see iamui nangagillu laubba? ³⁹Su tempo suapa iamui naasilo Mawu maradda'a ara'e su ruumanna, see iamui nantuluṅngu Mawu?' ⁴⁰Ratu udde sarun sumimbakka, 'Asingkate: su tempo iamui ma'ola'a inolaanna udde, salaiwe su wallattu sangkatou taumata wuassu manga tuṛrangku apan addio'anne, ere lai iamui na'ola'a Sia'u!

⁴¹See ratu udde sarun mabbisara su manga taumata su samba'a airrine, 'Roote wua isindi, manga taumata laḷeo! Suttate sulaḷummu putungnga apan tawe iapadumma, apan suete nissaddia su Setanna wuṛṛu su manga raloḷorṛanne! ⁴²Ana waugu su tempo Ia'u maḷunussa, iamui

tawe nangagillu anna Sia'u; su tempo Ia'u marou, iamiu tawe nangagillu ua'e Sia'u. ⁴³Ia'u taumata raho, iamiu tawe nanarimmatta Sia'u sulalummu walenu. Ia'u tawe laubba iamiu tawe nangagillu laubba Sia'u. Ia'u maradda'a wurru su ruumanna, iamiu tawe nantulungku.' ⁴⁴See imangitou sarun mabbisara Sitou, 'Mawu, su tempo suapa iami naasilo Mawu malunussa, ara'e narou, ara'e ere sangkatou raho, ara'e tawe laubba, ara'e maradda'a ara'e su ruumanna, wurru iami tawe nantulungngu Mawu?' ⁴⁵Ratu udde sarun sumimbakka, 'Asingkate: su tempo iamiu madiri mantulungngu sangkatou taumata asusane ereindi, ere lai iamiu madiri mantulungku.' ⁴⁶Ne manga taumata udde sarun irruumanna ringannu ruumanna ma'oma n sara malannu-lannu, arawe manga taumata apan tutturutta apulu Mawu Ruata sarun maappendamma pabbiakka tutune saran malannu-lannu."

Mangngaalla su saruannu Mawu Yesus

(Mrk. 14:1-2; Luk. 22:1-2; Yoh. 11:45-53)

26 Su tempo Mawu Yesus nasue mangngarra'u manga alarra'a udde, Itou nabbisara su manga mallalarrenggen-Ne, ²"Iamiu masingkatta tillorege Allo Wahewa m Paskah, wurru Ana'u Taumata sarun itantilla iapaarussa!"

³Su tempo udde manga imam tembonanne wurru piarra'u Yahudi maammulla su wale n araratuannu Imam Wahewa Kayafas. ⁴Imangitou ma'ire manametta Mawu Yesus ringannu malanna-lannaba, wurru mate Sitou. ⁵"Arawe," unni mangitou, "imbarangnga olangnge udde olaanna su tempo allo wahewa, ana wagu takka maola'a hio su wallattu tumana'u soa."

Mawu Yesus niwoborrannu lana mawangngi su Betania

(Mrk. 14:3-9; Yoh. 12:1-8)

⁶Su tempo Mawu Yesus su Betania, su wale n Simon apan dorone uatatarangnga radda'a paro, ⁷sangkatou wawine nirumanta ringannu Mawu Yesus. Itou uaapiddu wotolla sambau, lalorrone lana mawangngi apan maarega. Su tempo Mawu Yesus tantanna uaianna u'anna, wawine udde namobokku lana mawangngi udde su pua Mawu Yesus. ⁸Manga mallalarrenggennu Mawu Yesus naasilo olangnge udde mangke namulo, "Apa hunane sarangkanambone indi mangke iradamme tawe mangalene?" unni mangitou. ⁹"Lana mawangngi udde wo-

tongnge iwaŕu'a ringannu aregane apan masaggada, wuŕru roinne ionggolla su taumata asiangnga!"

¹⁰Mawu Yesus naasingkatta ringiŕranni mangitou, see Itou nabbisara, "Anio iamiu mapaasusa n wawine indi? Itou na'ola'a inolaanna apan mapia wuŕru mawantuga Sia'u. ¹¹Taumata asiangnga sidutu isudde su wallatti amiu, arawe Ia'u tawe maŕannu su sampunna ringanni amiu. ¹²Ringannu namobokku lana mawangngi udde su wadanku, itou na'ola'a saddia'u su pallaŕabingku. ¹³Pangimante! su ahewallu runia, suapan tampa Watti'u Aŕaŕuassa wuassu Mawu Ruata iapasingkatta, inolaannu wawine indi sarun iwatti'a lai maola'a pananaunganna Sitou."

Yudas maapulu mamate Mawu Yesus

(Mrk. 14:10-11; Luk. 22:3-6)

¹⁴See sangkatou wuassu wallattu sire mapuŕo dua mallaŕa-ŕrenggennu Mawu Yesus, aranne Yudas Iskariot, inaita ringannu manga imam tembonanne. ¹⁵Itou nabbisara simangitou, "Apa sarun ionggolli amiu sia'u, amungkangngu ia'u manantillu Mawu Yesus siamiu?" Ne imangitou nandeengngu tallu m puŕo roitta saŕa'a, see nionggole roitta udde sitou. ¹⁶Nanattakka wuassu tempo udde Yudas maddea'a tempone apan mapia ipandaŕeo Mawu Yesus.

Mawu Yesus inumanna annu Paskah ringannu mallaŕarŕenggen-Ne

(Mrk. 14:12-21; Luk. 22:7-14, 21-23; Yoh. 13:21-30)

¹⁷Su allo paarorone su Allo Wahewa n Roti Tawe Ragine, manga mallaŕarŕenggennu Mawu Yesus nirumanta ringanni Tou. Imangitou naiwaŕo, "Suapa tampane ipaapulu n lamangnga iami manaddia annu Paskah n lamangnga?"

¹⁸Mawu Yesus sinumimbakka, "Roote ringannu sangkatou su soa wuŕru waŕoa'a sitou, Tanata n lamangnga Huru, ina'omante tempone Sia'u, Ia'u maapulu maddamea m Paskah su waŕenu, su sampunna ringannu mallaŕarŕenggeng-Ku."

¹⁹Manga mallaŕarŕenggennu Mawu Yesus tinumuŕutte apa apan nirolokku Mawu Yesus simangitou. Imangitou inaita nanaddia annu Paskah.

²⁰Napawe ŕabbite, Mawu Yesus wuŕru sire mapuŕo dua mallaŕarŕenggen-Ne inuma'iante wuŕru inumanna. ²¹Tantaŕanna imangitou

u'anna, Mawu Yesus nabbisara, "Paddaringikka: Sangkatou wuassu wal-latti amiu sarun mandaleo Sia'u."

²²Naaringikka aroddi, mallalarrengennu Mawu Yesus mangke nasusa. See imangitou, sangkatou ringannu sangkatou nanattakke naiwalo Mawu Yesus, "Walineuwe ia'u apan su pandumanni lamangnga udde?"

²³Mawu Yesus sinumimbakka, "Taumata apan nangammo n roti sulalummu mangko su sampunna ringanku, ete itou sarun mandaleo Sia'u. ²⁴Atonna Ana'u Taumata sarun mate ere uaworretta sulalummu Wuke Susi. Arawe nasilakate taumata apan mandaleo Ana'u Taumata! Mappianne taumata udde tawe niasungkangnga!"

²⁵See Yudas taumata laleo udde nabbisara, "Atonna walineuwe ia'u apan pandumanni lamangnga Huru?"

Mawu Yesus sinumimbakka, "Aroddi ere su wisaranu!"

Saliwangnu Mawu

(Mrk. 14:22-26; Luk. 22:14-20; 1Kor. 11:23-25)

²⁶Su tempo imangitou u'anna, Mawu Yesus nanganute roti, see inumaliomanna naadiangkamanna. Wua udde itou nattahiate roti ringannu lima-Ne nionggole su mallalarrenggen-Ne ringannu wisara-Ne, "Sengkampe, wurru ante; indi wadang-Ku."

²⁷Wua udde Itou nanganute mangko n anggore sambau, see naadiangkamante su Mawu Ruata. Wua udde Itou nangagillu mangko udde su mallalarrenggen-Ne ringannu wisara-Ne, "Pa'inumpe, iamiu sarangkanambone. ²⁸Ana waugu indi rarra-U apan mannohassa paaire Mawu Ruata rarra apan niapaturo ana waugu taumata nambo wurru ipangampungnga rosa mangitou. ²⁹Pangimante: Ia'u tate ma'inumma anggore indi apia ma'oma n sara tempone Ia'u ma'inumma anggore wakku su sampunna ringanni amiu su Araratuannu lamangku."

³⁰Wua udde imangitou nangantari n sambau antari daralo. Wurru wua udde imangitou inaita watukku Wuiddu Zaitun.

Papasingkatta manungku Petrus sarun massinaadu Mawu Yesus

(Mrk. 14:27-31; Luk. 22:31-34; Yoh. 13:36-38)

³¹See Mawu Yesus nabbisarate su mallalarrenggen-Ne, "Rabbi indi lai iamiu sarangkanambone tumalangnga manantang-Ku; ana waugu sulalummu Wuke Susi uaworretta, Mawu Ruata nabbisara, 'Ia'u sarun mamate mallalu'adda udde, wurru ammulannu dombane sarun mas-

saljawukka.' ³²Arawe napawe Ia'u niapawangunna apia, Ia'u sarun inai malliu roro siamiu su Galilea."

³³Petrus nabbisara Mawu Yesus, "Wala'e imangitou nambo manantangngu Iamangnga, ia'u tawe manantangnga!"

³⁴"Naunge," unnu Mawu Yesus sitou, "Rabbi indi lai, tantañanna manu'a taambe inumu'u, paatallute i'o massinaa-U."

³⁵Petrus sinumimbakka, "Salaiwe ia'u rinone mate ringannu Iamangnga, ia'u tawe mabbisara manungku ia'u tawe maaillañ Iamangnga!"

Wurru manga mallañarnggen-Ne waine nabbisara aroddi lai.

Mawu Yesus inumaliomanna su Getsemani

(Mrk. 14:32-42; Luk. 22:39-46)

³⁶Wua udde Mawu Yesus inaita ringannu manga mallañarnggen-Ne su sambau tanpa aranne Getsemani. Poiaroddi Itou nabbisara simangitou, "A'iante isindi tantañanna Ia'u inai umaliomanna." ³⁷See Itou nangahe si Petrus wurru rua ng katou ana'i Zebedeus inai su sampunna ringanni Tou. Itou nanattakke maappendamma susa wurru sussingawangnga. ³⁸Itou nabbisara su mallañarnggen-Ne, "Naungku tumanite massusa, pendamanna ere matete. Atana'e iamiu isindi, wurru pandiagate su sambau ringang-Ku."

³⁹Wua udde Mawu Yesus inaita marau addio'a, see Itou inumalintuda su leta'a wurru inumaliomanna. "Iamangnga," wisara-Ne, "amungkangngu wotongnge, paaraua'a wuassia'u asasusa apan marria'a Sia'u indi. Arawe arie tumuruttu apulu-U, arawe tumuruttu apulu n Iamangnga sassane."

⁴⁰Wua udde Mawu Yesus nabelengke apia ringannu sire tallu mallañarnggen-Ne, wurru inaratinganna imangitou mattiilla. Itou nabbisara si Petrus, "Tumba'u sangka orassa, iamiu n tallu tawe maatarangnga mandiaga ringang-Ku? ⁴¹Paariagate wurru aaliomante tadea'u iamiu tawe maasomba wawono'a. Atonna gharrahonu maapuluma'ola'a apapia, arawe iamiu tawe maatarangnga ana waugu pallañagu n taumata udde lome."

⁴²Apia lai Mawu Yesus inaita inumaliomanna, wisara-Ne, "Iamangnga, amungkangngu asasusa indi sarun marria'a Sia'u wurru tate ialinda'a, apulu-Nu ariadite Iamangnga." ⁴³Wua udde Mawu Yesus nabelengke apia, wurru inaratinganna mallañarnggen-Ne ta'e mattiilla, ana waugu imangitou tumanite n aamatiilanna.

⁴⁴Apia lai Mawu Yesus nanantangngi mangitou wurru su atallunete lai inumaliomanna nabbisara wisara apan uasulungnga. ⁴⁵Wua udde Itou nabelengke apia ringannu mallañarnggen-Ne wurru nabbi-

sara, "Ta'e lai mattiilla iamiu wurru mangngillo Pa'ellega, nia'omante tempone Ana'u Taumata itantilla su lima n taumata marosa. ⁴⁶Pabbangunte, wette iite inaite. Pa'ellega! Taumata apan mandaleo Sia'u uddete!"

Mawu Yesus sinametta

(Mrk. 14:43-50; Luk. 22:47-53; Yoh. 18:3-12)

⁴⁷Tantalanna Mawu Yesus ta'e uahahatto, Yudas, sangkatou wua-ssu wallattu sire mapulo dua mallalarrenggen-Ne udde nirumanta. Sua-ddio'a ringanni tou, nirumanta lai taumata manambo apan uaapiddu halele wurru papuulla. Imangitou nirolokku manga imam tembonanne, wurru piarra'u Yahudi. ⁴⁸Iapa mandaleo, suete nabbalo simangitou tatialane indi, "Taumata apan ta'u ari'anna, eteudde taumata-Ne. Same-tte Itou!"

⁴⁹Aroddi na'omate su tampa udde, Yudas lapiddu inai ringannu Mawu Yesus wurru nabbisara, "Tabea, lamangnga Huru!" See itou nangaria'a Mawu Yesus.

⁵⁰Mawu Yesus sinumimbakka, "Turangnga, apa pandumannu rumanta isindi?"

Wua udde taumata nambo udde nilumempangnga lapiddu nanametta Mawu Yesus. ⁵¹Su wallattu mallalarrenggen-Ne pia sangkatou isudde lai ringannu Mawu Yesus, nanawutta halelene wurru namilitta allangngu imam wahewa udde na'oma n sara talingane nattaiei. ⁵²Mawu Yesus nabbisara su mallalarrenggen-Ne udde, "Sutta'e apia halelenu su romane, ana waugu anambo n taumata apan ahide halele sarun pateannu halele. ⁵³Su naungngu Ia'u tawe maarorongnga tulunganna wuassi lamangku, wurru Itou ringannu malihakka mandolokku mapulo dua pia lebbene wageangngu tantara mala'ekatta? ⁵⁴Arawe amungkangngu aroddi, ere-apa wotongnge mariaddi maola'a ere suete niapaasingkatta sulalummu Wuke Susi manungku rinone sarun mariaddi ere su orassa indi?"

⁵⁵See Mawu Yesus nabbisara su taumata manambo udde, "Apa Ia'u indi taumata laleo, na'oma n sara iamiu nirumanta ringannu uaapiddu halele wurru papuulla ipanametta Sia'u? Miallo-miallo Ia'u mangngarra'a su Wale Mawu, arawe iamiu tawe manametta Sia'u. ⁵⁶Arawe atonna narriote aroddi tadea'u matipusse apa apan uiworrettu manga nabi sulalummu Wuke Susi."

Wua udde, manga mallalarrenggen-Ne tinumalangke nanantangngu Mawu Yesus.

Mawu Yesus su saruannu Mallaṛṛuungngu Agama

(Mrk. 14:53-65; Luk. 22:54-55, 63-71; Yoh. 18:13-14, 19-24)

⁵⁷Manga taumata apan nanametta Mawu Yesus nangapidde Mawu Yesus su waḷe n Imam Wahewa Kayafas. Poiaroddi manga huru n agama wuṛṛu piaṛṛa'u Yahudi uaammulle. ⁵⁸Petrus uantantalongnga Mawu Yesus wuassu marau na'oma n sara su passalangannu waḷe n imam wahewa. See Petrus sinumuttate su passalanganna, wuṛṛu inuma'ianna su sampunna ringannu mandariaga. Itou maapulu maa-singkatta ereapa panginsueanne sarangkanambone udde. ⁵⁹Manga imam tembonanne wuṛṛu anambo Mallaṛṛuungngu Agama mangke mam-mata'a maasomba tatiala awusu apan wotongnge maṛṛawessa manungku Mawu Yesus iṛṛuumanna ma'oma n sara mate. ⁶⁰Arawe imangitou tawe maasomba saran sambau pasasaḷa, salaiwe manambo apan nirv-manta mattiala awusu. Panginsueanne pia rua ng katou nirumanta su sa-ruanne. ⁶¹Imangitou nabbisara, "Taumata indi mabbisara, 'Ia'u wotong-nge mapaaṛṛa'a n Waḷe Mawu, wuṛṛu sulaḷummu tallu allo wotongnge mapararisikka apia.'"

⁶²See imam wahewa nirumarisikka, wuṛṛu nabbisara Mawu Yesus, "Apa I'o tawe sumimbakka alae apan ipa'iwaḷo Si'o?" ⁶³Arawe Mawu Yesus maḷannaba. Paassa lai imam wahewa nabbisara Sitou, "Ringannu arannu Mawu Ruata apan wiakka, Waḷoa'e siami apa ete I'o Ratu m Punnu Saḷamatta, Ana'u Mawu Ruata?"

⁶⁴Mawu Yesus sinumimbakka, "Aroddite ere su wisaranu. Arawe pangimante: manattakka orassa indi iamiu sarun maasilo Ana'u Tau-mata uma'ianna su samba'a n uanannu Mawu Ruata Lembo Mataṛṛino, wuṛṛu rumanta sulaḷummu winabbawa wuassu langitta!"

⁶⁵Ne imam wahewa udde nanggesa'a laungnge, wuṛṛu nabbisara, "Itou mangngaddio'a Mawu Ruata! Tawe gunane lai madea'a sakassi. Iamiu sarangkanambone suete naaringikka sassane manga wisara apan ipangngaddio'a Mawu Ruata.

⁶⁶Orassa indi ereapa adapatti amiu?"

Imangitou sinumimbakka, "Itou nassaḷa wuṛṛu ṛinone pateanna."

⁶⁷See imangitou nangaddu hati Mawu Yesus, wuṛṛu namuulla Sitou. Piaddu lai namero Sitou, ⁶⁸wuṛṛu nabbisara, "Si'ata'a wuṛṛu pasingkata'a siami, ei Ratu m Punnu Saḷamatta! Isai namero Si'o?"

Petrus nassinaaddu Mawu Yesus

(Mrk. 14:66-72; Luk. 22:56-62; Yoh. 18:15-18, 25-27)

⁶⁹Petrus tantaḷanna ua'ianna su liudde, su rallakka. Sangkatou mangangimbe wawine wuassu wallattu wawine isudde nirumanta, wuṛṛu nabbisara Petrus, "Waḷinewe i'o lai su sampunna ringannu Mawu Yesus taumata n Galilea udde?"

⁷⁰Arawe Petrus nassinaadda su saruanni mangitou sarangka-nambone, "Ia'u wagga apa pandumannu," sasimbakki Petrus, see itou inaite watukku ngara m passalanganna. ⁷¹Sangkatou mangangimbe wawine apan waine lai naasilo si Petrus, wuṛṛu nabbisara su manga tau-mata isudde, "Taumata indi lai tanginna su sampunna ringannu Mawu Yesus wuassu Nazaret udde!"

⁷²See Petrus nassinaadde apia, wuṛṛu nassalu. "Atonna-tonna ia'u wagga n taumata udde!" unni Petrus.

⁷³Tawe naḷannu wua udde, manga taumata apan uarisikka isudde nirumanta ringanni Petrus, wuṛṛu nabbisara, "Atonna-tonna i'o sangkatou wuassu wallatti mangitou. Udde naillaḷanna wuassu pabbawisanu."

⁷⁴See Petrus nanattakke mangke massalu wuṛṛu mabbisara, "Ia'u wagga n taumata udde!"

Orassa udde lai manu'a inumuute. ⁷⁵Wuṛṛu Petrus naanaungke manungku Mawu Yesus suete nabbisara sitou, "Tantaḷanna manu'a taambe niumu'u, i'o paatallute massinaa-U." See Petrus sinumabangnga, wuṛṛu nilumuaite ringannu massusa.

Mawu Yesus niapidda ringanni Pilatus

(Mrk. 15:1; Luk. 23:1-2; Yoh. 18:28-32)

27 Ruaallo atonna, manga imam tembonanne wuṛṛu piaṛṛa'u Yahudi naṛrawesse manungku Mawu Yesus pateanna. ²Imangitou naṛrapussa Sitou, wuṛṛu nangapiddi Tou, see tinantilla si Pilatus, gubere-nure n araratuannu Roma.

Apapate n Yudas

(WMR. 1:18-19)

³Napawe Yudas mandaḷaḷeo udde naasilo manungku Mawu Yesus suete nianggiḷannu ruumanna, itou sinumassille. See itou nanguḷete n roitta tallu m puḷo roitta saḷa'a udde su manga imam tembonanne wuṛṛu

piarra'u Yahudi. ⁴Itou nabbisara, ia'u suete na'ola'a rosa nandaleo taumata tawe sałane, na'oma n sara Itou nirruumanna pateanna!

Arawe imangitou sinumimbakka, "Masingkattu apa iami? Udde singkannu!"

⁵Yudas nallombo n roitta udde sulałummu Wałe Mawu, see napułe wuřru nangele n watanganne.

⁶Manga imam tembonanne namurutta roitta udde wuřru nabbisara, "Roitta indi roitta ıraıra. Tumuruttu atorannu agama, roitta indi tawe wotongnge itarro sulałummu tampa n aonggolla su Wałe Mawu." ⁷See napawe imangitou na'irete, imangitou nappaatte n roitta udde nipamalli leta'a apan nisaggo Leta'u Maaola'a Urinna. Leta'a udde nipaatta pallabingannu taumata raho. ⁸Ana waugu udde na'oma n sara allo indi leta'a udde nisaggo "Leta'a ıraıra".

⁹Ringannu aroddi, natipusse apa apan suete niapasingkatti Nabi Yeremia, eteudde, "Imangitou nanengkamma tallu m puło roitta sała'a, eteudde arega apan suete pina'ire m pabbawalagu Israel maola'a wawaekki Tou. ¹⁰Wuřru roitta udde suete nipaatti mangitou pinamalli leta'u maaola'a urinna, ere apa apan suete niparenta Mawu sia'u."

Pilatus namarikissa hatto Mawu Yesus

(Mrk. 15:2-5; Luk. 23:3-5; Yoh. 18:33-38)

¹¹Su tempo Mawu Yesus sinumaruanna Pilatus, gubernure su wanua udde, Pilatus naiwało, "Apa i'o ratu n taumata n Yahudi?"

"Ere su wisaranu," sinimbakku Mawu Yesus. ¹²Arawe su tempo manga imam tembonanne wuřru piarra'u Yahudi napasabangngu anambo n alae su ola'u Mawu Yesus, Itou tawe sinumimbakka saran addio'a.

¹³Ana waugu udde Pilatus nabbisara Sitou, "Apa i'o tawe maaring-ikka aławo'u alae mangitou ipangalaenu?"

¹⁴Arawe Mawu Yesus tawe sinumimbakka saran addio'a na'oma n sara gubernure udde mangke naherangnga atonna.

Mawu Yesus irruumanna pateanna

(Mrk. 15:6-15; Luk. 23:13-25; Yoh. 18:39-19:16)

¹⁵Su anambo n Ramea m Paskah, gubernure inaramanne mam-mallossu sangkatou ruumanna tumuruttu apulu n awadaalla. ¹⁶Su tempo udde pia sangkatou ruumanna apan niasingkatante n taumata nambo. Aranne Yesus Barabas. ¹⁷Nariaddi, su tempo taumata nambo

naammulle, Pilatus naiwało simangitou, "Isai su apulu ng kamiu, ta'u ipallossa? Yesus Barabas ara'e Mawu Yesus apan isassaggo lai Kristus?" ¹⁸Pilatus nabbisara aroddi ana waugu itou masingkatta manungku manga tembonannu Yahudi nanantillu Mawu Yesus sitou ana waugu imangitou tawe maļuassa sitou.

¹⁹Su tempo Pilatus tantałanna ua'ianna su wałe m pamarikisanna, awingnge nananata sitou ereindi, "Arie i'o lumalo'a su hatto n taumata apan tawe sałane udde, ana waugu ete Itou, ia'u niwałiawannu wałiawa apan maata'utta allo indi." ²⁰Arawe manga imam tembonanne wurru piařra'u Yahudi mangke mammata'u taumata nambo udde, iaparorongnga si Pilatus tadea'u Barabas ipallossa wurru Mawu Yesus iřruumanna sara mate. ²¹See gubernure udde naiwało apia simangitou, "Wuassu wallatti tarua indi, isai sarun ipallossa tumuřruttu apulu ng kamiu?"

"Barabas," sasimbakki mangitou.

²²"Amungkangngu aroddi, ia'u řinone ma'ola'a apa su Mawu Yesus apan isassaggo Kristus?" aiwało m Pilatus simangitou.

"Arussa'a Itou!" sasimbakki mangitou sarangkanambone.

²³"Arawe apa ałaleone?" aiwało m Pilatus.

See imangitou inumui lembo n aikkanne lai, "Arussa'a Itou!"

²⁴Panginsueanne Pilatus naatutukka, manungku itou tawe wotongnge maaola'a apa-apa lai wurru manungku manga taumata udde asinungka sarun mamangalo. Nariaddi itou nanganu ua'e, see su saruannu taumata nambo udde itou nangukkassa limane wurru nabbisara, "Ia'u tawe sałane su apapate n taumata indi! udde manarate ng kamiu!"

²⁵Awadaalla udde sinumimbakka, "Ore, wala'e siami wurru manga ałarra'ana'i ami mamasanna řuumanna wuassu papate-Ne!"

²⁶See Pilatus namallose m Barabas simangitou, wurru nandolokku taumata namuulla Mawu Yesus; wurru nanantilli Tou niapaarussa.

Manga tantara mannalangnga Mawu Yesus

(Mrk. 15:16-20; Yoh. 19:2-3)

²⁷Wua udde manga tantara m Pilatus nangapidde Mawu Yesus sumutta su wałe n gubernure, wurru anambo n tantara udde naammulla namałiwutta Mawu Yesus. ²⁸Imangitou nalluatta laubbu Mawu Yesus, wurru nilluřreannu jubah ungu. ²⁹Imangitou na'ola'a sambau araposa mararatu wuassu manga ranna ng kalu řoaanna wurru niluře su pua Mawu Yesus. Wua udde imangitou nangagillu ta'inna su lima aikkatan-Ne, see inumałintuda su saruan-Ne wurru mangngałuandaga Sitou. "Tabea ratu n taumata n Yahudi!" unni mangitou. ³⁰Imangitou nangaddu Sitou, wurru nanganu ta'in-Ne udde, see nipuulla su pua-Ne.

³¹Napawe suete nannalangnga Sitou, imangitou nalluatte jubah ungu udde see nillurreante n laung-Nge apia. Wua udde Itou niapidde su liudde ana iarussate.

Mawu Yesus niarussa

(Mrk. 15:21-32; Luk. 23:26-43; Yoh. 19:17-27)

³²Su tangnga n dalanna, imangitou nassomba n sangkatou wuassu Kirene aranne Simon. Imangitou namata'u taumata udde mamasanna alu arussa Mawu Yesus. ³³Wua udde imangitou na'omate su sambau tampa apan isassaggo Golgota, atappasanne "Tampa n Tangilala". ³⁴Isudde imangitou napa'inummu anggore su Mawu Yesus apan nilo'annu paddu. Arawe napawe Mawu Yesus naattemma anggore udde, Itou madiri ma'inumma.

³⁵Wua udde imangitou nangarussate n Tou, wurru nattahia laung-Nge ringannu niundi. ³⁶Wua udde imangitou inuma'ianna mandiaga Sitou poiarddi. ³⁷Su pua-Ne imangitou nangado n worretta su ola'u pinangalae n Tou eteudde: "Indiwe Mawu Yesus ratu n taumata n Yahudi". ³⁸Su sampunna ringanni Tou, imangitou nangarussa n rua ng katou lai tarra rampassa; sangkatou su samba'a uanan-Ne, wurru sangkatou lai su samba'a airri-Ne.

³⁹Manga taumata apan sinumabbi isudde mangke uapapa'ilingnga wurru mangngaddio'a Mawu Yesus. ⁴⁰Imangitou mabbisara, "I'o apan manggohakku Wale Mawu, wurru mapararisikka apia sula'ummu tallu allo! Amungkangngu I'o Ana'u Mawu Ruata, lintukke wuassu alu arussa udde, wurru pana'lamatte riri-Nu!"

⁴¹Aroddi lai imam tembonanne wurru manga huru n agama see lai manga pia'ra'u Yahudi mangnga'landaga Mawu Yesus. Imangitou mabbisara, ⁴²"Itou manalamatta taumata waine, arawe riri-Ne sassane tawe iasalamatti Tou! Amungkangngu Itou ratu n taumata n Israel, mappianne Itou orassa indi sumossokka wuassu alu arussa udde, wakkute udde iami mangngimanna Sitou. ⁴³Itou mangngimanna Mawu Ruata wurru mabbisara manungku Itou Ana'u Mawu Ruata. Ne, wette iite ma'ellega tanne Mawu Ruata manalamatta Sitou orassa indi."

⁴⁴Manga tarra pate apan uarussa ringanni Tou udde lai, ewe'e mangnga'landaga lai Sitou.

Apapate Mawu Yesus

(Mrk. 15:33-41; Luk. 23:44-49; Yoh. 19:28-30)

⁴⁵Su allo allatune, alannune tallu ng ka'orassa ahewallu wanua udde naddandumma. ⁴⁶Puulla tatallu wawallo, Mawu Yesus nangintuli

ringannu tingikka ma'ikkatta, "Eli, Eli, lama sabakhtani?" atappasanne, "Oh Mawu, Oh Ruata-U, anio I'o nanantang-Ku?"

⁴⁷Sire pira taumata isudde naaringikka aintuḷi udde, wuṛṛu nabbisara, "Itou mammaggo si Elia!" ⁴⁸Sangkatou wuassi mangitou ringannu maḷihakka nanganu wunga n sahatta, wuṛṛu inammo sulaḷummu anggore mapakkadda. Wua udde itou nangusu'u pentakku alu sampaddi su wunga n sahatta udde wuṛṛu tinogokka su wiwikku Mawu Yesus.

⁴⁹Arawe manga taumata waine nabbisara, "Paṛṛado, wette iite ma'ellega asinungka Elia rumanta manaḷamatta Sitou!"

⁵⁰Wua udde Mawu Yesus nangintuḷi apia ringannu tingikka apan ma'ikkatta, see sinumangngo n sasangngo panginsueanne.

⁵¹Pampele apan ua'ele sulaḷummu Waḷe Mawu nahesa'a natahia darua, wua doso na'oma n sara wowane. Runia inumio'a wuṛṛu manga wuiddu watu napesangnga. ⁵²Manga laḷabinganna nawu'a, wuṛṛu manambo laḷorṛo n araratuannu Mawu Ruata apan natete nabbiakka apia. ⁵³Imangitou sinumabangnga wuassu manga laḷabinganna napawe Mawu Yesus nabangunte wuassu papate, wuṛṛu imangitou sinumuttate su Yerusalem. Wuṛṛu poiaroddi manambo taumata naasilo simangitou.

⁵⁴Tembonannu tantara wuṛṛu manga tantara apan tantaḷanna uariaga Mawu Yesus, mangke matta'utta su tempo naappendamma linukka wuṛṛu aḷawo'u apa apan suete nariaddi udde. Imangitou nabbisara, "Atonna, Itou indi Ana'u Mawu Ruata!"

⁵⁵Isudde pia lai manambo wawine apan ua'ellega wuassu marau. Ete imangitou udde apan suete tinumantalongnga Mawu Yesus, nantuluṅngi Tou ro'e n wuassu Galilea. ⁵⁶Su wallatti mangitou eteudde Maria Magdalena, Maria inangngi Yakobus wuṛṛu Yusuf, wuṛṛu inangngu aḷarṛana'i Zebedeus.

Pallaḷabingngu Mawu Yesus

(Mrk. 15:42-47; Luk. 23:50-56; Yoh. 19:38-42)

⁵⁷Rabbi udde nirumantate sangkatou taumata ala wuassu Arimatea, aranne Yusuf. Itou lai sangkatou mallalaṛṛenggennu Mawu Yesus. ⁵⁸Itou inaita ringanni Pilatus, wuṛṛu naddorongnga winaḷunannu Mawu Yesus. See Pilatus namarentate tadea'u winaḷunannu Mawu Yesus ionggolla si Yusuf. ⁵⁹Ne, Yusuf nanganute winaḷunanna udde, wuṛṛu pinapi'unnu maḷarṛnessa wuassu linen apan wakku. ⁶⁰See itou nanga-dote n winaḷunannu Mawu Yesus sulaḷummu laḷabinganna wageangnge sassane apan suete niola'a su sambau wowo n watu. Wua udde itou nanaḷinggi n sambau watu pinalindumma ngara n laḷabinganna udde,

see napulete. ⁶¹Maria Magdalena wurru Maria apan waine tinangngone ua'ianna uasaruanna labingnga udde.

Manga mandariaga su laḷabinganna

⁶²Su tirrabbine, su allo n Sabatta, manga imam tembonanne wurru manga taumata n Farisi inaita su sambau sinumaruanna si Pilatus ⁶³wurru nabbisara, "Mawu, iami maanaungnga su tempo tarra awusu udde ta'e wiakka, Itou suete nabbisara, 'Napawe tallute allo Ia'u sarun mabangunna apia.' ⁶⁴Ana waugu udde rolorra'e taumata mandiaga laḷabinganna udde mapia-pia ma'oma n sara allo atallune, tadea'u mal-laḷarḷenggen-Ne tawe maapanna'o winalunan-Ne see mabbaḷo manga taumata manungku Itou nabangunte wuassu papate. Wurru pangangawusu panginsueanne indi sarun araleoanne wuassu paarorone."

⁶⁵"Iamiu pia tantara mandariaga," unni Pilatus si mangitou, "roote pandiaga laḷabinganna udde paapia-pia."

⁶⁶See imangitou inaita watukku laḷabinganna, nanegella watu laḷindumme wurru nangado mandariaga su saruane, tadea'u tawedu maawu'a laḷabinganna udde.

Pabawangunnu Mawu Yesus

(Mrk. 16:1-10; Luk. 24:1-12; Yoh. 20:1-10)

28 Napawe allo n Sabatta naliudde, su allo Misa ruaallo atonna, Maria Magdalena wurru Maria apan waine inaita na'ellega laḷabinganna udde. ²Inarḷombanganne pia linukka apan wahewalla. Sangkatou mala'ekattu Mawu sinumossokka wuassu surga see nami-linggu watu laḷindumme udde, wurru inuma'ianna su wowone. ³Hati Mala'ekatta udde naalihiidda sawallo wurru laungnge mawira atonna. ⁴Tantara mandariaga apan uariaga isudde mangke nata'utta na'oma n sara imangitou mangngindo, wurru naalihiidde ere taumata nate.

⁵Mala'ekatta udde nabbisara manga wawine udde, "Arie paata'utta! ia'u masingkatta iamiu maddea'a Mawu Yesus apan suete marussa udde. ⁶Itou tate baddi'a isindi. Itou nabangunte ere suete mapasingkan-Ne rorone. Wette pa'ellega tampa milallowangan-Ne. ⁷Orassa indi roote paaliha-lihakka, pasingkata'a su mallalaḷarḷenggen-Ne, 'Itou nabangunte, wurru orassa indi Itou inaita malliu roro wuassi amiu su Galilea. Poiaroddi iamiu sarun maasilo Sitou!' Paanaungete apa apan suete ta'u miwaḷo siamiu."

⁸Malihah-lihakka manga wawine udde nanantangngu lalabinganna udde. Ringannu apendamma matta'utta ualalo'a n lalussa, imangitou tinumalangnga naniasingkattu olangnge udde su mallalarrenggennu Mawu Yesus.

⁹Inarrombanganne Mawu Yesus nirumanta naisasomba manga wawine udde, wurru nabbisara, "Tabea!" See imangitou nirumanta nangundani n Tou, wua udde narra'uppa ledda-Ne wurru nassubba Sitou. ¹⁰"Arie paata'utta," wisara Mawu Yesus simangitou, "roote walao'a su manga turrangku, tadea'u imangitou inai su Galilea, poiaronddi imangitou sarun maasilo Sia'u."

Tantara mandariaga nangalae su manga imam tembonanne

¹¹Tantalanna manga wawine udde napulete, manga pira wuassu tantara mandariaga apan uariaga lalabinganna udde nabelengke watukku soa wurru nangalae su manga imam tembonanne anambo n apa apan suete nariaddi. ¹²Manga imam tembonanne udde na'irete ringannu manga piarra'u Yahudi, see nangagille n roitta apan manambo su mandariaga lalabinganna udde, ¹³wurru nabbisara, "Iamiu rinone mabbatti'a manungku mallalarrenggennu Mawu Yesus nirumanta su tempo rabbi wurru nanna'o winalunan-Ne su tempo iamiu mattiilla. ¹⁴Wurru amungkangngu gubernure maaringikka olangnge udde, iami sarun massa'lo'i tou tadea'u iamiu tawe maasomba asasusa apa-apa."

¹⁵Ne manga tantara mandariaga udde nanganute roitta, wurru na'ola'e ere suete nitanata simangitou. Ana waugu udde watti'a indi sidutu ta'e iwabatti'a su pattangngannu taumata n Yahudi na'oma n sara allo indi.

Mawu Yesus natingkapasilo m batangan-Ne su mallalarrenggen-Ne

(Mrk 16:14-18; Luk 24:36-49; Yoh 20:19-23; WMR 1:6-8)

¹⁶Sire mapulo assa mallalarrenggennu Mawu Yesus udde inaita watukku wuidda su Galilea ere suete nirolokku Mawu Yesus simangitou. ¹⁷Su tempo imangitou naasilo Mawu Yesus poiaronddi, imangitou inumalintuda nassubba Sitou. Arawe su wallatti mangitou ta'e piaddu lai hugago'a. ¹⁸Mawu Yesus nangundani mangitou wurru nabbisara, "Anambo n tarino su surga wurru su runia suete tinantilla Sia'u. ¹⁹Ana waugu udde roote su anambo n taumata su wowo n runia indi, ola'e

imangitou mallarṛenggeng-Ku. Sarṛanite imangitou ringannu arannu lamangnga, wurru Ana'a, wurru Gharṛaho Mawu Ruata. ²⁰Arṛa'ete imangitou tutturṛutta anambo n parenta apan suete niparenta-U siamiu. Wurru paanaunge, Ia'u sarun marṛundinganna siamiu saran panginsue-annu runia indi."

WATTI'U ALĀLUASSA APAN NIAPASINGKATTI MARKUS

WISARA TALAANE

Wuke m Watti'u Alāluassa wuassi *Markus* nitattakka ringannu pangau-anna: "Ete indi Watti'u Alāluassu Mawu Yesus Kristus, Ana'u Mawu Ruata". Sulalummu Watti'u Alāluassa udde, Mawu Yesus niapaḷiatta'a ere sangkatou apan manambo manara-Ne wuṛṛu masarṛaungnga. Sarṛaung-Nge udde inumaḷiatta'a sulalummu ereapa Itou mangngaṛṛa'a, sulalummu tarṛino-Ne su manga gharṛaho laḷeo, wuṛṛu pangangampungnga rosa. Mawu Yesus napaḷiatta'u watangan-Ne ere sangkatou Ana'u Taumata apan nanantillu niawa-Ne, tadea'u taumata maḷiu wuassu rosa.

Watti'a su ola'u Mawu Yesus su wuke indi tinala'a wuassu arariadi-Ne, wuṛṛu mangke masema-semakka. Manga pallaḷagu-Ne anamboanne a'olaanna su wisara wuṛṛu su alaṛrang-Nge. Nanansunna wuassu manga wisara panattarṛanne apan maautta su ola'i Yohanes Mananarṛani wuṛṛu su ola'u pananarṛani Mawu Yesus see wawono'a su riri-Ne, wuke *Markus* indi lapiddu mabatti'u pamamanara Mawu Yesus, nangillembo su manga inolaanna mapaapia n taumata marada'a apan suete niolang-Nge wuṛṛu su ola'u alaṛrang-Nge. Su wageangnge panginsueanne nabbati'a su ola'u arariadianna apan nariaddi su sangkamisa panginsueanne su allo m pabḷiarṛannu Mawu Yesus su runia indi, nangillembo su ola'u watangan-Ne niarussa wuṛṛu pabawangun-Ne wuassu papate.

Rua ng kawageanganna panginsueanne wuassu wuke *Markus*, apan sinutta sulalummu kurungnga wahewa, sarangkanambone sassunnanna waḷine worṛettu mamamorṛettu wuke Markus, arawe wuassu sangkatou taumata waine.

Lalorrone

Panattaranne	1:1-13
Manara Mawu Yesus su pattangngannu taumata su Galilea	1:14-9:50
Wuassu Galilea watukku Yerusalem	10:1-52
Sangkamisa panginsueanne su Yerusalem wurru su soa maranine	11:1-15:47
Pabawangunnu Mawu Yesus	16:1-8
Mawu Yesus namasilo m batangan-Ne wurru asasengkeng-Nge watukku surga	16:9-20

Nase n Yohanes Mananaŕrani

(*Mat. 3:1-12; Luk. 3:1-18; Yoh. 1:19-28*)

1 Ete indi Watti'u Aŕaŕuassa su ola'u Mawu Yesus Kristus, Ana'u Mawu Ruata. ²Watti'u Aŕaŕuassa udde nanattakka ere suete niwoŕretti Nabi Yesaya, arendi,

"'Ete indi raloŕoŕrang-Ku,' wisara Mawu Ruata;

'Ia'u nandolokki tou malliu ŕoro wuassi'o,

tadea'u itou mamu'a laŕan-Nu.'

³Pia taumata u'aliata su wadda'a,

'Saddiaite laŕannu Mawu

rataŕra'e manga laŕanna apan amatan-Ne.'"

⁴Ere lai uawoŕretta udde, aroddi lai Yohanes nirumanta su wadda'a. Itou mannaŕrani taumata wuŕru mammasingkattu watti'a wuassu Mawu Ruata. "Awaŕute iamiu wuassu manga rosanu, wuŕru ŕinone saŕranianna, tadea'u Mawu Ruata mangampungnga siamiu," aroddi unni Yohanes. ⁵Anambo n taumata wuassu wanua n Yudea wuŕru soa n Yerusalem matudda maddaringikka Yohanes. Imangitou nanga'u manga rosa mangitou, see Yohanes nanaŕranite simangitou su Saŕukku Yordan.

⁶Yohanes ualuŕre n laubba wuassu wambuŕu n unta. Papeŕrenne wuassu pisi m winatangnga, wuŕru wiakke alumbati'a wuŕru puŕa n ahuranganna. ⁷Itou namasingkattu watti'a indi, "Ŕaddoi wuassia'u sarun rumanta taumata apan maggewaŕanna wuassia'u. Umaruutta mamu'a taŕi n sapatu-Ne lai ia'u tawe su ŕinone. ⁸Ia'u mannaŕrani siamiu ringannu ua'e, arawe Itou sarun mannaŕrani siamiu ringannu Ghaŕraho Mawu Ruata."

Yohanes nanaŕrani Mawu Yesus

(*Mat. 3:13-17; Luk. 3:21-22*)

⁹Su tempo udde Mawu Yesus nirumanta wuassu Nazaret su wa-geangngu leta'u Galilea, wuŕru Yohanes nanaŕrani Sitou su Saŕukku Yordan. ¹⁰Aroddi Mawu Yesus nilumapputta wuassu saŕukka udde, Itou naasilo langitta nawu'a wuŕru Ghaŕraho Mawu Ruata naaŕihida ere manu'a merpati inumonto'a Sitou. ¹¹Wua udde niaringikka tingikku Mawu Ruata nabbisara, "Ete I'o Ana-U apan arangnguang-Ku. I'o maaŕuassa naung-Ku."

Mawu Yesus niwono'annu Setanna

(Mat. 4:1-11; Luk. 4:1-13)

¹²Wua udde Gharraho Mawu Ruata lapiddu nangapiddu Mawu Yesus su wadda'a. ¹³Appattu puḷo su allone Itou isudde, wabono'annu Setanna. Manga winatangnga matengnga, isudde lai su sampunna ringanni Tou, wuṛru manga mala'ekatta sidutu lai mangngimbe Sitou.

Mawu Yesus namago sire appata samakka

(Mat. 4:12-22; Luk. 4:14-15, 5:1-11)

¹⁴Napawe Yohanes niṛruumante, Mawu Yesus inaita su Galilea, wuṛru namasingkattu Watti'u Aḷaḷuassa wuassu Mawu Ruata poiaroddi. ¹⁵Wisara-Ne, "Tempone nia'omante Mawu Ruata mamarenta. Awaḷute wuassu manga rosanu, wuṛru pangimante Watti'u Aḷaḷuassa wuassu Mawu Ruata!"

¹⁶Su tempo Mawu Yesus u'amatta su winggi n Rano n Galilea, Itou naasilo rua ng katou samakka, eteudde Simon wuṛru tuarine Andreas. Itarua tantaḷanna mannoma inassa su rano. ¹⁷Mawu Yesus nabbisara simangitou, "Tantalongke Sia'u. Ia'u sarun mangarra'a siamiu mannoma taumata." ¹⁸Itarua lapiddu nanantangngu soma mangitou see tinumantalongke Mawu Yesus.

¹⁹Mawu Yesus lapiddu inumamatta, see naasilote lai rua sangkatuṛrangnga apan waine eteudde Yakobus wuṛru Yohanes, aḷarraṇa'i Zebedeus. Imangitou sulaḷummu saalanna, wuṛru tantaḷanna mannapi soma. ²⁰Mawu Yesus lapiddu namago sitarua. Ne itarua nanantangke n iamanggi mangitou sulaḷummu saalanna ringannu manga taumata n sewa mangitou. See itarua inaita tinumantalongnga Mawu Yesus.

Taumata apan niasuttannu gharraho laḷeo

(Luk. 4:31-37)

²¹Mawu Yesus wuṛru manga mallalaṛrenggen-Ne na'omate su soa Kapernaum. Su allo n Sabatta manansunna, Mawu Yesus sinumutta su waḷe m pattataṛramawuanna wuṛru nanattakke mangngarra'a. ²²Manga taumata apan uararingikka Sitou mangke naherangnga su ola'u ere-apa Itou mangngarra'a. Ana waugu, Itou mangngarra'a ringannu saṛraungnga, tawe ere pangangarra'u huru n agama.

²³Su tempo udde sangkatou apan niasuttannu gharraho laleo sinumutta sula lummu wale m pattata ramawuanna wurru u'ui. ²⁴"Ei Yesu, taumata Nazaret, I'o maapulu ma'ola'a apa ringanni ami? I'o rumanta mamate siami? Ia'u masingkatta isai I'o: Ete I'o ralojorranna apan na'ukkassa wuassu Mawu Ruata!"

²⁵"Paalannaba!" Mawu Yesu nandona gharraho udde, "Sabbangke wuassu taumata indi!"

²⁶Ne gharraho laleo udde nangio'u taumata udde maikka-ikkatta, wua udde sinumabangnga wuassu taumata udde lapiddu u'ui. ²⁷Anambo n taumata mangke naherangnga, na'oma n sara imangitou nabbisara sangkatou ringannu sangkatou, "Wah apa indi? Sambau alarra'a apan wakku? Ringannu sarraungnga wurru tarino Ito namarenta manga gharraho laleo udde sinumabangnga, wurru imangitou tinumurrutta Sitou!"

²⁸Ne watti'a su ola'u Mawu Yesu tinumelengke ringannu malihakka su ahewallu wageangngu leta'u Galilea.

Mawu Yesu napaapia n taumata manambo

(Mat. 8:14-17; Luk. 4:38-41)

²⁹Mawu Yesu wurru manga mallalarrenngen-Ne nanantangke m wale m pattata ramawuanna udde, wurru inaita su wale n Simon wurru Andreas. Yakobus wurru Yohanes inai lai su sampunna ringanni mangitou. ³⁰La'iananni Simon marada'a saljubba su tampa atatiilanne. Nariaddi su tempo Mawu Yesu wurru manga mallalarrenngen-Ne sinumutta su wale udde, Mawu Yesu niwaloannu olangnge udde. ³¹Ne Mawu Yesu nattuda n la'iananni Simon, wurru namita limane, see nantulunggi tou niapawangunna. Saljubbe nawuli wurru itou lapiddu nangimbe simangitou.

³²Su wawallone, napawe matannallo nattupe, manga taumata nangapidde ringannu Mawu Yesu anambo n taumata marada'a wurru taumata apan niasuttannu gharraho laleo. ³³Anambo n lallo n soa udde uarripulunna su passalangannu wale udde. ³⁴See Mawu Yesu napaapiate n anambo n taumata apan uatatarangnga alawo'u hati n rada'a, wurru nallimbuakke lai manga gharraho laleo. Ito tawe nanga-gillu tempone su manga gharraho laleo udde mabbisara, ana waugu imangitou masingkatta isai Ito udde.

Mawu Yesus nannase su Galilea

(Luk. 4:42-44)

³⁵Ruaallone, su tempo ta'e marřangapa atonna, Mawu Yesus nabangunte see nanantangke m waŕe. Itou inaita su tampa apan maŕannaba su liuddu soa, wuřru inumaŕiomante poiaronddi. ³⁶Arawe Simon wuřru manga ringanne inai nadea'a Sitou. ³⁷Wuřru napawe imangitou naasombate Sitou, imangitou nabbisara, "Manambo taumata maddea'a Iamangnga."

³⁸Arawe Mawu Yesus sinumimbakka, "Wette iite manassute amatanni ite su manga soa waine apan maranine isindi. Ia'u sarun mannase lai poiaronddi, ana waugu eteudde pandumanne Ia'u nirumanta isindi."

³⁹Ana waugu udde Mawu Yesus inaita su aŕawo'u tampa su ahewallu Galilea, wuřru mannase su manga waŕe m pattatařramawuanna, see mallimbuakka manga gharřaho laŕeo.

Mawu Yesus napaapia n sangkatou pia radangnge paro apan maarrantinna

(Mat. 8:1-4; Luk. 5:12-16)

⁴⁰Sangkatou apan pia radangnge paro apan maarrantinna nirumanta ringannu Mawu Yesus. Taumata udde inumaŕintuda, wuřru nabbisara, "Amungkangngu Iamangnga maapulu, Iamangnga wotongnge mangapia sia'u."

⁴¹Mawu Yesus inumakkannu taumata udde. Nariaddi Itou namita taumata udde lapiddu wisara-Ne, "Ia'u maapulu, apiate!" ⁴²Orassa udde lai radangnge nawuŕi wuřru itou napiate. ⁴³See Mawu Yesus nando-lokki tou napuŕe ringannu tanata indi, ⁴⁴"Naunge, arie mabatti'a sisai-sai, arawe roote ringannu imam wuřru padorongnga sitou manantunna manungku i'o napiate. See matatařrino su inapiannu wuassu radangngu udde, pangapidde n sasamba tumuřřuttu ere suete niparenta Musa, maola'a sambau pananaunganna su manga taumata manungku i'o atonna-tonna napiate."

⁴⁵Arawe taumata udde inaita, wuřru mangke tawe illoŕone mabatti'u inolaanna udde su aŕawo'u tampa, na'oma n sara Mawu Yesus tate naasutta su soa ringannu maŕuassa. Itou tumba'u uatana'a su liuddu soa su tampa apan maŕannaba. Arawe taumata sidutu lai rudanta ringanni Tou wuassu aŕawo'u tampa.

Mawu Yesus napaapia n sangkatou lome

(Mat. 9:1-8; Luk. 5:17-26)

2 Manga pira allo wua udde, Mawu Yesus nabelengke su Kapernaum. Ne tinumelengke watti'a manungku Itou tantaŋanna su waŋe. ²See manambo taumata nirumanta. Imangitou uarripulunna poiarddi na'oma n sara niasueannu tampa. Su ngara taumata mangke lai uasaseppe'a. See Mawu Yesus namasingkattu watti'a wuassu Mawu Ruata simangitou. ³Tantaŋanna Itou mabbisara, pia sire appatta uapasanna sangkatou lome apan iaapidda ringannu Mawu Yesus. ⁴Arawe ana waugu taumata tumanite manambo, imangitou tate naaundani Mawu Yesus. Nariaddi imangitou nalla'ete atuppa su lantakku Mawu Yesus. Wua udde imangitou nangulukku taumata udde sara wilanne. ⁵Su tempo Mawu Yesus naasilo tumanite m bahewa pangangimanne, Itou nabbisara taumata lome udde, "Ana'u, manga rosanu suete niampunganna."

⁶Manga pira huru n agama apan ua'ianna isudde, mannattakke uai-waŋo sulaŋummu naungnga, ⁷"Warani atonna taumata indi mabbisara aroddi! Itou mangngadio'a Mawu Ruata. Isai wotongnge mangampungnga rosa, waŋinewe tumba'u Mawu Ruata sassane?"

⁸Su tempo udde lai Mawu Yesus naasingkatta ringiranni mangitou. See Itou nabbisara, "Anio iamiu ma'iwalo sulaŋummu naungngu?" ⁹Suapa malluasanne: mabbisara, 'Rosanu suete niampunganna', ara'e mabbisara, 'Pabbangunte, lappute wilannu wuŋu amatte'? ¹⁰Arawe orassa indi Ia'u sarun mapaaŋiat'a siamiu, manungku su wowo n runia indi Ana'u Taumata pia tarŋino mangampungnga rosa." See Mawu Yesus nabbisara taumata lome udde, ¹¹"Pabbangunte, lappute wilannu wuŋu apulete!"

¹²Itou nabangunna wuŋu maŋiha-ŋihakka nanganu wilanne see sinumabangnga aellehanni mangitou saranganambone. Manga taumata udde naherangnga see nadalote Mawu Ruata. Unni mangitou, "Taambe saran paassa iite naasilo arariadianna ereindi!"

Mawu Yesus namago si Lewi

(Mat. 9:9-13; Luk. 5:27-32)

¹³Mawu Yesus nabelengnga apia su winggi n Rano n Galilea. Manambo taumata nirumanta ringanni Tou, ne Itou nangarra'e simangitou. ¹⁴Tantaŋanna Mawu Yesus u'aamatta isudde, Itou naasilo sangkatou madarorongnga wose aranne Lewi ana'i Alfeus, tantaŋanna ua'ianna su

wale m pammanaranne. "Tantalongke Sia'u," unnu Mawu Yesus sitou. Ne Lewi dirumarisikka wuŕru tinumantalongke Mawu Yesus.

¹⁵Su tempo Mawu Yesus tantaŕanna u'anna su wale n Lewi, nirumantate manambo manga madarorongnga wose wuŕru manga taumata apan su aellegu awadaalla taumata laŕeo, u'anna su sampunna ringannu Mawu Yesus wuŕru mallalaŕrenggen-Ne. Ana waugu manambo su wallatti mangitou uatantalongnga Mawu Yesus. ¹⁶Sire pira huru n agama wua-ssu wallattu taumata n Farisi naasilo Mawu Yesus u'anna su sampunna ringannu manga madarorongnga wose wuŕru manga taumata laŕeo. Nariaddi imangitou na'iwaŕo su mallalaŕrenggennu Mawu Yesus, "Anio hurunu u'anna su sampunna ringannu madarorongnga wose wuŕru manga taumata apan laŕeo udde?"

¹⁷Mawu Yesus naaringikka aiwaŕo mangitou udde, see sinumimbakka, "Taumata apan tawe marada'a tawe mappandumma doktere, tumba'u taumata marada'a. Ia'u nirumanta tawe mamago taumata apan uapendamma ririne mapiate, arawe taumata apan aellehanna araŕeoanne."

Pattatatiakka su ola'u puasa

(Mat. 9:14-17; Luk. 5:33-39)

¹⁸Su sambau tempo, mallalaŕrenggenni Yohanes Mananaŕrani wuŕru manga taumata n Farisi tantaŕanna mappuasa. See pia taumata nirumanta ringannu Mawu Yesus wuŕru naiwaŕo, "Anio mallalaŕrenggenni Yohanes wuŕru mallalaŕrenggennu taumata n Farisi mappuasa, arawe mallalaŕrenggennu lamangnga tawe mappuasa?"

¹⁹Mawu Yesus sinumimbakka, "Su andeangngu awingnga, apa pia manga raho apan tawe umanna? Amungkanngu maa'awingnga esakka ta'e su sampunna ringanni mangitou, ŕinone imangitou umanna.

²⁰Arawe sarun rumanta tempone maa'awingnga esakka udde alaŕanna wua dinganni mangitou, su tempo udde imangitou tate umanna.

²¹Tawe taumata mandappela laubba tabbe ringannu piŕriŕsa wakku. Ana waugu piŕriŕsa rarapella udde maarinsutta wuŕru manggesa'a laubba udde, na'oma n sara hesangnge maola'a nangillemba ng kahewalle.

²²Aroddi lai tawe taumata mallalinnu anggore wakku sulaŕummu pato'a pisi tabbe. Ana waugu anggore wakku udde sarun mamesangnga pato'a udde. Panginsueanne itarua mangke maramme abbi. Anggore wakku ŕinone ilalinna sulaŕummu patoa'a wakku lai!"

Aiwało su ola'u allo n Sabatta

(Mat. 12:1-8; Luk. 6:1-5)

²³Su sambau allo n Sabatta, su tempo Mawu Yesus sinumabbi su sambau wailu gandumma, mallalařřenggen-Ne nanattakke mangngitingnga gandumma. ²⁴See manga taumata n Farisi naiwało Mawu Yesus, "Anio manga mallalařřenggen nu lullawangnga tita n agama ng kite, ringannu ma'ola'a apan isassingadda su allo n Sabatta?"

²⁵⁻²⁶Mawu Yesus sinumimbakka, "Iamiu taambe naawasa saran passa apa apan niola'i Daud, su tempo Abyatar mammanara naola'a imam wahewa. Su tempo Daud wuřru manga taumatane małunussa, wuřru tawe anna, itou sinumutta su Wałe Mawu, wuřru inumannu roti apan suete niola'a sasamba su Mawu Ruata. Wuřru roti udde nianggilla lai su manga taumatane. Sumbali tumuřrutu atorannu agama ng kite, tumba'u manga imam wotongnge umanna roti udde."

²⁷See Mawu Yesus nabbisara apia, "Allo n Sabatta niola'a huna n taumata; wałine taumata huna n allo n Sabatta. ²⁸Nariaddi Ana'u Taumata pia tařřino, see lai uatařřino allo n Sabatta."

Taumata apan limane lome samba'a

(Mat. 12:9-14; Luk. 6:6-11)

3 Mawu Yesus nabelengke apia su wałe m pattatařramawuanna. Isudde pia sangkatou taumata limane lome samba'a. ²Isudde lai pia taumata apan maddea'a pasasała Mawu Yesus, tadea'u wotongnge mangalae n Tou. Nariaddi imangitou sidutu ua'ellega Sitou, apa Itou mapaapia n taumata su allo n Sabatta. ³Mawu Yesus nabbisara su taumata apan limane lome samba'a udde, "Wette darisikke isindi, su saruanne." ⁴See Itou naiwało manga taumata isudde, "Tumuřrutu agama, iite wotongnge mammanara su allo n Sabatta? Ma'ola'a apapia ara'e ma'ola'a alałeo? Manalamatta taumata ara'e mamate?"

Imangitou małannaba. ⁵Ringannu nasa'u Mawu Yesus na'ellega taumata apan uapałiwutta Sitou, arawe Itou nasusa lai, aia waugu imangitou tumanite maattikka puane. See Itou nabbisara taumata udde, "Ułuřra'e limanu." Taumata udde nangułukke n limane see limane udde napiate. ⁶Ne manga taumata n Farisi nanantangke n wałe m pattatařramawuanna udde see małiha-łihakka na'ire ringannu sire pira taumata n Herodes, pandumanne mamate Mawu Yesus.

Taumata manambo su winggi n rano

⁷Mawu Yesus wuṛṛu mallalaṛṛenggen-Ne inaita nabelengnga wua-ssu Rano n Galilea. Ne manambo atonna taumata wuassu Galilea inai mallalaṛṛenggenna Mawu Yesus. Manambo lai nirumanta wuassu Yudea, ⁸wuassu Yerusalem, wuassu wageangngu leta'u Idumea, wuṛṛu wua-ssu wageangngu leta'a samba'a n ra'i Saḷukku Yordan, wuṛṛu wuassu manga soa su Tirus wuṛṛu Sidon. Imangitou sarangkanambone nirumanta ringannu Mawu Yesus, ana waugu imangitou naaringikka manga inolaanna apan suete niola'u Mawu Yesus. ⁹Manga taumata udde tumante manambo, na'oma n sara Mawu Yesus nandolokku manga mallalaṛṛenggen-Ne niapasaddia saalanna sa'ean-Ne, ana waugu aṛṛengenne Itou iasesse'u taumata nambo udde. ¹⁰Itou napaapia n taumata nambo, na'oma n sara manga taumata marada'a uasasesse'a maddea'a tadea'u maa'agassa Sitou. ¹¹Wuṛṛu manga taumata apan niasuttannu ghaṛṛaho laḷeo, napawe maasilo Sitou lapiddu niumaḷintudda su saruanni Tou wuṛṛu niemui, "Ete I'o Ana'u Mawu Ruata!"

¹²Arawe Mawu Yesus mangke manningaddu ghaṛṛaho laḷeo udde mamasingkatta isai Itou.

Mawu Yesus namile sire mapuḷo dua mallalaṛṛenggen-Ne

(Mat. 10:1-4; Luk. 6:12-16)

¹³Wua udde Mawu Yesus sinumaate su sambau wuidda, wuṛṛu namagote manga taumata apan pappanduman-Ne. Manga taumata udde nirumanta, ¹⁴see Itou namilete wuassu wallatti mangitou sire mapuḷo dua su atoune. Wisara-Ne, "Ia'u mamile siamiu, tadea'u iamiu maṛṛundinganna Sia'u, tadea'u Ia'u mandolokki amiu mamasingkattu Watti'u Aḷaḷuassa wuassu Mawu Ruata, ¹⁵wuṛṛu iamiu sarun maasomba taṛṛino ipallimbuakka manga ghaṛṛaho laḷeo."

¹⁶Ete indi arannu sire mapuḷo dua taumata udde: Simon (apan isassago lai Petrus), ¹⁷Yakobus wuṛṛu Yohanes tuṛrangge, eteudde alaṛṛana'i Zebedeus (imangitou indi inonggoḷannu aranna Boanerges atappasanne "ana'u rallu'a"), ¹⁸Andreas, Filipus, Bartolomeus, Matius, Tomas, Yakobus ana'i Alfeus, Tadeus, Simon Patriot, ¹⁹wuṛṛu Yudas Iskariot apan nandaḷeo Mawu Yesus.

Mawu Yesus wuṛṛu Beelzebul

(Mat. 12:22-32; Luk. 11:14-23, 12:10)

²⁰Wua udde Mawu Yesus napuḷete su waḷe. Arawe taumata nambo nirumanta lai naammulla, na'oma n sara Mawu Yesus wuṛṛu mal-laḷaṛrenggen-Ne tawe naa'anna. ²¹Manga taumata udde nabbisara, "Itou nabewate!" Wuṛṛu napawe manga tuṛṛang-Nge naaringikka olangnge udde, imangitou nirumanta nangaḷappa Sitou.

²²Manga huru n agama apan nirumanta wuassu Yerusalem nabbi-sara, "Itou niasuttannu Beelzebul! Tembonannu manga ghaṛṛaho laḷeo apan mangngagillu taṛṛino Sitou ipallimbuakka ghaṛṛaho laḷeo."

²³Ne Mawu Yesus namago taumata nambo udde, wuṛṛu na-bbati'a simangitou manga pira sasumandingnga. "Ereapa wotong-nge ghaṛṛaho laḷeo mallimbuakka ghaṛṛaho laḷeo," unnu Mawu Yesus. ²⁴"Amunkangngu sambau araratuanna mapesangnga sulaḷummu pira ng kawageanganna apan uasaseetta, araratuanna udde tawe maataṛrangnga maḷannu. ²⁵Wuṛṛu amunkangngu sulaḷummu laḷoṛṛo n waḷe, tawe paddarame wuṛṛu manga laḷoṛṛone uasaseetta, laḷoṛṛo n waḷe udde sarun massongkakka. ²⁶Amunkangngu sulaḷummu araratuannu Setanna pia passaseetta wuṛṛu pabbawawuḷo, araratuanna udde tawe maḷannu wuṛṛu sarun maḷihakka mawuḷi.

²⁷Tawe saran sangkatou wotongnge maasutta sulaḷummu waḷe n sangkatou taumata matohassa wuṛṛu mangaṛṛo darotongnge amunkang-nngu itou tawe malliu ṛoro maṛṛapussa taumata matohassa udde. Wua udde itou wotongngete mangaṛṛo darotongnge.

²⁸Asingkatewe! Amunkangngu taumata ma'ola'a rosa wuṛṛu mang-ngadio'a, itou wotongnge aampunganna. ²⁹Arawe amunkangngu itou mangngadio'a Ghaṛṛaho Mawu Ruata, itou tawe aampunganna! Ana waugu mangngadio'a udde rosa ma'oma n sara maḷannu-ḷannu." (³⁰Mawu Yesus nabbisara aroddi ana waugu pia taumata mabbisara manungku Mawu Yesus niasuttannu ghaṛṛaho laḷeo.)

Inangnga wuṛṛu manga tuṛṛangngu Mawu Yesus

(Mat. 12:46-50; Luk. 8:19-21)

³¹Wua udde inangnga wuṛṛu manga tuṛṛangngu Mawu Yesus niru-mantate. Imangitou uaraṛṛaddo su liudde wuṛṛu nandolokku taumata ia-pawago Mawu Yesus. ³²Su tempo udde manambo taumata tantaḷanna ua'ianna uapaḷiwutta Mawu Yesus. Imangitou nabbisara Sitou, "Iamang-

nga, inangngu wuṛṛu manga tuṛrangngi Iamangnga wowa su liudde. Imangitou maddea'a Iamangnga."

³³Mawu Yesus sinumimbakka, "Isai inang-Ku? Isai manga tuṛrang-Ku?" ³⁴Wua udde Itou nanaile manga taumata apan ua'ianna uapaliwutta Sitou see nabbisara, "Ete indi inang-Ku wuṛṛu manga tuṛrang-Ku! ³⁵Taumata apan tuttuṛrutta apulu Mawu Ruata, ete itou tuṛrang-Ku esakka, tuṛrang-Ku wawine, wuṛṛu inang-Ku."

Sasumandingngu sangkatou mangangasi'a

(Mat. 13:1-9; Luk. 8:4-8)

4 Mawu Yesus mangngarra'a lai su winggi n Rano n Galilea. Manambo atonna taumata uapaliwutta Sitou. Ana waugu udde Itou inaita inuma'ianna sulaḷummu saalanna apan ualallatto, wuṛṛu taumata nambo uarisikka su winggi n rano. ²See Mawu Yesus nangarra'u alawo'u inolaanna apan mapia simangitou ringannu sasumandingnga. Ereindi Itou mangngarra'a simangitou.

³"Paddaringikka! Pia sangkatou mabbawaiilla inai mangasi'u wualanna. ⁴Su tempo itou mangngasi'a, pia bualanna nanawo su laḷanna. See manu'a nirumanta wuṛṛu inumanna wualanna udde na'oma n sara nasue. ⁵Pia lai nanawo su tampa mawatu apan letangnge adio'a, manga wualanna udde lapiddu tinumuwo ana waugu letangnge adio'a, ⁶arawe su tempo matannallo matanggakka, manga tatuwone udde mannattakke tuttolangnga wua udde narṛangu wuṛṛu nate ana waugu ramunne tawe nusippa maḷaḷumma. ⁷Pia lai bualanna apan nanawo su tangnga n ahuranganna roaanna. Ahuranganna roaanna udde tinumuwo wuṛṛu namulissa tatuwo n bualanna udde na'oman sara tawe nabbua. ⁸Arawe pia lai bualanna apan nanawo su leta'a masuwukka. Wualanna udde tinumuwo, see nahewalle wuṛṛu nabbua, pia tallu m puḷo, pia annummu puḷo, wuṛṛu pia lai paarṛasutta su wageangnge."

⁹Napawe suete nabbati'a sasumandingnga udde, Mawu Yesus nabbisara, "Isai pia taḷinga, paddaringikka!"

Anio Mawu Yesus mappaattu sasumandingnga

(Mat. 13:10-17; Luk. 8:9-10)

¹⁰Su tempo Mawu Yesus sassane, manga taumata apan suete naaringikka alarṛang-Nge nirumanta ringanni Tou su sampunna ringannu sire mapuḷo dua mallalarṛenggen-Ne. Imangitou madorongnga Sitou manaḷa'a n atappasannu sasumandingnga udde. ¹¹Ne Mawu Yesus na-

bbisarate simangitou, "Iamiu suete nionggolannu alamatta maasingkatta adappingnga su ola'u ereapa Mawu Ruata mamarenta. Arawe manga taumata su liudde aarfaannu sasumandingnga, ¹²tadea'u

'Imangitou sidutu maatutukka

arawe wagga apa apan sarun mariaddi,

imangitou sidutu maddaringikka

arawe tawe maasunna,

olangnge indi mariaddi tadea'u imangitou

tawe maasilo wurru tawe maasunna

wurru arie imangitou rumanta ringannu Mawu Ruata

wurru Mawu Ruata mangampungnga simangitou.'"

Mawu Yesus manala'a n sasumandingngu sangkatou mangangasi'a

(Mat. 13:18-23; Luk. 8:11-15)

¹³Wua udde Mawu Yesus nabbisarate simangitou, "Amungskangngu iamiu tawe maasunna sasumandingnga udde, ereapa iamiu wotongnge maasunna sasumandingnga waine? ¹⁴Mangangasi'a udde sangkatou taumata apan mannaliawukku watti'a wuassu Mawu Ruata. ¹⁵Wualanna apan nanawo su la'anna, iassumandingnga su taumata apan uararingikka watti'a su ola'u ereapa Mawu Ruata mamarenta. Aroddi naaringikka, Setanna nirumanta wurru nanganu wualanna apan suete niasi'a sulalummu naungngi mangitou. ¹⁶Wualanna apan nanawo su leta'a mawatu, iassumandingnga su taumata apan uararingikka watti'a udde, wurru ringannu malihakka nanengkamma ringannu naungnga maluassa. ¹⁷Arawe watti'a udde tawe nakkamutta sulalummu naungngi mangitou, na'oma n sara tawe nata'rangnga malannu. Aroddi imangitou natata'rangnga asasusa ara'e panda'aleo ana waugu watti'a udde, lapiddu imangitou nassinaaddu Mawu Ruata. ¹⁸Wualanna apan nanawo su tangnga n ahuranganna roaanna, iassumandingnga su taumata apan uararingikka watti'a udde, ¹⁹arawe sussingawangngu pabbia'ranni mangitou wurru maapulu mabbia'kka lembo nasuungnga. Apulu m padarunia sinumuttate sulalummu naungngi mangitou. Wua udde watti'u Mawu Ruata nawuli wuassu la'lummu naungngi mangitou, na'oma n sara tawe nabbua. ²⁰Wurru wualanna apan nanawo su leta'a masuwukka udde iassumandingnga su taumata apan naddaringikka watti'a udde wurru nanengkamma, imangitou nabbua manambo, pia tallu m pulo, pia annummu pulo, pia lai paarfasutta su wageangnge wuane."

Soŋo apan niluwannu wensada

(Luk. 8:16-18)

²¹Wua udde Mawu Yesus nabbisara apia, "Apa piate taumata nande'omma soŋo see niluwannu wensada, ara'e nangado n soŋo udde su aŋungu lallowanganna? Apa itou tawe nangele n soŋo udde su aeleanne? ²²Tawe apa uawuni apan tawe asiloanna; wuŋŋu tawe apa iaadappingnga apan tawe asingkatanna. ²³Ana waugu udde, amungkangngu pia taŋinga paddaringikka!"

²⁴See Mawu Yesus nabbisara apia, "Panutukka apa apan radaringi-ŋŋanni amiu indi! Uuŋŋanna apan ipaatti amiu su taumata waine sarun ipaattu Mawu Ruata lai siamiu – wuŋŋu ewe'e lembo n anamboanne lai. ²⁵Ana waugu taumata apan uatahuante, sarun onggolanu anamboanne lai; arawe taumata apan tawe tatahuananne, adio'a apan ta'e sitou sarun anuanna lai."

Sasumandingngu wualanna apan tinumuwo

²⁶Mawu Yesus nanassute wisara-Ne apia, "Napawe Mawu Ruata mamarenta ere sangkatou ratu, olangnge wotongnge isumandingnga ere sangkatou apan mangngasi'a su wawaiŋanne. ²⁷Rabbine itou mattiilla; napawe allote itou mabangunna, wuŋŋu tantaŋanna udde manga wualanna mangkatuwone na'oma n sara matanggakke. Arawe ereapa olangnge manga wualanna udde tinumuwo wuŋŋu matanggakke, taumata udde wagga. ²⁸Ete leta'a udde apan nangagillu wuane sassane; paarorone raene, wua udde wungane, ana see wuane. ²⁹Wuŋŋu amungkangngu gandumma udde naŋahate, taumata udde manattakke mangitingnga, ana waugu tempote m pangangitingnga."

Sasumandingngu watu n sawi

(Mat. 13:31-32, 34; Luk. 13:18-19)

³⁰"Napawe Mawu Ruata mamarenta, ringannu apa iite wotongnge manumandingnga?" aiwaŋo Mawu Yesus. "Tuŋada apa apan wotongnge ipaatti ite ipanaŋa'a? ³¹Napawe Mawu Ruata mamarenta, olangnge ere sasumandingnga indi: Sambau watu n sawi nianu n sangkatou taumata see sinuanna su leta'a. Watu n sawi eteudde watu apan adio'anne su runia. ³²Arawe amungkangngu tinumuwo, itou maola'a ahewaŋanne su

wallattu manga sinuananna. Manga rannane manambo na'oma n sara manga manu'a rudanta, wuɽɽu ma'ola'a salakka su aɭungnge."

³³Aroddi Mawu Yesus mangngaɽɽa'a taumata ringannu mappaattu sasumandingnga ereudde, tadea'u imangitou wotongnge maasunna.

³⁴Mawu Yesus sidutu mappaattu sasumandingnga amungkanngu Itou mangngaɽɽa'a manga taumata udde. Arawe amungkanngu Itou sassane ringannu mallalaɽɽenggen-Ne, Itou mannaɭa'a n sarangkanambone simangitou.

Mawu Yesus napaalenakku tandi'a

(Mat. 8:23-27; Luk. 8:22-25)

³⁵Su allo wawallo udde lai, Mawu Yesus nabbisara su mallalaɽɽenggen-Ne, "Wette iite massenggote su samba'a n rano."

³⁶Ne Mawu Yesus sinuma'ete su saalanna, wuɽɽu mallalaɽɽenggen-Ne nanantangke n taumata nambo su winggi n rano, see sinuma'ete su saalanna su sambau. Pia lai manga saalanna waine isudde. Wua udde Mawu Yesus wuɽɽu mallalaɽɽenggen-Ne nassenggote. ³⁷Tawe naɭannu wua udde nattandi'e. Lua'a mannattakke mangngema'u saalanna wuɽɽu naasuttate sulalumme na'oma n sara saalanna udde maranite mapene n ua'e. ³⁸Su pangangulinannu saalanna udde Mawu Yesus tantaɭanna mattiilla uailɭuɭunna su apepessa. Mallalaɽɽenggen-Ne namu'o Sitou. Imangitou nabbisara, "Iamangnga Huru, apa iamangnga tawe marɽingidda iite masilakate?"

³⁹Mawu Yesus napu'ote see namuɭo anginna udde, wuɽɽu nabbisarate rano, "Paalannaba, aɭenakke!" Ne anginna noɭote, wuɽɽu rano naɭenakke atonna. ⁴⁰See Mawu Yesus nabbisara su mallalaɽɽenggen-Ne, "Anio iamiu matta'utta? Anio iamiu tawe mangngimanna Sia'u?"

⁴¹Ne imangitou nata'utte wuɽɽu uawawisarate sangkatou ringannu waine, "Isai ɽinone taumata indi, na'oma n sara anginna wuɽɽu lua'a mangke tuttuɽɽutta Sitou."

Mawu Yesus napaapia n taumata niasutannu gharraho laɭeo

(Mat. 8:28-34; Luk. 8:26-39)

5 Wua udde Mawu Yesus wuɽɽu mallalaɽɽenggen-Ne na'omate su samba'a n Rano n Galilea, su wageangngu leta'u Gerasa. ²Aroddi Mawu Yesus nilumintukka wuassu saalanna, Itou nirantannu sangkatou esakka apan sinumabangnga wuassu manga loɽɽangngu laɭabinganna.

³Taumata udde tatauannu gharraho laleo wurru uatana'a su lalabinganna. Itou tate ia'iitta salaiwe ete rateanna. ⁴Masokkate ledda wurru limane imantungnga, arawe manga rate udde wabbassutanne, wurru atta'a su leddane pappadianne. Itou matohassa atonna na'oma n sara tawedu sangkatou wotongnge maatarangnga sitou. ⁵Allo rabbi itou lullallele su lalabinganna wurru su manga wuidda, ringannu aintuljine wurru mallessa wadangnge ringannu watu.

⁶Napawe ro'e n marau itou naasilote Mawu Yesu nirumanta, itou tinumalangnga see nassubba su saruannu Mawu Yesu. ⁷Ringannu tingikka apan ma'ikkatta itou inumui, "Yesu, Ana'u Mawu Ruata Apan Atanggaranne! Sarun urannu ia'u indi? Ringannu arannu Mawu Ruata ia'u sumalande, arie panansara sia'u!" (⁸Taumata udde nabbisara aroddi ana wagu Mawu Yesu nabbisara sitou, "Gharraho laleo, sabbangke wuassu taumata indi!")

⁹See Mawu Yesu naiwalo sitou, "Isai arannu?"

Taumata udde sinumimbakka, "Arangu 'Legiun' - ana wagu iami indi tumanite manambo!" ¹⁰Masokkate itou madorongnga ringannu sussalande, tadea'u Mawu Yesu tawe mandolokku manga gharraho laleo udde massaļu wuassu wageangngu leta'a udde.

¹¹Marani n tampa udde pia wawi manambo apan tantaļanna madda'a anna su sendekku wuidda. ¹²Manga gharraho laleo udde sinumalande Mawu Yesu, "Roloṛra'e iami sumutta su manga wawi udde." ¹³Mawu Yesu inumire. Nariaddi, manga gharraho laleo udde sinumabangke wuassu taumata udde see sinumuttate su manga wawi udde. Anambo n ammuļannu manga wawi udde tinumalangnga wurru tinumumpa wuassu rampissa watukku rano see nilumakkuba - wawi udde sarangkanambone, irararangngu rua riwu anambone.

¹⁴Manga mandariaga wawi udde tinumalangnga, wurru nama-singkattu watti'a udde su soa wurru su ampungnga maranine. See manga taumata nampassabangnga ma'ellega apa apan suete nariaddi. ¹⁵Imangitou nirumantate ringannu Mawu Yesu, see na'ellega taumata apan tanginna niasuttannu gharraho laleo udde, tantaļanna ua'ianna isudde. Itou suete napedetta, wurru ringiranne lai masemakke. Ne imangitou sarangkanambone nata'utte. ¹⁶Manga taumata apan suete naasilo sassane inolaanna su ola'u taumata wurru manga wawi udde, nabbati'e apa apan suete nariaddi. ¹⁷See tumana'u wageangngu leta'a udde nadorongnga tadea'u Mawu Yesu manantangngu wageangngu leta'a udde.

¹⁸Su tempo Mawu Yesu sinuma'ete su saalanna, taumata apan tanginna paparentannu gharraho laleo udde sinumalande Mawu Yesu, tadea'u itou wotongnge tumantalongnga.

¹⁹Arawe Mawu Yesus maddiri, wisara-Ne, "Apulete wuŕŕu waŕloa'e su manga tuŕrangngu apa apan suete niola'u Mawu si'o wuŕŕu aroddi apiane Itou si'o!"

²⁰Ne taumata udde napulete wuŕŕu nanattakke mabatti'a su wage-angngu leta'u Mapuŕlo Soa su ereapa apan suete niola'u Mawu Yesus sitou. Anambo n taumata naherangnga naaringikka watti'a udde.

Ana'i Yairus – Wawine apan nangindingnga jubah Mawu Yesus

(Mat. 9:18-26; Luk. 8:40-56)

²¹Mawu Yesus nabelengke apia su samba'a n rano. Su winggi n rano udde, manambo taumata uarŕimpulunna uapaŕiwutta Mawu Yesus.

²²Nirumantate sangkatou aranne Yairus. Itou sangkatou piaŕŕa'u waŕe m pattataŕramawuanna su soa udde. Napawe itou naasilo Mawu Yesus, itou inumaŕintuda su saruan-Ne, ²³wuŕŕu sinumaŕande, "Iamangnga, ana'u wawine marada'a masaddatta. Wotongnge Iamangnga rumanta mamita sitou, tadea'u itou mapia wuŕŕu tawe mate!"

²⁴Ne Mawu Yesus inaita su sampunna ringanni Yairus. Manambo taumata uatantalongnga Sitou wuŕŕu mannesse'i Tou wuassu aŕawo'u tampa.

²⁵Su wallatti mangitou udde pia lai sangkatou wawine apan mapuŕote dua su tonnane marada'a aamatannu ŕaŕŕa ara'e rada'u wawine.

²⁶Anambo n darotongnge nasuete nipaatta pinamaekka manga doktere, arawe tawedu naapia sitou, ewe'e radangnge mangke aatambanna awak-kanne. ²⁷Wawine udde naaringikke manambo su ola'u Mawu Yesus. Ne su wallattu taumata nambo udde itou nangundani Mawu Yesus wuassu liudde, ²⁸ana wangu itou maŕŕingidda, "Sar baŕiate ia'u naaindingnga jubah-Ne, ia'u sarun mapia!"

²⁹Itou nangindingnga jubah Mawu Yesus, wuŕŕu orassa udde lai radangnge nattaalla. Itou naapendamma manungku itou napiate. ³⁰Su orassa udde lai Mawu Yesus naapendamma manungku pia auatanna apan nasabangnga wuassu wadang-Nge. Ne Itou nanaile taumata nambo udde wuŕŕu naiwaŕo, "Isai nangindingnga jubah-U?"

³¹Manga mallaŕarŕenggen-Ne nabbisara, "Iamangnga pa'ellega sassane aroddi anambone taumata apan uasasuŕŕuda. Wuŕŕu Iamangnga ta'e ma'iwaŕo, isai nangindingnga Iamangnga?"

³²Arawe Mawu Yesus sidutu ma'ellega taumata uapaŕiwutta Sitou wuŕŕu maddea'a taumata apan nangindingnga Sitou. ³³Wawine udde masingkatte apa apan suete nariaddi su wadangnge, ringannu mang-ningindo wuŕŕu matta'utta itou nassubba su saruannu Mawu Yesus wuŕŕu

nanga'u alawo'u inolaanne. ³⁴See Mawu Yesus nabbisara wawine udde, "Ana'u, ana wangu i'o mangngimanna Sia'u, i'o napiate! Roote ringannu asasaJamatta. I'o napiate atonna!"

³⁵TantaJamanna Mawu Yesus ta'e mabbisara, manga pira raloJorJanna nirumanta wuassu wale n Yairus, "Ana'i Tuangnga marJuala natete," wisara mangitou si Yairus, "Ariete Tuangnga mapaaasusa n Iamangnga Huru."

³⁶Ringannu tawe naddaringikka apa apan iwabbisara n taumata nambo udde, Mawu Yesus nabbisara si Yairus, "Arie paata'utta, pangimante!" ³⁷See Mawu Yesus inumamatta, arawe Itou tawe namala n saran sangkatou tumantalongnga Sitou, tumba'u Petrus see Yakobus wuJru Yohanes sangkatuJrangnga. ³⁸Napawe imangitou na'omate su wale n Yairus, Mawu Yesus naasilo mangke uahahio, wuJru naaringikka laJuai wuJru laJallu apan ma'ikkatta. ³⁹See Mawu Yesus sinumutta wuJru nabbisara simangitou, "Anio iamiu uahahio wuJru lulluai? Ana'a udde tawe nate; itou tumba'u mattiilla!"


⁴⁰Imangitou nilumage Mawu Yesus. Ne Itou nandoloke mangitou nambo niapaasabangnga. See Itou nangapidde inangnga iamangngu ana'a udde wuJru sire tallu mallalaJranggen-Ne sinumutta sulaJummu wabbo'a n ana'a udde. ⁴¹Mawu Yesus namita lima ng kana'a udde see nabbisara sitou, "Talita kum," atappasanne, "Ana'a wawine, Ia'u mabbisara si'o: pabbangunte!"

⁴²Ana'a marJuala udde maJiha-Jihakka nabangunna wuJru inumamatta. (Uukke mapuJote dua su tonnane.) Anambo n tauniata apan naasilo arariadianna udde, mangke tinumiangnga! ⁴³Arawe Mawu Yesus mangke manningaddi mangitou mabatti'u olangnge udde sisai-sai. See Itou nabbisara, "OnggoJete n anna ana'a udde."

Mawu Yesus tawe tinarimmatta su Nazaret

(Mat. 13:53-58; Luk. 4:16-30)

6 Wuassu tampa udde, Mawu Yesus napuJete su sampunna ringannu mallalaJranggen-Ne watukku ampungngi Tou. ²Su allo n Sabatta Itou nanattakke mangngaJra'a su wale m pattataJramawuanna. Manambo taumata isudde. Su tempo manga taumata udde naaringikka alajra'u Mawu Yesus, imangitou mangke naherangnga. Imangitou nabbisara, "Wuassuapa taumata indi naasomba sarangkanambone udde? Apande ereapa indi Sitou? Ereapa Itou wotongnge ma'ola'a alajrindu'a? ³WalJnewe Itou indi ana'u wase ng kalu, ana'i Maria, wuJru tuJrangngi Yakobus, Yoses, Yudas wuJru Simon? Ore, manga



Wageange sulaŋummu waŋe m pattataŋŋamawuanna (6:2)

turŋrang-Nge wawine lai udde uatana'a isindi." Ana waugu udde imangitou nanoŋai Tou.

⁴See Mawu Yesus nabbisara simangitou, "Sangkatou nabi aaddatanna su aŋawo'u tampa, arawe su ampungnge sassane tawe addatanna, wuŋru su wallattu manga turŋrangnge wuŋru walahanne."

⁵Su tampa udde Mawu Yesus tawe napa'ola'a saran sambau aŋaŋŋindu'a, tumba'u napaapia n sire pira taumata inarada'a ringannu nangandangngu lima-Ne simangitou. ⁶Itou naherangnga imangitou tawe mangngimanna.

Mawu Yesus nandolokku sire mapuŋo dua mallalaŋŋenggen-Ne

(Mat. 10:5-15; Luk. 9:1-6)

Wua udde Mawu Yesus inaite su manga ampungnga maranine isudde, wuŋru mangngaŋŋa'a. ⁷Itou namago sire mapuŋo dua mallalaŋŋenggen-Ne, see nandolokki mangitou pattarra rua ng katou wuŋru inonggoŋannu taŋŋino simangitou ipallimbuakka manga ghaŋŋaho laŋeo. ⁸Itou nangagillu tatantiro indi simangitou, "Arie pangapiddu apa-apa su amatanna, tumba'u tatumma'inna. Arie pangapiddu anna ara'e pato'a m pondi, ara'e lai roitta. ⁹Palluŋŋete n sapatu, arawe arie pangapiddu laubba rua m parassa." ¹⁰Itou lai nabbisara, "Amungkangngu iamiu sumutta su sambau waŋe, atana'e isudde ma'oma n sara iamiu manantangngu soa udde. ¹¹Arawe amungkangngu iamiu ma'oma su sambau tampa, wuŋru manga taumata isudde maddiri manarimmatta wuŋru maddiri ma-

daringikka siamiu, tantanga'a tampa udde. Wuṛṛu tontonga'a awu wua-ssu leddanu maola'a sambau pananaunganna su saruanni mangitou!"

¹²Ne sire mapuḷo dua mallalaṛṛenggenṇu Mawu Yesus udde inaitē. Imangitou inaitē namasingkattu watti'a manungku taumata ṛinone ma-waḷu wuassu paddarosane. ¹³Manga mallalaṛṛenggenṇu Mawu Yesus udde nallimbuaḱḱe manambo ghaṛṛaho laḷeo, wuṛṛu mammuṛṛa n lana n zaitun su taumata marada'a wuṛṛu napaapia mangitou.

Apapate n Yohanes Mananaṛṛani

(Mat. 14:1-12; Luk. 9:7-9)

¹⁴Manga watti'a su ola'u anambo n arariadianna udde na'omate lai ringanni Ratu Herodes, ana waugu arannu Mawu Yesus niasingkatante su alaḷwo'u tampa. Pia taumata mabbisara, "Yohanes Mananaṛṛani nabbiakke apia! Ana waugu udde itou pia taṛṛino ma'ola'a alaṛṛindu'a udde."

¹⁵Arawe manga taumata waine mabbisara, "Itou Elia."

Pia lai mabbisara, "Itou nabi, ere sangkatou su wallattu manga nabi su tempo paarorone."

¹⁶Napawe Herodes naaringikka hatto udde, itou nabbiisara, "Atonna indi Yohanes Mananaṛṛani apan rorone suete ta'u niapaponggo'a puane. Orassa indi itou nabbiakke apia!"

¹⁷Ana waugu tantaḷanna taambe inolaanne udde, Herodes suete nandolokku taumata niapasametta si Yohanes, wuṛṛu napaasutta n tou sulaḷummu tuttupanna. Herodes na'ola'a aroddi ana waugu Herodias, awingngu tuṛṛangnge sidutu, eteudde Filipus. Ana waugu Herodes suete naawingngi Herodias, ¹⁸wuṛṛu su olangnge udde Yohanes suete nanagu si Herodes ringannu masokka ereindi, "Tawe wotongnge i'o maawingnga ringannu awingngu tuṛṛangngu udde!"

¹⁹Ana waugu udde Herodias pia naungnga laḷeo si Yohanes wuṛṛu maapulu mamate si Yohanes, arawe itou tawe mapa'ola'a olangnge udde, ana waugu isassingaddi Herodes. ²⁰Ana waugu Herodes suete nandolokku taumata niapariaga mapia-pia asalaḷamatti Yohanes su tuttupanna, ana waugu itou matta'utti Yohanes. Itou masingkatta manungku Yohanes sangkatou taumata mapia apan suete nirolokku Mawu Ruata. Wuṛṛu atonna amungkanngu Yohanes mabbisara, Herodes maḷutu madaringikka sitou, salaiwe itou sussingawangnga atonna ana waugu Yohanes.

²¹Panginsueanne Herodias naasomba tempone su allo inariadianni Herodes. Tempo udde Herodes na'ola'a andeangngu manga tembonannu araratuane, manga tembonannu tantarane wuṛṛu manga piaṛṛa'u

tumana'u Galilea. ²²Su andeangnga udde ana'a maṛṛuala n Herodias nassaiaingnga, wuṛṛu saiaingnge udde mangke naaḷuassa naungngi Herodes see lai manga rahone. Ne Herodes nabbisara su ana'a maṛṛuala udde, "Apa ipaapulunu, padorongke. Ia'u sarun mangonggolu darorongngu udde si'o!" ²³See Herodes naddiandi su ana'a udde ringannu sasalu, Herodes nabbisara, "Aḷawo'u apa apan dorongannu sarun ta'u ionggolla, salaiwe samba'a wuassu araratuangku indi!"

²⁴Ne maṛṛuala udde sinumabangnga wuṛṛu naiwaḷo inangnge, "Inangnga, suapa apan mappianne ta'u doronganna?"

Inangnge sinumimbakka, "Padorongke pua n Yohanes Mananaṛṛani."

²⁵Maṛṛuala udde maḷiha-ḷihakka nabelengnga ringanni Herodes wuṛṛu nabbisara, "Ia'u madorongnga pua n Yohanes Mananaṛṛani ionggolla sia'u orassa indi uarandangnga su baki!"

²⁶Naaringikka darorongnga udde, Herodes mangke nasusa. Arawe itou tawe mapanoḷa'u darorongnga udde, ana waugu itou suete nassalu su pattangngannu manga rahone. ²⁷Nariaddi itou lapiddu namarenta sangkatou mandariagane niapaalappa pua n Yohanes Mananaṛṛani. Ne tantara udde inaite su tuttupanna see namonggo'e pua n Yohanes. ²⁸Wua udde itou nangapiddu pua udde uarandangnga su baki wuṛṛu tinantille su maṛṛuala udde, see maṛṛuala udde nanantille su inangnge. ²⁹Napawe mallaḷaṛṛenggeni Yohanes Mananaṛṛani naaringikka olangnge udde, imangitou inaite nangaḷappa winalunanni Yohanes, see nilabingke.

Mawu Yesus napaannu lima ṛiwu su atoune

(Mat. 14:13-21; Luk. 9:10-17; Yoh. 6:1-14)

³⁰Manga rasul apan suete nirolokku Mawu Yesus, wua udde nabelengke apia, wuṛṛu naammulle ringannu Mawu Yesus. Imangitou nabaḷo Sitou aḷawo'a apan suete nimmanara wuṛṛu niaṛṛa'i mangitou.

³¹Manambo atonna taumata nirumanta wuṛṛu mappuḷe, na'oma n sara tate lai tempone Mawu Yesus wuṛṛu mallaḷaṛṛenggen-Ne umanna. Ana waugu udde Mawu Yesus nabbisara mallaḷaṛṛenggen-Ne, "Wette iite inaite su tampa apan maḷannaba, isudde iite wotongnge sassane, wuṛṛu iamiu wotongnge mangilloḷo taḷa ng kadio'a." ³²Ne imangitou inaite ringannu sinuma'e saalanna nabatukku tampa apan maḷannaba udde.

³³Arawe manambo taumata naasilo simangitou nanantangngu tampa udde, wuṛṛu masingkatta lai isai imangitou. Nariaddi, wuassu aḷawo'u soa su wageangngu leta'a udde, manga taumata tuttaḷangnga wuassu ammaranne malliu ṛoro Mawu Yesus wuṛṛu mallaḷaṛṛenggen-Ne.

³⁴Su tempo Mawu Yesus sinumossokka wuassu saalanna, Itou naasilo taumata manambo. Itou inumakkanni mangitou, ana waugu imangitou naalihidda domba apan tawe mallalu'adde. Ne Itou nanattakke mangngarra'u alawo'u alarra'a simangitou. ³⁵Napawe wawallote, mallalarrenggennu Mawu Yesus naiwalo Sitou, "Maranite marrabi wufu tampa indi marau wuassu soa. ³⁶Mappianne Iamangnga mandolokku manga taumata indi mapule tadea'u imangitou wotongnge mamalli anna su manga soa wufu ampungnga maranine isindi."

³⁷Arawe Mawu Yesus sinumimbakka, "Iamiute sassane papaanni mangitou."

"Uare, apa iami inai mamalli roti aregane rua rasutta roitta sala'a ana see mapaannu manga taumata indi?" aroddi unnu manga mallalarrenggennu Mawu Yesus.

³⁸See Mawu Yesus naiwalo, "Pia sangkura roti siamiu? Roote ellehe."

Napawe imangitou suete na'ellega, imangitou nabbisara, "Pia lima m bau roti wufu rua m bua inassa."

³⁹See Mawu Yesus nandolokku manga taumata udde niapaa'ianna tumufuttu manga wageangnge su nannalo ma'elomma. ⁴⁰Ne manga taumata udde inuma'iante ringannu uatokka su manga wageangnge. Pia marrasutta su atoune sangkawageanganna wufu pia lai lima m pulo su atoune sulalummu sangkawageanganna. ⁴¹Wua udde Mawu Yesus nanganute lima m bau roti wufu inassa rua m bua, see naningngara langitta wufu naadiangkamanna su Mawu Ruata. Wua udde, Itou namesangke roti udde ringannu lima-Ne wufu nianggille su mallalarrenggen-Ne iapatahia su taumata nambo udde, wufu inassa lai rua m bua nitahia simangitou nambo udde. ⁴²Imangitou inumanna na'oma n sara nalaidda. ⁴³Wua udde lambe n anna udde niammullu mallalarrenggennu Mawu Yesus - sarangkanambone mapulo dua su ulangnge napene-pene. ⁴⁴Taumata esakka apan inumanna roti udde irarrangngo lima riwu su atoune.

Mawu Yesus niuamatta su wowo n ua'e

(Mat. 14:22-33; Yoh. 6:15-21)

⁴⁵Wua udde ringannu malihakka Mawu Yesus nandolokku mallalarrenggen-Ne nassenggotte ringannu saalanna malliu roro Sitou su Betsaida su samba'a n rano, tanta'anna Itou nandolokku taumata nambo udde niapaapule. ⁴⁶Napawe suete nanondo n taumata nambo udde, Mawu Yesus inaite su wuidda umaliomanna. ⁴⁷Napawe rabbite, saalannu mallalarrenggennu Mawu Yesus su pattangngante n rano, arawe

Mawu Yesus ta'e su ammaranne. ⁴⁸Itou naasilote simangitou mammundalla ringannu masahadda atonna, ana waugu anginna uasomakka saalanna. Ana waugu udde, irararanggo su wallattu puulla tatallu wuɽɽu annumma ruaallo, Itou nirumantate ringanni mangitou u'amatta su wowo n ua'e. Wuɽɽu Itou sidutu u'amatta ere ola'u sumabbi simangitou. ⁴⁹Napawe imangitou naasilo manungku Itou u'amatta su wowo n ua'e, imangitou massunna Itou setanna, ⁵⁰na'oma n sara imangitou mangngintuli n atata'utta. Ana waugu imangitou naasilo Sitou wuɽɽu imangitou lapiddu niɽrumoro atonna.

Arawe Mawu Yesus lapiddu namo'a simangitou, "Paatammuda! Ia'u Mawu Yesus. Arie paata'utta!" ⁵¹See itou sinuma'ete saalanni mangitou, wuɽɽu anginna noɽote. Mallalarɽenggenno Mawu Yesus mangke naherangga atonna. ⁵²Aɽarindu'a ringannu roti lima m bau udde, taambe lai niasunnanni mangitou. Masahadda imangitou massunna.

Mawu Yesus napaapia manga taumata marada'a su Genesaret

(Mat. 14:34-36)

⁵³Napawe na'omate su samba'a n rano, imangitou nabaɽangote su tatuɽiannu Genesaret. ⁵⁴Napawe imangitou sinumossokke wuassu saalanna, manga taumata naasilote manungku nirumanta udde Mawu Yesus. ⁵⁵See imangitou tinumaɽangke su aɽawo'u tampa su wageanggu leta'a udde, wuɽɽu nangapidde manga taumata marada'a uarandangga su wilatta inaite ringannu Mawu Yesus. Amungkanggu imangitou maa-ringikka manungku Mawu Yesus su sambau tampa, imangitou mangapiddu manga taumata marada'a lai isudde. ⁵⁶Suapa n tampa Mawu Yesus rumanta – mapia ete su ampungnga, su soa ara'e su ampunguga maradio'a – isudde sidutu taumata rudanta wuɽɽu mangngaddo n rumarada'a su pasakka. See imangitou sussaɽande tadea'u manga taumata marada'a udde iwala mangindingnga jubah Mawu Yesus, salaiwe tumba'u pentakke. Sarangkanambone apan naaindingnga jubah udde mangke mapia.

Addatta inanaramannu iupungngu aɽamona

(Mat. 15:1-9)

7 Sambageanganna taumata n Farisi wuɽɽu manga pira huru n agama wuassu Yerusalem, nirumanta ringannu Mawu Yesus. ²Imangitou naasilo sire pira mallalarɽenggenno Mawu Yesus u'anna ringannu lima tawe niukkassa tumuɽruttu atorannu agama, eteudde tawe nangukkassa lima rorone tumuɽruttu atorannu agama.

³Manga taumata n Farisi, aroddi lai manga taumata n Yahudi, maturrutta atonna su addatta inanaramannu iupungngu alamona mangitou. Imangitou tawe umanna, amungkanngu taambe nangukkassa lima tumurruttu atoranna apan suete nitantunna. ⁴Sarannapa niwallianna su pasakka tawe annananna, amungkanngu taambe niukkassa rorone. Wurru manambo atoranna waine wuassu iupungngu alamona mangitou apan aagasanni mangitou matoha-tohassa, ere lai atorannu pangangukassa halasi, mangko wurru manga sarannapa wuassu witu'a.

⁵Ana waugu udde manga taumata n Farisi wurru manga huru n agama naiwalo Mawu Yesus, "Anio mallalarrenggennu udde u'anna tawe nangukkassa lima? Anio imangitou tawe tumurrutta addatta inanaramannu iupungngu alamona ng kite?"

⁶Mawu Yesus sinumimbakka, "Iamiu taumata lilangkama'e! Narringo atonna apa apan suete niapasingkatti Yesaya su ola'i amiu ete-udde,

'Arendi wisara Mawu Ruata,

Manga taumata udde tumba'u massubba Sia'u ringannu manga wisara,

arawe naungngi mangitou marau wuassia-U.

⁷Tawe gunane imangitou massubba Sia'u,

ana waugu imangitou mangngarra'u atorannu taumata parrimau napa udde ere atorang-Ku!"

⁸Manga parenta Mawu Ruata tawe pandumanni amiu, arawe manga atorannu taumata aagasanni amiu matoha-tohassa."

⁹See Mawu Yesus nabbisara apia, "Iamiu pande atonna manola'u parenta Mawu Ruata tadea'u wotongnge mannohassa alarra'i amiu sassane. ¹⁰Musa suete nangagillu parenta indi, 'Pangaddatta iamangngu wurru inangngu,' wurru, 'Isai-sai mabbisara iamangnga inangnge rinone irruumanna ma'oma n sara pateanna.' ¹¹Arawe iamiu mangngarra'a: Amungkanngu taumata mabbisara hagurangnge, 'Apa rinone ta'u ianggila su iamangnga wurru inangnga, suete ta'u nianggilla su Mawu Ruata,' ¹²ne iamiu napaaliu n taumata wuassu manarane mantulungngu hagu-

rangnge. ¹³Nariaddi ringannu alarrangngu sassane, apan nianggillu su manga taumata, iamiu mapawuli m wisara Mawu Ruata. Ta'e manambo lai inolaanna ereindi apan a'olaanni amiu."

Inolaanna apan maalaleo taumata

(Mat. 15:10-20)

¹⁴See Mawu Yesus namagote paassa lai taumata nambo udde wurru nabbisara simangitou, "Padaringikka tadea'u maasunna! ¹⁵Tawe saran

sambau wuassu liudde apan sumutta sulaḷummu taumata wotongne maarosa sitou. Arawe, apan sinumabangnga wuassu sangkatou eteudde maarosa sitou. [¹⁶Nariaddi, amungkangngu pia taḷinga, padaringikka.]”

¹⁷Su tempo Mawu Yesu nanantangke n taumata nambo udde, wuṛṛu sinumuttate su waḷe, mallaḷarṛenggen-Ne naiwaḷote Sitou su ola’u pandummu sasumandingnga udde. ¹⁸Ne Mawu Yesu nabbisara simangitou, ”Mangaḷene iamiu taambe lai naasunna? Apa iamiu tawe maasunna manungku apan sinumutta sulaḷummu sangkatou taumata tawe wotonge maaola’a taumata udde marosa? ¹⁹Ana waugu sinumutta udde tawe sinumabbi su naungnga, arawe sinumabbi su tianna wuṛṛu wua udde sinumabangnga apia.” Ringannu wisara udde, Mawu Yesu napaaliatta’a manungku aḷawo’u anna wotongne annananna.

²⁰See Mawu Yesu nabbisara apia, ”Apan sinumabangnga wuassu taumata, eteudde maarosa sitou. ²¹Ana waugu wuassu laḷumme eteudde wuassu laḷummu naungnga, sumabangnga riṅiṛṛanna laḷeo apan pangin-sueanne taumata ma’ola’a aḷaḷeo, manna’ote, mammate, ²²sussandaga, mallinga, mangngadio’a, ma’ola’a aḷawo’u aḷaḷeo, waḷiu, tawe addanne, mangngune mawarabunga wuṛṛu masahadda pangaṛṛaanne. ²³Anambo n aḷaḷeo udde sinumabangnga wuassu laḷumme, wuṛṛu eteudde maaola’a taumata marosa.”

Pangangimannu sangkatou wawine

(*Mat. 15:21-28*)

²⁴Wua udde Mawu Yesu nanantangke n tampa udde, wuṛṛu inaite su wageangngu leta’a marani n soa Tirus. Itou sinumutta su sambau waḷe wuṛṛu maddiri asingkatanna manungku Itou uatana’a isudde. Arawe Itou tawe mappa’imbuni. ²⁵Sangkatou inangnga, apan pia anangnge wawine niasuttannu ghaṛṛaho laḷeo, naaringikka su ola’u Mawu Yesu. Itou nirumanta ringannu Mawu Yesu wuṛṛu nassubba su saruan-Ne, ²⁶lapiddu sinumaḷande tadea’u Mawu Yesu mallimbuakka ghaṛṛaho laḷeo wuassu ana’a udde. Wawine udde waḷine taumata n Yahudi, inasungkangnga su wageangngu leta’u Fenisia su Siria. ²⁷Mawu Yesu nabbisara sitou, ”Aḷaṛṛana’a riṇone anggiḷannu anna rorone. Laḷeo manganu annu aḷaṛṛana’a ilombo su asu.”

²⁸”Tuangnga,” sasimbakku wawine udde, ”manga asu su aḷungngu medda lai u’anna manga lambe apan ia’ema’u aḷaṛṛana’a!”

²⁹See Mawu Yesu nabbisara sitou, ”Ana waugu sasimbakku udde, apuḷete; ghaṛṛaho laḷeo sinumabangke wuassu anangngu!”

³⁰Inangnga udde napulete. Su wale itou naaratingnga ana'i tou mattiilla su lallowanganna, wuɽɽu gharraho laɽeo, atonna-tonna sinumabangke wuassu ana'a udde.

Mawu Yesus napaapia n sangkatou mou wuɽɽu wengella

³¹Wua udde Mawu Yesus nanantangke n wageangngu leta'u Tirus, wuɽɽu nanassute amatanne sinumabbi Sidon watukku Rano n Galilea. Itou namile laɽanna sumabbi wageangngu leta'u Mapuɽo Soa (Dekapolis). ³²Isudde taumata nangapiddu sangkatou mou wuɽɽu wengella ringanni Tou. Imangitou madorongnga Mawu Yesus mangado n lima-Ne su taumata udde. ³³Mawu Yesus nangapiddu taumata udde nangindau wuassu taumata nambo, see nantarɽo n taɽimado-Ne sulaɽummu taɽinga n taumata udde. Wua udde Mawu Yesus nangaddu, wuɽɽu namita lila n taumata udde. ³⁴Wua udde Mawu Yesus naningngara watukku langitta, see sinumangngo ma'ikkatta wuɽɽu nabbisara taumata udde, "Efata," atappasanne, "Awu'ate!"

³⁵Taɽinga n taumata udde nawu'a wuɽɽu lilane nallome apia, itou nanattakke maawisara ringannu mapia. ³⁶See Mawu Yesus naningaddi mangitou sarangkanambone mabatti'u inolaanna udde sisai-sai. Arawe mangkasingadde Mawu Yesus, imangitou mangke mabatti'a lai. ³⁷Wuɽɽu anambo n taumata apan naaringikka udde naherangnga atonna. Imangitou nabbisara, "Sarangkanambone niolang-Nge ringannu mapia! Wuɽɽu lai Itou na'ola'a taumata wengella naaringikka wuɽɽu taumata mou naawisara!"

Mawu Yesus napaannu appattu ɽiwu su atoune

(Mat. 15:32-39)

8 Tawe naɽannu wua udde, pia lai sambageanganna taumata nambo nirumanta naammulla. Ana waugu imangitou tawe anna, Mawu Yesus namago mallaɽarɽenggen-Ne wuɽɽu nabbisara, ²"Ia'u u'akkannu taumata nambo indi. Tallute allo aɽannune imangitou su sampunna ringang-Ku, wuɽɽu orassa indi imangitou tawe anna. ³Amungkangngu Ia'u mandolokki mangitou iapaapuɽe maɽunussa, imangitou sarun mawantingnga su tangnga n daɽanna. Apa lai su wallatti mangitou piaddu nirumanta wuassu tampa marau."

⁴Mallaḷarṙenggenṇu Mawu Yesus sinumimbakka, "Su tampa araune indi, suapa taumata wotongnge maasomba anna iapaanna su taumata nambo indi?"

⁵"Sangkura anambone roti siamiu?" aiwaḷo Mawu Yesus.

"Pitu m bau," sasimbakki mangitou.

⁶Ne Mawu Yesus nandolokku taumata nambo udde inuma'ianna su leta'a, see Itou nanganute pitu m bau roti udde wuṙṙu naadiangkamante su Mawu Ruata. Wua udde Itou namesangke roti ringannu lima-Ne wuṙṙu nianggille su mallaḷarṙenggen-Ne niapatahia su taumata. Ne mallaḷarṙenggen-Ne na'ola'e aroddi. ⁷Imangitou lai pia manga pira inassa maradio'a. Mawu Yesus naadiangkamante lai su Mawu Ruata ana waugu inassa udde, see nandolokku mallaḷarṙenggen-Ne niapatahia inassa udde lai. ⁸⁻⁹Imangitou inumanna na'oma n sara naḷaidda – irarṙangngo pia appatu riwu su atoune taumata inumanna. Wua udde mallaḷarṙenggenṇu Mawu Yesus nangammullu lambe n anna – pitu ng kuḷa'a napene-pene. See Mawu Yesus nandolokku manga taumata udde niapaapuḷe, ¹⁰wuṙṙu Itou ringannu mallaḷarṙenggen-Ne lapiddu sinuma'e saalanna wuṙṙu inaite su wageangngu leta'u Dalmanuta.

Manga taumata n Farisi madorongnga Mawu Yesus ma'ola'a aḷarṙindu'a

(Mat. 16:1-4)

¹¹Sire pira taumata n Farisi nirumanta ringannu Mawu Yesus, wuṙṙu nanattakke uasasimbakka ringanni Tou ana maddea'a mapaasaḷa n Tou. Imangitou madorongnga Mawu Yesus ma'ola'a aḷarṙindu'a, maola'a sambau tatiala manungku Itou nirumanta wuassu Mawu Ruata.

¹²Mawu Yesus nasa'u, see sinumimbakka, "Anio manga taumata n tempo indi madorongnga Sia'u ma'ola'a aḷarṙindu'a? Tawe! Ia'u tawe mangagillu tanda ereudde simangitou!"

¹³See Mawu Yesus nanantangke mangitou, wuṙṙu sinuma'ete saalanna; wua udde inaite nassenggotta su samba'a n rano udde.

Ragi n taumata n Farisi wuṙṙu Herodes

(Mat. 16:5-12)

¹⁴Manga mallaḷarṙenggenṇu Mawu Yesus naabuḷi nangapiddu roti natimu. Imangitou tumba'u pia roti sambau su saalanna.

¹⁵"Paatehamma su ragi manga taumata n Farisi wuṙṙu ragi n Herodes," unnu Mawu Yesus simangitou.

¹⁶Ne manga mallajarrenggennu Mawu Yesus mannattakke uawa-watti'u hatto udde. Imangitou nabbisara, "Itou nabbisara aroddi, ana waugu iite tawe nangapiddu roti."

¹⁷Mawu Yesus masingkattu apa ipagahato mangitou. Ana waugu udde Itou naiwało simangitou. "Anio iamiu uahahatto su ola'u tawe roti? Apa iamiu ta'e wagga wurru taambe naasunna lai? Aroddi alumune ringirranu?" ¹⁸Iamiu pia mata – anio tawe ma'ellega? Iamiu pia talinga – anio tawe madaringikka? Iamiu tawe maanaungnga, ¹⁹lima m bau roti apan nitahia-U su lima riwu su atoune? Pira ng kuła'a lambe n anna niammulli amiu?"

"Mapuło dua," sasimbakki mangitou.

²⁰"Wurru su tempo Ia'u nattahia pitu m bau roti su appatu riwu su atoune," aiwało Mawu Yesus apia, "pira ng kuła'a lambe ng kannu apan niammulli amiu?"

"Pitu," sasimbakki mangitou.

²¹"Ne, iamiu taambe lai naasunna?" wisara Mawu Yesus apia.

Mawu Yesus napaapia n taumata wuta su Betsaida

²²Imangitou na'omate su Betsaida. Isudde taumata nangapiddu sangkatou wuta ringannu Mawu Yesus, wurru nadorongnga tadea'u Itou mamita taumata udde see mapia. ²³Ne Mawu Yesus nangagassa lima n taumata wuta udde wurru nangehetta sitou su liuddu soa. Wua udde Mawu Yesus nangaddu mata n taumata udde. Itou nangado n limane su mata n taumata udde, see naiwało sitou, "Wotongngete i'o maasilo sarannapa orassa indi?"

²⁴Taumata udde na'ellega saruane, see nabbisara, "Ore, ia'u naasilo taumata u'amatta; arawe imangitou iaasilo naalihida alu."

²⁵Mawu Yesus nangado n lima-Ne apia su mata n taumata udde. Paassa indi taumata udde mammata'u matane tadea'u maasilo. Matane napiate wurru itou naasilote sarangkanambone ringannu masema-semakka. ²⁶See Mawu Yesus nabbisara sitou, "Apulete, wurru ariete pabelengnga su soa udde."

Panga'uanni Petrus su ola'u Mawu Yesus

(Mat. 16:13-20; Luk. 9:18-21)

²⁷Mawu Yesus wurru manga mallajarrenggen-Ne inaita su manga ampungnga su leta'u Kaisarea Filipi. Su pattangngannu lałanna Mawu

Yesus naiwaŋo simangitou, "Tumuŋruttu wisara n taumata, isai Ia'u indi?"

²⁸Imangitou sinumimbakka, "Piaddu mabbisara: Yohanes Mananaŋrani; piaddu lai mabbisara Elia, wuŋru waine lai mabbisara; sangkatou su wallattu nabi."

²⁹"Arawe tumuŋruttu amiu sassane, Ia'u indi isai?" aiwaŋo Mawu Yesus.

Petrus sinumimbakka, "Iamangnga eteudde Ratu m Punnu Saŋa-matta!"

³⁰See Mawu Yesus napaanaungnga simangitou, tadea'u tawe mabatti'a su manga taumata su ola'u watangan-Ne.

Mawu Yesus nabbisara su ola'u asasusa-Ne wuŋru apapate-Ne

(*Mat. 16:21-28; Luk. 9:22-27*)

³¹Wua udde, Mawu Yesus nanattakke mangngaŋra'a mallaŋaŋŋenggen-Ne manungku Ana'u Taumata sarun matataŋŋangngu anambo n asasusa, wuŋru ipaseettu manga tembonanne, manga imam tembonanne wuŋru manga huru n agama. Itou sarun pateanna, arawe su allo atallune Itou sarun mabangunna apia. ³²Ringannu masemakka atonna Mawu Yesus namasingkattu olangnge udde su mallaŋaŋŋenggen-Ne. Ne Petrus nangehetta Mawu Yesus su sandiŋŋanne wuŋru nanagu Sitou. ³³Arawe Mawu Yesus nanaile wuŋru na'ellega mallaŋaŋŋenggen-Ne wuŋru nanagu Petrus, "Roote wua isindi, Wawono'a! Riŋiŋŋannu udde riŋiŋŋannu taumata; waŋine riŋiŋŋannu Mawu Ruata!"

³⁴Wua udde Mawu Yesus namagote taumata nambo isudde su sampunna ringannu mallaŋaŋŋenggen-Ne. See Itou nabbisara simangitou, "Taumata apan mallaŋŋenggena Sia'u, riŋone manantangngu manarane wua udde mamasanna arussa-Ne wuŋru sidutu uatantalongnga Sia'u.

³⁵Ana waugu taumata apan mannahekkku wiakku ririne, sarun awuŋiannu wiakke. Arawe taumata apan mannantillu wiakke ana waugu Ia'u wuŋru Watti'u Aŋaŋuassa wuassu Mawu Ruata, sarun masaŋamatta. ³⁶Apa auntunganne su sangkatou taumata, amungkanngngu ahewallu runia indi maola'a darotongnge arawe itou awuŋiannu wiakke? ³⁷Wotongnge wiakka udde asaŋiuanu darotongnga waine?

³⁸Amungkanngngu sangkatou taumata massili mangnga'u Sia'u wuŋru aŋaŋra'u su tempo maŋawangnga wuŋru laŋeo indi, Ana'u Taumata lai massili manga'u taumata udde, su tempo Itou rumanta apia ringannu taŋŋino n Iamangnge, tatantalongannu manga mala'ekatta apan susi."

9 "Asingcate!" unnu Mawu Yesus, "Wuassu wallatti amiu isindi piaddu apan tawe mate, tantaḷanna taambe maasilo Mawu Ruata mamarenta ringannu taḡḡino-Ne!"

Mawu Yesus niwantuhanna

(*Mat. 17:1-13; Luk. 9:28-36*)

²Annummu allo wua udde, Mawu Yesus nangapiddi Petrus wuḡḡu Yakobus wuḡḡu tuḡḡangnge Yohanes, nangindau su sambau wuidda apan matanggakka. Su saruannu mata mangitou Mawu Yesus nawaḷu hati-Ne. ³Laung-Nge nabaḷi mawira lullendapa. Tawedu sangkatou mabawansalla su runia indi wotongnge maawaresi aroddi awirane. ⁴Wua udde sire tallu mallaḷaḡḡenggen-Ne naasilo Mawu Yesus uahahatto n Elia wuḡḡu Musa. ⁵Ne Petrus nabbisara su Mawu Yesus, "Iamangnga Huru, mapia atonna iite isindi. Mappianne iami mapararisikku rasanna tatallu: sambau su Iamangnga, sambau si Musa, wuḡḡu sambau lai si Elia." ⁶Petrus wagga apa apan ḡinone iwisarane, ana waugu itou wuḡḡu ringanne darua tantaḷanna matta'utta atonna.

⁷Wua udde winabbawa nangooppa simangitou wuḡḡu wuassu winabbawa udde inaringiḡḡanna tingikka nabbisara, "Ete indi Ana'u apan arangnguanna. Daringiḡḡe Itou!" ⁸Maḷiha-ḷihakka imangitou na'ellega su uapaḷiwutta simangitou, wuḡḡu tawe naasilo manga apa isudde ringanni mangitou, tumba'u Mawu Yesus sassane. ⁹Su tempo imangitou sinumossokke wuassu wuidda udde, Mawu Yesus napaanaungnga simangitou, "Arie pabbatti'a sisai-sai, apa apan suete niasiloanni amiu tanginna tantaḷanna Ana'u Taumata taambe niapawangunna wuassu papate."

¹⁰Imangitou tinumuḡḡutte tanata udde, arawe su wallatti mangitou sassane nanattakke uahahatto apa pandumannu Mawu Yesus nabbisara "mabbiakka apia wuassu papate". ¹¹Ne imangitou naiwaḷo Sitou, "Anio manga huru n agama mabbisara manungku Elia sarun rumanta paarorone?"

¹²Mawu Yesus sinumimbakka, "Elia atonna nirumanta paarorone ana waugu manuungngu sarangkanambone. Arawe ereapa olangnge ringannu Ana'u Taumata? Anio sulaḷummu Wuke Susi uawoḡḡetta manungku Itou sarun matataḡḡangngu anambo n asasusa wuḡḡu aaḷuandahannu taumata? ¹³Arawe Ia'u mabbisara siamiu: Elia suete nirumanta, wuḡḡu manga taumata na'ola'a sitou walate apulu mangitou. Udde naḡḡino ere suete niwoḡḡetta sulaḷummu Wuke Susi su ola'u watanganne."

Mawu Yesus napaapia n ana'a niasuttannu gharraho laleo

(Mat. 17:14-21; Luk. 9:37-43a)

¹⁴Napawe Mawu Yesus wuŕŕu sire tallu mallalaŕŕenggen-Ne nawe-lengke apia ringannu mallalaŕŕenggen-Ne waine, imangitou naasilo pia taumata manambo isudde. Manga pira huru n agama tantaŕanna uasasimbakku mallalaŕŕenggennu Mawu Yesus isudde. ¹⁵Aroddi manga taumata udde naasilo Mawu Yesus, imangitou inagukke, lapiddu tinumaŕangnga nanaŕohu Sitou. ¹⁶"Apa ipattatiakki amiu ringannu manga huru n agama udde?" aiwaŕo Mawu Yesus su mallalaŕŕenggen-Ne.

¹⁷Sangkatou wuassu wallattu taumata nambo sinumimbakka, "Iamangnga Huru, ia'u uaapiddu ana'u iapa'ellega su Iamangnga. Itou mou ana waugu niasuttannu gharraho laleo. ¹⁸Amungkangngu gharraho udde sumutta sitou, wadangnge iwabatingnge su leta'a, moŕŕongnge lullupa, isine ia'garŕagitta wuŕŕu ahewallu wadangnge mannottoga. Ia'u nadorongnga mallalaŕŕenggennu Iamangnga mallimbuakka gharraho laleo udde, arawe imangitou tawe maalimbuakka."

¹⁹Ne Mawu Yesus nabbisara simangitou, "Tawe hampa iamiu indi! Iamiu atonna-tonna taumata apan tawe mangngimanna. Ma'oma n sara tempo suapa Ia'u sarun matana'a su sampunna ringanni amiu wuŕŕu manabare su alaŕleo ng kamiu? Apira'e ana'a udde isindi!" ²⁰Ne imangitou nangapidde n ana'a udde ringannu Mawu Yesus.

Aroddi gharraho laleo udde naasilo Mawu Yesus, itou napawantikku ana'a udde na'oma n sara ana'a udde nawantingnga tuttaŕingngi su leta'a. Moŕŕongnge lullupa. ²¹See Mawu Yesus naiwaŕo iamangnge, "Pirate alaŕnune itou arendi?"

"Ro'e n itou ta'e adio'a!" sasimbakki iamangnge. ²²"Masokkate gharraho laleo udde mappandumma mamate sitou ringannu mangema'a su putungnga ara'e sulaŕummu ua'e. Arawe amungkangngu Iamangnga wotongnge mantuŕungnga, doronganna Iamangnga umakkanni ami wuŕŕu mantuŕungngi ami!"

²³"Apa wisaranu? Amungkangngu Iamangnga wotongnge?" sasimbakku Mawu Yesus. "Sarangkanambone wotongnge, sambaliate tau-mata mangngimanna!"

²⁴Iamangngu ana'a udde lapiddu inumui, "Mawu, ia'u mangngimanna, arawe pangangimangu adio'a. Tuŕunga'a ia'u tadea'u aatambanna lai pangangimangu!"

²⁵Napawe Mawu Yesus naasilo manungku taumata mannattakke rudanta maŕŕimpulunna, Itou namarenta gharraho laleo udde ringannu na-

bhisara, "Gharraho wengella wuṛṛu mou, Ia'u mandolokku; sabbangnga wuassu ana'a indi wuṛṛu ariete passutta sitou apia."

²⁶Gharraho laleo udde nangintuli, see na'ola'a ana'a udde iwabantikke, wua udde sinumabangnga wuassu ana'a udde. Ana'a udde ellehanna ere asuangnga na'oma n sara taumata manambo mabbisara, "Itou natete!" ²⁷Arawe Mawu Yesus nangagassa limane wuṛṛu nantulunggi tou dirumarisikka. Ne ana'a udde nabangunte.

²⁸Napawe Mawu Yesus su walete, manga mallalarrenggen-Ne ni-rumanta passangkatou ringanni Tou wuṛṛu naiwalo, "Anio iami tawe maalimbuakka gharraho laleo udde?"

²⁹Mawu Yesus sinumimbakka, "Gharraho laleo ere udde tawe aalimbuaranna ringannu alawo'u inolaanna, tumba'u aaliomanna."

Mawu Yesus nabalo apia su ola'u papate-Ne

(Mat. 17:22-23; Luk. 9:43b-45)

³⁰Mawu Yesus wuṛṛu mallalarrenggen-Ne nanantangke n tampa udde wuṛṛu inaita nanassu amatanna sinumabbi Galilea. Mawu Yesus maddiri asingkatannu taumata su tampa Itou uatana'a, ³¹ana waugu Itou tanta'anna manggarra'a mallalarrenggen-Ne. "Ana'u Taumata sarun itantilla su tarino n taumata," aroddi unnu Mawu Yesus, "wuṛṛu Itou sarun pateanna, arawe su allo atallune Itou sarun mabangunna apia!"

³²Manga mallalarrenggen-Ne tawe naasunna alarra'u Mawu Yesus, arawe imangitou matta'utta maiwalo Mawu Yesus.

Isai ahewalanne?

(Mat. 18:1-5; Luk. 9:46-48)

³³Imangitou na'omate su Kapernaum. Napawe su walete, Mawu Yesus naiwalote mallalarrenggen-Ne, "Iamiu uasasimbakku apa tanginna su tangnga n dalanna?"

³⁴Imangitou tawe sinumimbakka, ana waugu tanginna su tangnga n dalanna imangitou uatatiakka su ola'u isai ahewalanne. ³⁵Mawu Yesus inuma'ianna, see namagote sire mapulo dua mallalarrenggen-Ne udde. Itou nabbisara simangitou, "Taumata apan maapulu maola'a paarorone, itou sarun maola'a panginsueanne wuṛṛu sarun maola'a mangangimbe-taumata nambo." ³⁶Wua udde Mawu Yesus nangehetta sangkatou ana'a adio'a, wuṛṛu ana'a udde niapararisikka su saruanni mangitou saranganambone. Mawu Yesus narra'uppa ana'a udde wuṛṛu nabbisara su

mallalarrenggen-Ne, ³⁷"Taumata apan manarimmattu sangkatou ana'a ereindi ana waugu Ia'u, udde ere lai manarimmatta Sia'u. Wuṛṛu tau-mata apan manarimmatta Sia'u, itou waḡine tumba'u manarimmatta Sia'u, arawe manarimmattu lai Sitou apan nandolo-U."

Isai apan tawe lumawangnga siite sarun manamba'a siite

(Luk. 9:49-50)

³⁸See Yohanes nabbisara Mawu Yesus, "Iami naasilo sangkatou mallimbuakka setanna ringannu arannu Iamangnga. Wuṛṛu iami na-ningaddi tou ana waugu itou waḡine wua dinganni ite."

³⁹Arawe Mawu Yesus nabbisara, "Arie maningaddi tou, ana waugu tawe sangkatou apan maaola'a alaṛṛindu'a wuassu arang-Ku, wotongnge lapiddu mandaleo arang-Ku. ⁴⁰Ana waugu taumata apan tawe mando-appa siite, udde atappassanne uasamba'a siite. ⁴¹Paanaunge! Taumata apan mappa'inummi amiu, ana waugu iamiu mallalarrenggennu Ratu m Punnu Saḡamatta, itou sarun manengkamma laḡantakke."

Manga inolaanna apan maarosa taumata

(Mat. 18:6-9; Luk. 17:1-2)

⁴²"Isai napa'ola'a su wallattu sangkatou taumata maradio'a indi tate lai mangngimanna Sia'u, mappianne amungkangngu watu gahilinganna ii'tta su ullekkane, wuṛṛu itou iwontolla su tahaḡoangnga. ⁴³Amungkangngu limanu maarosa si'o, pototta limanu udde! Mappianne i'o mabbiakka ringannu Mawu Ruata tawe limanu samba'a wuassu i'o ringannu limanu rua m ba'a masutta su naraka, eteudde putungnga apan tawe mappadumma. [⁴⁴Poiaroddi putungnga tawe mappadumma wuṛṛu ulida tawe mate.] ⁴⁵Wuṛṛu amungkangngu leddanu maarosa si'o, pototta ledda udde. Mappianne i'o mabbiakka ringannu Mawu Ruata tawe leddanu samba'a wuassu i'o ringannu leddanu rua m ba'a iramme sulalummu naraka. [⁴⁶Poiaroddi putungnga tawe mappadumma wuṛṛu ulida tawe mate.] ⁴⁷Amungkangngu matanu maarosa si'o, loetta mata udde. Mappianne i'o sumutta su Runia Wakku Mawu Ruata tawe mata samba'a, wuassu i'o ringannu matanu rua m ba'a iramme su naraka. ⁴⁸Poiaroddi putungnga tawe mappadumma wuṛṛu ulida tawe mate.

⁴⁹Sangkatou-sangkatou sarun waresiannu putungnga ere sasamba apan wabaresiannu asimma.

⁵⁰Asimma udde mapia, arawe amungkanngu naola'a maammi, wotonggewe iapaapakkada apia? Nariaddi, řinone iamiu maola'a ere asimma – pabbiakke su sampunna ringannu paddarama."

Mawu Yesus manggarra'a su ola'u pasasasindo

(Mat. 19:1-12; Luk. 16:18)

10 Wua udde Mawu Yesus nanantangke n tampa udde, wuřru inaita su wageangngu leta'u Yudea wuřru su wageangngu leta'u samba'a n Sařukku Yordan. Taumata manambo nirumanta apia marřimpulunna mammařiwutta Mawu Yesus. Wuřru ere wiasane Mawu Yesus manggarra'a simangitou.

²Manga pira taumata n Farisi nirumanta lai mappaasařa Mawu Yesus. Imangitou naiwařo, "Tumuřruttu tita n agama ng kite, wotongewe taumata manindo awingnge?"

³Mawu Yesus sinumimbakka, "Musa nangagillu parenta apa siamiu?"

⁴"Musa namala n taumata manindo awingnge, sambařiate mamorřettu surattu sindo rorone," sasimbakki mangitou.

⁵"Musa namorřettu parenta udde ana waugu iamiu tumanite masahadda pangarřaanne," wisara Mawu Yesus simangitou. ⁶"Arawe su paarorone, su tempo Mawu Ruata nandiaddi taumata, niwisara manungku 'Mawu Ruata nandiaddi simangitou esakka wuřru wawine. ⁷Ana waugu udde esakka sarun manantangngu inangnga iamangnge wuřru uaaukke ringannu awingnge, ⁸ne itarua naola'e sambau.' Nariaddi, imangitou wařine rua ng katou lai, awe'e sambau. ⁹Ana waugu udde, apa apan suete ni'aukka Mawu Ruata, tate wotonge iapaatařei n taumata!"

¹⁰Napawe imangitou sinumuttate su waře, manga mallařarřenggen-Ne naiwařote Mawu Yesus su ola'u hatto udde. ¹¹Mawu Yesus nabbisara simangitou, "Isai manindo awingnge see maawingngu wawine waine, taumata udde sinumandaga su saruannu awingnge paarorone udde. ¹²Aroddi lai wawine apan nanindo awingnge see maawingnga apia ringannu esakka waine, itou lai sinumandaga."

Mawu Yesus nangalamatta alařřana'a

(Mat. 19:13-15; Luk. 18:15-17)

¹³Pia manga pira taumata nangapiddu alařřana'a ringannu Mawu Yesus tadea'u Itou mamita wuřru mangalamatta simangitou. Arawe

mallalārrengennu Mawu Yesus namuḷo manga taumata udde. ¹⁴Naasilo olangnge udde Mawu Yesus namuḷo see Itou nabbisara mallalārrenggen-Ne, "Wala'e alārřana'a udde rumanta ringang-Ku! Arie passingara'a imangitou, ana waugu ete taumata ereindi maola'a laḷorřo n araratuannu Mawu Ruata. ¹⁵Naunge indi! Isai tawe sumaruanna Mawu Ruata ere sangkatou ana'a, tawe maola'a laḷorřo n araratuannu Mawu Ruata." ¹⁶Napawe suete nabbisara aroddi, Mawu Yesus narřa'upe alārřana'a udde, wua udde nangado n lima-Ne su wowo m pua mangitou sangkatou-sangkatou wuřru nangaḷamatte simangitou.

Taumata ala

(Mat. 19:16-30; Luk. 18:18-30)

¹⁷Napawe Mawu Yesus nanassute lai amatanni mangitou, nirumantate sangkatou tuttataḷangnga inai ringannu Mawu Yesus. Taumata udde inumaḷintuda su saruannu Mawu Yesus wuřru naiwaḷo, "Huru apan mapia, ia'u ma'ola'a apa tadea'u wotongnge maasomba pabba-wiakka tutune wuřru saran maḷannu-ḷannu?"

¹⁸"Anio i'o mabbisara Ia'u mapia?" aiwaḷo Mawu Yesus. "Tawedu apan mapia, tumba'u Mawu Ruata sassane. ¹⁹I'o masingkatte manga parenta Mawu Ruata, 'Arie pamate, arie passandaga, arie panna'o, arie mattiala awusu, arie pallinga, pangaddatta iamangngu wuřru inangngu."

²⁰"Iamangnga Huru," unnu taumata udde, "anambo n parenta udde suete tinuřrutangu ro'e n ta'e dario'a."

²¹Mawu Yesus nanaile taumata udde ringannu aakkanna see nabbisara, "Ete inolaanna sambau lai apan sarun olaannu. Roote waḷua'a anambo n darotongngu; onggola'e roinne su taumata asiangnga, wuřru i'o sarun maasomba darotongnga su surga. Wua udde rantate řundingante Sia'u." ²²Naaringikka Mawu Yesus nabbisara aroddi, taumata udde sinumassilla, see nanantangke n tampa udde ringannu naungnga massusa ana waugu itou tumanite n ala.

²³Ne Mawu Yesus nanutudde mallalārrenggen-Ne see nabbisara simangitou, "Masahadda atonna taumata ala maola'a laḷorřo n araratuannu Mawu Ruata!"

²⁴Manga mallalārrenggen-Ne naherangnga naaringikka wisara Mawu Yesus. Arawe Mawu Yesus nabbisara apia, "Alārřana'u, marahadda atonna maola'a laḷorřo n araratuannu Mawu Ruata! ²⁵Malluasanna sambau unta sumutta su lořrangngu rararřumma wuassu sangkatou ala sumutta su Runia Waku Mawu Ruata."

²⁶Manga wisara Mawu Yesus udde naaherangnga mallalarrenggen-Ne, na'oma n sara imangitou naaiwalote sangkatou ringannu sangkatou. "Amungkangngu aroddi, isai wotongnge masalamatta?"

²⁷Mawu Yesus nanutuda simangitou wurru sinumimbakka, "Su tau-mata udde tawe maola'a arawe su Mawu Ruata udde mangke maola'a; sarangkanambone wotongnge maola'a su Mawu Ruata."

²⁸See Petrus nabbisara, "Pa'ellega, iami suete nanantangngu sarang-kanambone ana waugu mallarreggenna iamangnga."

²⁹Mawu Yesus nabbisara, "Pangimante: taumata apan suete nanan-tangngu amonanne, ara'e turrangnge esakka ara'e turrangnge wawine, ara'e inangnge ara'e iamangnge, ara'e alarranangnge, ara'e lai manga wawailanne ana waugu Ia'u wurru ana waugu Watti'u Alaluassa wua-ssu Mawu Ruata, ³⁰taumata udde sarun manengkamma lembo n anam-boanne orassa indi. Itou sarun maasomba paarasutta pia lebbene anambo n walene, turrangnge esakka, turrangnge wawine, inangnge, alarranangnge, wawailanne, - wurru asasusa lai. Wurru parrangatta su tempo addantane, taumata udde sarun manengkamma pabbawiakka tu-tune wurru saran malannu-lannu. ³¹Arawe manambo taumata'apan ora-ssa indi paarorone sarun maola'a panginsueanne wurru manambo apan orassa indi panginsueanne sarun maola'a paarorone."

Mawu Yesus nabbisara atallune su ola'u papate-Ne

(Mat. 20:17-19; Luk. 18:31-34)

³²Mawu Yesus wurru mallalarrenggen-Ne tantaļanna su amatanna watukku Yerusalem. Mawu Yesus u'amatta paarorone, wurru mal-lalarrenggen-Ne sussingawangnga abbi. Wurru manga taumata apan mallarreggenna simangitou wuassu liudde lai matta'utta. Wua udde Mawu Yesus namago apia mallalarrenggen-Ne sassane wurru nama-singkatta simangitou apa apan sarun mariaddi salimmurine su riri-Ne. ³³"Padaringikka," wisara-Ne, "Iite orassa indi tantaļanna mattuda n Ye-rusalem. Poiaroddi Ana'u Taumata sarun itantilla su manga imam tem-bonanne wurru manga huru n agama. Itou sarun irruumanna ma'oma n sara mate, wua udde itantilla su manga taumata waline Yahudi. ³⁴Imangitou sarun mangaļuandaga Sitou, wurru mangaddu Sitou, manan-sara Sitou, wurru mangarussa n Tou. Arawe su allo atallune Itou sarun mabangunna apia."

Darorongngi Yakobus wuŕru Yohanes

(Mat. 20:20-28)

³⁵See Yakobus wuŕru Yohanes, eteudde alaŕrana'i Zebedeus, niru-manta ringannu Mawu Yesus, "Iamangnga Huru," unni tarua, "pia ino-laanna apan ipaapulu ng kami olaanni Iamangnga siami."

³⁶"Apa ipaapulu ng kamiu olaang-Ku siamiu?" aiwaŕo Mawu Yesus.

³⁷Imangitou sinumimbakka, "Iami maapulu uma'ianna su uananna wuŕru su aiŕri n Iamangnga, amungkangngu Iamangnga ua'iante su addera n araratuanna apan mawantuga."

³⁸"Iamiu wagga apa apan radoronganni amiu," wisara Mawu Yesus simangitou. "Wotongnge iamiu ma'inumma wuassu mangko n asasusa apan sarun inumang-Ku wuŕru sumutta sulaŕummu papaŕrangnga apan sarun suttang-Ku?"

³⁹"Wotongnge," sasimbakki mangitou.

Ne Mawu Yesus nabbisara apia simangitou, "Atonna iamiu sarun ma'inumma wuassu mangko n asasusa apan sarun inumang-Ku wuŕru sumutta sulaŕummu papaŕrangnga apan sarun suttang-Ku. ⁴⁰Arawe su ola'u isai apan uma'ianna su uananna ara'e su aiŕri-U, udde waŕine Ia'u manantunna. Mawu Ruata apan manantunna isai-sai sarun uma'ianna sumanga tampa udde."

⁴¹Napawe sire mapuŕo mallalaŕrenggennu Mawu Yesus waine udde naaringikka hatto udde, imangitou nasa'u Yakobus wuŕru Yohanes.

⁴²Nariaddi Mawu Yesus namagote simangitou sarangkanambone, see nabbisara, "Iamiu masingkatta manungku manga piaŕra'u pabbawalaga apan tawe maaillaŕa Mawu Ruata, mammaŕrangnga tumanangnge. Wuŕru tembonanni mangitou mannasa'i mangitou. ⁴³Arawe iamiu tawe wotongnge ma'ola'a aroddi! Arawe, taumata apan maapulu maola'a tembonanne su wallatti amiu, itou sarun maola'a mangangimbenu.

⁴⁴Wuŕru taumata apan maapulu maola'a paarorone su wallatti amiu sarun maola'a allangngu awadaalla. ⁴⁵Ana waugu Ana'u Taumata lai nirumanta waŕine ana see imbeanna. Itou nirumanta mangimbe wuŕru manantillu niawa-Ne ipanubussa rosa n taumata nambo."

Mawu Yesus napaapia n Bartimeus apan wuta

(Mat. 20:29-34; Luk. 18:35-43)

⁴⁶Imangitou na'omate su Yerikho. Wuŕru su tempo Mawu Yesus ringannu manga mallalaŕrenggen-Ne see taumata nambo nanantangke n soa udde, sangkatou wuta tantaŕanna ua'ianna madoro-rorongnga su

winggi n daɭanna. Aranne Bartimeus, ana'i Timeus. ⁴⁷Napawe Itou naaringikka manungku taumata sinumabbi udde Mawu Yesus taumata Nazaret, itou nangngintuɭi, "Mawu Yesus Ana'i Daud! Akkanaawe ia'u!"

⁴⁸Itou niwuɭoannu awadaalla wuɾru niapaɭaannaba. Arawe aatambanna lai aikkanne itou mangngintuɭi, "Ana'i Daud, akkanaawe ia'u!"

⁴⁹Ne Mawu Yesus nattaalle see nabbisara, "Wagoite itou."

Nariaddi imangitou namagote taumata wuta udde. Imangitou nabbisara sitou, "Paalannabe! I'o wabagoannu Mawu Yesus, pabbuatte!"

⁵⁰Taumata wuta udde nallombote n jubahne, see naɭiha-ɭihakka nirumarisikka inaita ringannu Mawu Yesus.

⁵¹"Apa ipaapulunu Ta'u olaang-Ku si'o?" aiwaɭo Mawu Yesus sitou.

Taumata wuta udde sinumimbakka, "Iamangnga Huru, ia'u maapulu maasilo."

⁵²"Roote," unnu Mawu Yesus, "Ana waugu i'o mangngimanna Sia'u, i'o napiate."

Su orassa udde lai taumata wuta udde naasilote. See itou tinumantalongke Mawu Yesus su laɭanna.

Mawu Yesus sinumutta su Yerusalem ringannu awawantuga

(Mat. 21:1-11; Luk. 19:28-40; Yoh. 12:12-19)

11 Su tempo maddani n Yerusalem, imangitou na'omate su Betfage wuɾru Betania, su wele m Wuiddu Zaitun. Isudde rua ng katou mallaɭarɾenggen-Ne nirolokku Mawu Yesus niapaɾɾoro. ²"Roote su



Betaniam (11:1)

ampungnga sasaruanna udde," unnu Mawu Yesus sitarua. "Aroddi iraddua sumutta su ampungnga udde, iraddua sarun maasilo sambau ana'u keledai apan ua'iitta wuŕŕu taambe sina'eannu taumata. Wu'ate keledai udde wuŕŕu apira'e isindi. ³Wuŕŕu amungkangngu pia taumata maiwaŕo siraddua, anio iraddua mamu'a keledai udde, waŕoa'a, 'Mawu mappandumma sitou, wuŕŕu Itou sarun mamelengnga ringannu maŕiha-lihakka.'"

⁴Rua ng katou mallalaffengennu Mawu Yesus udde inaita, wuŕŕu naaratingnga ana'u keledai tantaŕanna ua'iitta su ngara n waŕe su winggi n daŕanna. Ne itarua namu'ate keledai udde. ⁵Manga taumata apan uarisikka isudde naiwaŕo sitarua, "Ei, ma'ura iraddua? Anio iraddua mamu'a ana'u keledai udde?"

⁶Itarua sinumimbakka ereapa suete niwisara Mawu Yesus sitarua. Ne manga taumata udde namalate n tarua mangapiddu keledai udde. ⁷Napawe na'omate ringannu Mawu Yesus, tapanna'u keledai udde niamparŕanu jubah mangitou see Mawu Yesus sinuma'ete keledai udde. ⁸Manambo taumata mangngampakku jubah mangitou su laŕanna, pia lai mangngampakku ranna ng kalu su tangnga n daŕanna apan niapiddi mangitou wuassu wailla. ⁹Manga taumata apan u'amatta rorone wuŕŕu manga taumata apan uaŕaffengenna wuassu liudde, sarangkambone u'ui, "Paddalote Mawu Ruata! Niaŕamatante Itou apan nirumanta ringannu arannu Mawu! ¹⁰Niaŕamatante araratuan-Ne apan sarun rumanta - araratuanni Ratu Daud, iupungngu aŕamona ng kite! Dalo su Mawu Ruata Apan Atanggaranne!"

¹¹Panginsueanne Mawu Yesus na'omate su Yerusalem, see sinumutta su Waŕe Mawu. Isudde Itou na'ellega uapaŕiwutta Sitou. Arawe ana waugu marandumpe, wua udde Itou inaita watukku Betania su sampunna ringannu sire mapuŕo dua mallalaffenggen-Ne.

Mawu Yesus namontoga alu ara

(Mat. 21:18-19)

¹²Su tiŕrabbine tantaŕanna imangitou u'amatta nanantangngu Betania, Mawu Yesus niamalunusanna. ¹³Ro'e n marau Itou naasilote sangkalu alu ara rongnganne masindumunna. Nariaddi Itou inaita ringannu alu ara udde ma'ellega tanne pia buane ara'e tala. Arawe su tempo Itou na'omate su alu udde, Itou tawe naasilo apa-apa, tumba'u rongngane sassane, ana waugu tempo udde taambe tempone ara mabbua. ¹⁴See Mawu Yesus nabbisara alu ara udde, "Manattakka orassa indi tawedu saran sangkatou lai apan umanna wuanu!"

Manga mallalaffengennu Mawu Yesus naaringikka wisara udde.

Mawu Yesus sinumutta su Waḷe Mawu

(Mat. 21:12-17; Luk. 19:45-48; Yoh. 2:13-22)

¹⁵Wua udde imangitou na'omate su Yerusalem, wuṛṛu Mawu Yesus inaita lai su Waḷe Mawu. Isudde Itou nanattakke mallimbuakka manga taumata apan uawawalli su tampa udde. Itou namaḷinsuangngu manga medda mananu'addu roitta, wuṛṛu manga wangko mabawaḷu'u manu'a merpati. ¹⁶Wuṛṛu tawe saran sangkatou apan iwala Mawu Yesus mangapiddu manga sarannapa sumabbi passalangannu Waḷe Mawu udde. ¹⁷Wua udde Mawu Yesus nangaṛṛa'e manga taumata isudde. Itou nabbisara, "Sulaḷummu Wuke Susi uaworṛetta ereindi: Mawu Ruata nabbisara, 'Waḷe-U sarun isago waḷe tampa pangangaliomanannu aḷawo'u pabbawalaga.' Arawe niola'i amiu saḷakku taumata tarṛa rampassa!"

¹⁸Manga imam tembonanne wuṛṛu manga huru n agama naaringikka wisara udde. Ne imangitou nanattakke maddea'a laḷanne ipamate Mawu Yesus. Imangitou matta'utti Tou, ana waugu awadaalla naherangnga naaringikka aḷaṛrang-Nge.

¹⁹Napawe maramite maṛṛabi, Mawu Yesus wuṛṛu mallalaṛṛenggen-Ne nanantangke n soa udde.

Aḷaṛṛa'a wuassu alu ara

(Mat. 21:20-22)

²⁰Tiṛṛabbine ruaaflo, su tempo imangitou sumabbi alu ara udde, imangitou naasilo alu ara udde naṛṛangute na'oma n sara ṛamunne.

²¹See Petrus naanaungnga apa apan suete nariaddi su allo naḷiu. Ne Petrus nabbisarate Mawu Yesus, "Iamangnga Huru, pa'ellega! Alu ara apan suete nitaḷa n Iamangnga udde, naṛṛangute!"

²²Mawu Yesus sinumimbakka, "Pangimante Mawu Ruata. ²³Atonna wotongnge iamiu mabbisara wuidda indi, 'Awengkette wuṛṛu awontolle su tahaḷoangnga!' ne olangnge udde sarun mariaddi siainiu; sambaliate iamiu tawe humago'a, wuṛṛu iamiu mangngimanna manungku apa apan sarun iwisara ng kamiu atonna-tonna mariaddi. ²⁴Ana waugu udde paanaunge indi: Napawe iamiu umaḷiomanna wuṛṛu madorongnga sarannapa, pangimante manungku Mawu Ruata suete nangonggolla siamiu apa apan radoronganni amiu, ne iamiu sarun manengkamma udde. ²⁵Wuṛṛu amungkangngu iamiu umaḷiomanna; arawe naungngi amiu tawe maḷuassa su sangkatou taumata, ampungnge asuene taumata udde, tadea'u Iamangngu su surga lai mangampungnga manga rosanu.

[²⁶Amungkanngu iamiu tawe mangampungnga taumata waine, Iamangngu su surga lai maddiru mangampungnga manga rosanu.]”

Aiwaḷo su ola’u taḡḡino Mawu Yesus

(Mat. 21:23-27; Luk. 20:1-8)

²⁷Imangitou nabelengke apia su Yerusalem. Wuḡḡu su tempo Mawu Yesus u’amatta mammaliwutta sulaḷummu Waḷe Mawu, manga imam tembonanne, manga huru n agama wuḡḡu manga piaḡḡa’u Yahudi nirumanta ringanni Tou. ²⁸Imangitou naiwaḷo, ”Apa pinangiananne I’o ma’ola’a sarangkanambone indi? Isai nangonggolu taḡḡino udde Si’o?”

²⁹Mawu Yesus sinumimbakka, ”Ia’u lai maiwaḷo siamiu. Simbaḡḡete ana see Ia’u lai mamasingkatta siamiu ringannu taḡḡino n sai Ia’u ma’ola’a inolaanna indi. ³⁰Yohanes mannaḡḡani ringannu taḡḡino n sai, Mawu Ruata ara’e taumata?”

³¹See manga imam tembonanne wuḡḡu manga piaḡḡa’u Yahudi nanattakke na’ire su wallatti mangitou. Imangitou nabbisara, ”Amungkanngu iite nabbisara, ’ringannu taḡḡino Mawu Ruata,’ itou sarun mabbisara, ’Anio iamiu tawe mangngimanna si Yohanes?” ³²Arawe masahadda lai mabbisara, ’Ringannu taḡḡino n taumata,” ana waugu imangitou matta’uttu taumata nambo, wuḡḡu manambo taumata massunna manungku Yohanes sangkatou nabi. ³³Nariaddi imangitou sinumimbakka, ”Iami wagga.”

See Mawu Yesus nabbisara simangitou, ”Amungkanngu aroddi, Ia’u lai tawe mamasingkatta siamiu ringannu taḡḡino n sai Ia’u ma’ola’a sarangkanambone indi.”

Sasumandingngu mamamanara m waillu anggore

(Mat. 21:33-46; Luk. 20:9-19)

12 Wua udde Mawu Yesus nanattakke mangngaḡḡa’a ringannu sasumandingnga su manga imam tembonanne, manga huru n agama wuḡḡu manga piaḡḡa’u Yahudi udde. Mawu Yesus nabbati’e, ”Pia sangkatou nassuanna su sambau waillu anggore, see wailla udde pinaḷiwutannu paggala. Wua udde itou naaḷi loḡḡangnga pa’olaanna pamakkannu anggore, see itou napararisikku waḷe m pandariaganna. Wua udde itou napasewa n waillu anggore udde su sire pira mamamanara, see inaiḡe su wanua waine. ²Napawe nia’omante tempone mangiḡḡingnga wua n anggore, taumata udde nandolokku sangkatou allangnge ringannu mamamanara m waillu anggore udde, iapatarimmattu wageangnge.



Waḷe pandariaganna su waillu anggore (12:1)

³Arawe mamamanara udde nanametta mangangimbe udde. Wua udde pinuulli mangitou see nandolokki tou niapaapuḷe ringannu tawe uḷene.

⁴See tatahuannu wailla udde nandolokku apia sangkatou mangangimbe waine. Arawe mamamanara udde namuulla pua n mangangimbe udde see nillimbuarḡanna wuḡḡu nipansilianna. ⁵Tatahuannu wailla udde nandolokka apia sangkatou mangangimbe waine. Arawe imangitou namate mangangimbe udde. Wuḡḡu ete aroddi lai niola'i mangitou su anambo mangangimbe apan waine: lapiddu nipuulla wuḡḡu piaddu lai nipate.

⁶Isai lai wotongge irolokku tatahuannu wailla udde orassa indi? Ete sangkatou, eteudde anangnge sassane apan arangnguanne. Nariaddi panginsueanne itou nandolokku anangnge ringannu mamamanara udde.

⁷Ana'u sarun addatanni mangitou,' su riṅgirḡanne. ⁷Arawe mamamanara udde nabbisara sangkatou ringannu sangkatou, 'Ete itou indi manahuanna, wette iite mamate sitou, tadea'u iite maasomba darotongge!'

⁸Ne ana'a udde sinametta, see nipate. Winalunanne niramme mangitou su liuddu wailla udde."

⁹See Mawu Yesus naiwaḷo, "Apa sarun olaannu tatahuannu wailla udde? Itou sarun rumanta wuḡḡu mamate manga mabbawailla udde, see manantillu wailla udde su mabawailla waine. ¹⁰Iamiu asinungka suete naawasa addoanne sulaḷummu Wuke Susi,

'Watu apan tawe ipaattu manga maaola'a waḷe naola'e watu apan paarorone.

¹¹Ete indi inolaannu Mawu; marḡamaga atonna!'"

¹²Ne manga pira piarra'u walagu Yahudi apan naaringikka sasumandingga udde, mangke maddea'a manametta Mawu Yesus, ana waugu imangitou masingkatte sasumandingga udde ipammasedekku Mawu Yesus simangitou. Arawe imangitou matta'uttu taumata nambo. Nariaddi, imangitou inaita nanantangngu Mawu Yesus.

Su ola'u pamamaekka wose

(Mat. 22:15-22; Luk. 20:20-26)

¹³Manga pira taumata n Farisi wuɽɽu manga pira taumata n Herodes nirolokka maddea'a mapaasala Mawu Yesus ringannu manga aiwaɽo. ¹⁴Imangitou nirumanta ringannu Mawu Yesus wuɽɽu nabbi-sara, "Iamangnga Huru, iami masingkatta Iamangnga tawe mangawusu wuɽɽu tawe madaringikka ringiranni sai-sai. Iamangnga manggarra'a ringannu masema-semakka su ola'u apulu Mawu Ruata su taumata, ana waugu Iamangnga tawe mamile taumata. Ne Iamangnga wotongnge masingkatta siami, 'Tumuɽɽuttu atorannu agama ng kite, wotongnge iite mamaekka wose su Kaisar ara'e tawe wotongnge? Iite mamaekka wose udde ara'e tawe?'"

¹⁵Mawu Yesus naasingkatta lilangkamale'i mangitou. Itou sinumimbakka, "Anio iamiu maddea'a mappaasala-U? Annama'a palleha'a Sia'u sambau roitta sala'a."

¹⁶Ne imangitou nangagillu roitta sala'a sambau Sitou. See Mawu Yesus naiwaɽo, "Hambaranna wuɽɽu aranni sai indi?"

"Kaisar," sasimbakki mangitou.

¹⁷"Ne, amungkangngu aroddi," wisara Mawu Yesus, "onggoɽa'a si Kaisar apa apan tatahuanannu Kaisar, wuɽɽu onggola'a su Mawu Ruata apa apan tatahuanannu Mawu Ruata." Imangitou naherangnga naaringikka Sitou.

Su ola'u pabbawangunna wuassu papate

(Mat. 22:23-33; Luk. 20:27-40)

¹⁸Sire pira taumata n Saduki nirumanta ringannu Mawu Yesus. (Imangitou udde walahannu taumata pia addapatta manungku taumata nate tawe mabangunna apia.) ¹⁹"Iamangnga Huru," wisara mangitou su Mawu Yesus, "Musa namoɽɽettu tita indi siite: 'Amungkangngu sangkatou esakka mate wuɽɽu itou tawe ana'a, ne tuɽrangnge sarun maawingngu inawaɽu udde tadea'u pia pabbawalaga su taumata apan natete udde.' ²⁰Suete nariaddi pia sire pitu sangkatuɽrangnga. Pahuɽune naa-

wingnga, wua udde nate tawe naasomba ana'a. ²¹Wua udde iapa aruane naawingngu inawaŋu udde, arawe itou lai nate tawe naasomba ana'a. Olangnge udde nariaddi lai su turrangnge atallune, ²²wurru nalalisan sunna na'oma n sara appitune. Panginsueanne wawine udde lai nate. ²³Su allo n taumata nate mabangunna apia, awingngi sai wawine udde? Ana waugu sire pitu sangkaturrangnga suete naawingngi tou!"

²⁴Mawu Yesus sinumimbakka, "Iamiu niuমালাইবু atonna. Ana waugu iamiu tawe maasunna Wuke Susi wurru lai tarrino Mawu Ruata. ²⁵Ana waugu napawe manga taumata nate mabangunna apia, imangitou tate lai maawingnga, arawe imangitou sarun mabbia akka ere lai mala'ekatta su surga. ²⁶Wurru su ola'u taumata nate iapawangunna apia, iamiu taambe naawasa sulalammu wuke Musa su ola'u anggarumunanne lukkenggamma udde? Sulalammu manga addoanne udde, uaworretta manungku Mawu Ruata nabbisara si Musa, 'Ete Ia'u Mawu Ruata m Abraham, Mawu Ruata n Ishak, wurru Mawu Ruata n Yakub.' ²⁷Mawu Ruata udde wafine Mawu Ruata n taumata nate. Itou Mawu Ruata n taumata wiakka. Iamiu inuমালাইবু atonna!"

Parenta apan ahewalanne

(Mat. 22:34-40; Luk. 10:25-28)

²⁸See nirumantate sangkatou huru n agama madaringikka hatto Mawu Yesus wurru manga taumata n Saduki udde. Huru n agama udde naasilo manungku Mawu Yesus suete sinumimbakka manga taumata udde ringannu mapia-pia. Ne itou naiwaŋote Mawu Yesus, "Parenta suapa apan ahewalanne wuassu alawo'u parenta?"

²⁹Mawu Yesus sinumimbakka, "Parenta paarorone eteudde: 'Paddaringikkawe, iamiu pabbawalagu Israel! Mawu Ruata ng kite, Mawu udde tinggassa. ³⁰Pandangngu Mawu Ruatanu ringannu ahewallu naungngu, ringannu ahewallu apulunu, ringannu ahewallu apendammu, wurru ringannu alawo'u auatannu.' ³¹Parenta aruane eteudde, 'Pandangngu sansulungngu taumata ere i'o lai mandangngu ririnu sassane.' Tate parenta waine apan nangillembu n ahewalle wuassu parenta darua udde."

³²See huru n agama udde nabbisara Mawu Yesus, "Narriino atonna, Iamangnga Huru! Atonna su wisara n Iamangnga: Mawu Ruata apan tinggassa, wurru tawe Mawu Ruata lai waine. ³³Wurru rinone taumata mandangngu Mawu Ruata ringannu ahewallu naungnge, wurru ringannu anambo n ringiranne see lai ringannu anambo n auatanne. Wurru itou lai rinone umakkannu sansulungnge ere lai ririne sassane. Ude mappianne wuassu mangngonggolu sasamba itatambunna wurru manga sasamba waine su Mawu Ruata."

³⁴Mawu Yesus naasilo manungku huru n agama udde suete sinumim-bakka ringannu mapia atonna. Wurrū Mawu Yesus nabbisara sitou, "To maranite maola'a laŋorŋo n araratuannu Mawu Ruata."

Wua udde tate saran sangkatou lai apan waŋrani mapaasabangngu aiwaŋo su Mawu Yesus.

Su ola'u Ratu m Punnu Sałamatta

(Mat. 22:41-46; Luk. 20:41-44)

³⁵Tantaŋanna mangngarra'a su Waŋe Mawu, Mawu Yesus naiwaŋo, "Ereapa manga huru n agama wotongnge mabbisara manungku Ratu m Punnu Sałamatta udde wuassu papapulunni Daud? ³⁶Wutte'e Daud sassane – ana waugu niranannu Gharraho Mawu Ruata – nabbisara,

'Mawu nabbisara su Mawu-U:

a'iante su samba'a n uanang-Ku

ma'oma n sara Ia'u ma'ola'a manga seennu

massurubawa si'o.'

³⁷Nariaddi amungkanngngu Daud mannago n Ratu m Punnu Sałamatta udde 'Mawu', ereapa wotongnge itou papapulunni Daud?"

Iapaanaungnga tadea'u paatehamma su saruannu manga huru n agama

(Mat. 23:1-36; Luk. 20:45-47)

Taumata nambo apan su Waŋe Mawu udde maŋuassa naung-nge madaringikka Mawu Yesus mangngarra'a. ³⁸Itou nabbisara si-mangitou, "Paatehamma su saruannu manga huru n agama. Apulu mangitou u'amatta ualuŋŋe n jubah apan maŋo'e wurrū apulune aadda-tanna su manga pasakka. ³⁹Apulu mangitou su manga tampa mawan-tuga sulalummu waŋe m pattataŋramawuanna wurrū su manga ande-angnga. ⁴⁰Imangitou mallinga manga wawine waŋu wurrū mangngarŋo waŋene. Wurrū ana see maapamuni n alaŋeo mangitou udde, imangitou u'aliomanna maŋo'e-ŋo'engnga. Ruumanni mangitou saŋimmurine udde mawakkatta!"

Aonggolu wawine waŋu

(Luk. 21:1-4)

⁴¹Su tempo ua'ianna uasasaruanna tampa m pondi su Waŋe Mawu, Mawu Yesus mannutudda manga taumata mantarŋo n roitti mangitou sulalummu tampa n roitta udde. Manambo taumata ala nantarŋo n

roitti mangitou aroddi anambone; ⁴²see sangkatou wawine waļu apan asiangnga nirumanta lai. Itou nantarō n darua roitta witu'a, eteudde roitta aregane awawoanne. ⁴³Ne Mawu Yesus namago manga mal-laļarřenggen-Ne see nabbisara simangitou, "Paanaunge indi: Wawine waļu asiangnga udde suete nantarō su tampa m pondi udde nilumebe anambone wuassu tinarō manga taumata waine. ⁴⁴Ana waugu imangitou sarangkanambone suete nangonggolu lebe n darotongge. Arawe wawine waļu udde salaiwe tumanite n asiangnga nangonggolu sarangkanambone apan tatahuananne - eteudde apan pia gunane su pabiarřanne."

Mawu Yesus nabatti'u ahahohakku Waļe Mawu

(Mat. 24:1-2; Luk. 21:5-6)

13 Su tempo Mawu Yesus nanantangke n Waļe Mawu, sangkatou su wallattu mallarřenggen-Ne, nabbisara, "Iamangnga Huru, pa'ellega manga waļe udde. Pa'ellega manga watune. Waļine hampa arřamagel!"

²Mawu Yesus sinumimbakka, "To ma'ellega manga waļe apan wahewa udde? Tawe saran sambau watu wuassu waļe udde mallambe uaatokka su tampane, sarangkanambone sarun iapaahohakka."

Asasusa wuřru pananansara

(Mat. 24:3-14; Luk. 21:7-19)

³Wua udde Mawu Yesus inaita su Wuiddu Zaitun, wuřru inuma'iante su tampa uasaruanna Waļe Mawu. See Petrus, Yakobus, Yohanes wuřru Andreas nirumanta ringanni Tou ana maggahatto-Ne sassane. ⁴"Annama'a waļoa'a siami Iamangnga," unni mangitou Sitou, "Angngerate sarangkanambone udde sarun mariaddi? Wuřru manga tanda apa apan mammasingkatta manungku tempone nia'omante?"

⁵"Paatehamma," sasimbakku Mawu Yesus, "arie ma'oma n sara iamiu aawusuanna. ⁶Manambo taumata sarun rumanta ringannu arang-Ku see mabbisara, 'Ete Ia'u itou udde!' see nangawusute taumata nambo udde. ⁷Amunkangngu iamiu maaringikka manga tingikku pangalo wuřru manga watti'u pasaseetta, arie paata'utta. Sarangkanambone udde sarun mariaddi, arawe sarangkanambone udde tawe papasingkatta manungku temponete kiamatta. ⁸Pabbawalaga sambau sarun mamangalo pabbawalaga waine. Araratuanna sambau sarun mamangalo araratuanna waine. Su aļawo'u tampa sarun mallinukka wuřru pia aļalunussa.

Sarangkanambone udde wakkute panattaranne, ere rada'a apan niapendamannu sangkatou wawine apan mangunsiwe.

⁹Iamiu rinone paatehamma, ana waugu iamiu sarun sametanna wuŕru parikisanna su saruannu mallarŕuungnga. Iamiu sarun puulanna su manga wale m pattattarramawuanna. Iamiu sarun parikisanna su maruanna manga tembonanne wuŕru manga ratu ana waugu iamiu mallalarŕenggeng-Ku. Wuŕru eteudde temponu manganggillu tatiala su ola'u riri-U simangitou. ¹⁰Watti'u Alaleuassa wuassu Mawu Ruata udde sarun iapasingkatta su anambo n pabbawalaga. ¹¹Wuŕru napawe iamiu sametanna wuŕru parikisanna su saruannu mallarŕuungnga, arie passingawangnga su ola'u apa apan sarun iwisara ng kamiu. Amungkangngu nia'omante tempone mabbisara, waloa'a apa apan suete niapaasingkatta siamiu su tempone. Ana waugu manga wisara apan iwabbisara ng kamiu udde wale wisaranu sassane, ewe'e nirumanta wuassu Gharraho Mawu Ruata. ¹²Taumata sarun mandaleo turŕangnge sassane ma'oma n sara pateanna. Udde lai sarun mariaddi su wallattu iamangnga wuŕru anangnge. Alarŕana'a sarun lumawangnga inangnga iamangnge, wuŕru manantilli mangitou pateanna. ¹³Iamiu sarun iarintinnu anambo n taumata ana waugu iamiu mallalarŕenggeng-Ku. Arawe taumata apan matatarŕangnga ma'oma n sara panginsueanne sarun masalamatta."

Alaleo apan maahohakka

(Mat. 24:15-28; Luk. 21:20-24)

¹⁴"Iamiu sarun maasilo 'Alaleo apan maahohakka' uarisikka su tampa apan isassingadda sitou. (Iapasingkatta su mabawasa: Ringira'e apa atappasanne!) Su tempo udde taumata apan uatana'a su Yudea rinone tumalangnga watukku wuidda. ¹⁵Taumata apan roso su wowo n atuppu wale arie pallintukka wuŕru sumutta su wale manganu saranapa. ¹⁶Taumata apan su wailla arie pabelengnga mangalappa jubahne. ¹⁷Maata'utta atonna manga allo udde su wawine apan uailloŕro, su inangnga apan ta'e mappasusu n anangnge. ¹⁸Aaliomante tadea'u manga olangnge udde tawe mariaddi, su tempo manguranna. ¹⁹Su manga allo apan maata'utta udde, sarun pia sambau asasusa apan taambe nariaddi, ro'e n Mawu Ruata nandiaddi runia na'oma n sara orassa indi, wuŕru tate lai mariaddi apia. ²⁰Unnu wisara, Mawu Ruata tawe nangautta tempone udde, ne tawe saran sangkatou masalamatta. Arawe ana waugu manga taumata apan nipele-Ne, Mawu Ruata nangautta tempone udde.

²¹Su tempo udde amungkangngu piaddu sangkatou-sangkatou mabbisara siamiu, 'Ellehet Ratu m Punnu Salamatta udde isindi!' ara'e 'Ellehet Itou isudde!' – arie pangimanna taumata udde. ²²Ana

waugu manana lamatta awusu wuṛṛu manga nabi awusu sarun rumanta. Imangitou sarun ma'ola'a aḷawo'u inolaanna waha hewa wuṛṛu aḷawo'u aḷaṛṛindu'a ipangawusu aḷaṛṛana'u Mawu Ruata amung kangngu wotongnge. ²³Nariaddi, paatehamma! Sarangkanambone udde suete Ta'u nipaasingkatta siamiu tantaḷanna olangnge udde taambe nariaddi."

Daranta n Ana'u Taumata

(Mat. 24:29-31; Luk. 21:25-28)

²⁴"Napawe tempo n asasusa udde naḷiudde, matannallo sarun madandumma, wuṛṛu wuḷanna tate lai semakke. ²⁵Manga anumpitanna sarun manawo wuassu langitta, wuṛṛu manga tembonannu winalanganna sarun massongkakka. ²⁶Su tempo udde Ana'u Taumata sarun iasilo rumanta wuassu winabbawa ringannu taṛṛino apan wahewa wuṛṛu mawantuga. ²⁷Itou sarun mandolokku manga mala'ekatta mangammulu aḷawo'u pabbawalage wuassu pi'u n runia appatta, wuassu manga pentakku runia wuṛṛu manga pentakku langitta."

Aḷaṛṛa'a wuassu alu ara

(Mat. 24:32-35; Luk. 21:29-33)

²⁸"Panganute aḷaṛṛa'a wuassu alu ara. Amung kangngu manga ronggane nangelompe wuṛṛu lullaukke, wuṛṛu mannattakke mallaḷuwo, iamiu masingkatte manungku tempo m padissa maranite. ²⁹Aroddi lai amung kangngu iamiu maasilo aḷawo'u olangnge udde mariaddi, iamiu masingkatte manungku tempone maranite atonna. ³⁰AsingKate! Anambo n arariadianna indi sarun mariaddi tantaḷanna manga taumata apan wiakka orassa indi sarangkanambone taambe nate. ³¹Langitta wuṛṛu runia sarun mawuḷi, arawe wisara-U sidutu ma'oma n sara maḷannu-ḷannu."

Tawedu masingkattu allone wuṛṛu oranne

(Mat. 24:36-44)

³²"Salaiwe aroddi, tawedu saran sangkatou masingkattu tempo suapa allone ara'e oranne. Manga mala'ekatta su surga lai wagga, Ana'a lai wagga, tumba'u Iamangnga sassane masingkatta. ³³Nariaddi iamiu rinone paariaga ana waugu iamiu wagga tingngerate tempone. ³⁴Olangnge isumandingnga ere sangkatou apan nanantangngu wafene

see inai su tampa marau. Itou nandolokku manga ralo|orranne mandi-aga wałene, wuřru nangagillu manara simangitou sangkatou-sangkatou. Su mandariaga ngara, itou nananata tadea'u mandiaga mapia-pia. ³⁵Ana waugu udde iamiu řinone paariaga, ana waugu iamiu wagga tingngerate tatahuannu wałe udde mabelengnga – asinungka wawallo, asinungka allorane, asinungka maraninnallo, ara'e asinungka su sasabangngu matannallo. ³⁶Amungkangngu itou nirumanta awagananna, arie ma'oma n sara Itou maaratingnga siamiu tantałanna mattiilla. ³⁷Apa iwabbisara-U indi siamiu, iwabbisara-U lai su manga taumata: paariagate!"

Mangngaalla su saruannu Mawu Yesus

(Mat. 26:1-5; Luk. 22:1-2; Yoh. 11:45-53)

14 Rua allo lai Allo m Paskah wuřru Ramea n Roti Tawe Ragine. Manga imam tembonanne wuřru manga huru n agama tantałanna maddea'a lałanne manametta Mawu Yesus ringannu małanna-łannaba, wuřru mamate Sitou. ²"Arawe arie iite ma'ola'a udde su tempo n ramea," wisara mangitou, "ana waugu takka maola'a pagahahio."

Mawu Yesus niseborranu lana mawangngi

(Mat. 26:6-13; Yoh. 12:1-8)

³Napawe Mawu Yesus na'omate su Betania, su wałe n Simon apan dorone uatatařrangnga rada'a paro, sangkatou wawine nirumanta ringanni Tou. Itou uaapiddu sambau wotolla pualam, lałorřoannu lana mawangngi apan maarega, niola'a wuassu řamutta mawangngi. Su tempo Mawu Yesus tantałanna u'anna, wawine udde namesangnga wotolla udde wuřru nanebokku lana mawangngi su pua Mawu Yesus.



Manga sarannapa wuassu pualam (14:3)

⁴Sire pira taumata isudde mangke nasa'u wuɽɽu uawawisara sangkatou ringannu sangkatou, "Apa hunane lana mawangngi udde iasebokka aroddi? ⁵Lana udde wotongnge iwaɽu'a ringannu aregane mallebbe wuassu tallu ɽasutta roitta saɽa'a, wuɽɽu roinne ionggolla su taumata asiangnga!" Ne imangitou nasa'ute su wawine udde.

⁶Arawe Mawu Yesus nabbisara, "Wala'e aroddi itou! Anio iamiu mapaasusa n tou? Itou ma'ola'a inolaanna mapia, wuɽɽu maaluassa Sia'u. ⁷Taumata asiangnga sidutu su wallatti amiu. Suapa n tempo amungkangngu iamiu maapulu, iamiu wotongnge mantulungngi mangitou. Arawe Ia'u tate maɽannu su sampunna ringanni amiu. ⁸Wawine indi suete na'ola'a apa wotongnge olaanni tou. Itou suete nanaddia lana mawangngi sia'u su tempo Ia'u taambe nilabingnga. ⁹Pangimante! Su ahewallu runia, su tampa Watti'u Alaɽuassa wuassu Mawu Ruata iapasingkatta, inolaannu wawine indi sarun iwatti'a lai, maola'a sambau pananaunganna sitou."

Yudas inumire mamate Mawu Yesus

(Mat. 26:14-16; Luk. 22:3-6)

¹⁰See Yudas Iskariot, sangkatou wuassu sire mapuɽo dua malalaɽɽenggennu Mawu Yesus, inaite ringannu manga imam tembonanne ringannu pandumma mamate Mawu Yesus. ¹¹Imangitou lembo n lulluassa naaringikka wisarane udde, wuɽɽu na'ire sarun mangagillu roitta si Yudas. Ne Yudas mannattakke maddea'a tempone mapia mamate Mawu Yesus.

Mawu Yesus inumanna annu Paskah ringannu manga mallaɽɽenggen-Ne

(Mat. 26:17-25; Luk. 22:7-14, 21-23; Yoh. 13:21-30)

¹²Su allo paarorone wuassu Allo Wahewa n Roti Tawe Ragine - su tempo taumata mammototta domba n Paskah - mallaɽɽenggennu Mawu Yesus naiwaɽo Sitou, "Suapa tampa ipaapulu n lamangnga iami manaddia annu Paskah su lamangnga?"

¹³Mawu Yesus nandolokku rua ng katou su wallatti mangitou, "Roote su soa, poiaronddi sangkatou esakka apan tantaɽanna uaapiddu sambau wensada laɽoɽoannu ua'e, sarun massomba ng kami. Tantalongke sitou, ¹⁴watukku waɽe apan suttanni tou wuɽɽu waɽoa'a su tahuannu waɽe udde, 'lamangnga Huru ma'iwaɽo, suapa tampane Itou

wurru mallalarrenggen-Ne umanna annu Paskah.' ¹⁵Taumata udde sarun mamantingidu sambau wabo'a ualiu rosone apan wahewa. Wabo'a udde suete niatokka, nasuungnga ringannu lalorrone. Saddiaite sarangkanambone udde poiaronddi siite."

¹⁶See rua ng katou mallalarrenggennu Mawu Yesus udde inaita watukku soa. Poiaronddi itarua naaratingnga sarangkanambone ere suete niwalo Mawu Yesus. See imangitou nanaddiate annu Paskah.

¹⁷Rabbine, Mawu Yesus nirumanta ringannu sire mapulo dua mallalarrenggen-Ne. ¹⁸Wurru tantallanna imangitou ua'ianna u'anna, Mawu Yesus nabbisara, "Padaringikka: pia sangkatou, wuassu wallatti amiu, apan su orassa indi u'anna ringang-Ku sarun mamate Sia'u."

¹⁹Naaringikka udde, mallalarrenggennu Mawu Yesus mangke nasusa. See sangkatou ringannu sangkatou nanattakke naiwalo Mawu Yesus, "Asinungka waline ia'u apan su pandummi lamangnga?"

²⁰Mawu Yesus sinumimbakka, "Itou sangkatou wuassu wallatti amiu sire mapulo dua indi, apan u'anna su lama'a sambau ringang-Ku. ²¹Atonna Ana'u Taumata sarun mate ere uaworretta su Wuke Susi. Arawe nasilakate taumata apan mamate Ana'u Taumata udde. Mappianne taumata udde tawe niasungkangnga!"

Saliwangngu Mawu

(Mat. 26:26-30; Luk. 22:14-20; 1Kor. 11:23-25)

²²Tantallanna imangitou u'anna, Mawu Yesus nanganu roti inumaliomante aaliomannu aadiangkamanna su Mawu Ruata. Wua udde Itou nattahiate roti ringannu lima-Ne, wurru niaggile su mallalarrenggen-Ne ringannu wisara-Ne, "Sengkampe wurru ante, indi wadang-Ku."

²³Wua udde Itou nanganute sambau mangko n angore. Itou inumaliomanna aaliomannu aadiangkamanna su Mawu Ruata, see nangagille mangko udde su mallalarrenggen-Ne. Wua udde imangitou sarangkanambone na'inumma angore udde. ²⁴Wua udde Mawu Yesus nabbisara, "Ete indi rarra-U apan mapaasuungngu paaire Mawu Ruata, rarra apan suete niapatureo huna n taumata nambo. ²⁵Pangimante: Ia'u tate ma'inumma angore indi apia, ma'oma n sara tempone Ia'u ma'inumma angore wakku su sampunna ringanni amiu su Runia Wakku n lamang-Ku."

²⁶Wua udde imangitou nangantari n sambau antari daralo. Wurru wua udde imangitou inaita su Wuiddu Zaitun:

Papasingkata manungku Petrus sarun massinaaddu Mawu Yesus

(Mat. 26:31-35; Luk. 22:31-34; Yoh. 13:36-38)

²⁷Wua udde Mawu Yesus nabbisara simangitou, "Iamiu sarangka-nambone sarun tumalangnga manantang-Ku. Ana waugu sulaŕummu Wuke Susi uaworretta, 'Mawu Ruata sarun mamate mallaŕu'adde, wuŕru ammuŕannu dombane sarun massaliawukka.' ²⁸Arawe napawe Ia'u iapa-wangunna apia, Ia'u sarun inai malliu roro siamiu su Galilea."

²⁹"Tawe," sasimbakki Petrus, "wala'e imangitou nambo manan-tangngu Iamangnga, ia'u atonna-tonna tawe manantangnga."

³⁰"Paanaunge," wisara Mawu Yesus, "rabbi indi lai, tantaŕanna manu'a taambe inumu'u aruane, i'o paatallute massinaadu riri-U."

³¹Petrus sinumimbakka ringannu atonna-tonna, "Wala'e ia'u mate su sampunna ringannu Iamangnga, saran paassa ia'u tawe mabbisara manungku ia'u wagga n Iamangnga!"

Wuŕru mallaŕarŕenggen-Ne waine lai nabbisara aroddi.

Mawu Yesus inumaliomanna su Getsemani

(Mat. 26:36-46; Luk. 22:39-46)

³²Imangitou na'omate su sambau tanpa aranne Getsemani, wuŕru Mawu Yesus nabbisarate mallaŕarŕenggen-Ne, "A'iante isindi tantaŕanna Ia'u inai umaliomanna."

³³See Mawu Yesus nangahe si Petrus, Yakobus wuŕru si Yoha-nes inai su sampunna ringanni Tou. Itou nanattakke massusa wuŕru sussingawangnga. ³⁴"Naungku massusa atonna," unnu Mawu Yesus si-mangitou, "pendamanna ere mappulute mate. Atana'e isindi wuŕru paa-riagate!"

³⁵Mawu Yesus inaita nangindau adio'a see inumaliintuda su leta'a wuŕru inumaliomanna. Sulaŕummu aaliomanne Itou nadorong-nga amungkangngu wotongnge, Itou tawe mamendamma orassu san-sara udde. ³⁶"Iamangnga, o Iamangnga," wisara-Ne, "tawe saran sam-bau apan tawe maola'a su Iamangnga. Aŕappe asasusa indi wuassia-U. Arawe arie tumuŕrutta apulu-U ewe'e apulu n Iamangnga."

³⁷Wua udde Mawu Yesus nabelengke apia wuŕru inaratinganna mal-laŕarŕenggen-Ne tantaŕanna mattiilla. Itou nabbisara si Petrus, "Simon, i'o mattiilla? Tumba'u sangka orassa i'o tawe maariaga?" ³⁸See Mawu Yesus nabbisara simangitou, "Pandiagate, wuŕru aaliomanna, tadea'u iamiu tawe maasomba wawono'a. Gharrahonu maapulu ma'ola'a su

rinone, arawe iamiu tawe maatarangnga ana waugu pallaḷagu n taumata udde lome."

³⁹Paasa lai Mawu Yesus inai umaḷiomanna ringannu aalḷiomanne apan uasulungnga. ⁴⁰Wua udde Itou nabelengke apia ringannu malalārrenggen-Ne wurru naaratingnga imangitou ta'e mattiilla, ana waugu imangitou tumanite n aamatiilanna. Ne imangitou wagga apa apan sarun iwisara mangitou su Mawu Yesus.

⁴¹Napawe Mawu Yesus nabelengke ringanni mangitou apia su atallune, Itou nabbisara, "Ta'e lai mattiilla iamiu wurru uailloḷo? Wotongnete! Nia'omante tempone Ana'u Taumata itantilla su lima n taumata marosa. ⁴²Pabbangunte, wette iite inaita. Pa'ellega! Taumata apan mamate Sia'u uddete!"

Mawu Yesus sinametta

(Mat. 26:47-56; Luk. 22:47-53; Yoh. 18:3-12)

⁴³Tantalanna Mawu Yesus ta'e mabbisara, nirumantate Yudas, sangkatou wuassu sire mapuḷo dua mallalārrenggen-Ne udde. Uarḷundinganni sitou lai nirumanta taumata nambo uaapiddu haḷele wurru papuulla. Imangitou nirolokku manga imam tembonanne, manga huru n agama wurru manga piarra'u taumata n Yahudi. ⁴⁴Taumata tarra pate suete nanantunnu sambau tanda simangitou. "Taumata apan ta'u ari'anna," unni tou simangitou, "eteudde taumata-Ne. Sametta Itou wurru apira'a ringannu riagane apan matohassa."

⁴⁵Su tempo Yudas nirumanta, itou lapiddu inai ringannu Mawu Yesus wurru nabbisara, "Iamangnga Huru!" wua udde itou nangari'a Mawu Yesus. ⁴⁶See manga taumata nirumanta su sampunna ringanni Yudas nanametta Mawu Yesus wurru nirrapusse Itou. ⁴⁷Arawe sangkatou su wallattu taumata isudde nanawutta haḷele wurru namilitta alangngu imam wahewa, na'oma n sara napototta talingane. ⁴⁸See Mawu Yesus nabbisara simangitou, "Anio Ia'u indi taumata laḷeo, na'oma n sara iamiu nirumanta uaapiddu haḷele wurru papuulla manametta Sia'u?" ⁴⁹Miallo-miallo Ia'u mangngarra'a su Waḷe Mawu su saruanni amiu arawe iamiu tawe manametta Sia'u. Arawe atonna sarun maola'a aroddi, tadea'u matipusse apa apan uaworretta sulaḷummu Wuke Susi."

⁵⁰Anambo mallalārrenggen-Ne tinumaḷangnga nanantangngu Mawu Yesus.

⁵¹Sangkatou umbasanna tumba'u ualuḷḷe n maḷarḷrenessa sanggesa'a ualḷindumma wadangnge tinumantalangnga Mawu Yesus. Manga taumata maapulu manametta sitou, ⁵²arawe itou namallossu maḷarḷrenessa udde, see tinumaḷangnga tantoḷe.

Mawu Yesus su saruannu Mallarpuungngu Agama

(Mat. 26:57-68; Luk. 22:54-55, 63-71; Yoh. 18:13-14, 19-24)

⁵³Mawu Yesus niapidde su wale imam wahewa. Poiaroddi anambo n imam tembonanne, piarra'u Yahudi, wufu huru n agama maam-mulla. ⁵⁴Petrus uatantalongnga Mawu Yesus wuassu marau na'oma n sara sinumutta su passalangannu wale m imam wahewa. Poiaroddi itou inuma'ianna mandarangnga marani m putungnga su sampunna ringannu mandariaga. ⁵⁵Manga imam tembonanne wufu manga Mallarpuungngu Agama mangke maddea'a maasomba pasasala Mawu Yesus tadea'u wotongnge marpuumanni Tou ma'oma n sara pateanna. Arawe imangitou tawe naasomba saran sambau pasasala. ⁵⁶Manambo mattatjala awusu niwagoanna iapatjala awusu su saruannu Mawu Yesus, arawe sasimbakki mangitou uapaparrala sangkatou ringannu sangkatou.

⁵⁷See manga pira taumata mattatjala nirumarisikka wufu nangagillu tattjala awusu su ola'u Mawu Yesus. ⁵⁸"Iami naaringikka taumata indi mabbisara, 'Ta'u sarun manggohakku Wale Mawu Ruata indi apan suete niola'u taumata, wufu napawe tallute allo Ia'u sarun mapararisikku waine lai, apan waine niola'u taumata.'" ⁵⁹Arawe wisara manga taumata udde uapaparrala sangkatou ringannu waine.

⁶⁰Ne imam wahewa dirumarisikka su saruanni mangitou sarangkanambone wufu naiwalo Mawu Yesus, "Anio I'o tawe sumimbakka manga aiwalo apan ipa'iwalo Si'o?"

⁶¹Arawe Mawu Yesus malannaba. Itou tawe sinumimbakka saran paassa. See imam wahewa udde naiwalo paassa lai Sitou, "Ete I'o Ratu m Punnu Salamatta, Ana'u Mawu Ruata Lembo Naukkassa?"

⁶²"Ete Ia'u," sasimbakku Mawu Yesus, "wufu iamiu sarangkanambone sarun maasilo Ana'u Taumata uma'ianna su uanannu Mawu Ruata Apan Lembo Matarrino wufu rumanta sulalummu winabbawa wuassu langitta!"

⁶³Ne imam wahewa nangesa'a laungnge wufu nabbisara, "Ipa'ura lai sakassi! ⁶⁴Iamiu naaringikke sassane manga wisara-Ne apan ipanggadiao'a Mawu Ruata. Orassa indi ereapa i'o makkawessu hatto indi?"

Imangitou sarangkanambone nakkawessa manungku Mawu Yesus nassala, wufu rinone ipuumanma ma'oma n sara mate.

⁶⁵See sire pira taumata nanattakke mangngadu Mawu Yesus, wufu imangitou nallindumma mata-Ne wufu namuulla Sitou, see nabbisara, "Si'ata'a, isai namuulla Si'o?" Manga mandariaga lai namero Mawu Yesus.

Petrus nassinaadu Mawu Yesus

(Mat. 26:69-75; Luk. 22:56-62; Yoh. 18:15-18, 25-27)

"Tantaŋanna Petrus ta'e su passalanganna, sangkatou wawine allangu imam wahewa nirumana isudde. ⁶⁷Napawe naasilo si Petrus manningikka marani m putungga, itou nanutukka mapia-pia hati m Petrus wuŋŋu nabbisara, "Waŋinewe i'o lai su sambau ringannu Mawu Yesus taumata Nazaret udde?"

⁶⁸Arawe Petrus nassinaada. "Ia'u waga wuŋŋu tawe maasunna apa pandumannu," unni Petrus su mangangimbe udde. See Petrus inaitu su ngara m pasallangannu waŋe m imam wahewa udde. [Su orassa udde lai manu'a inumu'u.]

⁶⁹Mangangimbe wawine udde na'ellega si Petrus apia, wuŋŋu nabbisara su manga taumata isudde, "Atonna itou sangkatou wuassu wallatti mangitou!" ⁷⁰Arawe Petrus nassinaada apia.

Tawe naŋannu wua udde, manga taumata isudde nabbisara apia si Petrus, "Tate maappasinaada lai i'o, atonna i'o sangkatou wuassu wallatti mangitou, ana waugu i'o wuassu Galilea!"

⁷¹See Petrus nanattakke massalu wuŋŋu nabbisara, "Ia'u tawe maailala taumata apan ipappandummi amiu udde!"

⁷²Orassa udde lai manu'a inumu'u aruane. Wuŋŋu Petrus naanaungnga manungku Mawu Yesus suete nabbisara sitou. "Tantaŋanna manu'a taambe inumu'u paarua, i'o paatallute massinaadu riri-U." Ne Petrus lulluaite ringannu massusa atonna.

Mawu Yesus su saruanni Pilatus

(Mat. 27:1-2, 11-14; Luk. 23:1-5; Yoh. 18:28-38)

15 Ruaallo atonna, manga Mallarŋuungngu Agama nasutta lai manga imam tembonanne, manga piaŋŋa'u taumata n Yahudi wuŋŋu manga huru n agama maŋiha-ŋihakka na'ire. Imangitou naŋŋapussa Mawu Yesus, wua udde nangapiddi Tou wuŋŋu tinantilla si Pilatus.

²Pilatus naiwaŋo Mawu Yesus, "Atonna i'o ratu n taumata n Yahudi?"

"Aroddi ere su wisaranu," sasimbakku Mawu Yesus.

³Manga imam tembonanne nabaŋo manambo ala'e su ola'u Mawu Yesus. ⁴See Pilatus naiwaŋo apia Mawu Yesus. "I'o maddiri sumimbakka? Pa'ellega sangkura aalae mangitou ipangalae-Nu!"

⁵Arawe Mawu Yesus tawe sumimbakka sara n adio'a, na'oma n sara Pilatus naherangnga.

Mawu Yesus iṛruumanna pateanna

(Mat. 27:15-26; Luk. 23:13-25; Yoh. 18:39-19:16)

⁶Suapa n pia Ramea n Paskah, inanaramanne Pilatus mammallossu sangkatou ruumanna tumuṛṛuttu tatebo'u taumata nambo. ⁷Sulaḷummu tuttuṛpanna su wallattu manga lumaḷawangnga apan naola'a taṛṛa pate su tempo m passaseetta, pia sangkatou aranne Barabas. ⁸Taumata manambo naammulla wuṛṛu nadorongnga si Pilatus tadea'u itou mammallossu sangkatou uarṛuumanna ere su inanaramanne. ⁹Pilatus naiwaḷo simangitou, "Iamiu maapulu ia'u mamallossu ratu n taumata n Yahudi udde siamiu?" ¹⁰Ana waugu Pilatus naatutukka manungku manga imam tembonanne nanantillu Mawu Yesus sitou ana waugu naungngi mangitou tawe maḷuassa.

¹¹Arawe manga imam tembonanne mammono'a awadaalla tadea'u madorongnga Pilatus mamallossi Barabas simangitou. ¹²Ne Pilatus nabbisara apia su taumata nambo udde, "Amungkangngu aroddi, ia'u rinone ma'ola'a apa su taumata apan isassago ng kami ratu n taumata n Yahudi udde?"

¹³Imangitou inumui, "Arussa'a Itou!"

¹⁴"Arawe apa aḷaḷeone?" aiwaḷo m Pilatus.

See imangitou inumui lembo ma'ikkatta lai, "Arussa'a Itou!"

¹⁵Pilatus maapulu mappaaḷuassu taumata nambo udde, ne itou namallosse n Barabas simangitou. Wua udde itou nandolokku taumata namuulla Mawu Yesus see tinantilli tou iapaarussa.

Manga tantara mannalangnga Mawu Yesus

(Mat. 27:27-31; Yoh. 19:2-3)

¹⁶Mawu Yesus niapidde manga tantara su tampa mallarṛuungnga su waḷe gubernure. Wua udde tantara niwagoante maammulla. ¹⁷See imangitou nalluṛṛe n jubah ungu su Mawu Yesus, wuṛṛu niolaanna araposa n araratuanna wuassu manga ranna roaanna, wua udde nitaappa su pua Mawu Yesus. ¹⁸Wua udde, imangitou nangadatta Sitou, "Saḷamatta ratu n taumata n Yahudi!" unni mangitou. ¹⁹Imangitou namuulla pua Mawu Yesus ringannu ta'inna, see imangitou nangaddu Sitou wuṛṛu nassubba su saruanni Tou. ²⁰Napawe suete nannalangnga Mawu Yesus, imangitou nalluatte jubah ungu udde see nilluṛṛeante n laung-Nge sassane. Wua udde Itou niapidda su liudde ana waugu iarussa.



Tantara n Roma (15:16)

Mawu Yesus niarussa

(Mat. 27:32-44; Luk. 23:26-43; Yoh. 19:17-27)

²¹Su tangnga n daļanna imangitou namata'u sangkatou iapapasanna arussa Mawu Yesus. Taumata udde wakkute wuassu ampungnga inai watukku soa. (Aranne Simon, – wuassu Kirene – iamangngi Aleksander wuŗru Rufus.) ²²Mawu Yesus niapidda su sambau tampa aranne Golgota, atappasanne "Tampa n Tanggilala". ²³Isudde imangitou napa'inummu anggore laļo'annu awawangngi, arawe Mawu Yesus maddiri ma'inumma anggore udde. ²⁴Wua udde imangitou nangarussa n Tou, wuŗru nattahia laung-Nge ringannu ni'undi tadea'u maatan-tunnu wageangngu sangkatou-sangkatou. ²⁵Mawu Yesus niarussa puulla sio ruaallo. ²⁶Su wowo n arussa niworřeta su ola'u alae Sitou, ete-udde: "Ratu n Taumata n Yahudi". ²⁷Su sambau ringannu Mawu Yesus, imangitou lai nangarussa rua ng katou taŗra řampassa; sangkatou su uananna wuŗru sangkatou lai su aiŗri. [²⁸Ringannu aroddi nariaddite apa apan uaworřetta sulaļummu Wuke Susi, eteudde: "Itou sassunnanna lai nareengnga taumata laļeo."]

²⁹Manga taumata apan sussabbi isudde mangke uapapa'ilingnga wuŗru manggaļusa'a Mawu Yesus. Imangitou nabbisara, "Ei, Po apan

manggohakku Waļe Mawu Ruata wuŗru mapaarisikka sulaļummu tallu allo. ³⁰Annama'o lintukka wuassu arussa wuŗru panaļamatta riri-Nu!"

³¹Aroddi lai manga imam tembonanne wuŗru manga huru n agama manggeetta Mawu Yesus. Imangitou uahahatto sangkatou ringannu sangkatou, "Itou maasaļamatta taumata waine arawe tawe maasaļamatta riri-Ne sassane! ³²Amungkangngu Itou ratu n Israel, Ratu m Punnu Saļamatta, mappianne Itou orassa indi lumintukka wuassu arussa udde, tadea'u iami maasilo wuŗru mangngimanna Sitou!"

Manga taumata apan niarussa lai su sambau ringannu Mawu Yesus manggaļusa'a Mawu Yesus.

Apapate Mawu Yesus

(*Mat. 27:45-56; Luk. 23:44-49; Yoh. 19:28-30*)

³³Su allo allattune, aļannune tallu ng ka'orassa ahewallu wanua udde naddandumma. ³⁴Wuŗru su puulla tatallu wawallo, Mawu Yesus inumui ringannu tingikka ma'ikkatta, "Eloi, Eloi, lama sabakhtani?" atappasanne, "Oh Ruata'u, oh Ruata'u, anio I'o nanantang-Ku?"

³⁵Manga pira ng katou isudde naaringikka sasaliomanna udde, wuŗru nabbisara, "Padaringikka, Itou mamago si Elia!" ³⁶Sangkatou wuassi mangitou maļiha-lihakka nanganu wunga n sahatta, see inammo sulaļummu anggore mapakkada. Wua udde wunga n sahatta udde niusu'u pentakku alu see tinogokka su wiwikku Mawu Yesus, ringannu wisarane, "Raddoi, wette iite ma'ellega tanne Elia rumanta manossokki Tou wuassu arussa udde."

³⁷See Mawu Yesus nangintuļi, wuŗru wua udde natete.

³⁸Pampele ua'ele su Waļe Mawu nahesa'a natahia darua, wua doso na'oma n sara wowane. ³⁹Tembonannu tantara uarisikka su saruannu aļungngu arussa udde, naasilo ereapa Mawu Yesus nate. Tembonannu tantara udde nabbisara, "Atonna-tonna taumata indi Ana'u Mawu Ruata!"

⁴⁰Isudde lai pia manga pira wawine tantaļanna ua'ellega sarangkanambone udde wuassu tampa marau. Su wallatti mangitou pia Salome, Maria Magdalena, wuŗru Maria inangngi Yakobus apan maddario'anna wuŗru Yoses. ⁴¹Ete imangitou manga wawine apan uatantalongnga wuŗru nantuļungngu Mawu Yesus, su tempo Itou ta'e su Galilea, wuŗru pia manambo lai manga wawine waine isudde apan suete nirumanta su Yerusalem su sambau ringannu Mawu Yesus.

Pallalabingngu Mawu Yesus

(Mat. 27:57-61; Luk. 23:50-56; Yoh. 19:38-42)

⁴²⁻⁴³Allo mar̄rabite napawe Yusuf wuassu Arimatea nirumanta. Itou nareengnga lai sangkatou Mallar̄ruungngu Agama apan aaddatanna. Itou lai tantaḷanna uar̄rado tempone Mawu Ruata manattakka mama-renta ere sangkatou Ratu. Allo udde allo Pananaddianna (eteudde allo taambe allo n Sabatta). Ana waugu udde ringannu war̄rani Yusuf sinumaruanna si Pilatus wur̄ru madorongnga winalunannu Mawu Yesus. ⁴⁴Pilatus naherangnga naaringakka Mawu Yesus natete. Nariaddi itou nandolokku taumata namago piar̄ra'u tantara wur̄ru naiwaḷo sitou apa Mawu Yesus maḷannute nate. ⁴⁵Napawe naaringikka wawaḷo n piar̄ra'u tantara udde, Pilatus namala n Yusuf mangalappa winalunannu Mawu Yesus. ⁴⁶See Yusuf namallite maḷar̄renessa papi'unne wuassu linenna aḷussa wur̄ru napawe suete nallintukku winalunannu Mawu Yesus, nipi'unte n maḷar̄renessa udde. Wua udde itou nangaddo n winalunanna udde sulaḷummu sambau labingnga apan niola'a sulaḷummu wuiddu watu. Wua udde itou nanaḷinggi n sambau watu wahewa nipar̄rappingnga ngara n laḷabinganna udde. ⁴⁷Tantaḷanna udde Maria Magdalena wur̄ru Maria inangngi Yoses mannutukka suapa tampa Mawu Yesus niaddo.

Pabawangunnu Mawu Yesus

(Mat. 28:1-8; Luk. 24:1-12; Yoh. 20:1-10)

16 Napawe allo n Sabatta naliute, Maria Magdalena, Maria inangngi Yakobus, wur̄ru Salome inaita namalli rampa-rampa ipal-lana winalunannu Mawu Yesus. ²Ruaallo atonna napawe matan-nallo sumabangke, su allo paarorone misa udde, imangitou inaita su laḷabinganna. ³⁻⁴Su tangnga n daḷanna imangitou uahahatto sangka-tou ringannu sangkatou, "Isai wotongnge mantulungngi ite manging-kattu watu uar̄rappingnga lor̄rangngu laḷabinganna?" Ana waugu watu udde tumanite n wahewalla. Arawe su raranta mangitou isudde, imangi-tou naasilo watu udde nawilingke. ⁵See imangitou sinumuttate su laḷabinganna udde. Sulaḷumme su samba'a aikkatanna imangitou naasilo sangkatou umbasanna uaḷur̄re n jubah mawira tantaḷanna ua'ianna, ne imangitou mangke niḷrumoro.

⁶Taumata umbasanna udde nabbisara, "Arie paata'utta! Ia'u masing-katta iamiu maddea'a Mawu Yesus taumata Nazaret apan suete nia-russa. Itou tate baddia isindi. Itou nabangunte! Pa'ellega, indi tampane, imangitou napaḷallowangngi Tou. ⁷Orassa indi roote, waḷoa'e watti'a

indi su mallalārrenggen-Ne, nasutta lai Petrus. Waḷoa'a, 'Itou inaita malliu ṛoro siamiu su Galilea. Poiaroddi iamiu sarun maasilo Sitou, ere-apa suete niwaḷo n Tou siamiu.'"

⁸Ne imangitou sinumabangke wuassu laḷabinganna udde see ti-numaḷangnga ana waugu niṛṛumoro wuṛṛu nata'utta. Imangitou tate nabati'u watti'a sisai-sai, ana waugu imangitou nata'utta.

PANGINSUEANNU WORRETTI MARKUS TUMURRUTTU WORRETTA RO'E N AḶAMONANE

Mawu Yesus naipasilo m batangan-Ne si Maria Magdalena

(Mat. 28:9-10; Yoh. 20:11-18)

[⁹Napawe Mawu Yesus nabangunte wuassu papate, ruaallo atonna su allo Misa, Itou paarorone nattingkapasilo m batangan-Ne si Maria Magdalena. (Wuassi Maria udde Mawu Yesus suete napasabangngu sire pitu gharraho laḷeo.) ¹⁰Ne Maria Magdalena inaita namasingkattu aradianna udde su manga hawe Mawu Yesus, apan tantaḷanna massusa wuṛṛu lulluai. ¹¹Arawe napawe imangitou naaringikka manungku Mawu Yesus nabbiakke apia, wuṛṛu manungku Maria naasilote Sitou imangitou tawe mangngimanna.

Mawu Yesus nattingkapasilo m batangan-Ne su rua ng katou mallalārrenggen-Ne

(Luk. 24:13-35)

¹²Wua udde Mawu Yesus nattingkapasilo m batangan-Ne su rua ng katou mallalārrenggen-Ne ringannu olangnge apan paṛṛalane. Udde nariaddi su tempo rua ng katou udde tantaḷanna u'amatta mabatuku sambau ampungnga. ¹³Nariaddi imangitou nabelengnga wuṛṛu namasingkattu olangnge udde su manga hawene waine. Arawe imangitou tawe mangngimanna.

Mawu Yesus nattingkapisilo m batangan-Ne su mallalarrenggen-Ne

(Mat. 28:16-20; Luk. 24:36-49; Yoh. 20:19-23; WMR. 1:6-8)

¹⁴Panginsueanne, Mawu Yesus nattingkapisilo m batangan-Ne su sire mapulo assa mallalarrenggen-Ne, su tempo imangitou tantañanna u'anna. Itou namo'a simangitou ana waugu pangangimanni mangitou lome, wuṛṛu tumanite maattikka puane na'oma n sara tawe mangngimanna su manga taumata apan suete naasilo sassane manungku Mawu Yesus nabbiakke apia. ¹⁵See Mawu Yesus nabbisara simangitou, "Roote su ahewallu runia wuṛṛu waḷoa'e Watti'u Aḷaḷuassa wuassu Mawu Ruata udde su anambo n taumata. ¹⁶Taumata apan tawe mangngimanna sarun iṛṛuumanna. Arawe taumata apan mangngimanna wuṛṛu saṛṛanianna, sarun masaḷamatta. ¹⁷Maola'a sambau tatiala manungku imangitou mangngimanna, manga taumata udde sarun mallimbuakka ghaṛṛaho laḷeo ringannu arang-Ku; imangitou sarun mabbisara sulalūmmu aḷawo'u wisara apan taambe niasingkatanni mangitou. ¹⁸Amungkangngu imangitou mangagassa atoanna ara'e ma'inumma pasangkada, imangitou tawe masilaka. Amungkangngu imangitou mangandangngu lima su manga taumata marada'a, manga taumata udde sarun mapia."

Mawu Yesus nasengkengnga watukku surga

(Luk. 24:50-53; WMR. 1:9-11)

¹⁹Napawe Mawu Yesus suete nagahatto mangitou, Itou nasengkengke watukku surga. Poiaroddi Itou uaparenta su sampunna ringannu Mawu Ruata. ²⁰Ne manga mallalarrenggen-Ne inaita wuṛṛu namasingkatte m watti'a wuassu Mawu Ruata su aḷawo'u tampa. Wuṛṛu Mawu lai mammanara su sampunna ringanni mangitou wuṛṛu mapaaḷiatṭa'a lai ringannu manga aḷaṛṛindu'a manungku wattii mangitou udde atonna.]

PANGINSUEANNU WORRETTU AḷAMONA APAN WAINE

[⁹Manga wawine udde inaita ringanni Petrus wuṛṛu manga hawene, see nabbaṭi'a ringannu maautta anambo n apa apan suete niapasingkattu taumata umbasanna udde simangitou. ¹⁰Wua udde Mawu Yesus sassane

nappaattu mallalar̄renggen-Ne nabbati'a wuassu ra'i watukku war̄ratta,
watti'a susi wur̄ru tawe panginsueanne su ola'u asasaḷamatta apan saran
maḷannu-ḷannu.]

WATTI'U AĀĀUASSA APAN NIAPASINGKATTI LUKAS

WISARA TAĀĀANE

Wuke Watti'u AĀĀuassa wuassi *Lukas* namasingkatta, Mawu Yesus sangkatou Ratu m Punnu SaĀamatta apan pina'ire Mawu Ruata su pabbawalagu Israel wuŕŕu su anambo n taumata. SulaĀummu wukene indi Lukas namoŕŕetta manungku Mawu Yesus suete niongoĀannu Ghaŕŕaho Mawu iapamanara mannaĀiawukku Watti'u AĀĀuassa wuassu Mawu Ruata su taumata asiangnga. Watti'u AĀĀuassa indi napene n ainnunu su saruannu manga taumata ringannu aĀawo'u hausanne. Niasiloanna lai sambau aĀĀuassa su wuke n *Lukas* indi, lembonete su manga aaddoanne paarorone su ola'u daranta Mawu Yesus, wua udde wageangnge panginsueanne lai su ola'u asasengkengngu Mawu Yesus watukku surga. Watti'a su ola'u niatambanna wuŕŕu nassaĀiawukka agama n Saŕŕani man napawe Mawu Yesus nasengkengnga su surga niwatti'u lai mamamoŕŕettu wuke indi sulaĀummu wuke *Watti'u Manga Rasul*.

Wageangnge 2 wuŕŕu 6 (pa'ellega LaĀoŕŕo n Wuke uawoŕŕetta aĀiuwowane indi) laĀoŕŕoannu manambo hati m batti'a apan tumba'u asombanganna sulaĀummu wuke m Watti'u AĀĀuassa indi. Ere lai watti'a su ola'u antari manga mala'ekatta wuŕŕu tatembo manga mal-laĀu'adda winatangnga su tempo asasungkangngu Mawu Yesus, Mawu Yesus su WaĀe Mawu su tempo ta'e aĀaŕŕana'a, wuŕŕu lai sasumandingngu taumata n Samaria naungnge apan mapia wuŕŕu Ana'a apan NawuĀi. Wuke indi tumanite mannasa lai su ola'u aĀĀiomanna, Ghaŕŕaho Mawu Ruata, wawine sulaĀummu manara mangngimbe Mawu Yesus wuŕŕu pangangampungnga rosa wuassu Mawu Ruata.

Lalorrone

Panattarranne	1:1-4
Asasungkanga wuɽɽu tempo Yohanes	
Mananaɽrani wuɽɽu Mawu Yesus	
ta'e alaɽrana'a	1:5-2:52
Pamamanara n Yohanes Mananaɽrani	3:1-20
Sasaɽrani Mawu Yesus wuɽɽu wawono'a su riri-Ne	3:21-4:13
Pamamanara Mawu Yesus su tangnga n taumata	
n Galilea	4:14-9:50
Wuassu Galilea watukku Yerusalem	9:51-19:27
Misa panginsueanne su Yerusalem wuɽɽu su soa	
maranine	19:28-23:56
Pabbawangunnu Mawu Yesus wuassu papate,	
nattingka pasilo m batangan-Ne wuɽɽu	
asasengkeng-Nge watukku surga	24:1-53

Panattaranne

1 Teofilus apan naungnge mapia,
1 Manambo taumata suete nammanara atonna mammoŕretta ringannu uaatokka su ola'u manga arariaddianna apan suete nariaddi su pat-tangnganni ite. **2** Imangitou namoŕretta nassuŕunggu apan niwatti'a siite wuassu manga taumata apan naasilo sassane manga arariaddianna udde wuassu panattaranne, ana see namasingkattu watti'a udde. **3** Napawe ia'u ringannu matiti'a mammarikissa sarangkanambone udde wuassu panattaranne, ia'u manggantimma mappianne mammoŕrettu sambau watti'a apan uaatokka si Tuangnga. **4** Ia'u namoŕretta udde, tadea'u i Tuangnga masingkatta manungku apa apan suete niaŕra'a si Tuangnga udde atonna.

Asasungkanggi Yohanes Mananarŕani niapaasingkatta

5 Napawe Herodes naola'e ratu su leta'u Yudea, pia sangkatou imam aranne Zakharia. Itou nasutta su wageangngu manga imam Abia. Awingnge aranne Elisabet, itou lai papapulunnu imam. **6** Rua sangkawinganna udde, mabbiakka maaŕuassa naungngu Mawu Ruata. Itarua matuŕrutta anambo n parenta wuŕru tita Mawu ringannu ahewallu naungnge. **7** Itarua tawe ana'a ana waugu Elisabet tinna wuŕru itarua timmaddete.

8 Su sambau allo, su tempo wageanggi imam Abia naasomba wuatta, Zakharia nangamattu manara n imam su saruannu Mawu Ruata. **9** Ringannu na'ola'a undi, ere inanaramanne a'olaannu manga imam, Zakharia niatebo'anne su mutta sulaŕummu Waŕe Mawu wuŕru manu-tungnga amania. **10** Tantaŕanna amania tattutunganna taumata nambo u'aŕiomanna su liudde. **11** Su tempo udde mala'ekattu Mawu nattingkapa-silo si Zakharia. Mala'ekatta udde uarisikka su samba'a aikkatannu me-dda, su tampa m pananutunganna amania. **12** Napawe Zakharia naasilo mala'ekatta udde, itou nabingo wuŕru nata'utta. **13** Arawe mala'ekatta udde nabbisara, "Arie paata'utta, Zakharia! Mawu Ruata suete nadda-ringikka aŕiomannu. Awingngu Elisabet sarun mangunsiwe n sangkatou ana'a esakka. I'o sarun manago n aranne Yohanes. **14** I'o sarun lembo n lumuassa wuŕru manambo taumata lullala'a napawe ana'a udde inasung-kangke! **15** Itou sarun maola'a taumata mapia su aellegu Mawu, wuŕru itou tawe ma'inumma anggore ara'e inumanna maawu'anna. Ro'e n ina-sungkangge itou aintaŕroante n Ghaŕraho Mawu Ruata. **16** Manambo

taumata n Israel sarun ehetanne apia mabelengnga ringannu Mawu Ruata, Mawu mangitou. ¹⁷Itou sarun maola'a raloŋorannu Mawu apan matohassa wuŋŋu mataŋŋino ere Elia. Itou sarun mangonggolu padda-rame su iamangnga wuŋŋu ana'a, wuŋŋu taumata apan tawe tumuŋŋutta sarun ehetanne apia sulaŋannu ŋingiranna apan mapia. Ringannu aroddi itou nanaddia sambau walahanna apan nasaddiate huna Mawu."

¹⁸"Ereapa ia'u maasingkatta manungku olangnge udde sarun mariaddi?" aiwaŋo n Zakharia su mala'ekatta udde. "Ia'u timmaddete, wuŋŋu awingku lai timmaddete."

¹⁹Mala'ekatta udde sinumimbakka, "Ia'u indi Gabriel. Ia'u mangngimbe Mawu Ruata wuŋŋu ete Itou nandolo'u mamasingkattu watti'a mapia indi si'o. ²⁰Apa apan ta'u niwisara, sarun mariaddi su tempone. Arawe ana waugu i'o tawe mangngimanna, i'o sarun tawe maawisara; i'o sarun imoune ma'oma n sara apa apan suete niwaŋo'u matipusse."


²¹Tantaŋanna udde taumata nambo sidutu uaŋŋado si Zakharia. Imangitou naherangnga anio itou aroddi aŋannune sulaŋummu Waŋe Mawu. ²²Wuŋŋu su tempo itou sinumabangnga, itou tate maawisara simangitou. Itou sidutu maggahatto ringannu limane wuŋŋu sidutu nimmoune. Ne manga taumata naasingkatte manungku itou suete naasilo sambau sondappa sulaŋummu Waŋe Mawu.

²³Napawe nasuete manarane su Waŋe Mawu, Zakharia napuŋete su waŋe. ²⁴Tawe naŋannu wua udde, Elisabet awingnge plate illoŋŋo, see itou sidutu uatana'a su waŋe aŋannune lima wuŋanna. ²⁵Itou nabbisara, "Panginsueanne Mawu nantuŋungku wuŋŋu namappaassa asasili'u."

Asasungkangngu Mawu Yesus niapaasingkatta

²⁶Napawe Elisabet plate illoŋŋo annumpe wuŋanna, Mawu Ruata nandolokku mala'ekattu Gabriel inai su Nazaret, sambau soa su leta'u Galilea. ²⁷Gabriel nirolokka ringannu sangkatou maŋŋuala aranne Maria. Maŋŋuala udde uatatunanga n sangkatou aranne Yusuf, papapulunni Daud. ²⁸Mala'ekatta udde nirumanta ringanni Maria wuŋŋu nabbisara, "Saŋamatta, si'o apan lembo niaŋamatannu Mawu! Mawu su sampunna ringannu!"

²⁹Naaringikka wisara mala'ekatta udde Maria niŋŋumoro, see mangke ma'iwalo sulaŋummu naungnge apa pandumannu tabea udde. ³⁰Ne mala'ekatta udde nabbisara sitou, "Arie paata'utta, Maria, ana waugu i'o naaŋuassa naungngu Mawu Ruata. ³¹I'o sarun pia illoŋŋo wuŋŋu mangunsiwe n sangkatou ana'a apan sarun isagonu aranne Yesus. ³²Itou sarun maola'a wahewa wuŋŋu sarun isago Ana'u Mawu Ruata Lembo n Atanggaŋanne. Mawu Ruata sarun ma'ola'a Sitou ratu ere Ratu Daud



Sambau parrihi su Nazaret (1:26)

iupungngu alamonane. ³³Wurru Itou sarun mamarenta ere sangkatou ratu wuassu papapulunni Yakub saran malannu-lannu. Araratuan-Ne tawe panginsueanne.”

³⁴”Arawe ia’u ta’e marʼruala,” unni Maria su mala’ekatta udde, ”Ereapa olangnge udde wotongnge mariaddi?”

³⁵Mala’ekatta udde sinumimbakka, ”Gharraho Mawu Ruata sarun rumanta si’o, wurru tarʼrino Mawu Ruata sarun mangintarʼro si’o. Ana waugu udde ana’a apan sarun iunsiwenu udde sarun isago Naukkassa, Ana’u Mawu Ruata. ³⁶Naunge; Elisabet, turʼrangngu udde plate illoʼro annummu wulanna, alannune salaiwe itou timmaddete wurru taumata mabaʼlo manungku itou tinna. ³⁷Ana waugu su Mawu Ruata tawedu sambau apan tawe maola’a.”

³⁸See Maria nabbisara, ”Ia’u indi allangngu Mawu; ariaddite sia’u su erapa suete niwisaranu.” See mala’ekatta udde nanantangke Maria.

Maria nattembo si Elisabet

³⁹Ringannu malihakka wua udde, Maria inaite su sambau soa su Yudea, su wageangngu panenteanna. ⁴⁰Itou inaite su wale n Zakharia, wurru napawe itou nasutta, itou nattabea si Elisabet. ⁴¹Aroddi napawe Elisabet naaringikka Maria nattabea, ana’a sulaʼummu illoʼro n Elisabet udde inumaʼlore. Ne Elisabet niasuttante n Gharraho Mawu Ruata, ⁴²see nangintuʼji, ”Ete i’o apan lembo niaʼamatanna su wallattu anambo n wawine! Inaʼamatante ana’a apan sarun iasungkangu udde! ⁴³Isai ia’u na’oma n sara inangngu Mawu nirumanta ringanku? ⁴⁴Aroddi ia’u naaringikka tabeanu, ana’a sulaʼummu illoʼro’u inumaʼlore lulluassa.

⁴⁵Lalumanna'a si'o, ana waugu mangngimanna manungku apa apan niwalo Mawu si'o udde sarun mariaddi!"

Aadiangkamanni Maria

⁴⁶Maria nabbisara,

"Naungku maddalo Mawu

⁴⁷ wuŕru řimuu'u lullala'a

ana waugu Mawu Ruata Mananałama'u.

⁴⁸Itou uanaungnga sia'u, allang-Nge apan adio'anne!

Manattakka orassa indi, anambo n pabbawalaga

mabbisara manungku ia'u su lalumanna'a.

⁴⁹Ana waugu Mawu Ruata Lembo Matařřino

nandanta n inolaanna wahewa sia'u.

Naukkassa aran-Ne.

⁵⁰Papapulunna sansunannu papapulunna

Mawu napaalatta'u darangngu-Ne

su taumata apan matta'uttu Mawu.

⁵¹Ringannu lima-Ne apan matohassa

Itou napaatalei n taumata mawunga,

wuŕru nanongkakku pandumanni mangitou.

⁵²Manga ratu nilintukka wuassu araratuanne

wuŕru taumata adio'anne tinanggakka.

⁵³Taumata małunussa niapaalaidu alawo'u apapia,

taumata ala nillimbuařřanna tawe ulene.

⁵⁴Itou nantułungngu Israel allang-Nge,

tumuřřuttu paaire apan suete niolang-Nge

ringannu iupungngu alamona ng kite.

⁵⁵Mawu tawe maabułi m paaire-Ne,

Itou marangngu si Abraham

wuŕru papapulunne ma'oma n sara małannu-łannu."

⁵⁶Irařřangngo tallu wułanna alannune Maria uatana'a ringanni Elisabet, wua udde itou napulete su wale.

Asasungkangngi Yohanes Mananařřani

⁵⁷Na'omate tempone Elisabet mangunsiwe. Itou nangunsiwete n sangkatou ana'a esakka. ⁵⁸Manga alindonganne wuŕru manga tuřřangnge naaringikka aroddi apiane Mawu Ruata si Elisabet, ne imangitou lulluasse su sampunna ringanni tou.

⁵⁹Su tempo ana'a udde uukke ualute allo, imangitou nirumanta massunatta sitou. Imangitou maapulu manago arannu ana'a udde Zakharia, ere arannu iamangnge, ⁶⁰arawe inangngene nabbisara, "Tawe! Itou rinone isago Yohanes."

⁶¹"Tawe saran sangkatou wuassu wallattu manga turangngu pia aranne aroddi," unni mangitou si Elisabet. ⁶²See ringannu isaratta, imangitou naiwalō si Zakharia aranna apan ipaapulu ianggilla su ana'itou.

⁶³Zakharia nadorongnga watullei see namorretta, "Aranne Yohanes." Imangitou sarangkanambone naherangnga. ⁶⁴Su tempo udde lai Zakharia naawisarate wurru nadalote Mawu Ruata. ⁶⁵Manga alindonganne mangke nata'utta, wurru watti'a udde natelengke su alawo'u leta'u manga panenteannu Yudea. ⁶⁶Anambo n taumata apan naaringikka olangnge udde naiwalō sulaḷummu naungnge, "Maola'e apa ana'a udde salimmurine?" Ana waugu Mawu uarḷundinganna sitou.

Zakharia namasingkattu watti'a wuassu Mawu

⁶⁷Zakharia iamangngu ana'a udde, niasuttannu Gharraho Mawu Ruata na'oma n sara itou namasingkattu tanata wuassu Mawu. Itou nabbisara,

⁶⁸"Wette iite maddalo Mawu,

Ruata m balahannu Israel!

Itou suete nirumanta mantulungngu pabbawala-Ge wurru mamallossi mangitou.

⁶⁹Itou nangoggolla siite mananaḷamatta matohassa, papapulunni Daud, allang-Nge.

⁷⁰Ro'e n aḷamonane sulaḷummu manga nabi arangnguan-Ne, Mawu Ruata suete nangagillu paaire-Ne,

⁷¹ipanaḷamatta siite wuassu seetti ite wurru wuassu tarḷino manga taumata apan maddantinni ite.

⁷²Wurru mammasilo naungnge mapia su iupungngu aḷamona ng kite, paaire-Ne apan naukkassa sarun tipusan-Ne.

⁷³⁻⁷⁴Itou nassalu si Abraham iamangngi ite, wurru na'ire manaḷamatta siite wuassu seetti ite, tadea'u iite tawe matta'utta mangimbe Sitou

⁷⁵sidutu mattarḷamawu Sitou wurru mapaaḷuassu naung-Nge su aḷo'engngu pabbiaḷranni ite.

⁷⁶To, ei Ana'u, sarun isago nabi Mawu Ruata Lembo n Atanggaranne.

I'o 'apan nirolokka malliu ɾoro Mawu
wɯɾɾu mamu'a laɭan-Ne,

⁷⁷see mamasingkatta su pabbawala-Ge
manungku imangitou sarun masaɭamatta,
amungkangngu Mawu Ruata suete nangampungnga manga rosa
mangitou.

⁷⁸Mawu ng kite naung-Nge masarɾionto'a wɯɾɾu maakkanna;
ana waugu manaɭamatta siite Itou nirumanta.

Ere matannallo
sinumabbangnga su ruaallo,

⁷⁹aroddiwe lai Itou nangonggolu semak-Ke su anambo n taumata
apan mabbiakka sulaɭummu ararandumma wɯɾɾu su atata'utta.
Itou mangngehetta siite su laɭanna
apan matudda m paddarame."

⁸⁰Ana'i Zakharia udde maggewalla see aatambanna auatannu
gharrahone. Itou uatana'a su wadda'a, na'oma n sara tempone
nia'omanna itou namasingkattu watanganne su pabbawalagu Israel.

Asasungkangnu Mawu Yesus

(Mat. 1:18-25)

2 Su tempo udde Kaisar Agustus namarenta tadea'u anambo n tu-
mana'u Araratuannu Roma maiwoɾɾettu aranne ana see ireengnga.

²Pandareengnga paarorone indi, niamatta su tempo Kirenus naola'a
gubernure su leta'u Siria. ³Su tempo udde anambo n taumata inaita
mapawoɾɾettu aranne su soa n sangkatou-sangkatou.

⁴Yusuf inaita wuassu Nazaret su Galilea, watukku Betlehem su
Yudea, su soa inasungkanganni Ratu Daud; ana waugu Yusuf wua-
ssu papapulunni Daud. ⁵Yusuf naiwoɾɾettu aranne su sambau ringanni
Maria tunangane, apan tantaɭanna pia illoɾɾo. ⁶Napawe imangitou
na'omate su Betlehem, nia'omante tempone Maria mangunsiwe. ⁷Itou
nangunsiwete n sangkatou ana'a esakka, anangnge pahulu. Ana'a udde
nioosannu larɾeme, see niapaatiilla su tampa n aananannu winatangnga
niamparɾannu larɾami; ana waugu imangitou niasueannu tampa pattin-
dahoanna.

Mallaɭu'adda domba wɯɾɾu mala'ekatta

⁸Su ɾabbi udde pia manga mallaɭu'adda apan tantaɭanna mandiaga
manga dombane su wadda'u nannaɭo su leta'a udde. ⁹Inarɾombanganne

mala'ekattu Mawu natingkapasilo m batanganne simangitou, wuṛṛu semakku asasemakka wuassu Mawu nilumansiangan nanemakka simangitou, wuṛṛu imangitou mangke nata'utta. ¹⁰Arawe mala'ekatta udde nabbisara, "Arie paata'utta! Ana waugu ia'u nirumanta uaapiddu Watti'u Aḷaḷuassa siamiu - watti'a apan maaḷuassa anambo n taumata. ¹¹Allo indi su soa n Daud nasungkange Ratu m Punnu Saḷamatti amiu, eteudde Kristus, Mawu. ¹²Ete indi tatialane: Iamiu sarun maaringnnga sangkatou ana'a aaosannu laṛreme, niapaatiilla su tampa n aananannu winatangnga."

¹³Inaṛrombanganne mala'ekatta udde raṛrundingannannu manambo mala'ekatta waine, apan maddalo Mawu Ruata. Imangitou mabbisara,

¹⁴"Daralo su Mawu Ruata su langitta apan atanggaṛṛanne!

Wuṛṛu su wowo n runia, paddarame su taumata
apan maaḷuassa naungngu Mawu!"

¹⁵Napawe manga mala'ekatta udde nanantangke mangitou wuṛṛu nabelengke su surga, manga mallalū'adda uawawisarate sangkatou ringannu sangkatou, "Wette iite inaita su Betlehem ma'ellega apa apan suete nariaddi udde, apan suete niapasinkattu Mawu siite."

¹⁶Imangitou lapiddu inai, see naaringnke si Maria wuṛṛu Yusuf, wuṛṛu ana'a adio'a udde tantaḷanna mattiilla su tampa aananannu winatangnga.

¹⁷Napawe manga mallalū'adda domba naasilo ana'a udde, imangitou nabbatti'e apa apan niapaasingkattu manga mala'ekatta su ola'u ana'a udde. ¹⁸Wuṛṛu anambo n taumata naherangnga naaringikka watti'u manga mallalū'adda domba udde. ¹⁹Arawe Maria nanahipunna sarangkanambone udde sulaḷummu naungnge wuṛṛu iraṛringida. ²⁰Manga mallalū'adda domba nabelengke watukku wadda'u nannaḷo lapiddu maddalo wuṛṛu mammantuga Mawu Ruata, ana waugu sarangkanambone apan suete inaringiṛṛanna wuṛṛu inasiloanni mangitou naṛṛino ere suete niapaasingkattu mala'ekatta simangitou.

Mawu Yesus nionggolaṇnu aranne

²¹Napawe uukke ualute allo, ana'a udde nissunatte. Wuṛṛu aranne nissagote mangitou Yesus, aranna apan suete nionggolu mala'ekatta Sitou tantaḷanna Itou ta'e su illoṛṛo n inangnge-Ne.

Mawu Yesus tinantilla su Mawu su Waļe Mawu

²²Na'omate tempone Yusuf wuřru Maria mapaamattu addatta pa-mamaresi tumuřrutta Tita Musa. Nariaddi imangitou nangapiddu ana'a udde watukku Yerusalem itantilla su Mawu. ²³Ana waugu sulaļummu tita Mawu uawořretta arendi, "Suapa n ana'a esakka puhuļu sarun itan-tilla su Mawu." ²⁴Imangitou lai pia pandumma manantillu sasamba, eteudde sampare manu'a bakiangnga ara'e darua ana'u merpati ta'e maradio'a, ere suete tinantunna sulaļummu tita Mawu.

²⁵Tempo udde su Yerusalem pia sangkatou taumata aranne Simeon. Itou taumata mapia, apan matta'uttu Mawu Ruata wuřru tantaļanna uarařraddo tempone Mawu Ruata manaļamatta Israel. Ghařraho Mawu Ruata uařrundinganna sitou, ²⁶wuřru Ghařraho Mawu Ruata suete namasingkatta sitou manungku itou taambe mate tantaļanna taambe naasilo Ratu m Punnu Saļamatta apan suete pina'ire Mawu. ²⁷Wuassu aehettu Ghařraho Mawu Ruata, Simeon sinumutta su Waļe Mawu. Su tempo udde Yusuf wuřru Maria uaapiddu Mawu Yesus, apan ta'e adio'a udde mallagu n addatta apan suete niatokku Tita n agama. ²⁸Ne Simeon nanganute ana'a udde wuřru nisaļurute n tou, see nadalote Mawu Ruata,

²⁹"Orassa indi, Mawu, I'o suete napasuungngu paaire-Nu.

Wala'ewe allang-Ngu indi mate ringannu matammuda.

³⁰Ana waugu ringannu mata'u sassane, ia'u suete naasilo

Punnu Saļamatta wuassu Mawu Ruata.

³¹Punnu Saļamatta apan suete nisaddia-Nu

hunane su aļawo'u pabbawalaga:

³²naaļihida semakka apan mannemakka laļannu manga pabbawalaga waine,

ana see rumanta ringan-Nu;

eteudde asasemakka apan mandanta n awawantuga

su aļařranang-Ngu Israel."

³³Iamangnga wuřru inangngu ana'a udde naherangnga naaringikka apa apan suete niwisara n Simeon su ola'u ana'i mangitou. ³⁴Simeon nangalaļamatta simangitou wuřru nabbisara si Maria, inangugu ana'a udde, "Ana'a indi suete nipile Mawu Ruata sarun mamate wuřru ma-naļamatta anambo n taumata n Israel. Itou sarun maola'a tatiala Mawu Ruata, apan sarun ipaseettu taumata nambo, ³⁵wuřru ringannu aro-ddi inasingkatante laļořro naungngi mangitou. Asasusa sarun mangusu'a naungngu ere haļele mařoro."

³⁶Pia lai sangkatou nabi wawine timmaddete atonna. Aranne Hana, ana'i Fanuel, wuassu walaga Asyer. Napawe pitute tonna wua naawing-

nga, ³⁷Hana naola'e wawine walu, wuɽɽu orassa indi uukke ualute m puɽo appatta su tonnane. Tawe saran paassa itou nanantangngu Waɽe Mawu. Allo rabbi itou mattaɽɽamawu isudde su Mawu Ruata ringannu u'aljomanna wuɽɽu mappuasa. ³⁸Orassa udde lai itou naɽɽindo'a niru-manta, see nadalo Mawu Ruata wuɽɽu uahahatto su ola'u ana'a udde ringannu awadaalla apan uaraɽɽaddo tempone Mawu Ruata mamallossu Yerusalem.

Nabelengnga watukku Nazaret

³⁹Napawe Yusuf wuɽɽu Maria suete na'ola'a sarangkanambone apan niatokku tita Mawu, imangitou napuɽete watukku Nazaret su Galilea. ⁴⁰Ana'a udde aatambante ahewalle wuɽɽu atohanne. Itou pande atonna wuɽɽu lembo n arangnguannu Mawu Ruata.

Yesus su Waɽe Mawu

⁴¹Suapa n tonna hagurangngu Mawu Yesus inai watukku Yerusalem maddamea n Allo Wahewa m Paskah. ⁴²Wuɽɽu napawe Mawu Yesus uukke mapuɽote dua su tonnane, imangitou inaita su ramea udde tumuɽɽuttu inanaramanna. ⁴³Napawe ramea udde nasuete imangitou napuɽete, arawe Mawu Yesus, ana'a udde, ta'e natantangnga su Yerusalem wuɽɽu iamangnga inangnge wagga. ⁴⁴Imangitou massunna Itou uatan-talongnga suadio'a ringannu ammuɽanna su amatanna. Napawe suete inumamatta allo massallo wakkute udde imangitou naddea'a Sitou su wallattu manga tuɽrangnge see hawe mangitou. ⁴⁵Arawe imangitou tawe naasangkala Sitou, nariaddi imangitou nabelengke apia watukku Yerusalem nadea'a Sitou. ⁴⁶Napawe tallute allo maddea'a, imangitou naasangkala Sitou sulaɽummu Waɽe Mawu. Itou tantaɽanna ua'ianna madaringikka manga huru n agama wuɽɽu manggagillu manga aiwaɽo. ⁴⁷Anambo n taumata apan naaringikka Sitou naherangnga ana waugu manga sasimbak-Ke apan masiɽɽongnga. ⁴⁸Hagurang-Nge lai naherangnga naasilo Sitou. Inangnge nabbisara Sitou, "Ana'a, anio I'o na'ola'a arendi siami? Iamangngu wuɽɽu inangngu susinggawangnga maddea'a Si'o!"

⁴⁹Mawu Yesus sinumimbakka, "Anio iamangnga wuɽɽu inangnga maddea'a Sia'u? Iamangnga wuɽɽu inangnga wagga manungku Ia'u ɽinone su waɽe n Iamang-Ku?" ⁵⁰Arawe imangitou tawe naasunna sasimbakku Mawu Yesus.

⁵¹Wua udde Mawu Yesus napuɽete su sampunna ringanni mangi-tou watukku Nazaret, wuɽɽu uararingikka simangitou. Anambo n ino-

laanna udde sasahipunannu inangnge sulaḷummu naungnge. ⁵²Mawu Yesus mangke aatambanna ahewalle wuṛṛu aatambanna apandene, see iattaḷantuppu Mawu Ruata wuṛṛu ipaapulu n taumata.

Watti'a wuassi Yohanes Mananaṛṛani

(Mat. 3:1-12; Mrk. 1:1-8; Yoh. 1:19-28)

3 Su tonna apuḷo limane su pamamarenta n Kaisar Tiberius, Pontius Pilatus naola'a gubernure su Yudea, wuṛṛu Herodes uaparenta su Galilea, Filipus, tuṛṛangngi Herodes namarenta su wageangngu Iturea wuṛṛu Trakhonitis, arawe Lisantias namarenta su Abilene. ²Apan uaumbele manga imam wahewa eteudde i Hanas wuṛṛu i Kayafas. Su tonna udde Mawu Ruata nabbisara si Yohanes, ana'i Zakharia su wadda'a. ³Ne Yohanes inaitte mammalintadu aḷawo'u tampa su ahewallu wageangngu Saḷukku Yordan wuṛṛu namasingkattu Watti'a wuassu Mawu Ruata. Yohanes u'aḷiata, "Awaḷute wuassu manga rosanu, wuṛṛu iamiu ṛinone saṛṛanianna, tadea'u Mawu Ruata mangampungnga siamiu." ⁴Udde nassuḷungngu apa apan uawoṛṛetta sulaḷummu wuke Nabi Yesaya:

"Pia taumata u'aḷiata su wadda'a,

'Saddiaite laḷannu Mawu,
rataṛṛa'e laḷanni Tou.

⁵Aḷawo'u liobongnge sarun soopanna,
aḷawo'u wowone wuṛṛu wuidda iapaaratakka.

Laḷanna apan uawengkolla sarun tuḷiṛṛanna,
wuṛṛu laḷanna apan uaḷiobbo'a sarun iratakka.

⁶Manga taumata su ahewallu runia sarun ma'ellega
Mawu Ruata manaḷamatta taumata!"

⁷Manambo taumata nirumanta ringanni Yohanes maisaṛṛani. Yohanes nabbisara simangitou, "Iamiu taumata laḷeo! Isai nabbisara manungku iamiu wotongnge maḷiu wuassu ruumannu Mawu Ruata apan sarun rumanta? ⁸Pasiloa'e ringannu pallaḷagunu manungku iamiu nawaḷute wuassu manga rosanu! Arie mabbisara manungku Abraham udde iupungngu aḷamonanu. Naunge: Wuassu manga watu indi lai Mawu Ruata wotongnge ma'ola'a papapulunni Abraham! ⁹Waḷiungnga nasaddiate ipanuwangnga alu ma'oma n sara ṛamunne. Aḷawo'u alu apan tawe mabbua mapia sarun tuwanganna wuṛṛu iramme sulaḷummu putungnga."

¹⁰"Nariaddi, apa ṛinone olaanni ami?" aiwaḷo manga taumata si Yohanes.

¹¹Yohanes sinumimbakka, "Taumata apan laungnge darua řinone mangonggolu samparassa su taumata tawe laubba, wuřru taumata pia anna, řinone mattahia su taumata tawe anna."

¹²Manga mallaluřru wose lai nirumanta ringanni Yohanes maisařrani. Imangitou naiwařo, "Iamangnga Huru, apa řinone olaanni ami?" ¹³Yohanes sinumimbakka, "Arie padorongnga lumebbe wuassu apa apan suete tinantunna."

¹⁴Pia lai tantara naiwařo, "Ereapa iami? Apa řinone olaanni ami?"

Yohanes sinumimbakka, "Arie pamařrangnga sisai-sai, wuřru arie pangarřo roitta ringannu aansilla awusu. Wotongnete i'o mabbiakku roitta lařantakku!"

¹⁵Su tempo udde manga taumata mannatakke uaiwařo, tanne Yohanes Ratu Punnu Sařamatta apan rařradoanni mangitou. ¹⁶Ana waugu udde Yohanes nabbisara simangitou sarangkanambone, "Ia'u mannařrani siamiu ringannu ua'e, arawe pařraddote sarun rumanta sařimmurine lembo n ahewařanne wuassia'u. Mamu'a taři n sapatune lai ia'u tawe suřřinone. Itou sarun mannařrani siamiu ringannu Ghařraho Mawu Ruata wuřru putungnga. ¹⁷Su lima-Ne pia niřru ipattappa ammene ma'oma n sara mawaresi. Amme sarun iammulla su wařingkakka, arawe anambo n wařaane sarun tutunganna su putungnga apan tawe mapadumma!"

¹⁸Ete aroddi Yohanes mannantiro taumata ringannu ařawo'u ařařa'a su tempo itou mabatti'u Watti'u Ařařuassa. ¹⁹Arawe Herodes tembonanne su Galilea, wino'anni Yohanes su ola'u paa'awingnge ringanni Herodias, awingngu tuřrangnge, wuřru su ola'u manga ařařeo waine apan suete niolangnge. ²⁰Arawe Herodes niatambanna ařařeone ringannu nantařro n Yohanes sulařummu tuttupanna.

Mawu Yesus nissařrani

(Mat. 3:13-17; Mrk. 1:9-11)

²¹Napawe manga taumata udde nissařranite, Mawu Yesus lai nissařrani. Wuřru tantařanna Itou u'ařiomanna, langitta nati'akka, ²²wuřru Ghařraho Mawu Ruata inumonto'a Sitou ere manu'a merpati. See inaringikka tingikku Mawu Ruata nabbisara, "Ete-I'o Ana'a arangnguang-Ku. I'o mařuassa naung-Ku."

Manga arannu iupungngu ałamona Mawu Yesus

(Mat. 1:1-17)

²³Su tempo udde Mawu Yesus nanattakke n manara-Ne, uukke irarřranggo tallu m puło su tonnane. Tumurřuttu addapattu taumata, Itou ana'i Yusuf, ana'i Eli, ²⁴ana'i Matat, ana'i Lewi, ana'i Malkhi, ana'i Yanai, ana'i Yusuf, ²⁵ana'i Matica, ana'i Amos, ana'i Nahum, ana'i Hesli, ana'i Nagai, ²⁶ana'i Maat, ana'i Matica, ana'i Simej, ana'i Yosekh, ana'i Yoda, ²⁷ana'i Yohanan, ana'i Resa, ana'i Zerubabel, ana'i Sealtiel, ana'i Neri, ²⁸ana'i Malkhi, ana'i Adi, ana'i Kosam, ana'i Elmadam, ana'i Er, ²⁹ana'i Yesua, ana'i Eliezer, ana'i Yorim, ana'i Matat, ana'i Lewi, ³⁰ana'i Simeon, ana'i Yehuda, ana'i Yusuf, ana'i Yonam, ana'i Elyakim, ³¹ana'i Melea, ana'i Mina, ana'i Matata, ana'i Natan, ana'i Daud, ³²ana'i Isai, ana'i Obed, ana'i Boas, ana'i Salmon, ana'i Nahason, ³³ana'i Aminadab, ana'i Admin, ana'i Arni, ana'i Hezron, ana'i Peres, ana'i Yehuda, ³⁴ana'i Yakub, ana'i Ishak, ana'i Abraham, ana'i Terah, ana'i Nahor, ³⁵ana'i Serug, ana'i Rehu, ana'i Peleg, ana'i Eber, ana'i Salmon, ³⁶ana'i Kenan, ana'i Arpaksad, ana'i Sem, ana'i Nuh, ana'i Lamekh, ³⁷ana'i Metusalah, ana'i Henokh, ana'i Yared, ana'i Mahalaleel, ana'i Kenan, ³⁸ana'i Enos, ana'i Set, ana'i Adam, ana'u Mawu Ruata.

Mawu Yesus niwono'annu Setanna

(Mat. 4:1-11; Mrk. 1:12-13)

4 Mawu Yesus niintařřoannu Gharřaho Mawu Ruata su tempo Itou nanantange n Sałukku Yordan. Gharřaho Mawu Ruata nangehetta Sitou watukku wadda'a małalangnga. ²Isudde Itou niwono'annu Setanna appattu puło allo ałannune. Su ało'engngu allo udde, Itou tawe inumanna manga apa. Nariaddi panginsueanne Itou naapendamma małunussa.

³Setanna nabbisara Sitou, "Amungkangngu I'o Ana'u Ruata, ola'e watu indi maola'a roti."

⁴Mawu Yesus sinumimbakka, "Sulałummu Wuke Susi uaworřetta, 'Taumata tawe tumba'u maawiakku roti sassane.'"

⁵See Setanna nangapiddu Mawu Yesus su tampa apan matanggakka wuřřu tumba'u sangkarřondapa Setanna namasilo Sitou anambo n arara-tuanna su runia. ⁶"Anambo n tarřino wuřřu paa'ala indi sarun ta'u itan-tilla Si'o," unnu Setanna su Mawu Yesus, "ana waugu sarangkanambone udde suete nionggolla sia'u wuřřu ia'u wotongnge mangonggolla sisai-

sai apan ipaapulu'u pangonggolanne. ⁷Sarangkanambone indi sarun maola'a darotongngu, amungkannggu I'o umalintudda massubba sia'u."

⁸Mawu Yesus sinumimbakka, "Sulalummu Wuke Susi uaworretta, 'Passubbate Mawu Ruatanu wu'ru tumba'u pangimbe Sitou sassane.'"

⁹See Setanna nangapidde Mawu Yesus watukku Yerusalem wu'ru nangado n Tou su salawo m Wale Mawu wu'ru nabbisara Sitou, "Amungkannggu I'o Ana'u Mawu Ruata, tumpate I'o wua isindi. ¹⁰Ana waugu sulalummu Wuke Susi uaworretta, 'Mawu Ruata sarun mando-lokku manga mala'ekatta mandiaga Si'o mapia-pia.' ¹¹Wu'ru lai, 'Manga mala'ekatta sarun manengamma Si'o ringannu limane, tadea'u leddanu tawe mattu'a su watu.'"

¹²Mawu Yesus sinumimbakka, "Sulalummu Wuke Susi uaworretta, 'Arie pamono'a Mawu Ruatanu.'"

¹³Napawe Setanna suete namono'a Mawu Yesus ringannu alawo'u hati n wawono'a, itou nanantangke Mawu Yesus wu'ru nalla'radote tephone apan mapia.

Mawu Yesus nanattakku manara-Ne su Galilea

(Mat. 4:12-17; Mrk. 1:14-15)

¹⁴Wua udde Mawu Yesus nabelengke watukku Galilea; wu'ru Itou niintar'roannu Ghar'raho Mawu Ruata. Watti'a su ola'u watangan-Ne naddingikka su ahewallu wanua udde. ¹⁵Itou manggar'ra'a su manga wale m pattatar'amawuanna, wu'ru anambo n taumata maddalo Sitou.


Mawu Yesus tino'a'a su Nazaret

(Mat. 13:53-58; Mrk. 6:1-6)

¹⁶Mawu Yesus inaita lai watukku Nazaret, su wanua inahewalanni Tou. Su allo n Sabatta, ere su wasane Itou inai su wale m pattatar'amawuanna. Itou dirumarisikka mabbasa n Wuke Susi, ¹⁷wu'ru nionggolannu wuke Nabi Yesaya. Itou namu'ate wuke lalulunanna udde, see inasombanganna wageangnge indi,

¹⁸"Ghar'raho Mawu sidutu ringang-Ku,
ana waugu Itou suete namile Sia'u iapapasingkattu
Watti'u Alaluassa su taumata asiangnga.

Itou nandolo-U iapawatti'a
pamamallossa su taumata n ruumanna
wu'ru aaule su taumata wuta;
wu'ru ipamallossu taumata allangnga



Lufunnu wuke (4:17)

¹⁹ wuṛru mamasingkattu orassu daranta Mawu manalamatta pabbawala-Ge."

²⁰Mawu Yesus nallufunna apia wuke udde, niwelengke su manarane, see inuma'ianna. Anambo n taumata sulaḷummu waḷe m pattataṛramawuanna udde na'ellega Sitou. ²¹Wuṛru Mawu Yesus nannattakke nabbisara simangitou ereindi, "Manga wageangngu laḷorṛo n Wuke Susi su allo indi natipusse su tempo iamiu naaringikka watti'a udde."

²²Manga wisara apan niwisara-Ne mapia atonna, na'oma n sara imangitou naherangnga wuṛru lapiddu nanamba'a Sitou. Imangitou nabbisara, "Waḷinewe Itou indi ana'i Yusuf?"

²³Ne Mawu Yesus nabbisara simangitou, "Atonna iamiu sarun map-paattu sasumandingnga indi Sia'u, 'Doktere, paapia'a ririnu sassane. Aḷaṛṛindu'a apan niṛringiṛṛanni ami niolang-Ngu su Kapernaum, ola'a lai su ampungngu sassane.'" ²⁴Mawu Yesus nanassu wisara-Ne, "Paa-naunge, tawe nabi apan aaddatanna su ampungnge sassane. ²⁵Arawe daringiṛṛe: su tempo n Elia, su tempo tawe manguranna tallu tonna anummu wuḷanna aḷannune, nariaddi aḷaṛṛutumma apan wahewa su aḷawo'u wanua. Su tempo udde manambo wawine waḷu su Israel. ²⁶Salaiwe aroddi, Mawu Ruata tawe nandolokki Elia su wallattu sangkatou wawine waḷu isudde, ewe'e tumba'u su sangkatou wawine waḷu su Sarfat su leta'u Sidon. ²⁷Aroddi lai su tempo Nabi Elisa manambo taumata su Israel pia radangnge paro maata'utta, arawe tawe sangkatou wuassi mangitou niapaapia, tumba'u Naaman taumata n Siria udde."

²⁸Anambo n taumata su waḷe m pattataṛramawuanna udde mangke nasa'u naaringikka watti'a udde. ²⁹Imangitou dirumarisikka see nallim-

buakka Mawu Yesus watukku liuddu soa, wuɽɽu niapidɗa su wowo n rampissa, su tampa udde soa mangitou niapaarisikka. Imangitou pia pandumma manuɽɽudu Mawu Yesus su rampissa. ³⁰Arawe Mawu Yesus nilumusi'a su tangnga n taumata nambo udde wuɽɽu napuɽe.

Taumata apan niasuttannu ghaɽɽaho laɽeo

(Mrk. 1:21-28)

³¹Wua udde Mawu Yesus inaita su soa Kapernaum su Galileea. Poiaroddi Itou mangngaɽɽa'a manga taumata su allo n Sabbatta. ³²Imangitou naherangnga naasilo olangnge Itou mangngaɽɽa'a, ana waugu Itou mabbisara pia saɽɽaungnge. ³³Isudde su waɽe m pattataɽɽamawuanna pia sangkatou niasuttannu ghaɽɽaho laɽeo. Taumata udde mangke ma'uaɽe, ³⁴"Ei Mawu Yesus, taumata Nazaret, apa olaannu siami? I'o rumanta mamate siami? Ia'u masiŋgkatta isai I'o: I'o raloɽoɽɽannu Mawu Ruata apan susi!"

³⁵"Paalannaba!" Mawu Yesus nandona ghaɽɽaho laɽeo udde, "Sab-bangke wuassu taumata indi!" See ghaɽɽaho laɽeo udde namantingu taumata udde su saruanni mangitou sarangkanambone wuɽɽu wua udde sinumabangnga wuassu taumata udde ringannu tate napaaradange.

³⁶Awadaalla naherangnga, wuɽɽu uahahattote sangkatou ringannu sangkatou, "Waɽine hampa alaɽo'u wisara-Ne. Ringannu saɽɽaungnga wuɽɽu taɽɽino, Itou namarenta manga ghaɽɽaho laɽeo niapaasabangnga wuɽɽu imangitou sinumabangke lai!" ³⁷Ne watti'a su ola'u Mawu Yesus tinumelengke su ahewallu wanua su wageangnge udde.

Mawu Yesus napaapia n taumata manambo

(Mat. 8:14-17; Mrk. 1:29-34)

³⁸Mawu Yesus nanantangke m waɽe m pattataɽɽamawuanna udde, see inaita su waɽe n Simon. La'iananni Simon marada'a saɽihamma, wuɽɽu manga taumata nabbati'u olangnge udde su Mawu Yesus. ³⁹Mawu Yesus inaita nattuda n lallowanganne, see nallimbuakka saɽihamma udde. Saɽihamma udde nawuɽi, wuɽɽu la'iananni Simon lapi-ddu nabangunna wuɽɽu nangimbe simangitou.

⁴⁰Napawe matannallo mattuppe, manambo taumata nangapiddu manga tuɽɽrangŋi mangitou apan uatataɽɽangnga alaɽo'u hati n rada'a ringannu Mawu Yesus. Mawu Yesus namita simangitou sangkatou-sangkatou wuɽɽu napaapia mangitou. ⁴¹Manga ghaɽɽaho laɽeo udde

sinumabangke wuassu taumata nambo udde lapiddu mangngintuli, "Ete I'o Ana'u Mawu Ruata!"

Arawe Mawu Yesu namulo simangitou wurru naningaddi mangitou mabbisara, ana waugu imangitou masingkatta manungku ete Itou Ratu m Punnu Salamatta.

Mawu Yesu nannase sulaḷummu manga waḷe m Pattataḷḷamawuanna

(*Mrk. 1:35-39*)

⁴²Su tempo matannallo sussabangke, Mawu Yesu nanantangke n soa udde see inaita su sambau tampa apan maḷannaba. Manga taumata maddea'a Sitou, wurru napawe imangitou nassomba Mawu Yesu, imangitou mangke mappandumma tadea'u Itou tawe manantanggi mangitou. ⁴³Arawe Mawu Yesu nabbisara, "Watti'u Aḷaḷuassa su ola'u ereapa Mawu Ruata mamarenta sarun Ta'u iwatti'a lai su manga soa waine, ana waugu Mawu Ruata nandolo-U su runia."

⁴⁴Ana waugu udde Mawu Yesu nannase sulaḷummu waḷe m pattataḷḷamawuanna su ahewallu leta'u Yudea.


Mawu Yesu namile manga mallalaḷḷenggen-Ne apan paarorone

(*Mat. 4:18-22; Mrk. 1:16-20*)

5 Su sambau tempo Mawu Yesu uarisikka su winggi n Rano Gene-saret. Manambo taumata uasaseppe'a maddaringikka watti'u Mawu Ruata. ²Mawu Yesu naasilo saalanna rua ngassa su apanne udde; manga samakka nilumintukke wuassu saalanna udde wurru lapiddu mangngukkassa soma mangitou. ³Mawu Yesu sinuma'e su saalanna sangngassa, eteudde saalanni Simon, see nandolokki Simon manondo n saalanne udde marau adio'a wuassu apanne. Mawu Yesu inuma'ianna su saalanna udde wurru mangngaḷḷa'e taumata nambo.

⁴Napawe suete nangaḷḷa'a, Itou nabbisara si Simon, "Pundaḷa'e watukku aḷaḷumanne, wurru pallosa'e somanu panameta'a inassa."

⁵"Imangnga Huru," sasimbakki Simon, "su aḷo'engngu ḷabbi iami mammanara maḷḷimadda, arawe tawe naahau saran sambua! Arawe ana waugu Imangnga nandolokka, aroddite; ia'u sarun mallombo n soma apia." ⁶Napawe imangitou suete namallossu soma udde, imangitou naahau inassa aroddi anambone na'oma n sara soma mangitou nahahesa'e. ⁷Ana waugu udde imangitou naituḷungnga su manga hawene su saa-



lanna waine. Manga hawe mangitou nirumanta see imangitou su sambau nallooro saalanna rua ngassa udde napene n inassa na'oma n sara manga saalanna udde maranite n lumakkuba. ⁸Napawe Simon naasilo olangnge udde, itou inumalintuda su saruannu Mawu Yesus, see nabbisara, "Tanganga'e ia'u, Mawu! ana waugu ia'u taumata marosa!"

⁹Simon wufru anambo n taumata ringanni tou naherangnga naasilo inassa manambo apan niahauanni mangitou udde. ¹⁰Aroddi lai ringannu mianga hawe n Simon, eteudde Yakobus wufru Yohanes, alarana'i Zebedeus. Mawu Yesus nabbisara si Simon, "Arie paata'utta! Manattakka orassa indi i'o sarun maola'a mananoma taumata."

¹¹Simon wufru manga hawene namolengke saalanna rua ngassa udde su apanne, wua udde nanantangke n sarangkanambone udde, see nallarenggente Mawu Yesus.

Mawu Yesus napaapia n sangkatou pia radangnge paro apan maarrantinna

(Mat. 8:1-4; Mrk. 1:40-45)

¹²Su sambau allo, Mawu Yesus uatana'a su sambau soa. Poiaroddi pia sangkatou esakka wadangnge napene n radangnge paro apan maarrantinna. Napawe itou naasilo Mawu Yesus, itou inumalintuda su saruan-Ne lapiddu sinumalande, "Iamangnga, amungkangngu Iamangnga maapulu, Iamangnga wotongnge mapaapia'u!"

¹³Mawu Yesus namita taumata udde lapiddu nabbisara, "Ia'u maapululu, apiate!" Orassa udde lai radangnge nawuŋi. ¹⁴See Mawu Yesus nangingaddu taumata udde mabatti'u olangnge udde su manga taumata, tanatane, "Roote ringannu imam, wuŋŋu padorongnga sitou manantunna manungku i'o napiate. See roote pangagillu sasamba ere suete nirolokki Musa, maola'a pananaunganna su taumata manungku i'o atonna-tonna napiate."

¹⁵Arawe watti'a su ola'u Mawu Yesus nadingikke su alaŋo'u tampa, wuŋŋu manambo taumata nirumanta madaringikka wuŋŋu maapululu ia-paapia wuassu rada'i mangitou. ¹⁶Wua udde Mawu Yesus inaite inumaliomanna su tampa apan maŋannaba.

Mawu Yesus napaapia n sangkatou lome

(Mat. 9:1-8; Mrk. 2:1-12)

¹⁷Su sambau allo, tantaŋanna Mawu Yesus mangngaŋa'a, pia manga pira ng katou taumata n Farisi wuŋŋu manga huru n agama ua'ianna isudde. Imangitou nirumanta wuassu Yerusalem, wuŋŋu wuassu manga soa su leta'u Galilea wuŋŋu Yudea. Taffino Mawu Ruata uarŋundinganna Mawu Yesus mapaapia n taumata marada'a. ¹⁸Su tempo udde manga pira ng katou nirumanta uaapiddu sangkatou lome ualallowangnga su wilatta. Imangitou suapa n wotongnge mangapiddu taumata udde sulaŋummu waŋe tadea'u itou wotongnge iaddo su saruannu Mawu Yesus. ¹⁹Arawe ana waugu tumanite n manambo taumata isudde, imangitou tawe naa'apididi tou sinumutta. Ana waugu udde imangitou nangawittu taumata udde su atuppu waŋe. See imangitou nalla'ete atuppa, wuŋŋu nanguŋukku taumata udde ringannu wilanne su saruannu Mawu Yesus su pattangngannu taumata nambo udde. ²⁰Su tempo Mawu Yesus naasilo aroddi ahewalle pangangimanni tou, Itou nabbisara taumata udde, "Tuŋrangnga, rosanu suete niampunganna."

²¹Manga huru n agama wuŋŋu manga taumata n Farisi mannattakke uahahatto sangkatou ringannu sangkatou, "Isai taumata indi apan warŋani mangngadio'a Mawu Ruata? Isai wotongnge mangainpungnga rosa, su liuddu Mawu Ruata sassane?"

²²Mawu Yesus naasingkatta aiwaŋo mangitou. Nariaddi Itou nabbisara, "Anio iamiu ma'iwaŋo aroddi sulaŋummu naungngu? ²³Suapa mappianne mabbisara, 'Rosanu suete niampunganna', ara'e mabbisara, 'Pabbangunte wuŋŋu amatte!?' ²⁴Arawe orassa indi Ia'u sarun mapaaŋiatta'a siamiu manungku su wowo n runia indi Ana'u Taumata pia taffinone mangampungnga rosa." See Mawu Yesus nabbisara taumata lome udde, "Pabbangunte, apira'e lallowangannu, wuŋŋu apuŋete!"

²⁵Maŋiha-ŋihakka taumata udde nabangunna su saruanni mangitou sarangkanambone, see namasanna lallowanganne, wuŋŋu napuŋe lapiddu maddalo Mawu Ruata.

²⁶Imangitou sarangkanambone naherangnga atonna see imangitou nadalote Mawu Ruata. Wuŋŋu ringannu apendamma matta'utta, imangitou mabbisara, "Maarŋindu'a atonna arariaddianna apan niasiloanni ite su allo indi!"

Mawu Yesus namaggo si Lewi

(Mat. 9:9-13; Mrk. 2:13-17)

²⁷Wua udde Mawu Yesus sinumabbangke wuŋŋu naasilo sangkatou madarorongnga wose, aranne Lewi, tantaŋanna ua'ianna su tampa n pammanaranne. Mawu Yesus nabbisara sitou, "Paŋrundingante Sia'u."

²⁸Lewi dirumarisikka wuŋŋu nanantangngu sarangkanambone, see nirumandingante Mawu Yesus.

²⁹Wua udde Lewi na'ola'e andeangnga su waŋene huna Mawu Yesus. Manambo madarorongnga wose wuŋŋu manga taumata waine lai inumanna su sampunna ringanni mangitou. ³⁰Sire pira taumata n Farisi wuŋŋu manga huru n agama pia apendamma tawe maŋuassa, see nabbisara su mallalaŋrenggennu Mawu Yesus, "Anio iamiu sarangkanambone u'anna ma'inumma su sampunna ringannu madarorongnga wose wuŋŋu manga taumata laŋeo?"

³¹Mawu Yesus sinumimbakka, "Taumata apan tawe marada'a tawe mappandumma doktere, tumba'u taumata mangkarada'a. ³²Ia'u nirumanta waŋine mamago manga taumata apan uapendamma ririne mapiate, ewe'e taumata apan marosa tadea'u imangitou mawaŋu wuassu paddarosa mangitou."

Pattatatiakka su ola'u puasa

(Mat. 9:14-17; Mrk. 2:18-22)

³³Manga taumata nabbisara Mawu Yesus, "Mallalaŋrenggenni Yohanes wuŋŋu mallalaŋrenggennu taumata n Farisi masokka mapuasa wuŋŋu u'aŋiomanna. Arawe mallalaŋrenggennu u'anna wuŋŋu ma'inumma."

³⁴Mawu Yesus sinumimbakka, "Iamiu wotongnge mandolokku manga raho mappuasa su andeangngu awingnga, tantaŋanna maa'awingnga esakka ta'e su sampunna ringanni mangitou? Natantunna tawe!"

³⁵Arawe sarun a'omanna tempone maa'awingnga esakka udde ałapanna wua dinganni mangitou. Su tempo udde imangitou mappuasate."

³⁶See Mawu Yesus nabatti'e simangitou sasumandingnga indi, "Tawe taumata mandapella laubba tabbe rappelannu piřrissu małarřenessu laubba wakku. Ana waugu itou sarun manggesa'a laubba wakku udde. Wuřru lai małarřenessa rarapela wakku udde tawe mappare n laubba tabbe. ³⁷Aroddi lai tawe taumata mandalinnu anggore wakku sulałummu pato'a pisi apan tabbe, ana waugu anggore wakku udde sarun mame-sangnga pato'a tabbe udde. Ne anggore udde mabbosote, wuřru tampane mahohakke. ³⁸Anggore apan wakku sarun ilałinna su tampane apan wakku lai. ³⁹Aroddi lai tawe taumata maapululu ma'inumma anggore wakku napawe itou suete na'inumma anggore tabbe. 'Anggore tabbe udde mattemanganna,' wisara-Ne."

Aiwało su ola'u allo n Sabatta

(Mat. 12:1-8; Mrk. 2:23-28)

6 Su sambau allo n Sabatta, su tempo Mawu Yesus sinumabbi sambau waillu gandumma, mallałarřenngen-Ne nangitingnga gandumma. Imangitou nangusu gandumma udde ringannu limane, see nianna. ²Sire pira taumata n Farisi nabbisara, "Anio iamiu lullawangnga manga Tita n agama ng kite ringannu ma'ola'a apa isassingadda su allo n Sabatta?"

³Mawu Yesus sinumimbakka, "Iamiu taambe naawasa su ola'u apa a'olaanni Daud, su tempo itou wuřru manga taumatane małunussa? ⁴Itou sinumutta sulałummu Wałe Mawu wuřru nanganu roti apan suete tinantilla su Mawu Ruata, see nianna. Wua udde roti nianggilla lai su manga taumatane. Sumbalı tumuřruttu Tita n agama ng kite, tumba'u manga imam sassane wotongnge umanna roti udde."

⁵See Mawu Yesus nabbisara, "Ana'u Taumata uatařrino allo n Sabatta!"

Taumata limane lome samba'a

(Mat. 12:9-14; Mrk. 3:1-6)

⁶Su sambau allo n Sabatta apan waine, Mawu Yesus inaite nangarra'a su wałe m pattatařramawuanna. Isudde pia taumata limane lome samba'a. ⁷Sire pira huru n agama wuřru taumata n Farisi madda'a pasasala Mawu Yesus tadea'u wotongnge Itou ialae. Nariaddi imangitou sidutu mannutukka tanne Itou mapaapia n taumata su allo n Sabatta. ⁸Arawe Mawu Yesus naasingkatta řingirřanni mangitou. Ne

Itou nabbisarate su taumata limane lome samba'a udde, "Wette dari-sikke isindi su saruane!" Taumata udde nabangunte, see dirumarisikke isudde. ⁹Wua udde Mawu Yesus naiwało su manga taumata isudde, "Tumurruttu agama, iite wotongnge mammanara apa su allo n Sabatta? Ma'ola'a apapia ara'e ma'ola'a alaleo? Mandalukka taumata ara'e manilaka?" ¹⁰Mawu Yesus na'ellega uapaliwutta simangitou sarangkanam-bone, see nabbisara taumata udde, "Uluurra'e limanu." Taumata udde nangulukke n limane, see limane udde napiate.

¹¹Arawe manga huru n agama wurru manga taumata n Farisi udde nasa'u atonna, wurru nanattakke ma'ire su ola'u apa apan wotongnge olaanni mangitou su Mawu Yesus.

Mawu Yesus namile sire mapulo dua rasul

(Mat. 10:1-4; Mrk. 3:13-19)

¹²Su tempo udde Mawu Yesus sinuma'ate su sambau wuidda ana see inumaliomanna. Isudde Itou inumaliomanna su Mawu Ruata su alo'engngu rabbi. ¹³Napawe allote, Itou namagote mallalarrenggen-Ne, see namilete sire mapulo dua su atoune wuassu wallatti mangitou. Itou nanago n sire mapulo dua su atoune udde rasul. Imangitou eteudde: ¹⁴Simon (isassago lai Petrus), wurru Andreas turrangngi Simon; Yakobus wurru Yohanes, Filipus wurru Bartolomeus, ¹⁵Matius wurru Tomas, Yakobus ana'i Alfeus, wurru Simon (isassago lai Patriot). ¹⁶Yudas ana'i Yakobus wurru Yudas Iskariot apan salimmurine naola'a mandalaleo.

Mawu Yesus mangngarra'a wurru mappaapia n taumata

(Mat. 4:23-25)

¹⁷Wua udde Mawu Yesus sinumossokke wuassu wuidda su sam-punna ringannu manga rasul udde, see nattaalla wurru dirumarisikka su sambau tampa ratakke. Isudde pia lai sambau ammulannu manga mallalarrenggenna waine wurru manambo lai taumata rudanta wuassu anambo n tampa su ahewallu leta'u Yudea, Yerusalem, wurru manga soa n Tirus wurru Sidon su winggi n tahaolangnga. ¹⁸Imangitou niru-manta madaringikka Mawu Yesus, wurru see iapaapia wuassu manga rada'i mangitou. Imangitou apan niasuttannu gharraho laleo nirumanta lai see niapaapia. ¹⁹Anambo n taumata maddea'a suapa n wotongnge maaggassa Mawu Yesus, ana waugu pia tarino sussabangnga wuassu wadangnge apan maapia simangitou sarangkanambone.

Aļaļuassa wuŗru asasusa

(Mat. 5:1-12)

²⁰Mawu Yesus nanutudda mallalaŗrenggen-Ne see nabbisara,

"Laļumanna'a iamiu manga taumata asiangnga,
ana waugu ete iamiu udde laļorŗo n araratuannu Mawu Ruata!

²¹Laļumanna'a iamiu apan maļunussa orassa indi;
iamiu sarun iapaalaidda!

Laļumanna'a iamiu apan lulluai orassa indi;
iamiu sarun lumagge!

²²Laļumanna'a iamiu amungkangngu iaarantinna, iaadiri, aadio'anna
wuŗru haļaļausaanna ana waugu Ana'u Taumata! ²³Manga nabi su tempo
rorone a'olaanna lai aroddi. Amungkangngu olangnge udde mariaddi,
ŗinone iamiu lulluassa wuŗru massaļaingnga ringannu lullala'a ana
waugu wahewa laļantakke siamiu apan suete nissaddia su surga.

²⁴Arawe nasilakate iamiu taumata ala su orassa indi;
ana waugu iamiu naappendampe aļaļuassa!

²⁵Nasilakate iamiu apan maļaida orassa indi;
ana waugu iamiu sarun amaļunusanna!

Nasilakate iamiu apan lullage orassa indi;
ana waugu iamiu sarun masusa wuŗru lumuai!

²⁶Nasilakate iamiu, amungkangngu anambo n taumata maddalo
siamiu; ana waugu aroddi lai iupungnga aļamona mangitou maddalo
manga nabi awusu su tempo rorone."

Aakkanna su seetta

(Mat. 5:38-48, 7:12a)

²⁷"Arawe iamiu apan madaringikka Sia'u orassa indi, Ia'u manna-
nata ereindi: akkana'a manga seennu, wuŗru pa'ola'a pallaļagu mapia
su taumata apan maddantinnu. ²⁸Aļamate taumata apan mammontoga
siamiu, wuŗru aļiomaana'a taumata apan laļeo siamiu. ²⁹Amungkangngu
taumata mamero wambalanu samba'a, wala'a lai itou mamero wamba-
lanu samba'a. Amungkangngu jubahnu aŗŗoanna, anggiļa'a lai laungngu.
³⁰Amungkangngu taumata madorongnga sarannapa siamiu, anggiļa'a lai
udde sitou; wuŗru amungkangngu darotongngu aŗŗoanna, arie padoronge
apia. ³¹Ola'a su taumata waine ere lai iamiu maapulu olaanni mangitou
mapia.

³²Amungkangngu iamiu tumba'u u'akkannu manga taumata apan
mandangngu siamiu, apa aļamannu? Taumata marosa lai u'akkannu

manga taumata apan mandangngu simangitou! ³³Wurru amungkangngu iamiu pia pallalagu mapia su taumata apan mapia siamiu, apa alamannu? Taumata marosa lai ma'ola'a aroddi! ³⁴Wurru amungkangngu iamiu tumba'u mapawallassu roitta su taumata apan wotongnge maawelengngu roitta udde, apa alamanne siamiu? Taumata marosa lai mapaawallassu roitta su taumata marosa, see doronganna apia roitta udde. ³⁵Rinone waline aroddi! Ewe'e iamiu rinone umakkannu seetti amiu wurru pia pallalagu mapia simangitou. Iamiu rinone mapawallassa wurru arie mangantimma mawelengnga apia. Amungkangngu aroddi, lalantakku wahewa wurru iamiu sarun maola'a alaranna'u Mawu Ruata Apan Atanggaranne. Ana waugu Mawu Ruata naungnge mapia su saruannu taumata apan waga maaidengkamanna, wurru su saruannu taumata laleo lai. ³⁶Rinone iamiu uararangngu ere lamangngu lai mandangngu siamiu!"

Marruungngu taumata

(Mat. 7:1-5)

³⁷"Imbarangnga marruungngu taumata waine, tadea'u iamiu lai sassane tawe irruungngu Mawu Ruata. Imbarangnga marruumannu taumata waine, tadea'u iamiu sassane tawe irruumannu Mawu Ruata. Ampungete taumata waine, tadea'u Mawu Ruata lai mangampungnga siamiu. ³⁸Pangonggolla su taumata waine, tadea'u Mawu Ruata lai mangonggolla siamiu; iamiu sarun manengkamma aonggolla nangillembo apan suete niuukka masada-sadatta maola'a wageangngu. Ana waugu auuranna apan ipanguukki amiu su taumata waine sarun ipanguukku Mawu Ruata lai siamiu."

³⁹Wua udde Mawu Yesus nabatti'u sasumandingnga simangitou ere indi, "Amungkangngu taumata wuta mangehetta taumata wuta waine, itarua sarun manawo sulaummu lorrangnga. ⁴⁰Tawe ana'a si'ola nangillembo wuassu hurune. Arawe ana'a si'ola apan nasuete si'olane, sarun maola'a lai massulungngu hurune.

⁴¹Anio iamiu maasilo alu adio'a sulaummu mata n turrangngu, arawe salaba'u su matanu sassane tawe asiloannu? ⁴²Ereapa iamiu wotongnge mabbisara turrangngu, 'Wette turrangnga, ia'u mapasabangngu alu adio'a su matanu,' arawe sulaummu matanu sassane pia salaba'u apan tawe asiloannu? Ei lilangkama'e! Pasabanga'e rorone salaba'u su matanu sassane, wakkute udde iamiu wotongnge maasilo ringannu masemakka wurru wotongnge mapasabangngu alu adio'a wuassu mata n turrangngu."

Alu wuṛṛu manga wuane

(Mat. 7:16-20, 12:33-35)

⁴³"Aaluanna apan masuwukka tawe mabua wua laḷeo. Aroddi lai alu marṛissita tawe mabua wua mapia. ⁴⁴Aḷawo'u alu aaillaḷanna wuassu wuane. Manga ahuranganna ṛoaanna tawe mabua wua n ara, wuṛṛu manga ahuranganna ṛoaanna tawe mabua wua n anggore. ⁴⁵Taumata mapia mapasabangngu pallalagu mapia ana waugu naungnge napene n apapia. Taumata pallalagune laḷeo mapasabangngu inolaanne laḷeo ana waugu naungnge napene n aḷaḷeo. Ana waugu apa apan suete niwisara moṛṛongnga udde sinabanganne wuassu naungnga."

Maaola'a waḷe apan pande wuṛṛu maaola'a waḷe apan woddo

(Mat. 7:24-27)

⁴⁶"Anio iamiu mammago Sia'u, 'Mawu, Mawu,' arawe tawe tumuṛṛutta apa iwabbisara-U siamiu? ⁴⁷Ringanni sai iite wotongnge mannuḷungngu taumata apan rudanta ringang-Ku, wuṛṛu madaringikka wisara-U, see tumuṛṛutta parenta udde? – mappianne Ia'u manantiro siamiu – . ⁴⁸Itou ere taumata apan napawe mapararisikku waḷe naaḷi malaḷu-laḷumma, see na'ola'a rapappake wuassu watu. Su tempo nammanawangnga wuṛṛu ua'e n saḷukka nangelekka su waḷe udde, waḷe udde tawe naholle, ana waugu suete niapararisikka su wowo n rapappake apan matohassa. ⁴⁹Arawe taumata apan maddaringikka wisara-U wuṛṛu tawe tumuṛṛutta, udde ere sangkatou apan napararisikku waḷe tawe rapappake. Napawe nammanawangnga, waḷe udde maḷiha-ḷihakka marṛa'a; wuṛṛu ahahohakke wahewalla atonna!"

Mawu Yesus napaapia n allangngu sangkatou tembonannu tantara n Roma

(Mat. 8:5-13)

7 Napawe suete nabbatu'a aḷaṛṛa'a udde su taumata nambo, Mawu Yesus inaitu su Kapernaum. ²Isudde pia tembonannu tantara n Roma pia allangnge apan arangnguanne. Allangnga udde marada'a wuṛṛu maranite mate. ³Napawe tembonannu tantara udde naaringikka ola'u Mawu Yesus, itou nandolokku manga pira tembonannu taumata n Yahudi inai ringannu Mawu Yesus madorongnga tadea'u Itou rumanta

wurru mapaapia n allangnge. ⁴Napawe na'omate ringannu Mawu Yesu, imangitou mangke sussaḷande tadea'u Itou mantulungngu tembonanne udde. "Tebonanne udde rinone itulunggi lamangnga," unni mangitou su Mawu Yesu, ⁵"ana waugu itou marangngu pabbawalagi ite wurru suete napararisikku waḷe m pattataḥḥamawuanni ami."

⁶Ne Mawu Yesu inaita su sampunna ringanni mangitou. Napawe Mawu Yesu maranite ma'oma su waḷe udde, tembonannu tantara udde nandolokku manga hawene iapaawaḷo, "Ariete lamangnga matingkasa-hadda madumatingngu waḷe'u. Ia'u tawe rinone manarimmattu lamangnga su waḷe'u. ⁷Ana waugu udde ia'u sassane tawe waḥḥani sumaruanna su lamangnga. Nariaddi pangagile m parenta tadea'u mangangimbe'u mapia. ⁸Ana waugu ia'u lai tuttuḥḥutta parenta n tembonanku wurru wuassia'u lai pia tantara pangkanne mabbawoanna apan tuttuḥḥutta parenta'u. Amungkangngu ia'u mandolokku sangkatou, 'Inaita!' itou sarun inai; wurru amungkangngu ia'u mamago lai waine, 'Wette isindi!' itou lai sarun rumanta. Wurru amungkangngu ia'u mamarenta allangku, 'Ola'a indi!' itou sarun tumuḥḥutta ma'ola'a udde."

⁹Mawu Yesu naḥḥangnga naaringikka aroddi. Itou nanaile wurru nabbisara taumata nambo apan tantaḷanna ualaḥḥenggena Sitou, "Waḥḥine hampa taumata indi. Su wallattu taumata n Israel, Ia'u taambe saran paassa naasomba pangangimanna ahewalle ereindi!"

¹⁰Napawe manga taumata apan nirolokka udde nabelengke su waḷe n tembonanne udde, allangnge napiate.

Mawu Yesu napaawiakka apia ana'u sangkatou wawine waḷu

¹¹Tawe naḷannu wua udde, Mawu Yesu inaita su soa Nain. Mal-laḥḥenggen-Ne wurru taumata nambo inaita lai su sampunna ringanni Tou. ¹²Su tempo Mawu Yesu na'omate marani ngara sasuttanna su soa udde, pia taumata manambo uapasanna asuangnga watukku liuddu soa. Taumata nate udde ana'a esakka man sambau wuassu sangkatou wawine waḷu. Manambo taumata laḷoḥḥo n soa uaḥḥundingannu inangngene. ¹³Napawe Mawu Yesu naasilo wawine waḷu udde, Itou inumakkannu wawine udde see nabbisara, "Arie palluai Inangnga!" ¹⁴Wua udde Mawu Yesu nangundanite n tampa n asuangnga udde wurru namita. Ne manga mamamasanna nattaalle. Mawu Yesu nabbisara, "Ei umbasanna, Ia'u mabbisara si'o pabbangunna!" ¹⁵Umbasanna apan natete udde, nabangunna inuma'ianna wurru nanattakke uahahatto. Ne tinantille Mawu Yesu su inangngene.

¹⁶Anambo n taumata nata'utta wuṛṛu nanattakke maddalo Mawu Ruata. Imangitou mabbisara, "Sangkatou nabi apan wahewa suete nirumanta su wallatti ite! Mawu Ruata nirumantate manalamatta pabbawalage!"

¹⁷Watti'a su ola'u Mawu Yesu indi nadingikke su ahewallu leta'u Yudea wuṛṛu su wanua maranine.

Daroḷoṛṛanni Yohanes Mananaṛṛani

(Mat. 11:2-19)

¹⁸Mallaḷaṛṛenggeni Yohanes namasingkatta si Yohanes anambo n arariaddianna udde. Ne Yohanes namagote rua ng katou mallaḷaṛṛenggenne, ¹⁹see nandoloke mangitou inai ringannu Mawu Yesu wuṛṛu niapaiwaḷo, "Ete Iamangnga taumata apan sarun rumanta tumuṛṛuttu paaire Mawu Ruata, ara'e iami maṛṛado sangkatou waine lai?"

²⁰Rua ng katou mallaḷaṛṛenggeni Yohanes inaita ringannu Mawu Yesu wuṛṛu nabbisara, "Yohanes Mananaṛṛani nandolokki ami iapaiwaḷo su Iamangnga, tanne ete Iamangnga taumata apan sarun rumanta tumuṛṛuttu paaire Mawu Ruata, ara'e ṛinone iami maṛṛado taumata waine?"

²¹Su tempo udde, Mawu Yesu napaapia n taumata nambo, wuṛṛu nallimbuakka anambo n ghaṛṛaho laḷeo see na'ola'a taumata wuta naasilo. ²²Nariaddi Mawu Yesu sinumimbakka, "Pabelengke ringanni Yohanes wuṛṛu waḷoa'a apa apan suete niaringiṛṛanna wuṛṛu niasiloanni amiu: taumata wuta naasilo, taumata lome inumamatta, taumata radangnge paro napia, taumata wengella naaringikka, taumata nate nabbiakka apia, wuṛṛu Watti'u Alaḷuassa wuassu Mawu Ruata niapaasingkatta su taumata asiangnga. ²³Laḷumanna'a su taumata apan tawe pinangiananne ipanoḷa-U."

²⁴Napawe raloḷoṛṛanni Yohanes udde napuḷete, Mawu Yesu nantakke nabbisara su taumata nambo udde su ola'i Yohanes, wisara-Ne, "Iamiu inai su wadda'a ma'ellega apa? Sangkuḷappa nannaḷo itatalla'u anginna? ²⁵Iamiu inai ma'ellega apa? Sangkatou apan uapedetta maṛṛamaga? Manga taumata apan uapedetta aroddi wuṛṛu wiakke lembo mapia uatana'a su tampa n araratuanna! ²⁶Nariaddi, iamiu sumabangnga ma'ellega apa? Ma'ellega sangkatou nabi? Atonna, ewe'e nangillembu lai wuassu sangkatou nabi. ²⁷Ana wangu Yohanes udde niapaasingkatta su wageanggu Wuke Susi ereindi,

'Ete indi raloḷoṛṛang-Ku,' wisara Mawu Ruata,

'Ia'u mandolokki tou malliu ṛoro wuas-Si'o, tadea'u itou mamu'a laḷanna amatan-Nu!"

²⁸"Paanaunge," unnu Mawu Yesus, "su runia indi taambe saran sangkatou taumata maggewaḷanna wuassi Yohanes Mananaḗrani. Arawe tau-mata apan adio'anne su wallattu aḷaḗrana'u Mawu Ruata, magewaḷanna wuassi Yohanes Mananaḗrani."

²⁹Anambo n taumata – nasutta madarorongnga wose – naaringikka Mawu Yesus mabatti'u olangnge udde; ete imangitou manga taumata apan suete tinumuḗrutta aḷawo'u apulu Mawu Ruata wuḗru maapulu saḗranianni Yohanes. ³⁰Arawe manga taumata n Farisi wuḗru manga huru n agama maddiri manengkamma ḗinnu Mawu Ruata su wadangngi mangitou. Imangitou maddiri saḗranianni Yohanes.

³¹See Mawu Yesus nabbisarate apia, wisara-Ne, "Ringannu apa Ia'u manumandingngu taumata su tempo indi? Massuḷungngu apa imangitou? ³²Imangitou ere aḷaḗrana'a ua'ianna su pasakka; ammuḷanna sambau mabbisara ammuḷanna waine. 'Iami mangngantari n aantari n laḷuassa siamiu, arawe iamiu maddiri massaḷaingnga! Iami mangan-tari aantari n tatampungnga, arawe iamiu maddiri lumuai!' ³³Yohanes Mananaḗrani nirumanta – itou mappuasa wuḗru tawe ma'inumma ang-gore – wuḗru iamiu mabbisara, 'Itou niasuttannu setanna!' ³⁴Ana'u Tau-mata nirumanta – Itou u'anna wuḗru ma'inumma – see iamiu mabbi-sara, 'Pa'ellega taumata udde! Waḷiu, taḗra wu'anna, hawe madarorong-ga wose wuḗru hawe n taumata marosa.' ³⁵Salaiwe aroddi, apapande Mawu Ruata niatialanna su tangnga n taumata nambo apan nanarim-matti Tou."

Mawu Yesus su waḷe n Simon

³⁶Sangkatou taumata n Farisi, aranne Simon, nangahe Mawu Yesus umanna. Mawu Yesus inaite su waḷene wuḗru inuma'ianna see inumante. ³⁷Su soa udde pia lai sangkatou wawine apan mabbiakka su-laḷummu paddarosa. Napawe itou naaringikka manungku Mawu Yesus tantaḷanna u'anna su waḷe taumata n Farisi udde, itou nirumanta uaapi-ddu sambau wotolla wuassi pualam laḷoḗroannu lana mawangngi. ³⁸Itou dirumarisikka su liuddu Mawu Yesus marani n leddane wuḗru nilumuai lapiddu naḗrolo ledda Mawu Yesus ringannu allo matane. Wua udde ledda Mawu Yesus pinedda n utangnge see niari'i tou wuḗru niwok-kannu lana mawangngi. ³⁹Napawe taumata n Farisi apan nangahe Mawu Yesus naasilo olangnge udde, itou nabbisara sulaḷummu naungnga, "Iraḗrangngo taumata indi sangkatou nabi, Itou masingkatta isai wawine apan nangindingnga Sitou, wuḗru manungku wawine udde mabbiakka su-laḷummu paddarosa!"

⁴⁰See Mawu Yesus nabbisara si Simon, "Simon, pia sambau Ta'u iwaŋo si'o."

"Ore, Iamangnga Huru," sasimbakki Simon, "Waŋoa'e."

⁴¹Mawu Yesus nabbisara, "Pia rua ng katou apan pia utangnge su taumata apan mappawallassu roitta. Sangkatou pia utangnge lima rasutta roitta saŋa'a, wuŋru sangkatou lai lima m puŋo roitta saŋa'a. ⁴²Itarua tawe maawaekka utangnga udde, ana waugu udde utangngi tarua tate niapawaekka. Ne, isai su wallatti tarua lembo marangngu taumata apan napawallassu roitta udde?"

⁴³"Ia'u marangngo taumata apan utangnge anamboanne apan tawe niapawaekka!" sasimbakki Simon.

"Asingkannu narŋino," sasimbakku Mawu Yesus. ⁴⁴See Mawu Yesus na'ellega wawine udde wuŋru nabbisara si Simon, "To naasilo wawine indi? Ia'u nirumanta su waŋenu, arawe i'o tawe nanaddia ua'e ipangukkassa ledda-U; arawe wawine indi suete nangukkassa ledda-U ringannu allo matane, wuŋru nipedda n utangnge. ⁴⁵I'o tawe nanaŋoho Sia'u ringannu aari'a, arawe wawine indi tawe illoŋone mangngari'a ledda-U nanattakka Ia'u naranta isindi. ⁴⁶To tawe nandaŋinnu lana su pua-U, arawe wawine indi suete nandaŋinnu lana mawangngi su ledda-U. ⁴⁷Atonna: darangngune apan wahewa udde napaalŋatta'a manungku rosane apan manambo udde suete niampunganna! Amungkangngu taumata ongoŋannu aampungnga matuŋlungnga, matuŋlungnga lai itou mandangngu."

⁴⁸See Mawu Yesus nabbisara wawine udde, "Manga rosanu suete niampunganna."

⁴⁹Manga taumata waine apan ua'ianna u'anna su sampunna ringannu Mawu Yesus mannattakke uahahatto sangkatou ringannu waine, "Isai taumata indi na'oma n sara Itou wotongnge mangampungnga rosa?"

⁵⁰Arawe Mawu Yesus nabbisara wawine udde, "Ana waugu i'o mangngimanna Sia'u, i'o sarun masaŋamatta. Roote ringannu padarame!"

Manga wawine apan nallaŋima Mawu Yesus

8 Tawe naŋannu wua udde, Mawu Yesus inaita su manga soa wuŋru manga ampungnga, ana mamasingkattu Watti'u Aŋaŋuassa manungku Mawu Ruata manattakke mamarenta ere sangkatou Ratu. Sire mapuŋo dua mallalaŋrenggen-Ne uatantalongnga su sampunna ringanni Tou. ²Aroddi lai sire pira wawine apan suete niapaapia wuassu ghaŋraho laŋeo wuŋru rada'a. Imangitou eteudde Maria apan isassago Magdalena (pitu ghaŋraho laŋeo apan suete niapaasabangnga wuassi tou); ³wuŋru lai Yohana awingngi Khuza, marŋinu n araratuanni Herodes; Susana,

wurru manambo lai wawine waine. Ringannu roitti mangitou sassane, imangitou nallalima Mawu Yesus wurru manga mallaŋarŋenggen-Ne.

Sasumandingngu mangangasi'a

(Mat. 13:1-9; Mrk. 4:1-9)

⁴Manga taumata sidutu rudanta ringannu Mawu Yesus wuassu alawo'u soa. Wurru napawe manambote taumata uaammulla, Mawu Yesus nabbatti'a simangitou sasumandingnga ereindi: ⁵"Sangkatou mabawailla inai mangasi'u wualanna. Su tempo itou mangngasi'a, pia bualanna nanawo su laŋanna. Sangkawageanganna nisaŋedanannu taumata wurru waine lai niannu manu'a, ⁶Pia lai nanawo su tampa manambo wature. Su tempo wualanna udde tuttuwote, sinuananna udde tinumolangnga ana waugu letangge mamara. ⁷Pia lai bualanna nanawo su tangnga n ahuranganna roaanna. Ahuranganna roaanna udde tinumuwo su sambau ringannu wualanna udde, wurru nangangkuba na'oma n sara nate. ⁸Arawe pia lai bualanna nanawo su leta'a masuwukka, see tinumuwo wurru nabua paarŋasutta anambone."

Napawe suete nabbati'u sasumandingnga udde, Mawu Yesus nabbi-sara, "Amungkangngu pia taŋinga padaringikka!"

Anio Mawu Yesus mappaattu sasumandingnga

(Mat. 13:10-17; Mrk. 4:10-12)

⁹Manga mallaŋarŋenggennu Mawu Yesus naiwaŋo Sitou atappasannu sasumandingnga udde. ¹⁰Mawu Yesus sinumimbakka, "Iamiu suete nionggolaŋnu alaŋatta tadea'u maasingkatta addapingnga su ola'u ere-apa Mawu Ruata mamarenta ere sangkatou Ratu. Arawe manga taumata waine niaŋraannu sasumandingnga, tadea'u imangitou madaringikka, arawe wagga apa apan mariaddi; wurru imangitou madaringikka, arawe tawe maasunna."

Mawu Yesus nanaŋa'a n sasumandingngu sangkatou mangangasi'a

(Mat. 13:18-23; Mrk. 4:13-20)

¹¹"Ete indi atappasannu sasumandingnga udde: Wualanna eteudde watti'u Mawu Ruata. ¹²Wualanna apan nanawo su laŋanna isassumandingnga su manga taumata apan madaringikka wisara udde. Arawe Se-



Ahuranganna roaanna (8:14)

tanna nirumanta wuṛṛu nangarṛo watti'a udde wuassu naungngi mangitou, tadea'u imangitou tawe mangngimanna wuṛṛu tawe masalamatta. ¹³Wualanna apan nanawo su leta'a pia batune isassumandingnga su taumata napawe naaringikka watti'a udde, nanengkamma ringannu naungnge maḷuassa. Arawe watti'a udde tawe narṛamutta sulaḷummu naungnge. Imangitou mangngimanna taḷa ng kadio'a, wuṛṛu napawe wawono'a nirumanta, imangitou nassinaada. ¹⁴Wualanna apan nanawo su tangnga n ahuranganna roaanna isassumandingnga su taumata madaringikka watti'a udde, arawe sussingawangngu wiakki mangitou wuṛṛu maapulu mabbiakka nasuungnga wuṛṛu maḷuassa sulaḷummu runia indi. Sarangkanambone udde nangumpisanna simangitou na'oma n sara tawe nabua wua apan naḷaha. ¹⁵Wualanna nanawo su leta'a masuwukka isassumandingnga su taumata madaringikka watti'a udde, see sinahipunna sulaḷummu naungnge apan waresi wuṛṛu matuḷida. Imangitou natataṛrangnga na'oma n sara nabua."

Soḷo apan niluwannu wensada

(Mrk. 4:21-25)

¹⁶"Tawe taumata mande'omma soḷo see luuwannu wensada, ara'e iaddo su aḷungngu antilla. Itou sarun mangado n soḷo udde su panganga-doanne, tadea'u taumata apan sumutta maasilo semakke. ¹⁷Tawedu apa

apan uawuni apan tawe asiloanna; wuɾɾu tawedu apa apan iaadappingnga apan tawe sarun massongkakka wuɾɾu asingkatanna.

¹⁸Ana waugu udde paanaungete mapia-pia apa apan niaaringirɾanni amiu. Ana waugu taumata apan uatahuante, sarun onngoɾanna lembo n anamboanne lai; arawe taumata tawedu tatahuananne, adio'a apan ta'e sitou sarun anuanna lai."

Inangnga wuɾɾu manga tuɾɾangngu Mawu Yesus

(Mat. 12:46-50; Mrk. 3:31-35)

¹⁹Inangnga wuɾɾu manga tuɾɾangngu Mawu Yesus nirumanta ringan-Ne, arawe imangitou tawe na'oma ringan-Ne ana waugu taumata tumanite manambo. ²⁰Ne pia sangkatou apan nabbisara su Mawu Yesus, "Iamangnga, inangnga wuɾɾu manga tuɾɾangngi Iamangnga wowa su liudde. Imangitou maapulu maisasomba m Iamangnga."

²¹Arawe Mawu Yesus nabbisara simangitou, "Manga taumata apan madaringikka wisara Mawu Ruata wuɾɾu tuttuɾɾutta, ete imangitou udde inang-Ku wuɾɾu manga tuɾɾang-Ku."

Mawu Yesus napaalenakku tandi'a

(Mat. 8:23-27; Mrk. 4:35-41)

²²Su sambau allo Mawu Yesus wuɾɾu mallalaɾɾenggen-Ne si-numa'ete saalanna. "Wette iite inai su samba'a n rano," unnu Mawu Yesus simangitou. Ne imangitou inaite. ²³Su tempo imangitou tantaɾanna massaalanna, Mawu Yesus inamatiiɾanna. Inaɾɾombanganne anginna ma'ikkatta tinumiuppa su rano udde. Ua'e sussuttate su saalanna, na'oma n sara maasilakate simangitou sarangkanambone. ²⁴Mallalaɾɾenggennu Mawu Yesus inaite ringan-Ne wuɾɾu namu'o Sitou. Imangitou nabbisara, "Iamangnga Huru, Iamangnga Huru, iite masilakate!"

Mawu Yesus napu'o see nandona anginna wuɾɾu lua'a apan mattandi'a udde. Anginna wuɾɾu lua'a udde noɾote, see rano nabbalite maɾenakka atonna. ²⁵See Mawu Yesus nabbisara mallalaɾɾenggen-Ne, "Anio iamiu tawe mangngimanna Sia'u?"

Imangitou naherangnga wuɾɾu nata'utta. Wuɾɾu uahahattote imangitou sangkatou ringannu waine, "Isai ɾinone taumata indi na'oma n sara namarenta anginna wuɾɾu lua'a, wuɾɾu parenta-Ne tinuɾɾutanna!"

Mawu Yesus napaapia n taumata niasuttannu gharḥaho laḥeo

(Mat. 8:28-34; Mrk. 5:1-20)

²⁶Mawu Yesus wuṛṛu mallalaṛṛenggen-Ne lapiddu nassaalanna na'oma n sara leta'u Gerasa su samba'a n Rano Galilea. ²⁷Napawe Mawu Yesus nilumintukke su ammaranne, Itou nirantannu sangkatou esakka apan niasuttannu gharḥaho laḥeo. Taumata udde wuassu soa. Maḷannute itou uatantole wuṛṛu maddiri matana'a su waḥe. Itou tumba'u maapulu matana'a su manga liangnga tampa m pallabinganna. ²⁸Napawe naasilo Mawu Yesus, itou nangintuḷi see inumaḷintuda su saruannu Mawu Yesus wuṛṛu nabbisara, "Mawu Yesus, Ana'u Mawu Ruata Apan Atanggaranne! Sarun olaannu ereapa ia'u indi? Ia'u su maḷande ariewe manansara sia'u!" ²⁹Taumata udde nabbisara arodidi ana waugu Mawu Yesus namarenta gharḥaho laḥeo udde sinumabangnga wuassi tou. Masokkate itou suttannu gharḥaho laḥeo udde, ma'oma n sara salaiwe limane wuṛṛu leddane suete niṛṛapussu ṛate wuṛṛu itou rariaganna mapia-pia, itou ta'e lai maawassutta ṛate udde see iaapiddu gharḥaho laḥeo watukku wadda'a.

³⁰Mawu Yesus naiwaḷo taumata udde, "Isai arannu?"

"Arangku 'Legiun'," sasimbakku taumata udde – ana waugu manambo gharḥaho laḥeo sinumutta sulaḷummu wadangnge. ³¹Manga gharḥaho laḥeo udde sinumaḷande tadea'u Mawu Yesus tawe mallimbuakka simangitou sulaḷummu Rampissu Papate.

³²Marani n tampa udde manambo atonna wawi tantaḷanna maddea'a anna su wele n wuidda. Manga gharḥaho laḥeo udde sinumaḷande Mawu Yesus tadea'u iwala sumutta sulaḷummu manga wawi udde. Ne Mawu Yesus inumire. ³³Ne manga gharḥaho laḥeo udde sinumabangke wuassu taumata udde see nangintaṛrote su manga wawi udde. See manga wawi udde tinumaḷangnga wuṛṛu tinumumpa wuassu winggi n rampissa watukku laḷummu rano, wua udde naḷammissa.

³⁴Manga mandariaga wawi udde naasilo apa apan suete nariaddi. Ne imangitou tinumaḷangnga, wuṛṛu namasingkattu watti'a udde su soa wuṛṛu su ampungnga maranine. ³⁵See manga taumata nampassabangnga ma'ellega apa apan suete nariaddi. Imangitou nirumanta ringannu Mawu Yesus, wuṛṛu isudde imangitou naaratingnga taumata apan napallosse wuassu manga gharḥaho laḥeo udde tantaḷanna ua'ianna marani n ledda Mawu Yesus. Itou ualuṛṛete n laubba wuṛṛu ringiṛanne masemakke. Imangitou nata'utta. ³⁶Sarangkanambone apan naasilo arariaddianna udde nabbatti'e su taumata ereapa taumata udde niapaapia.

³⁷See anambo n tumana'u leta'u Gerasa udde sinumaḷande Mawu Yesus

tadea'u Itou manantangngu tampa udde, ana waugu imangitou nambo matta'utta. Nariaddi Mawu Yesus sinuma'ete saalanna inaita mapule.
³⁸Taumata apan napallosse wuassu gharraho laleo udde sinumalande Mawu Yesus tadea'u itou wotongnge tumantalongnga.

³⁹Arawe Mawu Yesus nandolokki tou napule, wisara-Ne, "Apulete wuŕru wattia'e apa apan suete niola'u Mawu Ruata si'o."

Ne taumata udde napulete wuŕru nabbatti'e su ahewallu soa, alawo'u inolaanna apan suete niola'u Mawu Yesus sitou.

Ana'i Yairus - wawine apan nangindingnga Mawu Yesus

(Mat. 9:18-26; Mrk. 5:21-43)

⁴⁰Napawe Mawu Yesus nabelengke su samba'a n rano, Itou ni-saloanna manga taumata ringannu alaluassa ana waugu imangitou tantaŕanna ualarrado Sitou. ⁴¹See nirumanta sangkatou tembonnu wale m pattatarramawuanna isudde. Aranne Yairus. Itou nassubba su saruannu Mawu Yesus wuŕru sinumalande tadea'u Mawu Yesus rumanta su wale, ⁴²ana waugu anangnge wawine man sambau uukke mapulo dua su tonnane maranite mate.

Tantaŕanna Mawu Yesus u'amatta watukku wale n Yairus, manga taumata mangke mannesse'i Tou wuassu alawo'u tampa. ⁴³Su wallatti mangitou pia sangkatou wawine apan mapulete dua su tonnane uapendamma rada'u wawine. Itou suete nanginsue manga darotongnge iapa'undamma su doktere, arawe tawedu sangkatou apan naapia sitou. ⁴⁴Wawine udde nangundani Mawu Yesus wuassu liudde, see nangindingnga pentakku jubah-Ne. Orassa udde lai rada'u wawine udde napia. ⁴⁵Mawu Yesus naiwalo, "Isai nangindingnga Sia'u?"

Anambo n taumata nassinaada. See Petrus nabbisara, "Iamangnga, manambo atonna taumata uapaliwutta su Iamangnga; imangitou mangke mannesse'i Iamangnga!"

⁴⁶Mawu Yesus nabbisara, "Arawe pia taumata nangindingnga Sia'u. Ia'u masingkatta ana waugu pia auatanna sinumabangnga wuassia-U." ⁴⁷Wawine udde naatutukka manungku inolaanne udde niasingkatante. Nariaddi itou nirumanta ringannu mangngindo see inumalintuda su saruannu Mawu Yesus. Ne itou nabbatti'e su saruannu awadaalla, anio itou nangindingnga Mawu Yesus, wuŕru manungku radangnge napia orassa udde lai. ⁴⁸Mawu Yesus nabbisara sitou, "Ana'u, ana waugu i'o mangngimanna Sia'u, i'o napia. Apulete ringannu salamatta."

⁴⁹Tantaŕanna Mawu Yesus ta'e uahahatto, sangkatou raloŕŕanna nirumanta wuassu wale n Yairus. Itou nabbisara si Yairus, "Ana'i tuangnga natete. Ariete lai tuangnga mapaasusa m Iamangnga Huru."

⁵⁰Napawe Mawu Yesus naaringikka wisara udde, Itou nabbisara si Yairus, "Arie paata'utta. Pangimante, anangngu sarun mapia."

⁵¹Napawe na'omate su waļe n Yairus, Mawu Yesus tawe namala n saran sangkatou sumutta su sambau ringanni Tou tumba'u Petrus, Yohanes, Yakobus wuŗru inangnga iamangngu ana'a udde. ⁵²Anambo n taumata tantaļanna lulluai wuŗru massusa ana waugu apapate n ana'a udde. Arawe Mawu Yesus nabbisara, "Arie palluai. Ana'a udde tawe nate, itou tumba'u mattiilla!"

⁵³Imangitou nilumage Mawu Yesus, ana waugu imangitou masingkatta manungku ana'a wawine udde natete. ⁵⁴Wua udde Mawu Yesus namita lima n ana'a udde see nabbisara, "Pabbangunte, Ana'a!" ⁵⁵Niawa ng kana'a nabelengke apia su ana'a udde, wuŗru orassa udde lai itou nabangunna. Wua udde Mawu Yesus nandolokki mangitou napaannu ana'a udde. ⁵⁶Hagurangngu ana'a udde naherangnga atonna. Arawe Mawu Yesus naningaddi mangitou mamasingkattu arariaddianna udde su aļawo'u taumata.

Mawu Yesus nandolokku sire mapuļo dua mallaļarŗenggen-Ne

(Mat. 10:5-15; Mrk. 6:7-13)

9 Mawu Yesus namago sire mapuļo dua mallaļarŗenggen-Ne, see nangagillu tarrino simangitou ipallimbuakka gharraho laļeo wuŗru mapaapia n rada'a. ²Wua udde Itou nandolokke mangitou inai mapaapia n taumata marada'a wuŗru mamasingkattu watti'a su ola'u ereapa Mawu Ruata mamarenta ere sangkatou Ratu. ³"Arie pangapiddu saran-napa su amatanni amiu," unnu Mawu Yesus simangitou. "Arie pangapiddu ta'inna, ara'e tampa m pondi, ara'e anna, ara'e roitta, ara'e lai laubba rua m parassa. ⁴Suapa n tampa iamiu itarimmatta, atana'e isudde ma'oma n sara iamiu manantangngu soa udde. ⁵Wuŗru su tampa iamiu tawe itarimmatta, su tempo iamiu manantangngu soa udde, tontonga'a awu wuassu paladu leddanu, maola'a sambau pannanaunganna simangitou."

⁶Manga mallaļarŗenggennu Mawu Yesus nabuatte, see inaitte su manga ampungnga mabatti'u Watti'u Aļaļuassa udde wuŗru napaapia n taumata marada'a su aļawo'u tampa.

Herodes niaļiwune

(Mat. 14:1-12; Mrk. 6:14-29)

¹Su tempo Herodes uaparenta su Galilea, naaringikka su ola'u anambo n arariaddianna udde, itou niaļiwune. Ana waugu piaddu

mabbisara manungku Yohanes Mananaŕrani nabbiakke apia. ⁸Piaddu lai mabbisara manungku Elia nirumantate apia. Taumata waine lai mabbisara manungku sangkatou nabi su wallattu manga nabi ro'e n ałamonane nabbiakke apia. ⁹Herodes nabbisara, "Ia'u suete nandolokku taumata niapapototta pua n Yohanes. Arawe taumata indi, isai Itou? Manambo watti'a suete ta'u niaringiŕranna matataŕrino Sitou." Ne Herodes mappandumma ma'ellega Mawu Yesus.

Mawu Yesus napaannu lima ŕiwu su atoune

(Mat. 14:13-21; Mrk. 6:30-44; Yoh. 6:1-14)

¹⁰Manga ralołoŕrannu Mawu Yesus nabelengke wuŕru nabbatti'e su Mawu Yesus, sangkanambone apan suete niola'i mangitou. Mawu Yesus nangahe simangitou see inaiŕe su sambau, imangitou nanginsa-ssa watukku soa Betsaida. ¹¹Arawe napawe manga taumata naasing-katta olangnge udde, imangitou tinumantalongnga Mawu Yesus. Itou nanarimmatti mangitou, see nabbatti'a simangitou su ola'u ereapa Mawu Ruata mamarenta ere sangkatou Ratu. Wuŕru Itou lai napaapia n tau-mata marada'a su wallatti mangitou.

¹²Napawe matannallo mattattuŕe, sire mapuło dua mallał-a-ŕŕenggennu Mawu Yesus nirumanta ringanni Tou wuŕru nabbisara, "Ia-mangnga, tampa indi naŕŕae marau. Mappianne Iamangnga mandolokku manga taumata indi iapaapułe, tadea'u imangitou wotongnge maddea'a anna wuŕru maddea'a tampa atiłanna su manga soa wuŕru manga am-pungnga maranine isindi."

¹³Arawe Mawu Yesus sinumimbakka, "Iamiute mapaanni mangitou."

Manga mallał-a-ŕŕenggennu Mawu Yesus nabbisara, "Iami tumba'u pia lima m bau roti wuŕru inassa rua m bua. Apa iami ŕinone inai mamalli anna iapaanna su awadaalla indi?" ¹⁴(Iraŕranggo sire lima ŕiwu su atoune esakka isudde.)

Mawu Yesus nabbisara mallał-a-ŕŕenggen-Ne, "Doloŕŕa'e manga tau-mata indi uma'ianna uawahageangnga, iraŕranggo lima m puło su atoune sambageangnga."

¹⁵Manga mallał-a-ŕŕenggennu Mawu Yesus udde tinumuŕutte su ereapa suete niwisara Mawu Yesus simangitou. ¹⁶See Mawu Yesus nanganute lima m bau roti wuŕru inassa rua m bua, wua udde naningngara langitta wuŕru naadiangkamanna su Mawu Ruata. Wua udde Itou namesangnga roti wuŕru inassa udde ringannu lima-Ne see nianggille su mallał-a-ŕŕenggen-Ne niapatahia su taumata nambo udde. ¹⁷Imangitou sangkanambone inumannna na'oma n sara nałai-łaidda.

See manga mallaḷarṙenggenṇu Mawu Yesus nangammule n lambe ng kanna udde anambone mapuḷo dua su uḷangnge.

Panga'uanni Petrus su Mawu Yesus

(Mat. 16:13-19; Mrk. 8:27-29)

¹⁸Su sambau allo, napawe Mawu Yesus tantaḷanna u'aḷiomanna sassane, mallaḷarṙenggen-Ne nirumanta ringanni Tou. Mawu Yesus naiwaḷo simangitou, "Tumuṙṙuttu wisara n taumata, Ia'u indi isai?"

¹⁹Imangitou sinumimbakka, "Piaddu nabbisara Yohanes Manana-ṙṙani. Piaddu lai mabbisara Elia, waine lai nabbisara su wallattu sangkatou nabi su tempo n aḷamona apan nabbiakke apia."

²⁰"Arawe tumuṙṙutta siamiu sassane, Ia'u indi isai?" aiwaḷo Mawu Yesus.

Petrus sinumimbakka, "Iamangnga eteudde Ratu Punnu Saḷamatta apan pina'ire Mawu Ruata."

Mawu Yesus nabatti'u asasusa-Ne wuṙṙu apapate-Ne

(Mat. 16:21-28; Mrk. 8:31-9:1)

²¹See Mawu Yesus nabbisara mallaḷarṙenggen-Ne, "Imbaṙrangnga mamasingkattu olangnge indi sisai-sai." ²²Mawu Yesus nabbisara apia, "Ana'u Taumata sarun matataṙrangnga wuṙṙu ipasseettu manga piaṙrangnge wuṙṙu manga imam tembonanne, see manga huru n agama. Itou sarun pateanna, arawe su allo atallune sarun iapawangunna apia."

²³Wua udde Mawu Yesus nabbisara taumata nambo isudde, "Tau-mata apan maapulu rumandinganna Sia'u, ṙinone tawe mannaungnga manarane sassane, mamasanna arussa-Ne miallo-miallo wuṙṙu sidutu uatantalongnga Sia'u. ²⁴Ana waugu taumata apan mannahekku wiakke, sarun awuḷiannu wiakke udde. Arawe taumata apan mannantillu wiakke ana waugu apulu-U, itou sarun masaḷamatta. ²⁵Apa sombangnge su sangkatou taumata amungkangngu ahewallu runia indi maola'a pus-saane, arawe itou mandaḷeo wuṙṙu awuḷiannu wiakke? ²⁶Amungkangngu taumata massili manga'u Sia'u wuṙṙu aḷara'u, Ana'u Taumata lai massili manga'u taumata udde su tempo Itou rumanta apia ringannu taṙṙino-Ne, wuṙṙu ringannu taṙṙino n Iamangnga wuṙṙu taṙṙino mala'ekatta apan susi! ²⁷Asingkatewe: wuassu wallatti ami u isindi pia sangkatou tawe mate tantaḷanna itou taambe naasilo Mawu Ruata mamarenta."

Mawu Yesus niwantuhanna

(Mat. 17:1-8; Mrk. 9:2-8)

²⁸Iraṙrangngo sangkamisa wuassu tempo Mawu Yesus nangaṙṙa'u sarangkanambone udde, Itou nangapidde n Petrus, Yohanes wuṙṙu Yakobus su sambau wowone inai umaḷiomanna. ²⁹Tantaḷanna Mawu Yesus u'aḷiomanna isudde, hati-Ne nawaḷu wuṙṙu laung-Nge nabaḷi mawira sussaḷendappa. ³⁰⁻³¹Inaṙṙombanganne rua ng katou, eteudde Musa wuṙṙu Elia nattingkapasilo m batanganne ringannu asasemakka wuassu surga. Imangitou uahahatto Mawu Yesus su ola'u apapate-Ne apan tate maḷannu lai mariaddi su Yerusalem. ³²Su tempo udde Petrus wuṙṙu manga hawene niamatiḷanna, arawe inaṙṙombanganne napu'o wuṙṙu naasilo Mawu Yesus lullansiangnga wuṙṙu taumata rua ng katou uarisikka ringanni Tou. ³³Su tempo rua ng katou udde manantangke Mawu Yesus, Petrus nabbisara Mawu Yesus, "Iamangnga Huru, mapia atonna iite isindi. Mappianne iami mapararisikku rasanna tatallu; sambau si Tuangnga, sambau si Musa wuṙṙu sambau lai si Elia." (Petrus nabbisara aroddi arawe tawe maasunna wisarane udde.)

³⁴Tantaḷanna Petrus ta'e uahahatto, nirumantate winabbawa, wuṙṙu nangooppa simangitou na'oma n sara imangitou nata'utta. ³⁵Wua udde wuassu winabbawa udde niaringiṙṙanna tinggikka mabbisara, "Ete indi Ana'u apan Ta'u pinile. Padaringikka Sitou!"

³⁶Napawe tingikka udde naddote, imangitou naasilo Mawu Yesus sassane isudde. Mallaṙṙenggenneu Mawu Yesus nallannaba su ola'u sarangkanambone apan nariaddi udde, wuṙṙu tawe nabatti'a sisai-sai apa apan suete niasiloanni mangitou.

Mawu Yesus napaapia n ana'a apan niasuttannu ghaṙṙaho laḷeo

(Mat. 17:14-18; Mrk. 9:14-27)

³⁷Su allo tiṙṙabbine Mawu Yesus wuṙṙu sire tallu mallaṙṙenggen-Ne 'sinumossokke wuassu wowone udde, wuṙṙu manambo taumata nirumanta ringannu Mawu Yesus. ³⁸Sangkatou esakka wuassu pattangannu awadaalla udde, nangintuḷi, "Iamangnga Huru, tuḷunga'a ellehe ana'u – tumba'u sangkatou udde ana'u! ³⁹Amungkangngu ghaṙṙaho laḷeo sumutta sitou, inaṙṙombanganne itou umui wuṙṙu awangnge iwabantikke ma'oma n sara moṙṙongnge lullupa. Ghaṙṙaho udde sidutu mannan-sara sitou wuṙṙu maddiri sumabangnga wua dinganni tou. ⁴⁰Ia'u suete

naituŋnga su mallaŋrengenni Iamangnga mallimbuakka gharraho udde, arawe imangitou tawe naalimbuakka."

⁴¹Mawu Yesus sinumimbakka, "Waline hampa iamiu indi! Iamiu atonna manga taumata apan marrusaŋa wuŋru tawe mangngimanna! Ma'oma n sara tinggera Ia'u matana'a suadio'a ringanni amiu wuŋru manabare siamiu? Apira'e anangngu udde isindi!"

⁴²Tantaŋanna ana'a udde u'amatta mattuda Mawu Yesus, gharraho laŋeo udde nangema'i tou wuŋru wadangnge iwabantikke. Arawe Mawu Yesus namarenta gharraho laŋeo udde niapaasabangnga see napiate ana'a udde. See ana'a udde tinantille apia su iamangnge. ⁴³Awadaalla naherangnga naasilo tarŋino Mawu Ruata aroddi ahewalle.

Mawu Yesus nabbati'a apia su ola'u apapate-Ne

(Mat. 17:22-23; Mrk. 9:30-32)

Su tempo manga taumata ta'e tuttiangnga naasilo sarangkanam-bone apan niolang-Nge, Mawu Yesus nabbisara su mallaŋrenggen-Ne, ⁴⁴"Paatuturre paapia-pia wuŋru arie paabuliane manga wisara-U indi: Ana'u Taumata sarun itantilla su tarŋino n taumata." ⁴⁵Arawe mallaŋrenggennu Mawu Yesus udde tawe naasunna wisara-Ne. Olangnge udde iaadappingnga simangitou tadea'u imangitou tawe maasunna. Arawe imangitou matta'utta maiwaŋo olangnge udde Sitou.

Isai ahewaŋanne?

(Mat. 18:1-5; Mrk. 9:33-37)

⁴⁶Su wallattu mallaŋrenggennu Mawu Yesus nariaddi pattatiakka su ola'u isai su wallatti mangitou apan ahewaŋanne. ⁴⁷Mawu Yesus naasingkatta ringirŋanni mangitou, ana waugu udde Itou namaggo sangkatou ana'a adio'a wuŋru niaparisikka su sandirŋan-Ne. ⁴⁸See Itou nabbisara manga mallaŋrenggen-Ne, "Taumata apan manarimmattu ana'a indi ana waugu Ia'u, udde ere lai manarimmatta Sia'u. Wuŋru taumata apan manarimmatti Ia'u manarimmatti Tou lai apan nandolo-U. Ana waugu taumata apan adio'anne su wallatti amiu, ete itou apan ahewaŋanne!"

**Taumata apan tawe mandooppa siamiu,
uasamba'a siamiu**

(Mrk. 9:38-40)

⁴⁹Yohanes nabbisara, "Mawu, iami naasilo taumata mallimbuakka setanna ringannu arannu Mawu, wuŕŕu iami naningaddi tou, ana waugu itou waŕine wua dinganni ite."

⁵⁰"Arie maningaddi tou," wisara Mawu Yesus si Yohanes wuŕŕu manga mallalaŕŕenggennu Mawu Yesus apan waine, "ana waugu tau-mata apan tawe mandooppa siamiu, udde uasamba'a siamiu."

**Sambau ampungnga su Samaria maddiri
manarimmattu Mawu Yesus**

⁵¹Napawe maranite tempone Mawu Yesus masengkengnga watukku surga, Itou nakkawessa inai mabatukku Yerusalem. ⁵²Ne Itou nando-lokku taumata inai malliu ŕoro Sitou. Manga taumata apan nirolokka udde inaita, see sinumuttate su sambau ampungnga su Samaria tadea'u manaddia manga alaŕo'a huna Mawu Yesus. ⁵³Arawe manga taumata su ampungnga udde maddiri manarimmattu Mawu Yesus, ana waugu niasingkatante atonna manungku Itou mattudate n Yerusalem. ⁵⁴Ne su tempo manga mallalaŕŕenggennu Mawu Yesus, eteudde Yakobus wuŕŕu Yohanes naasingkatta olangnge udde, imangitou nabbisara, "Mawu, apa Mawu maapulu, iami madorongnga putungnga sumossokka wuassu langitta ipamate manga taumata indi?"

⁵⁵Mawu Yesus nanaile, see namuŕo simangitou. ⁵⁶Wua udde imangi-tou inaita su ampungnga waine.

**Manga taumata apan maapulu maola'a
mallalaŕŕenggennu Mawu Yesus**

(Mat. 8:19-22)

⁵⁷Tantalanna Mawu Yesus wuŕŕu mallalaŕŕenggen-Ne mannassu amatanne, pia taumata nabbisara Mawu Yesus, "Iamangnga, ia'u maa-pulu tumantalongnga su Iamangnga suapa n tampa Iamangnga uma-matta!"

⁵⁸Mawu Yesus sinumimbakka, "Serigala pia liangnge, wuŕŕu manu'u winalanganna pia salaŕakke, arawe Ana'u Taumata tawe tampa

lallalowangan-Ne.” ⁵⁹See Mawu Yesus nabbisara su sangkatou waine, ”Tantalongke Sia’u.”

Arawe taumata udde nabbisara, ”Iamangnga wala’a ia’u mapule asuene mallabingngu iamangku.”

⁶⁰Mawu Yesus sinumimbakka, ”Wala’e taumata nate mallabingngu taumatane nate sassane. Arawe i’o roote wurre waloa’e watti’a manungku Mawu Ruata mannattakke mammarenta.”

⁶¹Piaddu lai taumata waine nabbisara, ”Iamangnga, ia’u maapulu tumantalongnga su Iamangnga, arawe wala’a ia’u mapule rorone maba’o.”

⁶²Mawu Yesus nabbisara taumata udde, ”Taumata apan mannattakke mammajeko see manaile liudda, tawe rinone maola’a la’or’ro n araratuannu Mawu Ruata.”

Mawu Yesus nandolokku sire pitu m pu’o mallajarrengen-Ne

10 Wua udde Mawu Yesus namile sire pitu m pu’o mallajarrengen-Ne lai, see nandolokki mangitou pattarra darua malliu roro Sitou watukku alawo’u soa wurre tampa apan rantanni Tou. ²”Wuane apan itinganna manambo,” unnu Mawu Yesus simangitou, ”arawe mangangitingnge matulungnga. Ana waugu udde padorongke su tatahuannu wailla tadea’u itou mandolokku taumata mangitingnga wua n si-nuananne. ³Ne, roote! Ia’u mandolokki amiu ere domba su pattangngannu serigala. ⁴Arie pangapiddu tampa n roitta ara’e pato’a m padaroronganna, ara’e sapatu. Arie mangillo’o su tangnga n dalanna ana mattabea su sangkatou taumata. ⁵Amungkanngu iamiu sumutta su sambau wale, wisara’a paarorone, ’Doronganna alaluassa sulalummu wale indi.’ ⁶Amungkanngu isudde pia taumata maapulu m padaramene, tabea m padaramenu udde sarun sidutu sitou, amungkanngu tawe, ulei apia tabea m padaramenu udde. ⁷Atana’e tumba’u su wale sambau. Sengkamma apa apan iassarau siamiu isudde, ana waugu taumata apan mammanara wotongnge manengkamma lalantakke. Arie massaliu wuassu wale sambau watukku wale waine. ⁸Amungkanngu iamiu rumanta su sambau soa wurre isudde iamiu salohoanna ringannu mapia, ante apa apan ia’imbe mangitou isudde. ⁹Paapia’a taumata apan marada’a su soa udde, wurre paasingkata’a su manga taumata isudde manungku, ’Mawu Ruata malihakke mamarenta ere sangkatou Ratu su pattangnganni amiu.’ ¹⁰Arawe amungkanngu iamiu rumanta su sambau soa wurre iamiu isudde tawe itarimmatta, sabbangke su dalanna wurre wisara’a, ¹¹Ewe’e sara lai awu su soanu apan uareetta su ledda ng kami, itontongngi ami maola’a sambau pananaunganna siamiu. Arawe rinone

iamiu maasingkatta manungku maranite tempone Mawu Ruata mama-renta ere sangkatou Ratu su pattangnganni amiu!" ¹²Paananunge, su Allo ng Kiamatta, taumata n Sodom malluasanna ampungannu Mawu Ruata wuassu taumata su soa udde!"

Manga soa apan tawe mangngimanna

(Mat. 11:20-24)

¹³"Nasilakate iamiu Korazim! Wuṛṛu nasilakate iamiu Betsaida! Unnu wisara manga aḷaṛṛindu'a apan niola'a su pattangnganni amiu udde suete niola'a su soa Tirus wuṛṛu Sidon, manga taumata poiaronddi maḷannute nawaḷu wuassu manga rosa mangitou, wuṛṛu nalluṛṛete n laubbu asasusa see nangado n awu su pua mangitou. ¹⁴Su Allo ng Kiamatta, manga taumata n Tirus wuṛṛu Sidon malluasanna ampungannu Mawu Ruata wuassi amiu. ¹⁵Wuṛṛu iamiu Kapernaum! Iamiu maṛṛingidda manungku iamiu sarun itanggakka ma'oma n sara surga? Tawe! Ewe'e iamiu sarun iramme su naraka!"

¹⁶See Mawu Yesus nabbisara manga mallalaṛṛenggen-Ne, "Taumata apan madaringikka siamiu, madaringikka lai Sia'u. Taumata apan mannoḷa'i amiu, mannoḷa-U lai. Wuṛṛu taumata apan mannoḷa-U, mannoḷa'i Tou lai apan nandolo-U."

Pabbawelengngu sire pitu m puḷo mallalaṛṛenggenna

¹⁷Sire pitu m puḷo mallalaṛṛenggenna udde nabelengnga ringannu aḷaḷuassa. "Mawu," wisara mangitou, "manga ghaṛṛaho laḷeo lai tuttuṛṛutta siami umungkangngu iami mamarenta simangitou ringannu arannu Mawu!"

¹⁸Mawu Yesus sinumimbakka, "Ia'u naasilo Setanna nanawo wuassu langitta naaḷihida sawallo. ¹⁹Asingkatewe! Iamiu suete inonggoḷannu. taṛṛino tadea'u iamiu wotongnge maṛṛinda atoanna wuṛṛu kalajengking lapiddu mamadi aḷawo'u auatannu seetta, ringannu tawe saran sambau wotongnge manilaka siamiu. ²⁰Salaiwe aroddi arie lumuassa ana waugu manga ghaṛṛaho laḷeo nassuṛṛubawa siamiu. Mappianne iamiu lulluassa ana waugu arannu uawoṛṛetta su surga."



Kalajengkinga (10:19)

Mawu Yesus lullala'a

(Mat. 11:25-27, 13:16-17)

²¹Su tempo udde lai, Mawu Yesus lullala'a ana waugu niasuttannu Gharraho Mawu Ruata. Mawu Yesus nabbisara, "Iamangnga, Mawu apan uatahuanna langitta wuŕru runia! Ia'u maadiangkamanna Si'o ana waugu sarangkanambone udde niadappingngu su taumata nambo apan pande wuŕru pia asingkanne, arawe I'o napaaliatta'a su manga taumata tawe si'olane. Eteudde apan maaŕuassa naungngu Iamangnga.

²²Sarangkanambone suete tinantillu Iamangnga Sia'u. Tawe saran sangkatou maaillaŕa Ana'a tumba'u Iamangnga. Tawe saran sangkatou maaillaŕa Iamangnga tumba'u Ana'a, wuŕru su manga taumata ete sisai Ana'a udde iapaasingkattu Iamangnga."

²³See Mawu Yesus nanaile mallaŕarŕenggen-Ne, see nabbisara si-mangitou sassane, "Auntunganna siamiu ana waugu suete naasilo apa apan niasiloanni amiu orassa indi. ²⁴Ana waugu paanaunge: Manambo nabi wuŕru ratu maapulu ma'ellega apa apan niasiloanni amiu orassa indi arawe imangitou tawe maasilo. Imangitou maapulu madaringikka apan radaringiŕanni amiu orassa indi, arawe imangitou tawe maaring-ikka."

Sasumandingngu taumata n Samaria apan mapia naungnge

²⁵Wua udde sangkatou huru n agama nirumanta maddea'a mapaa-saŕa Mawu Yesus. Itou naiwaŕo, "Iamangnga Huru, apa sarun ta'u manaranna tadea'u wotongnge maasengkamma wiakka tutune wuŕru maŕannu-ŕannu?"

²⁶Mawu Yesus sinumimbakka, "Apa udde uaworretta su Wuke Susi? Ereapa su ringirannu matatarino su olangge udde?"

²⁷Taumata udde sinumimbakka, " 'Pandangngute Mawu Ruatanu ringannu ahewallu naungngu wuɽru ringannu ahewallu apendammu, ringannu aɽawo'u auatannu, wuɽru ringannu anambo n apandenu,' wuɽru 'Pandangngu sansuɽungngu ere lai i'o mandangngu wadangngu sassane.' "

²⁸"Sasimbakku udde atonna," unnu Mawu Yesus. "Ola'e udde tadea'u i'o maralukka."

²⁹Arawe huru n agama udde maddiri mapaasala n ririne. Itou naiwaɽo, "Isai sansuɽungku udde?"

³⁰Mawu Yesus sinumimbakka, "Pia sangkatou esakka sinumossokka wuassu Yerusalem watukku Yerikho. Su tangnga n daɽanna itou niam-pangannu maɽrarampassa, niaɽro aɽawo'u darotongge, nipuulla na'oma n sara maranite mate, see tinantangnga uaɽallowangnga su laɽanna ringannu naɽaɽessa. ³¹Inaɽrombanganne sangkatou imam inumamatta lai su laɽanna udde. Napawe itou naasilo taumata udde, itou nanewadda su samba'a n daɽanna, see nanassute amatanne. ³²Aroddi lai sangka-tou taumata n Lewi apan inumamatta isudde; napawe itou naasilo tau-mata udde, itou nangundani ma'ellega. Arawe itou lai nanewadda su samba'a n daɽanna see nanassute amatanne. ³³Arawe wua udde sangka-tou taumata Samaria apan tantaɽanna u'amatta, sinumabbi isudde. Napawe itou naasilo taumata udde, naungnge nasusa wuɽru inumak-kanna. ³⁴Ne itou nangundani n taumata udde see namaresi manga le-ssane ringannu anggore wuɽru inundamannu lana, wua udde manga lessa udde niwa'issa. Wua udde, itou nallurannu taumata udde su keledai n tou sassane, see niapidda su sambau waɽe m patindahoanna see niunda-mante. ³⁵Tiɽɽabbine itou nanganu darua roitta saɽa'a wuɽru nianggilla su tatahuannu waɽe lapiddu nabbisara, 'Undamete itou, wuɽru amungkang-ngu pia bawaekke waine, ia'u mamaekka napawe ia'u mabelengnga apia isindi.' "

³⁶Wua udde Mawu Yesus nanginsuete watti'a udde ringannu aiwaɽo indi, "Wuassu sire tallu udde, suapane tumuɽɽuttu addapannu apan nan-tuɽungngu sansuɽungnge wuassu taumata apan nipangaɽroanna udde?"

³⁷Huru n agama apan niiwaɽoanna udde sinumimbakka, "Taumata apan suete nantuɽungngu taumata udde."

"Ne, roote wuɽru pa'ola'e lai ereudde!" wisara Mawu Yesus.

Mawu Yesus nattembo si Maria wuɽru si Marta

³⁸Wua udde Mawu Yesus wuɽru mallalaɽɽenggen-Ne nanassute amatanne, see na'omate su sambau ampungnga. Isudde sangkatou wa-

wine, aranne Marta, namaggo Sitou niaparanta su wałene. ³⁹Marta pia turrangnge wawine aranne Maria. Maria indi inuma'ianna marani Mawu Yesus madaringikka manga ałarřang-Nge. ⁴⁰Arawe Marta mangke mammanara aławo'u manara su wałene. Itou inaita ringannu Mawu Yesus wuřru naiwało, "Mawu, anio Mawu tawe managu si Maria mappamannara'u sassane? Dolořra'e itou mallalima sia'u!"

⁴¹"Marta, Marta!" sasimbakku Mawu Yesus. "I'o sussingğawangnga wuřru marringiddu manara indi wuřru manara udde; ⁴²arawe apa apan pia gunane tumba'u sambau. Wuřru Maria suete namile lembo n apianne, apan tawe iaalappa wuassi tou."

Ałarřa'u Mawu Yesus su ola'u aaljomanna

(Mat. 6:9-13, 7:7-11)

11 Su sambau allo Mawu Yesus inumaljomanna su sambau tampa. Man napawe suete inumaljomanna, sangkatou su wallattu manga mallalarřenggen-Ne nabbisara, "Mawu, arřa'e iami umaljomanna ere lai Yohanes manggarřa'a mallalarřenggenne umaljomanna."

²Ne Mawu Yesus nabbisara simangitou, "Amungkangngu iamiu umaljomanna, pabbisarate ereindi,

'Iamangnga,

Ete I'o Mawu Ruata apan Tinggassa.

Doronganna I'o subbanna wuřru addatanna.

³Onggoł'a su miallo-miallo

anna apan haggasanni ami,

⁴Ampungnge manga rosa ng kami,

ana waugu iami lai mangngampungnga taumata

sangkatou-sangkatou

apan nassala siami.

Wuřru arie mamala ng kami awuļiannu pangangimanna su tempo iami uasaruanna wawałintongnga."

⁵Mawu Yesus nabbisara manga mallalarřenggen-Ne, "Unnu wisara sangkatou wuassu wallatti amiu inai su wałe n hawene su tempo allorane, wuřru mabbisara, 'Hawe, pawallasa'a roti tallu m bau, 'ana waugu hawe'u apan su amatanne wakkute notongnga su wałe'u wuřru ia'u tawe anna ipanaru sitou!' 'Unnu wisara hawe apan nirantannu udde sinumimbakka arendi, wuassu lalummu wałene, 'Arie mapaasusa'u! Ngara suete niřruuda wuřru ia'u ringannu ałarřana'u mattiille. Ia'u tawe maawangunna wuřru mangagillu manga apa si'o."

⁸"See ereapa?" wisara Mawu Yesus nanansunna. "Ia'u mabbisara ore! Salaiwe i'o udde hawene, itou maddiri mabangunna wuřru manga-

gillu sarannapa si'o. Arawe ana waugu i'o tawe apendamma massili si-dutu madorongnga sitou, ne itou mabangunte wuŕŕu mangagille si'o apa apan pappandumannu. ⁹Nariaddi Ia'u mabbisara si'o: Padorongke, ne iamiu sarun onngoŕanna; padea'e, ne iamiu sarun maasomba; panengkelle, ne iamiu sarun pamu'anna ngara. ¹⁰Ana waugu taumata apan nadorongnga sarun manengkamma, taumata apan maddea'a sarun maasomba, wuŕŕu taumata apan mannengkella sarun pamu'anna ngara. ¹¹Su wallatti amiu apa pia iamangnga mangngagillu atoanna su anangnge, amungkangngu itou madorongnga inassa? ¹²Ara'e mangagillu kalajengkingnga amungkangngu itou madorongnga tallukka? ¹³Salaiwe iamiu laŕeo, iamiu masingkatta lai mangagillu sarannapa mapia su ana'i amiu. Lembonete lamangnga su surga. Itou sarun mangagillu Ghaŕraho-Ne simangitou apan madorongnga Sitou!"

Mawu Yesus wuŕŕu Beelzebul

(Mat. 12:22-30; Mrk. 3:20-27)

¹⁴Su sambau allo Mawu Yesus nallimbuakka ghaŕraho laŕeo nia-paasabangnga wuassu sangkatou mou. Napawe ghaŕraho laŕeo udde sinumabangnga, taumata udde nanattakke maawisara. Manambo taumata naherangnga, ¹⁵arawe piaddu mabbisara, "Itou wotongnge mallimbuakka ghaŕraho laŕeo ana waugu taŕŕino Beelzebul, tembonannu ghaŕraho laŕeo udde."

¹⁶Piaddu lai manga sire pira taumata waine maddea'a mapaa-saŕa Mawu Yesus, aroddi imangitou madorongnga Itou ma'ola'a sambau alaŕŕindu'a maola'a sambau tatiala manungku Itou atonna-tonna nirumanta wuassu Mawu Ruata. ¹⁷Arawe Mawu Yesus naasingkatta pandumanni mangitou. Ne Itou nabbisarate simangitou, "Amungkangngu araratuanna natahia sulaŕummu wageangnge apan uasaseetta sambau ringannu waine, araratuanna udde tawe mattatana'a maŕannu. Wuŕŕu sambau pabbawalaga apan uataŕei wuŕŕu uasaseetta sambau ringannu waine, sarun mawinasa. ¹⁸Aroddi lai sulaŕummu araratuannu Setanna, amungkangngu sambageanganna mabawuŕo ringannu wageangnge waine, araratuanna udde sarun mawinasa. Iamiu mabbisara manungku Ia'u mallimbuakka ghaŕraho laŕeo ana waugu taŕŕino n Beelzebul. ¹⁹Amungkangngu aroddi, ringannu taŕŕino n sai manga mallalaŕŕenggennu mallimbuakka ghaŕraho laŕeo udde? Manga mallalaŕŕenggennu udde sassane apan nattiala manungku iamiu nassaŕa! ²⁰Arawe Ia'u mallimbuakka ghaŕraho laŕeo ringannu taŕŕino Mawu Ruata, wuŕŕu udde atappasanne manungku Mawu Ruata mannattakke mammarenta su pattangnganni amiu.

²¹Amungkanngu sangkatou apan matohassa, ringannu ahidde apan nasuungnga, mandiaga wałene sassane, anambo n darotongnge sarun masałamatta. ²²Arawe amungkanngu sangkatou apan mattohasanna lumał'a'o wuřru see itou iaansukka, ne taumata apan mattohasanna udde sarun mangařro anambo n ahidde apan naola'a atatohasu tatahuannu wałe udde, see nattahiate anambo n darotongnge udde.

²³Taumata apan tawe uasamba'a Sia'u, atonna-tonna lullawangnga Sia'u, wuřru taumata apan tawe massumbala Sia'u, atonna-tonna mang-gohakku manara-U!"

Pabbawelengngu ghařraho lałeo

(Mat. 12:43-45)

²⁴"Amungkanngu ghařraho lałeo manantangu sangkatou taumata, ghařraho udde mammalıntaddu manga tampa apan mamara maddea'a tampa pangillołoanna, arawe itou tawe naasomba. Ana waugu udde, itou nabbisara, 'Ia'u sarun mabelengnga su wałe'u apan suete ta'u tiantangnga!' ²⁵Su tempo itou na'omate poiarddi, itou naaratingnga wałe udde waresi wuřru uatokka. ²⁶See itou inaita wuřru nangapiddu sire pitu ghařraho waine apan nangillembu arałeoanne wuassi tou. Wua udde imangitou sinumuttate sulałummu taumata udde see natana'e isudde. Wuřru panginsueanne taumata udde nangillembote n arałeoanne wuassu paarorone."

Lałumanna'a apan tutune

²⁷Napawe Mawu Yesus suete nabbisara aroddi, sangkatou wawine su wallattu taumata nambo udde nabbisara Mawu Yesus, "Lałumanna'a eteapa su wawine apan nangunsiwe wuřru namasusu Si'o!"

²⁸Arawe Mawu Yesus sinumimbakka, "Nangillembu n lałumanna'a lai su taumata apan maddaringikka wisara Mawu Ruata wuřru mappaa-mattu alařrang-Nge!"

Manga taumata madorongnga Mawu Yesus ma'ola'a alařrindu'a

(Mat. 12:38-42)

²⁹Tantałanna manga taumata uarřimpulunna Mawu Yesus, Itou nanassute wisara-Ne, unni Tou, "Tumanite n lałeo taumata su tempo

indi. Imangitou madorongnga sambau alaṛṛindu'a tadea'u imangitou wotongnge mangngimanna Sia'u, arawe imangitou tawe ongoḷannu saran sambau alaṛṛindu'a, tumba'u alaṛṛindu'i Nabi Yunus. ³⁰Su ereapa Nabi Yunus na'ola'a alaṛṛindu'a su taumata n soa Niniwe, aroddi lai Ana'u Taumata sarun ma'ola'a sambau alaṛṛindu'a su manga taumata tempo indi. ³¹Su Allo ng Kiamatta, Ratu wuassu wanua Timukka sarun mabangunna ringannu taumata n tempo indi, wuṛṛu mangansilla simangitou. Tadea'u, maaringikka alaṛṛa'i Salomo apan pande udde, Ratu udde nangatokku amamatta marau wuassu pentakku runia. Arawe isindi orassa indi pia sangkatou magewaḷanna wuassi Salomo! ³²Su Allo ng Kiamatta, tumana'u soa Niniwe sarun mabangunna su sambau ringannu taumata n tempo indi, wuṛṛu mangansilla simangitou, ana waugu taumata Niniwe udde nawaḷu wuassu manga rosane napawe Yunus nannase simangitou. Arawe isindi orassa indi pia magewaḷanna wuassi Nabi Yunus!"

Asasemakka wuṛṛu ararandumma

(Mat. 5:15, 6:22-23)

³³"Tawe taumata mande'omma soḷo see iwuni ara'e luuwannu wensada. Itou sarun mangado n soḷo udde su tampane, tadea'u taumata apan sumutta wotongnge maasilo semakka. ³⁴Mata eteudde soḷo m badangnga. Amungkangngu matanu matilangnga, ahewallu wadangngu masema-semakka. Arawe amungkangngu matanu maḷabukka, ahewallu wadangngu maola'a marandu-randumma. ³⁵Ana waugu udde, paa-tehamma, arie ma'oma n sara asasemakka apan si'ote udde maola'a marandumma. ³⁶Amungkangngu ahewallu wadangngu masemakka, wuṛṛu tawedu saran sambau marandumma, ne ahewallu wadangngu udde masema-semakka ere sassemarṛannu semakku soḷo."

Mawu Yesus napaasaḷa manga taumata n Farisi wuṛṛu huru n agama

(Mat. 23:1-36; Mrk. 12:38-40)

³⁷Napawe Mawu Yesus nangudussu wisara-Ne, sangkatou taumata n Farisi nangahe Sitou umanna su waḷene. Ne Mawu Yesus inaite inumanna isudde. ³⁸Taumata n Farisi udde naherangnga naasilo Mawu Yesus inumanna tawe nangukkassa lima rorone, tumuṛṛuttu atorannu agama. ³⁹Ana waugu udde Mawu nabbisara sitou, "Atonna iamiu manga taumata n Farisi ninumaramma mammaresi mangko wuṛṛu lama'a

tumba'u su liudde, arawe sulaḷummu watangannu napene laḷawangnga wuṛṛu aḷaḷeo. ⁴⁰Iamiu woddo! Waḷinewe Mawu Ruata apan na'ola'a wageangngu liudde udde, suete na'ola'a lai wageangngu laḷumme? ⁴¹Apan sulaḷummu mangko wuṛṛu lamangngu udde, eteudde ṛinone ionggolli amiu su taumata asiangnga. Ringannu olangnge aroddi, sarangkanambone sarun maola'a waresi hunane siamiu.

⁴²Nasilakate iamiu manga taumata n Farisi! Wua n sinuanannu ere salasih wuṛṛu inggu wuṛṛu rampa-rampa waine, iamiu mangngagillu sambageanganna su Mawu Ruata, arawe atatuḷidda wuṛṛu darangngu su Mawu Ruata tawe ia'ola'i amiu. Sumbali eteudde ṛinone olaanni amiu, ringannu tawe manantangngu atoranna waine lai.

⁴³Nasilakate iamiu manga taumata n Farisi! Iamiu maḷutu manga tampa awantuhanne sulaḷummu waḷe m pattataṛramawuanna, apulune aaddatanna su manga pasakka. ⁴⁴Nasilakate iamiu! Iamiu ere laḷabinganna tawe aranne, apan raṛṛindannu taumata awagananna."

⁴⁵Sangkatou huru n agama nabbisara Mawu Yesus, "Iamangnga Huru, ringannu manga wisara udde, Iamangnga mangngadio'a lai siami!"

⁴⁶Mawu Yesus sinumimbakka, "Iamiu lai nasilakate, manga huru n agama! Iamiu madorongnga manga inolaanna apan masahadda wuṛṛu mangagillu manga atoranna apan mawakkatta, arawe iamiu sassane maddiri mantuḷungngu taumata umaamanne. ⁴⁷Nasilakate iamiu! Iamiu manggolangnga manga nabi apan suete nipate n iupungngu aḷamonanu sassane. ⁴⁸Nariaddi iamiu sassane mangnga'u manungku iamiu suadio'a lai su inolaanna apan suete niola'u iupungngi amiu; ana waugu ete imangitou apan namate manga nabi udde wuṛṛu ete iamiu apan nanggolangnga. ⁴⁹Ana waugu udde Apapande Mawu Ruata nabbisara, 'Ia'u sarun mandolokku manga nabi wuṛṛu manga raloḷoṛrang-Ku ringanni mangitou; sangkawageanganna sarun pateanna wuṛṛu waine lai sarun sansaranna!' ⁵⁰Mawu Ruata na'ola'a udde tadea'u manga taumata orassa indi iṛṛuumanna ana waugu pamamate apan suete niola'a su manga nabi ro'e n runia nariaddi, ⁵¹nanattakka wuassu pamamate si Habel na'oma n sara pamamate si Zakharia, apan nariaddi su wallattu pangadoannu sasamba wuṛṛu Waḷe Mawu. Pangimante: Manga taumata orassa indi sarun iṛṛuumanna ana waugu sarangkanambone udde.

⁵²Nasilakate iamiu, manga huru n agama! A'unsi ipamu'a ngara n apande sasahipunanni amiu, arawe iamiu sassane maddiri sumutta sulaḷumme maddea'a apande udde. Arawe iamiu mangnguḷa'ukku manga taumata apan maapulu sumutta sulaḷumme!"

⁵³Napawe Mawu Yesus nanantangke tampa udde, manga huru n agama wuṛṛu manga taumata n Farisi mammansaggu Mawu Yesus. Imangitou mannattakke mammono'a Sitou tadea'u Itou mabbisara ringannu anambo n inolaan-Ne. ⁵⁴Wuṛṛu tantaḷanna udde lai,

imangitou mannutukka Sitou mapia-pia ana see maasametta manga apa apan nassaŋa iwabbisara-Ne.

Tatagu su taumata lilangkamaŋe'a

(Mat. 10:26-27)

12 Su ɽiwune taumata mangke uasaseppe'a na'oma n sara pia-ddu niaɽɽindanna leddane. Tantaŋanna manga taumata udde uarɽimpulunna, Mawu Yesus nabbisara su manga mallalaɽɽenggen-Ne, "Paatehamma su ragi n taumata Farisi, pandumang-Ku, lilangkamaŋe'i mangitou. ²Tawedu uawuni apan tawe aasiloanna, wuɽɽu tawedu apan iadappingnga apan tawe asingkatanna. ³Apan iwabbisara ng kamiu su allorane, sarun aringirɽanna lai su tempo allo; wuɽɽu apa apan isassaŋimburunggi ami u su taŋinga n taumata sulaŋummu wabbo'a uarɽuuda, sarun iaŋata su ala'wo'u tampa."

Ata'utte Mawu

(Mat. 10:28-31)

⁴"Paanaunge, manga hawe'u! Arie paata'utti mangitou apan mam-mate wadangnga arawe tawe maaola'a manampaŋiu wua isudde. ⁵Mappianne Ta'u ita'e siamiu apan ɽinone iaata'utti ami u. Ata'utte Mawu Ruata! Ana waugu napawe suete namate, Itou uataɽɽino lai mandammenu sulaŋummu naraka! Pangimante, tumba'u Itou iaata'utti ami u.

⁶Lima m bau manu'a sanggelokka niwaŋu'a ringannu aregane darua roitta apan aadio'anne. Salaiwe aroddi tawe saran sambau inabuŋianannu Mawu Ruata. ⁷Uta'a su puanu lai suete nireengnga anam-bone, ana waugu udde arie paata'utta; iamiu maareganna marau wuassu manga sanggelokka udde!"

Mangnga'u si Kristus su saruannu awadaalla

(Mat. 10:32-33, 12:32, 10:19-20)

⁸"Paanaunge mapia-pia: Taumata apan nanga'u su saruannu awadaalla manungku itou mallalaɽɽenggen-Ku, itou sarun a'uannu Ana'u Taumata lai su saruannu manga mala'ekattu Mawu Ruata. ⁹Arawe taumata apan nassinaada su saruannu awadaalla manungku itou mallalaɽɽenggen-Ku, itou sarun isinaadu Ana'u Taumata lai su saruannu manga mala'ekattu Mawu Ruata.

¹⁰Amungkangngu taumata mabbisara wisara lullawangnga Ana'u Taumata, itou wotongnge aampunganna, arawe amungkangngu itou mangngadio'a Gharraho Mawu Ruata, itou tawe aampunganna.

¹¹Amungkangngu iamiu iapidda su manga wale m pattata-rmamawuanna parikisanna su saruannu pamarenta ara'e tembonanne, arie paasinggawangnga su ola'u ereapa iamiu manahekku wadangngu ara'e su ola'u apa apan sarun iwisananu. ¹²Ana waugu apa apan sarun iwisananu udde, sarun itantiro n Gharraho Mawu Ruata si'o su tempone.

Sasumandingngu taumata ala apan woddo

¹³Sangkatou wuassu wallattu taumata nambo nabbisara Mawu Yesus, "Iamangnga Huru, wotongnge Iamangnga mandolokku turrangku mangonggolla sia'u sangkawageanganna wuassu darotongngu iamangngi ami."

¹⁴Mawu Yesus sinumimbakka, "Turrangnga, isai namile sia'u maola'a mallarruungnga ara'e matatahia darotongnga pussa'a su wallatti raddua?" ¹⁵Wua udde Mawu Yesus nabbisara su anambo n taumata isudde, "Paatehamma wurru paariaga, arie ma'oma n sara iamiu manarria'u. Ana waugu wiakku taumata tawe uaantimma wuassu paa'alane, salaiwe darotongnga uarundu'a."

¹⁶See Mawu Yesus nabatti'u sasumandingnga indi, "Pia sangkatou ala. Itou pia leta'a apan manambo hessine. ¹⁷Taumata ala udde nanattakke marringidda sulalummu naungnge, 'Inasueannu tampane hessi n leta'u. Apa apande'u orassa indi?" ¹⁸Wua udde itou narringida lai wurru nabbisara su watanganne sassane, 'Ore ia'u pia ringidda; manga tampa n darotongku iapaahohakka see ta'u iapaola'a lembo n ahewalanne. Isudde sarun pangadoannu alawo'u gandumma wurru manga darotongku waine. ¹⁹Wua udde sarun iwisara su riri'u sassane: I'o naauntungnga! Alawo'u apa apan mapia naola'e pussaanu wurru tawe masue sulalummu pira tonna alannune. Pangilloote orassa indi! Ante wurru pa'inumpe, wurru pamendampe lalumanna'u wiakku!" ²⁰Arawe Mawu Ruata nabbisara sitou, 'Ei taumata woddo! Rabbi indi lai i'o sarun mate, see isai sarun manahuanna paa'ala apan suete niammullu huna m badangngu?"

²¹Aroddi olangnge alawo'u taumata apan maddea'a maala huna n badangnge sassane, arawe tawe maddea'a maala su saruannu Mawu Ruata."

Pangimante Mawu Ruata

(Mat. 6:25-34)

²²See Mawu Yesus nabbisara su manga mallaḷarḷenggen-Ne, "Ana waugu udde Ia'u mabbisara, 'Arie paasinggawangnga su ola'u wiakki amiu, eteudde apa apan sarun annananni amiu, ara'e apa sarun ilurḷe ng kamiu.' ²³Wiakka udde nangillembu wuassu anna, wuḷḷu wadangnga nangillembu wuassu laubba. ²⁴Panutukka paapia manga manu'u winalanganna! Imangitou tawe massuanna, tawe mangitingnga, tawe lai gudangnga ara'e walingkakka. Arawe Mawu Ruata mappaduḷi simangitou. Iamiu lembo maareganna wuassu manga manu'a udde! ²⁵Isai su walatti amiu ringannu asasinggawangnge wotongnge maatamba uukke salaiwe adio'a? ²⁶Amungkangngu hatto adio'a udde tate ia'ola'i amiu, anio iamiu susinggawangngu inolaanna waine? ²⁷Panutukka ereapa manga wunga bakung tumuwo, manga wunga udde tawe mammanara, tawe lai mandadu'a. Arawe Ratu Salomo apan paa'alane aroddi anambone tawe mallurḷe n laubba aḷḷamange ere manga wunga udde! ²⁸Walabukka su wadda'a tumuwo allo indi wuḷḷu tirabbine masue tutunganna. Arawe Mawu Ruata mammedetta walabukka udde aroddi aḷḷamange. Nangillembote iamiu! Arawe pangangimanni amiu matulungnga! ²⁹Nariaddi, arie paasinggawangnga wuḷḷu umaliwu su ola'u apa apan sarun annananna wuḷḷu inumannu amiu. ³⁰Sarangkanambone udde raddeannu taumata apan wagga Mawu Ruata. Arawe lamangngu masingkatta manungku iamiu mappandumma sarangkanambone udde. ³¹Arawe iamiu ḷinone padea'a tadea'u Mawu Ruata mamarenta sulalummu wiakku, ne waine udde lai sarun ionggolu Mawu Ruata siamiu."

Darotongnga su surga

(Mat. 6:19-21)

³²"Iamiu apan tumba'u matulungnga anambone, arie paata'utta! Ana waugu lamangngu maluassa mangagillu alamatta siamiu wuassu Araratuan-Ne. ³³Walua'e darotongngu wuḷḷu anggila'e roinne su taumata asiangnga. Ola'e sulalummu ririnu tampa n roitta apan tawe marrenessa, eteudde darotongnga apan uaraddo su surga. Darotongnga udde tawe mawuḷi ana waugu tarra ta'o tawe maapanna'o wuḷḷu wiangnga tawe maahohakka. ³⁴Ana waugu suapa pia darotongngu uaraddo, isudde lai naungngu uaraddo!"

Mangangimbe apan sidutu uasaddia

³⁵"Paatehamma sumaruanna aławo'u hatto. Iamiu řinone sidutu uasaddia uallurře n laubba wuřru sořonu sidutu rare'omanna, ³⁶ere manga mangangimbe apan uasaddia mawune mawelengnga wuassu an-deangngu awingnga. Amungkanngu mawune udde mawelengnga wuřru manengkella ngara, imangitou sarun mařiha-řihakka' mamu'a ngara. ³⁷Tumanite naauntunga manga mangangimbe apan aratinganna tantařanna uarařraddo tempone mawune rumanta. Pangimante: mawune udde uasaddiate wuřru mandolokku mangangimbene udde uma'ianna, see itou nangimbete simangitou. ³⁸Tumanite naauntunga manga mangangimbe udde inaratingannu mawune tantařanna uarařraddo, sa-laiwe itou nirumanta řabbi mattangnga ara'e mallannuanna lai wua isudde! ³⁹Paanaunge indi! Unnu wisara tatahuannu waře masingkatta orassa tingngera tarřa ta'o rumanta, itou sarun mandiaga tadea'u tarřo ta'o udde tawe maasutta sulalummu wařene. ⁴⁰Ana waugu udde iamiu řinone uasasaddia, ana waugu Ana'u Taumata sarun rumanta su tempo apan tawe iařrangngo ng kamiu."

Mangangimbe apan matuřrutta wuřru mangangimbe apan mařawangnga

(Mat. 24:45-51)

⁴¹"Mawu, apa ařarřa'a udde pandumanne siami ara'e su taumata nambo?" aiwařo m Petrus.

⁴²Mawu Yesus sinumimbakka, "Isai mangangimbe apan matuřrutta wuřru pande ma'oma n sara pileannu mawune maola'a tembonannu mangangimbe waine tadea'u itou mappaanmi mangitou su tempone?

⁴³Lařumanna'a eteapa su mangangimbe udde napawe mawune mawelengnga wuřru naaratingnga sitou tantařanna mammanara manarane!

⁴⁴Pangimante: Mawunu udde sarun manantillu aławo'u rarotongnge su mangangimbe udde. ⁴⁵Arawe amungkanngu mangngimbe udde mabbi-sara sulalummu naungnge, 'Mawu'u ta'e mařannu mabelengnga,' see itou namuulle anambo n mangangimbe, wuřru umanna; ma'inumma ma'oma n sara iwu'anne, ⁴⁶ne mawune mabelengnga su allo wuřru orassa apan tawe iařrangngo. Wuřru mangangimbe udde sarun puuřannu mawune see olaanna lai ere manga taumata apan tawe tumuřrutta Mawu Ruata.

⁴⁷Mangangimbe apan masingkattu apulu mawune, arawe tawe uasasaddia wuřru maddiri tumuřrutta apulu mawune udde sarun heserřanna

ringannu ma'ikkatta. ⁴⁸Arawe mangangimbe apan masingkattu apulu mawune, wua udde na'ola'a sambau apan nassała ma'oma n sara puułanna, tumba'u puułanna masi'ome. Ana waugu taumata apan suete nionggolañnu manambo wuassi tou sarun padoronganna lai manambo. Wuřru taumata apan suete nipangimananna masokka, wuassi tou lai sarun padoronganna masokka lai."

Wałine paddarame arawe pasaseetta

(Mat. 10:34-36)

⁴⁹"Ia'u nirumanta su runia indi mandanta n sořroba. Apia eteapa amungkangngu putungnga luřřenggampe! ⁵⁰Ta'e pia lai asasusa wahewa sarun ta'u pendamanna. Wuřru naungku u'ambułisada amungkangngu udde taambe natipussa. ⁵¹Apa iamiu massunna manungku Ia'u rumanta mangapiddu paddarame su runia? Tawe, wałine paddarame ewe'e pasaseetta. ⁵²Manattakka orassa indi, su wałe sambau apan lałorřone sire lima, sarun matatiakka, sire tallu mandooppa rua ng katou, ara'e rua ng katou mandooppa sire tallu. ⁵³Iamangnga sarun mandooppa anangnge esakka wuřru anangnge esakka sarun mandooppa iamangnge. Inangnga mandooppa anangnge wawine, wuřru anangnge wawine mandooppa inangngene. La'iananna wawine sarun mandooppa mananambone wawine wuřru mananambo wawine sarun mandooppa la'iananna wawine."

Ma'illała tatiala n tempo

(Mat. 16:2-3)

⁵⁴Mawu Yesus nabbisara lai su taumata nambo, "Amungkangngu iamiu maasilo winabbawa wuassu samba'a n wařřatta, iamiu lapiddu mabbisara, 'Sarun manguranna,' Wuřru atonna-tonna mangu-ranna. ⁵⁵Amungkangngu maappendamma anginna nirumanta wuassu timukka, iamiu mabbisara, 'Sarun mapadissa.' ⁵⁶Iamiu taumata apan maa-pulu mangawusu! Iamiu wotongnge mařřangngo n tempone ringannu ma'ellega ola'u langitta wuřru runia. Anio tatiala indi tawe iařřangngo ng kamiu?"

Padamete ringannu seetta

(Mat. 5:25-26)

⁵⁷"Anio iamiu tawe marrawessa sassane apa apan narriño?
⁵⁸Amungskangngu pia taumata mangalae ng kamiu su mallarũungnga, suapa n wotongnge padea'a hatto udde masue ringanni tou tantanna iamiu ta'e su tangnga n dalanna. Amungskangngu tawe, itou sarun mangapiddi amiu su saruannu mallarũungnga udde wuřru mallarũungnga udde sarun manantilli amiu su polisi, wuřru polisi sarun marřuumanni amiu su tutupanna. ⁵⁹Pangimante! Iamiu tawe maa-sabangnga wuassu tutupanna tantanna wawaekku řuumanna udde taambe niawaeřranna."

Amungskangngu tawe mawaļu wuassu rosa sarun mawinasa

13 Su tempo udde taumata nabbati'a Mawu Yesus su ola'u manga pira taumata n Galilea apan nipate m Pilatus, su tempo imangitou mangngapiddu sasamba su Mawu Ruata. ²Naaringikka watti'a udde, Mawu Yesus nabbisara, "Ana waugu taumata n Galilea nipate ereudde, iamiu massunna udde tatialane imangitou lembo marosa wuassu manga taumata n Galilea waine? ³Atonna-tonna tawe! Arawe paanaunge: amungskangngu iamiu tawe mawaļu wuassu manga rosa ng kamiu, sarangkanambone sarun mate lai ere imangitou. ⁴Ereapa lai ringannu sire mapuļo uaļu taumata apan nate su Siloam, su tempo menara udde nema'a simangitou? Iamiu massunna udde ere sambau tanda manungku imangitou arosanne wuassu manga taumata waine apan uatana'a su Yerusalem? ⁵Atonna-tonna tawe! Paassa lai ia'u mabaļo: Amungskangngu iamiu tawe mawaļu wuassu manga rosa ng kamiu, iamiu sarangkanambone mate lai ere imangitou."

Sasumandingngu alu ara apan tawe mabua

⁶Wua udde Mawu Yesus nabbati'u sasumandingnga indi, "Pia sangkatou taumata uatahuanna alu ara su waillu angcorene. Su sambau allo itou inaite maddea'a wua ng kalu udde, arawe tawe naasomba saran sambau. ⁷Nariaddi itou nabbisara su mabbawaille udde, 'Pa'ellega, tallute tonna ia'u ruddanta maddea'a wua ng kalu ara indi, arawe tawe maasomba saran sambau. Tuwangke alu udde! Itou tumba'u mangngin-

sue **anna** sulaɭummu leta'a! ⁸Arawe mabbawailla udde sinumimbakka, 'Wala'e lai itou mabbiakka tumuwo santonna indi, Mawu. Ia'u sarun **mamasolla** leta'a uapaliwutta sitou wuɾu pupuɾanna. ⁹Asinungka itou mabua tonna suhati. Arawe amungkangngu tawe, wotongnete Mawu mandolokka mapatuwangngi tou.'"

Mawu Yesu napaapia n sangkatou wawine uaaɭudungnga su allo n Sabatta

¹⁰Su sambau allo n Sabatta, Mawu Yesu mangngaɾɾa'a su waɭe m pattataɾɾamawuanna. ¹¹Isudde pia wawine mapuɭote uaɭu su tonnane marada'a, ana waugu pia ghaɾraho laɭeo sulaɭummu wadangnge. Wawine udde uaaɭudungnga wuɾu tawe maarisikka matuɭida. ¹²Napawe Mawu Yesu naasilo sitou, winagoante itou, "Inangnga i'o mapia wuassu radangngu!" ¹³See Mawu Yesu namita wawine udde, ne su orassa udde lai itou naarisikka matuɭida see nadalote Mawu Ruata.

¹⁴Piaɾɾa'u waɭe m pattataɾɾamawuanna udde namuɭo, ana waugu Mawu Yesu napaapia n taumata su allo n Sabatta, ana waugu udde itou nabbisara su manga taumata, "Pia annummu allo ipammanara; rantate su miallo-miallo udde see iapaapia, imabaɾrangnga su allo n Sabatta!"

¹⁵Mawu sinumimbakka, "Lilangkamaɭe'a iamiu indi! Su allo n Sabatta anambo n taumata mammallossu sapi ara'e keledai wuassu tandangnge wuɾu iaapidda su liudde ana iapa'inumma. ¹⁶Ne, orassa indi pia sangkatou wawine papapulunni Abraham, apan mapuɭote uaɭu su tonnane aɭannune aiitannu Setanna. Apa itou tawe iapaapallossa wuassu aiitta udde su allo n Sabatta?" ¹⁷Sasimbakku Mawu Yesu udde naasili atonna manga ro'amme; arawe anambo n taumata waine lulluassa naasilo aɭawo'u aɭaɾɾindu'a apan niola'u Mawu Yesu.

Sasumandingngu watu n sawi

(Mat. 13:31-32; Mrk. 4:30-32)

¹⁸Mawu Yesu naiwaɭo, "Napawe Mawu Ruata mamarenta, ereapa olangnge? Ringannu apa Ia'u wotongnge manumandingnga? ¹⁹Olangnge ere sasumandingnga indi. Sambau watu n sawi niapiddu sangkatou taumata nisuanne su waille. Watune udde tinumuwo see naola'a alu, wuɾu manga manu'a na'ola'a saɭakke su manga ranna ng kalu udde."

Sasumandingngu ragi

(Mat. 13:33)

²⁰Paassa lai Mawu Yesus naiwaŋo, "Amungkanngu Mawu Ruata mamarenta, ringannu apa Ia'u manumandingngu olangnge? ²¹Olangnge ere ragi apan nianu n sangkatou wawine see niompelu taponna appatu puŋo su liteŋrene, na'oma n sara tinumuwo."

Ngara apan marriputta

(Mat. 7:13-14, 21-23)

²²Sulaŋummu amatanna watukku Yerusalem, Mawu Yesus sinumabbi manga soa wuŋru manga ampungnga lapiddu mangngaŋra'a. ²³See pia taumata naiwaŋo Sitou, "Iamangnga, apa tumba'u matuŋlungnga taumata masaŋamatta?"

Mawu Yesus sinumimbakka, ²⁴"Pattinsahadde sumutta malliu ngara apan marriputta. Ana waugu naunge! Manambo taumata maddea'a sumutta arawe tawe maasutta. ²⁵Napawe tatahuannu waŋe napu'o wuŋru narŋuudu ngarane, iamiu uarisikka su liudde wuŋru nanattakke man-nengkella lapiddu mabbisara, 'Mawu, iami pamu'aiwe ngara!' Mawu udde sarun sumimbakka, 'Ia'u wagga iamiu wuassuapa!' ²⁶Iamiu sarun sumimbakka, 'Iami suete inumanna wuŋru na'inumma su sambau ringannu Mawu, wuŋru Mawu suete nangngaŋra'a lai su manga laŋanna su soa ng kami!' ²⁷Arawe Mawu udde sarun mabbisara apia, 'Ia'u wagga iamiu wuassuapa. Passaŋiu wua isindi, iamiu apan na'ola'a aŋaŋeo!' ²⁸Su tempo iamiu naasilo si Abraham, Ishak wuŋru si Yakub wuŋru anambo n manga nabi lulluassa sulaŋummu Runia Waku Mawu Ruata, iamiu sarun lumuai wuŋru matataŋrangnga susa ana waugu iamiu sassane nillimbuaŋrangna watukku liudde! ²⁹Manga taumata sarun rumanta wuassu ra'i wuŋru waŋratta, wuassu sawannakka wuŋru timukka, wuŋru sarun lumuassa sulaŋummu Runia Waku Mawu Ruata. ³⁰Atonna-tonna, pia taumata panginsueanne sarun maola'a taumata paarorone, wuŋru pia taumata apan paarorone sarun maola'a panginsueanne."

Mawu Yesus niuimakkannu Yerusalem

(Mat. 23:37-39)

³¹Su tempo udde lai, pia manga pira taumata n Farisi nirumanta ringannu Mawu Yesus wuṛṛu nabbisara, "Arie paatana'a isindi! Roote su tampa waine, ana waugu Herodes pia pandumma mamate Si'o."

³²Mawu Yesus sinumimbakka, "Roote waḷoa'a su taumata apan tawe gunane udde, 'Allo indi wuṛṛu tiṛṛabbi Ia'u mallimbuakka ghaṛṛaho laḷeo wuṛṛu mapaapia n taumata marada'a, arawe su allo atallune Ia'u sarun manginsue manara-U.' ³³Salaiwe aroddi Ia'u ṛinone manassute lai amatang-Ku allo indi, tiṛṛabbi wuṛṛu tillorega, ana waugu laḷeo sangkatou nabi pateanna su liuddu Yerusalem.

³⁴Yerusalem, Yerusalem! Manga nabi suete nipatenu! Manga ra-
loḷoṛṛannu Mawu Ruata suete tinuntungannu watu na'oma n sara nate!
Paapirate ia'u maapulu mangammullu anambo n tumana'u soa indi
ere inangngu manu'a mangooppa manga anangnge sulaḷummu papai-
dde, arawe i'o maddiril! ³⁵Ana waugu udde Mawu Ruata tate lai
maṛṛundingannu. Paasingkate, manattakka orassa indi i'o tate lai maa-
silo Sia'u, ma'oma n sara i'o mabbisara, 'Niaḷamatannte Itou apan niru-
manta ringannu arannu Mawu."

Mawu Yesus napaapia n sangkatou marada'a

14 Su sambau allo n Sabatta, Mawu Yesus inaita inumanna su waḷe
n sangkatou piaṛṛa'u Farisi. Isudde manga taumata mannutukka
Mawu Yesus mapia-pia. ²Ne nirumantate ringannu Mawu Yesus sang-
katou marada'a hanne su limane wuṛṛu su leddane. ³See Mawu Yesus
naiwaḷo su manga huru n agama wuṛṛu manga taumata n Farisi apan
isudde, "Tumuṛṛuttu Tita n agama ng kite, wotongnge iite mapaapia n
taumata marada'a su allo n Sabatta ara'e tawe?"

⁴Manga huru n agama wuṛṛu taumata n Farisi udde nallannaba. See
Mawu Yesus namaggo taumata udde wuṛṛu niapaapiate n tou, wua udde
itou nirolokke niapaapuḷe. ⁵Wua udde Mawu Yesus nabbisara su manga
taumata, "Unnu wisara sangkatou wuassu wallatti amiu pia anangnge
ara'e sapi apan nanawo sulaḷummu paṛṛihi su allo n Sabatta, apa itou
tawe watunanna su liudde, ana'a ara'e sapi udde su allo udde lai?"

⁶Arawe tawe saran sangkatou wotongnge sinumimbakka Mawu
Yesus su ola'u hatto udde.

Masarjionto'a wuṛṛu marangngu

⁷Mawu Yesus naasilo manga raho apan namile tampa apianne. Ana waugu udde Itou nangagillu alaṛṛa'a indi simangitou nambo. ⁸"Amungskangngu iamiu waḷoanna su andeangngu awingnga, arie inai uma'ianna su addera awantuhanne, ana waugu arie piaddu sangkatou waine apan lembo n aaddatanna wuassi amiu suete winaloanna lai, 'na'oma n sara tatahuannu waḷe apan suete nabaḷo siraddua udde, ringannu ipabbawata'a rumanta ringanni amiu wuṛṛu mabbisara, 'Madorongnga ampungnga, tampa indi suete nisaddia su raho udde.' Ne ringannu massili i'o nangingkatta su tampa apan su liudde. ¹⁰Ana waugu udde, amungskangngu iamiu waḷoanna, pamile tampa su liudde, tadea'u tatahuannu waḷe rumanta wuṛṛu mabbisara siamiu, 'Hawe wette aiana'e su tampa apianne.' Ringannu aroddi iamiu aaddatanna su saruannu anambo n raho waine. ¹¹Ana waugu suapa n taumata apan mannaggakku watanganne sarun iapaawawo, arawe isai mammawo n watanganne sarun iapaatanggakka."

¹²See Mawu Yesus nabbisarate mawu m baḷe, "Amungskangngu i'o mabaḷo taumata su andeangnga umanna allo ara'e rabbi, arie mabaḷo hawe ara'e tuṛrangnga, ara'e sangkatuṛrangnganna, ara'e aḷindonganne apan ala. Ana waugu pia tempone lai imangitou mabaḷo si'o, wuṛṛu ringannu aroddi i'o manengkamma wawaḷinne wuassu inolaannu. ¹³Nariaddi, amungskangngu i'o ma'ola'a andeangnga, waḷoite taumata asiangnga, taumata pia sangkulle, taumata lome wuṛṛu taumata wuta. ¹⁴I'o sarun alaumatanna, ana waugu manga taumata udde tawe mawaḷissa apapiannu. Apapiannu sarun waḷisannu Mawu Ruata su tempo manga taumata apan mapia iapaawangunna apia wuassu papate."

Sasumandingngu andeangnga apan wahewa

(Mat. 22:1-10)

¹⁵Su tempo sangkatou wuassu wallattu taumata u'anna su sambau isudde naaringikka wisara Mawu Yesus, itou nabbisara, "Auntunganna eteapa su taumata apan sarun umanna su sambau ringannu Mawu Ruata napawe Itou rumanta ere sangkatou Ratu!"

¹⁶Arawe Mawu Yesus nabbisara taumata udde, "Su sambau allo pia sangkatou na'ola'a andeangnga apan wahewa wuṛṛu nabaḷo taumata nambo. ¹⁷Napawe na'omate tempone manattakku andeangnga, taumata udde nandolokku mangangimbene inai ringannu manga raho wuṛṛu nabbisara, 'Wette rantate, sarangkanambone nasaddiate!' ¹⁸Arawe imangi-

tou sarangkanambone, sangkatou-sangkatou madorongnga ampungnga. Paarorone nabbisara su mangangimbe udde, 'Ia'u wakkute namalli leta'a, wuŕŕu ia'u inai mamarikissa leta'a udde. Ampungewe ia'u.' ¹⁹Waine lai nabbisara, 'Ia'u wakku namalli lima m pare sapi, wuŕŕu inai maannammu manga sapi udde. Ampungewe ia'u.' ²⁰Waine lai nabbisara, 'Ia'u wakkute naawingnga. ana waugu udde ia'u tawe maaranta.'

²¹Mangangimbe udde napuŕete wuŕŕu nabaŕo n olangnge udde su mawune. Mawune mangke nasa'u, wuŕŕu nabbisara su mangangimbene, 'Paalihakka inai su manga laŕanna wuŕŕu manga sasuttanna su soa. Apira'e isindi taumata asiangnga, taumata pia sangkulle, taumata wuta, wuŕŕu taumata lome.' ²²Wua udde mangangimbe udde nabbisara, 'Mawu, parenta Mawu suete niapaamatta, arawe tampa ta'e manambo.' ²³See mawu udde nabbisara, 'Roote watukku laŕanna wuŕŕu manga sasuttanna su liuddu soa, wuŕŕu wataa'e taumata rumanta, tadea'u waŕe'u mapene. ²⁴Paanaunge! Tawedu saran sangkatou wuassu wallattu manga raho apan suete niwaŕoanna udde inumanna annu andeangku indi!'"

Asasahaddu sangkatou mallaŕaŕŕenggenna

(Mat. 10:37-38)

²⁵Manambo taumata u'amatta su sambau ringannu Mawu Yesus. Mawu Yesus nanaile wuŕŕu nabbisara simangitou, ²⁶"Amungskangngu taumata rumanta ringang-Ku, arawe lembo mandangngu inangngene, iamangnge, awingnge, aŕaŕanangnge, manga tuŕrangnge, lembonete ririne sassane, itou tawe maola'a mallaŕaŕŕenggeng-Ku. ²⁷Taumata apan maddiri mamasanna arussane wuŕŕu tumantalongnga Sia'u, tawe maola'a mallaŕaŕŕenggeng-Ku. ²⁸Amungskangngu sangkatou wuassu wallatti amiu maapulu mapararisikku menara itou sarun uma'ianna mandeengnga rorone roinne, tadea'u itou maasingkatta apa roinne wotongnge ipanginsue menara udde ara'e tawe. ²⁹Ana waugu amungkangu natualage itou tawe wotonge maasue menara udde, salaiwe rapappakke naola'e, ne alawo'u taumata apan maasilo manara udde sarun lumagge n tou. ³⁰Imangitou sarun mabbisara, 'Ih, taumata indi mapararisikka, arawe tawe maasue manarane!' ³¹Amungskangngu sangkatou ratu pia tantarane mapuŕo ŕiwu su atoune inai mappapangalo ringannu ratu waine apan uatahuanna tantara rua m puŕo su ŕiwune, ratu udde sarun uma'ianna maŕringidda asuene apa itou matohasse mandooppa seenne udde. ³²Amungskangngu itou masingkatte manungku itou lome, asinungka su tempo seenne ta'e marau, itou mandolokku raloŕoŕanne inai madorongnga maddame." ³³Panginsueanne Mawu Yesus nabbisara, "Aroddi lai matataŕŕino siamiu. Tawe saran sangkatou wuassi amiu wo-

tongnge maola'a mallalarrenggeng-Ku, amunggangngu itou tawe manan-tillu alawo'u darotongnge."

Asimma apan maammi

(Mat. 5:13; Mrk. 9:50)

³⁴"Asimma udde mapia, arawe amunggangngu naola'e maammi, wotongnge iapaapakkada apia? ³⁵Tate gunane lai, mapia ete su wailla aroddi lai ipanuwukka sasuanna. Nariaddi rammea'e. Amunggangngu pia talinga padaringikka!"

Domba apan nawuli

(Mat. 18:12-14)

15 Su sambau allo, manambo mallaluŕru wose wuŕru manga taumata apan sassunnanna laŕŕro n soa laŕeo, nirumanta madaringikka Mawu Yesus. ²Manga taumata n Farisi wuŕru manga huru n agama mannattakke sussaliomanna. Imangitou mabbisara, "Eh, taumata indi mannengkamma taumata laŕeo wuŕru u'anna lai su sampunna ringanni mangitou!" ³Aia waugu udde, Mawu Yesus nabbati'e simangitou sasumandingnga indi,

⁴"Unnu wisara sangkatou wuassi amiu uatahuanna domba marŕasutta see itou niawuliannu sambau - apa sarun olaanne? Natan-tunna itou sarun manantangngu sio m puŕo sio domba udde su wadda'a, wuŕru inaita maddea'a sambau apan nawuli udde ma'oma n sara asombanganna. ⁵Wuŕru napawe itou naasombate apia domba udde, itou aroddi lulluassa na'oma n sara pinasanna domba udde su wambangnge, ⁶see niapidda napule. Wua udde itou namago manga hawene wuŕru alindonganne, wuŕru nabbisara, 'Wette iite lumuassa. Domba'u apan nawuli niasombangante apia!' ⁷Ne, aroddi lai su surga pia alaluassa apan wahewalla su sangkatou apan marosa nawalu wuassu rosane, wuassu sio m puŕo sio taumata apan mapiate wuŕru tate lai iwata'a mawalu wuassu rosane."

Roitta apan nawuli

⁸"Ara'e unnu wisara sangkatou wawine uatahuanna mapuŕo roitta sala'a, see sambau nawuli - apa sarun olaanni tou? Itou sarun mande'omma soŕo wuŕru manapu walene lapiddu maddea'a su



Domba apan nawuŕi (15:4)

aŕawo'u tampa ma'oma n sara asombanganna roitta udde. ⁹Su tempo itou naasomba roitta udde, itou namago manga hawene wuŕru manga aŕindonganne, see nabbisara, 'Ia'u lulluassa atonna ana waugu niasombangante apia roi'u apan nawuŕi. Wette iite lumuassa!' ¹⁰Aroddi lai mala'ekattu Mawu Ruata lulluassa napawe pia sangkatou taumata laŕeo nawaŕu wuassu manga rosane. Pangimante!"

Ana'a apan nawuŕi

¹¹Mawu Yesus nabbisara apia, "Pia sangkatou iamangnga apan pia anangnge rua ng katou esakka. ¹²Iapa atuarianne nabbisara sitou, 'Iamangnga, anggiŕa'e sia'u wageangku orassa indi wuassu darotongngi ite.' Ne iamangnge nattahiate darotongnge udde su anangnge rua ng katou udde. ¹³Manga pira allo wua udde ana'a atuarianne udde nabaŕu'u wageangnge pussaane udde see inaite su wanua marau. Poiaroddi itou nanginsuete roinne wuŕru mallalumanna'e. ¹⁴Napawe roinne udde nasuete, nariaddite su wanua udde ŕutumma apan wahewa, na'oma n sara itou nasusate. ¹⁵See itou inaite nammanara ringannu sangkatou tumana'u soa isudde, apan nandolokki tou su wailla mandiaga wawi. ¹⁶Itou niamaŕunusante, na'oma n sara itou pia apulu malloŕro tianne ringannu annu manga wawi udde. Salaiwe itou maŕunussa aroddi, tawe saran sangkatou mangonggolu anna sitou. ¹⁷Panginsueanne itou naa-

naungnga wuŕru nabbisara, 'Manga taumata apan mammanara ringannu iamangku pia anna marasai arawe ia'u isindi matete n lunussa! ¹⁸Ia'u mapuŕete wuŕru inaite ringannu iamangku wuŕru mabbisara sitou: Iamangnga, ia'u suete na'ola'a rosa su saruannu Mawu Ruata wuŕru su saruanni Iamangnga. ¹⁹Ia'u tate su ŕinone lai isago ana'u Iamangnga. Ola'e ia'u ere sangkatou allangngu Iamangnga.' ²⁰Ne itou inaite napuŕe ringannu iamangnge.

Ta'e marau wuassu waŕe, itou niasiloante n iamangnge. Ringannu aakkanna iamangnge tinumaŕangnga naisasomba n tou, see naŕra'uppa wuŕru nangari'a sitou. ²¹'Iamangnga,' unnu ana'a udde, 'Ia'u suete na'ola'a rosa su saruannu Mawu Ruata wuŕru su saruannu Iamangnga. Tate su ŕinone lai ia'u isago ana'u Iamangnga.' ²²Arawe iamangnge namago manga mangangimbene wuŕru nabbisara, 'Paaŕihakka! Panganu laubba apianne, wuŕru luŕrea'e sitou. Luŕrea'a lai siŕsingnga su taŕimadone, wuŕru sapatu su leddane. ²³Wua udde panganute ana'u sapi atawanne wuŕru pototte. Iite sarun umanna wuŕru lumuassa. ²⁴Ana wangu ana'u indi natete, orassa indi nabbiakke apia; itou nawuŕite, orassa indi niasombangante apia.' See imangitou nanattakke naandeangnga.

²⁵Tantaŕanna udde, ana'a pahuŕune su wailla. Su tempo itou napuŕe wuŕru na'omate marani m waŕe, itou naaringikka tingikku musikka wuŕru masasaŕaingnga. ²⁶Itou namago sangkatou su wallattu mangangimbene see naiwaŕo, 'Pia apa su waŕe?' ²⁷Mangangimbe udde sinumimbakka, 'Tuarinu nawelengke! Wuŕru iamangngu suete nandolokka niapapototta ana'u sapi apan matawa, ana wangu nawelengnga apia ana'i tou ringannu saŕamatta!'

²⁸Ana'a pahuŕune udde mangke nasa'u, na'oma n sara itou maddiri sumutta su waŕe. See iamangnge sinumabangnga wuŕru nassaŕo'e n tou niapaasutta. ²⁹Arawe itou nabbisara, 'Ringannu tonnane aŕannune ia'u mammanara ringanni Iamangnga. Taambe saran paassa ia'u nilumawangnga parenta m Iamangnga. Apate nionggolli Iamangnga sia'u? Ambingnga sambau lai taambe nionggolli Iamangnga sia'u ipa'ola'a andeangnga ringannu manga hawe'u! ³⁰Ana'u Iamangnga udde suete nanginsue darotongngu Iamangnga ringannu wawine masandaga, arawe napawe itou nawelengnga, Iamangnga namototta ana'u sapi apan matawa sitou!'

³¹'Ana'u,' sasimbakku iamangnge, 'i'o sidutu isindi ringanku. Anambo n darotongnga apan tatahuananku udde darotongngu lai. ³²Arawe iite sarun maandeangnga wuŕru lumuassa ana wangu tuarinu udde natete, arawe orassa indi nabbiakke apia; itou nawuŕite, arawe orassa indi nawelengke apia.'"

Mangangado n roitta apan pande

16 Mawu Yesus nabbisara mallaḷarṙenggen-Ne, "Pia sangkatou tau-mata ala. Itou pia sangkatou mangangado n roitta apan mang-atokku paa'alane. Taumata ala udde naasomba alae manungku mangangado n roitta mangnginsue roinne. ²Nariaddi itou namagote mangangado n roitta udde wuṙṙu nabbisara, 'Apa indi niaringirṙangku atonna su ola'u pamamanaranu? Orassa indi, tantiḷa'e sia'u hessi n manaranu su pinangatokku paa'ala'u. I'o tate wotongnge maola'a mananahipunna roi'u.' ³Ne mangangado n roitta udde naṙringida, 'Ia'u sarun ma'ola'e apa orassa indi? Mawu'u tate mapaamanara'u. Ma-masolla ia'u alangkatta; madorongnga ia'u massili. ⁴Ia'u pia apande; amungkangngu ia'u iaddo, ia'u sarun maddea'a hawe'u manambo apan maapulu mapaatana'u su waḷe mangitou!' ⁵Nariaddi mangangado n ro-it-ta udde namagote manga taumata apan naballassa roitta su mawune. Su taumata paarorone itou nabbisara, 'Sangkura awallannu su mawu'u?' ⁶Taumata udde sinumimbakka, 'Maṙṙasutta su wensadde lana n zaitun.' Mangangado n roitta udde nabbisara apia sitou, 'Indi reengannu awal-lannu. A'iante wuṙṙu paaliḥakka mamorṙetta lima m puḷo.' ⁷Wua udde itou nabbisara su taumata aruane, 'Wuṙṙu su tuṙrangnga, pira awallassi tuṙrangnga?' Taumata udde sinumimbakka, 'Saṙṙiwu su karongnge gan-dumma.' Mangangado n roitta udde nabbisara sitou, 'Indi reengannu awallannu. Worṙetta'e ualu ṙasutta.'

⁸Ne mawu mangangado n roitta apan taṙṙa ḷinga udde nadalo sitou ana waugu inolanne apan mangngapande udde; ana waugu manga taumata n runia indi mappandeanna mangatokku manara mangitou wuassu mangatokku taumata apan mabbiakka sulaḷummu asasemakka."

⁹See Mawu Yesus nabbisara apia, wisara-Ne, "Padaringikka! Paata'e paa'ala n runia indi ipadea'a hawe, tadea'u napawe darotongngu runia indi tate aregane, iamiu sarun iapaatana'a su tampa n atatanaanna apan tawe pangudusanne. ¹⁰Taumata apan wotongnge apangimananna su manara maradio'a, wotongnge lai pangimananna su manara wahewa. Arawe taumata apan tawe apangimananna su manara maradio'a tawe apangimananna lai su manara wahewa. ¹¹Nariaddi, amungkangngu su ola'u darotongngu runia indi iamiu tate apangimananna, isai maapulu mangngimanna siamiu su darotongngu ṙimuudda? ¹²Wuṙṙu amungkang-ngu su ola'u sarannapa apan tatahuanannu taumata waine, iamiu niatia-lanna tawe apangimananna, isai maapulu mangonggolla siamiu saran-napa apan tatahuananni amiu?

¹³Tawe saran sangkatou wotongnge maapammanara su rua ng katou mawu; ana waugu itou sarun lembo marangngu su sangkatou wuassu

sangkatou waine, ara'e itou sarun lembo marangnu su mawune apan sangkatou wuassu mawune waine. Aroddi lai matataŕŕino siamiu. Iamiu tawe maapammanara su Mawu Ruata wuŕŕu su darotongnu runia lai."

Manga wisara Mawu Yesus

(Mat. 11:12-13, 5:31-32; Mrk. 10:11-12)

¹⁴Manga taumata n Farisi naaringikka aławo'u wisara apan niwisara Mawu Yesus. See imangitou nilumage n Tou, ana waugu imangitou waļu n roitta. ¹⁵Arawe Mawu Yesus nabbisara simangitou, "Ete iamiu taumata apan su saruannu taumata waine ellehanna mapia, arawe Mawu Ruata masingkattu laļoŕŕo naungnu. Ana waugu apa apan sassunnannu taumata matanggakka, su aellegu Mawu Ruata udde mawawo.

¹⁶Tita apan nionggolli Musa wuŕŕu aļarŕa'u manga nabi, sidutu ta'e ipappaatta na'oma n sara tempo n Yohanes Mananaŕŕani. Wuassu tempo udde Watti'u Aļaluassa su ola'u ereapa Mawu Ruata mamarenta ere sangkatou Ratu sidutu iwabbatti'a. Wuŕŕu taumata mammata'e n ririne tadea'u maola'a laļoŕŕo n araratuannu Mawu Ruata. ¹⁷Arawe malluaasanna langitta wuŕŕu runia mawuļi, wuassu woŕŕetta sambau sulaļummu Tita Mawu Ruata tawe matipussa.

¹⁸Isai manindo awingnge see maawingngu wawine waine, taumata udde sinumandaga. Wuŕŕu taumata apan maawingngu wawine apan suete sinindoanna udde, sinumandaga lai."

Taumata ala wuŕŕu Lazarus

¹⁹"Pia sangkatou ala. Peddenne mangkasagada aregane wuŕŕu wiakke mannampaļu apiane su miallo-miallo. ²⁰Su saruannu ngara n waļene niapaa'ianna sangkatou asiangnga aranne Lazarus. Awangnge napene n ibbongnga. ²¹Itou maapulu umanna manga taŕŕoto ng kanna apan mannawo wuassu medda n taumata ala udde. Arawe asu ewe'e n-rumanta nallewa lessane.

²²Taumata asiangnga udde see natete wuŕŕu niapiddu mala'ekatta watukku tampa awantuhanne su sandiŕŕanni Abraham su surga. Taumata ala udde nate lai wuŕŕu see nilabingnga. ²³Su runia n taumata nate itou uatataŕŕangnga. Wuŕŕu napawe itou naningngara wua poiardo-ddi, itou naasilo si Abraham su tampa apan marau wuŕŕu Lazarus su sandiŕŕanni Abraham. ²⁴"Iamangnga Abraham!" sasalande n taumata ala

udde. 'Akkanaawe ia'u. Dolorra'a Lazarus mangammo n talimadone su ua'e, see rumanta marrolo lila'u. Ia'u mangke nasansarate sulaumu putungnga indi!

²⁵Arawe Abraham sinumimbakka, 'Naungewe ana'u: su alo'engngu pabbiarannu i'o suete naasomba manambo apianne; arawe Lazarus naasomba ala'eoanne. Orassa indi itou maluassa isindi, wu'ru i'o uatatarangnga. ²⁶Wu'ru lai, su wallatti ite suete niola'a sambau rampissa mal'oangnga, tadea'u taumata wua isindi tawe maaranta poiarddi, wu'ru taumata poiarddi tawe maaranta isindi! ²⁷'Amungkanngu aroddi, Iamangnga, wisara n taumata ala udde, 'ia'u sumal'ande su Iamangnga tadea'u mandolokki Lazarus watukku wale n iamangku. ²⁸Pia sire lima turangku isudde. Dolorra'e Lazarus mapanaungnga simangitou, tadea'u arie imangitou lai manawo su tampa n sansara indi.'

²⁹Abraham sinumimbakka, 'Imangitou lai piate manga wuke Musa wu'ru wuke manga nabi! Wala'e imangitou tumurutta apa apan uaworretta sulaumu manga wuke udde! ³⁰Arawe taumata ala udde sinumimbakka, 'Udde taambe natimu, Iamangnga Abraham. Arawe amungkanngu pia taumata nate mabbakka apia wu'ru rumanta ringanni mangitou, imangitou sarun mawalu wuassu manga rosane! ³¹Arawe Abraham sinumimbakka, 'Amungkanngu imangitou maddiri madingikka tita Musa wu'ru manga nabi, atonna-tonna imangitou tawe mangngimanna lai, salaiwe pia taumata nate mabbakka apia.'

Manga inolaanna apan maarosa taumata

(Mat. 18:6-7, 21-22; Mrk. 9:42)

17 Mawu Yesus nabbisara manga mallal'arnggen-Ne, "Manga inolaanna apan maarosa taumata udde rinone pia. Arawe nasilakate taumata apan naola'a punnene! ²Mappianne amungkanngu pia watu n gahilinganna ii'itta su ullekkane, see itou iwontolla su taha'oangnga wuassu itou mapaarosa n sangkatou su wallattu manga taumata maradio'a indi. ³Ana wangu udde, paatehamma!

Amungkanngu turangngu ma'ola'a rosa, taggue itou. Amungkanngu itou sinumassilla, ampungewe itou. ⁴Amungkanngu itou nasala si'o paapitu sulaumu massallo wu'ru suapa n massala rumanta ringannu wu'ru mabbisara, 'Ia'u madorongnga ampungnga,' ampungewe itou."

Su ola'u pangangimanna

⁵Manga rasul nabbisara Mawu Yesus, "Mawu, tohassawe pangangimanni ami." ⁶Mawu Yesus sinumimbakka, "Amungkangngu iamiu pia pangangimanna ere ahewallu watu n sawi, iamiu wotongnge mabbisara su alu murbei indi, 'Aabute i'o wuŕru tuwote su tahaŕoangnga,' alu indi sarun tumuŕrutta parentanu."

Manara n sangkatou mangangimbe

⁷"Unnu wisara sangkatou wuassi amiu pia mangangimbe apan mammasolla su wailla wuŕru mallu'ada domba. Napawe mangangimbe udde nabelengnga, apa mawune mabbisara mangangimbene, 'Wette paalihakka umanna'? ⁸Asinungka tawe! Ewe'e itou mabbisara mangangimbene, 'Saddiae anna ia'u. Palluŕrete n laubba waresi wuŕru riagaite ia'u umanna wuŕru ma'inumma, wua udde wotongngete i'o umanna!' ⁹Mangangimbe udde salaiwe tawe raloanna, ana waugu suete tinumuŕrutta parenta mawune, waŕinewe aroddi? ¹⁰Aroddi lai iamiu. Amungkangngu iamiu suete tinumuŕrutta anambo n manara nirolokka si'o, waŕoa'e, 'Iami tumba'u mangangimbe wiasa; iami tumba'u ma'ola'a manara ng kami.'"

Mawu Yesus napaapia n taumata sire mapuŕo

¹¹Sulaŕummu amatanna watukku Yerusalem, Mawu Yesus sinumabbi passarannu Samaria wuŕru Galilea. ¹²Su tempo sinumutta su sambau ampungnga, Itou nirantannu sire mapuŕo taumata marada'a paro apan maarantinna. Imangitou nirumarisikka ro'e n marau ¹³wuŕru mangngintuli, "Mawu Yesus! Tuangnga! Akkanaawe iami!"

¹⁴Su tempo Mawu Yesus naasilo simangitou, Itou nabbisara, "Roote ringannu manga imam, padorongke imangitou mamarikissa wadangngi amiu."

Tantaŕanna imangitou u'amatta, nawuŕite rada'i mangitou. ¹⁵Napawe sangkatou su wallatti mangitou naappendamma manungku itou napiate, itou nabelengnga see ringannu tingikka ma'ikkatta itou nadalo Mawu Ruata. ¹⁶See su saruannu Mawu Yesus itou nassubba wuŕru naadiangkamanna Sitou. Taumata udde taumata n Samaria. ¹⁷Wua udde Mawu Yesus nabbisara, "Waŕinewe pia sire mapuŕo apan niapaapia? Suapa sire sio udde? ¹⁸Anio tumba'u taumata raho indi nabelengnga maa-

diangkamanna su Mawu Ruata?" ¹⁹See Mawu Yesus nabbisara su tau-mata udde, "Darisikke, wuṛṛu roote. Ana waugu i'o mangngimanna Sia'u, i'o napiate."

Tempone Mawu Ruata rumanta mamarenta

(Mat. 24:23-28, 37-41)

²⁰Sire pira taumata n Farisi naiwaḷo Mawu Yesus tingngera Mawu Ruata rumanta mamarenta. Mawu Yesus sinumimbakka, "Araratuannu Mawu Ruata tawe itattakka ringannu manga tanda apan wotongnge asiloannu taumata, ²¹ma'oma n sara taumata wotongnge mabbisara, 'Wette pa'ellega, indi Itou!' ara'e, 'Poiaroddi Itou!' Ana waugu Mawu Ruata suete nanattakka mamarenta su pattangnganni amiu."

²²Wua udde Mawu Yesus nabbisara su manga mallaḷarṛenggen-Ne, "Sarun rumanta tempone iamiu maapulu ma'ellega sambau al wuassu' manga allo n Ana'u Taumata, arawe iamiu tawe maasilo allo udde. ²³Wuṛṛu taumata sarun mabbisara siamiu, 'Pa'ellega, isudde!' ara'e, 'Pa'ellega isindi!' Arawe imbarṛangnga iamiu sumabangnga maddea'a Sitou. ²⁴Su ereapa sawallo ma'ilatta wuassu langitta, wuṛṛu manne-makka wuassu pentakke saran pondolle, aroddi lai ola'u Ana'u Taumata napawe su allonete. ²⁵Arawe paarorone Itou ṛinone matatarṛangnga aṇambo n asasusa wuṛṛu ipaadiṛi n taumata orassa indi. ²⁶Su allo udde Ana'u Taumata sarun iapaalḷatta'a lihidde ere su tempo Nabi Nuh rorone. ²⁷Taumata u'anna wuṛṛu ma'inumma, wuṛṛu maawingnga; aroddi lai tawe illoḷone na'oma n sara Nuh sinumutta sulaḷummu apalla wuṛṛu nammanawangnga lapiddu namate anambo n taumata udde. ²⁸Wuṛṛu ere lai su tempo n Lot. Taumata u'anna ma'inumma, mabalu'a, mammalli, mabbaila, massuanna wuṛṛu ma'ola'a waḷe. ²⁹Arawe napawe Lot sinumabangnga wuassu Sodom, allo udde putungnga wuṛṛu belerangnga nanawo wuassu langitta wuṛṛu namate simangitou sarangka-nambone. ³⁰Aroddi lai olangnge su allo n Ana'u Taumata iapaalḷatta'a.

³¹Su allo udde taumata apan tantaḷanna roso uaawitta su waḷene arie pallintukka mangaḷappa darotongnge sulaḷummu waḷe. Aroddi lai taumata apan tantaḷanna su wailla arie pabelengnga su waḷene. ³²Paananunge apa apan suete nariaddi su awingngi Lot! ³³Taumata apan mattinsahadda manaḷamatta wiakke, sarun awuḷiannu wiakke. Arawe taumata apan niawuḷiannu wiakke sarun maasaḷamatta wiakke udde. ³⁴Pangimante: Su ṛabbi udde rua ng katou apan mattiilla su atatiḷanna sambau, sangkatou sarun iapidḷa wuṛṛu sangkatou lai itantangnga. ³⁵Rua ng katou wawine tantaḷanna manggilingngu gandumma, sangkatou sarun iapidḷa wuṛṛu sangkatou sarun itantangnga. [³⁶Rua ng katou tan-

taḷanna mammanara su wailla, sangkatou sarun iapidḍa wuṛṛu sangkatou sarun itantangnga.]”

³⁷Mallaḷaṛṛenggennu Mawu Yesus naiwaḷo, ”Suapa udde sarun mariaddi, Mawu?”

Mawu Yesus sinumimbakka, ”Suapa pia winaḷunanna, isudde pia manu’a u’inassa winaḷunanna udde.”

Sasumandinggu wawine waḷu wuṛṛu mallarṛuungnga

18 Wua udde Mawu Yesus nabbati’u sambau sasumandingnga ipangarṛa’a manga mallaḷaṛṛenggen-Ne tadea’u imangitou sidutu u’aliomanna wuṛṛu tawe maadio’a naungnge. ²Mawu Yesus nabbisara, ”Su sambau soa pia sangkatou mallarṛuungnga apan tawe matta’uttu Mawu Ruata, wuṛṛu tawe lai mappandumma sisai-sai. ³Su soa udde pia sangkatou lai wawine waḷu apan masokkate sumaruanna mallarṛuungnga udde, madorongnga hattone sambaanna. ’Tuḷungaawe ia’u sumaruanna roa’u,’ unnu wawine waḷu udde. ⁴Manga pira tempo aḷannune mallarṛuungnga udde maddiri mantuḷunggu wawine waḷu udde. Arawe panginsueanne mallarṛuungnga udde narṛingida, ’Salaiwe ia’u tawe matta’uttu Mawu Ruata wuṛṛu tawe mappandumma sisai-sai, ⁵arawe ana wagu wawine waḷu indi sidutu mallimbatta sia’u, mappianne ia’u manamba’a hattone. Amungkanṅgu tawe, itou sidutu rudanta wuṛṛu ma-paasusa’u.”

⁶See Mawu Yesus nabbisara, ”Inunue’o paapia apa apan iwabbisara mallarṛuungnga apan wengkolla udde! ⁷Ne, apa Mawu Ruata tawe manamba’a hatto n aḷarṛanang-Nge sassane apan sussaḷande Sitou allo ṛabbi? Apa Itou sarun manorṛuttu tempone mantuḷunggi mangitou! ⁸Pangimante: Itou ringannu maḷiha-ḷihakka manamba’a hatto mangitou! Arawe napawe Ana’u Taumata rumanta, apa ta’e asombanganna lai taumata apan mangngimanna Sitou su runia indi?”

Sasumandinggu taumata n Farisi wuṛṛu mallalṛṛu wose

⁹Mawu Yesus nabbati’u lai sasumandingnga indi apan tuddane su taumata apan mangngadio’a taumata waine, arawe mangngimanna manungku ririne sassane mapṛate. ¹⁰Unnu Mawu Yesus, ”Pia rua ngkatou apan inai su Waḷe Mawu umaḷiomanna. Sangkatou taumata n Farisi, sangkatou lai madarorongnga wose. ¹¹Taumata n Farisi udde

nirumarisikka sassane wuṛṛu inumaḷiomanna, 'O Mawu Ruata, ia'u maadiangkamanna Si'o, ana waugu ia'u tawe ere taumata waine, apan waḷiṇu, taṛṛa ḷinga ara'e masandaga. Ia'u maadiangkamanna ana waugu ia'u tawe ere madarorongnga wose udde. ¹²Ia'u paarua mappuasa sulaḷummu sangkamisa, wuṛṛu ia'u mangngonggolu sambau wuassu mapuḷo anambo n asombanku!" ¹³Arawe madarorongnga wose udde nirumarisikka marau-rau wuṛṛu tawe maningngara langitta. Lapiddu mannapu roone, itou nabbisara, 'O Mawu Ruata, akkanawe ia'u, taumata marosa indi!"

¹⁴"Pangimante," unnu Mawu Yesus, "su tempo napuḷete su waḷe, ete madarorongnga wose udde tinarimmattu Mawu Ruata, waḷine taumata n Farisi udde. Ana waugu taumata apan mannanggakku watanganne sarun iapaawawo, wuṛṛu taumata apan sussallungu watanganne sarun iapaatangakka."

Mawu Yesus nangaḷamatta aḷaṛṛana'a

(Mat. 19:13-15; Mrk. 10:13-16)

¹⁵Pia sire pira taumata uaapiddu aḷaṛṛana'a maradio'a ringannu Mawu Yesus tadea'u Itou mamita wuṛṛu manganḷamatta simangitou. Napawe manga mallalaṛṛenggenṇu Mawu Yesus naasilo olangnge udde, imangitou namuḷo manga taumata udde. ¹⁶Arawe Mawu Yesus namago aḷaṛṛana'a udde see nabbisara mallalaṛṛenggen-Ne, "Wala'e aroddi aḷaṛṛana'a indi rumanta ringang-Ku! Arie isingadda imangitou, ana waugu taumata ereindi apan maola'a laḷoṛṛo n araratuannu Mawu Ruata. ¹⁷Naungete! Taumata apan tawe sumaruanna Mawu Ruata ere sangkatou ana'a, tawe maola'a laḷoṛṛo n araratuannu Mawu Ruata."

Su ola'u taumata ala

(Mat. 19:16-30; Mrk. 10:17-31)

¹⁸Sangkatou piaṛṛa'u Yahudi naiwaḷo Mawu Yesus, "Iamangnga Huru apan mapia, apa sarun olaangku tadea'u ia'u maasomba wiakka tutune wuṛṛu maḷannu-ḷannu?"

¹⁹"Anio i'o nabbisara Ia'u mapia?" unnu Mawu Yesus. "Tawedu apa apan mapia tumba'u Mawu Ruata sassane. ²⁰I'o masingkatte manga parenta Mawu Ruata: 'Arie passandaga, arie pamate, arie panna'o, arie mattiala awusu, wuṛṛu pangaddatta iamangngu wuṛṛu inangngu.'"

²¹"Anambo n parenta udde suete ta'u niola'a ro'e n ia'u ta'e dario'a," unnu taumata udde.

²²Naaringikka udde, Mawu Yesu nabbisara, "Ta'e pia lai sambau sarun olaannu: Wa'lua'e anambo n darotongngu, onggola'e roinne su taumata asiangnga, ne i'o sarun maasomba darotongnga su surga. Wua udde rantate wu'ru tantalongke Sia'u." ²³Arawe napawe taumata udde naaringikka wisara aroddi, itou mangke nasusa ana waugu itou ala marasai.

²⁴Mawu Yesu masingkatta manungku taumata udde nasusa naungnge, ana waugu udde Itou nabbisara, "Masahadda atonna taumata ala maola'a la'or'ro n araratuannu Mawu Ruata! ²⁵Malluasanna sambau onta sumu'ri su lo'rangngu rarar'rumma, wuassu sangkatou ala sumutta su Runia Waku Mawu Ruata."

²⁶Manga taumata apan naaringikka Mawu Yesu nabbisara aroddi, imangitou naiwa'o, "Amungkangngu aroddi, isai wotongnge masalamatta?"

²⁷Mawu Yesu sinumimbakka, "Apa tawe ia'ola'u taumata, udde wotongnge su Mawu Ruata!"

²⁸See Petrus nabbisara, "Pa'ellega! Iami suete nanantangngu la'or'ro n wa'e ng kami ana waugu tumantalongnga Iamangnga."

²⁹"Pangimante!" wisara Mawu Yesu, "Taumata apan suete nanantangngu wa'lene, ara'e awingnge wawine, ara'e tu'rangnge, ara'e iamangnge wu'ru inangnge, ara'e ala'ranangnge ana waugu mangngimbe Mawu Ruata, ³⁰taumata udde sarun wa'lisanna paarua wuassu tempo indi, wu'ru su tempo addantane itou sarun onggola'nnu pabbawiakka apan tune wu'ru saran ma'lanu-l'annu."

Mawu Yesu nabbisara atallune su ola'u apapate-Ne

(Mat. 20:17-19; Mrk. 10:32-34)

³¹Mawu Yesu nangammullu sire mapu'o dua mallala'rrenggen-Ne su sambau see nabbisara, "Padaringikka! Iite orassa indi mabatukku Yerusalem. Poiaroddi, sarangkanambone apan niwor'rettu manga nabi su ola'u Ana'u Taumata sarun matipussa. ³²Itou sarun itantilla su manga taumata apan wa'line Yahudi, apan sarun mangaluandaga, mangngadio'a wu'ru mangaddu Sitou. ³³Imangitou sarun manansara wu'ru mamate Sitou, arawe su allo atallune, Itou sarun mabangunna."

³⁴Sarangkanambone udde tawe niasunnannu manga mallala'rrenggennu Mawu Yesu udde sara ng kadio'a. Atappasannanu manga wisara-Ne udde iaadappingnga wuassi mangitou. Imangitou wagga apa pandumannu wisara-Ne.

Mawu Yesus napaapia n sangkatou madarorongnga matane wuta

(Mat. 20:29-34; Mrk. 10:46-52)

³⁵Napawe Mawu Yesus maramite ma'oma n Yerikho, sangkatou wuta tantaŋanna ua'ianna madoro-rorongnga su winggi n daŋanna. ³⁶Napawe itou naaringikka manambo taumata sinumabbi, itou naiwaŋo, "Pia apa?"

³⁷"Mawu Yesus taumata Nazaret udde, sumabbi," unni mangitou sitou.

³⁸Ne taumata wuta udde nangintuŋi, "Yesus, Ana'i Daud! Akkanaawe ia'u!"

³⁹Manga taumata apan su saruane, namuŋo wuŋru nandolokki tou miapaŋannabba. Arawe itou sidutu mangngintuŋi lembo n aikkanne lai, "Ana'i Daud! Akkanaawe ia'u!"

⁴⁰Mawu Yesus nattaalla wuŋru nandolokku taumata miapaapiddu taumata wuta udde ringanni Tou. Napawe itou na'omate, Mawu Yesus naiwaŋo, ⁴¹"Apa ipaapulunu olaang-Ku si'o?"

"Mawu," sasimbakku taumata wuta udde, "ia'u maapulu maasilo."

⁴²See Mawu Yesus nabbisara, "Amungkaŋngu aroddi, pa'ellege! Ana waugu i'o mangngimanna Sia'u, i'o napiate."

⁴³Orassa udde lai itou naasilote, see itou tinumantalongke Mawu Yesus ringannu maadiangkamanna Mawu Ruata. Napawe taumata nambo udde naasilote olangnge udde, imangitou nambo nadalote Mawu Ruata.

Mawu Yesus wuŋru Zakheus

19 Napawe Mawu Yesus na'omate su Yerikho, Itou nanassute amatanne sinumabbi soa udde. ²Su soa udde pia sangkatou tembonannu madarorongnga wose apan ala. Aranne Zakheus. ³Itou maapulu ma'ellega isai isassago Mawu Yesus udde, arawe ana waugu taumata tumamite manambo wuŋru wadangnge lai mawawo, ne itou tawe maasilo Mawu Yesus. ⁴Aroddi itou tinumaŋangnga nalliu ŋoro wuassu taumata, see itou-inumawitte su alu sangkalu, tadea'u wotongnge maasilo Mawu Yesus apan sarun sumabbi isudde. ⁵Napawe Mawu Yesus na'omate su alu udde, Itou naninggara see nabbisara, "Zakheus, lintukke paŋihakka! Ana waugu allo indi Ia'u inai su waŋenu."

⁶Zakheus maŋiha-ŋihakka mlumintukka wuŋru nanaŋoho Mawu Yesus ringannu lulluassa. ⁷Manga taumata apan naasilo olangnge udde nanat-



takke mallobbosa. Imangitou nabbisara, "Ih! Itou inai mattindaho su wale n taumata laleo!"

⁸Wua udde su wale Zakheus nirumarisikka wufu nabbisara Mawu Yesu, "Mawu, sangkawageanganna wuassu rarotongku sarun ionggolla su taumata asiangnga; wufu su alawo'u taumata apan suete niawusu-angku, sarun waeranna apia sitou paappatta wuassu paarorone!"

⁹See Mawu Yesu nabbisara, "Su allo indi i'o wufu laforo n waleu maasomba asalamatta wuassu Mawu Ruata wufu onggolannu wiakka apan wakku, ana wangu i'o lai papapulunni Abraham. ¹⁰Ana'u Taumata nirumanta maddea'a wufu manalamatta taumata apan nialiwune."

Sasumandingngu roitta wulawanna

(Mat. 25:14-30)


¹¹Tantalanna taumata ta'e uararingikka Mawu Yesu mabbisara, Itou nabati'u sambau sasumandingnga. Ana wangu su orassa udde Itou maranite n Yerusalem, wufu taumata massunna manungku Mawu Ruata maliha-lihakka mamarenta ere sangkatou Ratu su runia indi. ¹²Mawu Yesu nabbisara, "Pia sangkatou papunna inai su wanua marau apan ite-nega maola'a ratu, wua udde itou mabelengnga. ¹³Tantalanna taambe inai, itou namago sire mapulo mangangimbene, see nangagille simangitou sangkatou-sangkatou passambau roitta wulawanna. 'Pabalu'e ringannu roitta indi tantalanna ia'u su amatanna,' unni tou simangitou. ¹⁴Arawe tumana'u wanuane maddantinni tou. Nariaddi, napawe itou inaita, imangitou nandolokku taumata niapawalo, 'Iami maddiri n taumata indi maola'a ratu ng kami.'

¹⁵Arawe papunna udde nitenega naola'a ratu, wua udde nabe-
lengke watukku wanuane. Ringannu maliha-lihakka itou namago manga
mangangimbene sinumaruanna sitou, ana see maasingkatta sangkurate
auntunganna apan suete niasombanganni mangitou. ¹⁶Mangangimbe
paarorone nirumanta wuŕŕu nabbisara, 'Mawu, roitta wuławanna sambau
apan nionggolu Mawu sia'u, suete ta'u niola'a mapuło.' ¹⁷'Mapia,' unnu
mawu udde, 'i'o mangangimbe mapia! Ana waugu sulałummu inolaanna
adio'a i'o wotongnge apangimananna, ia'u sarun mamile si'o maola'a
mangangatokku soa mapuło.' ¹⁸Mangangimbe aruane nirumanta wuŕŕu
nabbisara, 'Mawu, roitta wuławanna sambau apan nionggolu Mawu sia'u
udde suete ta'u niola'a lima.' ¹⁹Su mangangimbe udde ratu nabbisara,
'I'o sarun mapile mangangatokku soa lima.' ²⁰Mangangimbe waine ni-
rumanta wuŕŕu nabbisara, 'Mawu indi roinnu; roitta udde ta'u niaddo
su leso. ²¹Ia'u matta'uttu Mawu, ana waugu Mawu sangkatou taumata
apan maŕragissa. Mawu mangnganu apa apan tawe wageangngu Mawu,
wuŕŕu Mawu lai mangngammullu auntunganna su tampa apan tawe nis-
suanannu Mawu.' ²²Ratu udde nabbisara sitou, 'I'o mangangimbe laleo!
Nassułungngu ere wisaranu sassane, ia'u sarun maŕŕuumannu. I'o ma-
singkatta ia'u taumata maŕragissa: ia'u mangnganu aławo a apan tawe
rərotongku, wuŕŕu mangngammulu auntunganna su tampa ia'u tawe ma-
ssuanna. ²³Amungkangngu aroddi, anio i'o tawe napaasutta n roitta
udde su pangangadoanne, tadea'u napawe ia'u mabelengnga ia'u wo-
tongnge manarimmattu roitta udde ringannu wungane?' ²⁴Wua udde
ratu nabbisara manga taumata apan uararingikka isudde, 'Anute roitta
udde wuassi tou, wuŕŕu onggola'e su mangangimbe apan uasahipunna
roitta wuławanna mapuło udde.' ²⁵Arawe manga taumata udde nabbis-
ara, 'Mawu, itou piate lai mapuło.' ²⁶Ratu udde sinumimbakka, 'Nau-
nge: taumata apan piate, itou sarun onggola'nnu anamboanne lai. Arawe
taumata apan tawe uatahuanna saran adio'a, apa apan tatahuananne
sarun anuanna lai wuassi tou. ²⁷Wuŕŕu orassa indi apira'e inawarendi
manga see'u udde apan maddiru ia'u maola'a ratune. Patete imangitou
su saruangu!' "

Mawu Yesus sinumutta su Yerusalem ringannu awawantuga

(Mat. 21:1-11; Mrk. 11:1-11; Yoh. 12:12-19)

²⁸Napawe Mawu Yesus suete nabbisara sarangkanambone udde, Itou
inumamatte nalliurŕoro wuassi mangitou watukku Yerusalem. ²⁹Napawe
na'omate su Betfage wuŕŕu Betania su Wuiddu Zaitun, Itou nando-
lokku rua ng katou mallalaŕŕenggen-Ne inai malliu ŕoro. ³⁰"Roote



Ana'u keledai (19:30)

su ampunganga apan sasaruananna udde," unnu Mawu Yesus sitarua, "amungkangngu iraddua sumutta poiaroddi, iraddua sarun maasilo sambau ana'u keledai aiitanna. Keledai udde taambe sina'eannu taumata. Wu'ate keledai udde wuṛṛu apira'e isindi. ³¹Amungkangngu pia taumata maiwaḷo siraddua, 'Anio iraddua namu'a keledai udde?' waḷoa'a, 'Mawu mappandumma.'"

³²Rua ng katou mallaḷarṛenggennu Mawu Yesus udde inaite, wuṛṛu naaratingnga sarangkanambone udde nassuḷungngu ere niwisara-Ne. ³³Tantaḷanna imangitou mammu'a ana'u keledai udde, tatahuanne nabbisara sitarua, "Anio iraddua mammu'a keledai udde?"

³⁴Itarua sinumimbakka, "Mawu mappandumma." ³⁵See itarua nangapiddu ana'u keledai udde ringannu Mawu Yesus. Wua udde imangitou nangampakku jubah mangitou su tapanna'u keledai wuṛṛu nattuḷungngu Mawu Yesus sinuma'e su liuddu keledai. ³⁶Tantaḷanna Itou sussabbi uasa'e keledai udde manga taumata mammilattu jubah mangitou su laḷanna.

³⁷Napawe Mawu Yesus maranite n Yerusalem, su laḷanna apan sussossokka watukku Wuiddu Zaitun, manga mallaḷarṛenggen-Ne apan manambo udde mannattakke u'ui madalo Mawu Ruata wuṛṛu maadiangkamanna Sitou ana waugu manga aḷarṛindu'a apan suete niasiloanni mangitou. ³⁸Imangitou u'ui, "Niaḷamatanna Ratu apan nirumanta ringannu arannu Mawu! Paddarame su surga wuṛṛu awawantuga su Mawu Ruata!"

³⁹Manga pira ng katou taumata n Farisi wuassu wallattu taumata udde nabbisara su Mawu Yesus, "Iamangnga Huru, wo'ai paałannawa'a mallałarřenggeni Iamangnga."

⁴⁰Mawu Yesus sinumimbakka, "Pangimante! Amungkangngu imangitou mallannaba, manga watu indi lai sarun umui."

Mawu Yesus nilumuai n Yerusalem

⁴¹Su tempo Mawu Yesus maranite n Yerusalem, wuřru naasilote soa udde, Itou nilumuai n Yerusalem. ⁴²Wisara-Ne, "Maa'akkanna, apia eteapa amungkangngu allo indi i'o maasingkatta apa apan wotongge mandanta m padarame! Arawe orassa indi i'o tawe maasilo.

⁴³I'o sarun maappendamma su sambau tempo, suapa n manga seennu ma'ola'a anambo n asasusa su pabbiařrannu miallo-miallo; imangitou sarun mamangalo malliwinna si'o wuřru manessengngu wuassu aławo'u pabbuuanne. ⁴⁴Imangitou sarun mařrimunsa'a si'o wuřru anambo n tu-manangngu; wuřru tawedu saran sambau itantangngi mangitou watu uaatokka su tampane, ana waugu i'o tawe manutukka tempone Mawu Ruata rumanta manałamatta si'ol!"

Mawu Yesus sinumutta su Wałe Mawu

(Mat. 21:12-17; Mrk. 11:15-19; Yoh. 2:13-22)

⁴⁵Mawu Yesus sinumutta su Wałe Mawu wuřru nallimbuakke manga mabbawału'a isudde. ⁴⁶"Sulałummu Wuke Susi," wisara Mawu Yesus simangitou, "uaworřetta arendi: Mawu Ruata nabbisara, 'Wałe'u sarun maola'a wałe tampa aalıomananna.' Arawe wałe udde niola'i amiu sałakku mařarampassa!"

⁴⁷Miallo-miallo Mawu Yesus mangngařra'a su Wałe Mawu. Manga tembonannu imam wuřru manga huru n agama, see manga piařra'u taumata n Yahudi maapulu mamate Sitou, ⁴⁸arawe tawe maasomba lałanne ipa'ola'a olangnge udde, ana waugu manga taumata sidutu uararingikka Sitou, wuřru małuassa madaringikka wisara-Ne.

Aiwało su ola'u tařřino Mawu Yesus

(Mat. 21:23-27; Mrk. 11:27-33)

20 Su sambau allo, Mawu Yesus tantałanna mangngařra'a wuřru mabatti'u Wattu'u Ałałuassa wuassu Mawu Ruata su manga taumata sulałummu Wałe Mawu. Manga imam tembonanne, wuřru manga huru n agama su sambau ringannu manga piařra'u Yahudi, nirumanta ²wuřru nabbisara Mawu Yesus, "Annama'a wałoa'a siami, ringannu tařřino n

sai I'o ma'ola'a sarangkanambone indi? Isai nangonggolu tarřino udde Si'o?"

³Mawu Yesus sinumimbakka, "Ia'u maapulu maiwało. Annama'a wałoa'a sia'u: ⁴Yohanes mannarřani ringannu tarřino n sai? Mawu Ruata ara'e taumata?"

⁵Ne imangitou nanattakke na'ire, "Amungskangngu iite mabało, 'Ringannu tarřino Mawu Ruata,' Itou sarun mabbisara, 'Amungskangngu aroddi anio iamiu tawe mangngimanna Sitou?' ⁶Arawe amungskangngu iite mabbisara, 'Ringannu tarřino n taumata,' manga taumata sarun manuntungngu watu siite, ana wangu imangitou mangngimanna manungku Yohanes sangkatou nabi." ⁷Nariaddi imangitou sinumimbakka, "Iami wagga."

⁸Ne Mawu Yesus nabbisara simangitou, "Amungskangngu aroddi ia'u lai tawe mabało siamiu ringannu tarřino n sai Ia'u ma'ola'a sarangkanambone indi."

Sasumandingngu manga mammamanara mabawailu angore

(Mat. 21:33-46; Mrk. 12:1-12)

⁹Mawu Yesus nabatti'e su manga taumata udde, sasumandingnga ereindi, "Pia sangkatou massuanna su sambau wailu angore. Itou napa sewa n wailla udde su sire pira mammamanara, see itou inaita su wanua waine wuřru natana'e mařannu poiarddi. ¹⁰Napawe temponete mangitingnga wua n angore udde, tatahuannu wailla udde nandolokku mangangimbene ringannu manga mammamanara udde iapatarimmattu wageangnge. Arawe mammamanara udde namuulla mangangimbe udde wuřru nandolokki tou niapaapulę tawe nionggolannu wageangnge. ¹¹Ne tatahuannu wailla udde nandolokka apia sangkatou mangangimbe waine; arawe mangangimbe udde lai nipuulla apia wuřru niwusannu manga mammamanara udde, see nirolokka ringannu tawe nionggolannu wageangnge. ¹²Wua udde tatahuannu wailla udde nandolokku mangangimbe atallune. Arawe darořorřanna udde nipuulla manga mammamanara udde lai wuřru niramme su liuddu wailla udde. ¹³Panginsueanne tatahuannu wailla udde nabbisara, 'Apa řinone sarun ta'u olaanna? Ia'u sarun mandolokku ana'u sassane apan arangnguangku. Itou sarun addatanni mangitou!' ¹⁴Arawe napawe manga mammamanara m wailla udde naasilo ana'u tatahuannu wailla udde, imangitou nabbisara sangkatou ringannu sangkatou, 'Ete itou indi mallořossa manahuanna. Wette iite mamate sitou, tadea'u iite wotong-

nge manahuanna.' ¹⁵Ne imangitou namangkassa sitou su liuddu wailla udde see namate sitou."

Wua udde Mawu Yesus naiwaŋo, "Ei, amungkangngu tatahuannu wailla udde mabelengke, apa sarun olaanni tou su manga mammamamana udde? ¹⁶Itou sarun rumanta wuŋru mamate manga mammamanara udde, see manantilli wailla udde su mammamanara waine."

Naaringikka aroddi, nabbisarat manga taumata su Mawu Yesus, "Atonna-tonna tawe!"

¹⁷Mawu Yesus nanutudda simangitou see naiwaŋo, "Amungkangngu aroddi apa atappasannu wageangngu Wuke Susi indi?

'Watu apan tawe ipaattu maaola'a waŋe, naola'e watu apan paarorone.'

¹⁸Anambo n taumata apan manawo su watu udde sarun marŋimunsa'a; wuŋru isai apan aemaannu watu udde sarun atalŋngianne mabaŋi awu."

Hatto m pamamaekka wose

(Mat. 22:15-22; Mrk. 12:13-17)

¹⁹Manga huru n agama wuŋru manga imam tembonanne naasingkatta manungku sasumandingnga udde ipammasendekku Mawu Yesus simangitou. Ana waugu udde imangitou pia pandumma manametta Sitou orassa udde lai, arawe imangitou matta'uttu taumata nambo.

²⁰Nariaddi imangitou maddea'a tempone mapia. Imangitou nangonggolu roitta su taumata iapaatanno lihiddu taumata matuŋida, wuŋru nandolokku manga taumata udde mapaasaŋa Mawu Yesus ringannu manga aiwaŋo, tadea'u imangitou wotongnge manantilli Tou su apulu wuŋru tarŋino n gubernure. ²¹Ne manga taumata apan suete nionggolannu roitta udde nabbisara Mawu Yesus, "Iamangnga Huru, iami masingkatta manungku anambo n apa apan iawabbisara wuŋru iatantiro m Iamangnga udde atonna. Iami masingkatta lai Iamangnga mangngaŋa'a ringannu masema-semakka su ola'u apulu Mawu Ruata su taumata, ana waugu Iamangnga tawe mamile taumata. ²²Ana waugu udde Iamangnga pabaŋote siami, tumuŋruttu Tita n agama ng kite, wotongnge mamaekka wose si Kaisar ara'e tawe wotongnge?"

²³Arawe Mawu Yesus masingkattu aawusu mangitou. Ana waugu udde Itou nabbisara, ²⁴"Annama'a palleha'a Sia'u sambau roitta saŋa'a. Hambaranna wuŋru aranni sai indi?"

"Kaisar!" sasimbakki mangitou.

²⁵"Amungkangngu aroddi," unnu Mawu Yesus simangitou, "onggoŋa'e si Kaisar, apa apan tatahuananni Kaisar wuŋru su Mawu Ruata, apa apan tatahuanannu Mawu Ruata."

²⁶Nasemakke su saruannu taumata nambo udde, imangitou tawe naasomba saran sambau pasasaŋa Mawu Yesus. Imangitou tumba'u maŋannabba wuŋŋu naherangngu sasimbakke udde.

Hatto su ola'u pabbawangunna wuassu papate

(Mat. 22:23-33; Mrk. 12:18-27)

²⁷Manga sire pira wuassu taumata n Saduki nirumanta ringannu Mawu Yesus. (Imangitou ammuŋanna apan pia addapanne manungku taumata nate tawe mabangunna apia.) Imangitou naiwaŋo Mawu Yesus, ²⁸"Iamangnga Huru, Musa namorŋettu tita indi siite: Amungkanngngu sangkatou esakka nate wuŋŋu itou tawe ana'a, tuŋrangnge rinone maawingngu inawaŋuane tadea'u maasomba pangangawanne wuassu taumata nate udde. ²⁹Suete nariaddi pia sire pitu sangkatuŋrangnga. Iapa pahulune naawingnga, see nate tawe ana'a. ³⁰Wua udde iapa aruane naawingke lai ringannu inawaŋuanna udde, arawe itou lai nate tawe ana'a. ³¹Aroddi lai su tuŋrangnge atallune wuŋŋu nallaŋisansunna na'oma n sara appitune. ³²Panginsueanne wawine udde lai nate. ³³Su allo n taumata nate iapawangunna apia, awingngi sai wawine udde? Ana waugu sire pitu udde suete naawingngi tou."

³⁴Mawu Yesus sinumimbakka, "Manga taumata apan mabbiakka tempo indi, maawingnga, ³⁵arawe manga taumata apan wotongnge iapawangunna napawe suete nate, wuŋŋu mabbiakka su tempo addantane, imangitou tawe maawingnga. ³⁶Ola'i mangitou ere mala'ekatta wuŋŋu tate mate. Ete imangitou udde aŋaŋrana'u Mawu Ruata, ana waugu imangitou suete niapawangunna apia wuassu papate. ³⁷Musa sassane napaŋiatta'a ringannu masemakka manungku taumata nate sarun iapawangunna apia. Sulaŋummu worŋenne nabbatti'u anggaŋŋumunanne apan luŋŋenggamma udde, itou mannago Mawu 'Mawu Ruata n Abraham, Mawu n Ruata Ishak, Mawu Ruata n Yakub'. ³⁸Ne, Mawu Ruata udde waŋinewe Mawu Ruata n taumata nate! Itou Mawu Ruata n manga taumata wiakka! Ana waugu hunane su Mawu Ruata, anambo n taumata mabbiakka."

³⁹Manga pira huru n agama nabbisara, "Sasimbakki Iamangnga Huru narŋino atonna." ⁴⁰Ana waugu udde imangitou tawe waŋrani lai maiwaŋo manga apa su Mawu Yesus.

Hatto su ola'u Ratu m Punnu Sałamatta

(Mat. 22:41-46; Mrk. 12:35-37)

⁴¹Mawu Yesus naiwało simangitou, "Ereapa wotongnge iwisara manungku Ratu m Punnu Sałamatta papapulunni Daud? ⁴²Sumbali Daud sassane nabbisara sulałummu wuke Mazmur,

'Mawu nabbisara su Mawu'u:

A'iante su samba'a uanang-Ku,

⁴³ma'oma n sara ia'u ma'ola'a manga seennu massurubawa si'o.'

⁴⁴Nariaddi amungkangngu Daud mannago n Ratu m Punnu Sałamatta udde 'Mawu', ereapa wotongnge Itou papapulunni Daud?"

Iapaanaungnga tadea'u paatehamma su saruannu manga huru n agama

(Mat. 23:1-36; Mrk. 12:38-40)

⁴⁵Tantałanna manga taumata udde uararingikka Mawu Yesus, Itou nabbisara su mallałarnggen-Ne, ⁴⁶"Paatehamma su manga huru n agama. Imangitou apulune u'amatta ualurre n jubah mało'e, wurru małutu aaddatanna su manga pasakka. Imangitou małutu su manga tampa mawantuga sulałummu wałe m pattatarramawuanna wurru su manga andeangnga. ⁴⁷Imangitou mammahia manga wawine wału wurru mangngarro wałene. Wurru see alałeo mangitou tawe asingkatanna, imangitou u'aliomanna mało'e-ło'engnga! Ruumanni mangitou mawak-katta!"

Aonggolu sangkatou wawine wału

(Mrk. 12:41-44)

21 Su Wałe Mawu, Mawu Yesus naasilo manga taumata ala nantarro n roitta sulałummu tampa n roitta. ²Itou naasilo lai sangkatou wawine wału asiangnga, nantarro n rua m bau roitta witu'a. ³See Mawu Yesus nabbisara, "Padaringikka: Wawine wału indi nantarro mannamboanna wuassu alało'u taumata waine. ⁴Ana waugu imangitou sarangkanambone nangonggolla wuassu lebbe n darotongnge. Arawe wawine wału indi, salaiwe itou asiangnga, nangonggolu apa apan tatahuananni tou apan ipappaatta su pabbiaŕanne."

Mawu Yesus nabbati'u ahahohakku Waļe Mawu

(Mat. 24:1-2; Mrk. 13:1-2)

⁵Pia manga taumata apan mabbisara su ola'u aroddi aṛṛamage Waļe Mawu nilogakku manga watu apan mangkaṛṛamaga wuṛṛu ringannu manga sarannapa nionggolla su Mawu Ruata. Ne Mawu Yesus nabbisarate simangitou, ⁶"Paṛṛado pia tempone, apa apan niasiloanni amiu indi sarun ihohakka; tawe saran sambau watu isindi apan mallambe uatokka su tampane!"

Asasusa wuṛṛu pananansara

(Mat. 24:3-14; Mrk. 13:3-13)

⁷Imangitou naiwaļo Mawu Yesus, "Iamangnga Huru, angnge-rate olangnge udde sarun mariaddi? Wuṛṛu apa tatialane manungku nia'omante tempone olangnge udde sarun mariaddi?"

⁸Mawu Yesus nabbisara, "Paatehamma, arie iamiu awahianna. Manambo taumata sarun rumanta ringannu arang-Ku, wuṛṛu mabbisara, 'Ete Ia'u Itou!' wuṛṛu 'Nia'omante tempone.' Arawe arie iamiu tumantalongnga simangitou. ⁹Arie lai iamiu matta'utta napawe maaring-ikka watti'a su ola'u pangalo wuṛṛu pasaseetta. Sarangkanambone udde ṛinone mariaddi paarorone. Arawe udde tawe manungku nia'omante tempone kiamatta."

¹⁰See Mawu Yesus nanassu watti-Nge, wisara-Ne, "Pabbawalaga sambau sarun mamangalo pabbawalaga waine, wuṛṛu araratuanna sambau mamangalo araratuanna waine. ¹¹Su alawo'u tampa sarun mariaddi linukka apan wahewa, aļaṛṛutumma wuṛṛu aļaṛṛusa'itta. Sarun mariaddi manga tanda apan maata'utta wuṛṛu wahewalla su langitta. ¹²Arawe tantaļanna sarangkanambone udde taambe nariaddi, iamiu sarun sametanna wuṛṛu sansaranna. Iamiu sarun parikisanna su manga waļe pattataṛṛamawuanna wuṛṛu itaṛṛo su tutupanna. Wuṛṛu iamiu sarun iapidida su saruannu mararatu wuṛṛu manga tembonanne, ana waugu iamiu mallaļaṛṛenggeng-Ku. ¹³Eteudde tempone iamiu mabatti'u Watti'u Aļaļuassa wuassu Mawu Ruata. ¹⁴Sidutua'e manungku iamiu tawe suminggawangnga su ola'u apan ṛinone iwisara ng kamiu ipanahekku watangannu. ¹⁵Ia'u sassane sarun mangonggolu wisara wuṛṛu apande udde, ma'oma n tawe saran sangkatou wuassu manga seetti amiu wotongnge lumawangnga ara'e massinaaddu apa apan suete nia-paasingkatti amiu. ¹⁶Iamiu sarun pateannu inangnga iamangngi amiu,

wurru manga turrangngu, manga ana'u turrangngi amiu wurru manga hawe ng kamiu. Sangkawageanganna wuassi amiu sarun pateanni mangitou. ¹⁷Iamiu sarun iarantinnu manga taumata ana waugu iamiu malalarrenggeng-Ku. ¹⁸Arawe uta'a sambua wuassu puanu tawe mawuli. ¹⁹Amungkangngu iamiu mataarrangnga wurru masabare iamiu masalamatta."

Mawu Yesus nabbisara su ola'u ahahohakku Yerusalem

(Mat. 24:15-21; Mrk. 13:14-19)

²⁰"Napawe iamiu naasilo Yerusalem tatalliwinannu tantara, iamiu sarun maasingkatta manungku soa udde tate malannu lai mahohakka. ²¹Su tempo udde rinone taumata apan uatana'a su Yudea sarun tumalangnga su wowone. Imangitou apan uatana'a su soa sarun manantangngu soa, wurru imangitou apan su liuddu soa arie passutta sula'ummu soa. ²²Ana waugu manga allo udde 'Eteudde Allo n Ruumanna Iapaamatta', tadea'u ringannu olangnge udde, apa apan uaworretta sula'ummu Wuke Susi sarun matipussa. ²³Maata'utta atonna manga allo udde su wawine apan ta'e pia illo'ro, wurru wawine apan ta'e mappasusu ana'a! Wanua indi sarun maappendamma asasusa wahewa, wurru Mawu sarun maruumannu pabbawalaga udde. ²⁴Piaddu pateannu halele, pia lai apan sarun iapidda ere taumata niatawana wutukku manga wanua n taumata; wurru manga taumata apan tawe maailala Mawu Ruata sarun marinda Yerusalem ma'oma n sara masue tempone apan suete tinantunnu Mawu simangitou."

Daranta n Ana'u Taumata

(Mat. 24:29-31; Mrk. 13:24-27)

²⁵"Paradote, su matannallo, wulanna, wurru manga anumpitanna sarun asiloanna manga tatialane. Su runia, manga taumata sarun matta'utta wurru maalihu sumaruanna wallada wurru tingikku lua'a. ²⁶Taumata sarun matta'utta atonna-tonna sumaruanna apa apan sarun mariaddi su ahewallu runia indi, ana waugu manga tembonanne su winalanganna, sarun massongkakka. ²⁷Su tempo udde Ana'u Taumata sarun rumanta sula'ummu winabbawa ringannu tarinone, wurru awawantuga apan wahewa. ²⁸Amungkangngu manga olangnge udde mannatakke mariaddi, atimpu'ote wurru papinggarate, ana waugu ete adio'a lai iamiu sarun maasomba asalamatta."

Ałarŕa'a wuassu alu ara

(Mat. 24:32-35; Mrk. 13:28-31)

²⁹See Mawu Yesus nabbati'a lai simangitou sasumandingnga ere indi, wisara-Ne, "Panutukka mapia-pia alu ara wuŕru manga alu waine. ³⁰Napawe manga lałuwone iaasilote, iamiu masingkatta manungku tempo m padissa maranite. ³¹Aroddi lai amungkangngu iamiu maasilo manga olangnge udde mariaddi, iamiu sarun maasingkatta manungku Mawu Ruata małihakke mamarenta ere sangkatou Ratu.

³²Asingkatewe! Sarangkanambone udde sarun mariaddi tantałanna manga taumata apan wiakka tempo indi taambe nate abbi. ³³Langitta wuŕru runia sarun mawułi, arawe manga wisara-U sidutu ma'oma n sara małannu-łannu."

Sidutu Paatehamma

³⁴"Paariagai wadangngu, arie ma'oma n sara iamiu tumanite manambo ma'ola'a andeangnga wuŕru ma'inumma ua'e maawu'anna, ara'e tumanite marringiddu aławo'u hatto m wiakki amiu, na'oma n sara iamiu tawe naasaddia napawe allo udde nirumanta ringannu awagananna. ³⁵Ana waugu Allo udde sarun rumanta ere wałati'a su anambo n taumata su wowo n runia indi. ³⁶Paariagate, wuŕru sidutu aalıomanna tadea'u iamiu matohassa mamipe n aławo'u hatto apan sarun mariaddi wuŕru iamiu wotongnge sumaruanna Ana'u Taumata."

³⁷Mawu Yesus mangngaŕra'a su Wałe Mawu su tempo allattune, wuŕru řabbine Itou inaita watukku Wuiddu Zaitun wuŕru natana'a isudde. ³⁸Suapa n ruaallo, manga taumata rudanta su Wałe Mawu madaringikka Mawu Yesus mangngaŕra'a.

Maaire mamate Mawu Yesus

(Mat. 26:1-5; Mrk. 14:1-2; Yoh. 11:45-53)

22 Ramea n Roti Tawe Ragine apan isassago Paskah maranite. ²Manga imam tembonanne wuŕru manga huru n agama tantałanna maddea'a lałanne mamate Mawu Yesus ringannu małanna-łannaba, ana waugu imangitou matta'uttu taumata nambo.

Yudas inumire mamate Mawu Yesus

(Mat. 26:14-16; Mrk. 14:10-11)

³Wua udde Setanna nangintaŋŋo si Yudas apan isassago lai Iskariot, eteudde sangkatou wuassu sire mapuŋo dua mallaŋarŋenggen nu Mawu Yesus. ⁴Ana waugu udde Yudas inaita wuŋŋu na'irete manga imam tembonanne wuŋŋu manga tembonannu mandariaga Waŋe Mawu su ola'u ereapa itou wotongnge manantillu Mawu Yesus simangitou. ⁵Imangitou mangke lulluassa wuŋŋu naddiandi mangonggolu roitta sitou. ⁶Yudas inumire wuŋŋu itou nadea'e tempone manantillu Mawu Yesus simangitou, ringannu tawe asingkatannu taumata.

Mannaddia annu Paskah

(Mat. 26:17-25; Mrk. 14:12-21; Yoh. 13:21-30)

⁷Na'omate allone Ramea n Roti Tawe Ragine, manungku domba annu Paskah pototante. ⁸Ne Mawu Yesus nandolokki Petrus wuŋŋu Yohanes, "Roote panaddia annu Paskah siite."

⁹"Suapa Iamangnga, iami manaddia anna udde?" aiwaŋo mangitou.

¹⁰Mawu Yesus sinumimbakka, "Su tempo iamiu sumutta su soa, iamiu massomba n sangkatou esakka uaapiddu sambau wensadda laŋorŋoannu ua'e. Tantalongke sitou su waŋe suttanni tou, ¹¹wuŋŋu waŋoa'e su tatahuannu waŋe udde: Iamangnga Huru mappaiwaŋo, 'Suapa tampane manga mallaŋarŋenggen-Ku wuŋŋu Ia'u umanna annu Paskah?' ¹²Tatahuannu waŋe udde sarun mamantingida siamiu wabbo'a wahewa sambau su ŋengkenne aruane, nasuungngu saranapane. Saddiaite sarakkanambone isudde."

¹³Ne inaita Petrus wuŋŋu Yohanes, naaratingke sarakkanambone nassuŋngnga ere iwabbisara Mawu Yesus. Imangitou nanaddiate annu Paskah isudde.

Saŋiwangngu Mawu

(Mat. 26:26-30; Mrk. 14:22-26; 1Kor. 11:23-25)

¹⁴Napawe na'omate tempone umanna annu Paskah udde, Mawu Yesus inuma'ian na su sampunna ringannu manga mallaŋarŋenggen-Ne su saŋiwangnga udde. ¹⁵See Itou nabbisara simangitou, "Ia'u maapulu atonna umanna annu Paskah indi su sampunna ringanni amiu, tantaŋanna Ia'u taambe matataŋrangnga susa! ¹⁶Ana waugu udde, pangi-

mante: Ia'u tate umanna anna indi apia ma'oma n sara atappasannu saliwangnga indi iapaaliatta'a su Runia Waku Mawu Ruata."

¹⁷Wua udde Mawu Yesus namengkette mangko n anggore, see inumaliomanna naadiangkamanna su Mawu Ruata, wua udde nabbisara, "Sengkampe indi, wuṛṛu tahiate; ¹⁸ana waugu asingkate: manattakka orassa indi Ia'u tate ma'inumma anggore indi apia ma'oma n sara Mawu Ruata uatarrinote sarangkanambone."

¹⁹Wua udde Mawu Yesus nanganute roti. Wuṛṛu napawe suete naadiangkamanna, Itou nattahiate roti udde ringannu lima-Ne, see nionggolla simangitou, wuṛṛu nabbisara, "Ete indi wadang-Ku [apan tinantilla ana waugu iamiu. Ola'e indi maola'a sambau pananaunganna Sia'u." ²⁰Aroddi lai napawe suete inumanna, Itou nangonggolu mangko n anggore udde simangitou wuṛṛu nabbisara, "Mangko indi, eteudde paaire Mawu Ruata apan waku, apan nitohassu darṛa-U - darṛa apan tinantilla ana waugu iamiu]."

²¹"Arawe pa'ellega! Taumata apan mamate Sia'u, isindi lai ringang-Ku! ²²Ana'u Taumata sarun mate su ereapa suete tinantunnu Mawu Ruata, arawe nasilakate taumata apan mamate Sitou!"

²³Ne imangitou nanattakke uaiwaḷo sangkatou ringannu sangkatou, isai wuassu wallatti mangitou sarun ma'ola'a olangnge udde.

Pattatatiakka su ola'u isai ahewaḷanne

²⁴Su wallattu manga mallalaṛṛenggen nu Mawu Yesus nariaddi pattatatiakka su ola'u isai wuassi mangitou apan ṛinone ellehanna lembo n ahewaḷanne. ²⁵Mawu Yesus nabbisara simangitou, "Manga ratu m pabbawalaga apan tawe maaillaḷa Mawu Ruata mannansara tumanangnge, wuṛṛu manga tembonanne isassago 'Mallala'u adda Tumanangnge'. ²⁶Arawe iamiu tawe wotongnge aroddi. Ewe'e mawaḷi'a taumata wahewa su wallatti amiu ṛinone maola'a adio'anne, wuṛṛu piaṛrangnge ṛinone maola'a ere sangkatou mangangimbe. ²⁷Isai magewaḷanne: taumata apan ua'ianna u'anna su medda, ara'e taumata apan mangngimbe sitou? Natantunna taumata apan ua'ianna udde. Arawe Ia'u isindi ringanni amiu naola'a ere sangkatou mangangimbe.

²⁸Sulaḷummu ala'wo'u asasusa-U, iamiu sidutu su sambau ringang-Ku. ²⁹Ere lai Iamangnga suete nangonggolu taṛṛino Sia'u ipamarenta, aroddi lai Ia'u sarun mangonggolu taṛṛino udde siamiu. ³⁰Ringannu aroddi iamiu wotongnge lumuassa ringang-Ku su tempo Ia'u maola'a Ratu. Wuṛṛu iamiu sarun uma'ianna su atanggaṛṛanne su mapuḷo dua addera n araratuanna wuṛṛu mamarenta mapuḷo dua pabbawalagu taumata n Israel."

Papasingkatta manungku Petrus sarun massinaadu Mawu Yesus

(*Mat. 26:31-35; Mrk. 14:27-31; Yoh. 13:36-38*)

³¹"Simon, Simon, paddaringikka! Setanna suete niwala mamono'a siamiu; ere gandumma irrae wuassu waɓaane na'oma n sara apan mappianne irrae wuassu apan laɓeo. ³²Arawe Ia'u suete inumaɓiomanni amiu, Simon, tadea'u pangangimannu tawe mallome. Wurru napawe i'o mabelengke ringang-Ku, i'o sarun manohassa manga turrangngu."

³³Petrus sinumimbakka, "Mawu, ia'u uasaddia sumutta su tuttupanna wurru mate su sampunna ringannu Mawu!"

³⁴"Pangimante, Petrus," unnu Mawu Yesus, "tantaɓanna manu'a taambe inumu'u allo indi, i'o paatallute nassina'a-U."

Dompetta, pato'a wurru halele

³⁵Wua udde Mawu Yesus nabbisarate simangitou, "Dorone su tempo Ia'u nandolokki amiu, tawe namala ng kamiu mangapiddu dompetta, pato'a ara'e sapatu, apa auranganni amiu su tempo udde?"

"Tawe!" sasimbakki mangitou.

³⁶"Arawe orassa indi," unnu Mawu Yesus, "Isai pia dompetta ara'e pato'a, rinone iapidda; wurru isai tawe halele, rinone mabaɓu'u jubahne ipamalli halele. ³⁷Ana waugu, pangimante, wageangngu Wuke Susi tingikke arendi, 'Itou sassunnanna ere sangkatou taumata laɓeo,' rinone mariaddi su riri-U. Ana waugu apan uaworretta su Wuke Susi matatarino Sia'u tantaɓanna mattipusse orassa indi."

³⁸"Mawu," unnu mallaɓarreggennu Mawu Yesus, "Pa'ellega, isindi pia rua m bua halele."

"Uddita'e!" sasimbakku Mawu Yesus.

Mawu Yesus inumaɓiomanna su Wuiddu Zaitun

(*Mat. 26:36-46; Mrk. 14:32-42*)

³⁹Mawu Yesus nanantangke n soa wurru inaita ere inanaramanne watukku Wuiddu Zaitun, wurru manga mallaɓarreggen-Ne inai lai ringanni Tou. ⁴⁰Napawe na'omate isudde, Itou nabbisara simangitou, "Aaɓiomante tadea'u iamiu tawe marosa amungkangngu iamiu wono'anna!"

⁴¹Wua udde Itou nangindau adio'a wuassi mangitou, irarrangno araune paassa panuntungannu watu, ⁴²see inumaliintuda wurru inumaliomanna, "Iamangnga," wisara-Ne, "amungkangngu wotong-nge, paaraua'a wuassia-U sansara apan sasaruanang-Ku indi. Arawe arie tumuruttu apulu-U, ewe'e tumuruttu apulu n Iamangnga." [⁴³Sangkatou mala'ekatta nirumanta ringanni Tou wurru nanohassa Sitou. ⁴⁴Mawu Yesus tumanite n uatatarrangnga sansara sulalummu naung-Nge na'oma n sara Itou u'aliomanna atonna-tonna. Liahane naalihida rarra tuturo su leta'a.]

⁴⁵Napawe suete inumaliomanna, Mawu Yesus nabelengke apia ringannu manga mallaarreggen-Ne. Itou naaratingnga simangitou tanta'anna mattiilla ana waugu massusa. ⁴⁶See Itou nabbisara simangitou, "Anio iamiu mattiilla? Pabbangunte wurru aaliomanna tadea'u iamiu tawe awono'anna."

Mawu Yesus nisametta

(*Mat. 26:47-56; Mrk. 14:43-50; Yoh. 18:3-11*)

⁴⁷Tanta'anna Mawu Yesus ta'e uahahatto, nirumantate taumata manambo. Imangitou uapiarra'a si Yudas, sangkatou wuassu mallaarreggennu Mawu Yesus. Wua udde Yudas inaita natudda Mawu Yesus see nangari'a Sitou. ⁴⁸Arawe Mawu Yesus nabbisara sitou, "Yudas, apa ringannu aari'a udde i'o mamate Ana'u Taumata?"

⁴⁹Napawe manga mallaarreggennu Mawu Yesus apan isudde naa-silo apa apan sarun mariaddi, imangitou nabbisara, "Mawu, iami mandoppa simangitou ringannu halele!" ⁵⁰See sangkatou su wallatti mangitou namuulla allangngu imam wahewa ringannu halele na'oma n sara narassatta talingane aikkatanna.

⁵¹Arawe Mawu Yesus nabbisara, "Udita'el" See Itou namita talinga n taumata udde see niapaapia.

⁵²Wua udde Mawu Yesus nabbisara manga imam tembonanne wurru manga tembonannu mandariaga Wale Mawu, see manga piarra'u taumata n Yahudi apan nirumanta isudde, manametta Mawu Yesus, "Apa Ia'u indi taumata laleo, na'oma n sara iamiu nirumanta uaapiddu halele wurru papuulla ipanametta Sia'u? ⁵³Miallo-miallo Ia'u su sambau ringanni amiu su Wale Mawu, arawe iamiu tawe manametta Sia'u. Arawe indite tempone iamiu manametta, su tempo tarfino n ararandumma mappaamattu manarane."

Petrus nassinaadu Mawu Yesus

(Mat. 26:57-58, 69-75; Mrk. 14:53-54, 66-72; Yoh. 18:12-18, 25-27)

⁵⁴Imangitou nanamette Mawu Yesus see niapidda su wale m imam wahewa. Petrus tinumantalongnga ro'e n marau. ⁵⁵Su pattangngannu rallakku wale udde plate putungnga apan suete nire'omanna wufu Petrus inaita inuma'ianna su sampunna ringannu manga taumata ua'ianna uapaliwutta putungnga udde. ⁵⁶Sangkatou mangangimbe wawine naasilo si Petrus ua'ianna su winggi m putungnga udde; see mangangimbe wawine udde mannutukka si Petrus, wua udde nabbisara, "Taumata indi lai tanginna su sambau ringannu Mawu Yesus!"

⁵⁷Arawe Petrus nassinaada. Itou nabbisara, "Ia'u atonna-tonna wagga n taumata udde!"

⁵⁸Tawe nalannu wua udde, sangkatou waine naasilo si Petrus wufu nabbisara, "Po lai sangkatou su wallatti mangitou!"

Arawe Petrus sinumimbakka, "Tawe, wale ia'u!"

⁵⁹Irarangngo sangka orassa naliudda, sangkatou waine lai nabbisara ma'ikkatta, "Atonna-tonna taumata indi mallarjenggen nu Mawu Yesus, ana waugu itou lai taumata n Galilea!"

⁶⁰Arawe Petrus sinumimbakka, "Apa pandumannu, ia'u wagga!"

Orassa udde lai, tanta'anna Petrus ta'e mabbisara, manu'a inumu'u.

⁶¹Mawu Yesus nanaile wufu na'ellega si Petrus. See Petrus naanaungke Mawu Yesus suete nabbisara sitou, "Tanta'anna manu'a taambe inumu'u allo indi, i'o paatallute massina'a-U." ⁶²Ne sinumabangke Petrus wua isudde wufu nilumuaite.

Mawu Yesus ninalangnga wufu nipuulla

(Mat. 26:67-68; Mrk. 14:65)

⁶³Manga taumata apan ualu'adda Mawu Yesus, mannalangnga wufu mamuulla Sitou. ⁶⁴Imangitou nanutuba matane wufu naiwalo Sitou, "Si'ata'a isai namuulla Si'o?" ⁶⁵Manambo lai manga wisara aaluandaga apan iwabbisara mangitou su Mawu Yesus.

Mawu Yesus su saruannu Mallarjünggu Agama

(Mat. 26:59-66; Mrk. 14:55-64; Yoh. 18:19-24)

⁶⁶Su ruaallone, manga pia'ra'u taumata n Yahudi, manga imam tembonanne, wufu manga huru n agama naammulla; see Mawu Yesus

niapidda su saruannu Mallarungu Agama mangitou. ⁶⁷"Pasingkata'a siami," unni mangitou Sitou, "atonna I'o indi Ratu m Punnu Salamatta?"

Mawu Yesus sinumimbakka, "Amungkanngu Ia'u mabaŋo siamiu, iamiu tawe mangngimanna. ⁶⁸Wurru amungkanngu Ia'u maiwaŋo siamiu, iamiu lai tawe sumimbakka. ⁶⁹Arawe manattakka orassa indi, Ana'u Taumata sarun uma'ianna su uanannu Mawu Ruata Lembo Matarrino."

⁷⁰Imangitou sarangkanambone nabbisara, "Amungkanngu aroddi, I'o indi Ana'u Mawu Ruata?"

Mawu Yesus sinumimbakka, "Aroddi ere su wisara ng kamiu."

⁷¹Ne imangitou nabbisara, "Ipa'ura lai sakassi! Iite naaringikke wuassu morrongge sassane!"

Mawu Yesus su saruanni Pilatus

(Mat. 27:1-2, 11-14; Mrk. 15:1-5; Yoh. 18:28-38)

23 Awadaalla su ammulanna udde dirumarisikka see nangapiddu Mawu Yesus su saruanni Pilatus. ²Isudde imangitou mapaasaŋa n Tou. Imangitou mabbisara, "Iami naaratingnga taumata indi mangngaliwu n laŋorŋo n soa. Itou mandolokku taumata tadea'u tawe mameakka wose su Kaisar, ana waugu Itou mabaŋo manungku ete Itou Kristus, sangkatou ratu."

³See Pilatus naiwaŋo Mawu Yesus, "Atonna I'o ratu n taumata n Yahudi?"

Mawu Yesus sinumimbakka, "Aroddi ere su wisaranu."

⁴Ne Pilatus nabbisara manga imam tembonanne wurru taumata nambo udde, "Ia'u tawe naasomba saŋane saran sambau su taumata indi tadea'u Itou irruumanna."

⁵Arawe imangitou lembo mammata'a lai, "Ringannu alaŋrang-Nge, Itou mangngaliwu n taumata su ahewallu leta'u Yudea; paarorone su leta'u Galilea, wurru orassa indi na'omate isindi lai."

Mawu Yesus su saruanni Herodes

⁶Napawe Pilatus naaringikka hatto udde, itou naiwaŋo, "Apa taumata indi taumata n Galilea?" ⁷Napawe nipaasingkatanna manungku Mawu Yesus wuassu leta'u wageangngu tarŋino n Herodes, Pilatus nandolokku Mawu Yesus ringanni Herodes, apan tempo udde isudde lai su Yerusalem. ⁸Herodes nilumuassa napawe naasilo Mawu Yesus, ana

waugu maɬannute itou maaringikka olangnge wuɾɾu maapulu ma'ellega Sitou. Itou mangngantimma wotongnge ma'ellega Mawu Yesu ma'ola'a aɬaɾɾindu'a. ⁹Ana waugu udde Herodes manambo naiwaɬo Sitou, arawe Mawu Yesu tawe sinumimbakka saran paassa. ¹⁰Manga imam tembonanne wuɾɾu manga huru n agama sinumaruanna lai isudde wuɾɾu ringannu pia lembone mapaasala Mawu Yesu. ¹¹Herodes wuɾɾu manga tantarane mannalangnga wuɾɾu mangngaɬuandaga Mawu Yesu, see nilluɾɾeannu laubbu awawantuga, wua udde Itou nirolokka apia ringanni Pilatus. ¹²Su allo udde lai Herodes wuɾɾu Pilatus, apan rorone uasase'etta, naddamete apia.

Mawu Yesu iɾɾuumanna pateanna

(Mat. 27:15-26; Mrk. 15:6-15; Yoh. 18:39-19:16)

¹³Pilatus nangammullu manga imam tembonanne, wuɾɾu manga piarɾangnge, wuɾɾu laɬoɾɾo n soa, ¹⁴see nabbisara simangitou, "Iamiu nangapiddu taumata indi sia'u wuɾɾu mabbisara manungku Itou mangngaɬiwu manga taumata. Orassa indi su saruanni amiu ia'u suete namarikissa Sitou, arawe ia'u atonna-tonna tawe naasomba saran sambau aɬaɬeone apan iaansilli amiu Sitou. ¹⁵Aroddi lai addapatti Herodes, ana waugu itou lai suete napawelengngu Mawu Yesu udde siami. Taumata indi tawe na'ola'a pasasala apan wotongnge maɾɾuumanna Sitou ma'oma n sara mate. ¹⁶Ana waugu udde ia'u sarun manggesekka Sitou wua udde Itou ipallosa."

[¹⁷Suapa n allo ramea m Paskah, Pilatus ɾinone mammallossu sangkatou taumata n ɾuumanna su tumana'u soa.] ¹⁸Anambo n taumata apan uaammulla isudde mangngintuɬi, "Patete Itou! Pallosa'a Barabas siami!" (¹⁹Barabas niɾɾuumanna ana waugu namangalo soa wuɾɾu ana waugu pamamate.)

²⁰Pilatus maapulu mamallossu Mawu Yesu, ana waugu udde itou nabbisara paassa lai su taumata nambo udde. ²¹Arawe imangitou mangngintuɬi, "Arussa'a Itou! Arussa'a Itou!"

²²See su atallune Pilatus nabbisara simangitou, "Arawe apa pasasane? Ia'u tawe naasomba saran sambau pasasane apan ɾinone iɾɾuumanna ringannu ɾuumanna pateanna! Ia'u manggesekka Sitou wua udde ipallosa."

²³Arawe imangitou sidutu u'ui ma'ikka-ikkatta manungku Mawu Yesu ɾinone iarussa. Ne panginsueanne darorongngi mangitou niringiɾɾanna. ²⁴Ne Pilatus nangonggole n ɾuumanna pateanna su Mawu Yesu ere su apulu n taumata nambo udde, ²⁵wuɾɾu namallossu taumata apan radoronganni mangitou, eteudde taumata apan

nirruumanna ana waugu namangalo wuŕru namate. Wua udde Mawu Yesus tinantille simangitou wuŕru walate apulu mangitou ma'ola'a Sitou.

Mawu Yesus niarussa

(Mat. 27:32-44; Mrk. 15:21-32; Yoh. 19:17-27)

²⁶Ne Mawu Yesus niapidde mangitou. Su pattangngannu laŕanna, imangitou nassomba n sangkatou aranne Simon, wuassu Kirene, apan tantaŕanna inai su soa. Imangitou nanametta sitou, see namata'i tou niapapasanna arussa su liuddu Mawu Yesus.

²⁷Manambo taumata uatanturŕutta liuddu Mawu Yesus – su wallatti mangitou pia sire pira wawine. Manga wawine udde lulluai wuŕru mas-susa Mawu Yesus. ²⁸Arawe Mawu Yesus nanaile wuŕru nabbisara, "Ei, manga wawine n Yerusalem! Ia'u arie palluaie. Luaite n watanganni amiu sassane wuŕru alaŕrangangu. ²⁹Ana waugu sarun rumanta tem-pone taumata sarun mabbisara, 'Laŕumanna'a eteapa su manga wa-wine apan tawe illoŕro, apan tawe naasomba ana'a wuŕru tawe ma-pasusu n anangge!" ³⁰Su tempo udde taumata sarun mabbisara su manga wowone, 'Umpisanete iami!' Wuŕru su manga wuidda, 'Soopete iami!' ³¹Ana waugu amungkangngu matataŕrino su alu ta'e wiakka, tau-mata suete na'ola'a ereindi, apa lai sarun olaanni mangitou su alu apan naŕrangute!"

³²Pia lai rua ng katou waine – itarua taumata laŕeo – apan niapiddi mangitou irruumanna lai sara mate su sampunna ringannu Mawu Yesus. ³³Napawe na'omate su tampa apan isassago "Tanggilaŕa", imangitou nangarussate Mawu Yesus wuŕru rua ng katou taumata laŕeo udde – sangkatou su samba'a uananna wuŕru sangkatou lai su samba'a airri Mawu Yesus. ³⁴See Mawu Yesus inumaŕiomanna, "O Iamang-Ku, ampungewe imangitou! Imangitou wagga apa apan a'olaanni mangitou."

Laubbu Mawu Yesus nitahia isudde su wallatti mangitou wuŕru niundi. ³⁵Manga taumata uarisikka isudde mabbiala lai, tantaŕanna manga tembonannu taumata n Yahudi mangngadio'a Mawu Yesus ringannu wisarane, "Itou suete nanaŕamatta taumata waine; orassa indi Itou panaŕamatta riri-Ne sassane, amungkangngu atonna-tonna Itou Ratu m Punnu Saŕamatta apan nipile Mawu Ruata!"

³⁶Manga tantara lai mangngadio'a Sitou. Imangitou nangundani wuŕru nangonggolu anggore mapakkada Sitou ³⁷lapiddu nabbisara, "Amungkangngu I'o ratu n taumata n Yahudi, panaŕamatte riri-Nu!"

³⁸Su alu arussa Mawu Yesus aliu rosone uaworŕetta wisara ereindi: "Ete indi Ratu n Taumata n Yahudi."

³⁹Sangkatou wuassu wallattu taumata laleo apan uarussa isudde mangngadio'a lai Mawu Yesus. Itou nabbisara, "Ete I'o Ratu m Punnu Salamatta udde? Ei, panałamatte riri-Nu wuřu siami!"

⁴⁰Arawe taumata laleo sangkatou lai nanagu hawene udde, unni tou, "Apa i'o tawe matta'uttu Mawu Ruata? I'o su sampunna niřuuman na'oma n sara mate ere Itou. ⁴¹Tumba'u řuumanni addua udde atonna narřino su pallařagu ng kadua. Arawe Itou atonna-tonna tawe sałane!"

⁴²See itou nabbisara, "Mawu Yesus, naungewe ia'u, napawe I'o ruman-tate maola'a sangkatou Ratu!"

⁴³"Pangimante," unnu Mawu Yesus sitou, "Allo indi i'o su sampunna lai ringang-Ku su Firdaus."

Apapate Mawu Yesus

(*Mat. 27:45-56; Mrk. 15:33-41; Yoh. 19:28-30*)

⁴⁴Irařrangngo puulla mapuło dua allattune, matannallo tawe se-makke wuřu ahewallu wanua udde naddandumma na'oma n sara puulla tatallu wawallo. ⁴⁵Pampele apan ua'ele su Wałe Mawu nahesa'a natahia darua. ⁴⁶See Mawu Yesus inumui ma'ikka-ikkatta, "O Iamang-Ku! Su-lałummu limanu Ia'u manantillu watangang-Ku!" Napawe suete nabbi-sara aroddi, Itou natete.

⁴⁷Napawe tembonannu tantara naasilo apa apan suete nariaddi, itou nadalote Mawu Ruata. See itou nabbisara, "Atonna-tonna, Itou indi tawe sałane!"

⁴⁸Taumata nambo apan nirumanta isudde ma'ellega, naasilote apa apan suete nariaddi isudde. Imangitou sarangkanambone napułe ringannu naungnga sinumassilla. ⁴⁹Wuřu manga hawe Mawu Yesus, na-reengnga lai manga wawine apan uatantalongnga Sitou wuassu Galilea uarisikka marau wuřu na'ellega sarangkanambone udde.

Pallařabingngu Mawu Yesus

(*Mat. 27:57-61; Mrk. 15:42-47; Yoh. 19:38-42*)

⁵⁰⁻⁵¹Pia sangkatou aranne Yusuf, wuassu soa Arimatea su wanua Yudea. Itou sangkatou mapia apan aaddatannu taumata, wuřu na-reengnga taumata apan sidutu uarařraddo tempone Mawu Ruata ma-marenta ere sangkatou Ratu. Salaiwe itou nareengnga su wageang-ngu Mallařuungngu Agama, itou maddiri n řuuman na udde wuřu inolaannu manga mallařuungnga udde. ⁵²Yusuf inaite sinumaruanna si Pilatus wuřu nadorongnga tadea'u winalunannu Mawu Yesus ionggolla

sitou. ⁵³Wua udde itou nanossokku winaḷunannu Mawu Yesus udde wuassu arussane, see nipi'unnu kaengnga kafan wuassu linen. Wua udde itou nangadote n winaḷunanna sulaḷummu laḷabinganna apan niola'a sulaḷummu wuiddu watu – laḷabinganna udde taambe pinallabinganna. ⁵⁴Allo udde allo aḷimane; wuḷḷu allo n Sabatta maranite itattakka.

⁵⁵Manga wawine apan nirumanta ringannu Mawu Yesus wuassu Galilea tinumantalongnga si Yusuf na'ellega laḷabinganna udde. Imangitou na'ellega lai ereapa winaḷunannu Mawu Yesus niaddo sulaḷummu laḷabinganna. ⁵⁶Wua udde imangitou napuḷe see nanaddia manga rampa-rampa wuḷḷu lana mawangngi ipamokka winaḷunannu Mawu Yesus.

Su allo n Sabatta, imangitou nangilloḷo mammanara ipallagu n Tita n agama.

Pabbawangunnu Mawu Yesus

(Mat. 28:1-10; Mrk. 16:1-8; Yoh. 20:1-10)

24 Su allo Misa, ruaallo maḷḷangapa, manga wawine udde inaita su laḷabinganna nangapiddu manga rampa apan suete nisaddia mangitou. ²Su laḷabinganna, imangitou naaratinga watu ḷaḷapingnge nataḷinggite. ³See imangitou sinumuttate sulaḷummu laḷabinganna udde, arawe tawe naasomba winaḷunannu Mawu Yesus isudde. ⁴Tantaḷanna imangitou uarisikka isudde wuḷḷu tuttatiangnga maḷḷingiddu olangnge udde, inaḷḷombanganne rua ng katou ringannu laungnge sussaḷendappa nirumarisikka marani mangitou. ⁵Imangitou mangke nata'utta, see inumaḷintuda su leta'a, tantaḷanna rua ng katou udde mabbisara si-mangitou, "Anio iamiu maddea'a taumata wiakka su tampa n taumata nate? ⁶Itou tate isindi. Itou nabangunte! Paanaunge apa apan suete ni-waḷo n Tou siamiu su tempo Itou ta'e su Galilea, ⁷manungku 'Ana'u Taumata sarun itantilla su taumata marosa, see iarussa, wuḷḷu su allo atallune Itou sarun mabangunna."

⁸Ne naanaungke manga wawine udde manga wisara Mawu Yesus. ⁹Napawe nawelengke wuassu laḷabinganna udde, imangitou nabatti'e anambo n apa apan suete nariaddi udde su sire mapuḷo assa mallalaḷḷenggen-Ne wuḷḷu su manga mallalaḷḷenggen-Ne apan waine. ¹⁰Manga wawine apan namasingkattu sarangkanambone udde su mallalaḷḷenggen nu Mawu Yesus eteudde: Maria Magdalena, Yohana wuḷḷu Maria inangngi Yakobus, see manga wawine waine apan su sampunna ringanni mangitou. ¹¹Arawe manga rasul udde massunna manungku manga wawine udde tumba'u mabatti'a waḷḷaḷḷia. Imangitou tawe mangngimanna watti'u manga wawine udde. ¹²Arawe Petrus

nabuatta dirumarisikka see tinumaḷangnga watukku laḷabinganna. Lapi-ddu u'aruutta itou ma'ellega watukku laḷumme, see naasilo tumba'u maḷarḡnessa kafan isudde. Petrus naherangnga, see napuḷe ringannu anambo n aiwaḷo sulaḷummu naungnge su ola'u apa apan suete nariaddi.

Su tangnga n daḷanna watukku Emaus

(*Mrk. 16:12-13*)

¹³Su allo udde lai, rua ng katou mallaḷarḡnggennu Mawu Yesus tantaḷanna u'amatta watukku sambau ampungnga, aranne Emaus, ita-takasere araune mapuḷo assa su kilone wuassu Yerusalem. ¹⁴Lapiddu u'amatta imangitou uahahatto su ola'u apa apan suete nariaddi udde. ¹⁵Tantaḷanna imangitou uahahatto wuḡḡu maḡḡingidda su sambau, Mawu Yesus sassane nirumanta wuḡḡu inumamatta su sampunna ringanni mangitou. ¹⁶Imangitou naasilo Mawu Yesus, arawe piaddu naaḷimbatta na'oma n sara imangitou tawe naaillaḷa Mawu Yesus. ¹⁷See Mawu Yesus nabbisara, "Apa ipagahato ng kamiḡu su tangnga n daḷanna indi?"

Imangitou nattaalla ringannu naungnga nasusa. ¹⁸See sangkatou wuassi mangitou, aranne Kleopas, naiwaḷo Mawu Yesus, "Ete iamangnga sangkatou raho su Yerusalem apan wagga m batti'a apan suete nariaddi poiारoddi wakku-wakku indi?"

¹⁹"Watti'a apa?" aiwaḷo Mawu Yesus.

"Watti'a apan narḡria'a su Mawu Yesus, taumata Nazaret udde," sasimbakki mangitou. "Itou sangkatou nabi. Manga wisara-Ne wuḡḡu manga manara-Ne pia tarḡḡnone – mapia su aelleḡu Mawu Ruata aroddi lai su aelleḡu awadaalla! ²⁰Manga imam tembonanne wuḡḡu manga piarḡra'u walagi ite nanantilli Tou iḡḡuumanna na'oma n sara mate, wuḡḡu imangitou nangarussa n Tou! ²¹Sumbali iami mangngantimma manungku ete Itou mamallossu Israel! Wuḡḡu allo indi allo atallune wuassu olangnge udde nariaddi. ²²Wuḡḡu lai manga sire pira wawine wuassu ammuḷanni ami suete namaḡḡindu'a siami. Ruaallo maḡḡanggapa imangitou nabatukku laḷabinganna, ²³arawe tawe naasomba winalunan-Ne poiारoddi. See imangitou nabelengke wuḡḡu nabatti'a manungku imangitou suete naasilo mala'ekatta, wuḡḡu manga mala'ekatta udde nabbisara manungku Mawu Yesus nabbiakke. ²⁴Sire pira wuassi ami inaite su laḷabinganna wuḡḡu naaratinga manungku apa apan niwatti'u manga wawine udde atonna, tumba'u imangitou tawe naasilo Mawu Yesus."

²⁵See Mawu Yesus nabbisara simangitou, "Iamiḡu woddo atonna! Tu-manite maḷiwue iamiḡu mangngimanna anambo n apa apan suete niapa-singkattu manga nabi! ²⁶Waḷinewe Ratu m Punnu Saḷamatta udde sarun

mamendamma asasusa rorone, wua udde na'omate su awawantug-Ge?"

²⁷Wua udde Mawu Yesus nanaŋaate simangitou apa apan uaworŋetta sulaŋummu Wuke Susi su ola'u wadang-Nge, manattakka wuassu wuke Musa wurru wuke manga nabi.

²⁸Tantaŋanna udde imangitou maddani n soa patudanni mangitou. Mawu Yesus na'ola'a paŋimaunnapa ere manassute amatan-Ne, ²⁹arawe imangitou nama'ungnga Sitou. "Atana'e su tampa ng kami." unni mangitou Sitou, "allo maranite maŋrabi wurru maranite marandumma lai." Ne Mawu Yesus sinumuttate manaŋrabi ringanni mangitou. ³⁰Su tempo inuma'ianna su sambau ringanni mangitou umanna, Mawu Yesus nangawakka roti, naadiangkamanna su Mawu Ruata, namesangnga roti ringannu lima-Ne, see nionggolle simangitou. ³¹Wua udde naatutukke imangitou manungku udde Mawu Yesus. Arawe Itou nattingkawuli wuassu aellegi mangitou. ³²Unni mangitou sangkatou ringannu waine, "Waŋinewe pendamanna naungngi ite ere ola'u sussarootta, su tempo Itou uahahatto ng kite su tangnga n daŋanna, wurru nanaŋa'a n laŋorŋo n Wuke Susi siite?"

³³Orassa udde lai imangitou dirumarisikka see nabelengke watukku Yerusalem. Poiaroddi imangitou naaratingnga sire mapulo assa malalaŋrenggennu Mawu Yesus uaammulla suadio'a ringannu taumata waine. ³⁴Imangitou nabbisara, "Atonna-tonna Mawu nabbiakke apia! Itou suete nattingkapisilo m batangan-Ne si Simon!"

³⁵Rua ng katou mallalaŋrenggennu Mawu Yesus apan wakku niru-manta udde nabbati'u lai addapatti mangitou su tangnga n daŋanna, wurru ereapa imangitou naaillaŋa Mawu su tempo Itou namesangnga roti.

Mawu Yesus nattingkapisilo m batangan-Ne su mallalaŋrenggen-Ne

(*Mat. 28:16-20; Mrk. 16:14-18; Yoh. 20:19-23; WMR. 1:6-8*)

³⁶Tantaŋanna imangitou ta'e uahahatto, inaŋrombanganne Mawu Yesus sassane nirumarisikka su pattangnganni mangitou wurru nabbi-sara, "Paddarame siamiu!"

³⁷Imangitou nirumuro wurru nata'utta, ana waugu imangitou ma-ssunna imangitou naasilo setanna. ³⁸Arawe Mawu Yesus nabbisara, "Anio iamiu matta'utta? Anio naungngi amiu uapapadua? ³⁹Pa'ellege lima-U wurru ledda-U. Asingkatawe manungku indi uarisikka Ia'u sa-ssane! Pangagasse wurru panutukke, ana waugu setanna tawe remene ara'e duŋrine, ere iamiu maasilo Sia'u orassa indi."

⁴⁰Mawu Yesus nabbisara aroddi lapiddu namasilo n lima-Ne wuɾɾu ledda-Ne simangitou. ⁴¹Wuɾɾu tantaɭanna imangitou taambe mangngi-manna atonna ana waugu tumanite n lulluassa wuɾɾu naherangnga, Mawu Yesus naiwaɭo simangitou, "Iamiu pia anna isindi?" ⁴²Imangitou nangonggolu inassa horengnga sanduru. ⁴³Mawu Yesus nanengkamma inassa udde see inumante su saruanni mangitou.

⁴⁴Wua udde Itou nabbisara simangitou, "Ete indi manga inolaanna apan suete Ta'u niwaɭo siamiu su tempo Ia'u ta'e su sambau ringanni amiu manungku manga inolaanna apan uaworɣetta matataɾɾino Sia'u sulaɭummu manga wuke Musa, Manga Nabi, wuɾɾu Mazmur, ɾinone matipussa."

⁴⁵Wua udde Mawu Yesus nanualaga ɾingirɾanni mangitou ana see maasunna pandumannu Wuke Susi. ⁴⁶See Itou nabbisara simangitou, "Sulaɭummu Wuke Susi uaworɣetta manungku Ratu m Punnu Saɭamatta ɾinone matataɾɾangnga, wuɾɾu sarun mabangunna apia wuassu papate su allo atallune. ⁴⁷Wuɾɾu lai manungku ringannu arannu Ratu m Punnu Saɭamatta udde ɾinone iwatti'a su anambo n pabbawalaga manungku ɾinone taumata mawaɭu wuassu rosane, wuɾɾu manungku Mawu Ruata mangampungnga rosa mangitou. Wuɾɾu watti'a udde ɾinone iapasing-katta manattakka wuassu Yerusalem. ⁴⁸Ete iamiu maola'a manga tatia-lane wuassu sarangkanambone udde. ⁴⁹Wuɾɾu Ia'u sassane sarun mandolokka ringanni amiu apa apan suete pina'ire n Iamangnga. Arawe iamiu ɾinone marrado su soa indi ma'oma n sara tarrino wuassu Mawu Ruata mannilla'uppa siamiu."

Mawu Yesus nasengkengnga watukku surga

(Mrk. 16:19-20; WMR 1:9-11)

⁵⁰Wua udde Mawu Yesus nangapidde mangitou sinumabangnga wuassu soa nadatingngu Betania. Isudde Itou namatte n lima-Ne, see nangaɭamatta simangitou. ⁵¹Tantaɭanna Itou mangngaɭamatta, Itou nasengkengnga watukku surga, see narrae wua dinganni mangitou. ⁵²Imangitou inumalintuda nassubba Sitou, wua udde nabelengke su Yerusalem ringannu naungnga lulluassa atonna, ⁵³wuɾɾu sidutu madalo Mawu Ruata su Waɭe Mawu.

WATTI'U AĻĀLUASSA APAN NIAPASINGKATTI YOHANES

WISARA TAĻAANE

SulaĻummu Watti'u AĻĀluassa apan niapasingkatti *Yohanes* indi, Mawu Yesu niapaasingkatta ere sangkatou Rengetannu Mawu Ruata apan awasa apan naola'a taumata wuṛṛu natana'a su runia ringanni ite. Ere lai suete niwaĻo su wuke indi, Watti'u AĻĀluassa indi niwoṛṛetta ringannu pandumma tadea'u manga mabawasane wotongnge mangngi-manna manungku ete Mawu Yesu Ratu m Punnu SaĻamatta apan pina'ire – Itou Ana'u Mawu Ruata sassane. Wuṛṛu lai tadea'u ringannu mangngimanna Sitou imangitou maasomba wiakka (20:31).

Napawe su paarorone apan namasingkatta manungku Rengetannu Mawu Ruata apan awasa udde eteudde Mawu Yesu, wageangnge paarorone su wuke indi mabatti'u aĻawo'u aĻaṛṛindu'a apan niola'u Mawu Yesu. Manga aĻaṛṛindu'a udde napaalĳatta'a manungku ete Mawu Yesu udde Ratu m Punnu SaĻamatta apan pina'ire, Itou Ana'u Mawu Ruata. Sambau-sambau su ola'u aĻaṛṛindu'a indi, pia lai manga pagahahatto Mawu Yesu ringannu manga taumata. Wuassu manga pagahahatto udde nasemakke apa apan niapaalĳatta'u manga aĻaṛṛindu'a udde. SulaĻummu wageangnge indi niapaasingkatta lai manungku pia taumata mangngimanna Mawu Yesu wuṛṛu naola'a mallalaṛṛenggen-Ne, arawe piaddu lai mannaĻare Sitou wuṛṛu maddiri mangngi-manna Sitou. Addoanne 13-17 namoṛṛetta maĻo'engnga su ola'u ereapa paa'aukku Mawu Yesu ringannu mallalaṛṛenggen-Ne su tempo ṛabbi napawe Itou sametante, wuṛṛu ereapa Itou nanaddia wuṛṛu nanohassa naungngi mangitou su ṛabbi udde. Manga addoanne panginsueanne nanaĻa'a su ola'u ereapa Mawu Yesu nisametta wuṛṛu niparikisanna, ereapa Itou niarussa, nate wuṛṛu nabbiakka apia, wuṛṛu ereapa Itou natting-kapasilo m batangan-Ne su manga mallalaṛṛenggen-Ne napawe Itou nabbiakke apia.

Watti'a su ola'u wawine apan niaratinganna sussandaga (8:1-11), nitaṛṛo su kurungnga wahewa, ana waugu manambo woṛṛetta wuṛṛu

manga wuke niaḷinna apan suete nitappassa su tempo rorone tawe nabbati'u watti'a udde, arawe ingana'a waine namorretta su aḷawo'u tampa.

Sulaḷummu wukene indi Yohanes mangke mannantiro su ola'u aonggolla, eteudde wiakka tutune wuḷḷu maḷannu-ḷannu, apan nionggolu Mawu Ruata sulaḷummi Kristus. Aonggolla udde suete tinattakka su runia, wuḷḷu wotongnge apendamannu manga taumata apan mangngimanna Mawu Yesus maola'a laḷanna mattuda Mawu Ruata, ere lai napaaḷiatta'u Mawu Ruata, wuḷḷu sangkatou apan nangonggolu wiakka. Inanaramanni Yohanes eteudde manga sasanato'a apan nianu wuassu inolaanna miallo-miallo tadea'u mapaaḷiatta'u apapia m pangangimanna, ere: ua'e, roti, asasemakka, mallalu'adda wuḷḷu dombane, punnu angore wuḷḷu wuane.

Laḷorrone

Panattaḷḷanne	1:1-18
Yohanes Mananaḷḷani wuḷḷu manga taumata apan paarorone-rorone naola'a mallaḷaḷḷengennu	
Mawu Yesus	1:19-51
Pangangimbe Mawu Yesus su tangnga n laḷorḷḷo n soa	2:1-12:50
Manga allo pangudusanne su Yerusalem wuḷḷu marani n Yerusalem	13:1-19:42
Pabbawangunnu Mawu Yesus wuḷḷu nattingkapisilo m batangan-Ne	20:1-31
Panginsueanne: nattingkapisilo m batangan-Ne lai su Galilea	21:1-25

Rengetanna apan mangngonggolu wiakka

- 1** Su paarorone, tantaḷanna runia taambe niriaddi, Rengetanna udde plate.
 Rengetanna udde su sambau ringannu Mawu Ruata
 wuṛṛu Rengetanna udde uasulunggu Mawu Ruata.
- 2** Ro'e n paarorone Itou su sambau ringannu Mawu Ruata.
- 3** Sarangkanambone niola'a sulaḷummi Tou,
 wuṛṛu wuassu aḷawo'u apan plate,
 tawe saran sambau apan inola'a tawedi Tou.
- 4** Rengetanna udde punnu wiakka,
 wuṛṛu wiakka udde mannemakka taumata.
- 5** Semakka udde lullansiangnga sulaḷummu ararandumma,
 wuṛṛu ararandumma tawe maapadumma Sitou.
- 6** Nirumantate taumata apan nirolokku Mawu Ruata,
 aranne Yohanes.
- 7** Itou nirumanta mammasingkattu asasemakka udde,
 tadea'u anambo n taumata mangngimanna.
- 8** Itou sassane waḷine asasemakka udde,
 itou tumba'u mabawaḷone.
- 9** Semakka tutune apan mannemakka anambo n taumata,
 nirumanta su runia.
- 10** Rengetanna plate su runia,
 runia niola'a sulaḷummi Tou,
 arawe runia tawe maaillaḷa Sitou.
- 11** Itou nirumanta su wanua-Ne sassane,
 arawe pabbawala-Ge maddiri manarimmatti Tou.
- 12** Arawe pia lai taumata apan manarimmatti Tou
 wuṛṛu mangngimanna Sitou;
 imangitou nionngoḷannu taṛṛino maola'a ana'u Mawu Ruata,
- 13** apan niasungkangnga waḷine wuassu taumata,
 ana waugu wiakka wakku udde punnene wuassu Mawu Ruata.
- 14** Rengetanna naola'e taumata,
 Itou uatana'a su wallatti ite,
 wuṛṛu iite suete naasilo awawantu-Ge.
 Awawantuga udde suete sinengkammi Tou
 ana waugu Itou Ana'u Iamangnga tinggassa.
 Sulaḷummi Tou iite naasilo Mawu Ruata
 wuṛṛu darangngu-Ne siite.
- 15** Yohanes nirumanta naola'a tatialane,
 itou mammasingkatta:

"Ete Itou indi apan ta'u iwabbatti'a:
Itou sarun rumanta, nasalimmuri wuassia'u,
arawe magewalanna wuassia'u,
ana waugu tantałanna ia'u taambe,
Itou nirumantate."

¹⁶Itou napene n darangngu;

tawe illołone,

Itou mangnalammatta siite.

¹⁷Tita Mawu, nisengkammi ite wuassi Musa.

Arawe darangngu wurru tatałantupu Mawu Ruata

niapaalatta'a sulałummi Yesus Kristus.

¹⁸Tawe saran sangkatou apan suete naasilo Mawu Ruata,

tumba'u ana'u lamangnga tinggassa,

apan uasulungngu lamangnga wurru uaaukka atonna ringanni Tou.

Ete Itou apan napaalatta'u lamangnga siite.

Tatiala n Yohanes

(*Mat. 3:1-12; Mrk. 1:1-8; Luk. 3:1-18*)

¹⁹Manga piarra'u Yahudi su Yerusalem nandolokku manga imam wurru manga taumata n Lewi inai ringanni Yohanes wurru naiwało sitou, "I'o indi isai?"

²⁰Yohanes nanga'u atonna-tonna, "Ia'u waline Ratu m Punnu Sałamatta."

²¹"Amungkangngu aroddi, i'o isai?" aiwało mangitou. "Apa i'o Elia?"

"Waline," sasimbakki Yohanes.

"Apa i'o sangkatou Nabi?" aiwało mangitou apia.

"Waline," sasimbakki tou.

²²"Amungkangngu aroddi, wałoa'e siami isai i'o indi," unni mangitou, "tadea'u iami wotongnge sumimbakka aiwało manga taumata apan nandolokki ami. Apa wisaranu su ola'u ririnu sassane?"

²³Yohanes sinumimbakka, "Ete ia'u apan niapaasingkatti Nabi Ye-saya:

"Taumata apan u'aljia su wadda'a:


Ratarra'e lałanna amatannu Mawu."

²⁴Manga taumata apan nirolokku taumata n Farisi, ²⁵naiwało, "Amungkangngu i'o waline Ratu m Punnu Sałamatta, waline Elia, waline lai sangkatou Nabi, anio i'o mannařrani?"

²⁶Yohanes sinumimbakka, "Ia'u mannařrani ringannu ua'e. Arawe su pattangnganni amiu pia taumata apan tawe aillałanni amiu. ²⁷Itou

nirumanta saġimurine wuassia'u, arawe mamu'a taġi n sapatu-Ne lai ia'u tawe wotongnge."

²⁸Sarangkanambone udde nariaddi su Betania, samba'a n ra'i n Saġukku Yordan, su tampa n Yohanes mannaŕrani.



Soa n Yerusalem (1:19)

Ana'u Domba Mawu Ruata

²⁹Su allo tiŕrabbine, Yohanes naasilo Mawu Yesus nirumanta ringanni tou. See Yohanes nabbisara, "Pa'ellega, eteudde Ana'u Domba Mawu Ruata apan namappassa rosa n runia indi. ³⁰Ete Itou apan ta'u iwabbatti'a apan nirumanta murine wuassia'u, arawe maggewaġanna wuassia'u, ana waugu ia'u taambe niasungkangnga, Itou uddete su runia. ³¹Su paarorone, ia'u wagga isai Itou udde. Sumbaġi ia'u nirumanta mannaŕrani ringannu ua'e, tadea'u taumata n Israel maaillaġa Sitou."

³²Yohanes nangagillu lai tatiala indi, "Ia'u naasilo Għaŕraho Mawu Ruata niumonto'a ere manu'a merpati wuassu langitta see nangintarŕo Sitou. ³³Tempo udde ia'u ta'e wagga isai Itou. Arawe Mawu Ruata apan nandolo'u mannaŕrani ringannu ua'e suete nabbisara sia'u, 'Napawe i'o maasilo Għaŕraho Mawu Ruata niumonto'a, see matana'a mangintarŕo su sangkatou, ete Itou apan mannaŕrani ringannu Għaŕraho Mawu Ruata.' ³⁴Ia'u suete naasilo sassane," unni Yohanes, "wuŕŕu ia'u mangonggolu tatiala manungku ete Itou Ana'u Mawu Ruata."

Manga mallaḷarḡenggenṇu Mawu Yesus paarorone

³⁵Su allo tiṛḡabbine Yohanes su tampa udde lai ringannu rua ng katou mallaḷarḡenggenne. ³⁶Napawe itou naasilo Mawu Yesus sinumabbi, itou nabbisara, "Pa'ellega! Eteudde Ana'u Domba Mawu Ruata."

³⁷Rua ng katou mallaḷarḡenggenṇi Yohanes naaringikka manga watti'a udde, see inaité tinumantalongnga Mawu Yesus. ³⁸Mawu Yesus nanaile su liudde, wuṛṛu naasilo simangitou uatantalongnga Sitou, Itou naiwaḷo, "Iamiu maddea'a apa?"

Imangitou sinumimbakka, "Rabi, Rabi uatana'a suapa?" (Wisara 'Rabi' atappasanne huru.)

³⁹"Wette pa'ellege sassane," unnu Mawu Yesus. Imangitou inaité su sambau ringanni Tou ma'ellega suapa Itou uatana'a. Orassa udde puulle appatta wawallo. Allo udde imangitou uatana'a su sampunna ringanni Tou.

⁴⁰Sangkatou su wallatti tarua apan suete naaringikka apa apan iwabatti'i Yohanes wuṛṛu see inaité tinumantalongnga Mawu Yesus, eteudde Andreas, tuṛḡangṇi Simon Petrus. ⁴¹Maḷiha-ḷihakka Andreas naddea'a si Simon, tuṛḡangṇe, wuṛṛu nabbisara sitou, "Iami suete nassomba Mesias!" (Mesias nassuḷungṇi Kristus, eteudde: Ratu m Punnu Saḷamatta.) ⁴²Andreas nanguntudi Simon ringannu Mawu Yesus.

Mawu Yesus nanutuda si Simon, see nabbisara, "I'o Simon, ana'i Yona. I'o sarun isago Kefas." (Kefas uasuḷungṇi Petrus, atappasanne: wowo m batu.)

Mawu Yesus namaggo si Filipus wuṛṛu si Natanael

⁴³Su allo tiṛḡabbine Mawu Yesus naṛḡawessa inai watukku Galilea. Itou nassomba m Filipus, wuṛṛu nabbisara sitou, "Wette tantalongke Sia'u!" ⁴⁴Filipus inasapputanne wuassu Betsaida, eteudde tampa atata-naanni Andreas wuṛṛu Petrus. ⁴⁵Filipus nassomba Natanael wuṛṛu nabbisara sitou, "Iami suete nassomba n taumata apan iwabaḷo Musa su-laḷummu Wuke n Tita Mawu Ruata, wuṛṛu niapaasingkattu manga nabi. Itou eteudde Mawu Yesus wuassu Nazaret ana'i Yusuf."

⁴⁶Arawe Natanael sinumimbakka, "Wotongṇewe sambau apapia rumanta wuassu Nazaret?"

"Wette pa'ellega sassane," sasimbakki Filipus.

⁴⁷Mawu Yesus naasilo si Natanael nirumanta, see nabbisara su ola'i tou, "Pa'ellega, udde taumata n Israel tutune. Tawe awusune itou."

⁴⁸"Ereapa Iamangnga maaillala sia'u?" aiwalo Natanael su Mawu Yesus.

Mawu Yesus sinumimbakka, "Tantalanna Filipus taambe namaggo si'o, Ia'u naasilote si'o su alungngu alu ara udde."

⁴⁹"Iamangnga Huru," unni Natanael, "Iamangnga eteudde Ana'u Mawu Ruata! Ete Iamangnga Ratu m pabbawalagu Israel!"

⁵⁰Mawu Yesus nabbisara, "I'o mangngimanna, tumba'u ana waugu Ia'u nabbisara manungku Ia'u naasilote si'o su alungngu alu ara udde? Manga inolaanna apan maggewalanna wuassu inolaanna udde sarun asiloannu!" ⁵¹Mawu Yesus nabbisara apia, "Atonna, pangimante, i'o sarun maasilo langitta mawu'a, wufru manga mala'ekattu Mawu Ruata uapapalele ringannu Ana'u Taumata."

Andeangngu awingnga su Kana

2 Rua allo wua udde pia andeangngu awingnga su soa n Kana su Galilea, wufru inangngu Mawu Yesus isudde lai. ²Mawu Yesus wufru mallafranggen-Ne niwalanna lai su andeangnga udde. ³Napawe ang-gore nasuete, inangngu Mawu Yesus nabbisara Sitou, "Imangitou niasueannu angore."

⁴Mawu Yesus sinumimbakka, "Inangnga, arie mandolo-U. Taambe tempone Ia'u mapaliatta'u riri-U."

⁵Arawe inangngu Mawu Yesus nabbisara su mangangimbe, "Tufutte apa apan irolokki Tou siamiu."

⁶Isudde pia annumma wensada apan nissaddia pangangukkasanna tumufutte inanaramannu Yahudi. Wensada udde sambau-sambau irarangngo lorrone marasutta su litefrane. ⁷Mawu Yesus nabbisara su mangangimbe udde, "Lorrote ng kua'e manga wensada udde." Imangitou nalorrote na'oma n sara napene-pene. ⁸See Mawu Yesus nabbisara simangitou, "Orassa indi pangabbate ua'e adio'a wufru apira'e su piarra'u andeangnga." Imangitou nangapiddu ua'e udde su piarra'u andeangnga, ⁹wufru itou naatemma ua'e apan nawalute angore udde. (Itou wagga wuassuapa angore udde, tumba'u manga mangangimbe apan nalla'inna angore udde masingkatta.) Ne, piarra'u andeangnga udde nangundani maa'awingnga esakka, ¹⁰see nabbisara sitou, "Wiasane taumata mannaru n angore apianne paarorone wufru napawe manga raha nawusate ma'inumma, wakkute udde angore wiasa isaru. Arawe tufurangnga nanahipunna angore apan apianne sara n orassa indi!"

¹¹Eteudde alarindu'a paarorone apan niola'u Mawu Yesus. Itou na'ola'a udde su wanua Kana su Galilea. Ringannu tanda udde Itou mapaliatta'u awawantu-Ge. Ne mallafranggen-Ne nangimante Sitou.

¹²Wua udde Mawu Yesus inaite watukku Kapernaum su sampunna ringannu inang-Nge, manga turrang-Nge see manga mallajarrenggen-Ne. Imangitou natana'a poiaronddi manga pira allo alannune.

Mawu Yesus sinumutta su Waje Mawu

(Mat. 21:12-13; Mrk. 11:15-17; Luk. 19:45-46)

¹³Napawe Allo Wahewa m Paskah Yahudi maranite, Mawu Yesus inaite watukku Yerusalem. ¹⁴Su Waje Mawu su Yerusalem Itou naa-ratingnga mabawalu'u sapi, domba, wufru manga manu'a merpati; wufru lai manga mananu'addu roitta ua'ianna isudde. ¹⁵Mawu Yesus na'ola'a sambokka wuassu tali wua udde nallimbuakka anambo n winatangnga udde, mawae domba ara'e sapi, wuassu lalummu Waje Mawu. Manga medda mananu'addu roitta niwalinsuang-Nge na'oma n sara roitti mangitou nassalawukka. ¹⁶See Itou nabbisara su mabawalu'u manu'a merpati, "Pangingkatta wua isindi. Arie Waje n Iamang-Ku maola'a tampa m pabawalu'anna!" ¹⁷Ne manga mallajarrenggen-Ne naanaungnga wageanggu Wuke Susi ereindi, "Naung-Ku su Waje-Nu, o Mawu Ruata, maatutungnga naung-Ku."

¹⁸Manga tembonannu Yahudi sussimbakka Mawu Yesus, unni mangitou, "Annama'a pa'ola'a alarrindu'a maola'a sambau tatiala siami manungku I'o pia tarrino ma'ola'a ereindi."

¹⁹Mawu Yesus sinumimbakka, "Hoharra'a Waje indi, wufru sulalummu tallu allo Ia'u sarun mapararisikka apia."

²⁰See imangitou nabbisara, "Appattu pulo annumma su tonnane nipaatta mapararisikku Waje Mawu indi. Wufru I'o sarun mapararisikka apia sulalummu tallu allo?"

²¹Arawe Waje Mawu apan su pandummu Mawu Yesus eteudde wadang-Nge sassane. ²²Wua udde, napawe Mawu Yesus niapawangunna wuassu papate, naanaungke manga mallajarrenggen-Ne manungku hatto udde suete niapasingkatti Tou. Ne imangitou nangimante apa apan uaworretta sulalummu Wuke Susi wufru apa apan niapaasingkattu Mawu Yesus.

Mawu Yesus masingkattu anambo n taumata

²³Tantalanna Mawu Yesus ta'e su Yerusalem, su tempo n Ramea m Paskah, manambo taumata mangngimanna Sitou ana waugu manga

aļarřindu'a apan suete niolang-Nge. ²⁴Arawe Mawu Yesus tawe mangngimanna simangitou, ana waugu Itou masingkattu anambo n taumata. ²⁵Taumata salaiwe tate manala'a Sitou su ola'u isai-sai, ana waugu Itou sassane masingkatta apa apan uatarřo su naungngu taumata.

Mawu Yesus wurřu Nikodemus

3 Pia sangkatou piařra'u agama wuassu taumata n Farisi aranne Nikodemus. ²Su sambau řabbi itou nirumanta ringannu Mawu Yesus wurřu nabbisara, "Iamangnga Huru, iami masingkatta iamangnga nirolokku Mawu Ruata. Ana waugu tawe saran sangkatou apan wotongnge ma'aola'a tanda maarřindu'a ere niola'u iamangnga, amungkanngngu Mawu Ruata tawe uarřundinganna sitou."

³Mawu Yesus sinumimbakka, "Pangimante, tawe saran sangkatou apan wotongnge maola'a laļorřo n araratuannu Mawu Ruata, amungkanngngu itou tawe iasungkanngnga apia."

⁴"Ratadde taumata timmaddete wotongnge iasungkanngnga apia," sasimbakki Nikodemus su Mawu Yesus, "Wotongnge itou mabelengnga apia sulařummu illořo inangngene wurřu see iasungkanngnga apia?"

⁵Mawu Yesus sinumimbakka, "Atonna-tonna wisara'u indi: amungkanngngu taumata tawe iasungkanngnga wuassu ua'e wurřu Gharřaho Mawu Ruata, taumata udde tawe mawaļi su reengannu walagu Mawu Ruata. ⁶Taumata su ola'u wadangnge niasungkanngngu hagurangnga, arawe su pangangimanna niasungkanngngu Gharřaho Mawu Ruata. ⁷Arie paaherangnga amungkanngngu la'u mabbisara: iamiu sarangkanambone řinone iasungkanngnga apia. ⁸Anginna tuttiupa watukkuapa ipaapuļune; iite maaringikka tingikke, arawe iite wagga wuassuapa rarantane wurřu watukku apa amatanne. Aroddi lai taumata apan niasungkanngngu Gharřaho Mawu Ruata."

⁹"Ereapa udde wotongnge mariaddi?" aiwaļo Nikodemus.

¹⁰Mawu Yesus sinumimbakka, "I'o huru su Israel; řatadde i'o wagga? ¹¹Pangimante: iami mabbisara tumba'u apa apan asingkatanni ami, wurřu iami mattiala tumba'u su ola'u apa apan niasiloanni ami; arawe iamiu maddiru mangngimanna tatiala wuassi ami. ¹²Iamiu tawe mangngimanna amungkanngngu ia'u mabatti'a siamiu su ola'u inolaannu runia indi; ereapa iamiu wotongnge mangngimanna, amungkanngngu ia'u mabatti'a siamiu su ola'u surga? ¹³Tawe saran sangkatou apan suete nasengkengnga watukku surga, tumba'u Itou apan sinumossokka su runia, eteudde Ana'u Taumata.

¹⁴Ere lai Musa nanduittu atoanna witu'a su alu sambua su wadda'a, aroddi lai Ana'u Taumata rinone iruitta, ¹⁵tadea'u taumata nambo apan mangngimanna Sitou maasomba wiakka tutune wuŕru saran maŕannu-lannu."

¹⁶Ana waugu Mawu Ruata aroddi arangngune su taumata n runia indi, na'oma n sara Itou nanantillu Anang-Nge tinggassa, tadea'u suapa n taumata apan mangngimanna Sitou tawe mate, ewe'e maasomba wiakka tutune wuŕru saran maŕannu-lannu. ¹⁷Ana waugu Mawu Ruata nandolokku Anang-Nge waŕine maŕruunggu runia indi, arawe maŕamatta runia indi.

¹⁸Taumata apan mangngimanna Sitou tawe iruumanna. Arawe taumata apan tawe mangngimanna suete niruumannu Mawu Ruata, ana waugu itou tawe mangngimanna Ana'u Mawu Ruata apan tinggassa udde. ¹⁹Itou niapaasala ana waugu inolaanna indi: Asasemakka udde nirumantate su runia, arawe taumata lembo maapulu n ararandumma wuassu asasemakka, ana waugu pallaŕagu mangitou laŕeo. ²⁰Suapa n taumata apan ma'ola'a alaŕeo, maddiri n asasemakka; tadea'u pallaŕagune apan laŕeo tawe asiloanna. ²¹Arawe taumata apan tuttuŕrutta apulu Mawu Ruata, nirumanta ringannu asasemakka tadea'u lumiatta'a manungku alaŕo'u inolaanne udde tumuŕrutta apulu Mawu Ruata.

Mawu Yesus wuŕru Yohanes Mananaŕrani

²²Wua udde Mawu Yesus wuŕru mallaŕarŕenggen-Ne inaita watukku Yudea. Itou natana'a poiारoddi manga pira allo aŕannune ringanni mangitou wuŕru mannaŕrani. ²³⁻²⁴Su tempo udde Yohanes Mananaŕrani taambe sinumutta su tutupanna. Itou mannaŕrani su Ainon, tawe marau wuassu Salim, ana waugu poiारoddi manambo ua'e. Manga taumata nirumanta ringanni tou, ne itou nanaŕranite simangitou.

²⁵Manga sire pira mallaŕarŕenggenni Yohanes mannatakke uata-tiakka ringannu taumata n Yahudi su ola'u atorannu pamamaresi. ²⁶Imangitou inaita ringanni Yohanes, wuŕru nabbisara, "Iamangnga Huru, Iamangnga ta'e maanaungnga taumata apan su sambau ringannu Iamangnga su samba'a n Saŕukku Yordan udde, apan tina'e n Iamangnga dorone? Itou orassa indi lai mannaŕrani wuŕru manambo taumata rudanta ringanni tou!"

²⁷Yohanes sinumimbakka, "Taumata tawe maatahuanna alaŕo'a amungkanggu tawe ionggolu Mawu Ruata sitou. ²⁸Iamiu sassane suete naaringikka sia'u nabbisara, 'Ia'u waŕine Ratu m Punnu Saŕamatta. Ia'u nirolokka malliu ŕoro Sitou.' ²⁹Maa'awingnga wawine tatahuanannu

maa'awingnga esakka. Hawe maa'awingnga esakka udde tumba'u uari-sikka su sandiranne wuɽɽu uararingikka, wuɽɽu itou lulluassa napawe naaringikke tingikku maa'awingnga esakka. Aroddi lai ia'u. Orassa indi ia'u lembo n lulluassa. ³⁰Ete Itou apan ɽinone magewaɽanna, wuɽɽu ia'u maadio'anne."

Itou apan nirumanta wuassu surga

³¹Apan nirumanta wuassu atanggaranne nangillembu wuassu sarangkanambone. Apan nirumanta wuassu runia nareengnga taumata n runia, wuɽɽu uahahatto m pallalagu runia. Itou apan nirumanta wuassu atanggaranne nangilembu wuassu sarangkanambone. ³²Itou mabbisara su ola'u apa apan suete niasiloanna wuɽɽu niaringiranne, arawe tawe saran sangkatou apan mangngimanna tatiala-Ne. ³³Taumata apan mangngimanna tatiala-Ne udde, mangnga'u manungku Mawu Ruata udde atonna. ³⁴Ana waugu taumata apan nirolokku Mawu Ruata mabatti'u wisara Mawu Ruata, ana waugu Gharraho Mawu Ruata suete nionggolla Sitou sarangkanambone. ³⁵Iamangnga mandangngu Anang-Nge, wuɽɽu suete nanantillu tarɽino Sitou. ³⁶Taumata apan mangngimanna Ana'a udde saru maasomba pabbawiakka tutune wuɽɽu saran maɽannu-ɽannu. Arawe taumata apan tawe madingikika Ana'a udde tawe maasomba wiakke. Itou irruumannu Mawu Ruata sarangkaɽo'engnge.

Mawu Yesus wuɽɽu wawine n Samaria

4 Manga taumata Farisi naaringikka manungku Mawu Yesus naa-somba wuɽɽu mannaranni mannamboanne wuassu mallalarrenggenni Yohanes. (2Mawu Yesus sassane tawe mannaranni ewe'e tumba'u malalarrenggen-Ne.) ³Napawe Mawu Yesus naasingkatta manungku manga taumata n Farisi naaringikke olangnge udde, Itou inaitu wuassu Yudea mabelengnga watukku Galilea. ⁴Sulalummu amatan-Ne udde Itou ɽinone sumabbi Samaria. ⁵Ne na'omate Mawu Yesus su sambau soa su Samaria aranne Sikhar, tawe marau wuassu leta'a apan paarorone nionggolli Yakub su anangnge Yusuf. ⁶Isudde pia parɽihi n Yakub. Mawu Yesus naɽoɽote u'amatta, ana waugu udde Itou inuma'ianna su winggi m parɽihi. Tempo udde irarrangngo puulla mapuɽo dua allattune, ⁷⁻⁸wuɽɽu mallalarrenggennu Mawu Yesus inaitu aroddi su soa mamalli anna.

Wua udde sangkatou wawine n Samaria nirumanta mania ua'e, Mawu Yesus nabbisara sitou, "Inangnga, wotongnge Ia'u madorongnga ma'inumma?"

⁹Wawine n Samaria udde sinumimbakka, "Mawu taumata n Yahudi, ia'u taumata n Samaria; anio Mawu madorongnga ma'inumma ua'e wuassia'u?" (Ana waugu taumata n Yahudi tawe padaramene su taumata n Samaria.)

¹⁰Mawu Yesus sinumimbakka, "Unnu wisara i'o masingkattu aong-golu Mawu Ruata wuɽɽu isai madorongnga ma'inumma ringannu, i'o sassane lai sarun madorongnga sitou ma'inumma, wuɽɽu itou sarun mangonggola si'o ua'e apan wiakka."

¹¹Wawine udde nabbisara, "Mawu tawe sasia, wuɽɽu paɽɽihi indi tu-manite maɽaɽumma. Wuassuapa Mawu maasomba ua'e apan wiakka udde? ¹²Yakub, iamangngi ami aɽamona, nanantillu paɽɽihi indi siami. Itou sassane mangngaɽappa ua'e wua isindi; aroddi lai manga aɽaɽanangnge see manga winatangnge. Apa Mawu massunna manungku Mawu magewaɽanna wuassi Yakub?"

¹³"Taumata apan ma'inumma ua'e indi sarun marou apia," wisara Mawu Yesus, ¹⁴"arawe taumata apan ma'inumma ua'e apan Ta'u ionggolla, itou tawe marou saran maɽannu-ɽannu. Ana waugu ua'e apan sarun Ta'u ionggolla udde maola'a aɽimata ng kua'e sulaɽummu wadangnge apan sumabangnga su liudde wuɽɽu mangonggolla sitou wiakka tutune wuɽɽu sara maɽannu-ɽannu."

¹⁵Wisara n wawine udde, "Mawu, ia'u onggole ng kua'e udde, tadea'u ia'u tate lai marou; wuɽɽu tate mabelengnga isindi mania ua'e."

¹⁶"Roote, waggoi awingngu, see pabelengnga apia isindi," unnu Mawu Yesus.

¹⁷"Ia'u tawe awingku," sasimbakku wawine udde.

"Atonna wisaranu," unnu Mawu Yesus. ¹⁸"Ana waugu i'o suete naawingnga paalima, wuɽɽu esakka apan mabbiaɽka su sampunna ringannu orassa indi waɽine awingngu."

¹⁹"Orassa indi ia'u naasingkatte Mawu sangkatou nabi," unnu wa-wine udde. ²⁰"Iupungngu aɽamona ng kami massubba Mawu Ruata su wuidda indi, arawe walagu Mawu mabbisara manungku tumba'u su Ye-rusalem tampane taumata massubba Mawu Ruata."

²¹"Pangimante," unnu Mawu Yesus sitou, "su sambau tempo tau-mata sarun massubba Iamangnga, waɽine lai su wuidda indi, wuɽɽu waɽine lai su Yerusalem. ²²Iamiu taumata n Samaria massubba apa apan awagananni amiu, arawe iami taumata n Yahudi massubba Sitou apan asingkatanni ami, waugu asasaɽamatta darantane wuassu taumata n Yahudi. ²³Arawe tempone sarun rumanta, nirumantate, manungku ringannu taɽɽino Ghaɽraho Mawu Ruata manga taumata saru massubba

Iamangnga maola'a Mawu Ruatane apan atonna ere lai ipaapulu n Iamangnga. ²⁴Ana waugu Mawu Ruata udde Gharraho, wurru tumba'u ringannu tarfino n Gharraho Mawu Ruata manga taumata wotongnge massubba Iamangnga ere lai su olangnge udde."

²⁵Wawine udde nabbisara Mawu Yesus, "Ia'u masingkatta Ratu m Punnu Salamatta (apan isassago Kristus) sarun rumanta. Amungkingngu Itou rumanta, Itou sarun mamasingkattu alawo'u watti'a siite."

²⁶"Ete Ia'u Itou," unnu Mawu Yesus, "Ia'u apan orassa indi tantanna uahahatonu."

²⁷Su tempo udde manga mallajarrenggennu Mawu Yesus nabe-lengke. Imangitou tinumiangnga naasilo Mawu Yesus uahahatto n sangkatou wawine. Arawe tawe saran sangkatou wuassu wallati mangitou apan naiwalo wawine udde, "Inangnga mappandumma apa?" ara'e maiwalo Mawu Yesus, "Anio Iamangnga uahahatto m wawine udde?"

²⁸Ne wawine udde nanantangngu wensada isudde see tinumalangnga watukku soa wurru nabbatti'a su manga taumata poiarddi, ²⁹"Wette pa'ellega taumata apan suete namasingkatta sia'u alawo'u arariaddianna apan suete niola'u. Asinungka Itou Ratu m Punnu Salamatta?" ³⁰Ne manga taumata udde nanantangke n soa see inaite ringannu Mawu Yesus.

³¹Tantanna udde manga mallajarrenggen-Ne nangahe Mawu Yesus umanna. "Iamangnga Huru," unni mangitou, "salamatte umanna."

³²Arawe Mawu Yesus sinumimbakka, "Ia'u pia anna, apan awagananni amiu."

³³Ne manga mallajarrenggen-Ne mannattake uaiwalo, "Apa pia taumata uaapiddu anni Tou?"

³⁴See Mawu Yesus nabbisara, "Angku eteudde tutturutta apulu n Tou apan nadolo-U, wurru mangnginsue manara apan tinantilli Tou Sia'u. ³⁵Iamiu mabbisara, 'Ete appatu wulanna tempo mangitingnga.' Arawe Ia'u mabbisara siamiu: Pa'ellege wawaijannu amme maririkke, wotonggete itinganna! ³⁶Taumata apan mangitingnga manattakke manengkamma lalantakke wurru mangammulu wuane ipadea'a wiakka tutune wurru saran malannu-lannu. Ne taumata apan nangasi'a wurru taumata apan mangngitingnga wotongnge lumuassa su sambau. ³⁷Sasanato'a indi tawe salane, 'Waine mangngasi'a, waine mangngitingnga.' ³⁸Ia'u nandolokki amiu inai mangitingnga su wailla apan tawe nirusahaddi amiu; taumata waine suete nammanara poiarddi, wurru iamiu nanengkamma auntunganne wuassu manara mangitou."

³⁹Manambo taumata n Samaria tumana'u soa udde nangimanna Mawu Yesus, ana waugu wawine udde nabbisara, "Itou nabbatti'a sia'u alawo'u inolaanna apan suete ta'u inola'a." ⁴⁰Ne napawe manga taumata n Samaria udde nassombate Mawu Yesus, imangitou madorongnga

ringannu sussaḷande tadea'u Itou matana'a ringanni mangitou. Nariaddi Mawu Yesus natana'a isudde rua allo aḷannune.

⁴¹Wua udde niatambanna lai anambone taumata mangngimanna Mawu Yesus ana waugu apa apan niaṙrang-Nge sassane simangitou. ⁴²Imangitou nabbisara wawine udde, "Orassa indi iami mangngimanna, waḷinewe ana waugu wisaranu siami, arawe ana waugu iami sassane suete naaringikka Sitou, wuṙṙu masingkatta manungku Itou atonna Punnu Saḷamattu Runia."

Mawu Yesus napaapia n ana'u mamana n waḷe n araratuanna

⁴³Napawe ruate allo naḷiu uatana'a su Sikhar, Mawu Yesus inaita watukku Galilea. ⁴⁴Mawu Yesus sassane suete nabbisara, "Sangkatou nabi tawe addatanna su wanuane sassane." ⁴⁵Arawe su tempo Itou na'omate su Galilea, manga taumata su Galilea mannoḷoho Sitou ringannu naungnga maḷuassa, ana waugu imangitou su Yerusalem su tempo Allo Wahewa m Paskah, suete naasilo sarangkanambone apan niola'u Mawu Yesus.

⁴⁶Wua udde Mawu Yesus nabelengke watukku Kana su Galilea, isudde Itou suete namaḷu ua'e nabaḷi angore. Su soa udde pia sangkatou mammamanara n tembonanne, anangnge marada'a su Kapernaum. ⁴⁷Napawe itou naaringikka manungku Mawu Yesus nirumantate su Galilea wuassu Yudea, itou inaita ringannu Mawu Yesus wuṙṙu madorongnga Mawu Yesus rumanta su Kapernaum mapaapia n anangnge apan maranite mate. ⁴⁸Mawu Yesus nabbisara su mammamanara n tembonanne udde, "Amungkangngu iamiu tawe maasilo manga aḷaṙṙindu'a, iamiu tawe mangngimanna."

⁴⁹"Mawu," sasimbakku mammamanara n tembonanne udde, "paaḷihakke rumanta tantaḷanna ana'u taambe nate."

⁵⁰Mawu Yesus nabbisara sitou, "Roote anangngu napiate."

Taumata udde nangimanna wisara Mawu Yesus, see itou napuḷete.

⁵¹Su tangnga n daḷanna manga mangangimbene nirumanta ringanni tou wuṙṙu nabatti'a, "Ana'i Tuangnga napiate."

⁵²See itou naiwaḷo simangitou orassa ereapa ana'a udde mannattake mapia. Imangitou sinumimbakka, "Aṙṙabi iraṙrangngo puulla sambau allattune saḷihangnge nawuḷi." ⁵³See iamangngu ana'a udde naanaungnga manungku su orassa udde Mawu Yesus nabbisara sitou, "Anangngu napiate." Ne itou wuṙṙu anambo n laḷoṙṙo n waḷene nangimante Mawu Yesus.



Sambau laʔanna su soa n Yerusalem (5:1)

⁵⁴Eteudde aʔaʔrindu'a aruane apan niola'u Mawu Yesus su Galilea napawe Itou nirumanta wuassu Yudea.

Pangangapia su li'u m Betesda

5 Wua udde pia ramea n Yahudi, ne Mawu Yesus inaite watukku Yerusalem. ²Su Yerusalem marani "Ngara n Domba" pia sambau li'u, apan su wisara n Ibrani isassago Betesda. Isudde pia lima panumbale. ³Su manga panumbale udde manambo taumata marada'a uaʔallowangnga, piaddu wuta, piaddu u'ento, wuʔru pia lai lome. [Imangitou sarangkanambone uaraʔraddo ua'e n li'u udde umio'a. ⁴Ana wangu wiasane mala'ekattu Mawu sussossokka su li'u udde wuʔru mangngio'u ua'ene. Wuʔru taumata marada'a apan paarorone uinurumma sulaʔummu li'u udde su tempo ua'e rudaʔua'a, sarun mapia wua-ssu radangge.] ⁵Su tampa udde pia sangkatou esakka apan marada'a tallute m puʔo uaʔu su tonnane aʔannune. ⁶Mawu Yesus naasilo sitou

uaʔallowangnga poiaroddi, wuʔru masingkatta manungku itou maʔannute marada'a; ne Mawu Yesus naiwaʔo sitou, "I'o maapulu iapaapia?"

⁷Taumata marada'a udde sinumimbakka, "Iamangnga, tawe taumata isindi mapasutta'u sulaʔummu li'u napawe ua'ene rudaʔua'e. Wuʔru tantaʔanna ia'u mattuda n li'u, taumata waine niumurumpe rorone."

⁸Ne Mawu Yesus nabbisarate sitou, "Pabbangunte, lappute wilannu wuʔru apuʔete." ⁹Su tempo udde lai taumata udde napia. Itou nallapute wilanne wuʔru inumamatte.

Olangnge udde nariaddi su allo n Sabatta. ¹⁰Ana waugu udde manga tembonannu Yahudi nabbisara taumata apan wakkute napia udde, "Allo indi allo n Sabatta. I'o tawe wotongnge mallapu wilannu."

¹¹Arawe taumata udde sinumimbakka, "Taumata apan napaapia'u tanginna nandolokka nallapu wilatta wuʔru ia'u niapaamatta."

¹²"Isai itou apan nandolokku mallapu wilannu wuʔru niapaamatta?" aiwaʔo mangitou.

¹³Arawe taumata apan napiate udde wagga isai taumatane, ana waugu Mawu Yesus nattingkawuʔite su wallattu taumata nambo isudde.

¹⁴Wua udde Mawu Yesus nassomba n taumata udde sulaʔummu Waʔe Mawu, wuʔru nabbisara sitou, "Orassa indi i'o napiate. Arié pa'ola'a rosa apia, tadea'u tawe mamendamma rada'a lembo n araʔeoanne."

¹⁵Ne taumata udde napuʔete see namasingkatta su tembonannu Yahudi manungku ete Mawu Yesus napaapia n tou. ¹⁶Wuʔru ana waugu udde imangitou mannattakke mapaasusa Mawu Yesus ana waugu Itou mapaapia n taumata su allo n Sabatta.

¹⁷Arawe Mawu Yesus nabbisara simangitou, "Iamang-Ku sidutu mammanara sara orassa indi, wuʔru Ia'u lai mammanara."

¹⁸Manga wisara udde naaola'a manga tembonannu Yahudi mangke maddea'a mamate Sitou. Imangitou na'ola'a aroddi, waʔine tumba'u ana waugu Itou nilumawanna Tita n agama su ola'u allo n Sabatta, arawe ana waugu Itou lai nabbisara manungku Mawu Ruata udde Iamang-Nge; atappasanne Itou mannuʔungngu watangan-Nge ringannu Mawu Ruata.

Taʔrino n Ana'a

¹⁹Mawu Yesus sinumimbakka su manga taumata udde arendi, "Pangimante, Ana'a tawe mapa'ola'a aʔawo'u inolaanna ringannu taʔrino-Ne sassane. Itou tumba'u maaola'a apa apan niasiloanni Tou niola'u Iamang-Nge. Ana waugu apa apan niola'u Iamangnga, udde lai a'olaannu Ana'a. ²⁰Ana waugu Iamangnga mandangngu Ana'a wuʔru manantiro Sitou aʔawo'u inolaan-Ne sassane. Ewe'e lai Iamangnga sa-

run manantiro Sitou manga inolaanna apan magewaḷanna lai ma'oma n sara iamiu tumiangnga. ²¹Iamangnga udde mapaawangunnu taumata nate, wuṛṛu mangngonggolu wiakka tutune wuṛṛu maḷannu-ḷannu; aroddi lai Ana'a mangngonggolu wiakka tawe panginsueanne su taumata apan maapulu onggoḷannu wiakka. ²²Iamangnga sassane tawe makkuungngi sai-sai. Anambo n taṛṛino ipakkuungnga suete tinantilla su Anang-Nge. ²³Iamangnga na'ola'a udde tadea'u anambo n taumata mangngaddatta Ana'a ere lai imangitou mangngaddatta Iamangnga. Taumata apan maddiri mangngaddatta Ana'a maddiri lai mangngaddatta Iamangnga apan nandolokku Ana'a.

²⁴Mangke atonna manga wisara-U indi: Taumata apan mading-ikka manga wisara-U wuṛṛu mangngimanna Sitou apan nandolo-U, maatahuanna wiakka tutune wuṛṛu saran maḷannu-ḷannu. Itou tawe iṛṛuumanna; itou naḷiute wuassu papate wuṛṛu naaba'e wiakka. ²⁵Pangimante: Sarun rumanta tempone - ewe'e nia'omante lai tempone - taumata nate sarun maddingikka tingikku Ana'u Mawu Ruata. Wuṛṛu taumata apan maddingikka sarun masalamatta. ²⁶Ere lai Iamangnga sassane punnu wiakka, Itou na'ola'a Anang-Nge lai punnu wiakka. ²⁷Itou suete nangonggolla su Anang-Nge taṛṛino ipakuungnga, ana waugu Itou Ana'u Taumata. ²⁸Arie iamiu tumiangnga maaringikka manga olangnge indi, ana waugu tempone sarun a'omanna manungku taumata nambo apan natete maaringikka tingikke, ²⁹see sumabangnga wuassu laḷabinganna. Taumata apan suete na'ola'a apapia sarun mabangunna mabbiakka. Arawe taumata apan suete na'ola'a aḷaḷeo sarun mabangunna wuṛṛu iṛṛuumanna."

Manga tatiala su ola'u Mawu Yesus

³⁰"Ia'u tawe mapa'ola'a manga apa wuassu apulu-U sassane. Ia'u tumba'u makkuungnga wuassu parenta Mawu Ruata. Wuṛṛu Ia'u maṛṛawessa tawe saḷane, ana waugu Ia'u tawe tumuṛṛutta apulu-U sassane, arawe apulu n Iamangnga apan nandolo-U.

³¹Unnu wisara Ia'u mangngagillu tatiala su ola'u riri-U sassane, tatiala udde tawe apangimananna. ³²Arawe pia taumata waine apan mangngagillu tatiala su ola'u riri-U, wuṛṛu Ia'u masingkatta manungku tatialane udde atonna. ³³Iamiu suete nandolokku daroloṛṛanna ringanni Yohanes, wuṛṛu itou suete nangagillu tatialane su ola'u riri-U. ³⁴Olangnge indi Ta'u iwisara, waḷine ana waugu Ia'u mapandumma tatiala wuassu taumata, arawe tadea'u iamiu maasomba asalamatta. ³⁵Yohanes udde naaḷihida soḷo apan luṛṛenggamma wuṛṛu mannemakka. Tumba'u sangkatempo iamiu maḷuassa mannengkamma semakka udde.

³⁶Arawe tatiala-U magewalanna wuassu tatiala n Yohanes. Apa apan niola-U orassa indi, eteudde manara apan nianggillu Iamangnga Sia'u, mattiala manungku Iamangnga suete nandolo-U. ³⁷Wurru Iamangnga apan nandolo-U lai nangagillu tatiala su ola'u riri-U. Iamiu taambe naaringikka tingikke ara'e naasilo pahudde. ³⁸Manga wisara-Ne tawe maa-ddo sulalummu naungngu ana waugu iamiu tawe mangngimanna Sia'u apan nirolokki Tou. ³⁹Iamiu mangngurumma Wuke Susi ana waugu mangngantimma manungku ringannu olangnge udde iamiu maatahuanna wiakka tutune wurru saran malannu-lannu. Wurru Wuke Susi udde sassane mattiala su ola'u riri-U. ⁴⁰Arawe iamiu maddiri rumanta ringang-Ku tadea'u maasomba wiakka apan tawe panguddusanne.

⁴¹Ia'u tawe maddea'a daralo wuassu taumata. ⁴²Ia'u masingkatti amiu, Ia'u masingkatti amiu maddiri mandangngu Mawu Ruata sulalummu naungngu. ⁴³Ia'u nirumanta ringannu tarfino n Iamang-Ku, arawe iamiu maddiri manarimma-U. Arawe amungkanngu taumata waine rumanta ringannu tarfinone sassane, iamiu mapulu manarimmatti tou. ⁴⁴Ereapa iamiu wotongnge apangimananna, amungkanngu iamiu maddea'a daralo wuassu sansulungngu taumata, wurru tawe mappandumma maddea'a daralo wuassu Mawu Ruata apan Tinggassa? ⁴⁵Arie massunna Ia'u mapaasala ng kami su saruannu Iamangnga. Arawe mapaasala ng kami eteudde Musa, ete itou apan aantimanni amiu. ⁴⁶Unnu wisara iamiu mangngimanna si Musa, iamiu sarun mangngimanna lai Sia'u, ana waugu ete su ola'u riri-U, itou namorretta. ⁴⁷Arawe amungkanngu iamiu tawe mangngimanna apa apan suete niworretti Musa, ereapa iamiu wotongnge mangngimanna apa apan iwaba-lo-U siamiu?"

Mawu Yesus napaannu lima riwu su atoune

(Mat. 14:13-21; Mrk. 6:30-44; Luk. 9:10-17)

6 Manga pira allo wua udde, Mawu Yesus inaita su samba'a Rano n Galilea, apan isassago lai Rano n Tiberias. ²Napawe na'omate poiaronddi, manambote taumata uatantalongnga Sitou ana waugu imangitou suete naasilo manga alarindu'a apan niolang-Nge ringannu napaapia n taumata marada'a. ³Mawu Yesus sinuma'a su wowo m wuidda, wua udde inuma'ianna isudde ringannu mallalarrenggen-Ne. ⁴Tempo udde maranite Allo Wahewa m Paskah Yahudi. ⁵Napawe Mawu Yesus na'ellega su uapaliwutta, Itou naasilo taumata mangngelekka rudanta ringanni Tou. Ne Itou nabbisara si Filipus, "Suapa iite wotongnge mamalli anna, tadea'u taumata nambo indi wotongnge umanna?" (⁶Mawu



Rano n Galilea (6:1)

Yesus masingkatte apa apan sarun olaan-Ne, arawe Itou nabbisara aroddi ana waugu Itou maapulu maannamma si Filipus.)

⁷Filipus sinumimbakka, "Roti aregane rua rasutta roitta sala'a, tawe maattiudda su manga taumata indi, salaiwe sangkatou tumba'u maabba'a adio'a."

⁸Sangkatou mallajarřenggennu Mawu Yesus apan waine eteudde Andreas, turřrangngi Simon Petrus nabbisara, ⁹"Isindi pia sangkatou ana'a esakka uaapiddu roti lima m bau wuřru inassa rua m bua. Arawe apa hunane su taumata anambone indi?"

¹⁰"Dolorřa'e manga taumata udde uma'ianna," wisara Mawu Yesus. Su tampa udde manambo nannařo, nariaddi manga taumata udde inuma'iante su nannařo – sarangkanambone itatakasere esakka lima řiwu su atoune. ¹¹Wua udde Mawu Yesus nanganu roti udde, see maadiangkamanna su Mawu Ruata. Nasue udde Itou natahiate roti udde su taumata nambo. Wua udde Itou nattahia inassa, wuřru imangitou inumanna mangke nawusa-wusa. ¹²Napawe sarangkanambone suete inumanna na'oma n sara nařaidda, Mawu Yesus nabbisara su manga mallajarřenggen-Ne, "Ammuřa'e lambe ng kanna udde; arie ma'oma n sara piaddu maramme." ¹³See imangitou nangammullu mapuřo dua su uřangnge napene lambe ng kanna wuassu lima m bau roti apan nianna n taumata nambo udde.

¹⁴Napawe taumata nambo udde naasilo alarřindu'a apan niola'u Mawu Yesus, imangitou nabbisara, "Atonna, ete indi Nabi apan aantimanna rumanta su runia!" ¹⁵Mawu Yesus masingkatte imangitou

nirumanta tuddane mamata'i Tou maola'a ratu mangitou. Ana waugu udde Itou inaita nassaliu watukku wageangnge pia wuidda.

Mawu Yesus niuamatta su wowo n ua'e

(Mat. 14:22-33; Mrk. 6:45-52)

¹⁶Napawe allo marabbite, manga mallalarrenggennu Mawu Yesus sinumossokke watukku rano. ¹⁷See imangitou sinuma'ete saalanna malliu rano udde mabatukku Kapernaum. Allo marandumpe arawe Mawu Yesus taambe lai nirumanta ringanni mangitou. ¹⁸Tantalanna udde rano mannattakke mattandi'a ana waugu anginna ma'ikkatte. ¹⁹Napawe nasenggotte itatakasere lima ara'e anummu kilo meterre araune, imangitou naasilo Mawu Yesus mattuda n saalanna u'amatta su wowo n ua'e. Imangitou mangke nata'utta. ²⁰Arawe Mawu Yesus nabbisara simangitou, "Arie paata'utta, Ia'u indi!" ²¹See ringannu naungnga lulluassa imangitou nanaŋoho Sitou watukku saalanna, wuŋŋu orassa udde lai saalanni mangitou na'omate su tampa tattudanna.

Manga taumata maddea'a Mawu Yesus

²²Su allo tirabbine taumata nambo apan ta'e uatana'a su samba'a n rano, natutukka manungku tanginna tumba'u pia sangngassa saalanna poiaronddi. Imangitou masingkatta manungku manga mallalarrenggennu Mawu Yesus nasenggotte ringannu saalanna udde, arawe Mawu Yesus tawe narundinganna. ²³Wua udde manga pira ngassa saalanna wuassu Tiberias nirumanta wuŋŋu nabbalango marani n tampa n taumata nambo udde u'anna roti napawe Mawu Yesus suete naadiangkamanna. ²⁴Napawe taumata nambo udde naasilo manungku mawae Mawu Yesus ara'e mallalarrenggen-Ne tawe isudde, imangitou sinuma'ete manga salaanna udde wuŋŋu inaita watukku Kapernaum maddea'a Mawu Yesus.

Mawu Yesus, roti apan mangngonggolu wiakka

²⁵Napawe manga taumata udde nassombate Mawu Yesus su samba'a n rano, imangitou naiwalo Sitou, "Iamangnga Huru, ro'e n angngera Iamangnga na'oma isindi?"

²⁶Mawu Yesus sinumimbakka, "Atonna iamiu maddea'a Sia'u walineuwe ana waugu iamiu naasunnate pandumannu manga alarindu'a apan Ta'u niola'a, arawe ana waugu iamiu suete inumanna na'oma n sara nalaidda. ²⁷Arie pammanara ipaddea'a anna apan wotongnge masue wuŋŋu mawukku'a. Pammanarate tadea'u maasomba anna apan

tawe mawukku'a wuṛṛu apan mangngonggolu wiakka tutune wuṛṛu saran maḷannu-ḷannu. Anna udde sarun ionggolu Ana'u Taumata siamiu, ana waugu Itou suete nitenegu Mawu Ruata lamangnga."

²⁸See imangitou naiwaḷo Sitou, "Iami ṛinone ma'ola'a apa tadea'u maaturṛutta apulu Mawu Ruata?"

²⁹Mawu Yesus sinumimbakka, "Ete indi apan ipaapulu Mawu Ruata wuassi amiu: pangimante Sitou apan nirolokku Mawu Ruata."

³⁰"Amungkangngu aroddi," unni mangitou, "tatiala apa apan ionggolli lamangnga tadea'u iami maasilo wuṛṛu mangngimanna lamangnga? Apa apan sarun olaannu lamangnga? ³¹Iupungngu aḷamona ng kami u'anna manna su wadda'a, ere lai uawoṛretta sulalummu Wuke Susi, 'Itou napaanni mangitou roti wuassu surga."

³²See Mawu Yesus nabbisara simangitou, "Pangimante: Waḷine Musa ewe'e ete lamang-Ku apan nangonggolu roti surṛinone wuassu surga. ³³Ana waugu roti apan nionggolu Mawu Ruata eteudde Itou apan nirumanta wuassu surga wuṛṛu nangonggolu wiakku taumata su runia."

³⁴"lamangnga," unni mangitou, "onggoḷa'awe lai siami roti udde uatialu."

³⁵"Ete Ia'u roti apan mangonggolu wiakka," unni Mawu Yesus simangitou. "Taumata apan rumanta ringang-Ku tawe amaḷunusanna sarangkaḷo'engnge. Wuṛṛu taumata apan mangngimanna Sia'u tawe marou lai sarangkaḷo'engnge."

³⁶"Arawe ere suete Ta'u niapaasingkatta siamiu, salaiwe iamiu suete naasilo Sia'u, iamiu tawe mangngimanna. ³⁷Anambo n taumata apan nionggolu lamangnga Sia'u sarun rumanta ringang-Ku. Ia'u tawe mapawelengngi sai-sai apan rumanta ringang-Ku. ³⁸Ana waugu Ia'u nirumanta wuassu surga, waḷine ma'ola'a apulu-U sassane, ewe'e apulu n Tou apan nandolo-U. ³⁹Wuṛṛu ete indi apulu-Ne apan nandolo-U: tadea'u wuassu anambo n taumata apan tinantilla Sia'u, tawe saran sangkatou apan mawuḷi; tadea'u Ia'u mapaawangunni mangitou su Allo ng Kiamatta. ⁴⁰Atonna, eteudde apulu n lamang-Ku: Tadea'u anambo n taumata maasilo Ana'a wuṛṛu mangngimanna Sitou maasomba wiakka tutune wuṛṛu saran maḷannu-ḷannu, wuṛṛu iapaawiakka apia su Allo ng Kiamatta."

⁴¹Manga taumata n Yahudi manattakke sussawutulla su saruannu Mawu Yesus, ana waugu Itou nabbisara: "Ia'u roti apan niumontu'a wuassu surga." ⁴²Imangitou nabbisara, "Waḷinewe indi Yesus ana'i Yusuf? Iami masingkattu inangnga iamangnge! Ereapa Itou wotongnge mabbisara Itou niumontu'a wuassu surga?"

⁴³See Mawu Yesus nabbisara simangitou, "Arie passawutulla. ⁴⁴Tawe saran sangkatou maaranta ringang-Ku, amungkangngu lamangnga apan nandolo-U tawe mangapiddi tou ringang-Ku; wuṛṛu isai

apan rumanta, sarun Ta'u iapaasengkengnga su Allo ng Kiamatta. ⁴⁵Sulaŕummu Wuke Manga Nabi uaworŕetta arendi, 'Anambo n tau-mata sarun tantiroannu Mawu Ruata.' Nariaddi anambo n taumata apan madingikka lamangnga wuŕru mangngurumma wuassi Tou, rumanta ringang-Ku. ⁴⁶Udde tawe atapasanne manungku plate taumata apan suete naasilo lamangnga. Tumba'u Itou apan nirumanta wuassu Mawu Ruata, suete naasilo lamangnga.

⁴⁷Paanaunge: Taumata apan mangngimanna, maatahuanna wiakka tutune wuŕru saran maŕannu-ŕannu. ⁴⁸Ete Ia'u roti apan mangong-golu wiakka. ⁴⁹Iupunggu aŕamonanu u'anna manna su wadda'a wuŕru imangitou nate lai. ⁵⁰Arawe tawe aroddi roti apan niumontu'a wuassu surga; taumata apan inumanna roti udde tawe mate. ⁵¹Ete Ia'u roti apan niumontu'a wuassu surga - roti apan mangonggolu wiakka. Taumata apan umanna roti indi sarun mabbiakka sarangkaŕo'engnge. Roti apan Ta'u ionggolla ipabiakku taumata su runia eteudde ŕeme-U."

⁵²Naaringikka udde, manga taumata n Yahudi uatatiakke sangkatou ringannu waine. "Ereapa taumata indi wotongnge mangonggolu ŕemessi Tou siite iapaanna?" unni mangitou.

⁵³See Mawu Yesus nabbisara simangitou, "Pangimante: Amungkang-ngu iamiu tawe umanna ŕemessu Ana'u Taumata wuŕru ma'inumma raŕra-Ne, iamiu atonna-tonna tawe mabbiakka. ⁵⁴Taumata apan umanna ŕeme-U wuŕru ma'inumma raŕra-U maatahuanna wiakka tutune wuŕru saran maŕannu-ŕannu wuŕru Ia'u sarun mapaawiakki tou apia su Allo ng Kiamatta. ⁵⁵Ana waugu ŕeme-U atonna-tonna udde anna, wuŕru raŕra-U atonna-tonna udde inumanna. ⁵⁶Taumata apan umanna ŕeme-U wuŕru ma'inumma raŕra-U sidutu su sambau ringang-Ku wuŕru Ia'u ringanni tou. ⁵⁷Iamangnga apan wiakka udde, nandolo-U wuŕru Ia'u lai mabbiakka sulaŕummu lamangnga. Aroddi lai taumata apan umanna ŕeme-U sarun mabbiakka wuassia-U. ⁵⁸Ete indi roti apan niumontu'a wuassu surga: waŕine ere roti apan niannu iupunggu aŕamonanu. Ana waugu napawe niumannu roti udde, imangitou nate lai. Arawe taumata apan umanna roti indi sarun mabbiakka sarangkaŕo'engnge."

⁵⁹Sarangkanambone udde niwisara Mawu Yesus su tempo Itou mangngarra'a su waŕe m pattatarŕamawuanna su Kapernaum.

Manga wisara apan mangngonggolu wiakka tutune wuŕru saran maŕannu-ŕannu

⁶⁰Napawe suete naddaringikka manga wisara Mawu Yesus udde, manambo su wallattu mallaraŕrenggen-Ne nabbisara, "Tatantiro indi tumanite masahadda. Isai wotongnge maasunna!"

⁶¹Mawu Yesus sassane masingkatta manungku manga malalaj̄r̄nggen-Ne sussawutulla su ola'u hatto udde. Ne Itou nabbisara, "Apa iamiu naludda ana waugu manga wisara-U indi? ⁶²Ereapa olangnge amungkangngu iamiu maasilo Ana'u Taumata masengkengnga apia su tampane apan paarorone? ⁶³Apan maawiakka taumata eteudde Gharraho Mawu Ruata. Atatohassu taumata tawe gunane. Manga wisara apan niwisara-U siamiu indi eteudde wisara Gharraho Mawu Ruata wuṛṛu manga wisara apan mangngonggolu wiakka. ⁶⁴Arawe pia lai su wallatti amiu apan tawe mangngimanna." (Mawu Yesus massingkatte ro'e n paarorone isai-sai apan tawe mangngimanna wuṛṛu isai-sai sarun mamate Sitou.) ⁶⁵See Mawu Yesus nabbisara apia, "Ana waugu udde Ia'u mamasingkatta siamiu manungku tawe saran sangkatou apan maa-ranta ringang-Ku, amungkangngu lamangnga tawe mamala."

⁶⁶Nanattakka orassa udde manambo mallalaj̄r̄nggen-Ne manantangngi Tou, wuṛṛu maddirite mallalaj̄r̄nggenna Sitou. ⁶⁷See Mawu Yesus naiwaḷo su sire mapuḷo dua mallalaj̄r̄nggen-Ne, "Apa iamiu maapulu lai manantang-Ku?"

⁶⁸"Mawu," wisara n Simon Petrus Sitou, "ringanni sai iami sarun inai? Wisara Mawu mangngonggolu wiakka tutune wuṛṛu saran malannu-lannu. ⁶⁹Iami mangngimante wuṛṛu naatutukke manungku ete Mawu daroloṛṛanna apan naukkassa wuassu Mawu Ruata."

⁷⁰Mawu Yesus sinumimbakka, "Wal̄inewe Ia'u apan namile siamiu mapuḷo dua indi? Arawe sangkatou wuassu wallatti amiu eteudde gharraho laḷeo!" ⁷¹Apan su pandumannu Mawu Yesus eteudde Yudas ana'i Simon Iskariot. Ana waugu salaiwe Yudas sangkatou wuassu sire mapuḷo dua mallalaj̄r̄nggennu Mawu Yesus, ete itou apan namate Mawu Yesus.

Mawu Yesus wuṛṛu manga tuṛrang-Nge

7 Wua udde Mawu Yesus inaita su alawo'u tampa su Galilea. Itou maddiri mabatukku leta'u Yudea ana waugu manga tembonannu Yahudi polaroddi pia pandumma mamate Sitou.

²Su tempo udde maranite Allo Wahewa Rasannu Rongnga. ³Ne manga tuṛrangngu Mawu Yesus nabbisara Sitou, "Tantanga'e tampa indi wuṛṛu roote su Yudea, tadea'u manga mallalaj̄r̄nggen-Nu maasilo lai manara-Nu. ⁴Tawe taumata apan maapamuni apa apan a'olaanne. Amungkangngu itou maapulu asingkatannu awadaalla. Amungkangngu i'o maapulu ma'ola'a inolaanna ere udde, ahewallu runia indi rinone maasingkatta!" (⁵Ana waugu manga tuṛrang-Nge sassane tawe mangngimanna Sitou.)

⁶"Taambe tempone Sia'u," unnu Mawu Yesus simangitou, "arawe siamiu, suapa n tempo udde wotongnge. ⁷Runia indi tawe marantinni amiu. Arawe Ia'u atonna-tonna iaarantinnu runia, ana waugu Ia'u sidutu mabbisara runia manungku inolaanne laleo. ⁸Roote iamiu sassane su ramea udde. Ia'u tawe inai ana waugu tempone taambe nia'omanna Sia'u." ⁹Eteudde wisara Mawu Yesus su manga turang-Nge, wurru Itou lai natana'a su Galilea.

Mawu Yesus su ramea n Rasannu Rongga

¹⁰Napawe manga turang-Nge inaita watukku ramea udde, malanna-lannaba Mawu Yesus nattuda sassane tawe niasingkatannu taumata. ¹¹Su alannu n ramea udde, manga tembonannu Yahudi maddea'a Sitou wurru uaiwalo, "Suapa Itou?"

¹²Manambo taumata mannattake uasasalimburungga su ola'i Tou. Piaddu mabbisara, "Itou taumata mapia." Piaddu lai mabbisara, "Tawe! Itou mangngaliwu n taumata nambo." ¹³Arawe tawe saran sangkatou warrani mabbisara uasasaruanna su ola'i Tou ana waugu imangitou matta'uttu manga tembonannu Yahudi.

¹⁴Matangnga n ramea, Mawu Yesus sinumutta sulalummu Wale Mawu, see nanattakke mangngarra'a. ¹⁵Manga tembonannu Yahudi naherangnga wurru nabbisara, "Ereapa taumata indi asingkanne arodidi anambone, sumbali Itou tawe nassi'ola?"

¹⁶Mawu Yesus sinumimbakka, "Apan Ta'u iaarra'a indi walineuwe alarra-U arawe alarra'i Tou apan nandolo-U. ¹⁷Taumata apan maturrutta apulu Mawu Ruata, sarun maasingkatta tanne alarra-U indi darantane wuassu Mawu Ruata ara'e wuassia-U sassane. ¹⁸Taumata apan mangngonggolu alarrangnge sassane maddea'a awawantugu ririne sassane. Arawe taumata apan maddea'a awawantugi Tou apan nandolokki Tou, taumata udde matulida, itou tawe awusune. ¹⁹Walineuwe Musa suete nangonggolu Tita Mawu Ruata siamiu? Arawe su wal-latti amiu tawedu tinumurrutta Tita udde. Anio iamiu maapulu mamate Sia'u?"

²⁰Awadaalla udde sinumimbakka, "I'o wewa! Isai maapulu mamate Si'o?"

²¹Mawu Yesus sinumimbakka, "Tumba'u sambau manara Ta'u olaanna su allo n Sabatta, wurru naaherangnga siamiu. ²²Musa nangonggolu atoranna siamiu iapasunatta - salaiwe sunatta udde tawe wuassi Musa, arawe wuassu manga iamangngu alamona ro'e n Musa taanna. Ana waugu udde, su allo n Sabatta lai iamiu maapulu mannunatta taumata. ²³Amungkannggu iamiu ma'ola'a udde tadea'u tawe lumawang-

nga atoranni Musa su ola'u sunatta, anio iamiu mannaungnga laleo sia'u ana waugu mapaapia n ahewallu wadangngu taumata su allo n Sabatta? ²⁴Arie mamarikissa taumata ana waugu pinangiananne apan aasiloanna, arawe ana waugu atatulidda."

Atonnawe Mawu Yesus Ratu m Punnu Sałamatta?

²⁵Wua udde pia manga pira taumata n Yerusalem mabbisara, "Waḵnewe indi taumatane apan tantaḵanna raddeanna pateanna? ²⁶Pa'ellege Itou mabbisara tawe singgawangnge su saruannu awa-daalla, wuḵḵu tawe saran sangkatou apan mabbisara n apa-apa Sitou! Asinungka manga tembonanni ite naatutukke manungku Itou indi Ratu m Punnu Sałamatta? ²⁷Arawe amungkangngu Ratu m Punnu Sałamatta udde rumanta, tawe saran sangkatou maasingkatta wuassuapa atatanaan-Ne! Sumbali iite masingkatta wuassuapa darantane taumata indi."

²⁸Wua udde, tantaḵanna Mawu Yesus mangngarra'a su Waḵe Mawu, Itou nangintuli ringannu tingikka ma'ikkatta, "Nariaddi iamiu masingkatta isai la'u indi, wuḵḵu wuassuapa la'u nirumanta? la'u tawe nirumanta ana waugu apulu-U sassane. la'u nirolokki Tou apan pia tarrino wotongnge mandolo-U, wuḵḵu Itou wotongnge apangimananna. Arawe iamiu tawe maaillala Sitou. ²⁹la'u maaillala Sitou, ana waugu la'u nirumanta wua dinganni Tou, wuḵḵu ete Itou apan nandolo-U."

³⁰Su tempo udde imangitou maapulu manametta Mawu Yesus, arawe tawedu warrani mangagassa Sitou, ana waugu taambe nia'omanna tempone. ³¹Manambo su wallattu manga taumata udde mannattakke mangngimanna Sitou, wuḵḵu mabbisara, "Amungkangngu Ratu m Punnu Sałamatta udde rumanta, apa Itou wotongnge maaola'a mannamboanna alarrindu'a wuassu taumata indi?"

Ma'ire manametta Mawu Yesus

³²Manga taumata m Farisi naaringikka ereapa taumata nambo udde uasasaḵimburungnga su ola'u Mawu Yesus. Ana waugu udde su sampunna ringannu manga imam tembonanne, imangitou nandolokku manga pira mandariaga Waḵe Mawu inai manametta Mawu Yesus. ³³Mawu Yesus nabbisara su taumata nambo su Waḵe Mawu, "Ete lai tala ng kadio'a la'u su sambau ringanni amiu. Wua udde la'u sarun mabelengnga ringanni Tou apan nandolo-U. ³⁴Iamiu sarun maddea'a Sia'u, arawe tawe maasomba Sia'u; ana waugu iamiu tawe maaranta su tampa atatanaang-Ku."

³⁵See manga tembonannu Yahudi uawawisarate sangkatou ringannu waine, "Taumata indi inai suapa na'oma n sara iite tawe maasomba Sitou? Apa Itou inai ringannu manga taumata n Yahudi apan uatana'a su wanua marau su wallattu taumata n Yunani, wuṛṛu mangngarra'a taumata n Yunani? ³⁶Apa pandumanne ringannu mabbisara manungku iite sarun maddea'a Sitou, arawe tawe maasomba Sitou, wuṛṛu manungku iite tawe maaranta su tampa Itou uatana'a?"

Ua'e apan mangngonggolu wiakka

³⁷Su allo panginsueannu ramea udde, eteudde allo apan apianne, Mawu Yesus dirumarisikka sulaḷummu Waḷe Mawu see nabbisara, "Taumata apan marou ṛinone rumanta ringang-Ku ma'inumma. ³⁸Su ola'u taumata apan mangngimanna Sia'u, uaworṛetta sulaḷummu Wuke Susi, 'Wuassu laḷummu naungnge mangngelekka manga aeleṛṛannu ua'e apan mangngonggolu wiakka.'" (³⁹Mawu Yesus mabbisara su ola'u Gharṛaho Mawu Ruata apan sarun sengkamannu manga taumata apan mangngimanna Sitou. Ana waugu su tempo udde Gharṛaho Mawu Ruata taambe nionggolla; ana waugu Mawu Yesus taambe niapaawantuga ringannu papate-Ne.)

⁴⁰Manambo taumata maaringikka apa apan niwisara Mawu Yesus, wuṛṛu su wallatti mangitou piaddu mabbisara, "Taumata indi natantunna ete Nabi udde!"

⁴¹Arawe piaddu lai mabbisara, "Ete indi Ratu m Punnu Saḷamatta!"

Arawe piaddu lai mabbisara, "Eh, ṛatadde Ratu m Punnu Saḷamatta nirumanta wuassu Galilea? ⁴²Sulaḷummu Wuke Susi uaworṛetta manungku Ratu m Punnu Saḷamatta udde sinossoṛṛanne wuassi Daud wuṛṛu sarun rumanta wuassu Betlehem, eteudde soa atatanaanni Daud." ⁴³Panginsueanne manga taumata mannatakke uatatiakka su ola'u Mawu Yesus. ⁴⁴Piaddu maapulu manametta Sitou, arawe tawe saran sangkatou mamita Sitou.

Manga tembonannu Yahudi tawe mangngimanna

⁴⁵Su tempo manga mandariaga Waḷe Mawu, apan nirolokka manametta Mawu Yesus nabelengke apia, manga imam tembonanne wuṛṛu manga taumata n Farisi udde naiwaḷo simangitou, "Anio iamiu tawe nangapiddi Tou inawarendi?"

⁴⁶Manga mandariaga udde sinumimbakka, "Ah, taambe saran paassa pia taumata mabbisara naaḷihida ere Itou!"

⁴⁷"Apa iamiu lai suete nialiwi-Ne?" unnu manga taumata n Farisi udde. ⁴⁸"Apa wuassu manga tembonanni ite wuṛṛu manga taumata n Farisi piaddu mangngimanna Sitou? ⁴⁹Arawe awadaalla indi, imangitou waga n Tita Musa, wuṛṛu salaiwe ereapa imangitou niawontohante."

⁵⁰Sangkatou su wallattu manga taumata n Farisi udde eteudde Nikodemus apan suete nirumanta ringannu Mawu Yesus. Nikodemus nabbisara su manga taumata n Farisi waine, ⁵¹"Tumuṛṛuttu Tita, sangkatou tawe wotongnge iṛṛuumanna amungkangngu hattone taambe niaringiṛṛanna wuṛṛu pallaḷagune niparikisanna."

⁵²"Apa i'o lai wuassu Galilea?" sasimbakki mangitou, "Pamarikisse Wuke Susi! I'o sarun maasingkatta manungku tawe sangkatou nabi apan darantane wuassu Galilea!"



Wuiddu Zaitun (8:1)

Sangkatou wawine niaratinganna sussandaga

[⁵³Wua udde, taumata nambo udde napuḷete watukku waḷe.

8 Arawe Mawu Yesus inaite watukku Wuiddu Zaitun. ²Tiṛṛabbine ruaallo maṛṛanggapa Itou inaite lai su Waḷe Mawu, wuṛṛu nambo taumata nirumanta ringanni Tou. Mawu Yesus inuma'ianna see nanattakke mangngaṛṛa'a simangitou. ³Tantaḷanna udde, manga huru n agama wuṛṛu manga taumata n Farisi nangapiddu sangkatou wawine ringanni Tou apan niaratinganna sussandaga. Imangitou nandolokku wawine udde niapararisikka su pattangnganne, ⁴see nabbisara su Mawu Yesus, "Iamangnga Huru, wawine indi niaratinganna sussandaga. ⁵Sulaḷummu Tita Musa pia atoranna manungku wawine ereindi ṛinone tuntungannu watu ma'oma n sara mate. Orassa indi ereapa addapattu Iamangnga?" ⁶Imangitou naiwaḷo aroddi maddea'a pasasaḷa-Ne,

tadea'u imangitou wotongnge mapaasaja n Tou. Arawe Mawu Yesus inumaruutta wuɽɽu mamorɽettu talimado-Ne su leta'a. ⁷Napawe imangitou sidutu mammata'a, Itou tinumatagekka wuɽɽu nabbisara simangitou, "Taumata apan tawe dosane su wallatti amiu, wotongnge itou manuntungngu watu paarorone su wawine udde." ⁸Wua udde Mawu Yesus inumaruutta apia wuɽɽu namorɽetta apia su leta'a. ⁹Napawe naaringikka Mawu Yesus nabbisara aroddi, imangitou nanantangke n tampa udde, passangkatou nanattakka wuassu atimmaranne. Panginsueanne Mawu Yesus natantangnga sassane isudde ringannu wawine apan ta'e uarisikka su dararisiranne. ¹⁰See Mawu Yesus namatti'u puane wuɽɽu nabbisara wawine udde, "Suapate imangitou sarangkanambone? Tawedu nakkuumannu?"

¹¹"Tawe, Ama," sasimbakke.

"Aroddite," unnu Mawu Yesus, "Ia'u lai tawe makkuumannu. Orassa indi apulete, imbarrangnga ma'ola'a rosa apia."]

Mawu Yesus asasemakku runia

¹²Mawu Yesus nabbisara apia su taumata nambo udde, wisara-Ne, "Ete Ia'u asasemakku runia. Taumata apan tumantalongnga Sia'u tawe umamatta su ararandumma, arawe maatahuanna asasemakku pabbiaranna."

¹³"Orassa indi I'o mangngonggolu tatiala su ola'u riri-Nu sassane," unnu manga taumata n Farisi udde Sitou, "Tatialanu udde awusu."

¹⁴Mawu Yesus sinumimbakka, "Salaiwe Ia'u mangngonggolu tatiala su ola'u riri-U sassane, tatiala-U udde atonna; ana waugu Ia'u masingkatta wuassuapa Ia'u nirumanta wuɽɽu watukku apa Ia'u inai. Iamiu waggga wuassuapa Ia'u nirumanta wuɽɽu watukku apa Ia'u inai. ¹⁵Iamiu mammarikissa taumata ringannu apulu n taumata; Ia'u tawe mamarikissa saran sangkatou. ¹⁶Arawe unnu wisara Ia'u mamarikissa taumata, Ia'u maɽrawessa udde matulida, ana waugu Ia'u tawe sassane; Iamangnga apan nandolo-U su sambau lai ringang-Ku. ¹⁷Sulalummu Tita Musa uworɽetta arendi; Tatiala apan atonna eteudde tatiala wuassu rua ng katou. ¹⁸Apan mangngonggolu tatiala su ola'u riri-U udde rua ng katou - Ia'u wuɽɽu Iamangnga apan nandolo-U."

¹⁹"Iamangngu udde suapa?" aiwalo mangitou.

Mawu Yesus sinumimbakka, "Iamiu tawe maaillaɽa Sia'u aroddi lai Iamang-Ku. Unnu wisara iamiu maaillaɽa Sia'u, amiu lai sarun maaillaɽa Iamang-Ku."

²⁰Sarangkanambone udde niwisara Mawu Yesus su tempo Itou tantallanna mangngarra'a su Wale Mawu marani manga pangangadoannu

roitta sasamba. Arawe tawe saran sangkatou apan nanametta Sitou, ana waugu taambe nia'omanna tempone.

Su tampa Ta'u rantanna, iamiu tawe maaranta

²¹Mawu Yesus nabbisara apia simangitou, "Ia'u inaité, wuṛṛu iamiu sarun maddea'a Sia'u, arawe iamiu sarun mate sulaḷummu rosanu. Su tampa Ta'u rantanna, iamiu tawe maaranta."

²²Ne manga tembonannu Yahudi nabbisara, "Asinungka Itou matingkaate, ana waugu Itou nabbisara, 'Su tampa Ta'u rantanna, iamiu tawe maaranta.'"

²³See Mawu Yesus nabbisara simangitou, "Iamiu nirumantá wua bowane; arawe Ia'u nirumanta wua dosone. Iamiu wuassu runia arawe Ia'u tawe wuassu runia. ²⁴Ana waugu udde Ia'u mabbisara siamiu, manungku iamiu sarun mate sulaḷummu manga rosanu. Wuṛṛu atonna iamiu sarun mate sulaḷummu manga rosanu, amungkanngu iamiu tawe mangngimanna manungku, 'ete Ia'u Itou apan isassago IA'U INDI'."

²⁵"Rinone isai P'o?" aiwaḷo mangitou.

Mawu Yesus sinumimbakka, "Ipa'ura maggahato ng kamiu apia! ²⁶Ta'e manambo lai hatto su ola'i ami u apan Ta'u iwisara wuṛṛu ipamarikissa. Arawe Itou apan nandolo-U wotongnge apangimananna. Wuṛṛu Ia'u mamasingkatta su runia apa apan Ta'u niaringirṛanna wuassi Tou."

²⁷Imangitou tawe maasunna manungku Itou tantaḷanna mabbisara simangitou su ola'u lamangnga. ²⁸Ana waugu udde Mawu Yesus nabbisara simangitou, "Raddoi amungkanngu iamiu suete nanduittu Ana'u Taumata, iamiu sarun maasingkatta manungku 'ete Ia'u Itou apan isassago IA'U INDI', wuṛṛu iamiu sarun maasingkatta manungku tawe saran sambau apan a'olaang-Ku wuassu riri-U sassane. Ia'u tumba'u mamasingkattu apa apan niarra'u lamangnga Sia'u. ²⁹Wuṛṛu Itou apan nandolo-U indi su sambau ringang-Ku. Itou tawe mamala-U sassane, ana waugu Ia'u sidutu ma'ola'a inolaanna apan maaluaassa naung-Nge."

³⁰Napawe Mawu Yesus suete nabbati'u sarangkanambone udde, manambo taumata mangngimanna Sitou.

Mawu Ruata apan narṛino mapaaḷiu ng kamiu

³¹Wua udde Mawu Yesus nabbisara su manga taumata n Yahudi apan nangimante Sitou, "Amungkanngu iamiu mabbiakka tuttuṛṛutta

ałarɾa-U, iamiu atonna-tonna mallalɾrenggeng-Ku, ³²ne iamiu sarun maailalɾa Mawu Ruata apan naɾɾino, wuɾɾu ana waugu udde iamiu sarun ipallossa."

³³"Iami indi papapulunni Abraham," unni mangitou. "Taambe saran paassa iami naola'a allangngi sai-sai! Apa pandumannu ringannu mabbisara, 'Iamiu sarun ipallossa'?"

³⁴"Mangke atonna wisara-U indi," unnu Mawu Yesus simangitou. "Taumata apan ma'ola'a rosa, eteudde allangngu rosa. ³⁵Wuɾɾu sangkatou allangnga tawe atatanaanne uasidutu sulalummu wafene, arawe ana'a pia atatanaanne sarangkało'engnge sulalummu wafene. ³⁶Ana waugu udde, amungkangngu ana'a mamallossi amiu, iamiu atonna-tonna mapallossa. ³⁷Atonna Ia'u masingkatta manungku iamiu indi papapulunni Abraham. Arawe iamiu maapulu mamate Sia'u, ana waugu iamiu maddiri manarimmattu ałarɾa-U. ³⁸Apa apan niasiloang-Ku wuassu Iamang-Ku eteudde apan iwabbisara-U. Arawe iamiu tuttuɾɾutta apa apan iaaɾɾa'i iamangngu siamiu."

³⁹Imangitou sinumimbakka, "Iamangngi ami eteudde Abraham."

"Unnu wisara atonna-tonna iamiu ana'i Abraham," unnu Mawu Yesus, "iamiu ɾinone ma'ola'a apa apan a'olaanni Abraham. ⁴⁰Ia'u mamasingkatta siamiu atatulidda apan niaringiɾrang-Ku wuassu Mawu Ruata, arawe iamiu maapulu mamate Sia'u. Abraham tawe inolaanne ereudde! ⁴¹Iamiu ma'ola'a ere apa apan niola'u iamangngu sassane."

Sasimbakki mangitou, "Iami wafene ałarɾana'a su liuddu awingnga. Iamangngi ami tumba'u sangkatou eteudde Mawu Ruata sassane."

⁴²See Mawu Yesus nabbisara simangitou, "Unnu wisara Mawu Ruata udde Iamangngu, iamiu sarun mandangngu Sia'u, ana waugu Ia'u nirumanta wuassu Mawu Ruata. Ia'u tawe nirumanta ringannu apulu-U sassane, arawe ete Itou apan nanadolo-U. ⁴³Anio iamiu tawe maasunna apa iwabalɾo-U? Ana waugu iamiu tawe maataɾrangnga maddaringikka ałarɾa-U. ⁴⁴Ete Setanna iamangngu, wuɾɾu iamiu tuttuɾɾutta apulu n iamangngu. Ro'e n panataɾranne Setanna udde taɾɾa pate. Itou taambe saran paassa manamba'a apapia, ana waugu tawe apapia sitou. Amungkangngu itou mangawusu, udde naɾɾino ana waugu ete aroddi palalagune. Itou taɾɾa awusu wuɾɾu punnu alawo'u awusu. ⁴⁵Arawe Ia'u mabatti'u atatulidda, wuɾɾu ana waugu eteudde iamiu maddiri mangngimanna Sia'u. ⁴⁶Isai su wallatti amiu wotongnge maatiala manungku Ia'u pia dosa? Amungkangngu Ia'u mabatti'u atatulidda, anio iamiu tawe mangngimanna Sia'u? ⁴⁷Taumata apan darantane wuassu Mawu Ruata, madaringikka wisara Mawu Ruata. Arawe iamiu wafene wuassu Mawu Ruata, ana waugu udde iamiu maddiri madaringikka."

Mawu Yesus wurru Abraham

⁴⁸Manga taumata n Yahudi udde sinumimbakka Mawu Yesus, "Walineuwe atonna wisara ng kami manungku I'o taumata n Samaria apan niasuttannu setanna?"

⁴⁹Mawu Yesus sinumimbakka, "Ia'u tawe niasuttannu setanna. Ia'u mangngaddatta Iamang-Ku, arawe iamiu mangngaɽuandaga Sia'u. ⁵⁰Ia'u tawe maddea'a awawantugu riri-U sassane. Pia sangkatou apan maddea'a awawantu-U, wurru tumba'u Itou apan mammarikissa. ⁵¹Mangke atonna wisara-U indi, taumata apan tuttuɽrutta wisara-U, tawe mate saran maɽannu-ɽannu."

⁵²See manga taumata n Yahudi udde nabbisara Mawu Yesus, "Orassa indi iami masingkatta I'o indi atonna-tonna niasuttannu setanna! Abraham sassane natete, aroddi lai manga nabi. Arawe I'o mabbisara, 'Taumata apan tuttuɽrutta wisara-U, tawe mate saran maɽannu-ɽannu.' ⁵³Amungkangngu Abraham sassane natete, wurru manga nabi sarangkambone lai natete, I'o indi isai? ɽatadde I'o magewaɽanna wuassi iamangngi ami Abraham!"

⁵⁴Mawu Yesus sinumimbakka, "Unnu wisara Ia'u maddea'a awawantugu riri-U sassane, awawantugu udde tawe gunane. Apan mangngaddatta Sia'u eteudde Iamang-Ku apan unni amiu Mawu Ruata ng kamiu, ⁵⁵arawe iamiu tawe maaillaɽa Sitou. Arawe Ia'u maaillaɽa. Amungkangngu Ia'u mabbisara manungku Ia'u tawe maaillaɽa Sitou, ne Ia'u sangkatou taɽra awusu, ere lai iamiu. Ia'u maaillaɽa Sitou wurru tuttuɽrutta wisara-Ne. ⁵⁶Iamangngu Abraham lembo n lulluassa, manungku itou sarun maasilo allo-U. Itou naasilote wurru itou mangke lulluassa!"

⁵⁷See manga taumata n Yahudi nabbisara Mawu Yesus, "Uukku taambe naɽratubba lima m puɽo su tonnane, arawe I'o naasilote si Abraham?"

⁵⁸Mawu Yesus sinumimbakka, "Atonna Ia'u mabbisara siamiu: Tantaɽanna Abraham taambe niasungkangnga, Ia'u nariaddite."

⁵⁹See manga taumata n Yahudi nanganute watu ipanuntungnga Sitou; arawe Mawu Yesus na'imbuni, see napuɽete nanantangngu Waɽe Mawu.

Mawu Yesus napaapia n taumata wuta naasilo apia

9 Su tempo Mawu Yesus u'amatta, Itou naasilo sangkatou wuta ro'e niariaddine. ²Manga mallaɽaɽrenggennu Mawu Yesus naiwaɽo Mawu Yesus, "Iamangnga Huru, anio taumata indi niasungkangnga matane wuta? Apa ana waugu itou sassane marosa ara'e hagurangnge marosa?"

³Mawu Yesus sinumimbakka, "Itou wuta wāline ana waugu rosane sassane ara'e rosa n hagurangnge, arawe tadea'u taumata wotongnge maasilo taffino Mawu Ruata mammanara sula'ummu ririne. ⁴Tantalanna ta'e allo, iite rinone mammanara manara n Tou apan nandolo-U. Rabbi sarun rumanta, wuṛṛu tawe saran sangkatou apan wotongnge maapammanara. ⁵Tantalanna la'u ta'e su runia indi, ete Ia'u asasemakku runia."

⁶Napawe suete nabbisara aroddi Mawu Yesus nangaddu su leta'a, wuṛṛu addune niluakka ringannu leta'a. Wua udde Itou nangapu su mata n taumata udde ⁷see nabbisara sitou, "Roote pamaresi hatinu su Li'u n Siloam." (Siloam atapasanne 'Nirolokka'.) Ne taumata udde inaita namaresi hatine. Su tempo itou nabelengnga, itou wotongngete maasilo.

⁸Manga alindonganna wuṛṛu manga taumata apan paarorone maasilo sitou sangkatou madarorongnga, sarangkanambone nabbisara, "Wāline we itou indi taumata apan inaramanne ua'ianna madorongnga?"

⁹Piaddu mabbisara, "Atonna itou." Arawe piaddu lai mabbisara, "Tawe itou tumba'u lihiddu taumata udde."

Arawe taumata udde sassane nabbisara, "Ete ia'u itou."

¹⁰"Ereapa olangnge na'oma n sara i'o naasilo?" aiwaḷo mangitou sitou.

¹¹Itou sinumimbakka, "Taumata apan aranne Mawu Yesus udde na'ola'a labbo adio'a, see niapu su mata'u lapiddu nabbisara, 'Roote pamaresi hatinu su Li'u n Siloam.' See ia'u inaita. Wuṛṛu su tempo ia'u namaresi hati'u, orassa udde lai ia'u naasilote."

¹²"Suapa taumata udde?" aiwaḷo mangitou.

Itou sinumimbakka, "Ia'u waggate."

Taumata n Farisi mannutudda arariaddianna napaapia n taumata udde

¹³⁻¹⁴Allo udde allo n Sabatta su tempo Mawu Yesus nalluakku leta'a ringannu addune nipangundamma taumata wuta udde wotongnge naasilo. Ne taumata wuta tanginna udde niapidu ringannu manga taumata n Farisi. ¹⁵Imangitou lai naiwaḷo sitou ereapa na'oma n sara itou naasilo. Itou sinumimbakka, "Itou nangado n labbo su mata'u, see ia'u namaresi wuṛṛu ia'u wotongngete maasilo."

¹⁶Manga pira su wallattu manga taumata n Farisi udde nabbisara, "Tawe mariaddi taumata na'ola'a indi darantane wuassu Mawu Ruata, ana waugu Itou tawe mallaghu n allo n Sabatta."

Arawe taumata waine lai mabbisara, "Tawe mariaddi taumata marosa wotongnge maaola'a manga alaṛṛindu'a ereindi?" See nasaputte patatatiakka su wallattu addapatti mangitou.

¹⁷Ne manga taumata n Farisi udde naiwaḷo apia su taumata udde, "Apa addapannu su ola'i Tou apan naapia si'o na'oma n sara naasilo?"

"Itou sangkatou nabi," sasimbakku taumata udde.

¹⁸Arawe manga piaṛṛa'u Yahudi udde maddiri mangngimanna manungku taumata udde atonna wuta ro'e niariaddine, wuṛṛu orassa indi naasilote. Ana waugu udde imangitou namago hagurangnge, ¹⁹wuṛṛu naiwaḷo, "Atonna indi anangngu apan niasungkangnga wuta? Ereapa itou wotongnge naasilo orassa indi?"

²⁰Inangnga iamangngu taumata udde sinumimbakka, "Atonna indi ana'i ami; wuṛṛu atonna itou niasungkangnga wuta. ²¹Arawe ereapa itou naasilote orassa indi, iami wagga. Wuṛṛu isai apan nangundamma sitou wotongnge naasilo, udde lai iami wagga. Pa'iwaḷote sitou, itou timmaddete; itou wotonggete sumimbakka sassane." ²²Inangnga iamangngu taumata udde sinumimbakka aroddi ana waugu imangitou matta'uttu manga piaṛṛa'u Yahudi; ana waugu imangitou na'irete, manungku taumata apan manga'u Mawu Yesus Ratu m Punnu Saḷamatta, tate wotongnge sumutta su waḷe m pattataṛṛamawuanna. ²³Ana waugu udde inangnga iamangngu taumata udde nabbisara, "Itou timmaddete; paiwaḷote sitou."

²⁴See imangitou namago apia taumata apan tanginna wuta udde, wuṛṛu nabbisara sitou, "Passalute manungku i'o mabbisara su rinone. Iami masingkatta taumata udde taumata marosa."

²⁵"Apa Itou marosa ara'e tawe," sasimbakku taumata udde, "ia'u wagga. Arawe ete sambau asingkatangu; ia'u dorone wuta, arawe orassa indi ia'u naasilote."

²⁶See imangitou nabbisara apia sitou, "Itou na'ola'a apa si'o? Ereapa itou na'ola'a si'o na'oma n sara naasilo?"

²⁷Taumata udde sinumimbakka, "Suete ta'u niwatti'a siamiu, arawe iamiu tawe madaringikka. Anio iamiu maapulu madaringikka apia? Asinungka iamiu maapulu maola'a mallaṛṛenggen-Ne lai?"

²⁸See imangitou nallela sitou wuṛṛu nabbisara, "Ete i'o mallaṛṛenggen-Ne; waḷine iami! Iami mallaṛṛenggeni Musa. ²⁹Iami masingkatta manungku Mawu Ruata suete nabbisara si Musa. Arawe su ola'u taumata udde, iami wagga wuassuapa inarantan-Ne."

³⁰Taumata udde sinumimbakka, "Maatiangnga atonna manungku iamiu wagga wuassuapa inarantan-Ne, wuṛṛu see Itou suete na'ola'a sia'u naasilo. ³¹Iite masingkatta manungku Mawu Ruata tawe madaringikka taumata marosa, ewe'e taumata apan mangngaddatta Mawu Ruata, wuṛṛu tuttuṛṛutta apulu-Ne. ³²Ro'e n panattaṛṛannu runia taambe

niaringiranna pia taumata maapia taumata wuta ro'e niasungkangnga see wotongnge maasilo. ³³Amungkangngu taumata udde wafine wuassu Mawu Ruata, itou tawe maaola'a apa-apa."

³⁴Sasimbakki mangitou, "Apa? I'o apan napene n rosa ro'e nia-riaddine, i'o maapulu mangnga'ra'a siami?" Ne nanattakka orassa udde itou isassingadde sumutta su wafe m pattata'ramawuanna.

Wuta sula'ummu pangangimanna

³⁵Mawu Yesus naaringikka manungku imangitou suete naningaddu taumata udde sumutta su wafe m pattata'ramawuanna. Itou nadea'e taumata udde see nabbisara sitou. "Apa i'o mangngimanna Ana'u Taumata?"

³⁶Taumata udde sinumimbakka, "Isai itou, Mawu? Tulunga'a waloa'a tadea'u ia'u mangngimanna Sitou."

³⁷"I'o suete naasilo Sitou," sasimbakku Mawu Yesus, "Ete Itou apan orassa indi uahahattonu."

³⁸"Ia'u mangngimanna, Mawu," sasimbakku taumata udde, see inumalintudda su saruannu Mawu Yesus.

³⁹Mawu Yesus nabbisara, "Ia'u nirumanta su runia indi, makkuungngu taumata; tadea'u taumata wuta wotongnge maasilo, wu'ru taumata maasilo, maola'a wuta."

⁴⁰Manga pira taumata n Farisi naaringikka Mawu Yesus nabbisara aroddi, see imangitou naiwalo Sitou, "Pandumannu iami indi lai wuta?"

⁴¹Mawu Yesus sinumimbakka, "Unnu wisara iamiu wuta, iamiu tawe marosa. Arawe ana wangu iamiu mabbisara, 'Iami maasilo,' udde atappasanne iamiu ta'e marosa."

Sasumandingngu domba wu'ru malla'u'adde

10 "Mangke atonna wisara-U indi: Taumata apan sumutta su la'ummu tanda'u domba lumiu pagalla, wu'ru tawe sumutta su ngara, arawe umawitta sumabbi la'anna waine, taumata udde tarra ta'o wu'ru tarra rampassa. ²Arawe taumata apan sinumutta wuassu ngara, ete itou malla'u'adda domba. ³Mandariaga tanda'a mammu'a ngara sutanni tou, wu'ru manga domba uatantalongnga tingikke su tempo itou mammago simangitou ringannu aranne sambau-sambau wu'ru manggehetta simangitou su liudde. ⁴Napawe manga domba udde niapidde su liudde, malla'u'adda udde u'amatta rorone, wu'ru manga domba udde uatantalongnga sitou, ana wangu imangitou maailla'la tingikke.

⁵Imangitou maddiri tumantalongnga taumata waine, ewe'e tumaŋangngu taumata udde, ana waugu imangitou tawe maaillaŋa tingikke."

⁶Mawu Yesus nabbati'u sasumandingnga udde, arawe imangitou tawedu naasunna apa panduman-Ne.

Mawu Yesus, mallaŋu'adda apan mapia

⁷Ne Mawu Yesus nabbisara paassa lai, "Mangke atonna wisara-U indi: Ete Ia'u ngara suttannu domba. ⁸Sarangkanambone apan nirumanta nalliu ŋoro wuassia-U, udde taŋra ta'o wuŋru taŋra rampassa, arawe manga domba udde tawe maddaringikka tingikki mangitou. ⁹Ete Ia'u ngara. Isai apan sumutta sumabbi Sia'u, sarun masalamatta; itou sumabangnga wuŋru sumutta sarun maasomba wiakka. ¹⁰Taŋra ta'o rumanta tumba'u manna'o, mamate, wuŋru manggohakka. Arawe Ia'u nirumanta tadea'u taumata maasomba wiakka - wiakka apan tawe masue.

¹¹Tumba'u Ia'u mallaŋu'adda apan mapia. Mallaŋu'adda mapia manantillu niawa-Ne ipanaŋi manga domba-Ne. ¹²Taumata n sewa apan waŋine mallaŋu'adda wuŋru waŋine lai tatahuannu manga domba udde, sarun tumaŋangnga manantangngu manga dombane napawe itou naasilo serigala rumanta. Ne manga domba udde sarun sametanne wuŋru isaŋiawukku serigala. ¹³Taumata n sewa udde tumaŋangnga, ana waugu itou mammanara tumba'u maddea'a roitta. ¹⁴⁻¹⁵Tumba'u Ia'u mallaŋu'adda apan mapia. Ere lai lamangnga maaillaŋa Sia'u, wuŋru Ia'u lai maaillaŋa lamangnga, aroddi lai Ia'u maaillaŋa manga domba'u wuŋru imangitou lai maaillaŋa Sia'u. Ia'u mannantillu niawa-U ana waugu imangitou. ¹⁶Ta'e pia manga domba waine lai apan tatahuanang-Ku, arawe tawe nareengnga sulalummu wageangngu domba indi. Imangitou lai ŋinone Ta'u iapidida wuŋru imangitou sarun madingikka tingi-U. Imangitou sarangkanambone sarun maola'a ammulanna sambau ringannu mallaŋu'adde sangkatou.

¹⁷Iamangnga mandangngu Sia'u ana waugu Ia'u mannantillu niawa-U, see manengkamma apia. ¹⁸Tawe saran sangkatou wotongnge mangarŋo wuassia-U. Ia'u manantilla wuassu apulu-U sassane. Ia'u uataŋrino manantilla, wuŋru uataŋrino manguŋe apia. Eteudde manara apan Ta'u sinengkakama wuassu lamang-Ku."

¹⁹Ana waugu Mawu Yesus nabbisara aroddi, manga taumata n Yahudi mannattakke uatataiakka. ²⁰Manambo taumata mabbisara, "Itou niasuttannu setanna! Itou wewa! Ipa'ura iamiu madingikka Sitou?"

²¹Arawe piaddu lai mabbisara, "Taumata apan niasuttannu setanna tawe maawisara aroddi! Wotongnge setanna maaola'a taumata wuta maasilo?"

Taumata n Yahudi maddiri manarimmattu Mawu Yesus

²²Su Yerusalem manga taumata tantaḷanna mallaggu n Allo Wa-hewa Manattakka Sumutta su Waḷe Mawu. Tempo udde runia masunge. ²³Mawu Yesus tantaḷanna u'amatta su panumbaḷe n Salomo sulaḷummu Waḷe Mawu, ²⁴su tempo manga taumata n Yahudi nirumanta maam-mulla manaliwutta Mawu Yesus. Imangitou nabbisara, "Sara tingngera I'o mamala ng kami uapapadua? Waḷoa'e paasemakka, amungkangngu I'o atonna-tonna Ratu m Punnu Saḷamatta."

²⁵Mawu Yesus sinumimbakka, "Suete Ta'u niwaḷo siamiu, arawe iamiu maddiri mangngimanna. Manga manara Ta'u ola'anna su arannu Iamang-Ku, mangngonggolu tatiala su ola'u riri-U ²⁶Iamiu maddiri mangngimanna ana waugu iamiu tawe nareengnga manga domba-U. ²⁷Manga domba-U madaringikka tingi-U. Ia'u maaillaḷa simangitou, wuṛru imangitou uatantalongnga Sia'u. ²⁸Ia'u mangngonggolu wiakka tu-tune wuṛru saran maḷannu-ḷannu simangitou, wuṛru sarangkaḷo'engnge imangitou tawe mate. Tawe saran sangkatou apan wotongnge mangarṛo simangitou wuassu lima-U. ²⁹Iamang-Ku, apan suete nanantilli mangitou Sia'u, nanampaliu wuassu sarangkanambone. Wuṛru tawe saran sangka-tou wotongnge mangarṛo simangitou wuassu lima n Iamangnga. ³⁰Ia'u wuṛru Iamangnga tumba'u sambau."

³¹See manga taumata n Yahudi namurutta watu ipanuntungnga Mawu Yesus. ³²Arawe Mawu Yesus nabbisara simangitou, "Iamiu suete nausilo Sia'u ma'ola'a manambo manara apan mapia, apan niapamanara n Iamangku Sia'u. Wuassu anambo manara udde, suapane apan naa'aḷudda siamiu na'oma n sara iamiu mammareta Sia'u?"

³³Manga taumata n Yahudi udde sinumimbakka, "Waḷinewe ana waugu manga manaranu apa mapia udde iami manuntungngu watu Si'o, arawe ana waugu I'o mangngadio'a Mawu Ruata. I'o sangkatou taumata, maapulu ma'ola'a riri-Nu ere Mawu Ruata."

³⁴See Mawu Yesus sinumimbakka, "Waḷinewe sulaḷummu Wuke n Titanu uaworretta: Mawu Ruata nabbisara, 'Ete iamiu udde mawu?"

³⁵Iite masingkatta manungku apa apan uaworretta sulaḷummu Wuke Susi ipappaatta sarangkaḷo'engnge. Nariaddi, amungkangngu Mawu Ruata mangonggolu aranna 'mawu' su manga taumata apan madaring-ikka wisara-Ne, ³⁶anio iamiu mabbisara Sia'u mangngadio'a Mawu

Ruata ana waugu nabbisara Ia'u Ana'u Mawu Ruata? Sumbali Ia'u nipile Mawu Ruata wuṛṛu nirolokka watukku runia. ³⁷Amungkangngu Ia'u tawe ma'ola'a manara apan tinantillu Iamangnga, iamiu arie pangimanna Sia'u. ³⁸Arawe ana waugu Ia'u, tinumuṛṛutta manara udde, pangimante apa apan Ta'u ola'anna udde, salaiwe iamiu maddiri mangngimanna Sia'u. Ringannu aroddi iamiu maasingkatta wuṛṛu naasunna manungku Iamangnga sidutu su sambau ringang-Ku, wuṛṛu Ia'u sidutu su sambau ringannu Iamangnga."

³⁹Imangitou maddea'a lai manametta Mawu Yesus, arawe Itou naataḷangnga wuassi mangitou.

⁴⁰Mawu Yesus nabelengke watukku samba'a n Saḷukku Yordan, su tampa n Yohanes dorone mannarani, see natana'e poiaronddi. ⁴¹Manambo taumata nirumanta ringanni Tou, Imangitou mabbisara, "Yohanes tawe ma'ola'a manga aḷaṛṛindu'a, arawe anambo n wisara su ola'u taumata indi mangke atonna." ⁴²See manambo taumata poiaronddi mangngimanna Mawu Yesus.

Apapate n Lazarus

11 Sangkatou aranne Lazarus uatana'a su Betania su sampunna ringannu tuṛrangnge Maria wuṛṛu Marta. ²Maria eteudde wawine apan nallaḷinnu lana mawangngi su ledda Mawu Yesus, wuṛṛu see niapu n uta'i tou. Su sambau allo Lazarus nirumada'a. ³Rua ng katou tuṛrangnge namasingkatta Mawu Yesus, "Mawu, tuṛrangngi ami apan arangnguannu Mawu udde marada'a."

⁴Napawe Mawu Yesus naaringikka watti'a udde, Itou nabbisara, "Rada'a indi tawe maapate. Indi mariaddi tadea'u Mawu Ruata wantuhanna, wuṛṛu tadea'u ana waugu udde Ana'u Mawu Ruata lai iapaa-wantuga."

⁵Mawu Yesus marangngu si Marta, si Maria wuṛṛu si Lazarus. ⁶Arawe napawe Mawu Yesus naaringikka watti'a manungku Lazarus marada'a, Itou natana'a rua allo lai su tampane. ⁷Wua udde Itou nabbisara su mallalaṛṛenggen-Ne, "Wette iite mabelengnga su Yudea."

⁸Imangitou sinumimbakka, "Iamangnga Huru, wakkute tanginna manga taumata n Yahudi maapulu manuntungngu watu su Iamangnga see orassa indi Iamangnga maapulu mabelengnga apia poiaronddi?"

⁹"Walḡnewe allo aḷannune mapuḷo dua su oranne?" Wisara Mawu Yesus. "Taumata apan u'amatta su tempo allo, tawe matara ana waugu itou maasilo semakku runia indi. ¹⁰Arawe taumata apan u'amatta su tempo rabbi, mattara ana waugu tawe asasemakka sitou." ¹¹Ete aroddi

unnu Mawu Yesus. Wua udde Itou nabbisara apia, "Hawe ng kite Lazarus mattiille, arawe Ia'u sarun inai mamu'o sitou."

¹²Manga mallajarrenggennu Mawu Yesus nabbisara, "Mawu, amung-kangngu Lazarus mattiilla, raddoite itou sarun mapia."

¹³Pandumannu Mawu Yesus eteudde manungku Lazarus natete. Arawe imangitou massunna manungku pandumannu Mawu Yesus udde Lazarus mattiilla wiasa. ¹⁴Ana waugu udde Mawu Yesus nabbisara simangitou ringannu masema-semakka, "Lazarus natete. ¹⁵Arawe Ia'u lulluassa lai ana waugu Ia'u tawe poiaronddi, ana waugu mappianne siamiu, tadea'u iamiu wotongnge mangngimanna. Wette iite inaita orassa indi ringanni Lazarus."

¹⁶Tomas isassago "I Rindua" nabbisara su manga ringanne mal-lajarrenggennu Mawu Yesus, "Wette iite tumantalongnga, salaiwe iite mate su sambau ringanni Tou!"

Apan mapaawiakka apia wurru mangngonggolu wiakka

¹⁷Napawe Mawu Yesus na'omate su tampa udde, Lazarus appate allo alannune nilabingnga. ¹⁸Betania marani n Yerusalem, itatakasere tallu kilo meterre araune. ¹⁹Manambo taumata n Yahudi nirumanta nattembo si Marta wurru si Maria malluassa naungngi mangitou ana waugu apapate n turrangnge.

²⁰Napawe Marta naaringikka Mawu Yesus nirumanta, itou si-numabangnga nanaŋoho Mawu Yesus, arawe Maria natana'a su wale. ²¹Wisara Marta su Mawu Yesus, "Mawu, wurru Mawu isindi su orassa udde, asinungka turrangku tawe nate. ²²Arawe aroddi Ia'u masingkatta manungku orassa indi lai Mawu Ruata sarun mangagillu apa apan ra-dorongannu Mawu Sitou."

²³"Turrangngu sarun mabbiakka apia," wisara Mawu Yesus si Marta.

²⁴Marta sinumimbakka, "Ia'u masingkatta Lazarus sarun mabbiakka apia napawe taumata nate iapawangunna su Allo ng Kiamatta."

²⁵"Ete Ia'u apan mangngonggolu wiakka wurru mapaawangunnu tau-mata nate," wisara Mawu Yesus si Marta. "Taumata apan mangngi-manna Sia'u sarun mabbiakka, salaiwe itou natete. ²⁶Wurru taumata wiakka apan mangngimanna Sia'u sarangkaŋo'engnge, itou tawe mate. Mangngimannawe i'o su olangnge udde?"

²⁷"Mawu," sasimbakki Marta, "ia'u mangngimanna Mawu Ana'u Mawu Ruata, Ratu m Punnu Saŋamatta apan sarun rumanta su runia indi."

Mawu Yesus nilumuai

²⁸Napawe i Marta nabbisara aroddi, itou inaita namago si Maria, turrangnge wuŕru sinumaŕimburingnga sitou, "Iamangnga Huru isin-dite; Itou ma'iwaloŕu." ²⁹Naaringikka udde, Maria maŕiha-ŕihakka na-buatta see inaita naisasomba Mawu Yesus. ³⁰Tempo udde, Mawu Yesus taambe sinumutta su ampungnga. Itou ta'e su tampa Marta naisasomba n Tou. ³¹Manga taumata n Yahudi apan tantaŕanna mallimbatta naung-ŕi Maria su waŕe, naasilo si Maria nabbuatta wuŕru maŕiha-ŕihakka si-numabangnga; nariaddi imangitou inai lai tinumantalongnga sitou, ana waugu imangitou massunna manungku itou inai su laŕabinganna lumuai.

³²Napawe Maria na'omate su tampa Mawu Yesus wuŕru naasilo Sitou, Maria inumaŕintuda su saruannu Mawu Yesus wuŕru nabbi-sara, "Mawu, amungkangngu Mawu isindi su orassa udde, asinungka turrangku tawe nate."

³³Napawe Mawu Yesus naasilo si Maria lulluai, wuŕru manga taumata n Yahudi nirumanta sangkaŕrindo'i Maria udde lai lulluai, naung-Nge nasusa, wuŕru Itou niasiloanna mangke natuno atonna. ³⁴Ne Itou naiwaŕote simangitou, "Suapa iamiu nallabingŕi tou?"

"Wette pa'ellega, Mawu," sasimbakki mangitou.

³⁵See Mawu Yesus nilumuai. ³⁶Ne manga taumata n Yahudi udde nabbisara, "Pa'ellega tawe hampa darangngu-Ne si Lazarus!"

³⁷Arawe pia su wallatti mangitou apan nabbisara, "Itou na'ola'a taumata wuta naasilo, anio Itou tawe naawa'ungnga tadea'u Lazarus tawe mate?"

Lazarus niapaawiakka apia

³⁸Mawu Yesus lembo natuno naung-Nge, see inaita su laŕabinganna. Laŕabinganna udde sambau loŕrangnga apan nitaapannu watu wahewa.

³⁹"Irua'a watu udde," unnu Mawu Yesus.

Marta, turrangngu taumata nate udde sinumimbakka, "Arawe Mawu, itou appate allo nilabingnga. Haŕurune mawukku'e!"

⁴⁰Mawu Yesus nabbisara si Marta, "Waŕinewe suete niwaŕo-U si'o: amungkangngu i'o mangngimanna, i'o saruŕn maasilo aroddi ahewalle taŕrino Mawu Ruata!" ⁴¹Ne imangitou nangirute n watu udde. See Mawu Yesus naningngara watukku langitta wuŕru nabbisara, "Aadiang-kamanna, Iamangnga, ana waugu i'o suete naddaringikka Sia'u. ⁴²Ia'u masingkatta i'o sidutu uararingikka Sia'u. arawe Ia'u mabbisara indi, hunane su manga taumata isindi; tadea'u imangitou mangngimanna

manungku ete I'o apan nandolo-U." ⁴³Napawe suete nabbisara aroddi, Mawu Yesus inumui ringannu tingikka ma'ikkatta, "Lazarus, sab-bangke!" ⁴⁴Ne sinumabbangke taumata apan natete udde. Lima wuṛṛu leddane ta'e papi'unannu kaengnga kafan, wuṛṛu hatine tataappannu kaengnga tataappa hati. "Wu'ate kaengnga udde; tadea'u itou wotong-nge umamatta," unnu Mawu Yesus su manga taumata isudde.

Ammuḷannu taumata lumawangnga Mawu Yesus

(Mat. 26:1-5; Mrk. 14:1-2; Luk. 22:1-2)

⁴⁵Manambo manga taumata n Yahudi nirumanta mattembo si Mariá, nangimanna Mawu Yesus su tempo imangitou naasilo arariaddianna udde. ⁴⁶Arawe manga pira su wallatti mangitou inaita ringannu taumata n Farisi wuṛṛu nangalae apa apan suete niola'u Mawu Yesus. ⁴⁷Ana waugu udde manga taumata n Farisi wuṛṛu manga imam tembonanne naammulla ringannu Mallarṛuungngu Agama. Imangitou nabbisara, "Iite ṛinone ma'ola'a apa? Taumata indi ma'ola'a anambo n alaṛṛindu'a!" ⁴⁸Amungkangngu iite sidutu mamala n Tou arendi, manambo taumata sarun mangngimanna Sitou. Wuṛṛu panginsueanne tembonannu Roma sarun rumanta wuṛṛu manggohakku Waḷe Mawu wuṛṛu anambo n walagi ite!"

⁴⁹Sangkatou su wallatti mangitou apan aranne Kayafas, imam wahewa su tonna udde, nabbisara, "Iamiu wagga n apa-apa. ⁵⁰Apa iamiu tawe maatutukka manungku ana waugu tumanangnge, mappianne sangkatou mate wuassu ala'wo'u pabbawalaga indi marṛimunsa'a?" ⁵¹Su ṛinone Kayafas nabbisara aroddi, waḷine wuassu ṛingiranne sassane. Arawe ana waugu itou sangkatou imam wahewalla tonna udde, itou namasingkatta manungku Mawu Yesus sarun mate hunane tumba'u su pabbawalagu Yahudi. ⁵²Wuṛṛu waḷine tumba'u su pabbawalagu Yahudi sassane, arawe hunane lai mangammula wuṛṛu manggemonnu manga alaṛṛana'u Mawu Ruata apan uasaliawukka.

⁵³Nanattakka allo udde manga tembonannu Yahudi na'irete mamate Mawu Yesus. ⁵⁴Ana waugu udde Mawu Yesus tate nattingkapasilo su saruannu awadaalla su pattangngannu taumata n Yahudi. Itou nanantangke n Yudea, see inaita watukku soa aranne Efraim marani wadda'a. Isudde Itou natana'a su sampunna ringannu mallalaṛṛenggen-Ne.

⁵⁵Tempo udde maranite Allo Wahewa m Paskah n Yahudi. Manambo taumata wuassu manga ampungnga inai watukku Yerusalem mallaghu m pamamaresi wadangnga tantaḷanna taambe ramea udde.

⁵⁶Imangitou maddea'a Mawu Yesus, wuṛṛu su tempo uaammulla su

Waļe Mawu, imangitou naiwaļo sangkatou ringannu waine. "Ereapa addapannu? Asinungka Itou tawe rumanta su ramea indi." ⁵⁷Imangitou nabbisara aroddi ana waugu manga imam tembonanne wuŗu manga taumata n Farisi suete namarenta manungku taumata apan masingkattu tampa Mawu Yesus, řinone mabaļo tadea'u Itou wotongnge sametanna.

Mawu Yesus niseborřannu lana mawangngi su Betania

(Mat. 26:6-13; Mrk. 14:3-9)

12 Annummu allo tantaļanna taambe Allo Wahewa m Paskah, Mawu Yesus inaite su Betania. Su soa udde uatana'a Lazarus apan suete niapawangunna wuassu papate. ²Poiaroddi Mawu Yesus sinaruanni mangitou, wuŗu Marta nangimbe. Lazarus wuŗu manga raho ua'ianna su sampunna u'anna ringannu Mawu Yesus. ³Wua udde Maria nirumanta uaapiddu irařrangngo maļoara su literře lana mawangngi narwastu apan masagada atonna aregane. Itou nanebokku lana udde su ledda Mawu Yesus, see niapu n uta'i tou. Ahewallu waļe udde nabaļi mawangngi ana waugu haļuru n lana udde. ⁴Arawe Yudas Iskariot, sangkatou su wallattu mallaļarřenggennu Mawu Yesus – apan wua udde nandaļeo Sitou – nabbisara, ⁵"Anio lana mawangngi udde tawe niwaļu'a ringannu aregane tallu řasutta roitta saļa'a, wuŗu roinne ionggolla su taumata asiangnga?" ⁶Yudas nabbisara aroddi waļine ana waugu itou tuttundaallu taumata asiangnga, arawe ana waugu itou tařa ta'o. Itou masokka manna'o roitti mangitou wuassu pangadoannu roitta apan uaraddo sitou.

⁷Arawe Mawu Yesus nabbisara, "Wala'e wawine udde! Itou na'ola'a indi huna n allo pallabingang-Ku. ⁸Taumata asiangnga sidutu su wallatti amiu, arawe Ia'u tawe."

Ammuļannu taumata lumawanna si Lazarus

⁹Manambo taumata n Yahudi naaringikka manungku Mawu Yesus poi su Betania, nariaddi imangitou inaite lai poiaroddi. Imangitou inai tawe tumba'u ana waugu Mawu Yesus. Arawe ana waugu imangitou lai maapulu ma'ellega si Lazarus apan suete niapaawiakki Tou wuassu papate. ¹⁰Ana waugu udde manga imam tembonanne maapulu lai mamate si Lazarus; ¹¹ana waugu ete itou naanambo taumata n Yahudi nanantangngi mangitou, wuŗu nangimanna Mawu Yesus.

Mawu Yesus sinumutta su Yerusalem ringannu awawantuga

(Mat. 21:1-11; Mrk. 11:1-11; Luk. 19:28-40)

¹²Su allo tiṛrabbine manga taumata apan suete nallaghu m Pas-kah, naaringikka manungku Mawu Yesus tantaḷanna u'amatta ma-tudda n Yerusalem. ¹³Ne imangitou nanappo manga rongngu pa-lem see inaita nanansomakka Sitou, lapiddu u'ui, "Paddalote Mawu Ruata! Inaḷamatanna Itou apan nirumanta ringannu arannu Mawu. Niaḷamatanna Ratu n Israel!"

¹⁴Mawu Yesus naasomba sambau keledai saṛṛe n tumuwo wuṛṛu sina'eanni Tou. Natipusse apa apan uaworṛetta sulaḷummu Wuke Susi:

¹⁵"Arie paata'utta, maṛṛuala n Sion!

Pa'ellege Ratunu nirumanta,

uasa'e sambau keledai saṛṛe n tumuwo!"

¹⁶Su tempo udde manga mallalaṛṛenggenno Mawu Yesus taambe naasunna saranganambone udde. Arawe napawe Mawu Yesus niaa-pawantuga ringannu papate-Ne, wakkute udde imangitou naanaungnga manungku apa apan niola'u manga taumata Sitou uaworṛette sulaḷummu Wuke Susi su ola'i Tou.

¹⁷Manga taumata apan uasemodda su tempo Mawu Yesus namago si Lazarus niapaasabangnga wuassu laḷabinganna wuṛṛu namangunna sitou wuassu papate, sidutu mattiala su olangnge udde. ¹⁸Ana waugu udde taumata nambo inaita ringannu Mawu Yesus ana waugu imangitou naaringikka manungku ete Itou apan na'ola'a alaṛṛindu'a udde. ¹⁹Ne manga taumata n Farisi uawawisarate sangkatou ringannu sangkatou, "Iite tawe mapa'ola'a apa-apa! Pa'ellege, anambo n laḷorṛo n runia uatantalongnga Sitou!"

Manga pira taumata n Yunani maddea'a Mawu Yesus

²⁰Su wallattu manga taumata apan inai su Yerusalem mattaṛramawu su tempo n ramea udde pia lai manga pira taumata n Yunani.

²¹Imangitou nirumanta ringanni Filipus wuṛṛu nabbisara, "Tuṛrangnga, amungkanngu wotongnge, iami maapulu maisasomba Mawu Yesus." (Filipus taumata wuassu Betsaida su Galilea.)

²²Ne Filipus inaita namasingkattu pandumanne udde si Andreas, wuṛṛu saḷimmurine itarua namasingkatte Mawu Yesus. ²³Mawu Yesus

nabbisara simangitou, "Nia'omante tempone Ana'u Taumata wanutuhanna. ²⁴Mangke atonna wisara-U indi: Amungkanngu gandumma sambatu tawe iasi'a su leta'a wuṛṛu mate, itou ta'e matatana'a sambatu. Arawe amungkanngu watu n gandumma udde mate, wakkute udde itou mabua manambo. ²⁵Taumata apan mandanngu wiakke sarun awuliannu wiakke. Arawe taumata apan maddantinnu wiakke su runia indi, sarun maapaduli wiakka tutune wuṛṛu saran maḷannu-ḷannu. ²⁶Taumata apan maapulu mangimbe Sia'u ṛinone tumantalongnga Sia'u; tadea'u mangangimbe'u wotongnge su sambau ringang-Ku su tampa Ia'u uatana'a. Taumata apan mangngimbe Sia'u sarun addatannu Iamang-Ku."

Mawu Yesus namasingkattu papate-Ne

²⁷"Naungku sussingawangnga; apa Ta'u iwisara su orassa indi? Rinonewe Ia'u mabbisara, 'Iamangnga liua'awe Ia'u wuassu orassa indi'? Arawe tadea'u Ia'u maappendamma orassu asasusa indi Ia'u nirumanta. ²⁸Iamangnga, mawantuga arannu!" Ne niaringirṛanna tingikka wuassu langitta nabbisara, "Ia'u suete namantuga Sitou, wuṛṛu Ia'u sarun mamantuga lai Sitou."

²⁹Awadaalla isudde naaringikka tingikka udde. Iamangitou nabbisara, "Udde rallu'a!" Arawe piaddu lai nabbisara, "Waḷine! Mala'ekatta uahahatto n Tou!"

³⁰See Mawu Yesus nabbisara simangitou, "Tingikka udde niaringirṛanna, waḷine hausang-Ku, arawe maola'a hausannu. ³¹Tempone nia'omante runia parikisanna; orassa indi tembonannu runia tate ipaatta. ³²Arawe Ia'u indi, amungkanngu Ia'u suete niruitta su wowo n runia, Ia'u sarun mamago anambo n taumata rumanta ringang-Ku." ³³Itou nabbisara aroddi tadea'u mapaaḷiatta'u ereapa olangnge Itou mate.

³⁴Manga taumata nambo udde nabbisara Sitou, "Tumuṛṛuttu Wuke n Tita ng kami, Ratu m Punnu Saḷamatta sarun mabbiakka sarangkaḷo'engnge. Ereapa I'o wotongnge mabbisara manungku Ana'u Taumata ṛinone iruitta su wowo n runia? Isai Ana'u Taumata udde?"

³⁵Mawu Yesus sinumimbakka, "Tumba'u tantaḷanna adio'a semakka udde su wallatti amiu. Nariaddi amatte tantaḷanna semakka udde ta'e pia, tadea'u iamiu tawe aratingannu randumma. Taumata apan u'amatta su ararandumma wagga suapa pattudanne. ³⁶Pangimante su semakka udde, tantaḷanna semakka udde ta'e ringanni amiu, tadea'u iamiu maola'a alaṛṛana'u asasemakka."

Manga taumata n Yahudi tawe mangngimanna

Napawe Mawu Yesus suete nabbisara aroddi, Itou nangingkatte wua isudde wuṛṛu maddirite mattingkapasilo m watangan-Ne simangitou. ³⁷Salaiwe manambote alaṛṛindu'a apan niola'u Mawu Yesus su saruanni mangitou, imangitou tawe lai mangngimanna Sitou. ³⁸Ne natipusse apa apan niapasingkatti Nabi Yesaya,

"Mawu, isai mangngimanna watti'i ami?

Ete sisai taṛṛino Mawu niapaaliatta'a?"

³⁹Ana waugu udde imangitou tawe mangngimanna, ana waugu Yesaya suete nabbisara apia,

"Mawu Ruata nabbisara,

⁴⁰Ia'u mapaaawuta mata mangitou,
maola'a naungngi mangitou maatikka;
tadea'u imangitou tawe maasilo,
ringiṛṛanni mangitou tawe maasunna.

Tadea'u imangitou tawe mabelengnga ringang-Ku,

see Ia'u mapaapia mangitou."

⁴¹Yesaya nabbisara aroddi ana waugu itou suete naasilo awawantugu Mawu Yesus wuṛṛu nabbatti'a su ola'i Tou.

⁴²Salaiwe aroddi, manambo taumata, ewe'e lai su wallattu tembo-nannu Yahudi lai mangngimanna Mawu Yesus. Arawe imangitou tawe waṛṛani manga'u udde ringannu uahahati, ana waugu imangitou matta'utta aṛṛengenne taumata n Farisi maningaddi mangitou sumutta su wale m pattataṛṛamawuanna. ⁴³Imangitou lembo maapulu maasomba daralo n taumata wuassu daralo Mawu Ruata.

Wisara Mawu Yesus ipamarikissa taumata

⁴⁴See Mawu Yesus inumui, "Taumata apan mangngimanna Sia'u, waḷinewe Sia'u itou mangngimanna, arawe Sitou apan nandolo-U.

⁴⁵Wuṛṛu taumata apan naasilo Sia'u, naasilo lai Sitou apan nandolo-U. ⁴⁶Ia'u nirumanta su runia indi maola'a sambau asasemakka, tadea'u anambo n taumata apan mangngimanna Sia'u tawe matana'a sulalummu ararandumma. ⁴⁷Taumata apan maddaringikka aḷara-U, arawe tawe tumuṛṛutta – waḷine Ia'u makkuumanni tou. Ana waugu Ia'u nirumanta waḷinewe mamarikissa runia indi, arawe rumanta manalamatta.

⁴⁸Taumata apan mannoḷa-U wuṛṛu maddiri maddaringikka wisara-U, piate mallarṛuungnge. Wisara apan Ta'u iapaasingkatta, eteudde sarun ipamarikissa sitou su Allo ng Kiamatta. ⁴⁹Ana waugu Ia'u tawe

mabbisara wuassu apulu-U sassane; lamangnga apan nanadolo-U, ete Itou apan namarenta Sia'u apa apan Ta'u iwisara wurru iapaasingkatta. ⁵⁰Wurru Ia'u masingkatta manungku parenta-Ne udde mangngonggolu wiakka tutune wurru saran malannu-lannu. Ne Ia'u lai namasingkatta ere lai niarra'u lamangnga Sia'u."

Mawu Yesus nangukassa ledda manga mallaarreggen-Ne

13 Allo massallo tantañanna taambe nia'omanna Allo Wahewa m Paskah, Mawu Yesus naasingkatte manungku temponete Itou manantangngu runia indi mabelengnga ringannu lamang-Nge. Itou mandangngu manga taumata apan tatahuanan-Ne su runia, wurru Itou sidutu mandangngu simangitou ma'oma n sara m panginsueanne.

²Mawu Yesus wurru manga mallaarreggen-Ne tantañanna u'anna annu rabbi. Setanna suete napaasutta m pandumanne sulañummu naunggi Yudas ana'i Simon Iskariot ipamate Mawu Yesus. ³Mawu Yesus masingkatta manungku lamangnga suete nanantillu alawo'u tarfino Sitou. Itou masingkatta lai manungku Itou nirumanta wua dingannu Mawu Ruata wurru sarun mabelengnga lai ringannu Mawu Ruata. ⁴Ana waugu udde Itou nirumarisikka, nalluatta jubah-Ne, wurru nama'issu handukka su lawan-Ne. ⁵Wua udde Itou nallañinnu ua'e sulañummu sambau pangangukasanna lima, see nanattakke nangukassa ledda manga mallaarreggen-Ne wurru niapaamara n handukka apan uawa'issa su lawan-Ne. ⁶Na'omate Itou ringanni Simon Petrus, apan nabbisara, "Mawu, ratadde Mawu nangukassa ledda'u?"

⁷Mawu Yesus sinumimbakka, "Orassa indi i'o tawe maasunna apa apan a'olaang-Ku indi, arawe salimmurine i'o sarun maasunna."

⁸"Arie Mawu," wisara m Petrus su Mawu Yesus, "Arie saran paassa Mawu nangukassa ledda'u!"

Arawe Mawu Yesus sinumimbakka, "Amungskangngu Ia'u tawe nangukassa leddanu, i'o tawe paa'aukka ringang-Ku."

⁹Simon Petrus nabbisara, "Amungskangngu aroddi, Mawu, arie tumba'u ledda'u, ewe'e lima'u wurru pua'u lai!"

¹⁰"Taumata apan suete nandeno, nawaresite sarangkanambone," wisara Mawu Yesus si Petrus. "Itou salaiwe tate waresianna; tumba'u leddane. Iamiu indi nawaresite, arawe tawe sarangkanambone." (¹¹Mawu Yesus masingkatte isai apan sarun mamate Sitou. Ana waugu udde itou nabbisara, "Iamiu indi nawaresite arawe tawe sarangkanambone.")

¹²Napawe Mawu Yesus suete nangukassa ledda mangitou, Itou nallurrete apia jubah-Ne see inuma'ianna apia. See Itou nabbisara

simangitou, "Iamiu maasunna apa apan wakkute niola-U siamiu?
¹³Iamiu mammago Sia'u huru wuɽɽu Mawu. Wuɽɽu atonna aroddi.
¹⁴Amungkangngu Ia'u Mawu wuɽɽu hurunu nangukkassa leddanu, iamiu
 ɽinone lai uaa'ukkasa ledda. ¹⁵Ia'u mangngonggolu tulada indi siamiu,
 tadea'u iamiu lai ma'ola'a apa apan suete Ta'u inola'a siamiu. ¹⁶Mangke
 atonna wisara-U indi: Sangkatou allangnga tawe magewaɽanna wua-
 ssu mawune, wuɽɽu sangkatou daroɽoɽɽanna tawe magewaɽanna wuassu
 mandarolokke. ¹⁷Amungkangngu iamiu maasingkatte n sarangkanam-
 bone indi, aɽaɽuassa siamiu apan suete na'ola'a manara udde.

¹⁸Apa apan Ta'u niwisara indi waɽinewe su ola'i amiu sarangka-
 nambone. Ia'u masingkatte isai-sai apan suete nipile. Arawe apa apan
 uawoɽɽetta sulaɽummu Wuke Susi ɽinone matipussa, eteudde 'Tau-
 mata apan u'anna su sambau ringang-Ku sarun lumawangnga Sia'u.'
¹⁹Olangnge udde Ta'u iapaasingkatte siamiu orassa indi, tantaɽanna
 taambe natipussa, tadea'u amungkangngu olangnge udde mariaddi,
 iamiu sarun mangngimanna manungku ete Ia'u apan isassago IA'U
 INDI. ²⁰Mangke atonna wisara-U indi: Isai manarimmattu taumata Ta'u
 nirolokka, mannarimma-U lai. Wuɽɽu isai mannarimma-U, itou lai ma-
 narimmatti Tou apan nandolo-U."

Mawu Yesus namasingkattu pamamate watangan-Ne

(Mat. 26:20-25; Mrk. 14:17-21; Luk. 22:21-23)

²¹Napawe Mawu Yesus suete nabbisara aroddi, naungngi Tou
 mangke natuno. See Itou nabbisara, "Mangke atonna wisara-U indi;
 sangkatou wuassu wallatti amiu sarun mamate Sia'u."

²²Manga mallaɽaɽɽenggen-Ne uaa'ellega sangkatou ringannu sang-
 katou, wuɽɽu lembo n tinumiangnga ana wangu wagga isai apan
 ipappandum-Me udde. ²³Mallaɽaɽɽenggenna apan arangnguannu Mawu
 Yesus ua'ianna su samba'a Mawu Yesus. ²⁴Simon Petrus inumeramma
 sitou, tadea'u itou maiwaɽo Mawu Yesus tanne isai apan pappandu-
 manne udde.

²⁵Ne mallaɽaɽɽenggenna udde nangundani Mawu Yesus wuɽɽu nai-
 waɽo, "Isai itou Mawu?"

²⁶Mawu Yesus sinumimbakka, "Taumata apan Ta'u ongoɽannu
 roti apan Ta'u iammo sulaɽummu mangko, ete itou taumatane." Ne
 Mawu Yesus nanganu roti sampaddi, niammo sulaɽummu mangko see
 nionggolla si Yudas ana'i Simon Iskariot. ²⁷Napawe Yudas naneng-
 kamma roti udde, Setanna sinumuttate sulaɽummu naungnge. See Mawu
 Yesus nabbisara sitou, "Ola'e paalihakka apa apan sarun olaannu."
²⁸Tawe saran sangkatou wuassi mangitou apan ua'ianna u'anna isudde

naasunna anio Mawu Yesus nabbisara aroddi si Yudas. ²⁹Piaddu mas-sunna Mawu Yesus mandolokki Yudas mamalli sarannapa apan ipaatta su andeangnga udde, ara'e mangonggolu roitta adio'a su taumata asiangnga ana waugu Yudas eteudde sangkatou mananahipunna roitti mangi-tou.

³⁰Napawe Yudas nanengkamma roti udde, itou lapiddu sinumabangnga. Allo rabbite.

Parenta apan wakku

³¹Napawe Yudas sinumabangke, Mawu Yesus nabbisara, "Ora-ssa indi Ana'u Taumata wantuhanna, wuŕŕu Mawu Ruata wantuhanna sulaŕummi Tou. ³²Amunkangngu Mawu Ruata wantuhanna sulaŕummi Tou, Itou lai sarun wantuhannu Mawu Ruata sulaŕummu wadang-Nge sassane. Ewe'e Mawu Ruata lai sarun mamantuga Sitou ringannu maŕihakka. ³³Manga alaŕŕana-U, Ia'u tate matana'a maŕannu lai ringanni amiu. Iamiu sarun maddea'a Sia'u, arawe ere suete ni-waŕo-U su manga tembonannu Yahudi, aroddi lai iwaŕo-U siamiu; su tampa patuddang-Ku, iamiu tawe maaranta isudde. ³⁴Parenta wakku apan Ta'u ionggolla siamiu: Padarangngute sangkatou ringannu waine. Ere lai Ia'u mandangngu siamiu, aroddi lai iamiu ŕinone uararangngu. ³⁵Amunkangngu iamiu uararangngu, anambo n taumata sarun maa-singkatta manungku iamiu mallaŕaŕrenggeng-Ku."

Papatta manungku Petrus sarun massinaadu Mawu Yesus

(Mat. 26:31-35; Mrk. 14:27-31; Luk. 22:31-34)

³⁶"Mawu, Mawu inai watukkuapa?" aiwaŕo n Simon Petrus su Mawu Yesus. Mawu Yesus sinumimbakka, "Su tampa tuddang-Ku, i'o tawe maatantalongnga orassa indi. I'o sarun tumantalongnga Sia'u saŕimmurine."

³⁷"Mawu, anio ia'u tawe maatantalongnga Mawu orassa indi?" aiwaŕo n Simon Petrus apia. "Ia'u maŕuassa mate ana waugu Mawu!"

³⁸Mawu Yesus sinumimbakka, "Atonna i'o maŕuassa mate ana waugu Ia'u? Paanaunge, tantaŕanna manu'a taambe inumu'u, paatallute i'o nabbisara manungku i'o wagga-U!"

Mawu Yesus laɭanna matudda n lamangnga

14 "Arie naungngu suminggawangnga," wisara Mawu Yesus simangitou. "Pangimante Mawu Ruata, wuɽɽu pangimante Sia'u lai. ²Su wale n lamang-Ku manambo tampa atatanaanna. Ia'u inai watukku tampa udde manaddia tampa ng kamiu. Ia'u tawe mabbisara aroddi siamiu amungkangngu udde tawe mariaddi. ³Napawe Ia'u suete nanaddia tampa ng kamiu, Ia'u sarun mabelengnga wuɽɽu manalofo siamiu, tadea'u suapa Ia'u isudde, isudde lai iamiu. ⁴Watukku tampa Ia'u umamatta iamiu lai masingkattu laɭanne."

⁵See Tomas nabbisara Mawu Yesus, "Mawu, iami wagga suapa Mawu inai, ereapa iami maasingkattu laɭanne?"

⁶Mawu Yesus sinumimbakka, "Ete Ia'u laɭanna ipa'illaɭa Mawu Ruata wuɽɽu see maasomba wiakka. Tawe saran sangkatou wotongnge rumanta ringannu lamangnga, amungkangngu tawe umamatta lumiu Sia'u. ⁷Unnu wisara iamiu maaillaɭa Sia'u, iamiu lai maaillaɭa lamang-Ku. Orassa indi iamiu naaillaɭate Sitou, wuɽɽu suete naasilo Sitou."

⁸Ne Filipus nabbisara Mawu Yesus, "Mawu ta'ea'a lamangnga udde siami tadea'u iami maasunnate."

⁹Arawe Mawu Yesus sinumimbakka, "Maɭannute Ia'u su sambau ringanni amiu, iamiu taambe lai naaillaɭa Sia'u, Filipus? Taumata apan naasilote Sia'u, naasilote lai lamangnga. Ereapa i'o wotongnge mabbisara, 'Ta'ea'a lamangnga siami'? ¹⁰Filipus! I'o tawe mangngimanna, manungku Ia'u su sambau ringannu lamangnga, wuɽɽu lamangnga su sambau ringang-Ku? Apa niwisara-U si'o, tawe niwisara-U wua-ssu wadang-Ku sassane. lamangnga apan sidutu su sambau ringang-Ku ete Itou apan nammanara sarangkanambone udde. ¹¹Pangimante Sia'u, manungku Ia'u su sambau ringannu lamangnga wuɽɽu lamangnga su sambau ringang-Ku. Ara'e amungkangngu tawe, pangimante, ana waugu aɭawo'u inolaang-Ku apan suete niola-U. ¹²Mangke atonna wisara-U indi; Taumata apan mangngimanna Sia'u, sarun tumuɽɽutta apa apan suete Ta'u niola'a, - ewe'e itou sarun ma'ola'a lembo n ahewaɭanne lai - ana waugu Ia'u inai ringannu lamangnga. ¹³Wuɽɽu aɭawo'u apa apan raddoronganni amiu sulaɭummu arang-Ku, udde sarun olaang-Ku lai siamiu, tadea'u lamangnga wantuhanna sulaɭummu Ana'a. ¹⁴Aɭawo'u apa apan raddoronganni amiu sulaɭummu arang-Ku, sarun olaang-Ku."

Mawu Yesus na'ire n daranta n Gharraho Mawu Ruata

¹⁵"Amunkangngu iamiu marangngu Sia'u, iamiu sarun tumurutta manga parenta-U. ¹⁶Ia'u sarun madorongnga su lamangnga, wurru Itou sarun manganggilla siamiu Mattatlungnga waine, apan sarun matana'a ringanni amiu saran malannu-lannu. ¹⁷Itou udde Gharraho Mawu Ruata apan sarun mapaaljatta'u atatujiddu Mawu Ruata. Runia maddiri n Tou, ana waugu tawe maasilo wurru tawe maailla Sitou. Arawe iamiu maailla Sitou, ana waugu Itou uatana'a su sambau ringanni amiu wurru uaukka ringanni amiu.

¹⁸Iamiu tawe itantang-Ku sassane ere asisi m palussa. Ia'u sarun mabelengnga ringanni amiu. ¹⁹Tate malannu runia maasilo Sia'u. Arawe iamiu sarun maasilo Sia'u. Wurru ana waugu Ia'u wiakka, iamiu lai sarun mabbia. ²⁰Napawe nia'omante allo udde, iamiu sarun maa-singkatta manungku Ia'u uaukka ringannu lamangnga, wurru iamiu uaukka ringang-Ku, wurru Ia'u uaukka ringanni amiu.

²¹Taumata apan tutturutta manga parenta-U wurru ma'ola'a, itou marangngu Sia'u. lamang-Ku sarun mandangngu taumata apan mandangngu Sia'u. Ia'u lai sarun mandangngu taumata udde wurru mapaaljatta'u riri-U sitou."

²²Yudas (waline Yudas Iskariot) naiwalo Mawu Yesus, "Mawu, anio Mawu mapaaljatta'u riri-Nu siami wurru tawe su runia?"

²³Mawu Yesus sinumimbakka, "Taumata apan mandangngu Sia'u, sarun tumurutta alarra-U. lamang-Ku sarun mandangngu sitou. lamang-Ku wurru Ia'u sarun rumanta ringanni tou wurru matana'a su sampunna ringanni tou. ²⁴Taumata apan tawe mandangngu Sia'u, tawe tumurutta alarra-U. Alarra'a apan niaringiranni amiu udde, waline wuassia-U, ewe'e wuassu lamangnga apan nandolo-U.

²⁵Sarangkanambone udde suete niwalo-U siamiu, tantalanna Ia'u ta'e su sambau ringanni amiu. ²⁶Arawe Gharraho Mawu Ruata, Mattatlungnga apan sarun irolokku lamangnga sulalammu arang-Ku, ete Itou apan mangarra'a siamiu su ola'u sarangkanambone wurru mapanaungnga su ola'u sarangkanambone apan suete Ta'u niapaasingkatta siamiu.

²⁷Alajuassa Ta'u itantangnga siamiu. Alaju-U sassane apan Ta'u nionggolla siamiu. Ta'u nionggolla udde waline ere nionggolu runia indi siamiu. Arie passingawangnga, arie paata'utta. ²⁸Iamiu suete naaringikka Sia'u mabbisara, 'Ia'u sarun manantangngi amiu, arawe Ia'u sarun mabelengnga apia ringanni amiu'. Amunkangngu iamiu mandangngu Sia'u, iamiu sarun lumuassa ana waugu Ia'u inai ringannu lamangnga, ana waugu lamangnga magewalanna wuassia-U. ²⁹Ia'u mamasingkattu

udde siamiu orassa indi, tantaŋanna sarangkanambone udde taambe mariaddi, tadea'u napawe mariaddite, iamiu sarun mangngimanna. ³⁰Ia'u tate mabbisara manambo lai ringanni amiu, ana waugu nia'omante tempone tembonannu runia indi rumanta. Arawe itou tawe uataŋŋino su riri-U. ³¹Arawe sarangkanambone udde sarun mariaddi tadea'u runia maa-tutukka manungku Ia'u marangngu Iamangnga wuŋŋu tuttuŋŋutta aŋawo'u apa apan nirolokku Iamangnga Sia'u.

Ne, wette iite inaite mangingkatta wua isindi."

Mawu Yesus punnu anggore apan tutune

15 Mawu Yesus nabbisara apia, "Ia'u punnu anggore apan tutune, wuŋŋu Iamang-Ku mabbawaille. ²Suapa n ranna Sia'u apan tawe mabua, pototanna, wuŋŋu ranna apan mabua, hainganna rongngane, wuŋŋu laurŋanna tadea'u lembo manambo lai wuane. ³Iamiu naŋaukke,



Solla n alu anggore (15:5)

ana waugu aŋaŋŋa'a apan Ta'u nionggolla siamiu. ⁴Paasidutua'e uaaukka ringang-Ku wuŋŋu Ia'u lai mangke sidutu ringanni amiu. Ranna sassane tawe mabua, tabene'e itou sidutu uaammullu punene. Aroddi lai iamiu tumba'u wotongnge mabua, amungkangngu sidutu su sambau ringang-Ku.

⁵Ete Ia'u punnu anggore, wuŋŋu iamiu manga rannane. Taumata apan sidutu uaaukka ringang-Ku wuŋŋu Ia'u ringanni tou, sarun mabua manambo; ana waugu amungkangngu tawe Ia'u, iamiu tawe maola'a

apa-apa. ⁶Taumata apan maddiri uaaukka ringang-Ku, sarun iramme ere ranna, ana see marrangute. Manga ranna ereudde sarun iammulla wuṛṛu iramme su putungnga, see tutunganna. ⁷Amungkanngu iamiu sidutu uaaukka ringang-Ku wuṛṛu alaṛṛa-U uatatana'a sulaḷummu naungngu, padorongke su lamangnga apa apan ipaapulunu; darorongngu udde sarun suunganna. ⁸Amungkanngu iamiu mabua manambo, lamang-Ku wantuhanna; wuṛṛu ringannu aroddi iamiu atonna-tonna maola'a mallaṛṛenggeng-Ku. ⁹Ere lai lamangnga marangngu Sia'u, aroddi lai Ia'u marangngu siamiu. Rinone iamiu sidutu mabbiakka ere taumata apan arangngu-Ku. ¹⁰Amungkanngu iamiu tuttuṛṛutta manga parenta-U, iamiu sidutu matammuda su darangngu-U ere lai sidutu matuṛṛutta su darangngu n lamangnga ana waugu tuttuṛṛutta manga parenta-Ne.

¹¹Sarangkanambone indi Ta'u iapaasingkatta siamiu, tadea'u alaḷua-U mangke pia sulaḷummu naungngu, wuṛṛu alaḷuannu maola'a masuungnga. ¹²Indite parenta-U; pandangngute sangkatou ringannu waine, ere lai Ia'u mandangngu siamiu. ¹³Taumata apan lembo mandangngu manga hawene eteudde taumata apan mangngonggolu wiakke simangitou. ¹⁴Ete iamiu manga hawe-U, amungkanngu iamiu tuttuṛṛutta apa apan ipaparenta-U siamiu. ¹⁵Ia'u tate lai mamago siamiu allangnga, ana waugu allangnga wagga apa apan tantaḷanna mammanarannu mawune. Iamiu wagoangkute hawe, ana waugu sarangkanambone apan niaringiṛrang-Ku wuassu lamangnga, suete Ta'u niapaasingkatta siamiu. ¹⁶Waḷine iamiu namile Sia'u. Ete Ia'u apan namile siamiu, wuṛṛu nandolokki amiu tadea'u mabua manambo - manga wua apan tawe maḷaḷeo. Ne lamangnga sarun mangonggolla siamiu alaḷo'u apa apan radoronganni amiu Sitou sulaḷummu arang-Ku. ¹⁷Ete indi parenta-U siamiu: Padarangngute sangkatou ringannu sangkatou."

Runia maddantinni amiu

¹⁸"Amungkanngu runia maddantinni amiu, paanaunge manungku Ia'u doronete pinaddantinnu runia. ¹⁹Amungkanngu iamiu tatahuanannu runia, iamiu sarun rangnguannu runia maola'a pussaane. Arawe Ia'u suete namile siamiu wuassu runia indi, nariaddi iamiu tate lai tatahuanannu runia. Ana waugu udde runia maddantinni amiu. ²⁰Paanaunge wisara apan suete niwaḷo-U siamiu, 'Allangnga tawe magewaḷanna wuassu mawune.' Amungkanngu imangitou suete mamate Sia'u, imangitou sarun mamate siamiu lai. Amungkanngu imangitou tuttuṛṛutta alaṛṛa-U, imangitou sarun tumuṛṛutta alaṛṛangngu lai. ²¹Sarangkanambone udde sarun olaanni mangitou siamiu, ana waugu iamiu mallaṛṛenggeng-Ku, ana waugu imangitou tawe maaillaḷa Sitou

apan nandolo-U. ²²Unnu wisara Ia'u tawe nirumanta, wuɽɽu tawe namasingkattu sarangkanambone udde simangitou, imangitou tawe dosane. Arawe orassa indi imangitou tawe mapassinaaddu rosa mangitou. ²³Taumata apan maddanting-Ku, maddantinnu Iamang-Ku. ²⁴Unnu wisara su pattangnganni mangitou Ia'u tawe na'ola'a apa apan taambe niola'u taumata waine, imangitou tawe dosane. Arawe orassa indi imangitou suete naasilo apa apan suete niola-U, wuɽɽu imangitou maddanting-Ku wuɽɽu maddantinnu Iamang-Ku lai. ²⁵Arawe aroddite ɽinone, tadea'u matipusse apa apan uawoɽɽetta sulaɽummu Wuke m Tita mangitou, eteudde: 'Imangitou maddanting-Ku tawe pinangiananne.'

²⁶Ia'u sarun mandolokku Mantataɽungnga siamiu apan darantane wuassu Iamangnga. Ete Itou Ghaɽɽaho apan sarun mapaaɽiatta'u taɽɽino Mawu Ruata. Amungkanngu Itou rumanta, Itou sarun mangonggolu tatiala su ola'u riri-U. ²⁷Wuɽɽu iamiu lai ɽinone mangonggolu tatiala su ola'u riri-U ana waugu iamiu uaukke ringang-Ku ro'e n paarorone.

16 Sarangkanambone udde Ta'u niapaasingkatta siamiu tadea'u iamiu tawe massinaadda. ²Iamiu sarun iapaasabangnga wuassu manga waɽe m pattataɽɽamawuanna. Wuɽɽu sarun a'omanna tempone manungku taumata apan mamate siamiu massunna itou massubba Mawu Ruata. ³Imangitou ma'ola'a udde siamiu ana waugu imangitou taambe naaillaɽa Iamangnga aroddi lai Sia'u. ⁴Arawe orassa indi iwaɽo-U olangnge udde siamiu, tadea'u amungkanngu udde mariaddi murine, iamiu maanaungnga manungku Ia'u suete namasingkatta siamiu."

Manara n Ghaɽɽaho Mawu Ruata

"Hatto indi tawe Ta'u niwaɽo siamiu ro'e n paarorone, ana waugu Ia'u ta'e su sampunna ringanni amiu. ⁵Arawe orassa indi Ia'u sarun inai ringanni Tou apan nandolo-U; wuɽɽu tawe saran sangkatou wuassi amiu maiwaɽo, watukkuapa Ia'u inai. ⁶Orassa indi ewe'e naungngu niatambanna asasusane, ana waugu Ia'u namasingkattu olangnge udde siamiu. ⁷Arawe Ia'u mamasingkatta atonna siamiu: Mappianne siamiu amungkanngu Ia'u inai; ana waugu amungkanngu Ia'u tawe inai, Mantataɽungnga udde tawe rumanta ringanni amiu. Arawe amungkanngu Ia'u inai, Ia'u sarun mandolokki Tou ringanni amiu. ⁸Amungkanngu Itou nirumantate, itou sarun mapaaɽiatta'a su runia atapasannu rosa, apan ɽinone, wuassu inolaanna apan atonna, wuɽɽu wuassu ɽuumannu Mawu Ruata. ⁹Itou sarun mapaaɽiatta'a manungku tawe mangngimanna Sia'u, udde lai rosa; ¹⁰manungku Ia'u atonna, ana waugu Ia'u inai ringannu Iamangnga wuɽɽu iamiu tate maasilo Sia'u lai; ¹¹wuɽɽu manungku Mawu

Ruata mannattake marꞑuumanna, ana waugu tembonannu runia indi suete niꞑuumanna.

¹²Manambo lai Ta'u iwaḷo siamiu, arawe orassa indi iamiu tawe maa-sengkamma. ¹³Arawe amungkangngu Ghaꞑꞑaho udde rumanta, eteudde itou apan napaaliatta'u atatuḷiddu Mawu Ruata iamiu sarun ehetanne iapaailaḷa anambo n taꞑꞑino. Itou tawe mabbisara wuassu riri-Ne sa-ssane arawe mamasingkattu apa apan suete niaringiꞑanne, wuꞑꞑu Itou namasingkatta siamiu apa apan sarun mariaddi su allo n saḷimmurine. ¹⁴Itou sarun mamantuga Sia'u, ana waugu apa apan suete niapaasing-katta siamiu, sinengkamma wuassia-U. ¹⁵Sarangkanambone apan tata-huanannu Iamangnga udde lai tatahuanang-Ku. Ana waugu udde Ia'u mabbisara manungku apa apan niapaasingkattu Ghaꞑꞑaho siamiu, ni-sengkamme wuassia-U."

Asasusa wuꞑꞑu aḷaḷuassa

¹⁶"Ete adio'a lai tempone, iamiu tate maasilo Sia'u, wuꞑꞑu ete adio'a lai tempone iamiu sarun maasilo Sia'u."

¹⁷Sire pira mallaḷaꞑꞑenggen nu Mawu Yesus uaiwaḷote sangkatou ringannu waine, "Apa pandumanne Itou nabbisara siite, 'Ete adio'a lai iamiu tate maasilo Sia'u, wuꞑꞑu ete adio'a lai iamiu sarun maasilo Sia'u'? Apa lai pandummu wisara-Ne: 'Ia'u inai ringannu Iamangnga'?"

¹⁸Imangitou sidutu uaiwaḷo, "Apa atappasanne, 'ete adio'a tempone'? Iite tawedu maasunna Itou mabbisara su ola'u apa!"

¹⁹Mawu Yesus masingkatta manungku imangitou maapulu maiwaḷo Sitou. Ne Itou nabbisara, "Tanginna suete niwaḷo-U, 'Ete adio'a tempone iamiu tate maasilo Sia'u, wuꞑꞑu ete adio'a tempone iamiu sarun maasilo Sia'u'. Eteudde apan naola'a pattatiakka su wallatti amiu?"

²⁰Pangimante, iamiu sarun lumuai wuꞑꞑu sumangitta, arawe runia sarun lumuassa. Naungngi amiu sarun masusa, arawe asasusanu udde sarun mawaḷu maola'a aḷaḷuassa. ²¹Amungkangngu sangkatou wawine maranite n mangunsiwe, itou massusa, ana waugu temponete itou matataꝼrangnga. Arawe aroddi anangnge niasungkangnga, wawine udde naabuḷite n asasusane ana waugu lulluassa manungku sangkatou ana'a niasungkangke su runia. ²²Aroddi lai iamiu; Orassa indi naungngi amiu massusa, arawe Ia'u sarun maisasomba apia ringanni amiu, ne naungngi amiu sarun lumuassa; wuꞑꞑu tawedu sangkatou maapanganu aḷaḷuassa udde wuassu laḷummu naungngi amiu.

²³Su allo udde, iamiu tate maiwaḷo manga apa Sia'u. Pangimante: Aḷawo'u apa apan raddoronganni amiu su Iamangnga sulaḷummu arang-Ku, udde sarun ionggolu Iamangnga siamiu. ²⁴Na'oma n sara orassa

indi iamiu taambe nadorongnga manga apa sulaŋummu arang-Ku. Pa-dorongke, ne iamiu sarun manengkamma, tadea'u aŋaŋuannu udde ma-suungnga."

Auntunganna su wowo n runia

²⁵"Sarangkanambone indi Ta'u iwaŋo siamiu ringannu sasumandingnga. Arawe sarun a'omanna tempone, Ia'u tate mappaattu sasumandingnga lai, arawe mabbisara uahahati siamiu su ola'u Iamangnga. ²⁶Su tempo udde iamiu sarun madorongnga su Iamangnga sulaŋummu arang-Ku; Paanaungete, Ia'u tawe madorongnga wuassu Iamangnga ionggolla siamiu, ²⁷ana waugu Iamangnga sassane marangngu siamiu. Itou marangngu siamiu ana waugu iamiu marangngu Sia'u, wuŋŋu mangngimanna manungku Ia'u nirumanta wuassu Mawu Ruata. ²⁸Atonna Ia'u nirumanta wua dingannu Iamangnga, wuŋŋu suete nirumanta sulaŋummu runia. Arawe orassa indi Ia'u manantangke n runia inai mabelengnga ringannu Iamangnga."

²⁹See manga mallaŋarŋenggennu Mawu Yesus nabbisara Sitou, "Orassa indi Mawu mabbisara uahahati wuŋŋu tawe mappaattu sasumandingnga, ³⁰wuŋŋu iami masingkatta manungku Mawu masingkattu sarangkanambone. Ipa'ura lai taumata maiwaŋo manga apa su Mawu. Ana waugu udde iami mangngimanna Mawu nirumanta wua dingannu Mawu Ruata."

³¹Mawu Yesus sinumimbakka simangitou, "Nariaddi orassa indi iamiu mangngimanna? ³²Paanaunge! Tempone sarun rumanta, ewe'e nia'omante, iamiu sarun massaŋiawukka. Iamiu sarun mapuŋe su waŋe n sangkatou-sangkatou wuŋŋu manantang-Ku sassane. Arawe Ia'u tawe sassane ana waugu Iamangnga udde ringang-Ku. ³³Sarangkanambone indi iwabaŋo-U siamiu, tadea'u iamiu maasomba aŋaŋuassa ana waugu su sampunna ringang-Ku. Su runia iamiu sarun matataŋrangnga. Arawe siddutu'a naungngu! Ia'u suete napaarugi n runia!"

Mawu Yesus inumaŋiomannu manga mallaŋarŋenggen-Ne

17 Wua nabbisara aroddi, Mawu Yesus naningngara langitta wuŋŋu nabbisara, "Iamangnga, orassa indi nia'omante tempone. Wantuhete Anangngu, tadea'u Anangngu lai mamantuga Iamangnga. ²Iamangnga suete nangonggolu taŋŋino su Ana'a ipamarenta anambo n taumata, tadea'u Itou mangonggolu wiakka tutune wuŋŋu saran maŋannu-

lanu su anambo n taumata apan nionggolu Iamangnga Sitou. ³Ete indi wiakka tutune wuŕŕu maŕlanu-lanu; tadea'u taumata maaillaŕa Iamangnga, eteudde Mawu Ruata tinggassa apan atonna, wuŕŕu maaillaŕa si Yesus Kristus apan nirolokku Iamangnga. ⁴Ia'u suete namantuga Iamangnga su wowo n runia indi ringannu nanginsue manara apan nirolokku Iamangnga Sia'u. ⁵Iamangnga! Wantuhete Ia'u orassa indi ringannu Iamangnga, ringannu awawantuga apan tatahuanang-Ku sua-dio'a ringannu Iamangnga ro'e n runia indi taambe nariaddi.

⁶Ia'u suete namasingkattu Iamangnga su mnga taumata su runia indi apan suete nionggolu Iamangnga Sia'u. Imangitou udde pussa'a n Iamangnga, wuŕŕu Iamangnga suete nangonggolli mangitou Sia'u. Imangitou suete tinumuŕŕutta wisara n Iamangnga. ⁷Orassa indi imangitou masingkatte manungku sarangkanambone apan nionggolu Iamangnga Sia'u darantane wuassu Iamangnga. ⁸Suete Ta'u niapaasingkatta simangitou wisara n Iamangnga apan nionggolu Iamangnga Sia'u; wuŕŕu suete nisengkammi mangitou. Imangitou masingkatta manungku Ia'u atonna-tonna nirumanta wuassu Iamangnga wuŕŕu imangitou lai mangngimanna manungku ete Iamangnga apan nandolo-U.

⁹Ia'u inumaliomanni mangitou. Ia'u tawe inumaliomannu runia ewe'e inumaliomannu mnga taumata apan suete nionggolu Iamangnga Sia'u, ana waugu imangitou pussa'a n Iamangnga. ¹⁰Anambo n pussaa-U lai pussa'a n Iamangnga; wuŕŕu anambo n pussa'a n Iamangnga udde lai pussa'a-U. Ia'u niwantuhanna su wallatti mangitou. ¹¹Orassa indi Ia'u nirumanta ringannu Iamangnga. Ia'u tate lai matana'a su runia; arawe imangitou su runia. Iamangnga apan naukkassa! Lu'arete imangitou ringannu taŕŕino n arannu Iamangnga, eteudde aranna apan suete nionggolu Iamangnga Sia'u – tadea'u imangitou maola'a sambau; ere Iamangnga wuŕŕu Ia'u sambau. ¹²Su tempo Ia'u ta'e su sambau ringanni mangitou, Ia'u suete nallu'adda simangitou ringannu taŕŕino n arannu Iamangnga – aranna apan suete nionggolu Iamangnga Sia'u. Ia'u suete nallu'adda simangitou, wuŕŕu tawe saran sangkatou wuassi mangitou nawuli; tumba'u itou apan ŕinone sarun mawuli; tadea'u ringannu aroddi matipusse apa apan uawoŕŕetta sulalummu Wuke Susi. ¹³Orassa indi Ia'u rumanta ringannu Iamangnga. Sarangkanambone indi iwaŕo'u tantaŕanna Ia'u ta'e su runia; tadea'u imangitou ringannu nasuungnga mamendamma alaŕuassa wuassia-U. ¹⁴Ia'u suete namasingkattu wisara n Iamangnga simangitou, wuŕŕu runia maddantinni mangitou, ana waugu imangitou waŕine pussa'a n runia, ere Ia'u lai waŕine tatahuanannu runia. ¹⁵Ia'u tawe madorongnga tadea'u Iamangnga mangaŕappa simangitou wuassu runia indi, arawe Ia'u madorongnga tadea'u iamangnga mallu'adda simangitou wuassi Raŕeo. ¹⁶Ere lai Ia'u waŕine pussa'a n runia, imangitou lai waŕine pussa'a n runia. ¹⁷Olaawe imangitou pussa'a

n Iamangnga sassane sulaŕummu atatulaidda; wisara n Iamangnga ete-udde atatulaidda. ¹⁸Ere lai Iamangnga suete nandolo-U su runia, aroddi lai Ia'u mandolokki mangitou watukku runia. ¹⁹Su hausanni mangitou, Ia'u nanantillu riri-U maola'a pussa'a n Iamangnga sassane, tadea'u imangitou lai maola'a pussa'a n Iamangnga sassane sulaŕummu atatulaidda.

²⁰Waline tumba'u imangitou sassane Ia'u u'aljomanna. Ia'u lai u'aljomannu manga taumata apan mangngimanna Sia'u sulaŕummu tatiala n mangitou indi. ²¹Ia'u sumaŕande, Iamangnga, tadea'u imangitou sarangkanambone maola'a sambau, ere lai Iamangnga sambau ringang-Ku, wuŕru Ia'u ringannu Iamangnga. Saŕandeanna imangitou maola'a sambau ringanni Ite, tadea'u runia mangngimanna manungku ete Iamangnga apan nandolo-U. ²²Ia'u suete nangonggolu awawantuga simangitou apan nionggolu Iamangnga Sia'u, tadea'u imangitou maola'a sambau ere iite lai sambau; ²³Ia'u ringanni mangitou, wuŕru Iamangnga ringang-Ku; tadea'u imangitou atonna-tonna sambau. Ne runia indi sarun maasingkatta manungku ete Iamangnga apan nandolo-U, wuŕru manungku Iamangnga mandangngu simangitou ere lai Iamangnga mandangngu Sia'u.

²⁴Iamangnga, Ia'u maapulu tadea'u imangitou, apan nionggolu Iamangnga Sia'u, mangke su sambau su tampa atatanaa'ang-Ku, tadea'u imangitou maasilo awawantu-U; eteudde awawantuga apan nionggolu Iamangnga Sia'u, ana waugu Iamangnga marangngu Sia'u ro'e n runia taambe niriaddi. ²⁵Iamangnga apan matulaidda! Runia tawe maailaŕa Iamangnga, arawe Ia'u maailaŕa Iamangnga; wuŕru manga taumata indi masingkatta manungku ete Iamangnga, apan nandolo-U. ²⁶Ia'u suete napaalatta'u arannu Iamangnga simangitou; wuŕru Ia'u sidutu sarun ma'ola'a aroddi, tadea'u darangngu n Iamangnga Sia'u sidutu sulaŕummu naungngi mangitou, wuŕru Ia'u mangke sambau ringanni mangitou."

Mawu Yesus sinametta

(Mat. 26:47-56; Mrk. 14:43-50; Luk. 22:47-53)

18 Napawe Mawu Yesus suete n inumaŕjomanna aroddi, Itou wuŕru manga mallalaŕrenggen-Ne inaita su samba'a n Saŕukku Kidron. Isudde pia sambau wailla, ne Mawu Yesus wuŕru manga mallalaŕrenggen-Ne sinumuttate su wailla udde. ²Yudas mandalaŕaŕeo udde, masingkattu tampa udde; ana waugu Mawu Yesus masokkate maam-mulu manga mallalaŕrenggen-Ne isudde. ³Ne Yudas inaita su tampa udde wuŕru uaapiddu sangkawiliŕanna tantara n Romawi wuŕru manga pira mandariaga Waŕe Mawu apan nirolokku manga imam tembonanne

wuṛṛu manga taumata n Farisi. Imangitou uaapiddu ahidda, lentera wuṛṛu auttutta. ⁴Mawu Yesus masingkattu sarangkanambone apan sarun mariaddi su watangan-Ne. Ne Itou nangundanite manga taumata udde wuṛṛu naiwaḷo, "Iamiu maddea'a sisai?"

⁵"Mawu Yesus, taumata Nazaret," sasimbakki mangitou.

"Ete Ia'u indi," sasimbakku Mawu Yesus.

Yudas mamamate udde uarisikka isudde ringanni mangitou. ⁶Su tempo Mawu Yesus nabbisara simangitou, "Ete Ia'u indi," imangitou sarangkanambone sinumorṛota see naṛṛa'a su leta'a. ⁷Paassa lai Mawu Yesus naiwaḷo simangitou, "Iamiu maddea'a sisai?"

"Mawu Yesus taumata Nazaret," sasimbakki mangitou.

⁸"Suede niwaḷo-U ete Ia'u indi," unnu Mawu Yesus. "Wuṛṛu amung-kanggu atonna Ia'u radeaanni amiu, wala'e imangitou waine indi inai." (⁹Ringannu nabbisara aroddi, natipusse apa apan suede niwisara Mawu Yesus paarorone: "Iamangnga, wuassu manga taumata apan nionggolu Iamangnga Sia'u, tawe saran sangkatou apan mawuli.")

¹⁰Simon Petrus apan uaapiddu haḷele sammata, sinawutta see namuulla allanggu imam wahewa na'oma n sara naṛṛassatta taḷingane aik-katanna. Arannu allangnga udde Malkus. ¹¹Ne Mawu Yesus nabbisara si Petrus, "Sutta'a apia haḷelenu su romane! Apa i'o maṛṛingidda Ia'u tawe maainumma ua'e n asasusa apan nionggolu Iamangnga Sia'u?"

Mawu Yesus niapidda sinumaruanna si Hanas

¹²See manga tantara n Romawi wuṛṛu piaṛrangnge see manga mandariaga n Yahudi nanametta wuṛṛu naṛṛapussa Mawu Yesus. ¹³Paarorone imangitou nangapiddu Mawu Yesus ringanni Hanas, la'iananni Kayafas. Kayafas eteudde sangkatou imam wahewa su tonna udde. ¹⁴Wuṛṛu ete itou apan nanantiro manga tembonannu Yahudi, manungku mappianne sangkatou mate hunane su anambo n pabbawalaga.

Petrus nassinaaddu Mawu Yesus

(*Mat. 26:69-70; Mrk. 14:66-68; Luk. 22:55-57*)

¹⁵Simon Petrus wuṛṛu sangkatou mallaḷaṛṛenggenna waine tinumantalongnga Mawu Yesus. Mallaḷaṛṛenggenna waine indi asiingkatannu imam wahewa; nariaddi itou sinumutta su sambau ringannu Mawu Yesus su rallakku waḷe n imam wahewa, ¹⁶arawe Petrus uaraṛṛaddo su liudde, su ngara. Wua udde mallaḷaṛṛenggenna apan waine udde

sinumabangnga wuṛṛu nagahatto mangangimbe wawine apan uariaga ngara, see nangapiddi Petrus sinumutta sulalumme. ¹⁷Mangangimbe wawine apan uariaga ngara udde nabbisara si Petrus, "Ei, waḷinewe i'o lai sangkatou wuassu wallattu mallalaṛṛenggenṇu taumata udde?"

"Waḷine," sasimbakki Petrus.

¹⁸Orassa udde runia masunge, nariaddi manga mangangimbe wuṛṛu manga mandariaga suete naṛṛunuttu putungnga wuassu waṛṛa see imangitou manningikke isudde. Petrus inai lai poiारoddi wuṛṛu nirumarisikka manningikke su sambau ringanni mangitou.

Imam wahewa naiwaḷo Mawu Yesus

(Mat. 26:59-66; Mrk. 14:55-64; Luk. 22:66-71)

¹⁹Imam wahewa naiwaḷo Mawu Yesus su ola'u manga malalaṛṛenggen-Ne wuṛṛu su ola'u alaṛṛang-Nge. ²⁰Mawu Yesus sinumimbakka, "Ia'u sidutu mabbisara ringannu uahahati su saruannu awadaalla. Ia'u sidutu mangngaṛṛa'a su manga waḷe m pattataṛṛamawuanna wuṛṛu su Waḷe Mawu Ruata, su tampa n taumata n Yahudi wiasane maam-mula. Taambe saran paassa Ia'u mabbisara ringannu itattullampingnga. ²¹Nariaddi anio ituangnga maiwaḷo Sia'u? Paiwaḷote simangitou apan suete naaringikka Sia'u mangngaṛṛa'a. Imangitou masingkatte apa apan niwisara-U."

²²Napawe Mawu Yesus suete nabbisara aroddi, sangkatou su wallattu mandariaga isudde namero Sitou wuṛṛu nabbisara, "Waṛṛani atonna I'o mabbisara aroddi su imam wahewa!"

²³Mawu Yesus sinumimbakka, "Amungkangngu Ia'u mabatti'u wisara nassaḷa, waḷoa'e isindi suapa saḷane! Arawe amungkangngu niwisara-U udde atonna, anio i'o namero Sia'u?"

²⁴Wua udde Hanas nandolokku taumata nangapiddu Mawu Yesus ringannu ṛaṛṛapusanna watukku Imam Wahewa Kayafas.

Petrus nassinaaddu Mawu Yesus apia

(Mat. 26:71-75; Mrk. 14:69-72; Luk. 22:58-62)

²⁵Simon Petrus ta'e lai uarisikka manningikka isudde. Manga tau-mata nabbisara sitou, "Waḷinewe i'o lai mallalaṛṛenggenṇu taumata udde?" Arawe Petrus nassinaadda, unni tou, "Waḷine!"

²⁶Sangkatou allangngu imam wahewa, eteudde walahannu taumata taḷingane niponggo'i Petrus, nabbisara, "Waḷinewe ia'u naasilo si'o su wailla udde suadio'a ringanni Tou?"

²⁷See Petrus nassinaadde apia, "Tawe" – wuṛṛu naṛṛino su orassa udde lai manu'a niumu'u.

Mawu Yesus sinumaruanna si Pilatus

(Mat. 27:1-2, 11-14; Mrk. 15:1-5; Luk. 23:1-5)

²⁸Ruaallo maṛṛangapa imangitou nangapiddu Mawu Yesus wuassu waḷe n Kayafas watukku waḷe n gubernure. Manga taumata n Yahudi sassane tawe sinumutta sulaḷummu waḷe n araratuanna, tadea'u imangitou tawe mabbali marosa su ola'u agama, ana waugu imangitou lai umanna umante annu Paskah. ²⁹Ana waugu udde Pilatus sinumabangnga ringanni mangitou wuṛṛu naiwaḷo, "Apa alaenu su ola'u taumata indi?"

³⁰Imangitou sinumimbakka, "Unnu wisara Itou tawe saḷane, iami tawe nangapiddi Tou ringannu Iamangnga Gubernure."

³¹Pilatus nabbisara simangitou, "Apira'e Itou wuṛṛu parikisete Itou tumuṛṛuttu titanu sassane!"

Arawe manga taumata n Yahudi udde sinumimbakka, "Iami tawe maṛṛuumannu taumata ma'oma n sara mate." (³²Indi mariaddi tadea'u matipusse apa apan niapaasingkattu Mawu Yesus su ola'u Itou sarun mate.)

³³Pilatus sinumutta apia su waḷene see namaggo Mawu Yesus wuṛṛu naiwaḷo, "Atonna I'o ratu n taumata n Yahudi?"

³⁴Mawu Yesus sinumimbakka, "Apa aiwaḷo indi wuassi'o sassane ara'e pia taumata waine apan suete namasingkatta si'o su ola'u riri-U?"

³⁵Pilatus sinumimbakka, "Antimannu ia'u indi taumata n Yahudi? Apan nanantillu riri-Nu sia'u udde pabbawalagu sassane wuṛṛu manga imam tembonanne. Apa apan suete niolangngu?"

³⁶Mawu Yesus nabbisara, "Araratuang-Ku waḷine wuassu runia indi. Unnu wisara araratuang-Ku wuassu runia indi, manga taumata-U sarun mando'appa, tadea'u Ia'u tawe itantilla su manga tembonannu Yahudi. Arawe atonna araratuang-Ku waḷine wuassu runia indi!"

³⁷Ne Pilatus naiwaḷo Sitou, "Amungkangngu aroddi, I'o indi ratu?"

Mawu Yesus sinumimbakka, "I'o nabaḷo manungku Ia'u indi ratu. Ia'u niasungkangnga wuṛṛu nirumanta su runia indi ringannu sambau pandumma, eteudde mangonggolu tatiala su ola'u atatuliidda. Taumata apan wuassu atatuliidda udde maddaringikka Sia'u."

³⁸Pilatus naiwaḷo Sitou, "Apa atappasannu atatuliidda?"

Mawu Yesus iṛṛuumanna pateanna

(Mat. 27:15-31; Mrk. 15:6-20; Luk. 23:13-25)

See Pilatus sinumabangnga apia wuassu waḷe n araratuanna wuṛṛu nabbisara su manga taumata n Yahudi, "Ia'u tawe naasomba saran sambau pasasaḷa n taumata indi. ³⁹Arawe tumuṛṛuttu inanaramannu, ia'u wiasane mammallossu sangkatou taumata n ṛuumanna su Allo Wahewa m Paskah. Iamiu maapulu tadea'u ia'u mamallossu ratu n taumata n Yahudi siamiu?"

⁴⁰Imangitou sinumimbakka ringannu u'ui, "Tawe, arie Itou, ewe'e Barabas!" (Barabas udde, sangkatou taṛṛa rampassa.)

19 Wua udde Pilatus sinumutta see nandolokku taumata nangge-sekka Mawu Yesus. ²Manga tantara na'ola'a sambau araposa wuassu manga ranna ng kalu ṛoaanna, see niluṛṛe su pua Mawu Yesus. Wua udde Itou nilluṛṛeanni mangitou jubah ungu, ³see masokka-sokka



Manga tantara n Roma (19:2)

rumanta ringanni Tou wuṛṛu mabbisara, "Nabbiakke ratu n taumata n Yahudi!" Wua udde imangitou namero Sitou.

⁴Wua udde Pilatus sinumabangnga apia wuṛṛu nabbisara su taumata nambo udde, "Pa'ellega! Ia'u mangapiddi Tou su liudde ringanni amiu, tadea'u iamiu maasingkatta manungku ia'u tawe naasomba pasasaḷa saran sambau Sitou." ⁵Ne Mawu Yesus sinumabbangnga ringannu ualṛṛe n araposa pia ṛoangnge wuṛṛu jubah willossa. Pilatus nabbisara simangitou, "Pa'ellege taumata udde."

⁶Napawe manga imam temboanne wuṛṛu manga mandariaga udde naasilo Mawu Yesus, imangitou u'ui, "Arussa'a Itou! Arussa'a Itou!"

Pilatus nabbisara simangitou, "Apira'e Itou, wuṛṛu arussa'e ng kami sassane, ia'u tawe naasomba saran sambau pasasala-Ne."

⁷Manga taumata n Yahudi udde sinumimbakka, "Tumuruttu tita ng kami, Itou ṛinone pateanna ana waugu Itou mangnga'u watangan-Ne Ana'u Mawu Ruata."

⁸Napawe Pilatus naaringikka simangitou mabbisara aroddi, itou lembo nata'utta lai. ⁹Ne itou nabelengnga sinumutta sulaḷummu wale n araratuanna wuṛṛu napawe Mawu Yesus niapidde sulaḷumme, Pilatus naiwaḷo Sitou, "I'o indi daranta-Nu wuassupa?"

Arawe Mawu Yesus tawe sinumimbakka. ¹⁰Ne, Pilatus nabbisara apia, "I'o maddiri maggahato'u? Ana see I'o masingkatta, ia'u pia taṛṛino mamallosu riri-Nu, wuṛṛu taṛṛino mangarussa-Nu!"

¹¹Mawu Yesus sinumimbakka, "Amungkangngu Mawu Ruata tawe mangonggolu taṛṛino udde si'o, i'o atonna-tonna tawe taṛṛino su riri-U. Ana waugu udde taumata apan nanantillu riri-U si'o, magewaḷanna rosane wuassu rosanu."

¹²Napawe Pilatus naaringikka udde, itou mangke maddea'a laḷanne mamallossu Mawu Yesus. Arawe manga taumata n Yahudi mangke u'ui, "Amungkangngu ituangnga mamallosi Tou, ituangnga waḷine hawe ng Kaisar! Taumata apan mangnga'u ririne ratu, ete itou seetti Kaisar!"

¹³Napawe Pilatus naaringikka manga wisara udde, itou nangapiddu Mawu Yesus su liudde see inuma'ianna su addera m pamarikisanna su tampa aranne Wawilanne Watu. (Sulaḷummu wisara n Ibrani aranne Gabata.)

¹⁴Tempo udde maranite m puulla mapuḷo dua allattune, taambe Allo Wahewa m Paskah. Pilatus nabbisara su manga taumata udde, "Indi ratunu!"

¹⁵Imangitou mangke pasi ui, "Patete Itou; Patete Itou! Arussa'a Itou!"

Pilatus naiwaḷo, "Apa ṛinone ia'u mangarussa n ratunu?"

Manga imam tembonanne sinumimbakka, "Tumba'u Kaisar sassane ratu ng kami!" ¹⁶Ne Pilatus nanantillu Mawu Yesus simangitou niapaa-russa. Imangitou nangehetta Mawu Yesus, see niapididi mangitou inai wua isudde.

Mawu Yesus niarussa

(Mat. 27:32-44; Mrk. 15:21-32; Luk. 23:26-43)

¹⁷Mawu Yesus sinumabangnga uapasanna alu arussane sassane wutukku tampa apan aranne "Tampa n Tanggilaḷa". (Sulaḷummu wisara n

Ibrani isassago Golgota.) ¹⁸Poiaroddi Itou niarussa. Su sambau ringanni Tou pia lai rua ng katou taumata waine apan uaarussa; sangkatou su samba'a airri, sangkatou su samba'a uananna wuɽu Mawu Yesus su tangngane. ¹⁹Su alu arussa Mawu Yesus, Pilatus napa'ele n woɽetta indi: "Yesus wuassu Nazaret, Ratu n Taumata n Yahudi." ²⁰Manambo taumata n Yahudi naawasa n woɽetta udde, ana waugu su tampa Mawu Yesus niarussa udde tawe marau wuassu soa. Woɽetta udde niwoɽetta sulaɽummu wisara n Ibrani, Latin wuɽu Yunani. ²¹Manga imam tembonanne nabbisara si Pilatus, "Arie pabboɽetta'a Ratu n Taumata n Yahudi, ewe'e woɽetta'a, 'Taumata indi nabbisara, Ia'u Ratu n Taumata n Yahudi.'"

²²Arawe Pilatus sinumimbakka, "Apa ta'u niwoɽetta, udde aroddite."

²³Napawe manga tantara udde nangarussate n Mawu Yesus, imangitou nanganute laung-Nge. Laubba udde nitahia appatta: sambau-sambau naasomba sambageanganna. Imangitou lai nanganu jubah-Ne. Jubah udde tawe tatabingnge – niradu'a wua dosone sara wowane. ²⁴Manga tantara udde nabbisara sangkatou ringannu waine, "Arie iite mamonggo'a jubah indi, wette iite masasi'atta asinginne isai wotongnge maabba'a." Hatto udde mariaddi tadea'u natipusse apa apan uawoɽetta sulaɽummu Wuke Susi, eteudde:

"Imangitou mattahia lau-U,
wuɽu nasasi'attu jubah-U."

Wuɽu atonna manga tantara udde na'ola'a aroddi.

²⁵Marani n arussa Mawu Yesus uarisikka inangngu Mawu Yesus, wuɽu turaangngu inangnge-Ne wawine, Maria awingngi Klopas, wuɽu Maria Magdalena. ²⁶Napawe Mawu Yesus naasilo inangnge-Ne wuɽu mallalaɽrenggenna apan arangnguan-Ne uarisikka isudde, Itou nabbisara inang-Nge, "Inangnga, udde ana'i Inangnga."

²⁷Wua udde Mawu Yesus nabbisara su mallalaɽrenggen-Ne udde, "Udde inangngu." Nanattakka orassa udde mallalaɽrenggenna nanengkampe inangngu Mawu Yesus matana'a su walene.

Apapate Mawu Yesus

(Mat. 27:45-56; Mrk. 15:33-41; Luk. 23:44-49)

²⁸Mawu Yesus masingkatta manungku orassa udde sarangkanam-bone natipusse, wuɽu tadea'u apa apan uawoɽetta sulaɽummu Wuke Susi wotongnete mariaddi, Itou nabbisara, "Ia'u marou."

²⁹Isudde pia sambau mangko napene ng kua'e anggore mapakadda. Ne sambau wunga n sahatta niammo sulaɽummu ua'e n anggore udde, wuɽu nitukka su sandanna hisop, see nitogokka su moɽongngu Mawu

Yesus. ³⁰Mawu Yesus naattemma ua'e n anggore udde see nabbisara, "Nia'omante!"

See nałapute pua-Ne wuřru natete.

Mawu Yesus niusu'a

³¹Manga tembonannu Yahudi maddiri winalunannu manga taumata apan niarussa udde mangke ua'ele su alu arussa su allo n Sabatta, lem-bonete Sabatta paassa indi Allo Wahewa apan apianne. Ana waugu allo Mawu Yesus niarussa nariino massallo taambe allo n Sabatta, manga taumata n Yahudi nadorongnga si Pilatus mamadi ledda manga taumata apan suete niarussa wuřru manossokku manga winalunanna udde wuassu alu arussa. ³²Ne manga tantara udde inaita wuřru namadite rorone ledda n taumata darua apan niarussa su sambau ringannu Mawu Yesus. ³³Napawe imangitou na'omate ringannu Mawu Yesus, imangitou naasilo Itou natete. Imangitou tate nariaddi namadi ledda-Ne. ³⁴Arawe sandirannu Mawu Yesus niusu'u sangkatou tantara ringannu sambeangnga; wuřru tawe nałannu sinumabangke rařra wuřru ua'e.

³⁵Taumata apan naasilo sassane arariaddianna udde, ete itou apan namasingkattu olangnge udde, tadea'u iamiu lai mangngimanna. Wuřru tatialane udde atonna, wuřru Itou masingkatta manungku olangnge udde atonna. ³⁶Olangnge udde mariaddi tadea'u apa apan uaworřetta sulałummu Wuke Susi, eteudde, "Tawe saran sambau wuassu duřri-Ne paddianna." ³⁷Sulałummu Wuke Susi uaworřetta lai: "Imangitou sarun ma'ellega Sitou apan suete niusu'i mangitou."

Mawu Yesus nilabingnga

(*Mat. 27:57-61; Mrk. 15:42-47; Luk. 23:50-56*)

³⁸Wua udde Yusuf wuassu Arimatea nadorongnga si Pilatus, mangelappa winalunannu Mawu Yesus. (Yusuf eteudde mallałarřenggennu Mawu Yesus, arawe ringannu małannaba, ana waugu itou matta'uttu manga tembonannu Yahudi.) Pilatus namalate n tou, wua udde itou inaita nangelappa winalunannu Mawu Yesus. ³⁹Nikodemus apan paarorone suete nirumanta ringannu Mawu Yesus su tempo řabbi, inai lai suadio'a ringanni Yusuf. Nikodemus uaapiddu undamma mur wuřru gaharu - sarangkanambone irarřangngo tallu m puło kilo gramma - anambone. ⁴⁰Itarua nanosokku winalunannu Mawu Yesus, see nipi'unnu kaengnga kafan su sambau ringannu udamma mawangngi udde tumuřruttu addattu pallałabingngu taumata n Yahudi. ⁴¹Su tampa Mawu Yesus niarussa pia sambau wailla. Su wailla udde pia sambau lałabinganna wakku, apan taambe nipaatta pallabingannu tau-

mata. ⁴²Ana waugu laḷabinganna udde marani, wuṛṛu allo n Sabatta maranite manattakka, Mawu Yesus nilabingngi mangitou su wailla udde.

Laḷabinganna tawe loṛṛone

(*Mat. 28:1-8; Mrk. 16:1-8; Luk. 24:1-12*)

20 Su allo Misa ruaallo, su tempo ta'e marandumma, Maria Magdalena inaita watukku laḷabinganna. Itou naasilo watu laṛṛapingnge na'irute wuassu loṛṛangngu laḷabinganna udde. ²Ne itou tinumaḷangnga nadea'a si Simon Petrus wuṛṛu mallaḷaṛṛenggenna apan arangnguannu Mawu Yesus, wuṛṛu nabbisara simangitou, "Mawu suete niaḷappa wuassu laḷabinganna, wuṛṛu ia'u wagga suapa Itou niapaḷallowanga."

³See Petrus wuṛṛu mallaḷaṛṛenggenna waine udde inaita watukku laḷabinganna. ⁴Itarua tuttaḷangnga, arawe mallaḷaṛṛenggenna waine udde mallihaṛṛanna wuassi Petrus, wuṛṛu itou na'oma rorone su laḷabinganna. ⁵Itou nallinge sulaḷummu laḷabinganna wuṛṛu naasilo kaengnga kafan uaraddo isudde, arawe itou tawe sinumutta. ⁶Simon Petrus uatanturutta wuassu liudde, lapiddu sinumutta sulaḷummu laḷabinganna udde. Itou naasilo kaengnga kafan uaraddo isudde, ⁷arawe kaengnga apan uawa'issa pua Mawu Yesus tawe gaddi'a maranine arawe lalulunanna paṛṛalane. ⁸Wua udde mallaḷaṛṛenggenna apan na'oma paarorone su laḷabinganna, sinumuttate lai. Itou na'ellegga wuṛṛu nangimante. (⁹Na'oma n sara orassa udde imangitou taambe naasunna apa apan uaworretta sulaḷummu Wuke Susi manungku Itou ṛinone mabangunna wuassu papate.) ¹⁰Wua udde manga mallaḷaṛṛenggennu Mawu Yesus napuḷete.

Mawu Yesus naipasilo n batangan-Ne si Maria Magdalena

(*Mat. 28:9-10; Mrk. 16:9-11*)

¹¹Maria Magdalena uarisikka su saruannu laḷabinganna lapiddu lulluai. Tantaḷanna lulluai itou ua'ellega laḷummu laḷabinganna, ¹²see itou naasilo rua ng katou mala'ekatta uapedettu mawira. Imangitou udde ua'ianna su lanna'u winaḷunannu Mawu Yesus, sangkatou su wageangngu pua, wuṛṛu waine lai su wageangngu ledda. ¹³Manga mala'ekatta udde naiwaḷo, "Inangnga, anio lulluai?"

Maria sinumimbakka, "Mawu'u suete nianu, wuṛṛu ia'u wagga Itou niaddo suapa."

¹⁴Napawe wua nabbisara aroddi, itou nanaile liudde wuṛṛu naasilo Mawu Yesus uarisikka isudde. Arawe itou wagga manungku udde Mawu Yesus. ¹⁵Mawu Yesus naiwaḷo sitou, "Inangnga, anio lulluai? Inangnga maddea'a sisai?"

Maria massunna manungku udde mabawaiilla, nariaddi itou nabbi-sara, "Iamangnga, amungkangngu Iamangnga nangingkatti Tou wua isindi, tuḷunga'a waḷo'a sia'u suapa Iamangnga nangado n Tou, tadea'u ia'u wotongnge mangaḷappa Sitou."

¹⁶Mawu Yesus nabbisara sitou, "Maria!"

Maria nanaile Mawu Yesus see nabbisara sulaḷummu wisara n Ibrani, "Rabuni!" (Atatappasanne "Huru".)

¹⁷"Arie pamita Sia'u" wisara Mawu Yesus sitou, "ana waugu Ia'u taambe nasengkengnga ringannu Iamangnga. Arawe roote ringannu manga tuṛrang-Ku, wuṛṛu pasingkata'e simangitou manungku orassa indi Ia'u ireete ringannu Iamang-Ku wuṛṛu Iamangngu, Ruata-U wuṛṛu Ruatanu."

¹⁸Ne Maria inaita namasingkatta su manga mallaḷaṛṛenggennu Mawu Yesus manungku itou suete naasilo Mawu Yesus wuṛṛu manungku Mawu suete namasingkattu sarangkanambone udde sitou.

Mawu Yesus naipasilo n watangan-Ne su manga mallaḷaṛṛenggen-Ne

(*Mat. 28:16-20; Mrk. 16:14-18; Luk. 24:36-49*)

¹⁹Su allo Misa udde lai, su tempo ṛabbite, manga mallaḷaṛṛenggennu Mawu Yesus uaammulla su sambau waḷe apan ngarane uarṛuudda, ana waugu imangitou matta'uttu manga tembonannu Yahudi. Inaṛṛombanganne Mawu Yesus nirumanta wuṛṛu dirumarisikka su pattangnganni mangitou wuṛṛu nabbisara, "Saḷamatta wuṛṛu paddarame siamiu."

²⁰Napawe suete nabbisara aroddi, Itou namasilote n lima-Ne wuṛṛu sandiṛṛan-Ne simangitou. Su tempo naasilo Mawu, imangitou lembo nilumuassa. ²¹See Mawu Yesus nabbisara simangitou paassa lai, "Saḷamatta wuṛṛu paddarame siamiu. Ere lai Iamangnga nandolo-U aroddi lai Ia'u mandolokki amiu." ²²See Itou napaasabangngu singangu-Ne simangitou wuṛṛu nabbisara, "Sengkampe Ghaṛraho Mawu Ruata. ²³Amungkangngu iamiu mangampungnga rosa n sangkatou taumata, Mawu Ruata lai mangampungnga rosane. Amungkangngu iamiu tawe mangampungnga rosa n taumata waine, Mawu Ruata lai tawe mangampungnga rosane."

Mawu Yesus wuɽɽu Tomas

²⁴Tomas (apan isassago lai "Rindua"), sangkatou wuassu sire mapuɽo dua mallalɛrɛnggennu Mawu Yesus, apan tawe suadio'a ringannu mallalɛrɛnggenna waine su tempo Mawu Yesus nirumanta. ²⁵Ne manga mallalɛrɛnggennu Mawu Yesus apan waine nabbisara si Tomas, "Iami naasilote Mawu!"

Arawe Tomas sinumimbakka, "Amungkangngu ia'u taambe naasilo lanna'u lessa m pa'u su lima-Ne, udde wuɽɽu taambe napangado n taɽimado'u su manga lanna'u lessa m pa'u udde wuɽɽu taambe napangado n lima'u susandirran-Ne, ia'u tawe mangngimanna saran paassa."

²⁶Sangkamisa naliudda, manga mallalɛrɛnggennu Mawu Yesus naammulla apia su tampa udde, wuɽɽu Tomas isudde lai. Anambo ngara uarɽuudda. Arawe Mawu Yesus nirumanta wuɽɽu nirumarisikka su pattangnganni mangitou, see nabbisara, "Saɽamatta wuɽɽu paddarame siamiu." ²⁷Wua udde Mawu Yesus nabbisara si Tomas, "Pa'ellege lima-U, wuɽɽu addoa'e taɽimadonu isindi. Uɽurra'e limanu wuɽɽu addoa'e su sandirrang-Ku. Arie mapapadua lai ewe'e pangimante!"

²⁸Tomas nabbisara Mawu Yesus, "Mawu'u wuɽɽu Ruata'u!"

²⁹Ne Mawu Yesus nabbisara sitou, "I'o mangngimanna ana waugu naasilote Sia'u? Asasaɽamatta su taumata apan mangngimanna salaiwe tawe naasilo Sia'u!"

Pandumannu wuke indi

³⁰Ta'e manambo lai manga alɛrɛrindu'a waine apan suete niola'u Mawu Yesus su saruannu manga mallalɛrɛnggen-Ne, arawe tate naworɽeta sulaɽummu wuke indi. ³¹Arawe sarangkanambone indi niworɽetta, tadea'u iamiu mangngimanna manungku Mawu Yesus ete-udde Ratu Punnu Saɽamatta, Ana'u Mawu Ruata, wuɽɽu ana waugu mangngimanna Sitou, iamiu naasomba wiakka.

Mawu Yesus naipasilo n watangan-Ne su sire pitu mallalɛrɛnggen-Ne

21 Wua udde Mawu Yesus namasilo watagan-Ne paassa lai su Rano n Tiberias su manga mallalɛrɛnggen-Ne. Arendi wattinge: ²Su sambau allo Simon Petrus, Tomas apan isassago lai i Rindua, Natanael wuassu Kana su Galilea, alɛrɛrana'i Zebedeus, wuɽɽu rua ng katou

mallaḷarṙenggennu Mawu Yesus apan waine tantaḷanna uaammulla. ³Wisara n Simon Petrus singana'a waine, "Ia'u maapulu inai tumondo."

"Iami tumantalongnga", unni mangitou si Petrus. Ne inaité imangitou sinuma'e saalanna. Arawe sarṙabbi tuudda udde imangitou tawe naahau saran sambua. ⁴Napawe matannallo sussabangke, Mawu Yesus uarisikka su apanne, arawe imangitou wagga manungku udde Mawu Yesus. ⁵Mawu Yesus nabbisara simangitou, "Aḷarṙana'u, iamiu naa-haute inassa?"

"Tawe" sasimbakki mangitou.

⁶Mawu Yesus nabbisara simangitou, "Lombo'a'a somanu su aik-katannu saalanna, iamiu sarun maahau inassa." See soma udde nilombate mangitou, arawe imangitou tate maawoḷengnga apia ana waugu aroddi anambone inassa sulaḷummu soma.

⁷Mallaḷarṙenggenna apan aranguannu Mawu Yesus, nabbisara si Petrus, "Udde Mawu!" Napawe Simon Petrus naaringikka manungku udde Mawu, itou nallurṙe n laubba (ana waugu itou uatantoḷe) see inumurumma sulaḷummu ua'e. ⁸Manga mallaḷarṙenggenna waine nananturṙutta watukku ammaranne ringannu saalanna, lapiddu namoḷengnga soma apan napene ng kinassa. Imangitou tawe marau wuassu ammaranne, irarṙangngo tumba'u marṙasutta su meterṙene. ⁹Napawe imangitou sinumossokke wuassu saalanna, imangitou naasilo pia warṙa m putungnga isudde ringannu inassa uatambunna wurṙu roti. ¹⁰Mawu Yesus nabbisara simangitou, "Apira'a inawarendi manga pira m bua inassa apan wakku niasametanni amiu."

¹¹Simon Petrus sinuma'e su saalanna, see namoḷengnga somane watukku ammaranne. Soma udde napene ng kinassa apan mangkasal-laka; sarangkanambone marṙasutta lima m puḷo tallu su wuane. Wurṙu salaiwe anambone aroddi, somane tawe nahesa'a. ¹²Mawu Yesus nabbisara simangitou, "Wette umanna." Tawe saran sangkatou wuassu mallaḷarṙenggen-Ne warṙani maiwaḷo, "Iamangnga isai?" Ana waugu imangitou masingkatta manungku Itou Mawu. ¹³Wua udde Mawu Yesus nangundani mangitou, nanganu roti udde, wurṙu nitahia simangitou. Inassa udde lai nitahia n Tou ere udde.

¹⁴Indi atallune Mawu Yesus maipasilo n watangan-Ne su manga mallaḷarṙenggen-Ne napawe Itou niwangunna wuassu papate.

Mawu Yesus wurṙu Petrus

¹⁵Napawe imangitou suete niumannu, Mawu Yesus nabbisara si Simon Petrus, "Simon ana'i Yona, apa i'o lembo marangngu Sia'u wuassi mangitou indi mandangngu Sia'u?"

"Atonna, Mawu," sasimbakki Petrus, "Mawu masingkatta ia'u maranggu Mawu."

Mawu Yesus nabbisara sitou, "Paduļianete aļarřana'u domba-U."

¹⁶Su aruane Mawu Yesus naiwaļo sitou, "Simon ana'i Yona, atonna i'o maranggu Sia'u?"

"Atonna, Mawu," sasimbakki Petrus, "Mawu masingkatta manungku ia'u maranggu Mawu."

Mawu Yesus nabbisara sitou, "Paduļianete manga domba-U."

¹⁷Su atallune Mawu Yesus naiwaļo sitou, "Simon ana'i Yona, atonna i'o maranggu Sia'u?"

Petrus nasusa naungnge ana waugu Mawu Yesus naiwaļo sitou na'oma n sara atallune. Ne Petrus sinumimbakka apia, "Mawu, Mawu masingkattu sarangkanambone. Mawu masingkatta manungku ia'u maranggu Mawu!"

See Mawu Yesus nabbisara sitou, "Paduļianete manga domba-U. ¹⁸Mangke atonna wisara-U indi: Su tempo i'o ta'e dario'a, i'o sassane mamma'issa lawannu, wuřru u'amatta su aļawo'u tampa ipaapulunu. Arawe amungkangngu i'o timmaddete, i'o mangnguļukku limanu, wuřru taumata waine mamma'issa si'o wuřru mangapidda su tampa apan ipaadirinu." ¹⁹(Ringannu manga wisara udde Mawu Yesus mapaalјatta'u ereapa Petrus sarun mate ipamantuga Mawu Ruata.) Wua udde Mawu Yesus nabbisara si Petrus, "Tantalongke Sia'u!"

Mawu Yesus wuřru mallaļarřenggen-Ne apan waine

²⁰Su tempo Petrus nanaile, itou naasilo su liudde mallaļarřenggenna apan aranguannu Mawu Yesus. (Ete itou ua'ianna marani Mawu Yesus su tempo u'anna wuřru naiwaļo Sitou, "Mawu, isai apan sarun mamate Mawu?") ²¹Naasilo sitou, Petrus naiwaļo Mawu Yesus, "Mawu, ereapa su ola'i tou indi?"

²²Mawu Yesus sinumimbakka, "Unnu wisara Ia'u maapulu itou matatana'a wiakka ma'oma n sara Ia'u rumanta apia, udde waļine manaranu. Arawe i'o tantalongke Sia'u!"

²³Ne tinumelengke watti'a su mallaļarřenggennu Mawu Yesus manungku mallaļarřenggenna udde tawe mate. Sumbaļi Mawu Yesus tawe nabbisara manungku mallaļarřenggenna udde tawe mate, ewe'e: "Unnu wisara Ia'u maapulu itou matatana'a wiakka ma'oma n sara Ia'u rumanta apia, udde waļine manaranu."

24Yohanes apan nangonggolu tatiala su ola'u manga riadianna indi. Ete itou lai suete namorreta. Wuṛru iite masingkatta manungku apa apan niapaasingkatti tou udde atonna.

Wisara Panginsueanne

25Ta'e manambo lai hatto waine apan niola'u Mawu Yesus. Unnu wisara sarangkanambone udde iworreta passa m bau, ia'u mammen-damma tawe a'ionanne ahewallu runia indi pangadoannu anambo n wuke apan sarun iworreta udde.

WATTI'U MANGA RASUL

WISARA TAŁAANE

Watti'u Manga Rasul eteudde sasampa'u Wuke n *Watti'u Ałaluassa* apan niapaassingkatti Lukas. Tuddane paarorone *Watti'u Manga Rasul* indi eteudde mannantiro su ola'u ereapa manga mallalarrenggennu Mawu Yesus - ringannu ahettu Gharraho Mawu Ruata - mammasingkattu *Watti'u Ałaluassu* Mawu Yesus "su Yerusalem, su ahewallu Yudea, su Samaria, wuřru sara pentakku runia" (1:8). Wuke indi eteudde watti'u pammamanara n taumata n Sařrani apan tinattakka su wallattu taumata n Yahudi, see maola'a agama sambau su ahewallu runia. Mamamorřettu wuke indi pia pandumma mapaałiatta'a su mabawasane manungku manga taumata n Sařrani wałinewe maola'a sambau angngo su araratuannu Roma, arawe manungku agama n Sařrani maola'a asasuungngu agama n Yahudi.

Watti'u Manga Rasul wotongnge tahianna sulałummu tallu ng kawa-geanganna. Sulałummu tallu ng kawageanganna udde niasilo manungku aatambanna ahewallu leta'a suapa *Watti'u Ałaluassa* su ola'u Mawu Yesus iappaasingkatta wuřru gharředa iapararisikka: (1) paarorone pammamanara n taumata n Sařrani su Yerusalem napawe Mawu Yesus nasengkengnga watukku surga; (2) niatambannu ahewalle manga wage-angnge su Palestina; wuřru (3) niatambannu ahewalle lai watukku wanua su marani n Tahałoangnga Tangngane na'oma n sara araune su Roma.

Inolaanna sambau apan apianne sulałummu wuke n *Watti'u Manga Rasul* indi eteudde pammamanara n Gharraho Mawu Ruata apan ni-rumanta ringannu tarřino su manga taumata mangngimanna su Yerusalem su allo m Pentakosta. Sulałummu anambo n arariadianna apan uaworřetta sulałummu wuke indi natualage manungku Gharraho Mawu Ruata udde sidutu mangngehetta wuřru mannohassa gharředa wuřru manga piařrangnge. Watti'a apan niarřa'u agama n Sařrani su tempo paarorone indi inautta sulałummu anambo nase. Aławo'u arariaddianna apan niworřetta sulałummu wuke indi mannualaga lai aroddi ahewalle tarřino n watti'a udde sulałummu pabbiařrannu manga taumata n Sařrani wuřru sulałummu pasasangkaturangannu gharředa.

Lorrone

Sasaddia mabatti'a	1:1-26
a. Parenta panginsueanne wuṛru paaire Mawu Yesus	1:1-14
b. Pinalloḷossa si Yudas	1:15-26
Pabbawatti'a Watti'u Aḷaḷuassa su Yerusalem	2:1-8:3
Pabbawatti'a Watti'u Aḷaḷuassa su Yudea wuṛru Samaria	8:4-12:25
Pammamanara m Paulus	13:1-28:31
a. Amamatta paarorone ipammasingkattu Watti'u Aḷaḷuassa	13:1-14:28
b. Ammuḷanna su Yerusalem	15:1-35
c. Amamatta aruane ipammasingkattu Watti'u Aḷaḷuassa	15:36-18:22
d. Amamatta atallune ipammasingkattu Watti'u Aḷaḷuassa	18:23-21:16
e. Paulus sangkatou ruumanna su Yerusalem, Kaisarea, wuṛru Roma	21:17-28:31

1 Teofilus apan ma'imanna,
 Sulaḷummu wuke'u paarorone suete ta'u tinaḷa'a sarangkanambone
 apan niola'a wuṛṛu niaṛṛa'u Mawu Yesus ro'e n Itou nanattakku manara-
 Ne, ²na'oma n sara allone Itou nasengkengnga su surga. Tantaḷanna
 Itou taambe nasengkengnga su surga, ringannu taṛṛino n Ghaṛṛaho
 Mawu Ruata Itou manantiro manga rasul apan suete pinile. ³Napawe
 Itou wua nate, aḷannune appatu puḷo su allone Itou masokka ma-
 paḷiatta'u inolaan-Ne apan masemakka su manga rasul udde manungku
 Itou atonna-tonna wiakka. Imangitou maasilo Sitou, wuṛṛu Itou lai ua-
 hahatto mangitou su ola'u ereapa Mawu Ruata mamarenta ere sangka-
 tou Ratu. ⁴Wuṛṛu su tempo Itou uaammulla suadio'a ringanni mangi-
 tou, Itou nangonggolu parenta indi simangitou, "Arie pangingkatta
 wuassu Yerusalem. Paṛṛaddo isudde ma'oma n sara Iamangnga
 mangonggolu apa apan suete pinaire-Ne, eteudde apa apan suete nia-
 paasingkatta siamiu rorone.

⁵Ana waugu Yohanes mannaṛṛani ringannu ua'e, arawe ete pira allo
 lai iamiu sarun saṛṛaniannu Ghaṛṛaho Mawu Ruata."

Mawu Yesus nasengkengnga su surga

⁶Napawe manga rasul udde uaammulla su sampunna ringannu
 Mawu Yesus, imangitou naiwaḷo Sitou, "Mawu, apa orassa indi Mawu
 mapararisika apia Araratuannu walagu Israel?"

⁷Mawu Yesus sinumimbakka, "Iamangku sassane manantunnu allone
 wuṛṛu tempone. Udde tawe wotongnge asingkatanhi amiu, ana waugu
 udde apulu n Iamangnga. ⁸Arawe iamiu sarun miasomba taṛṛino,
 amungkangngu Ghaṛṛaho Mawu Ruata nirumantate ringanni amiu.
 Wuṛṛu iamiu sarun ma'ola'a manga tatiala-U su Yerusalem, su ahewallu
 Yudea, su Samaria, wuṛṛu sara pentakku runia." ⁹Napawe Mawu
 Yesus suete nabbisara aroddi, Itou nasengkengnga su surga su saruannu
 mata mangitou, wuṛṛu winabbawa nallindumma Sitou wuassu aellegi
 mangitou.

¹⁰Tantaḷanna imangitou ta'e uatingngara langitta, su tempo Mawu
 Yesus nasengkengnga, inaṛṛombanganne rua ng katou uapedettu mawira
 uarisikka su samba'a mangitou. ¹¹"Ei, manga taumata n Galilea," unnu
 taumata darua udde, "anio iamiu uarisikka isudde uatingngara langitta?
 Mawu Yesus apan aellehanni amiu nasengkengnga watukku surga udde
 su saruanni amiu, sarun mabelengnga apia ringannu olangnge ereudde
 lai apan niasiloanni amiu tanginna."

Hahanti n Yudas

¹²See manga rasul udde nabelengnga watukku Yerusalem wu-assu Wuiddu Zaitun. Wuidda udde araune irarrangngo sangkilo wu-assu Yerusalem. ¹³Su Yerusalem imangitou inaita watukku wale su tampa imangitou mattindaho, see nirumanganna su wabbo'a rengkenne aliuosone. Manga rasul eteudde Petrus wuŕru Yohanes, Yakobus wuŕru Andreas, Filipus wuŕru Tomas, Bartolomeus wuŕru Matius, Yakobus ana'i Alfeus, Simon Patriot wuŕru Yudas ana'i Yakobus; ¹⁴sarangkanambone sidutu ringannu naungnga uasampinunutanna uaammulla u'aljomanna. Imangitou lai u'aljomanna suadio'a ringannu manga wawine nasutta Maria inangngu Mawu Yesus, wuŕru manga turrangngu Mawu Yesus.

¹⁵Su allo sambau, su tempo imangitou tantaŕanna uaammulla - irarrangngo pia marrasutta rua m puŕo su atoune nirumanta - Petrus dirumarisikka mabbisara. Itou nabbisara, ¹⁶"Manga turrangnga! Apa apan uaworretta sulaŕummu Wuke Susi, udde sarun matipussa. Paarorone wuassi Daud, Gharraho Mawu Ruata suete namasingkatta su ola'i Yudas, piaŕra'u manga taumata apan nanametta Mawu Yesus udde. ¹⁷Yudas eteudde sangkatou wuassu wallatti ite, wuŕru itou suete nipile lai mammanara suadio'a ringanni ite."

(¹⁸Yudas indi suete naasomba leta'u laŕabinganne wuassu laŕantakku ala'uanne apan laŕeo. Itou nanawo wuŕru nate ringannu tianne nawasse na'oma n sara laŕorŕo n sinangngone sinumabangnga. ¹⁹Anambo n taumata apan uatana'a su Yerusalem masingkattu haŕto udde. Ana waugu udde sulaŕummu wisara mangitou leta'a udde nissago Akeldama, atappasanne 'Leta'a Raŕra'.)

²⁰"Ana sulaŕummu Wuke Mazmur uaworretta arendi,

'Wala'e atatanaan-Ne maola'a maŕannaba;

arie piaddu sangkatou matana'a sulaŕumme.'

Pia uaworretta arendi lai,

'Wala'e aianan-Ne anuannu taumata waine.'

²¹⁻²²Ana waugu udde, rinone pia sangkatou apan tumantalongnga siite maola'a tatiala manungku Mawu Yesus nabbiakke apia wuassu papate-Ne. Taumata udde rinone sangkatou wuassu wallattu manga taumata apan sidutu suadio'a ringanni ite su tempo iite uatantalongnga Mawu Yesus su aŕawo'u tampa, ro'e n Yohanes nanattakka mannaŕrani na'oma n sara Mawu Yesus nasengkengnga su surga wuassu pattangnganni ite."

²³Ne manga taumata apan uasemodda isudde nanebo'u rua ngkatou, eteudde Yusuf apan isassago lai Barsabas (itou isassago lai

Yustus), wuṛṛu Matias. ²⁴⁻²⁵See imangitou inumaḷiomanna. Imangitou nabbisara, "Mawu, I'o masingkattu naungngu awadaalla. Yudas suete niaddo wuassu manarane sangkatou rasul wuṛṛu see natete. Nariaddi pantingira'a siami isai wuassu wallattu rua ng katou indi apan pileannu Mawu onggolannu manara ipalloḷossa si Yudas." ²⁶Wua udde aranna darua udde niundi, see niata'eanne eteudde Matias. Nariaddi itou netenega maola'a rasul mammanara su sambau ringannu sire mapuḷo assa rasul waine.

Daranta n Ghaṛṛaho Mawu Ruata

2 Napawe nia'omante allo m Pentakosta, anambo n taumata apan mangngimanna naammulla su sambau tampa. ²Inaṛrombanganne niaringiṛṛanna tingikka wuassu langitta naaḷihida anginna ma'ikkatta. Waḷe aianannu manga taumata udde mangke napene n tingikka. ³See imangitou naasilo manga lila ere ṛenggammu putungnga mangngeekka su aḷawo'u tampa wuṛṛu inumarunna simangitou sangkatou-sangkatou. ⁴Imangitou sarangkanambone naasomba taṛṛino n Ghaṛṛaho Mawu Ruata, wuṛṛu nanattakke mabbisara sulaḷummu aḷawo'u manga wisara waine. Imangitou mabbisara tumuṛṛuttu apa apan ia'onggolu Ghaṛṛaho udde simangitou iapawisara.

⁵Su tempo udde manambo taumata n Yahudi, wuṛṛu wuassu aḷawo'u wanua su ahewallu runia, natana'a su Yerusalem. Imangitou udde taumata matuṛṛutta Mawu Ruata. ⁶Napawe naaringikka tingikka udde, manambo taumata naṛṛimpulunna. Imangitou sarangkanambone niṛṛumindu'a naaringikka manga taumata mangngimanna udde magga-hatto sulaḷummu wisara mangitou sambau-sambau. ⁷Ringannu nahe-rangnga wuṛṛu inagukke imangitou nabbisara, "Manga taumata apan mabbisara indi sarangkanambone waḷinewe taumata n Galilea? ⁸Ereapa arariaddine na'oma n sara iite naaringikka imangitou mabbisara sulaḷummu wisara wanua ng kite sambau-sambau? ⁹Iite manga taumata wuassu Partia, Media, Elam; wuassu Mesopotamia, Yudea wuṛṛu Kapadokia; wuassu Pontus wuṛṛu Asia, ¹⁰wuassu Frigia wuṛṛu Pamfilia, wuassu Mesir wuṛṛu manga leta'u Libia marani n Kirene; piaddu wuassi ite lai apan nirumanta wuassu Roma, ¹¹pia manga taumata n Yahudi wuṛṛu pia lai manga taumata m pabbawalaga waine apan suete sinumutta agama n Yahudi; pia lai nirumanta wuassu Kreta wuṛṛu Arab. Iite sarangkanambone maaringikka imangitou mabbisara sulaḷummu wisara ng kite sambau-sambau su ola'u hatto apan maaherangnga apan niola'u Mawu Ruata!" ¹²Ringannu naherangnga wuṛṛu niagukke imangitou sa-

rangkanambone uaiwaŋo sangkatou ringannu waine, "Apa atapasanne indi?"

¹³Arawe piaddu lai manga taumata mangngaŋandaga. Imangitou nabbisara, "Ei, manga taumata udde wu'anna!"

Nase m Petrus

¹⁴See Petrus dirumarisikka suadio'a ringannu sire mapuŋo assa rasul waine, wua udde nabbisara su taumata nambo udde. Ringannu tingikka ma'ikkatta itou nabbisara, "Manga tuŋrangnga, manga taumata n Yahudi wuŋru sarangkanambone apan uatana'a su Yerusalem! Padaringikka paapia-pia, ana wangu olangnge indi ta'u itaŋa'a siamiu ringannu masema-semakka. ¹⁵Manga taumata indi waŋine wu'anna, ere su sunna ng kami; ana wangu orassa indi wakku puulla sio ruaallo. ¹⁶Arawe indi suete niapaasingkattu Mawu Ruata si Nabi Yoel:

¹⁷Mawu Ruata nabbisara, 'Su panginsueannu runia

Ia'u sarun mangonggolu Ghaŋraho-U su anambo n taumata. Aŋaŋrangngu esakka wuŋru aŋaŋrangngu wawine sarun mamasingkatta siamiu manga inolaanna apan Ta'u ipaasingkatta simangitou.

Manga dario'a sarun maasilo inolaanna apan Ta'u iapasilo simangitou.

Manga taumata timmaddenu sarun mabaŋiawa su ola'u waŋiawa apan Ta'u ionggolla simangitou.

¹⁸Su manga allang-Ku lai - mawae esakka ara'e wawine -, sarun onggolannu Ghaŋraho-U su allo udde.

Imangitou sarun mamasingkattu inolaanna apan Ta'u iapaasingkatta simangitou.

¹⁹Ia'u sarun ma'ola'a manga aŋaŋrindu'a roso su langitta, wuŋru inolaanna apan wahewalla su runia; sarun pia ŋaŋra wuŋru putungnga, sawudda wuŋru timbulla.

²⁰Matannallo sarun maddandumma, wuŋanna mabaŋi marŋamu ere ŋaŋra tantaŋanna Allo Mawu, Allo apan wahewa wuŋru Allo apan mawantuga udde rumanta.

²¹Su tempo udde taumata apan mailaŋare su Mawu sarun masalamatta.'

²²Manga tuŋrangnga taumata n Israel! Padaringikka wisara'u indi: Mawu Yesus taumata Nazaret udde suete nionggolannu Mawu Ruata manara huna ng kami. Udde natualaga su manga aŋaŋrindu'a wuŋru inolaanna apan wahewalla apan niola'u Mawu Ruata su pattangngani amiu sulaŋummu Mawu Yesus udde. Sarangkanambone udde tuŋrangnga

sassane masingkatta. ²³Ere su ringirran-Ne sassane, Mawu Ruata narrawessa, Itou manantillu Mawu Yesus siamiu. Wuru su tempo Itou tinantilla, iamiu namate Sitou ringannu namala manga taumata laleo nangarussa n Tou. ²⁴Arawe Mawu Ruata napaawiakki Tou apia wuassu wallattu manga taumata nate. Itou niallupu papate, arawe Mawu Ruata napaaliu n Tou, ana waugu tawe rinone Itou sidutu aagasannu papate. ²⁵Su ola'u Mawu Yesus indi Daud suete nabbisara,

'Ia'u sidutu ua'ellega Mawu su saruanku;

Itou uaammungnga sia'u, tadea'u ia'u tawe awono'anna.

²⁶Ana waugu udde naungku mangke lulluassa,
morrongku mangke maddalo:

wuru wadanku indi sarun

mallaardo ringannu matammuda sulaumu lalabinganna.

²⁷Ana waugu I'o tawe namala rimuu'u matantangnga su runia n taumata nate.

I'o tawe mamala n allang-Ngu apan maturutta indi

marrimunsa'a wuru masue.

²⁸I'o suete namantingidu lalanna sia'u ipatudda wiakka apan tutune.

Aluassa sia'u ete ni pangillemba ana waugu I'o sidutu uatantalongnga sia'u.'

²⁹Manga turangnga, ia'u madorongnga mabbisara ringannu mase-makka su ola'i Daud, iamangngu alama ng kite udde. Itou nate wuru suete nilabingnga lai; lalabinganne ta'e udde saran orassa indi. ³⁰Mawu Ruata suete na'ire si Daud, ringannu sasalu, manungku sangkatou wuassu wallattu papapulune sarun itenegu Mawu Ruata maola'a ratu. Ana waugu Daud masingkattu paaire udde wuru ana waugu itou lai sangkatou nabi, ³¹itou masingkatta lai apa apan sarun olaannu Mawu Ruata. Nariaddi itou suete namasingkatta manungku Ratu m Punnu Salamatta apan pina'ire Mawu Ruata, sarun mabbiakka apia wuassu papate. Daud nabbisara,

'Itou tawe iwala matantangnga sulaumu runia n taumata nate;

wadang-Nge tawe marrimunsa'a wuru masue.'

³²Ete Mawu Yesus udde apan niapaawiakku Mawu Ruata apia wuassu papate. Iami sarangkanambone suete naasilo sassane olangnge udde.

³³Itou nitenega su aiananna apan matanggakka wuru nionggolannu Mawu Ruata tarino, see nanengkamma Gharraho Mawu Ruata apan suete pina'ire lamangnga. Wuru apan niaringiranna wuru aellehanni amiu orassa indi eteudde Gharraho apan suete nionggolla siami. ³⁴Daud sassane tawe nasengkengnga watukku surgu, arawe Daud nabbisara,

'Mawu nabbisara su Mawu-U:

³⁵ A'iante su samba'a uanang-Ku,

ma'oma n sara Ia'u ma'ola'a manga seennu massurubawa Si'o!'

³⁶Ana waugu udde anambo n taumata n Israel řinone maasingkatta atonna-tonna manungku Mawu Yesus apan niarussa ng kamiu udde, eteudde Mawu Yesus apan nitenegu Mawu Ruata maola'a Mawu wuřu Ratu m Punnu Sařamatta!"

³⁷Napawe manga taumata udde naaringikka olangnge udde, naungngi mangitou u'ambulisađa. See imangitou naiwařo si Petrus wuřu manga rasul apan waine, "Manga tuřrangnga apa řinone olaanni ami?"

³⁸Petrus sinumimbakka, "Awařute wuassu manga rosanu. Wuřu iamiu sambau-sambau řinone sařranianna su arannu Mawu Yesus Kristus, tadea'u manga rosanu ampunganna. Ne manga tuřrangnga sarun manengkamma Ghařraho Mawu Ruata wuassu Mawu Ruata. ³⁹Ana waugu paaire Mawu Ruata udde maola'a wageangngu wuřu papapulunnu see manga taumata apan uatana'a su tampa apan marau – eteudde anambo n taumata apan niwagoannu Mawu Ruata rumanta ringanni Tou."

⁴⁰Ete aroddi Petrus mannařa'a simangitou. Wuřu ringannu wisara apan manambo waine lai itou nandolokki mangitou tadea'u imangitou mapaalju watanganne wuassu pabbawalaga apan dařeo indi apan sarun iřruumannu Mawu Ruata. ⁴¹Manambo taumata mangngimanna watti'i Petrus, see imangitou naisařranite. Ne reengannu taumata mangngimanna su allo udde niatambanna lai tallu řiwu su atoune. ⁴²Ringannu mařřimada imangitou sidutu mangngurumma ařařa'a wuassu manga rasul wuřu sidutu uaammulla suadio'a. Imangitou u'anna su sambau wuřu u'ařiomanna su sampunna.

Ola'u manga taumata mangngimanna udde mabbiakka

⁴³Manambo atonna ařařřindu'a apan maarindu'a apan niola'u manga rasul udde na'oma n sara manambo taumata naherangnga wuřu nata'utta. ⁴⁴Manga taumata apan mangngimanna udde sarangkanambone sidutu uaaukka wuřu apa apan tatahuannani mangitou ipappaatti mangitou suadio'a. ⁴⁵Imangitou nabařu'u manga sarannapa wuřu pussa'a mangitou, see tinahia roinne simangitou sarangkanambone tumuřřuttu hausannu sangkatou-sangkatou. ⁴⁶Miallo-miallo imangitou sidutu uaammulla su Waře Mawu; lapiddu u'anna suadio'a, ringannu lulluassa wuřu masařřionto'a su manga waře mangitou. ⁴⁷Imangitou sidutu madalo Mawu Ruata wuřu ipaapulu n taumata nambo. Miallo-miallo reenganni mangitou aatambanna ana waugu Mawu nangonggolu manga taumata apan tantařanna sassařamattanna.

Taumata lome niapaapia

3 Su sambau allo Petrus wuŕru Yohanes inai su Waŕe Mawu su puulla tatallu wawallo, eteudde orassa umaŕiomanna. ²Poiaroddi ngara wahewa apan isassago "Ngara Maŕramaga", pia sangkatou esakka lome ro'e n dariaddine. Miallo-miallo taumata udde iaapidda isudde ia-parorongnga su manga taumata apan sumutta su Waŕe Mawu. ³Napawe taumata udde naasilo si Petrus wuŕru Yohanes sussutta su Waŕe Mawu, itou nadorongnga sitarua mangonggolu sarannapa sitou. ⁴Ne itarua nanutuda sitou, wua udde Petrus nabbisara, "Pa'ellege siami!" ⁵See taumata udde nanutuda sitarua ringannu antimma sarun onggolannu sarannapa wuassi mangitou. ⁶Arawe Petrus nabbisara sitou, "Ta'u tawe doitta sara ng kadio'a. Arawe apa apan indi sia'u, sarun ta'u ionggolla si'o: Ringannu taŕrino n Yesus Kristus taumata Nazaret udde, amatte i'o!" ⁷See Petrus nangagassa taumata udde su lima aikkatanne wuŕru nantulungngi tou dirumarisikka. Ledda n taumata udde wuŕru wawulannu leddane, lapiddu nabaŕi matohassa. ⁸See itou sinumolo'a dirumarisikka, wuŕru inumamatte uapapaŕele isudde. Wua udde itou sinumutta su Waŕe Mawu suadio'a ringanni Petrus wuŕru Yohanes lapiddu u'amatta wuŕru sussolo'a wuŕru maddalo Mawu Ruata. ⁹Awadaalla naasilo sitou u'amatta wuŕru maddalo Mawu Ruata. ¹⁰See imangitou naatutukka manungku ete itou madarorongnga apan wiasane ua'ianna su "Ngara Maŕramaga" su Waŕe Mawu. Imangitou naherangnga wuŕru niagukke naasilo apa apan suete nariaddi sitou.

Nase m Petrus sulaŕummu Waŕe Mawu

¹¹Taumata udde sidutu uatantalongnga si Petrus wuŕru si Yohanes. Wuŕru napawe imangitou n tallu na'omate su panumbaŕe apan isassago "Panumbaŕe n Salomo", anambo n taumata nirumanta maŕrimpulunna simangitou n tallu ana waugu niagukke. ¹²Napawe Petrus naasilo manga taumata udde, itou nabbisara simangitou, "Ei manga taumata n Israel, anio manga tuŕrangnga maggerangngu olangnge indi? Anio iamiu sidutu ua'ellega siami? Apa iamiu massunna manungku taumata indi naamatta ana waugu taŕrino wuassi ami ara'e ana waugu iamii matuŕrutta Mawu Ruata? ¹³Mawu Ruata apan sassubbanni Abraham, Ishak, Yakub, Mawu Ruata aŕamona ng kite, Mawu Ruata udde suete namantuga Allang-Nge eteudde Mawu Yesus, ete Mawu Yesus udde tinantilli amiu su tembonanne wuŕru niroopanni amiu su saruanni Pilatus, su tempo Pilatus maapulu mamallosi Tou. ¹⁴Itou na'ukkassa wuŕru mapia,

arawe iamiu mannaḷare wuṛṛu mammata'a tadea'u Pilatus mamallossu sangkatou tarra pate siamiu. ¹⁵Manga tuṛrangnga namate Sitou, sumbaḷi ete Itou punnu wiakku taumata nambo. Wuṛṛu Mawu Ruata suete napaawiakki Tou apia wuassu papate. Wuṛṛu iami suete naasilo sassane olangnge udde. ¹⁶Manga tuṛrangnga suete naasilo wuṛṛu nattiala apa apan nariaddi su taumata lome indi. Itou nabaḷi matohassa, wuṛṛu napia ana waugu mangngimanna Mawu Yesus wuṛṛu tarṛino-Ne. Ana waugu mangngimanna Mawu Yesus, ne taumata indi napiate apia su saruannu manga tuṛrangnga sarangkanambone.

¹⁷Manga tuṛrangnga! Orassa indi ia'u masingkate manungku apa apan a'olaanni amiu wuṛṛu manga piaṛṛa'i amiu su Mawu Yesus, udde a'olaanni amiu ana waugu iamiu wagga apa apan tantaḷanna a'olaanni amiu. ¹⁸Wuṛṛu ana waugu eteudde natipusse apa apan suete nipaasingkattu Mawu Ruata ro'e n aḷamonane sulaḷummu manga nabi-Ne, manungku Ratu m Punnu Saḷamatta apan pina'ire udde ṛinone matatarangnga. ¹⁹Ana waugu udde manga tuṛrangnga, awaḷute wuassu manga rosanu wuṛṛu pabelengke ringannu Mawu Ruata tadea'u Itou mapassa manga rosanu. ²⁰Mawu sarun rumanta ringanni amiu, wuṛṛu iamiu sarun maappendamma atatohassa wakku sulaḷummu pangangimanna. Wuṛṛu Mawu sarun mandolokku Mawu Yesus rumanta ringanni amiu, ana waugu Itou suete tinantunnu Mawu Ruata maola'a Ratu m Punnu Saḷamatti amiu. ²¹Itou sarun matana'a su surga ma'oma n sara Mawu Ruata ma'ola'a sarangkanambone wakku ere lai suete niapaasingkattu Mawu Ruata su manga nabi-Ne tempo rorone. ²²Musa suete nabbisara, 'Mawu Ruatanu sarun mandolokka ringanni amiu sangkatou nabi wuassu pabbawalagu sassane ere lai Itou nandolo'u. Iamiu ṛinone madaringikka anambo n watti'a apan nipasingkattu nabi udde siamiu. ²³Taumata apan tawe madaringikka wisara nabi udde, taumata udde sarun limbuaṛṛanna wuassu pabbawalagu Mawu Ruata wuṛṛu pateanna.' ²⁴Manga nabi apan suete namasingkattu watti'u Mawu Ruata, manattakka wuassi Nabi Samuel wuṛṛu manga nabi waine apan nirumanta saḷimmurine, sarangkanambone namasingkatta su ola'u tempo indi. ²⁵Manga paaire Mawu Ruata apan niapaasingkattu manga nabi, eteudde huna manga tuṛrangnga. Sulaḷummu paaire apan niola'u Mawu Ruata su iupungngu aḷamonanu, Mawu Ruata nabbisara si Abraham arendi, 'Wuassu papapulunnu, Ia'u sarun mangalaḷamatta aḷawo'u taumata su runia.' Paaire udde hunane siamiu lai. ²⁶Ana waugu udde Mawu Ruata namile Allang-Nge, see nandolokki Tou nirumanta ringanni amiu paarorone, tadea'u Itou mangalaḷamatta siamiu. Olangnge Itou mangalaḷamatta eteudde na'ola'a manga tuṛrangnga sarangkanambone nawaḷu wuassu ola'u wiakki amiu apan laḷeo."

Petrus wuṛṛu Yohanes su saruannu Mallaṛṛuunggu Agama

4 Tantalanna Petrus wuṛṛu Yohanes ta'e uahahatto manga taumata udde, manga imam tembonanne wuṛṛu piaṛṛa'u mandariaga Waḷe Mawu wuṛṛu manga taumata n Saduki nirumanta ringanni Petrus wuṛṛu Yohanes. ²Imangitou massa'u ana waugu Petrus wuṛṛu Yohanes mabatti'a manungku Mawu Yesus suete nabbiakka apia wuassu papate. Wuṛṛu udde maola'a tatiala manungku taumata nate sarun mabbiakka apia. ³Ne imangitou nanametta rasul darua udde see niapaasutta sulaḷummu tutupanna. Wuṛṛu ana waugu ṛabbite, ne Petrus wuṛṛu Yohanes tinaraṅganna isudde na'oma n sara tiṛṛabbine. ⁴Arawe manga taumata apan naaringikke aḷaṛṛa'u manga rasul udde, manambo nampangimanna. Ne reenganni mangitou niatambanna na'oma n sara iraraṅgango lima ṛiwu su atoune.

⁵Tiṛṛabbine manga mapapande Mallaṛṛuunggu Agama, manga piaṛṛa'u taumata n Yahudi wuṛṛu manga huru n agama naammulla su Yerusalem. ⁶Imangitou naisasomba n Imam Wahewa Hanas, see lai Kayafas, Yohanes, Aleksander, wuṛṛu sarangkanambone apan nasutta su reengannu pabbawalagu imam wahewa udde. ⁷Petrus wuṛṛu Yohanes niapidda sinumaruanna simangitou, see imangitou naiwaḷo, "Ereapa olangnge iamiu napaapia n taumata lome udde? Ringannu atatohassu sassane ara'e ringannu taṛṛino n sai iamiu ma'ola'a udde?"

⁸Petrus apan niintaraṛroannu Ghaṛṛaho Mawu Ruata, sinumimbakka, "Manga mawu piaṛṛa'u pabbawalaga, wuṛṛu manga mawu wageaṅgu mallaṛṛuungga! ⁹Iami niparikisanna allo indi ana waugu na'ola'a apapia ipantulaṅgu taumata lome, wuṛṛu ana waugu manga mawu maapulu maasingkatta taumata udde pinapaapia. ¹⁰Ne, manga mawu sarangkanambone rinone maasingkatta wuṛṛu anambo n walagu Israel rinone lai maasingkatta manungku taumata indi uarisikka orassa indi ringannu wadangnga apan mapia su saruannu manga mawu, ana waugu atatohassa wuṛṛu taṛṛino wuassu Mawu Yesus Kristus taumata Nazaret. Manga mawu suete nangarussa Mawu Yesus udde, arawe Mawu Ruata suete napaawiakki Tou apia. ¹¹Ete Mawu Yesus udde apan su pandummu aaddoanne indi sulaḷummu Wuke Susi,

'Watu apan tate ipaatta su manga waḷe,
nasemakka naola'e watu apan paarorone.'

¹²Tumba'u sulaḷummu Mawu Yesus sassane taumata masaḷamatta. Ana waugu su ahewallu runia indi su wallattu taumata tawe saran sangkatou taumata waine maasomba taṛṛino wuassu Mawu Ruata ipanaḷamatta siite."

¹³Manga wageangngu ammulannu Mamamarikissa udde naherangnga naasilo awawarrani n Petrus wurru Yohanes, see lai imangitou masingkatta manungku rasul darua udde taumata wiasa apan tawe si'olane. See imangitou naatutukke manungku rasul darua eteudde manga taumata apan uatantalongnga Mawu Yesus. ¹⁴Arawe imangitou tawe naasinaukka saran adio'a, ana waugu taumata apan suete niapaapia udde uarisikka lai isudde su saruanni mangitou suadio'a ringanni Petrus wurru Yohanes. ¹⁵Ne imangitou nandolokku rasul darua udde sinumabangnga wuassu tampa m paammulanna, wua udde imangitou na'ire. ¹⁶Imangitou mabbisara, "Rinone olaanni ite ereapa manga taumata indi? Anambo n taumata apan uatana'a su Yerusalem masingkate manungku alarrindu'a apan wahewalla indi, niola'i tarua. Iite tawe mappassinaaddu olangnge udde. ¹⁷Arawe tadea'u hatto indi tawe massa'iwukka su manga taumata, wette iite mapaanaungngi tarua manungku tate wotongnge itarua mabbisara taumata ringannu mappaattu arannu Mawu Yesus."

¹⁸Ne imangitou namago rasul darua udde niapaasutta apia, wurru niwaloanna manungku itarua tate wotongnge manago ara'e mangarra'a ringannu mappaattu arannu Mawu Yesus.

¹⁹Arawe Petrus wurru Yohanes sinumimbakka, "Ringirra'e sassane apa apan rinone su saruannu Mawu Ruata: tumurrutta parenta manga mawu ara'e tumurrutta parenta Mawu Ruata. ²⁰Ana waugu iami tawe maaillojo mabbisara su ola'u apa apan suete niasiloanni ami wurru niaringiranni ami sassane." ²¹Manga laforro n ammulanna udde tawe naasomba sambau pinangiananne ipakkuumanni Petrus wurru Yohanes. Nariaddi imangitou napaanaungngi tarua apia, see itarua nipallosse, ana waugu anambo n taumata mangke maddalo Mawu Ruata ana waugu arariaddianna udde. ²²Taumata apan suete niapaapia udde appate m pulo su tonnane pia lebene uukke.

Manga taumata mangngimanna madorongnga awawarrani wuassu Mawu

²³Napawe Petrus wurru Yohanes nipallose, imangitou nabelengke ringannu manga hawene wurru nabatti'u manga wisara n imam tembonanne wurru manga piarra'u Yahudi udde simangitou. ²⁴Napawe manga hawene naaringikka udde, imangitou suadio'a inumaliomanna ringannu naungnga sambua su Mawu Ruata. Imangitou mabbisara, "Mawu, tumba'u I'o nandiaddi langitta wurru runia wurru taha'olangnga ringannu alawo'u laforrone. ²⁵Ringannu Gharraho-Nu I'o suete nabbisara su iupungngu alamona n kami Daud, eteudde allang-Ngu; I'o nabbisara,

'Anio manga taumata, apan tawe maaillaļa Mawu, massa'u;
anio manga pabbawalaga ma'ola'a ringiranna laļeo?

²⁶Manga ratu su runia uasasaddia mappapangalo,
wurru manga piaŗrangge uauukka lumawangnga Mawu wurru
Ratu m Punnu Saļamatta.'

²⁷Ana waugu Herodes wurru Pontius Pilatus suete na'ola'a ammula
ringannu manga taumata apan tawe maaillaļa Mawu wurru ringannu
taumata n Israel su soa indi. Imangitou maamulla lumawangnga Mawu
Yesus allang-Ngu apan na'ukkassa udde, apan suete nitene-Gu maola'a
Ratu m Punnu Saļamatta. ²⁸Imangitou naauukka ma'ola'a aļawo'u ma-
nara, apan suete tinantunna ro'e n paarorone manungku udde sa-
run matippussa. Wurru I'o sarun manantunnu udde wuassu taŗrino
wurru apulu-Nu sassane. ²⁹Orassa indi, Mawu, ellehete ereapa imangi-
tou mammansaggi ami. Wurru wala'e iami, manga allang-Ngu indi ma-
masingkattu watti'a ringannu tawe matta'utta. ³⁰Onggoļawe aakannu,
tadea'u taumata marada'a iapaapia wurru manga aļarindu'a see ino-
laanna apan wahewalla mariaddi wuassu taŗrino wurru atatohassa wua-
ssu arannu Mawu Yesus, Allang-Ngu apan na'ukkassa udde."

³¹Napawe imangitou suete inumaliomanna, tampa imangitou uaam-
mulla udde inumio'a. Imangitou sarangkanambone naasomba taŗrino n
Ghaŗraho Mawu Ruata, wurru nanattakke mabbisara ringannu waŗrani
atonna, su ola'u watti'u Mawu Ruata.

Sarangkanambone su sambau

³²Anambo n taumata apan mangngimanna udde mabbiakka ringannu
naungnga wurru apendamma sambau. Tawe saran sangkatou wuassi
mangitou mammendamma manungku apa tatahuananne udde darotong-
nge sassane. Aļawo'u apa simangitou, ipappaatti mangitou su sambau.
³³Ringannu taŗrino apan wahewa, manga rasul udde mangngonggolu
tatiala manungku Mawu Yesus nabbiakke apia. Ne Mawu Ruata lembo
nangalamatta simangitou. ³⁴Wurru tawe saran sangkatou wuassu wal-
latti mangitou apan niatalannu manga apa. Ana waugu imangitou apan
uatahuanna leta'a ara'e waļe, nabaļu'u leta'a ara'e waļe mangitou udde;
roinne niapiddi mangitou ³⁵wurru tinantilli mangitou su manga rasul.
Wua udde roitta tinahia su manga taumata apan mappandumma.

³⁶⁻³⁷Aroddi lai Yusuf. Itou lai nabaļu'u leta'a, see roinne niapiddi
tou wurru tinantilla su manga rasul. Yusuf indi sangkatou wuassu
papapulunni Lewi wuassu Siprus; manga rasul mammago sitou lai
Barnabas (atappasanne Mallaļuassa).

Ananias wuṛṛu Safira

5 Arawe pia sangkatou aranne Ananias. Itou ringannu awingnge aranne Safira, nabaḷu'u leta'a santampa pussa'a mangitou. ²Roitta wuassu la'unnu leta'a udde, sambageanganna niwa'ungngi tou ipaatta sassane wuṛṛu waine tinantilli tou su manga rasul. Itou na'ola'a udde asingkatannu awingnge. ³Ne Petrus nabbisara sitou, "Ananias, anio i'o namala n Setanna namiarṛa'u naungngu, na'oma n sara i'o nangawusu Gharṛaho Mawu Ruata, ringannu maḷanna-ḷannaba nama'ungnga roitta ipaannu sassane sambageanganna roitta la'unnu leta'a udde? ⁴Leta'a udde pussaanu, ro'e n i'o taambe nabaḷu'a. Wuṛṛu napawe leta'a udde suete niwaḷu'a, roinne lai ta'e pussaanu. Nariaddi anio i'o pia pandumma ereudde sulaḷummu naungngu ma'ola'a pallaḷagu udde? Waḷine taumata aawusuannu ewe'e Mawu Ruata!" ⁵Aroddi Ananias naaringikka manga wisara udde, itou nawantingnga see nate. Anambo n taumata apan naaringikka olangnge udde nata'utta. ⁶Ne manga umbasanna nirumanta wuṛṛu nami'unna winaḷunanni Ananias see niapidida suliudde wuṛṛu nilabingnga.

⁷Iraṛrangngo tallu ng ka'orassa naḷiu, awingnge nirumanta. Itou wagga apa apan wakku nariaddi. ⁸Petrus nabbisara sitou, "Annama'a waḷoa'a sia'u: Apa leta'a apan niwaḷungngu wuṛṛu awingngu udde, aregane arendi?" "Atonna ereudde aregane," sasimbakku awingngi Ananias.

⁹See Petrus nabbisara sitou, "Anio i'o wuṛṛu awingngu na'ire man-
naḷu'atta Gharṛaho Mawu Ruata? Padaringika! Manga taumata apan
nallabingngu awingngu nabelengke. Imangitou sarun mangapiddu lai
su liudde." ¹⁰Orassa udde lai awingngi Ananias nawantingnga wuṛṛu
nate su saruanni Petrus. Wuṛṛu su tempo manga umbasanna udde si-
numutta, imangitou naaratingnga sitou natete. See imangitou nangapi-
ddu winaḷunanne su liudde see nilabingnga su sandirṛannu awingnge.
¹¹Ne anambo n taumata apan mangngimanna udde wuṛṛu manga tau-
mata waine, apan naaringikka arariaddianna udde, nata'utta.

Manga alaṛṛindu'a wuṛṛu manga inolaanna apan wahewalla

¹²Ana waugu pamamanara manga rasul, ne manambo alaṛṛindu'a
wuṛṛu manga inolaanna apan wahewalla nariaddi su wallattu laḷorṛo
n soa. Ringannu naungnga sambua anambo n taumata apan mangngi-
manna naammulla su Panumbaḷe n Salomo su Waḷe Mawu. ¹³Wuṛṛu

taumata waine tawedu warrani rumanta maammula ringannu manga taumata apan mangngimanna udde. Arawe manga taumata mangngimanna udde lembo n aaddatannu lajorjo n soa. ¹⁴Wurru mallannu mangke aatambanna anambone manga taumata apan mangngimanna Mawu – mapia esakka ara'e wawine. ¹⁵Ewe'e olangnge naola'e aroddi na'oma n sara manga taumata marada'a niaddo su lallowanganna ara'e wilatta, see niapidda su lajanna, tadea'u imangitou salaiwe mattulungnga arinoannu lintau m Petrus, amungkangngu Petrus sumabbi isudde. ¹⁶Mangke mangngelekka manga taumata nirumanta wuassu soa marani n Yerusalem. Imangitou mangngapiddu manga taumata marada'a wurru niasuttannu manga gharraho lajeo. Ne manga taumata udde sarangkanambone niapaapia.

Manga rasul pinassansara

¹⁷Panginsueanne imam wahewa wurru anambo mallajarrengeenne, eteudde wageangngu manga taumata n Saduki mannattake lullawangnga ana waugu imangitou pia naungnga lajeo. ¹⁸Manga rasul udde sinametta, see nitarro sulaummu tuttupannu awadaalla. ¹⁹Arawe rabbine, sangkatou mala'ekattu Mawu namu'a manga ngara n tuttupanna, see nangapiddu manga rasul udde sinumabangnga. Mala'ekatta udde nabbi-sara su manga rasul, ²⁰"Roote darisikka su Waje Mawu wurru pasingkata'a su taumata su ola'u wiakka apan wakku indi." ²¹Ne manga rasul udde tinumurrutte tanata n mala'ekatta udde. Ruaallo atonna imangitou inaita su Waje Mawu wurru mannattake manggarra'a isudde.

Tantalanna udde imam wahewa wurru mallajarrengeenne nirumanta, see na'ola'a amullu mallarruungnga ringannu manga piarra'u Yahudi. Wua udde imangitou nandolokku taumata inai mangalapa manga rasul udde su tuttupanna iapaapidda sumaruanna simangitou. ²²Arawe napawe manga taumata nirolokka udde na'omate su tuttupanna, imangitou tawe naasilo manga rasul isudde. Nariaddi imangitou nabelengke, see nabafo n olangnge udde su mallarruungnga. ²³"Su tempo iami na'omate su tuttupanna," unni mangitou su mallarruungnga, "niaratinganni ami ngara n tuttupanna uarruuda mapia-pia, wurru manga mandariaga uariaga su ngara. Arawe su tempo iami namu'a ngara udde, iami tawe naasilo saran sangkatou sulaumme." ²⁴Napawe piarra'u mandariaga Waje Mawu wurru manga imam tembonanne naaringikka alae udde, imangitou tinumiangnga su ola'u manga rasul wurru matta'uttu apa apan sarun mariaddi. ²⁵Wua udde nirumantate sangkatou esakka uaapiddu watti'a indi, "Daringirre! Manga taumata apan tinarrangannu manga Tuangnga su tuttupanna udde orassa indi tantalanna manggarra'a awadaalla

su Waļe Mawu!" ²⁶Ne piaŗŗa'u mandariaga Waļe Mawu udde su sambau ringannu mandariagane inaita nangaļappa manga rasul udde aŗia. Arawe imangitou tawe nangaļappu araŗŗagissa ana waugu imangitou matta'uttu taumata nambo; aŗŗengenne taumata nambo udde mamareta m batu simangitou.

²⁷Manga rasul udde niapidda sinumutta sinumaruanna mallarŗuungnga. See imam wahewa namarikissa simangitou. ²⁸Itou nabbi-sara, "Iami suete naningaddi amiu tadea'u ariete pangarŗa'u arannu taumata udde. Arawe orassa indi pa'ellege apa inolaanni amiu! Iamiu mannaļiawukku alaŗŗa'i amiu su ahewallu Yerusalem, wuŗŗu iamiu mangngansilla manungku ete iami nipandansilanannu papate n taumata udde."

²⁹Petrus wuŗŗu manga rasul apan waine sinumimbakka, "Iami rinone tumuŗŗutta Mawu Ruata wuŗŗu waļine tumuŗŗutta taumata. ³⁰Mawu Yesus, apan niarussa ng kamiu suete niapaawiakku Mawu Ruata iupungngu alaŗmona ng kite apia wuassu papate. ³¹Mawu Ruata suete nangonggolu aiananna wuŗŗu tarrino apan matanggakka Sitou eteudde Piaŗŗangnge wuŗŗu Punnu Saļamatta; tadea'u walagu Israel onggolaŗnu tempo mawaļu wuassu manga rosane wuŗŗu ampunganna. ³²Ete iami manga mattatiale su ola'u sarangkanambone udde - iami wuŗŗu lai Gharŗaho Mawu Ruata apan nionggolu Mawu Ruata su manga taumata apan matuŗŗutta Sitou."

³³Su tempo manga Mallarŗuungngu Agama naaringikka udde, imangitou mangke nasa'u, wuŗŗu imangitou na'irete mamate inanga rasul udde. ³⁴Arawe su wallattu manga Mallarŗuungngu Agama udde pia sangkatou Farisi aranne Gamaliel. Itou huru n agama apan aaddatannu anambo n taumata. Itou dirumarisikka see nandolokku taumata niapaapiddu manga rasul udde sinumabangnga su liudde taļa ng kadio'a. ³⁵Wua udde itou nabbisara su Mallarŗuungngu Agama udde, "Manga tuŗŗangnga manga taumata n Israel! Ringiŗŗa'a paapia-pia su ola'u apa apan sarun olaannu manga tuŗŗangnga su saruannu manga taumata indi. ³⁶Ana waugu dorone suete nirumanta Teudas, apan mangngantimma itou taumata wahewa, na'oma n sara iraŗŗangngo appatu raŗutta su atoune tinumantalongnga sitou. Arawe itou nipate wuŗŗu mallalaŗŗengenne nassaļiawukka wuŗŗu tuddane nawuļi. ³⁷Wua udde, su tempo m pandareengngu aranna, nilumapputa apia Yudas, taumata wuassu Galilea. Ana waugu sasaļongnge manambo taumata tinumantalongnga sitou. Arawe itou lai nipate, wuŗŗu anambo mallalaŗŗengenne nassaļiawukka. ³⁸Nariaddi orassa indi ringannu arariaddianna udde, tatantiro'u eteudde: imbaŗŗangnga ma'ola'a apa-apa su manga taumata indi, wala'e aroddi imangitou. Ana waugu alaŗŗa'a wuŗŗu tatantiro mangitou indi eteudde wuassu taumata, ne alaŗŗa'a wuŗŗu tatantiro

udde sarun mawuḷi. ³⁹Arawe amungkanngu udde nirumanta wuassu Mawu Ruata, ne manga tuṛrangnga tawe mapaasala mangitou. Ewe'e asinungka sarun matualaga manungku manga tuṛrangnga lullawangnga Mawu Ruata."

Aḷaṛṛa'i Gamaliel udde nisengkammu mallaṛṛuungnga. ⁴⁰Ne manga rasul udde niwagoante, see nihesekka, wua udde nisingadda mangaṛṛa'a apia aḷaṛṛa'u Mawu Yesus. Wua udde imangitou nipallosse. ⁴¹Manga rasul udde nanantangngu Mallaṛṛuungngu Agama ringannu lulluassa ana waugu Mawu Ruata suete na'ola'a simangitou naasomba aalṛuandaga ana waugu Mawu Yesus. ⁴²Wuṛṛu miallo-miallo su Waḷe Mawu see lai su manga waḷe n taumata, imangitou sidutu mangngaṛṛa'a wuṛṛu mabatti'a Watti'u Aḷaḷuassa su ola'u Mawu Yesus manungku tumba'u Itou Ratu m Punnu Saḷamatta apan pina'ire udde.

Sire pitu mallaḷajima

6 Manga mallaḷaṛṛenggenṇu Mawu Yesus mallannu aatambanna anambone. Su tempo udde manga taumata n Yahudi apan mabbisara n Yunani naola'a tawe maḷuassa su saruannu manga taumata n Yahudi tumanangnge. Apan mabbisara n Yunani udde nabbisara, "Manga wawine ng kami apan inawaḷuanna tawe naasomba tahia ipabiakka miallo-miallo apan nitahia su manga taumata." ²Ana waugu udde sire mapuḷo dua rasul udde nangammullu anambo mallaḷaṛṛenggenne wuṛṛu nabbisara simangitou, "Daḷeo amungkanngu iami umaddo mamasingkattu wisara Mawu Ruata, ana waugu ta'e maṛṛingiddu anna. ³Nariaddi, mappianne manga tuṛrangnga mamile wuassu wallatti amiṇu sire pitu apan pallaḷagune mapia wuṛṛu pia taṛṛino n Ghaṛṛaho Mawu Ruata see lai pande, apan wotongnge iapamanara ng kami mangatokku hatto indi; ⁴ana waugu iami inai umaḷiomanna wuṛṛu mabatti'u wisara Mawu Ruata."

⁵Awadaalla udde nanengkamma addapattu manga rasul udde. See imangitou namilete si Stefanus, sangkatou apan mangngimanna Mawu Yesus wuṛṛu pia Ghaṛṛaho Mawu Ruata. Napile lai Filipus, Prokhorus, Nikanor, Timon, Parmenas, wuṛṛu Nikolaus wuassu Antiokhia; itou waḷine taumata n Yahudi arawe sinumuttate agama n Yahudi. ⁶Sire pitu udde niapidda su manga rasul, see manga rasul udde inumaḷiomanna wuṛṛu nadorongnga aḷamattu Mawu rumanta simangitou.

⁷Aroddite watti'u Mawu Ruata mangke nassaḷiawukka wuṛṛu manga mallaḷaṛṛenggenṇu Mawu Yesus su Yerusalem lembo n aatambanna anambone. Wuṛṛu manambo lai manga imam apan nangngimanna Mawu Yesus.

Stefanus sinametta

⁸Stefanus lembo nialamatannu Mawu Ruata, na'oma n sara itou ma'ola'a manambo alarindu'a wuṛṛu inolaanna apan wahewalla su walattu tumana'u soa. ⁹Arawe pia lai manga taumata apan mannaṛare sitou; imangitou eteudde taumata waḷe m pattataṛramawuanna apan issago waḷe m pattataṛramawuannu manga Taumata Tawe Limbanne. Manga taumata waḷe m pattataṛramawuanna udde eteudde manga taumata n Yahudi wuassu Kirene wuṛṛu Aleksandria. Imangitou wuṛṛu manga taumata n Yahudi wuassu Kilikia wuṛṛu Asia uasasimbakki Stefanus. ¹⁰Arawe imangitou tawe maapanompolla wisara n Stefanus, ana waugu Gharraho Mawu Ruata mangngonggolu apande sitou iapawisara. ¹¹Ana waugu udde imangitou nangonggolu roitta su manga pira taumata iapawisara, "Iami naaringikka taumata udde mangngadio'a si Musa wuṛṛu Mawu Ruata!" ¹²Ete aroddi imangitou mapawawuḷo manga taumata, wuṛṛu manga piarra'u Yahudi, wuṛṛu manga huru n agama. See imangitou inaita nanametta si Stefanus, wua udde itou niapidda sinumaruanna Mallarṛuungngu Agama. ¹³Wuṛṛu imangitou lai nanga-piddu manga mattatjala apan mangngonggolu taḷa'a awusu su ola'i Stefanus. Manga mattatjala udde nabbisara, "Taumata indi sidutu mangngadio'a Waḷe Mawu apan na'ukkassa, wuṛṛu mangngadio'a manga parenta Mawu Ruata apan niapaasingkatti Musa. ¹⁴Iami suete naaringikka sitou mabbisara, manungku Mawu Yesus wuassu Nazaret udde sarun mangngohakku Waḷe Mawu indi, see mamaḷu anambo n inanamanna apan nisossokki Musa siite!" ¹⁵Awadaalla apan uasemodda sulaḷummu ammuḷannu Mallarṛuungngu Agama udde nanutudda si Stefanus. Wuṛṛu su tempo udde hati n Stefanus aellehanna naaḷihidda hati mala'ekatta.

Sasinaukki Stefanus

7 Imam wahewa naiwaḷo si Stefanus, "Apa anambo n wisara n taumata udde atonna?" ²Stefanus sinumimbakka, "Manga turṛangnga wuṛṛu manga iamangnga! Padaringikka sia'u! Tantaḷanna iupungngu alaḷmona ng kite Abraham taambe nangingkatta watukku Haran, su tempo itou ta'e uatana'a su Mesopotamia, Mawu Ruata apan mawantuga nirumanta ringanni tou ³wuṛṛu nabbisara, 'Tantanga'e wanuanu wuṛṛu manga turṛangngu. Roote su wanua apan sarun ipantingida si'o.' ⁴Ne Abraham nanantangke n wanua Kasdim, see nangingkatte watukku Haran. Napawe iamangngi Abraham natete, Mawu Ruata napa'ingatti

Abraham watukku wanua indi atatanaannu manga tuffrangnga wuŕru manga iamangnga orassa indi. ⁵Su tempo udde tawe saran sambage-anganna wuassu wanua indi nionggolu Mawu Ruata si Abraham maola'a pussa'a n Abraham; tawe saran sandango nionggolla sitou. Arawe Mawu Ruata na'ire manungku Itou sarun mangonggolla si Abraham maola'a pussa'a n Abraham wuŕru papapulunne. Tempo udde Abraham tawe ana'a. ⁶Arawe indi bawaŕo Mawu Ruata sitou, 'Papapulunne sarun matana'a ere taumata raho su wanua n taumata waine. Manga tumana'u wanua udde sarun mangallangnga simangitou wuŕru ma'ola'a simangitou marragisa appatu řasutta su tonnane alannune. ⁷Arawe Ia'u sarun makkuumannu pabbawalaga apan mangngallangnga siamiu, wuŕru imangitou sarun masaliu wuassu wanua udde wuŕru sarun massubba Sia'u su tampa indi.' ⁸Napawe suete nabbisara aroddi paaire udde pinattohassu Mawu Ruata ringannu sunatta. Ne napawe Ishak, ana'i Abraham niasungkangnga, Abraham nassunatte sitou napawe uukke ualute allo. Wua udde Ishak nassunatta lai alarřanangge, eteudde Yakub. Wuŕru Yakub nassunatta lai sire mapuŕo dua alarřanangge, eteudde apan naola'a iamangngu alamona n walagu Yahudi.

⁹Manga iamangngu alamona ng kite udde massa'u si Yusuf, na'oma n sara imangitou nabaŕu'i tou naola'a allangnga su Mesir. Arawe Mawu Ruata sidutu uatantalongnga sitou, ¹⁰wuŕru napaaliu n tou wuassu alawo'u asasusa. Mawu Ruata nangonggolu apapia wuŕru apande sitou su tempo itou sinumaruanna si Firaun ratu Mesir, na'oma n sara Firaun nanenegi tou naola'a gubernure su wanua Mesir wuŕru tembonannu wale n araratuannu Mesir. ¹¹Wua udde nariaddite alarřatumma apan wahewa su ahewallu wanua Mesir wuŕru Kanaan na'oma n sara taumata uatatarřangnga lunussa. Iupungngu alamona ng kite tawe maasomba anna. ¹²Ne napawe Yakub naaringikka pia gandumma su Mesir itou nandolokku alarřanangge, iupungngu alamona ng kite, inai poiारoddi su paarorone. ¹³Su tempo imangitou inai aruane, Yusuf namasingkatta manga tuffrangnge udde manungku ete itou Yusuf. Wakkute udde ratu Mesir naasingkatta manga tuffrangngi Yusuf. ¹⁴Wua udde Yusuf nananata n watti'a su iamangnge, eteudde Yakub tadea'u Yakub wuŕru manga tuffrangnge mangingkatta watukku Mesir – sarangkanambone pitu m puŕo lima su atoune. ¹⁵Ne Yakub nangingkatte watukku Mesir wuŕru isudde itou wuŕru iupungngu alamona ng kite, nate. ¹⁶Winalunanni mangitou niapidida apia su Sikhem wuŕru nilabingnga su lalabinganna apan suete niwallianni Abraham ringannu roitta wuassu taumata n walagu Hemor su Sikhem.

¹⁷Napawe maranite tempone Mawu Ruata manipussa paaire-Ne si Abraham, walagi ite su Mesir niatambante anambone. ¹⁸Panginsueanne

sangkatou ratu waine apan wagga n Yusuf, namarenta su Mesir. ¹⁹Ratu udde mannalangnga walagi ite ringannu araŕragissa su iupungngu ałamona ng kite. Itou mammata'i mangitou mandamme n ałarřana'a apan wakkute niasungkangnga tadea'u masusa wuřru mate. ²⁰Su tempo udde Musa niasungkangnga; itou ana'a arřamahanne. Tallu wułanna ałannune itou papadułianannu iamangnge, ²¹wuřru napawe itou nirammete, mařřuala n Firaun nangambi sitou, see namadułi sitou naalıhida ere anangnge sassane. ²²Aławo'u apande n taumata Mesir niařra'a sitou wuřru itou naola'a taumata apan lembo n tarřino sulałummu wisara wuřru inolaanne.

²³Su tempo Musa uukke appatu puło su tonnane, nirumantate apulune sulałummu naungnge inai mattembo walagu taumata n Israel. ²⁴See itou naasilo sangkatou wuassi mangitou sassanrannu taumata Mesir, ne itou nanamba'a taumata apan sassanranna udde wuřru namate taumata Mesir. ²⁵Musa massunna pabbawalage sarun maatutukka manungku Mawu Ruata tantałanna mappaatti tou mamallossi mangitou. Arawe imangitou tawe maatutukka. ²⁶Tiřrabbine itou naasilo lai rua ngkatou taumata n Israel uawawuło, see itou nallaassa wuřru nandame mangitou. Itou nabbisara, 'Iamiu indi sangkatuřrangnga, anio iamiu uawawuło?' ²⁷Arawe taumata apan namuulla hawene udde nanuřřudi Musa su winggine see nabbisara, ²⁸'Isai namile si'o maola'a piařrangnge wuřru mallarřuungngi ami? I'o pia pandumma mamate sia'u ere lai i'o namate taumata Mesir udde naarřabbi?' ²⁹Napawe Musa naaringikka wisara n taumata udde, Musa tinumałangnga wuassu Mesir see natana'a su wanua Midian. Poiaroddi itou naasomba ana'a darua.

³⁰Appatu puło su tonnane wua udde, sangkatou mala'ekatta nirumanta ringanni Musa su wadda'a marani Wowo n Sinai. Mala'ekatta udde nirumanta sulałummu putungnga su anggarřumunanne apan lukkenggamma. ³¹Musa naherangnga naasilo olangnge udde, na'oma n sara itou inaite nangundani tadea'u maasingkatta apa nariaddi udde. See itou naaringikka tingikku Mawu nabbisara, ³²'Ete Ia'u Mawu Ruata iupungngu ałamonanu; Ia'u Mawu Ruata n Abraham, Ishak, wuřru Yakub.' Musa nangindo n atata'utta na'oma n sara itou tate warřani ma'ellega anggarřumunanne udde. ³³Wua udde Mawu nabbisara apia, 'Luate si-lope apan ualuřre si'o udde ana waugu leta'a apan dararisirřannu udde leta'a na'ukkassa. ³⁴Ia'u suete naasilo wuřru naatutukka aroddi apettane asasusa m pabbawala-U su Mesir. Ia'u naaringikke sasałiomanni mangitou wuřru ia'u sinumossokka mamallosi mangitou. Orassa indi wette! Ia'u sarun mandolokku mabelengnga watukku Mesir.'

³⁵Musa indi Musa apan tawe nia'u m walagu Israel wuřru nito'e ringannu wisara indi, 'Isai suete namile si'o maola'a piařra'a wuřru mallarřuungngi ami?' Arawe ete itou taumata apan nirolokku Mawu

Ruata maola'a piarrangnge wuṛṛu mananaḷamatta, ringannu sasumbala mala'ekatta apan nirumanta ringanni tou su anggaṛṛumunanne apan luk-kenggamma udde. ³⁶Ete Musa udde apan namiaṛṛa'u walagu Israel sinumabangnga wuassu Mesir ringannu na'ola'a aḷaṛṛindu'a wuṛṛu inolaanna apan wahewalla su Mesir, su Tahaḷoangnga Maṛṛamu wuṛṛu su wadda'a, appatu puḷo su tonnane aḷannune. ³⁷Ete itou lai Musa apan nabbisara su pabbawalagu Israel, 'Mawu Ruata sarun mangonggolla siamiu sangkatou nabi apan nipile wuassu wallatti amiu sassane, ere lai Itou namile sia'u.' ³⁸Ete Musa lai apan su pattangngannu pabbawalagu Israel su wadda'a, naola'a uatangnga mala'ekatta apan mabbisara sitou su Wowo n Sinai ringannu iupungngu aḷamona ng kite. Ete itou apan nanengkamma watti'a apan wiakka wuassu Mawu Ruata niapaasingkatta siite.

³⁹Salaiwe aroddi iupungngu aḷamona ng kite maddiri tumuṛṛutta sitou. Imangitou maddiri n tou wuṛṛu maapulu mabelengnga watukku Mesir. ⁴⁰Imangitou nabbisara si Harun, 'Pallanginte manga paaḷuanna huna ng kami, tadea'u manga paaḷuanna udde mamiṛṛa'i ami. Ana waugu iami wagate lai apa apan sarun mariaddi si Musa udde, apan nangapiddi ami sinumabangnga wuassu Mesir!' ⁴¹See su tempo udde imangitou nalanginnu sambau paaḷuanna ana'u sapi, wua udde imangitou nangonggolu sasamba su paaḷuanna udde wuṛṛu na'ola'a andeangnga ipassubba paaḷuanna apan nilanginni mangitou sassane. ⁴²Ne Mawu Ruata nanantangngi mangitou wuṛṛu namala mangitou massubba manga anumpitanna su langitta. Udde ere lai uawoṛṛetta sulaḷummu Wuke Manga Nabi. Arendi,

'Ei manga taumata n Israel! Waḷinewe hunane Sia'u
iamiu mammototta wuṛṛu ma'ola'a sasamba wuassu winatangnga
appatu puḷo su tonnane aḷannune su wadda'a.

⁴³Ete rasanna pasasubbanna si Molokh apan iaapiddi amiu
suadio'a ringannu paaḷuanna winatangnga sassubbannu, eteudde
Refan; eteudde paaḷuanna niola'a sassubbanni amiu.

Ana waugu udde Ia'u sarun mallimbuakka siamiu marau-rau
watukku samba'a wanua Babel.'

⁴⁴Rasanna tampa rantannu Mawu Ruata ringannu taumata, pia lai su
iupungngu aḷamona ng kite su wadda'a. Rasanna udde niola'a wuassu
parenta Mawu Ruata si Musa tumuṛṛuttu saṛṛene apan niapaasilo Mawu
Ruata si Musa. ⁴⁵See rasanna udde niapiddi iupungngu aḷamona ng
kite su tempo imangitou wuṛṛu Yosua inai mangaṛṛo wanua ng kite indi
wuassu tatahuanannu manga pabbawalaga apan nilimbuaṛṛannu Mawu
Ruata su saruanni mangitou. Rasanna udde uaraddo isudde na'oma n
sara Daud. ⁴⁶Daud maaluassa naungngu Mawu Ruata wuṛṛu sussalaṇde
Sitou tadea'u itou iwala mapararisikku sambau Waḷe Mawu Ruata

apan sassubbanni Yakub udde. ⁴⁷Arawe ete Salomo napararisikku Waļe Mawu Ruata.

⁴⁸Ewe'e Mawu Ruata lembo n ahewaļanne tawe matana'a su waļe apan niola'u taumata; ana waugu su Wuke Nabi uaworřetta arendi,

⁴⁹Langitta eteudde aŗŗa'uang-Ku,
wuŗŗu runia apampakku ledda-U.

Waļe ereapa řinone iapararisikki amiu Sia'u?

Suapa tampa pangilloļoang-Ku?

⁵⁰Waļinewe Ia'u sassane nandiaddi sarangkanambone udde?"
ere udde wisara Mawu Ruata.

⁵¹Waļine hampa aatikku pua n manga tuŗrangnga, wuŗŗu aroddi asahadde tumuŗŗutta Mawu Ruata! Taļinganu wengella ipadaringikka wisara Mawu Ruata! Iamiu naaļihida ere iupungngu aļamonanu; si-dutu lullawangnga Ghaŗŗaho Mawu Ruata! ⁵²Apa pia sangkatou nabi apan tawe nisansarannu iupungngu aļamonanu? Imangitou namate daroloŗrannu Mawu Ruata apan dorone suete namasingkatta manungku Allangu Mawu Ruata apan atonna udde sarun rumanta. Wuŗŗu orassa indi iamiu nandaļeo wuŗŗu namate Allangu Mawu Ruata udde. ⁵³Manga mala'ekatta suete namasingkattu manga parenta Mawu Ruata si'o arawe iamiu maddiri tumuŗŗutta!"

Stefanus tinuntungannu watu

⁵⁴Aroddi manga ammuļannu Mallaŗŗuungngu Agama udde naaringikka sarangkanambone apan niwisara n Stefanus, imangitou nan-naungnga laļeo wuŗŗu nasa'u atonna sitou. ⁵⁵Arawe Stefanus apan aintaŗŗoannu Ghaŗŗaho Mawu Ruata, naningngara langitta. Itou naasilo awawantugu Mawu Ruata, wuŗŗu Mawu Yesus uarisikka su tampa pia taŗŗino su samba'a n uanannu Mawu Ruata. ⁵⁶"Pa'ellega" unni Stefanus, "ia'u maasilo surga nawu'a wuŗŗu Ana'u Taumata uarisikka su samba'a n uanannu Mawu Ruata!"

⁵⁷Manga ammuļannu mallaŗŗuungnga udde nanapingnga taļinga mangitou lapiddu inumui, see sangkaŗřindo'a naŗřimpulunna si Stefanus. ⁵⁸Imangitou namoļengnga sitou su liuddu soa wua udde itou tinuntungannu watu. Manga taumata apan naasilo arariadianna udde nanantangngu laubbi mangitou su sangkatou umbasanna aranne Saulus. ⁵⁹Tantaļanna imangitou mannuntungnga si Stefanus, Stefanus sussaļande, "Mawu Yesus, sengkammawe niawa'u!" ⁶⁰See itou inumaļintuda wuŗŗu inumui ringannu tingikka ma'ikkatta, "Mawu,

ariewe rosa indi maola'a winabbawa mangitou!" Napawe wua nabbisara aroddi itou nate.

8 Wuṛṛu Saulus lulluassa lai su ola'u pamamate udde.

Saulus mappaasusa n jamaatta

Allo udde lai jamaatta su Yerusalem mannattake a'enggenanna, na'oma n sara anambo n taumata mangngimanna, tabene'e manga rasul, nassaliawukke watukku ahewallu leta'u Yudea wuṛṛu Samaria. ²Manga taumata apan matta'uttu Mawu Ruata nallabingngi Stefanus wuṛṛu nilumuai n tou ringannu massusa atonna.

³Arawe Saulus sidutu maddea'a manongkakku jamaatta. Itou ru-danganna su manga waḷe wuṛṛu mammoḷengnga su liudde manga tau-mata apan mangngimanna, see imangitou nitaṛṛo su tuttupanna.



Sambau soa su Yudea (8:1)

Watti'u Aḷaḷuassa wuassu Mawu Ruata niapaasingkatta su Samaria

⁴Manga taumata mangngimanna apan nassaliawukka udde, mabatti'u Watti'u Aḷaḷuassa wuassu Mawu Ruata su aḷawo'u tampa. ⁵Filipus inaita watukku soa n Samaria wuṛṛu nabbati'a su manga taumata poiारoddi su ola'u Ratu m Punnu Saḷamatta apan pina'ire Mawu Ruata. ⁶Napawe manga taumata naaringikka si Filipus mangngarra'a, wuṛṛu

see imangitou naasilo manga ałarřindu'a apan niolangnge, manambo su wallatti mangitou madaringikka apa apan iaarřa'i Filipus. ⁷Ana waugu manga gharřaho laleo sinumabangke ringannu mangngintuľi wuassu laľummu taumata nambo apan niasuttannu setanna. Taumata lome wuřru u'ento manambo lai niapaapia. ⁸Ne manga taumata su soa n Samaria udde mangke lulluassa.

⁹Su soa udde pia sangkatou esakka aranne Simon, apan maľannute maaola'a taumata n Samaria iaaguke su ola'u apande baľimmita. Itou mabaľo simangitou manungku itou taumata pařřalane wuassu taumata nambo. ¹⁰Ne anambo n taumata su soa udde wuassu aľawo'u taumata tumanangnge mangke mangngimanna sitou. "Ete taumata indi atatohassu Mawu Ruata apan niasingkatanna 'Atatohassa apan Wahewa' udde," wisara mangitou. ¹¹Maľannute atonna itou mappaagukku taumata ringannu baľimmitane, na'oma n sara imangitou mangngimanna sitou. ¹²Arawe Filipus mabatti'u Watti'u Aľaľuassa simangitou su ola'u ereapa Mawu Ruata mamarentate ere sangkatou ratu, wuřru su ola'u Mawu Yesus Kristus, Ratu m Punnu Saľamatta udde. Ne imangitou nangngimante watti'a apan niapasangkatti Filipus, see imangitou nissarřanite – mawae esakka ara'e lai wawine. ¹³Simon sassane lai nangngimanna. Wuřru napawe suete nissarřani, itou sidutu uatantalongnga si Filipus. Manga ałarřindu'a apan suete nariaddi udde, mangke maatiangnga si Simon.

¹⁴Manga rasul su Yerusalem naaringikka manungku manga taumata n Samaria suete nanengkamma wisara Mawu Ruata. Ana waugu udde imangitou nandolokki Petrus wuřru Yohanes inai poiarddi. ¹⁵Napawe Petrus wuřru Yohanes na'omate, imangitou inumaľiomannu manga taumata n Samaria udde tadea'u imangitou maasomba Gharřaho Mawu Ruata, ¹⁶ana waugu Gharřaho Mawu Ruata taambe nirumanta nangintarřo su saran sangkatou su wallatti mangitou; imangitou wakkute nissarřani tumba'u ringannu arannu Mawu Yesus. ¹⁷See Petrus wuřru Yohanes nangaddo lima mangitou su manga taumata n Samaria udde; ne imangitou nanengkampe Gharřaho Mawu Ruata.

¹⁸Simon na'ellega manungku ana waugu lima manga rasul niaddo su wowo manga taumata udde, Gharřaho Mawu Ruata nionggolla simangitou. Ana waugu udde Simon nangapiddu roitta ionggolla si Petrus wuřru Yohanes, ¹⁹see nabbisara, "Onggola'e sia'u tarřino udde lai, tadea'u amungkangngu lima'u iaddo su aľawo'u taumata, taumata udde sarun maasengkamma Gharřaho Mawu Ruata."

²⁰Arawe Petrus sinumimbakka, "Nasilakate i'o wuřru roinnu! Sunnanu aonggolu Mawu Ruata wotongnge aawalliannu roitta? ²¹I'o tawe maatantalongnga sulaľummu manara ng kami, ana waugu naungngu wengkola su saruannu Mawu Ruata. ²²Ana waugu udde tantanga'e pan-

dumannu apan laleo udde, wuṛru padorongke su Mawu tadea'u Itou mangampungnga ringirannu apan laleo udde! ²³Ana wangu ia'u masingkatta manungku i'o napene n sasihikka wuṛru naola'a allangngu alaleo."

²⁴See Simon nabbisara si Petrus wuṛru Yohanes, "Tuḷunga'a padorongnga su Mawu tadea'u tawe saran sambau wuassu wisara manga tuṛrangnga udde mariaddi su riri'u."

²⁵Napawe imangitou suete nattiala wuṛru napaasingkattu wisara Mawu, Petrus wuṛru Yohanes nabelengke watukku Yerusalem. Wuṛru su amatanna lai imangitou mammasingkattu Wattu Aḷaḷuassa udde su anambo manga ampungnga su Samaria.

Filipus wuṛru sangkatou tembonannu Etiopia

²⁶Sangkatou mala'ekattu Mawu nabbisara si Filipus, "Ote amata'e! Roote watukku timukka su laḷanna apan uasampa'u Yerusalem wuṛru Gaza." Laḷanna udde maḷannaba tawe damene. ²⁷⁻²⁸Ne Filipus inaite. Su tempo udde pia sangkatou tembonannu Etiopia apan tantaḷanna u'amatta mappule watukku wanuane. Taumata udde sangkatou mamamanara n tembonanne apan mangngatokka wuṛru mallu'ada paa'ala n Kandake ratu wanua Etiopia. Taumata udde suete wuassu Yerusalem mattaṛramawu Mawu Ruata wuṛru orassa udde tantaḷanna mabelengnga uasa'e keretane. Tantaḷanna ua'ianna sulalummu kereta, itou mabasa Wuke Nabi Yesaya. ²⁹Ghaṛraho Mawu Ruata nabbisara si Filipus, "Roote pangundani n Kereta udde." ³⁰Ne Filipus inaite nangundani n Kereta udde see itou naaringikka taumata udde mabbasa Wuke n Yesaya. Filipus naiwaḷo sitou, "Tuangnga maasunna apa apan iwabbasa n Tuangnga udde?"

³¹Taumata udde sinumimbakka, "Ereapa ia'u maasunna, amungkangngu taweddu manaḷa'a sia'u?" See itou nangahe si Filipus sinuma'e su kereta wuṛru inuma'ianna su adio'a ringanni tou. ³²Ete indi tatialane apan iwabbasa n Tou,

"Itou naalihida ere domba apan aebetanna inai pototanna,
naalihida ere ana'u domba apan tawe ṛumeo'a amungkangngu
wambuḷune huntinganna,
ete aroddi Itou tawe nabbisara saran sangka paddi.

³³Itou nilobossa wuṛru niola'a ringannu tawe su ṛinone.

Niawa-Ne nisawutta wuassu wowo n runia
na'oma n sara taweddu sangkatou apan wotongnge mabatti'a su
ola'u pabbawala-Ge."

³⁴Tembonanne wuassu Etiopia udde nabbisara si Filipus, "Pasingkata'a sia'u, isai apan su pandummu nabi indi? Watangannè sassane ara'e taumata waine?" ³⁵Ne Filipus nanattakke mabbisara, itou nappaattu manga tatialane udde ipanattaku Watti'u Ałaluassa su ola'u Mawu Yesus su tembonanne wuassu Etiopia udde. ³⁶Su pattangngannu amatanne, itarua na'omate su sambau tampa pia ua'e. Tembonanne udde nabbisara, "Pa'ellega udde pia ua'e! apa lai aurananne tadea'u ia'u sarřanianna?"

[³⁷Filipus nabbisara, "Amungkangngu Tuangnga mangngimanna ringannu naungnga atonna, Tuangnga wotongnge sarřanianna."

"Ia'u mangngimanna manungku Mawu Yesus Kristus eteudde Ana'u Mawu Ruata," unnu tembonanne wuassu Etiopia udde.]

³⁸See itou napaataallu kereta udde, see itarua, Filipus wuřru tembonanne udde nilumintuka sulałummu ua'e wuřru Filipus nanařranite sitou. ³⁹Napawe imangitou nilumapputa wuassu ua'e, Ghařraho Mawu Ruata nangałappa si Filipus wua isudde. Tembonanne wuassu Etiopia udde tate naasilo sitou. Ringannu lulluassa tembonanne udde nanasute amatanne. ⁴⁰Inařrombanganne Filipus uddete su Asdod. Wuřru napawe itou nanassute amatanne, itou mammasingkatu Watti'u Ałaluassa su ola'u Mawu Yesus su aławo'u soa na'oma n sara itou na'omate su Kaisarea.

Saulus nawału wuassu rosane

(WMR. 22:6-16, 26:12-18)

9 Tantałanna udde Saulus sidutu mangke maapulu mammansaga wuřru mamate manga mallařrenggennu Mawu Yesus. Itou inaitte ringannu imam wahewa, ²wuřru madorongnga surattu parenta inai su manga piařra'u wałe m pattatařramawuannu taumata n Yahudi su Damsyik, tadea'u amungkangngu itou maaratingnga poiारoddi manga taumata apan mangngimanna Mawu Yesus, itou wotongnge manametta wuřru mangapiddi mangitou su Yerusalem.

³Tantałanna mattuda n Damsyik, napawe maranite n soa udde, inařrombanganne sambau semakka wuassu langitta natuakka si Saulus. ⁴Itou nema'a su leta'a see naaringikka sambau tingikka mabbisara sitou, "Saulus, Saulus! Anio i'o mandaleo Sia'u?"

⁵"Isai I'o, Mawu?" aiwało n Saulus.

Tingikka udde sinumimbakka, "Ete Ia'u Mawu Yesus, apan radaleoannu. ⁶Arawe orassa indi darisikke wuřru suttate su soa. Isudde sarun iapaasingkatta si'o apa apan sarun manarannu."

⁷Manga taumata apan uatantalongnga suadio'a ringanni Saulus, niŕumindu'a na'oma n sara tawe napattingikka; ana waugu imangitou naaringikka tingikka udde arawe tawe naasilo taumatane. ⁸See Saulus dirumarisikka namu'a matane, arawe matane tate maasilo manga apa lai. Nariaddi imangitou nangagassa limane wuŕru nangehette sitou sinumutta su Damsyik. ⁹Tallu allo aŕannune itou tawe maasilo wuŕru aŕannune udde lai itou tawe umanna wuŕru ma'inumma sara ng kadio'a.

¹⁰Su Damsyik pia sangkatou mallaŕarŕenggenno Mawu Yesuŕ aranne Ananias. Sulaŕummu sambau sondappa, Mawu nabbisara sitou. Mawu nabbisara, "Ananias!"

Ananias sinumimbakka, "Ia'u, Mawu."

¹¹Mawu nabbisara, "Otte inaite orassa indi. Roote watukku waŕe n Yudas su Laŕanna Matuŕida. Iwaŕoi poiारoddi taumata aranne Saulus wuassu soa n Tarsus. Taumata udde tantaŕanna u'aŕiomanna, ¹²wuŕru sulaŕummu sondappa udde itou naasilo sangkatou esakka, aranne Ananias, nirumanta ringanni tou wuŕru namita sitou tadea'u itou wotongge maasilo apia."

¹³Ananias sinumimbakka, "Mawu, ia'u suete naaringikka manambo taumata uahahatto n taumata indi, lembonete su ola'u pandaŕaŕeo apan niolangnge su saruannu pabbawalaga su Yerusalem. ¹⁴Wuŕru su orassa indi itou nirumantate isindi, niwala manga imam tembonanne iapasametta anambo n taumata apan mangngimanna Si'o."

¹⁵Arawe Mawu nabbisara si Ananias, "Roote! Ana waugu Ia'u suete namile sitou mangimbe Sia'u, tadea'u itou mamasingkatta su ola'u riri-U su manga pabbawalaga waine apan agamane waŕine Yahudi wuŕru su manga ratu wuŕru lai su pabbawalagu Israel. ¹⁶Wuŕru Ia'u sassane sarun mapaŕaŕatta'u anambo n asasusa apan ŕinone apendamanni tou ana waugu Ia'u."

¹⁷Ne Ananias inaite watukku waŕe udde wuŕru namitate si Saulus. "Tuŕrangku Saulus," unni Ananias, "Mawu Yesuŕ apan niasiloannu su tangnga n daŕanna su tempo n tuŕrangnga mattuda n Damsyik, ete Itou nandolo'u rumanta tadea'u tuŕrangnga wotongge maasilo apia wuŕru maasomba taŕrino n Ghaŕraho Mawu Ruata." ¹⁸Orassa udde lai pia sarannapa naaŕihida ere onappu inassa napallossa wuassu mata n Saulus see itou naasilote apia. Ne itou napu'ote, see nissaŕranite. ¹⁹Wuŕru napawe suete inumanna, itou natohasse apia.

Saulus mangngaŕra'a su Damsyik


Saulus natana'a su Damsyik su adio'a ringannu mallaŕarŕenggenno Mawu Yesuŕ manga pira allo aŕannune. ²⁰Itou lapiddu rudanta

su manga wale m pattataramawuanna wurru mannattake mabatti'a manungku ete Mawu Yesus udde Ana'u Mawu Ruata.

²¹Awadaalla naherangnga naaringikka si Saulus. Imangitou nabbi-sara, "Walineuwe ete itou indi su Yerusalem suete namate anambo n tau-mata apan mangngimanna Mawu Yesus? Itou nirumanta isindi pandu-manne manametta wurru mangapiddi mangitou su imam tembonanne!"

²²Arawe Saulus mangke mattohassa wawohene. Manga tatiala apan niapaasilo n tou su ola'u Mawu Yesus aroddi aapangimananna manungku eteudde Mawu Yesus Ratu m Punnu Salamatta, na'oma n sara taumata n Yahudi apan uatana'a su Damsyik tawe maapanompolla.

²³Napawe naliu manga pira allo alannune manga taumata n Yahudi na'ire mamate si Saulus. ²⁴Arawe ringiranni mangitou udde niasingkatanni Saulus. Allo rabbi imangitou ualarraddo su ngara wahewallu soa tadea'u mapamate sitou. ²⁵Arawe su sambau rabbi, manga malalarrenggenni Saulus nangaappa sitou, see niulukka sulaummu sambau so'anna nalliu darandungngu soa.



Saulus su Yerusalem

²⁶Saulus inaitte watukku Yerusalem, wurru poiारoddi itou maddea'a maammullu manga mallalarrenggennu Mawu Yesus. Arawe imangitou matta'utti Saulus, ana waugu imangitou tawe mangngimanna manungku atonna-tonna Saulus naola'e mallalarrenggennu Mawu Yesus. ²⁷Wua udde Barnabas nirumanta ringanni tou, see nangapiddi tou ringannu

manga rasul. Barnabas nabatti'a simangitou ereapa Saulus naasilo Mawu su tangnga n dalanna wuɽu ereapa Mawu nabbisara sitou. Barnabas nabbatti'a lai su ola'u ereapa awawarɽani n Saulus mangngaɽa'a su Damsyik ringannu arannu Mawu Yesus. ²⁸Ne Saulus natana'e ringanni mangitou, wuɽu mangngaɽa'e ringannu warɽani su ahewallu Yerusalem sulaɽummu arannu Mawu. ²⁹Itou mangngaɽa'a wuɽu uai-waɽo lai ringannu manga taumata n Yahudi apan mabbisara n Yunani, arawe imangitou maddea'a mamate sitou. ³⁰Su tempo manga taumata mangngimanna waine naasingkatta olangnge udde, imangitou nangapidi Saulus watukku Kaisarea, wua udde nandolokki tou watukku Tarsus.

³¹Ne jamaatta su ahewallu Yudea, Galilea, wuɽu Samaria nadamete. Ringannu pammamanara n Ghaɽraho Mawu Ruata, wuɽu matta'uttu Mawu, manga jamaatta udde lembo natohassa wuɽu aatambanna anambone.

Petrus su Lida wuɽu Yope

³²Petrus nanute su aɽawo'u tampa nattembo manga jamaatta. Su sambau allo itou nattembo aɽarɽana'u Mawu apan uatana'a su Lida. ³³Poiaroddi itou nassomba n sangkatou esakka aranne Eneas, apan lome wuɽu tate maawangunna wuassu tampa atatiɽanne tallute tonna aɽannune. ³⁴Petrus nabbisara si Eneas, "Eneas, Mawu Yesus ma-paapianu. Pabbangunte wuɽu sahangginte tattereannu." Orassa udde lai Eneas dirumarisikke. ³⁵Anambo n tumana'u Lida wuɽu Saron naasilo si Eneas, see imangitou sarangkanambone nangngimante Mawu Yesus.

³⁶Su Yope pia sangkatou wawine aranne Tabita. Itou sangkatou apan mangngimanna Mawu Yesus. (Aranne sulaɽummu wisara n Yunani eteudde Dorkas atappasanne rusa.) Inolaanni tou sidutu mapia wuɽu mantuɽunggu taumata asiangnga. ³⁷Su tempo udde itou nara-dda'a see nate. Napawe winaɽunanne nireno, itou niaddo su wabbo'a ɽengkenne rosone. ³⁸Yope tawe marau wuassu Lida. Nariaddi su tempo manga mallaɽarɽenggennu Mawu Yesus su Yope naaringikka Petrus uatana'a su Lida, imangitou nandolokku rua ng katou inai ringanni Petrus ringannu tanata indi, "Paalihakka rumanta isindi." ³⁹Petrus lapiddu dirumarisikka wuɽu tinumantalongnga simangitou. Na'oma poiaroddi, itou niapidda su wabbo'a ɽengkenne rosone. Anambo n wawine waɽu isudde narɽimpulunna si Petrus lapiddu lulluai wuɽu manta'e sitou manga laubba wuɽu manga jubah apan nitabbi'i Dorkas simangitou su tempo itou ta'e wiakka. ⁴⁰Petrus nandolokki mangitou sarangkanambone sinumabangnga, see itou inumaɽintuda wuɽu inumaɽiomanna.

Wua udde itou sinumaruanna winalunanni Dorkas wuṛṛu nabbisara, "Tabita, apu'ote." Ne Dorkas inumaallate, wuṛṛu napawe itou naasilo si Petrus, itou inuma'ianna. ⁴¹See Petrus namita limane wuṛṛu nantulunggi tou dirumarisikka. Wua udde Petrus namaggo manga tau-mata apan mangngimanna isudde suadio'a ringannu manga wawine walu udde, see nanantilli Dorkas apan nabbiakke udde simangitou. ⁴²Watti'a su ola'u arariadianna udde nassaliawukke su ahewallu Yope, na'oma n sara manambo taumata mangngimanna Mawu Yesus maola'a Ratu m Punnu Salamatti mangitou. ⁴³Petrus uatana'a isudde manga pira allo lai su wale n sangkatou mallaḷaha pisi aranne Simon.


Petrus wuṛṛu Kornelius

10 Su Kaisarea pia sangkatou esakka aranne Kornelius. Itou sangkatou apitennu "Tantara n Italia". ²Itou sangkatou apan matta'uttu Mawu Ruata wuṛṛu anambo n laḷorḷo waleṇe mattarṛamawu Mawu Ruata. Itou masokka mantulunggu taumata n Yahudi apan asiangnga wuṛṛu itou sidutu u'aliomanna su Mawu Ruata. ³Su sambau allo irarṛanggo puulla tatallu allattune itou naasilo ringannu masemakka sulalummu sondappa, sangkatou mala'ekattu Mawu nirumanta wuṛṛu namaggo sitou, "Kornelius!"

⁴Kornelius nanutuda mala'ekatta udde ringannu atata'utta see nabbi-sara, "Pia apa Mawu?"

Mala'ekatta udde sinumimbakka, "Aaliomannu wuṛṛu asasarṛionto'u naunggu sinengkampe Mawu Ruata wuṛṛu Mawu Ruata mannaungnga si'o. ⁵Orassa indi pandolokke n taumata watukku Yope pawago'a si Simon apan aranne nasuungnga Simon Petrus. ⁶Itou tantaḷanna uaintaḷa su wale n sangkatou mallaḷaha pisi aranne Simon waleṇe su winggi n apanne." ⁷Napawe mala'ekatta apan uahahatto n Kornelius udde inaite, Kornelius namago rua ng katou mangangimbe sulalummu waleṇe wuṛṛu sangkatou tantara mandariagane apan ma'imanna. ⁸Kornelius nabatti'a simangitou apa apan suete nariaddi, see nandolokki mangitou watukku Yope.

⁹Tirṛabbine, tantaḷanna imangitou sulalummu amatanne wuṛṛu maranite n Yope; Petrus nirumanganna su pangketta ana umaliomanna. ¹⁰See itou naappendamma lunussa wuṛṛu maapulute umanna. Tantaḷanna anna iaatokka, itou nissondapanna. ¹¹Itou naasilo langitta nawu'a wuṛṛu pia sambau naaliḷhida ere maḷarṛennessa apan maḷaḷakka, ia'uḷukka watukku runia ua'ele su wuune appata. ¹²Sulalumme pia aḷawo'u winatangnga leddane appata, aḷawo'u winatangnga tuttundo n



Atuppu wale su Palestina (10:9)

tianne wuŕru manga manua'a matengnga. ¹³See pia tingikka nabbisara sitou, "Petrus, apu'ote! wuŕru Pamototte wuŕru ante!"

¹⁴Petrus sinumimbakka, "Tawe, Mawu! Taambe saran paassa ia'u inumanna apa ipappalli ara'e iaarantinna." ¹⁵Arawe tingikka udde nabbisara apia sitou, "Apa apan suete niwala Mawu Ruata wotongnge ipaattu taumata, imbarangnga iwaŕonu palli." ¹⁶Sondappa udde na'oma n sara paatallu sinuŕe, wua udde maŕaŕrenessa udde nasengkengnga watukku surga.

¹⁷Petrus nabingo maŕringiddu apa atappasannu sondappa udde. Tantaŕanna Petrus maŕringidda, manga taumata apan nirollokki Kornelius naasombate wale n Simon wuŕru imangitou uddete su ngara. ¹⁸See imangitou namago taumata wuŕru naiwaŕo, "Apa isindi pia daho uaintaŕa, aranne Simon Petrus?"

¹⁹Tantaŕanna Petrus ta'e maddea'a maasingkatta apa atappasannu sondappa udde, Ghaŕraho Mawu Ruata nabbisara sitou, "Ei Petrus, pia sire tallu maddea'a si'o. ²⁰Paaŕihakke sumossokka wuŕru arie mapapadua tumantalongnga simangitou, ana waugu ete Ia'u nandolokki mangitou." ²¹Ne Petrus sinumossokke wuŕru nabbisara su manga taumata udde, "Ete ia'u apan raddeaanni amiu. Manga tuŕrangnga rumanta mapandumma apa?"

²²Imangitou sinumimbakka, "Apitenna Kornelius nandolokki ami isindi. Itou sangkatou taumata mapia wuŕru matta'uttu Mawu Ruata, wuŕru lembo n aaddatannu anambo n taumata n Yahudi. Sangkatou mala'ekattu Mawu Ruata nandolokki tou madorongnga Tuangnga rumanta su waŕene, ana waugu maola'a ere sambau sasimbakku aaŕiomanne, itou nirolokka madaringikka apa apan iapaasingkatti Tuangnga sitou." ²³Ne Petrus napaasuttate mangitou natana'a isudde.

Tirabbine Petrus nabuatte wuṛṛu inaitte suadio'a ringanni mangitou. Manga pira taumata mangngimanna wuassu Yope tinumantalongnga lai. ²⁴Massallo wua udde imangitou na'omate su Kaisarea. Poiaroddi imangitou ɾaṛadoante n Kornelius ringannu manga tuṛrangnge wuṛṛu manga hawene apan suete niwaḷoanne. ²⁵Napawe Petrus na'omate, Kornelius inai nanaḷoho sitou wuṛṛu inumaḷintuda su saruanne. ²⁶Arawe Petrus nantuḷunggi tou niaparisikka, see nabbisara, "Darisikke! Ia'u lai sassane taumata." ²⁷Tantaḷanna uahahatto n Kornelius, Petrus sinumutta sulaḷummu waḷe. Isudde itou naasilo manambote taumata uaammulla. ²⁸See itou nabbisara simangitou, "Manga tuṛrangnga sassane masingkatta manungku taumata n Yahudi isassingadu agamane mattembo ara'e maammulu manga taumata wuassu pabbawalaga waine. Arawe Mawu Ruata suete namasingkatta sia'u manungku ia'u tawe wotongnge massunna taumata waine laḷeo wuṛṛu ipapalli. ²⁹Ana waugu udde su tempo i Tuangnga madorongnga tadea'u ia'u rumanta, ia'u tawe nano'e rumanta. Nariaddi orassa indi ia'u maddea'a maasingkatta, anio i Tuangnga maparanta'u."

³⁰Kornelius sinumimbakka, "Tallu allo naḷiu, iraṛrangngo su tempo ereindi, ia'u tantaḷanna u'aliomanna su waḷe puulla tatallu wawallo. Inaṛrombanganne sangkatou esakka nirumarisikka su saruangu. La-ubbu taumata udde sussaḷoḷotta. ³¹Itou nabbisara, 'Kornelius! Mawu Ruata suete nadaringikka aaliomannu wuṛṛu uanaungnga sasaraṇto'u naungngu. ³²Nariaddi pandolokke n taumata watukku Yope pama-ggo taumata aranne Simon Petrus, itou tantaḷanna uaintaḷa su waḷe n sangkatou mallalaḷa pisi aranne Simon; waḷe udde su winggi n ta-haḷoangnga.' ³³Ana waugu udde ia'u nasasaraṛawutta nandolokku tau-mata inai namaggo si Tuangnga. Wuṛṛu Tuangnga naungnge mapia atonna nirumanta isindi. Orassa indi iami nambo uaammulle isindi su saruannu Mawu Ruata madingikikka apa apan niapasilo Mawu Ruata si Tuangnga iapaasingkatta siami."

Sasinaukki Petrus

³⁴See Petrus nabbisara, "Orassa indi ia'u atonna-tonna naapendampe manungku inolaannu Mawu Ruata su anambo n taumata udde nasuḷungnga. ³⁵Taumata apan matta'uttu Mawu Ruata wuṛṛu ma'ola'a apapia, taumata udde sengkamannu Mawu Ruata, tawe mamile itou wuassu pabbawalagu apa. ³⁶Manga tuṛrangnga masingkate laḷoṛṛo n watti'a apan niapaasingkattu Mawu Ruata su pabbawalagu Israel. Ete-udde Watti'u Aḷaḷuassa su ola'u padarame sulaḷummu Mawu Yesus Kristus, eteudde Mawu n anambo n taumata. ³⁷Iamiu masingkate apa

apan nariaddi su ahewallu Yudea, eteudde nitattakka wuassu Gali-lea napawe naliudde sasarrani apan nitita n Yohanes. ³⁸Iamiu masing-katta manungku Mawu Ruata suete namile Mawu Yesus taumata Nazaret udde wuṛṛu nangonggolu Gharraho Mawu Ruata wuṛṛu tarṛino Sitou. Iamiu masingkatta lai manungku Mawu Yesus u'amatta su alawo'u tanpa ma'ola'a apapia; Itou mapaapia n taumata apan niasuttannu Setanna, ana waugu Mawu Ruata uatantalongnga Sitou. ³⁹Ete iami indi manga taumata apan suete naasilo sassane alawo'u manga apa apan niola'i Tou su wanua n taumata n Yahudi wuṛṛu su Yerusalem. Salaiwe aroddi imangitou nangarussa wuṛṛu namate Sitou. ⁴⁰Arawe su allo atallune Mawu Ruata napaawiakki Tou apia wuassu papate wuṛṛu namasilo n Tou su taumata; ⁴¹tawe su anambo n taumata ewe'e tumba'u siami apan suete nipile Mawu Ruata paarorone tadea'u maola'a manga tiala-Ne: Iami u'anna wuṛṛu ma'inumma ringanni Tou napawe Itou nabbiakke apia wuassu papate. ⁴²Wuṛṛu Itou nandolokki ami mama-singkattu Wattu'u Alaluassa udde su manga taumata apan mattiala manungku ete Itou apan nitenegu Mawu Ruata maola'a Mallarṛuungngu manga taumata apan ta'e wiakka wuṛṛu manga taumata apan natete. ⁴³Anambo manga nabi mabatti'i Tou. Imangitou mabbisara manungku anambo n taumata apan mangngimanna Mawu Yesus, sarun ampunganna rosane ringannu tarṛino wuassu Mawu Ruata."

Manga taumata lai waiṇe Yahudi naasomba Gharraho Mawu Ruata

⁴⁴Tantalanna Petrus ta'e mabbisara, Gharraho Mawu Ruata inu-monto'a wuṛṛu nangintarṛo su anambo n taumata apan uararingikka wattu'a udde. ⁴⁵Manga taumata n Yahudi apan mangngimanna Mawu Yesus wuṛṛu taumata uatantalongnga si Petrus wuassu Yope, saranganambone naherangnga naasilo Mawu Ruata nangonggolu Gharraho-Ne su manga taumata pabbawalaga waine apan waiṇe Yahudi. ⁴⁶Ana waugu imangitou naaringikka manga taumata udde uahahatto sulalummu alawo'u wisara wuṛṛu mangke maddalo awawantugu Mawu Ruata. See Petrus nabbiara, ⁴⁷"Pa'ellege, manga taumata indi naasom-bate Gharraho Mawu Ruata ere lai iite. Nariaddi apa wotongnge tau-mata apan mannaṇare simangitou sarṛaniannu ua'e?" ⁴⁸Ne Petrus nan-dolokki mangitou sarṛanianna su arannu Mawu Yesus Kristus. Wua udde imangitou nadorongnga tadea'u Petrus matana'a ringanni mangitou manga pira allo alannune.

Petrus namasingkatta jamaatta su Yerusalem

11 Manga rasul wuṛṛu manga taumata apan mangngimanna su ahewallu leta'u Yudea naaringikka manungku manga taumata apan agamane waḷine Yahudi lai naasengkampe wisara Mawu Ruata. ²Wua udde napawe Petrus inaite watukku Yerusalem, manga taumata n Yahudi apan suete nangngimanna udde, mapaasaḷa m Petrus. ³"Anio i'o rudanta su waḷe manga taumata apan taambe nissunatta? Ewe'e i'o lai inumanna suadio'a ringanni mangitou!" ⁴Ana waugu udde Petrus nanaḷa'a simangitou sarangkanambone apan suete nariaddi, nanattakka wuassu panattaranne. Petrus nabbisara,


⁵"Ia'u tantaḷanna u'aḷiomanna su soa n Yope, see ia'u nisson-dapanna. Ia'u naasilo pia sambau sarannapa naaḷihida ere sangkuḷappa maḷarṛnessa apan maḷaḷakka nonto'a wuassu langitta, ua'ele su wuune appata, wua udde nattaalla su sandirrangku. ⁶Su tempo ia'u na'ellega sulaḷumme, ia'u naasilo manga winatangnga leddane appata, manga winatangnga matengnga, manga winatangnga tuttundo n tianne wuṛṛu manga manu'a matengnga. ⁷See ia'u naaringikka, pia tingikka nabbisara sia'u, 'Ote apu'ote, Petrus! Pototte udde wuṛṛu ante!" ⁸Arawe ia'u sinumimbakka, 'tawe, Mawu! Taambe saran paassa ia'u inumanna anna apan ipappalli wuṛṛu iaarantinna.' ⁹Arawe tingikka udde nabbisara apia wuassu langitta, 'Apa apan suete niwala Mawu Ruata wotongge ipaattu taumata imbarrangnga iwaḷonu palli.' ¹⁰Ia'u naasilo sondappa udde na'oma n sara paatallu sinuḷe, wua udde sarangkanambone nasengkengnga watukku surga. ¹¹Arawe sutempo udde lai sire tallu wuassu Kaisarea, apan nirolokka ringanku na'oma su waḷe pangngintaḷanku. ¹²See Gharraho Mawu Ruata nandolu inai suadio'a ringanni mangitou wuṛṛu tawe mapapadua. Sire annumma turrangnga indi lai tinumantalongnga sia'u watukku Kaisarea, wuṛṛu iami sarangkanambone sinumuttate su waḷe n Kornelius. ¹³Wua udde Kornelius nabbati'a siami ereapa itou naasilo sangkatou mala'ekatta uarisikka sulaḷummu waḷene wuṛṛu nabbisara, 'Pandolokku taumata watukku Yope pawagoa'a sangkatou esakka aranne Simon Petrus. ¹⁴Itou sarun mamasingkatta si'o watti'a apan maasalamatta si'o wuṛṛu laḷorṛo n waḷenu.' ¹⁵Wuṛṛu su tempo ia'u mannatakke mabbisara aroddi," aroddi Petrus nanassute wattingnge, "Gharraho Mawu Ruata nonto'a simangitou, ere lai nariaddi siite rorone su panattaranne. ¹⁶See ia'u naanaungnga Mawu suete nabbisara, 'Yohanes manarṛani ng kua'e arawe iamiu sarun sarṛaniannu Gharraho Mawu Ruata.' ¹⁷Nariaddi nasemakke Mawu Ruata lai mangngonggolla su taumata apan agamane waḷine Yahudi udde, aonggolla apan uasulungnga nionggolli Tou siite su tempo iite mangngimanna Mawu

Yeşus Kristus. Ana waugu udde, tawe mariaddi ia'u maningaddu Mawu Ruata!"

¹⁸Napawe naaringikke udde, imangitou tate nanompola apia. See imangitou nadalote Mawu Ruata. Imangitou mabbisara, "Amungkangngu aroddi, manga taumata apan waḷine Yahudi lai inonggoḷannu Mawu Ruata tempone mawaḷu wuassu manga rosane wuḷḷu massunna wiakka apan tutune!"

Jamaatta su Antiokhia

¹⁹Napawe Stefanus nipate, manga taumata apan mangngimanna Mawu Yesus, nanattakke a'enggenanna, na'oma n sara imangitou nasaliawukka su aḷawo'u tampa. Piaddu tinumaḷangnga su Fenisia, wuḷḷu piaddu lai na'oma su Siprus wuḷḷu Antiokhia. Imangitou mammasingkattu Watti'u Mawu Ruata tumba'u su manga taumata n Yahudi sassane. ²⁰Arawe wuassu wallattu manga taumata mangngimanna udde,



Soa Antiokhia (11:19)

apan darantane wuassu Siprus wuḷḷu Kirene, pia lai manga taumata inai watukku Antiokhia mamasingkattu Watti'u Aḷaḷuassa su ola'u Mawu Yesus udde su manga taumata apan agamane waḷine Yahudi lai. ²¹Taḷḷino Mawu mangke simangitou na'oma n sara taumata nambo mangngimanna wuḷḷu nanantillu watanganne su Mawu.

²²Manga watti'a su ola'u manga aḷaḷḷindu'a udde na'omate lai su jamaattu Yerusalem. Ne imangitou nandolokki Barnabas watukku Antiokhia. ²³Wuḷḷu napawe Barnabas na'omate su Antiokhia, wuḷḷu naasilo ereapa Mawu Ruata nangaḷamatta manga taumata udde, itou

lembo n lulluassa. See itou nadorongnga tadea'u imangitou atonna-tonna tumurutta Mawu Ruata ringannu ahewallu naungnge. ²⁴Barnabas indi sangkatou taumata apan mapia naungnge wuru pia tarino n Gharaho Mawu Ruata see lai lembo mangngimanna Mawu na'oma n sara taumata nambo tinumantalongnga Mawu.

²⁵Wua udde i Barnabas nanute su Tarsus nadea'a si Saulus. ²⁶Napawe nassombate n Saulus, itou nangapidi Saulus watukku Antiokhia wuru santonna alannune imangitou uammulla ringannu jamaatta poiaronddi lapiddu mangngarra'a taumata nambo. Ete su Antiokhia udde, manga taumata apan mangngimanna Mawu Yesus paarorone nisago taumata n Sarani.

²⁷Su tempo udde pia sire pira nabi nirumanta wuassu Yerusalem matukku Antiokhia. ²⁸Su wallatti mangitou pia sangkatou aranne Agabus. Wuassu piarra'u Gharaho Mawu Ruata itou nabbati'a manungku su ahewallu runia sarun mariaddi tempo alarutumma apan wahe-walla: (Wuru olangnge udde natipusse su tempo Klaudius uaparenta.) ²⁹Ne anambo mallaarenggenno Mawu Yesus na'ire mapaapiddu sumbala su manga turangnge apan uatana'a su Yudea, sangkatou-sangkatou nangonggolla tumuruttu asombangnge. ³⁰Paaire udde niola'a lai, see Barnabas wuru Saulus nirolokka manguntudu aonggola udde su manga piarra'u jamaatta.

Pananansara mangke aatambanna

12 Su tempo udde lai Ratu Herodes mannattake mapaasusa manga jamaatta. ²Wuassu parentane, Yakobus turangngi Yohanes nipate n halele. ³Su tempo Herodes naasilo manungku inolaanne udde maaluaassa naungngu manga taumata n Yahudi, itou nattanno lai ereudde; itou nandolokku taumata lai manametta si Petrus. Olangnge udde nariaddi su tempo Allo Wahewa n Roti Tawe Ragine. ⁴Napawe niasamette, Petrus nisutta sulalummu tutupanna. Appatu wageangnga tantara niapaariaga si Petrus - sangkawageanganna udde anambone sire appata. Napawe ramea m Paskah nasuete, wakkute udde Herodes namarikissa si Petrus su saruannu awadaalla. ⁵Nariaddi Petrus tataarangante su tutupanna; arawe manga jamaatta sidutu u'aljomanni Petrus su Mawu ringannu atonna-tonna.

Petrus niapaasabangnga wuassu tutupanna

⁶Sambau rabbi tantaalanna Herodes sarun mapaasaruanni Petrus su awadaalla, Petrus mattiilla aiitannu rate darua, su wallattu rua ng katou tantara mandariaga. Su ngara n tutupanna, manga mandariaga waine

lai uariaga tuttupanna. ⁷Inaṛrombanganne mala'ekattu Mawu uarisikka isudde wuṛṛu sambau semakka natuakka sulaḷummu wabo'a n tuttupanna udde. Mala'ekatta udde nangio'i Petrus na'oma n sara itou napu'o. See mala'ekatta udde nabbisara, "Ei paasaṛṛawutte mapu'o!" Orassa udde lai ṛate atta'a nawu'a wuassu lima m Petrus. ⁸Wua udde mala'ekatta nabbisara, "Luṛṛea'e laungngu wuṛṛu wa'isa'e taḷi n sapa-tunu." Ne Petrus nalluṛṛete n laungnge wuṛṛu nama'issu taḷi n sapa-tune. Wua udde mala'ekatta nabbisara apia, "Luṛṛea'e paḷiwungngu wuṛṛu tantalongke sia'u." ⁹Ne Petrus tinumantalongke mala'ekatta udde sinumabangnga wuassu tuttupanna. Arawe Petrus tawe naatu-tukka manungku inolaannu mala'ekatta udde atonna-tonna nariaddi. Petrus massunna manungku udde tumba'u sambau sondappa. ¹⁰Su tempo imangitou suete sinumabbi tampa pandariaganna paarorone wuṛṛu aruane, itarua na'omate su ngara atta'a, apan mabatukku soa. Ngara udde nawu'a sassane, see itarua sinumabangke wuṛṛu inumamatta su laḷanna maṛṛiputta. Inaṛrombanganne mala'ekatta udde nanantangngi Petrus.

¹¹Wakkute udde Petrus naatutukka apa apan suete nariaddi sitou, see itou nabbisara, "Orassa indi ia'u masingkate manungku Mawu atonna-tonna suete nandolokku mala'ekan-Ne mapasabangu wuassu taṛṛino n Herodes wuṛṛu wuassu aḷawo'u inolaannu pabbawalagu Yahudi sia'u."

¹²Napawe naatutukke olangnge udde, Petrus inaite watukku waḷe Maria, inangngi Yohanes apan isassago lai Markus. Isudde manambo taumata uaammulla wuṛṛu u'aḷiomanna. ¹³Petrus nanengkella ngara n liudde, see sangkatou mangangimbe wawine aranne Rode, nirumanta mamu'a ngara. ¹⁴Itou lapiddu naaillaḷa tingikki Petrus. Ana waugu lulluassa, itou maḷiha-ḷihakka sinumutta apia ringannu tawe namu'a ngara, see nabaḷo manga taumata isudde manungku Petrus wowa su liudde. ¹⁵"I'o wewa!" unni mangitou. Arawe Rode mangke mangngattikka manungku udde atonna-tonna Petrus. Ne imangitou nabbisara, "Udde mala'ekanne!"

¹⁶Tantaḷanna udde Petrus sidutu mannengkela ngara. Ne napawe imangitou namu'a ngara, wuṛṛu naasilo si Petrus, imangitou mangke na-herangnga. ¹⁷Petrus namasingkatta ringannu limane tadea'u imangitou mallannaba, wua udde itou nabbati'e ereapa Mawu suete nangapiddi tou sinumabangnga wuassu tuttupanna. See itou nabbisara, "Waḷoa'a hatto indi si Yakobus wuṛṛu su manga tuṛrangnga waine lai." Wua udde Petrus nanantangke n tampa udde wuṛṛu inaite su tampa waine.

¹⁸Tiṛṛabbine ruaallo nariaddite hio su wallattu tantara mandariaga. Imangitou inaḷiwune su ola'u apa apan suete nariaddi si Petrus. ¹⁹See Herodes nandolokke n taumata niaparea'a si Petrus, arawe imangitou

tawe naasomba si Petrus. Nariaddi Herodes namarenta tadea'u manga mandariaga udde iwaŋoanna see pateanna.

Wua udde Herodes nanantangke n Yudea wuŋu natana'e pira allo aŋannune su Kaisarea.

Apapate n Herodes

²⁰Herodes mangke mandona su manga taumata n Tirus wuŋu Sidon. Ana waugu udde imangitou suadio'a nirumanta sumaruanna sitou. Paarorone imangitou nassalo'i Blastus, apan uapiarra'u waŋe n araratuanni Herodes, na'oma n sara itou nanamba'a simangitou. Wua udde imangitou inaita sinumaruanna si Herodes, see nadorongnga maddame, ana waugu wanua mangitou tumba'u uaantimma anna wuassu wanua n Herodes.

²¹Su sambau allo, apan suete tinantunna, Herodes nalluŋe n laubbu araratuanna see inuma'ianna su addera n araratuanna wuŋu nanattakke massinaukka su saruannu laŋoŋo n soa. ²²Laŋoŋo n soa apan uararing-ikka udde mangke u'ui, "Indi tingikku monganna, waŋine tingikku tau-mata!" ²³Su orassa udde lai mala'ekattu Mawu nameró si Herodes, ana waugu itou tawe mangngaddatta Mawu Ruata. Herodes niinassu uŋidda see nate.

²⁴Ne wisara Mawu Ruata mangke inaringiŋŋannu taumata nambo wuŋu lembo matohassa.

²⁵Napawe Barnabas wuŋu Saulus nanginsue manara mangitou, imangitou nabelengke wuassu Yerusalem ringannu uaapiddi Yohanes Markus suadio'a ringanni mangitou.

Barnabas wuŋu Saulus nipile wuŋu nirolokka

13 Sulaŋummu jamaatta su Antiokhia pia manga nabi wuŋu manga huru eteudde Barnabas, Simeon apan isassago lai Ma'itumma, Lukius wuassu Kirene, Menahem apan niwuwunna suadio'a ringanni Herodes wuŋu Saulus. ²Su tempo imangitou tantaŋanna mattaŋŋamawu su Mawu wuŋu mappuasa, Ghaŋŋaho Mawu Ruata nabbisara simangitou, "Pamilete si Barnabas wuŋu si Saulus tumba'u hunane su manara-U, tadea'u imangitou mammanara manara apan suete niapamanara-U simangitou."

³Napawe suete nappuasa wuŋu inumaŋiomanna, imangitou nangan-dangngu lima si Barnabas wuŋu si Saulus see nandoloke n tarua.

Su Siprus

⁴Ana waugu nirolokku Gharraho Mawu Ruata, Barnabas wuŕru Saulus inaité watukku Seleukia. Wua isudde imangitou nassenggotte watukku tarŕanusa n Siprus. ⁵Napawe na'omate su Salamis imangitou nabbati'u wisara Mawu su manga wale m pattatarŕamawuannu Yahudi. Yohanes Markus nallaŕima su amatanni mangitou.

⁶Ahewallu tarŕanusa udde niamatanni mangitou na'oma n sara watukku Pafos. Poiaroddi imangitou nassomba n sangkatou taumata n Yahudi aranne Bar Yesus. Itou tarŕa waliimmata apan mangnga'u itou nabi. ⁷Sergius Paulus gubernure su tarŕanusa udde hawene tarŕa waliimmata udde. Gubernure udde sangkatou pande wuŕru masarŕaungnga. Itou namago si Barnabas wuŕru si Saulus ana waugu itou maapulu madaringikka wisara Mawu Ruata. ⁸Arawe Barnabas wuŕru Saulus sinigaddi Elimas tarŕa waliimmata udde, ana waugu Elimas (eteudde aranne sulaŕummu wisara n Yunani) maddea'a tadea'u gubernure udde tawe mangngimanna Mawu Yesus. ⁹Arawe Saulus – apan isassago lai Paulus – pia tarŕino n Gharraho Mawu Ruata, na'oma n sara itou nanutudda tarŕa waliimmata udde, ¹⁰wuŕru nabbisara, "Ei tarŕa awusu, ana'u alaŕeo! I'o seettu ala'wo'u apapia. Anio i'o tawe mangilloŕo mandaleo pandumannu Mawu ruata, ipanaŕamatta taumata? ¹¹Orassa indi pa'ellega, Mawu sarun makkuumannu! I'o sarun mawuta, ma'oma n sara i'o tawe maasilo semakku matannallo lai taŕa ng kadio'a."

Orassa udde lai Elimas naappendamma pia awu ma'itumma nallindumma matane, na'oma n sara itou u'amatta uasasarŕipo maddea'a taumata mangehetta sitou. ¹²Napawe gubernure udde naasilo apa apan suete nariaddi, itou nangngimante Mawu Yesus; ana waugu itou mangke niaguku alaŕra'u Mawu.

Su Antiokhia, Pisidia

¹³Wuassu Pafos, Paulus wuŕru manga hawene nassenggotte watukku Perga su Pamfilia. Isudde Yohanes Markus nanantangngi mangitou, see nabelengnga watukku Yerusalem. ¹⁴Wuassu Perga imangitou nanassute amatanne watukku Antiokhia su Pisidia, wua udde su allo n Sabatta imangitou inaité inuma'ianna sulaŕummu wale m pattatarŕamawuanna. ¹⁵Napawe Wuke Musa wuŕru Wuke Manga Nabi niwasate, manga piaŕra'u wale m pattatarŕamawuanna udde nandolokku taumata iapai-waŕo si Paulus wuŕru manga hawene, "Manga turŕangnga, amungkang-

ngu turřangnga pia sambau ałarřa'a su manga taumata indi, wałoa'e ałarřa'a udde." ¹⁶Paulus dirumarisikka, see namatte n lima wua udde nabbisara,

"Manga turřangku pabbawalagu Israel wuřru manga turřangku apan waine isindi, apan tuttuřrutta Mawu Ruata! Padaringikka sia'u: ¹⁷Mawu Ruata m pabbawalagu Israel suete namile iupungngu ałamona ng kite, wuřru na'ola'a pabbawalaga indi pabbawalaga apan wahewa su tempo imangitou uatana'a su Mesir naalıhida ere taumata raho. Wua udde ringannu tarřino apan wahewa Mawu Ruata nangapiddi mangitou sinumabangnga wuassu Mesir. ¹⁸Itou masabare su pallałagu mangitou su wadda'a appattu puło su tonnane ałannune. ¹⁹Pitu pabbawalaga nipate n tou su wanua Kanaan tadea'u maatahia wanua udde su pabbawalagu Israel tadea'u wanua udde maola'a pussa'a mangitou. ²⁰Sarangkanambone udde nariaddi appatu řasutta lima m puło su tonnane ałannune.

Napawe suete nattahia leta'u Kanaan udde, Mawu Ruata nangong-golu manga mallarřuungnga simangitou. Mallarřuungnga panginsueanne eteudde Nabi Samuel. ²¹Wua udde imangitou nadorongnga sangkatou ratu. Mawu Ruata nangonggolli Saul simangitou ana'i Kis wuassu pabbawalagi Benyamin maola'a ratu mangitou appatu puło su tonnane ałannune. ²²Napawe Mawu Ruata nanossokki tou wuassu aiananne, Mawu Ruata nanenegi Daud maola'a ratu mangitou. Wuřru ete indi apan iwabało Mawu Ruata su ola'i Daud, 'Ia'u suete naasomba si Daud ana'i Isai udde sangkatou apan maaluassa naung-Ku. Tumba'u itou taumata apan mangngamattu apulu-U.' ²³Ete wuassi papapulunni Daud udde Mawu Ruata nangonggolla su pabbawalagu Israel sangkatou Ratu m Punnu Sałamatta su ereapa suete pina'ire. Wuřru ete Mawu Yesus udde Ratu m Punnu Sałamatta. ²⁴Ro'e n Mawu Yesus taambe napaa-mattu manara-Ne, Yohanes suete inumalıata su manga taumata n Israel tadea'u imangitou mawału wuassu rosa mangitou wuřru sařranianna. ²⁵Napawe maranite m panginsueannu manarane, Yohanes nabbisara su manga taumata, 'Isai ia'u indi tumuřruttu addapatti amiu? Ia'u wałine taumata apan řarřadoanni amiu. Paanaunge, taumata udde sarun rumanta mananturřrutta sia'u; sara mamu'a sapatu-Ne lai ia'u tawe wotongnge.'

²⁶Manga turřangnga papapulunni Abraham, wuřru manga turřangnga waine apan isindi apan tuttuřrutta Mawu Ruata! Mawu Ruata suete nangonggolu Watti'u Asasałamatta udde siite; ²⁷ana waugu manga taumata apan uatanaa'a su Yerusalem wuřru manga piařra'i mangitou tawe maatutukka manungku ete Itou punnu sałamatta udde. Imangitou tawe maasunna ałarřa'u manga nabi apan iwabasa su manga allo u Sabatta, na'oma n sara imangitou nakkuumannu Mawu Yesus. Arawe ringannu

na'ola'a aroddi, imangitou napaatipussa manungku apa apan iapaasing-kattu manga nabi udde nariaddite. ²⁸Salaiwe imangitou tawe maasomba sambau pasasala wuassi Tou, apan wotongnge maaruumanna ringannu ruumanna pateanna, arawe imangitou nadorongnga si Pilatus tadea'u Itou pateanna. ²⁹Wurru napawe imangitou suete na'ola'a sarangkanambone apan uaworretta su Wuke Susi su ola'i Tou, imangitou nallintukku winalunan-Ne wuassu alu arussa, see niaddo su lalabinganna. ³⁰Arawe Mawu Ruata napaawiakki Tou apia wuassu papate. ³¹Wua udde manga pira allo alannune Itou nirumanta namasilo watangan-Ne su manga taumata apan suete nirumanta ringanni Tou wuassu Galilea watukku Yerusalem. Ete imangitou udde orassa indi naola'a manga tatiala n Tou su pabbawalagu Israel. ³²Nariaddi, orassa indi iami mamasingkattu Wattiu Alaluassa udde siamiu: Apa apan suete pina'ire Mawu Ruata su iupungngu alamona ng kite, ³³udde suete nimanara n Tou siite ringannu napaa-wiakku Mawu Yesus apia wuassu papate. Ana waugu sulalummu Mazmur aruane uaworretta,

'Ete Po Ana-U

su allo indi Ia'u naola'e Iamang-Ngu.'

³⁴Mawu Ruata suete napaawiakki Tou apia wuassu papate. Orassa indi Itou tate lai mamendamma papate sulalummu lalabinganna. Su olangnge udde Mawu Ruata nabbisara,

'Ia'u sarun mangonggolu paaire susi Si'o apan sarun tipusanna,
apan suete pina'ire-U si Daud.'

³⁵Aroddi lai sulalummu tatialane waine niapaasingkatta,

'To tawe mapaawala n Allang-Ngu apan matuurrutta udde mawukku'a
sulalummu lalabinganna.'

³⁶Daud natete wurru nilabingnga lai suadio'a ringannu iupungngu alamonane, napawe itou suete nammanara apa apan nirolokku Mawu Ruata sitou. Winalunanni Daud narrenessa wurru sarangkanambone nasuete. ³⁷Arawe Mawu Yesus apan suete niapaawiakku Mawu Ruata wuassu papate-Ne udde tawe narrenessa aroddi. ³⁸⁻³⁹Ana waugu udde manga turangnga, iamiu rinone maasingkata manungku sulalummu Mawu Yesus indi, wattia su ola'u pangangampungnga rosa niapaasingkatta siamiu; iamiu rinone masingkatta manungku suapa n taumata apan mangngimanna Sitou, iapaaliu wuassu alawo'u rosa apan tawe iapappa-ssa sulalummu manga parenta Mawu Ruata apan niapaasingkatti Musa.

⁴⁰Ana waugu udde rinone iamiu manutukka mapia-pia, arie ma'oma n sara mariaddi siamiu apa apan iwabbisara manga nabi indi,

⁴¹Panutukka paapia-pia, ei iamiu manga taumata apan maapulu
mangaluandaga!

Iamiu sarun maherangnga see mate!

Ana waugu su tempo indi ia'u tanta'anna ma'ola'a manga

apa apan tawe pangimananni amiu sassane
salaiwe pia taumata manna'a siamiu.'"

⁴²Napawe Paulus wuṛṛu Barnabas nanantangngu waḷe m pattataṛṛamawuanna udde, manga taumata su waḷe m pattataṛṛamawuanna udde madorongnga sitarua mabelengnga apia su allo n Sabatta manansunna, tadea'u manala'a sansune su ola'u manga hatto udde. ⁴³Napawe manga taumata sinumabangke wuassu waḷe m pattataṛṛamawuanna udde, Paulus wuṛṛu Barnabas nitantalongannu manambo taumata n Yahudi wuṛṛu taumata m pabbawalaga waine apan suete sinumutta agama n Yahudi. Ne manga rasul udde nangaṛṛa'a simangitou tadea'u imangitou sidutu uantimma alaṃattu Mawu Ruata.

⁴⁴Su allo n Sabatta manansunna, marani n anambo n taumata su soa udde nirumanta madaringikka wisara Mawu. ⁴⁵Napawe manga taumata n Yahudi naasilo taumata manambo udde, imangitou mannihikka atonna. Imangitou manggaḷuandaga si Paulus wuṛṛu mannompola anambo n wisarane. ⁴⁶Arawe ringannu lembo n waṛṛani lai Paulus wuṛṛu Barnabas nabbisara uahahati. Imangitou nabbisara, "Wisara Mawu Ruata atonna ṛinone iwaḷo siamiu rorone. Arawe ana waugu iamiu maddiri madaringikka, iamiu suete namile sassane manungku iamiu tawe ṛinone manengkamma wiakka tutune wuṛṛu saran maḷannu-ḷannu. Wuṛṛu orassa indi iami manantangngi amiu wuṛṛu inaite ringannu pabbawalaga waine. ⁴⁷Ana waugu indi parenta Mawu siami: Mawu nabbisara,

'Ia'u suete namile siamiu maola'a semakka su manga taumata waine
apan waḷine Yahudi,

tadea'u iamiu mangapiddu asalaṃatta su ahewallu runia.'"

⁴⁸Su tempo manga pabbawalaga waine apan waḷine Yahudi naaringikka udde, imangitou lembo n lulluassa, see mangke maddalo wisara Mawu. Wuṛṛu manga taumata apan suete nitantunnu Mawu Ruata maa-somba wiakka tutune wuṛṛu saran maḷannu-ḷannu, manga taumata udde mangnimanna.

⁴⁹Ne wisara Mawu nassaliawukke su ahewallu leta'a udde. ⁵⁰Arawe manga tembonannu soa udde wuṛṛu manga wawine wuassu wageangngu taumata papunna apan matta'uttu Mawu Ruata, niwaḷoannu manga taumata n Yahudi. Imangitou na'ola'a pabbawawuḷo su saruanni Paulus wuṛṛu Barnabas, wuṛṛu nallimbuakka sitarua wuassu leta'a udde. ⁵¹Ne manga rasul udde nangesoge n awu ledda mangitou su saruannu manga taumata udde, maola'a sambau pananaunganna, see itarua inaite watukku Ikonium. ⁵²Manga mallalaṛṛenggenna su Antiokhia lembo n lulluassa wuṛṛu niintarṛoannu Ghaṛṛaho Mawu Ruata.

Su Ikonium

14 Paulus wuṛṛu Barnabas naapendamma olangnge uasulungnga ereudde su Ikonium. Imangitou inaita lai su wale m patta-tarṛamawuannu Yahudi wuṛṛu nabbisara isudde aroddi lai olangnge na'oma n sara manambo taumata n Yahudi wuṛṛu wāline Yahudi mangngimanna Mawu Yesus. ²Arawe manga taumata n Yahudi apan maddiri mangngimanna, mammono'a manga taumata wāline Yahudi, na'oma n sara imangitou mannaungnga laleo su manga taumata apan mangngimanna Mawu Yesus. ³Ana waugu udde Paulus wuṛṛu Barnabas natana'a maḷannu isudde. Wuṛṛu ringannu waṛrani imangitou mabatti'u wisara Mawu. Ne Mawu lai napaaliatta'a manungku watti'i mangitou su ola'u darangngu-Ne udde atonna; Itou nangonggolu tarṛino simangitou ma'ola'a alaṛṛindu'a wuṛṛu inolaanna waine. ⁴Arawe tumana'u soa udde uatatiakka sangkatou ringannu sangkatou; piaddu mannamba'a taumata n Yahudi wuṛṛu piaddu lai mannamba'a manga rasul udde.

⁵See manga taumata n Yahudi wuṛṛu manga piarṛangnge su sam-punna ringannu manga taumata wāline Yahudi na'ire manansara wuṛṛu manuntungngu watu su manga rasul udde. ⁶Arawe manga rasul udde naasingkattu olangnge udde, see nangingkatte watukku Litra wuṛṛu Derbe, eteudde manga soa su Likaonia, wuṛṛu watukku leta'a maranine. ⁷Poiaroddi imangitou mabatti'u lai Watti'u Alaḷuassa udde.

Su Litra wuṛṛu Derbe

⁸Su Litra pia sangkatou esakka leddane lome ro'e n niariaddine, na'oma n sara itou tawe maamatta, ana waugu leddane tumanite n lome. ⁹Taumata udde ua'ianna poiaroddi uararingikka si Paulus mabbisara. Paulus naasilo manungku taumata udde mangngimanna wuṛṛu ana waugu udde itou wotongnge iapaapia. Ne Paulus nanutuda sitou, ¹⁰wuṛṛu ringannu tingikka ma'ikkatta Paulus nabbisara, "Darisikka paatulidda!" Taumata udde sinumolo'a dirumarisikka see inumamatta. ¹¹Napawe taumata nambo udde naasilo apa apan suete niola'i Paulus, imangitou mangngintuḷi sulaḷummu wisara n Likaonia, "Manga monganna sinumossokke su runia ringannu awa'u taumata." ¹²See Barnabas nisaggo mangitou Zeus, wuṛṛu Paulus nisaggo mangitou Hermes, ana waugu ete itou nabbisara. ¹³Imam Monganna Zeus apan tanpa pattatarṛamawuane su saruannu soa, nirumanta uaapiddu manga sapi esakka wuṛṛu manga wunga ng kalu su ngara wahewa n:soa udde. Itou

maapulu tumantalongnga taumata nambo udde manguntudu sasamba su manga rasul udde.

¹⁴Napawe Barnabas wuṛṛu Paulus naaringikka apa apan niola'u taumata nambo udde, imangitou nanggesa'a manga laungnge lapiddu tutalangnga su pattangngannu awadaalla udde see u'aljata, ¹⁵"Ei, anio iamiu ma'ola'a arendi? Iami indi taumata ere lai iamiu! Iami rudanta mamasingkattu Watti'u Alaluassa siamiu tadea'u iamiu manantangngu inolaanna laleo indi wuṛṛu rumanta ringannu Mawu Ruata apan wiakka, nandiadi langitta wuṛṛu runia wuṛṛu tahaḷoangnga wuṛṛu anambo n laḷorṛone. ¹⁶Su tempo naliu Mawu namala manga pabbawalaga tuttuṛṛutta apulune sassane. ¹⁷Arawe Itou tawe maabuli mangonggolu tatiala-Ne, eteudde ringannu ma'ola'a apapia. Itou mangngonggolu uranna wuassu langitta wuṛṛu hessi n leta'a su tempone. Itou mangngonggolu anna siamiu wuṛṛu malluassa naungngu." ¹⁸Arawe ringannu wisara udde lai ta'e masahadda manga rasul udde maningaddu manga taumata mangonggolu sasamba simangitou.

¹⁹Manga pira taumata n Yahudi apan nirumanta su Listra wuassu Antiokhia su Pisidia wuṛṛu Ikonium mammono'a awadaalla, na'oma n sara taumata nambo udde nanamba'a simangitou. Imangitou nanuntungngu watu si Paulus, wuṛṛu namolengnga sitou watukku liuddu soa. Imangitou massunna naudde itou natete, ²⁰arawe napawe manga taumata apan mangngimanna isudde uarisikka uapaḷiwutta sitou, itou dirumarisikka wuṛṛu nabelengnga apia watukku soa. Tiṛṛabbine itou inaite watukku Derbe su sampunna ringanni Barnabas.

Paulus wuṛṛu Barnabas nabelengnga watukku Antiokhia

²¹Su Derbe, Paulus wuṛṛu Barnabas mabatti'u Watti'u Alaluassa udde wuṛṛu manambo taumata apan nangngimanna Mawu Yesus. Wua udde imangitou nabelengke su Listra, wua udde su Ikonium, see su Antiokhia su Pisidia. ²²Su manga soa udde imangitou mannohassa naungngu mallalaṛṛenggennu Mawu Yesus wuṛṛu mannantiro mallalaṛṛenggenna udde tadea'u sidutu mangngimanna Mawu Yesus. "Iite rinone matataṛṛangnga rorone, wakkute udde iite wotongnge mamen-damma alaluassa su Runia Waku Mawu Ruata," aroddi manga rasul udde mangngaṛṛa'a manga mallalaṛṛenggennu Mawu Yesus su soa udde. ²³Wuṛṛu su alawo'u jamaatta, Paulus wuṛṛu Barnabas nanenegu manga piaṛṛangnge su jamaatta udde. See ringannu u'aljomanna wuṛṛu mappuasa, imangitou nanantillu manga piaṛṛangnge udde su Mawu apan pangngimananni mangitou.

²⁴Wua udde Paulus wuṛṛu Barnabas nanassute amatanni mangitou sinumabbi leta'u Pisidia wuṛṛu na'omate su Pamfilia. ²⁵Wuṛṛu napawe imangitou suete namasingkattu watti'u Mawu Ruata su Perga, imangitou inaita watukku Atalia. ²⁶Wua isudde imangitou nassenggotte apia watukku Antiokhia. Eteudde soa tampa mangitou rorone tinantilla su darangngu Mawu Ruata, tadea'u imangitou mammanara manara apan orassa indi suete niinsue mangitou.

²⁷Napawe na'omate su Antiokhia, imangitou nangammullu manga taumata wuassu jamaatta udde, see nabatti'u sarangkanambone apan suete niola'u Mawu Ruata sulalummi mangitou. Imangitou nabbati'a lai su ola'u ereapa Mawu Ruata suete namantingidu laḷanna tadea'u manga taumata apan waḷine Yahudi mangngimanna Mawu Yesus. ²⁸Su soa udde Paulus wuṛṛu Barnabas natana'a maḷannu ringannu manga taumata apan mangngimanna.

Ra'ianna su Yerusalem

15 Manga pira taumata wuassu Yudea nirumanta su Antiokhia wuṛṛu mangngaṛṛa'a manga taumata mangngimanna su Antiokhia udde manungku amungkangngu imangitou tawe sunatanna tumuṛuttu Tita Musa, imangitou tawe masalamatta. ²Paulus wuṛṛu Barnabas mangke mannompola addapattu manga taumata udde. Panginsueanne tinantunna tadea'u Paulus wuṛṛu Barnabas wuṛṛu manga pira taumata waine wuassu Antiokhia inai watukku Yerusalem suadio'a ringannu manga rasul wuṛṛu manga piaṛrangnge poiारoddi.

³Jamaatta su Antiokhia nanguntudi mangitou na'oma n sara su liuddu soa, wua udde imangitou inaita nabatukku Fenesia wuṛṛu Samaria. Poiaroddi imangitou nabbati'u ereapa manga taumata apan waḷine Yahudi suete nanantillu watanganne su Mawu Ruata. Watti'a udde naaḷuassa manga taumata mangngimanna isudde. ⁴Napawe imangitou na'omate su Yerusalem, imangitou sinaḷohoannu jamaatta ringannu mapia, wuṛṛu manga rasul see manga piaṛrangnge. See imangitou nabbati'a su manga taumata isudde su ola'u anambo n inolaannu Mawu Ruata sulalummi mangitou. ⁵Arawe sire pira wuassu wageangngu Farisi apan suete nangngimanna, dirumarisikka wuṛṛu nabbisara, "Manga taumata pabbawalaga waine apan nangngimante udde ṛinone sunatanna wuṛṛu ṛinone tumuṛutta Tita Musa."

⁶See manga rasul wuṛṛu manga piaṛrangnge naammulla magahatto n'olangnge udde. ⁷Maḷannu atonna imangitou uaraṛringidda su sambau. Panginsueanne Petrus dirumarisikka wuṛṛu nabbisara, "Manga tuṛrangnga! Iamiu sassane masingkatta manungku tempo naḷiu Mawu

Ruata namile sia'u wuassu wallatti amiu mamasingkattu Watti'u Ala'uassa udde su manga taumata apan wa'line Yahudi, tadea'u imangitou madaringikka wu'ru mangngimanna. ⁸ Wu'ru Mawu Ruata apan masingkattu naungngu taumata suete napaaliatta'a manungku Itou manengkamma simangitou; Itou napaaliatta'u olangnge udde ringannu nangonggolu Gharraho Mawu Ruata simangitou ere lai suete nionggolla siite. ⁹ Mawu Ruata tawe mapaparra ng kite wu'ru imangitou. Itou nangukkassa naungngi mangitou ana waugu imangitou mangngimanna. ¹⁰ E, anio iamiu lullawangnga Mawu Ruata orassa indi ringannu nangonggolu winabbawa apan mawakkata su mallalarrengenna indi, sumba'i iupungngu ala'mona ng kite wu'ru iite sassane lai tawe maaturrutta manara udde? ¹¹ Arawe, iite mangngimanna wu'ru iite naasomba asalamatta ana waugu darangngu Mawu Yesus; aroddi lai imangitou."

¹² Ne nallannabe manga taumata apan uaammulla isudde. Wua udde imangitou nadaringikka si Barnabas wu'ru si Paulus nabbatti'a apia su ola'u anambo n alarrindu'a wu'ru manga inolaanna apan wahewalla apan suete niola'u Mawu Ruata sula'ummi mangitou su wallattu manga taumata m pabbawalaga waine apan wa'line Yahudi. ¹³ Napawe imangitou suete nabbisara, Yakobus nabbisara, "Manga turrangnga! Padaringikka sia'u. ¹⁴ Simon wakkute lai nana'a'a ereapa Mawu Ruata paarorone napaaliatta'u naung-Nge su manga taumata wa'line Yahudi ringannu pandumma mamile wuassi mangitou manga taumata waine apan sarun olaanna pabbawala-Ge. ¹⁵ Udde nassulungngu apa apan suete niapaasingkattu manga nabi. Ana waugu pia uaworretta arendi,

¹⁶ Napawe wua udde Ia'u sarun rumanta apia,' unnu Mawu,

'Ia'u sarun mapararisikka apia wa'e n Daud apan narraate wu'ru manule n aolangnge nahohakka,
see iapararisikka apia;

¹⁷ tadea'u taumata apan lambene udde maddea'a Mawu,
su sampunna ringannu pabbawalaga waine apan wa'line Yahudi apan suete niwagoang-Ku maola'a pussaa-U.'

Ete aroddi wisara Mawu,

¹⁸ apan suete namasingkattu olangnge udde ro'e m paarorone."

¹⁹ "Nariaddi tumuruttu addapa'u," unni Yakobus, "Iite tawe wotongnge mapaasusa n taumata wa'line Yahudi udde apan suete nanantillu wadangnge su Mawu Ruata. ²⁰ Arawe iite rinone mamorrettu suratta simangitou tadea'u imangitou tawe umanna anna la'eo apan suete pinassubba paaluanna, ara'e inassa wuassu remessu winatangnga apan nate niatongnga, ara'e ma'inumma rarra. Wu'ru lai tadea'u imangitou maparau watanganne wuassu manga inolaanna apan la'eo. ²¹ Ana waugu Tita Musa ro'e n paarorone iwabbasa suapa n allo n Sabatta su manga wa'e m pattatarramawuanna wu'ru iapaasingkatta su anambo n soa."



Manga monganna (15:20)

Suratta su manga taumata pabbawalaga waine apan suete nangngimanna

²²Manga rasul wuŕŕu manga piaŕrangnge, su sampunna ringannu jamaatta udde naŕrawessa mamile manga pira ng katou taumata wuassu wallatti mangitou apan sarun irolokka watukku Antiokhia suadio'a ringanni Paulus wuŕŕu Barnabas. Imangitou namile si Silas wuŕŕu si Yudas apan isassago lai Barsabas. Taumata darua indi paarorone su wallattu manga taumata mangngimanna su Yerusalem. ²³Suadio'a ringannu manga daroloŕŕanna udde, imangitou napaapiddu suratta lai apan tingikke arendi,

"Iwuna'a su anambo n tuŕrangnga wuassu manga pabbawalaga waine apan waŕine Yahudi, wuŕŕu uatana'a su Antiokhia, Siria, wuŕŕu Kili-kia. Tabea wuassi ami, manga rasul wuŕŕu manga piaŕrangnge, eteudde manga tuŕrangngu. ²⁴Iami naaringikka pia sire pira taumata wuassu wal-latti ami apan suete nirumanta ringanni amiu nanongkakka wuŕŕu naa-patiangnga ng kamiu ringannu alaŕŕa'i mangitou. Sumbaŕi iami tawe nandolokki mangitou ma'ola'a manara udde. ²⁵Ana waugu udde iami suete na'ire wuŕŕu sarangkanambone inumire mamile sire pira taumata wuŕŕu mandolokki mangitou ringanni amiu. Imangitou sarun inai sua-dio'a ringannu tuŕrangnga Barnabas wuŕŕu Paulus apan arangnguanni ami. ²⁶Itarua indi eteudde manga taumata apan suete nanantillu niawane ana waugu Mawu ng kite Yesus Kristus. ²⁷Nariaddi iami nan-dolokki Yudas wuŕŕu Silas ringannu manga tuŕrangnga. Ete imangi-

tou sassane mamasinkatta uahahati siamiu watti'a apan uaworretta sulalumu suratta indi lai. ²⁸Gharraho Mawu Ruata suete namala – wufu iami maapulu tadea'u iamiu tawe onggolannu manara apan awak-katanne wuassu manga manara apan apianne indi: ²⁹imbarangnga umanna anna apan suete pinassubba paa'uanna; imbarangnga ma'inumma rarra, imbarangnga uminassa remessu winatangnga nate niatongnga, wufu paarau n inolaanna apan laleo. Amungkanngu iamiu mangindau watanganni amiu wuassu manga inolaanna udde, iamiu suete na'ola'a apapia. Na'omate isindi, tabea!"

³⁰Napawe suete nabafo inaite, imangitou apan nirolokka udde, nabatukke n Antiokhia. Poiaroddi imangitou namaggo anambo n jamaatta maammula see namasingkattu laforro n suratta udde. ³¹Napawe manga jamaatta naawasa n suratta udde, imangitou mangke lulluassa ana wangu laforro n suratta udde maalussa naunggi mangitou. ³²Yudas wufu Silas, apan nabi lai, malannu uahahatto manga turangnga apan mangngimanna su Antiokhia udde wufu nangoggolu sasasa wufu awawarani simangitou. ³³Napawe Yudas wufu Silas natana'a manga pira allo alannune, manga taumata mangngimanna su Antiokhia udde nandolokki mangitou mabelengnga wufu nananata n tabea mangitou su manga taumata apan nandolokki mangitou. [³⁴Arawe Silas narawessa see sidutu matana'a su Antiokhia.]

³⁵Paulus wufu Barnabas natana'a lai manga pira allo alannune su Antiokhia. Poiaroddi imangitou manggarra'a wufu mabatti'u wisara Mawu suadio'a ringannu taumata nambo waine.

Paulus wufu Barnabas nattaiei

³⁶Tawe nalannu wua udde Paulus nabbisara si Barnabas, "Wette iite mabelengke apia mattembo manga turangnga apan mangngimanna Mawu Yesus su anambo n soa apan suete niwatti'i anni ite wisara Mawu; tadea'u iite maasilo ereapa ola'i mangitou." ³⁷Barnabas maapulu mangapiddi Yohanes Markus, ³⁸arawe Paulus mammendamma laleo mangapiddi Markus apan maddiri mammanara su sampunna ringanni mangitou wufu nanantanggi mangitou su Pamfilia. ³⁹Ne Paulus wufu Barnabas natatiakka na'oma n sara panginsueanne itarua nattaiei: Barnabas nangahete si Markus wufu nassenggotte itarua watukku Siprus. ⁴⁰Paulus namile si Silas see inaite itarua napawe manga turangnge su Antiokhia nanantilli tarua su alamattu Mawu. ⁴¹Itarua namaliwutta Siria wufu Kilikia; poiaroddi itarua mannohassa manga jamaatta.

Timotius tinumantalongnga si Paulus wurru si Silas

16 Paulus nanassute amatanne watukku Derbe, wua udde watukku Listra. Isudde pia sangkatou mallajarrenggennu Mawu Yesus aranne Timotius. Inangngene sangkatou Yahudi, apan mangngimante Mawu Yesus; arawe iamangnge taumata n Yunani. ²Su wallattu manga taumata mangngimanna apan uatana'a su Listra wurru Ikonium, Timotius niasingkatanna sangkatou taumata apan mapia. ³Paulus maapulu tadea'u Timotius tumantalongnga sitou; ana waugu udde itou nanunatte si Timotius. Itou na'ola'a arodidi ana waugu manga taumata n Yahudi su wanua udde manambo masingkatta manungku iamangngi Timotius sangkatou taumata n Yunani. ⁴Su alawo'u soa apan tattemboanni mangitou, imangitou mammasingkatta su manga taumata apan mangngimanna manga atoranna apan suete tinantunnu manga rasul wurru manga piarrangge su Yerusalem. Imangitou mannantiro manga turrangnga apan suete nangngimanna udde tadea'u tumurrutta manga atoranna udde. ⁵Ne manga jamaatta udde niatambante atatohassu pangangimanne, wurru miallo-miallo aatambanna n anambone.

Su Troas: Paulus nisondapanna

⁶Gharraho Mawu Ruata tawe namala m Paulus wurru Silas mabatti'u wisara Mawu Ruata su leta'u Asia. Nariaddi amamatti tarua nisassute watukku wageangngu Frigia wurru Galatia. ⁷Napawe na'omate su passarannu Misia, itarua naannamma sinumutta su leta'u Bitinia, arawe Gharraho Mawu Yesus naningaddi tarua inai isudde. ⁸Nariaddi itarua inumamatta nanassute su Misia wurru lapiddu nasa'a watukku Troas. ⁹Rabbine su Troas, Paulus nisondapanna. Sula'ummu sondapa udde itou naasilo taumata Makedonia uarisikka su saruane lapiddu susalande tadea'u itou lai inai watukku Makedonia mantulungngi mangitou. ¹⁰Napawe Paulus wua nisondapanna udde, iami lapiddu nasasaddia inai watukku Makedonia. Ana waugu ringannu antimma iami makkawessa manungku Mawu Ruata nandolokki ami mabatti'u Watti'u Alafuassa udde su manga taumata poiaroddi.

Su Filipi: Lidia nangngimanna Mawu Ruata

¹¹Iami nanantangke n Troas wurru nassenggotte watukku Samotrake, wurru tirabbine watukku Neapolis. ¹²Wua isudde iami watukku Filipi,



Soa Filipi (16:12)

sambau soa paarorone su leta'u Makedonia. Filipi udde paparentannu araratuannu Roma. Poiaroddi iami natana'a manga pira allo. ¹³Su allo n Sabatta iami inai su winggi n saɭukka su liuddu ngara wāhewa n soa, ana waugu iami mammendamma isudde pia tampa pangngaɭiomanannu taumata n Yahudi. See iami inuma'iante wurru nagahatote manga wawine apan uaammulla su tampa udde. ¹⁴Sangkatou su wallatti mangitou eteudde mabbawaɭu'u maɭaɽɽenessa ungu, aranne Lidia taumata wua-ssu Tiatira. Itou marangngu Mawu Ruata, ne Mawu nangaɭore naung-nge tadea'u itou manengkamma apa apan iaarra'i Paulus sitou. ¹⁵Lidia wurru laɭoɽro n waɭene nisarraɽite. Napawe suete n sarɽanine itou nabaɭo siami. Itou nabbisara, "Amungkangngu manga tuɽrangnga mam-mendamma ia'u atonna-tonna suete nangngimanna Mawu Yesus, wette pangintaɭate su waɭe'u." See itou mammata'a tadea'u iami tumuɽɽutta daroronggi tou.

Paulus niɽruumanna su Filipi

¹⁶Su sambau allo tantaɭanna iami u'aɭiomanna, iami nassomba n sangkatou wawine; itou allangnga. Wawine udde aintaɽroannu ghaɽraho laɭeo apan wotongnge mani'attu arariadianna apan sarun rumanta. Ringannu manni'attu inolaannu taumata, wawine udde mangngong-golu auntunganna apan wahewa su mawune. ¹⁷Wawine udde sidutu uatantalongnga si Paulus wurru siami lapiddu u'aɭiata, "Manga tau-mata indi allangngu Mawu Ruata apan ahewaɭanne! Imangitou niru-manta mapaasingkatta su manga tuɽrangnga ereapa laɭanne iamiu ma-saɭamatta!" ¹⁸Manga pira allo aɭannune wawine udde sidutu u'aɭiata aroddi. Paulus niasueannu asasabarene, na'oma n sara itou nanaile see nabbisara ghaɽraho laɭeo udde, "Ringannu arannu Mawu Yesus

Kristus, ia'u mamarenta si'o sabbangnga wuassu wawine udde." Orassa udde lai gharraho udde nanantangngu wawine udde. ¹⁹Napawe manga mawune naatutukka manungku tempo mangitou maasomba roitta udde nawulite, imangitou nanametta si Paulus wuŕru si Silas, see itarua niwolengnga watukku tampa m pangilloŕoanna iapaasaruanna pamarenta. ²⁰Imangitou napaasaruanni Paulus wuŕru Silas su manga tembonannu Roma, wua udde nabbisara, "Manga taumata indi taumata n Yahudi. Imangitou mangngaliba'ukku soa ng kite. ²¹Imangitou nandolokku taumata mallagu n addatta inanaramanna apan uapapaŕralla manga tita ng kite taumata n Roma. Iite tawe wotongnge manengkamma ara'e tumuŕrutta addatta inanaramanna udde!" ²²Awadaalla udde lapiddu namuulla si Paulus wuŕru si Silas; wuŕru manga piaŕra'u pamarenta nanggesa'a laubbu rasul darua udde see nandolokku taumata niapapuulla sitarua. ²³Napawe itarua nipuulla ma'ikkatta, itarua nitaŕro sulaŕummu tuttuŕpanna. Tembonannu tuttuŕpanna nirolokka mandiaga sitarua ringannu matohassa. ²⁴Ana waugu parenta udde, tembonannu tuttuŕpanna nantaŕro n tarua su wabo'a n tuttuŕpanna apan alaŕumanne, wuŕru ledda n tarua nimantungnga su salaŕba'u.

²⁵Iraŕrangngo alloaranete, i Paulus wuŕru i Silas u'alaŕiomanna wuŕru mangngantari n daralo su Mawu Ruata. Manga taumata tataŕranganna waine lai tantaŕanna uararingikka sitarua mangngantari. ²⁶Inaŕrombanganne nallinukka wahewa na'oma n sara rapappaku tuttuŕpanna udde inumio'a. Anambo ngara n tuttuŕpanna udde nawu'a wuŕru manga ŕate apan uamantungngu taumata n tuttuŕpanna udde napallosa. ²⁷Tembonannu tuttuŕpanna udde niŕrumindu'a napu'o. Napawe itou naasilo manga ngara n tuttuŕpanna udde nawu'a, itou nanawutta haŕele ipamate ririne, ana waugu itou massunna manungku manga taumata apan tataŕranganna tinumaŕangke abbi. ²⁸Arawe Paulus inumui ma'ikkaikkatta, "Arie pamate ririnu! Iami sarangkanambone ta'e isindi!"

²⁹Tembonannu tuttuŕpanna udde nadorongnga soŕo see tinumaŕangnga watukku laŕumme, wuŕru ringannu mangngindo itou inumaŕintuda su saruanni Paulus wuŕru Silas. ³⁰Wua udde itou nangapiddi tarua sinumabangnga wuŕru nabbisara, "Manga mawu, apa ŕinone ta'u olaanna tadea'u ia'u masaŕamatta?"

³¹Paulus wuŕru Silas sinumimbakka, "Pangngimante Mawu Yesus! Po saru masaŕamatta - i'o wuŕru anambo n taumata sulaŕummu waŕenu!" ³²See Paulus wuŕru Silas nanaŕaate wisara Mawu su tembonannu tuttuŕpanna udde wuŕru anambo n taumata sulaŕummu waŕene. ³³Su ŕabbi mattangnga udde lai, tembonannu tuttuŕpanna udde nangapiddi tarua see namaresi manga lessa n tarua. Ne itou wuŕru anambo n laŕoŕro n waŕene lapiddu naisaŕrani. ³⁴Wua udde itou nangapiddi Paulus wuŕru Silas su waŕene wuŕru itarua niapaante. Itou wuŕru laŕoŕro

n wałene mangke lulluassa ana waugu imangitou orassa udde nangngimante Mawu Ruata.

³⁵Tirabbine ruaallo, manga piařra'u pamarenta n Roma nandolokku Polisi watukku tuttupanna iapawało, tadea'u Paulus wuřru Silas iapałlossa.

³⁶Tembonannu tuttupanna udde nabało m batti'a udde si Paulus. Itou nabbisara, "Manga mawu, manga piařra'u pamarenta suete nandolokka tadea'u manga mawu iapałlossa. Orassa indi manga mawu wotonggete mapułe. Sałamatte umamatta!"

³⁷Arawe Paulus nabbisara su manga polisi udde, "Iami tumana'u Roma. Taambe niparikisanna iami suete nipuulla su saruannu awadaalla wuřru tinařro sulałummu tuttupanna. Wuřru orassa indi imangitou mandolokki ami mapułe ringannu małanna-łannaba? Iami maddiri! Dołorřa'a manga piařra'u pamarenta udde rumanta sassane isindi mamalloso ami."

³⁸Manga polisi udde nabało n hatto udde su manga piařra'u pamarenta n Roma. Napawe manga piařrangnge udde naaringikka manungku Paulus wuřru Silas tumana'u aratuannu Roma, imangitou nata'utta.

³⁹See imangitou inaita nadorongnga ampungnga si Paulus wuřru si Silas, wua udde nanguntudi tarua sinumabangnga wuassu tuttupanna, lapiddu nadorongnga tadea'u imangitou mangingkatta wuassu soa udde.

⁴⁰Paulus wuřru Silas nanantangngu tuttupanna udde see inaita su wałe n Lidia. Napawe suete nassomba manga taumata mangngimanna poiarddi, wuřru nangonggolu sasasa simangitou, Paulus wuřru Silas inumamatte.

Su Tesalonika

17 Paulus wuřru Silas nanassute n amatanni tarua sinumabbi Amfi-polis wuřru Apolonia see na'omate su Tesalonika. Poiaroddi pia wałe m pattatařramawuannu taumata n Yahudi. ²Ne Paulus inaita watukku wałe m pattatařramawuanna udde – ere su anaramme amungkangngu pia wałe m pattatařramawuannu taumata n Yahudi – see mařringidda su sambau ringannu manga taumata isudde su ola'u tatiala n Wuke Susi. Itou na'ola'a udde paatallu allo n Sabatta ualałintuřrutta. ³Tumuřruttu pinangianannu manga tatiala Wuke Susi itou mannała'a wuřru mammasingkatta manungku Ratu m Punnu Sałamatta apan pina'ire Mawu Ruata, řinone matatařrangnga wuřru mabbiakka apia wuassu papate. "Mawu Yesus apan ta'u iapaasingkatta siamiu udde, ete Itou Ratu m Punnu Sałamatta apan pina'ire," unni Paulus. ⁴Manga pira taumata mangngimanna see tinumantalongnga si Paulus wuřru si Silas;

aroddi lai anambo n taumata n Yunani apan matta'uttu Mawu Ruata wuṛṛu manambo lai manga wawine piarṛangge.

⁵Arawe manga taumata n Yahudi mannihikka. Imangitou namago manga taumata ulallele su manga laḷanna wuṛṛu na'ola'a ammuḷanna mangaliba'ukka. See imangitou nangaliba'ukke su ahewallu soa udde wuṛṛu nattuda m baḷe n sangkatou apan mangngimanna aranne Yason maddea'a si Paulus wuṛṛu si Silas, ana waugu imangitou maapulu mangapiddi Paulus wuṛṛu Silas sumabangnga iapasaruanna awadaalla. ⁶Arawe su tempo imangitou tawe naasomba si Paulus wuṛṛu si Silas, imangitou namoḷengnga si Yason wuṛṛu manga pira taumata mangngimanna waine, sinumaruanna manga tembonanne apan uaparenta su soa udde. Imangitou u'ui, "Manga taumata indi mangngaliba'ukka su ala'wo'u tampa! Orassa indi soa ng kite lai nirantanni mangitou, ⁷wuṛṛu Yason suete napaintaḷa mangitou su waḷene. Imangitou sarangkanambone nilumawangnga manga atorannu Kaisar Roma, ana waugu imangitou mabbisara manungku pia lai ratu waine aranne Mawu Yesus." ⁸Ringannu manga wisara udde imangitou na'ola'a manga taumata nambo wuṛṛu manga tembonanne su soa udde hinumio. ⁹See manga tembonanne udde nandolokki Yason wuṛṛu manga taumata mangngimanna apan waine udde mamaekka roittu pasasaḷa. Wakkute udde imangitou ipallossa.

Su Berea

¹⁰Rabbi udde lai manga taumata mangngimanna su soa udde lai nandolokki Paulus wuṛṛu Silas inai watukku Berea. Napawe na'omate isudde, Paulus wuṛṛu Silas inaita su waḷe m pattataṛramawuannu Yahudi. ¹¹Manga taumata su Berea masarṛionto'a naungnge wuassu manga taumata su Tesalonika. Ringannu naungnga maḷuassa imangitou madaringikka watti'u Mawu Yesus, wuṛṛu miallo-miallo imangitou mannaṛassida laḷorṛo n Wuke Susi tadea'u maasingkatta tanne alaṛṛa'i Paulus udde atonna. ¹²Manambo su wallatti mangitou mangngimanna Mawu Yesus, wuṛṛu tawe matuḷu lai papunna manga taumata n Yunani nangngimanna; mapia wawine ara'e lai esakka. ¹³Napawe manga taumata n Yahudi su Tesalonika naaringikka manungku Paulus mabatti'u wisara Mawu su Berea, imangitou nirumanta lai su Berea wuṛṛu mammono'a see na'ola'a taumata isudde tawe matammuda. ¹⁴Maḷiha-lihakka manga tuṛrangnga su Berea nanguntuddi Paulus watukku apanne, arawe Silas wuṛṛu Timotius natantangnga su soa udde. ¹⁵Napawe suete nanguntuddi Paulus na'oma n sara Atena, manga tuṛrangnga udde nabelengnga su

Berea ringannu uaapiddu tanata wuassi Paulus tadea'u Silas wuṛṛu Timotius mananturutta sitou ringannu maḥihakka.

Su Atena

¹⁶Tantalanna i Paulus uaraṛṛaddo si Silas wuṛṛu si Timotius su Atena, naungnge massusa naasilo soa udde napene manga paaluanna. ¹⁷Ana waugu udde su waḷe m pattataṛṛamawuanna, Paulus uaa'aliu n ringidda ringannu manga taumata n Yahudi wuṛṛu manga taumata waine apan massubba Mawu Ruata isudde. Aroddi lai su manga pasakka, miallo-miallo itou uaa'aliu n ringidda ringannu manga taumata isudde. ¹⁸Manga huru mallalaṛṛenggenni Epikuros wuṛṛu Stoa uasasimbakki tou lai. Sire pira wuassi mangitou nabbisara, "Taumata indi masingkattu apa? Asingkanne tumba'u adio'a, arawe itou taḷimorronganna!" Sire pira ng katou waine nabbisara, "Lihidde itou mabatti'u manga mongannu pabbawalaga waine." Imangitou nabbisara aroddi ana waugu Paulus nabatti'u Mawu Yesus wuṛṛu su ola'u mabbiakka apia wuassu papate. ¹⁹See imangitou nangapiddi Paulus watukku tampa pasasombanna su Wuiddu Areopagus. Poiaroddi imangitou nabbisara sitou, "Iami maapulu maasingkata alaṛṛa'a wakku apan iaarṛangngu udde. ²⁰Ana waugu i'o mammasingkatu manga inolaanna apan daringiṛṛanna paṛṛalane su aringikki ami. Ana waugu udde iami maapulu maasingkatta atapasanne." ²¹Ana waugu taumata n Atena wuṛṛu manga taumata raho apan uatana'a isudde maapulu manginsue allo mangitou madaringikka wuṛṛu uahahatto manga hatto apan wakku.)

²²Su tempo i Paulus dirumarisikka su saruannu manga taumata apan uaammulla su Areopagus udde, Paulus nabbisara, "Ei, manga taumata n Atena! Ia'u ma'ellega manungku su alawo'u inolaanna iamiu lembo n taṛṛa agama. ²³Ana waugu su tempo ia'u u'amatta mammaliwutta soa atatanaannu wuṛṛu mannutukka manga tampa m pangaliomanannu, ia'u naasilo lai sambau tampa pangangadoannu sasamba; su tampa udde uaworretta, 'Ionggola su Mawu apan awagananna.' E, Mawu Ruata apan sassubbanni amiu udde awagananna, ete Itou apan iwabatti'u siamiu. ²⁴Mawu Ruata apan nandiaddi runia indi wuṛṛu alaḷwo'u laḷorrone, ete Itou Mawu su langitta wuṛṛu runia. Itou tawe uatana'a su manga waḷe m paaluanna apan niola'u taumata. ²⁵Itou lai tawe madorongnga tuḷunganna su taumata, ana waugu ete Itou apan mangngonggolu wiakka wuṛṛu sasangngo wuṛṛu manga alaḷwo'a su taumata. ²⁶Wuassu sangkatou taumata Itou nandiaddi anambo n pabbawalaga wuṛṛu nandolokki mangitou matana'a su ahewallu runia. Ete Itou lai apan nanantunna ro'e n paarorone, tinggera wuṛṛu suapa imangitou wotongnge mabbiakka.

²⁷Mawu Ruata na'ola'a udde tadea'u imangitou maddea'a Sitou. Antimanna imangitou maasomba Sitou su tempo imangitou maddea'a Sitou. Arawe surrinone Mawu Ruata tawe marau wuassi ite sangkatou-sangkatou. ²⁸Ere lai su wisara n taumata, 'Iite wiakka wuŕru u'alore wuŕru uatana'a su runia indi ana waugu tarŕino n Tou.' Ere lai iwabaŕo manga tarŕa sasanato'i amiu, imangitou mabbisara,

'Ete iite sarangkanambone udde alaŕranang-Nge.' ²⁹Ne, ana waugu ete iite udde alaŕrana'u Mawu Ruata, iite tawe wotongnge massunna manungku Mawu Ruata udde naaŕihida ere paaŕuanna apan niola'a wuassu wuŕawanna ara'e saŕa'a ara'e watu apan niola'a tumuŕrutu apande n taumata. ³⁰Tempo n awawodo ng kite suete tinimbuŕianannu Mawu Ruata, arawe orassa indi Itou nandolokku taumata su ahewallu runia tadea'u mawaŕu wuassu manga rosa mangitou. ³¹Ana waugu Itou suete nanantunnu sambau tempo ipamarikissa ahewallu runia indi ringannu atatŕidida. Manara udde sarun olaannu sangkatou apan suete nipile Mawu Ruata su ipa'ola'a manara udde. Wuŕru tadea'u anambo n taumata maasunna olangnge udde, Mawu Ruata suete napaawiakku taumata apia udde wuassu papate!"

³²Napawe manga taumata udde naaringikka hatto mabbiaakka apia wuassu papate, su wallatti mangitou piaddu nilumage m Paulus. Piaddu nabbisara, "Iami maapulu madaringikka tuŕrangnga mabbisara apia su ola'u hatto indi." ³³See Paulus nanantangngu ammuŕanna udde. ³⁴Arawe piaddu lai su wallatti mangitou mannamba'a si Paulus wuŕru mangngimanna Mawu Yesus, eteudde: Dionisius wuassu mammamanara n Areopagus, wuŕru sangkatou wawine aranne Damaris, wuŕru pira ng katou lai.

Su Korintus

18 Wua udde Paulus nanantangke n Atena wuŕru inaita watukku Korintus. ²Isudde itou nassomba n sangkatou Yahudi aranne Akwila, darantane wuassu leta'u Pontus. Akwila wakkute nirumanta wuassu Italia ringannu awingnge Priskila. Imangitou nirumanta su Korintus ana waugu Kaisar Klaudius suete nandolokku anambo n taumata n Yahudi iapaasaŕu wuassu Roma. Ne Paulus inaita nattembo sitarua, ³see natana'a isudde ringanni tarua wuŕru mammanara suadio'a ringanni tarua, ana waugu manara n tarua uasuŕungngi Paulus, eteudde ma'ola'a rasanna. ⁴Arawe suapa n allo n Sabatta, Paulus inaita uahahatto su waŕe m pattatarŕamawuanna tadea'u manga taumata n Yahudi aroddi lai manga taumata n Yunani mangngimanna Mawu Yesus.

⁵Napawe Silas wuṛṛu Timotius naranta wuassu Makedonia, Paulus nappaattu anambo n allone mammasingkattu Watti'a wuassu Mawu Ruata su manga taumata n Yahudi manungku Mawu Yesus udde Ratu m Punnu Saḷamatta apan suete pina'ire Mawu Ruata. ⁶Arawe ana waugu manga taumata sidutu mannompolla wuṛṛu mangngaḷuandaga sitou, ne Paulus nangesoge n awu wuassu laungnge, maola'a sambau pananaunganna simangitou su pasasaḷa mangitou. Itou nabbisara, "Amungskangngu iamiu nasilaka, saḷanu sassane! Ia'u waggate! Manattakka orassa indi ia'u inaitte ringannu manga taumata apan waḷine Yahudi." ⁷See Paulus nanantangke mangitou wuṛṛu inaitte natana'a su waḷe su samba'a waḷe m pattataṛramawuanna udde. Waḷe udde waḷe n sangkatou apan waḷine Yahudi, arawe itou massubba Mawu Ruata. Arannu taumata udde Titius Yustus. ⁸Arawe Krispus, tembonannu waḷe m pattataṛramawuanna udde wuṛṛu manga laḷoṛṛo n waḷene nangngimante Mawu Yesus. Wuṛṛu manambo lai manga taumata n Korintus waine naaringikka watti'a apan niapaasingkatti Paulus, nangngimante Mawu Yesus see nissarṛani.

⁹Su sambau ṛabbi sulaḷummu sambau sondappa, Mawu nabbisara si Paulus, "Imbaṛrangnga matta'utta! Sidutu pangngaṛṛa'a wuṛṛu arie pangilloḷo. ¹⁰Ana waugu Ia'u uarṛundinganna si'o. Tawe saran sangkatou apan mandaleo si'o ana waugu manambo taumata su soa indi taumata-U." ¹¹Ana waugu udde Paulus natana'a su Korintus santonna annumu wuḷanna aḷannune wuṛṛu mangngaṛṛa'u wisara Mawu Ruata simangitou.

¹²Napawe Galio naola'a gubernure n Akhaya, manga taumata n Yahudi naammulla mannaḷare si Paulus wuṛṛu mangapiddi tou watukku mallarṛuungnga. ¹³Imangitou nangapiddu alae indi, "Taumata indi mammono'a awadaalla, tadea'u massubba Mawu Ruata ringannu sarṛene uapaparṛala n Tita Musa!"

¹⁴Aroddi Paulus sinumimbakka, Galio nabbisarate rorone manga taumata n Yahudi, "Ei, manga taumata n Yahudi! Amungskangngu iaa-laenu indi sambau pasasaḷa ara'e sambau aḷaleo, ia'u ṛinone manabare n alaenu indi. ¹⁵Arawe indi sambau patatatiakka su ola'u manga wisara wuṛṛu manga aranna see manga titanu sassane! Nariaddi iamiu ṛinone manginsue hatto indi. Ia'u maddiri mamarikissa hatto ereudde!" ¹⁶See Galio nallimbuakka simangitou watukku liudde. ¹⁷Ne imangitou nanametta si Sostenes, tembonannu waḷe m pattataṛramawuanna udde, wuṛṛu namuulla sitou su saruannu medda m pamamarikisanna. Arawe Galio ma'iele m wagga su ola'u hatto udde.

Paulus nabelengnga su Antiokhia

¹⁸Wua udde Paulus ta'e natana'a maḷannu su Korintus. Wua udde itou nabbisarate addattu patatalei su manga taumata apan mangngimanna isudde, see itou nassenggotte ringanni Priskila wuṛṛu Akwila watukku Siria. Su Kengkrea, Paulus namoḷo utangnge apan niwala n tou maḷo'engnga ana waugu riandine su Mawu. ¹⁹Napawe na'omate su Efesus, Paulus nanantangngi Priskila wuṛṛu Akwila, see sinumutta su waḷe m pattataṛramawuanna wuṛṛu uararṛingida su sambau ringannu manga taumata n Yahudi isudde. ²⁰Imangitou nadorongnga tadea'u itou matana'a maḷannu ringanni mangitou arawe itou maddiri. ²¹Salaiwe aroddi, su tempo inaita, itou nabbisara, "Amungkangngu Mawu Ruata mamala, ia'u sarun mabelengnga apia isindi." Nasue nabbisara aroddi, itou inumamatte nanantangngu Efesus.

²²Napawe sinumossokke su Kaisarea, itou inaita watukku Yerusalem mattabea manga jamaatta isudde, see nanassute amatanne watukku Antiokhia. ²³Napawe natana'a isudde pira allo aḷannune, itou inaita inumamatta lai nattembo leta'u Galatia wuṛṛu Frigia inai manohassa pangangimannu taumata apan mangngimanna.

Apolos su Efesus wuṛṛu Korintus

²⁴Tantaḷanna udde, nirumantate su Efesus sangkatou Yahudi wua-ssu Aleksandria, aranne Apolos. Itou pande massinaukka wuṛṛu masinkattu laḷorṛo n Wuke Susi, ²⁵see suete lai niaṛṛaanna manarṛassida aḷarṛa'u Mawu Yesus. Ne ringannu apulu apan wahewalla itou mangngaṛṛa'a ringannu ma'uddupa su ola'u Mawu Yesus, salaiwe wakute sasarṛani n Yohanes niasingkatanne. ²⁶Ringannu warṛani Apolos nanattakke massinaukka su waḷe m pattataṛramawuanna wuṛṛu su tempo Priskila wuṛṛu Akwila naaringikka aḷarṛangnge, imangitou nangapiddi tou su waḷe. Poiaroddi imangitou mannaḷa'a ringannu mapia sitou su ola'u pandumannu Mawu Ruata manaḷamatta taumata sulaḷummu Mawu Yesus. ²⁷Wua udde Apolos pia pandumma inai su Akhaya. Ne manga taumata apan mangngimanna Mawu Yesus su Efesus namorṛetu suratta su manga tuṛrangnga apan mangngimanna su Akhaya tadea'u imangitou wotongnge manarimmatti Apolos. Wuṛṛu su tempo Apolos na'omate su Akhaya, sasumbalane mangke mahuna su manga taumata apan ana waugu aḷamattu Mawu Ruata nangngimante Mawu Yesus. ²⁸Ana waugu ringannu masarṛaungnga, Apolos napaḷannabu manga taumata n Yahudi sulaḷummu patatatiakka su saruannu awadaalla.

Wurru itou nattiala ringannu tatiala Wuke Susi manungku tumba'u Mawu Yesus Ratu m Punnu Salammatta apan suete pina'ire.

Paulus su Efesus

19 Tantalanna Apolos su Korintus, Paulus tantalanna u'amatta su ulu n wanua udde, see na'omate su Efesus. Poiroddi itou nassomba manga pira taumata apan suete nangngimanna Mawu Yesus. ²Itou naiwalo simangitou, "Manga turangnga suete naasengkamma Gharraho Mawu Ruata, su tempo iamiu nangngimanna Mawu Yesus?"

Imangitou sinumimbakka, "Taambe, Ewe'e iami taambe naaringikka manungku pia Gharraho Mawu Ruata."

³"Amungkangngu aroddi, ringannu sasarrani n sai iamiu nissarrani?" aiwalo m Paulus.

"Ringannu sasarrani n Yohanes," sasimbakki mangitou. ⁴See Paulus nabbisara, "Yohanes mannarrani taumata tadea'u mapaalatta'a manungku manga taumata udde nawalute wuassu manga rosa mangitou. Arawe tantalanna udde lai Yohanes mammasingkatta su manga taumata n Israel manungku rinone imangitou mangngimanna taumata apan ru-manta manalimmuri wuassi tou, eteudde Mawu Yesus."

⁵Napawe imangitou naaringikka udde, imangitou nissarranite ringannu arannu Mawu Yesus. ⁶Wurru su tempo Paulus nangado n lima simangitou, Gharraho Mawu Ruata nangintarro simangitou, see imangitou mannattakke uahahatto sulalummu alawo'u wisara apan maatiangnga lapiddu mammasingkattu watti'u Mawu Ruata. ⁷Reenganni mangitou sarangkanambone irarrangngo sire mapulo dua su atoune.

⁸Tallu wulanna alannune, Paulus sidutu mabbisara ringannu warrani su manga taumata su wale m pattatarramawuanna wurru uasasimbakki mangitou tadea'u imangitou mangngimanna su ola'u ereapa Mawu Ruata mamarenta ere sangkatou Ratu. ⁹Arawe su wallattu manga taumata udde pia sire pira apan puane maatika wurru maddiri mangngimanna. Su saruannu awadaalla apan uasemodda isudde imangitou mapaasala n alarra'a su ola'u Mawu Ruata manalamatta taumata sulalummu Mawu Yesus. Ana waugu udde Paulus nanantangngi mangitou, see inaitte ringannu manga mallalarrenggennu Mawu Yesus su tampa m pananantiroannu Tiranus. Isudde miallo-miallo itou uaiwalo manga taumata. ¹⁰Itou sidutu ma'ola'a inolaanna udde rua tonna alannune na'oma n sara anambo n taumata wuassu pabbawalaga waine, sarangkanambone nadaringikka wisara Mawu.

Aḷaṛṛana'i Skewa

¹¹Mawu Ruata na'ola'a manga aḷaṛṛindu'a apan wahewalla si Paulus. ¹²Amungkanngu leso, ara'e wawa'issa lawassa apan suete nipaatti Paulus iapidḍa su manga taumata marada'a, rada'i mangitou mawuḷi wuṛṛu ghaṛṛaho n setanna lai sumabangnga wuassi mangitou. ¹³Pia sire pira tonaassu Yahudi apan u'aamatta su aḷawo'u tampa, mallimbuakka ghaṛṛaho laḷeo wuassu manga taumata. Manga tonaassa udde maanama lai mappaattu arannu Mawu Yesu ipallimbuakka manga ghaṛṛaho n setanna udde. Imangitou mabbisara su manga ghaṛṛaho n setanna udde, "Ringannu arannu Mawu Yesu apan iwabatti'i Paulus udde, ia'u mallimbuakka siamiu!" ¹⁴Pia sire pitu aḷaṛṛana'a esakka ana'u sangkatou imam tembonanne, aranne Skewa, pia inolaanne ereudde.

¹⁵Arawe ghaṛṛaho n setanna udde nabbisara simangitou, "Ia'u masingkattu Mawu Yesu wuṛṛu Paulus asingkatanku lai, arawe iamiu indi isai?"

¹⁶See taumata apan niasuttannu setanna udde sinumolo'a wuṛṛu tinumambo simangitou ringannu maṛragissa, na'oma n sara imangitou tinumaḷangnga wuassu waḷe udde naḷaḷessa wuṛṛu natantole, ana waugu laubbi mangitou nihesa'a wuassu wadangngi mangitou. ¹⁷Anambo n taumata n Yahudi wuṛṛu pabbawalaga waine apan uatana'a su Efesus naaringikka arariadianna udde, see imangitou nata'utte. Ne arannu Mawu Yesu mangke raddaloanna. ¹⁸Manga taumata apan nangngimante Mawu Yesu, nirumanta mangnga'u su tangnga n awadaalla manga inolaanni mangitou su tempo nangkaliu. ¹⁹Wuṛṛu imangitou apan ninumarampe mappaattu laṛropa, nangammullu manga wuke mangitou wuṛṛu tinutungnga su saruannu awadaalla. Aregga manga wuke udde amungkanngu ireengnga sarangkanambone, iraṛrangngo lima m puḷo su riwune roitta saḷa'a. ²⁰Ete aroddi, ringannu saṛrene apan wahewalla udde wisara Mawu mangke inasingkatanna wuṛṛu aatambanna taumata apan mangngimanna.

Pattatiakka su Efesus

²¹Wuassu arariadianna udde, Paulus naṛrawessa inaite watukku Makedonia wuṛṛu Akhaya, see masaḷate watukku Yerusalem. "Wua isudde," unni Paulus, "Ia'u inaite watukku Roma apia." ²²Ne itou nandolokku rua ng katou wuassu mallaḷaḷimane eteudde Timotius wuṛṛu Erastus inai watukku Makedonia, wuṛṛu itou matana'a manga pira tempo aḷannune su leta'u Asia.

²³Irar̄rangngo ete su tempo udde lai nariaddi patatatiakka apan wahewa su Efesus ana waugu su ola'u ałar̄ra'u Mawu Yesus. ²⁴Ana waugu su soa udde pia sangkatou tar̄ra ola'a sarannapa wuassu sała'a aranne Demetrius, apan ma'ola'a manga wałe monganni Monganna Artemis. Manara n taumata udde mandanta n auntunganna apan wahewa su manga mammamanarane. ²⁵Ana waugu udde itou nangammullu manga mammamanarane su sampunna ringannu mamanara tar̄ra ola'a sała'a waine, see nabbisara, "Manga tur̄rangnga! Tur̄rangnga masingkatta manungku iite naasomba auntunganna wuassu manara indi. ²⁶Orassa indi manga tur̄rangnga naasilote wuřru naaringikke sassane apa apan niola'i Paulus udde. Itou nabbisara manungku manga monganna apan niola'u taumata, wałinewe monganna atonna. Wuřru itou namohete manambo taumata mangngimanna ałar̄rangnge, wałine tumba'u isindi su Efesus, ewe'e marani n su ahewallu leta'u Asia. ²⁷Maata'utta manungku manara ng kite indi sarun maasomba aranna laleo. Wuřru wałine tumba'u udde, ewe'e wałe n Monganna Artemis lai sarun tawe saileanna see ałar̄rangnge mangke lar̄rindanna; sumbałi itou monganna apan sassubbannu anambo n taumata su leta'u Asia wuřru su ahewallu runia!"

²⁸Aroddi manga taumata udde naaringikka udde, naungngi mangitou nałaleo, see imangitou u'ui, "Wiakke Artemis, mongannu taumata n Efesus!" ²⁹Ne patatatiakka udde nilumewesse su ahewallu soa. Wua udde ammułannu ałiba'ukka udde nanamette si Gayus wuřru si Aristarkus, eteudde manga taumata Makedonia apan uaammungnga si Paulus sulałummu amatanne, see namołengnga simangitou su wałe m pananalanganna su soa udde. ³⁰Paulus maapulu sumutta tumantalongnga simangitou, arawe manga taumata apan mangngimanna Mawu Yesus naningaddi tou. ³¹Manga pira tembonannu leta'u Asia udde, apan uahahawe m Paulus, nandolokku taumata namasingkatta si Paulus tadea'u itou tawe mattingkapasilo su tampa udde. ³²Tantałanna udde manga taumata apan uaammulla su wałe m pananalanganna udde nassongkaka. Piaddu u'ui arendi, piaddu lai u'ui aroddi, ana waugu manambo wuassi mangitou wagga pandumanne maammula isudde. ³³Sambageanganna wuassu manga taumata udde massunna manungku Aleksander mar̄rařringidde, ana waugu ete itou sinuřrudu manga taumata n Yahudi su saruane. Ne Aleksander namatte n limane madorongnga onggolannu tempo itou sumimbakka su saruannu manga taumata udde. ³⁴Arawe aroddi imangitou naasilo manungku itou taumata n Yahudi, sangkarindo'a imangitou inumui ma'ikka-ikkatta, "Wiakka Monganna Artemis, mongannu taumata n Efesus!"

³⁵Panginsueanne mamamořretu soa udde napaałannabu awadaalla udde. Itou nabbisara, "Tumana'u Efesus! Aławo'u taumata masingkatta manungku ete su Efesus soa apan mammadułi wałe n Mo-

nganna Artemis wuṛṛu watu susi apan nanawo wuassu langitta. ³⁶Tawe saran sangkatou wotongnge maaławangnga olangnge udde. Ana waugu udde paaławannabe, wuṛṛu arie ma'ola'a sambau manara ringannu tawe marřingidda asuene. ³⁷Manga taumata indi suete niapiddi amiu isindi, wařine ana waugu imangitou suete nangarřo waře n monganna ara'e ana waugu imangitou suete nangadio'a monganni ite. ³⁸Amungkangngu Demetrius wuṛṛu manga mammamanarane udde pia alaene su ola'u su sangkatou taumata, wala'e imangitou mangapiddu hattone udde su mallarřuungnga. Mallarřuungnga manengkamma ala'wo'u hatto udde wuṛṛu manga piařa'u pamarenta lai sidutu isudde. ³⁹Arawe amungkangngu ta'e pia lai waine apan ipaapulu ng kamiu, udde řinone insueanna sulařummu ammulu awadaalla apan matohassa. ⁴⁰Ana waugu aradianna allo indi wotongnge maaławaleo siite. Iite wotongnge ansiřanna na'ola'a pagahahio, ana waugu iite tawe sambau pinangiananne mapaarřino n patatatiakka indi." ⁴¹Napawe suete nabbisara n sarangkambone udde, mamamorřettu soa udde nandolokke n taumata nambo udde niapaapule:

Paulus inaite watukku Makedonia wuṛṛu Yunani

20 Napawe patatatiakka su Efesus nallannabe, Paulus nangammullu jamaatta wuṛṛu nangonggolu sasasa simangitou. Wua udde itou nabalote wisara n patatařei, see nanassute amatanne watukku Makedonia. ²Itou nattembo manga jamaatta su wageangngu leta'u Makedonia wuṛṛu itou manambo mangagilu tatantiro su manga taumata apan mangngimanna Mawu Yesus poiaroddi wuṛṛu mangngonggolu sasasa simangitou. Wua udde itou inaite watukku Yunani. ³Tallu wuřanna ařannune itou uatana'a poiaroddi. See napawe itou uasasaddiate massenggote watukku Siria, pia batti'a manungku manga taumata n Yahudi tantařanna ma'ire mamate sitou. Ana waugu udde itou narřawessa mabelengnga malliu Makedonia. ⁴Sopater ana'i Pirus wuassu Berea, inai suadio'a ringanni tou; aroddi lai Aristarkus wuṛṛu Sekundus taumata n Tesalonika, wuṛṛu Gayus taumata n Derbe. Wuṛṛu lai Timotius, Tikhikus wuṛṛu Trofimus manga taumata wuassu leta'u Asia. ⁵Imangitou nalliu řoro siami see narřado su Troas. ⁶Napawe Ramea n Roti Tawe Ragine, nařiudde, iami nassenggote nanantangngu Filipi. Lima allo wua udde iami naammulle apia ringanni mangitou su Troas. Poiaroddi iami natana'a sangkamisa.

Patatembo m Paulus panginsueanne su Troas

⁷Rabbi ng kallo misa iami naammulla umanna suadio'a naola'a ere sangkatuŕranganna. Paulus uahahatto manga taumata, ana tiŕrabbine itou maringidda inaita umamatta. Na'oma n sara allorane Paulus uahahatto. ⁸Sulaŕummu wabbo'a su ŕengkenne aŕiu rosone, su tampa nipaam-muŕanni ami udde, pia manambo soŕo. ⁹Sangkatou umbasanna aranne Eutikhus uaianna su sungketta. Ana waugu Paulus tate mangilloŕo mag-gahatto, umbasanna udde niamatiilante atonna, na'oma n sara itou nia-matiilanna su sungketta udde, see nanawo wuassu ŕengkenne atallune. Su tempo imangitou nanaŕuru sitou, itou natete. ¹⁰Arawe Paulus sinu-mossokka, see nattingkaŕra'a su awa'u taumata udde wuŕru naŕra'uppa sitou. Paulus nabbisara, "Arie paassingawangnga, itou ta'e wiakka!" ¹¹Wua udde Paulus nirumanganna apia su ŕengkenne aŕiu rosone, see nattahia roti wuŕru inumante su adio'a. Napawe maŕannute uahahatto manga taumata na'oma n sara ruaallo, Paulus inaita inumamatta. ¹²Manga taumata nangapiddu umbasanna udde napuŕe watukku waŕene ringannu ta'e wiakka. Imangitou naappendamma aŕaŕuassa wuŕru naung-ga mange natuno.

Wuassu Troas watukku Miletus

¹³Iami nassenggotte nalliu ŕoro sinuma'e apalla wuŕru nabatukku Asos, ana mangotongnga si Paulus isudde. Itou suete nangatokka aro-ddi, ana waugu itou inumamattu ammaranne watukku Asos. ¹⁴Napawe nassombate su Asos, Paulus nasaraŕrawutta sinuma'e su apalla see iami nassenggotte watukku Metilene. ¹⁵Wua poiaroddi iami nasseng-gotte apia, wuŕru tiŕrabbine na'omate su tampa apan uasaruanna Khios. Tillorege iami na'omate su Samos wuŕru massallo wua udde su Miletus. ¹⁶Paulus suete nangatokka manungku tate umotongnga su Efesus, ta-dea'u allo tawe maramme su leta'u Asia. Wuŕru amungkangngu wotong-nge itou maapulu maŕiha-ŕihakka ma'omate su Yerusalem su Allo Wa-hewa m Pentakosta.

Paulus nabbisara wisara m patataŕei su Efesus

¹⁷Wuassu Miletus Paulus napaapiddu watti'a watukku Efesus, ma-dorongnga manga piaŕra'u jamaatta su Efesus rumanta maisasomba n tou. ¹⁸Napawe imangitou na'omate, Paulus nabbisara simangitou,

"Manga tuffrangnga masingkatta ereupa ia'u mabbia akka alannune indi su wallatti amiu ro'e n allo paarorone ia'u na'oma su Asia. ¹⁹Ringannu awawawo n dalummu naungnga wufu ringannu allo mata, ia'u mammanara manara Mawu su pattangngannu asasusa apan niapendamangku ana waugu pandumma laleo wuassu taumata n Yahudi. ²⁰Tuffrangnga masingkatta manungku ia'u tawe illo lone mamasingskatta siamiu apa apan mahuna siamiu. Ia'u mangnga'ra'a siamiu su tampa pasasombannu awadaalla wufu su manga wale. ²¹Mapia udde su manga taumata n Yahudi aroddi lai su manga pabbawalaga waine ia'u sidutu mananata tadea'u imangitou mawalu wuassu manga rosa mangitou wufu rumanta ringannu Mawu Ruata, see lai mangngimanna Mawu Yesus. ²²Orassa indi tadea'u maaturrutta parenta Ghaffaho Mawu Ruata, ia'u inaita watukku Yerusalem. Wufu ia'u waggate apa apan sarun mariaddi sia'u poiarddi. ²³Ia'u tumba'u masingkatta manungku su alawo'u soa, Ghaffaho Mawu Ruata ringannu atonna mamasingskatta sia'u manungku ia'u sarun itarro su tutupanna wufu sarun matatarangnga. ²⁴Arawe ia'u ma'iele m bagga ringannu wia'u indi, sambaliate ia'u napanginsue manara apan tinantillu Mawu Yesus sia'u wufu sambaliate ia'u maaturrutta na'oma n sara pangudusannu wia'u ipammasingskattu Watti'u Alaluassa udde su ola'u darangngu Mawu Ruata.


²⁵Ia'u suete nattembo manga tuffrangnga sarangkanambone wufu suete namasingkatta lai su ola'u ereupa Mawu Ruata mamarenta ere sangkatou Ratu. Orassa indi ia'u mammendamma tate lai massomba manga tuffrangnga. ²⁶Ana waugu udde ringannu atonna ia'u mabbisara siamiu allo indi manungku amungkangngu su wallatti amiu apan piaddu mate, udde wale sa'u. ²⁷Tawe saran paassa ia'u tinumalangnga wuassu manara'u manna'a'a siamiu anambo n pandumannu Mawu Ruata. ²⁸Rinone iamiu uariaga watangannu wufu riagai lai anambo n jamaatta apan suete tinantillu Ghaffaho Mawu Ruata siamiu iapariaga; ana waugu iamiu suete nitenega maola'a mandariaga jamaatta udde. Rinone iamiu uariaga jamaattu Mawu Ruata udde naalihidda ere malalu'adda uariaga dombane, ana waugu Mawu Ruata suete na'ola'a jamaatta udde pussaa-Ne sassane sulalummu papate n Anang-Nge sassane. ²⁹Su alaliu'u, sarun rumanta manga serigala apan waffani su pattangngani amiu. Wufu manga taumata apan rariaganni amiu udde maola'a inassu manga serigala udde. ³⁰Ewe'e wuassu wallattu manga tuffrangnga sassane lai sarun lumapputa manga taumata apan sarun mabbati'u watti'a awusu. Imangitou ma'ola'a aroddi, tadea'u manga taumata apan nangngimante Mawu Yesus umaliwu wufu tumantalongke simangitou. ³¹Ana waugu udde paariagga! Paanaunge manungku tallu tonna alannune ringannu anambo n allommata, allo rabbi, ia'u tawe illo lone mangnga'ra'a awadaalla wufu siamiu.

³²Orassa indi ia'u manantilli amiu su Mawu Ruata, tadea'u Itou mammaduli siamiu wufu tadea'u iamiu sidutu ua'umbele watti'u daranggu Mawu Ruata. Mawu Ruata uatahuanna tarino ipanohassa siamiu wufu nangonggolu manga alamatta apan suete n saddiane ionggolla su alaranang-Nge. ³³Taambe saran paassa ia'u ninumemma n roitta ara'e laubbu taumata waine. ³⁴Turanga sassane masingkatta, manungku ringannu auatangku sassane ia'u mammanara mannipussa hausangku wufu manga hawe'u apan uatantalongnga sia'u. ³⁵Sulammu alawo'u hatto, ia'u suete nanuladda siamiu manungku ringannu mammanara marimadda ereindi, iite rione mantulunggu manga taumata lome. Ana waugu iite rione mannaungnga apa apan suete niwalo Mawu Yesus, 'Lembo n su lalumanna'a iite mangonggolla, wuassu iite manengkamma.'"

³⁶Napawe Paulus suete nabbisara, itou inumalintuda ringanni mangitou sarangkanambone see inumalomanna. ³⁷Imangitou sarangkanambone nilumuai lapiddu narra'uppa si Paulus wufu nabbisara, salamatte umamatta. ³⁸Imangitou massusa ana waugu Paulus nabbisara manungku imangitou tate maasilo sitou apia. See imangitou nanguntudi Paulus sara su apalla.

Paulus inaita watukku Yerusalem

21 Iami nabalō mapulete su manga piarra'u jamaatta wuassu Efesus udde see nanantangngi mangitou. Wua udde iami nassenggotte watukku taranusa n Kos; wufu tirabbine iami na'omate su taranusa n Rodos. Wua isudde iami nassenggotte watukku tatulianu Patara. ²Su Patara iami naasomba apalla apan mabatukku Fenesia. Ne iami sinuma'ete apalla udde, ³wufu nassenggotte na'oma n sara naasilo taranusa n Siprus su samba'a airi ng kami; arawe iami lapiddu nassenggotta mattuda n Siria. Iami nabbalango su Tirus, ana waugu isudde apalla sasa'eanni ami mangonna luranne. ⁴Su tampa udde iami inai nattembo manga taumata apan mangngimanna Mawu Yesus, see natana'a ringanni mangitou sangkamisa alannune. Wuassu tatantiro n Gharaho Mawu Ruata, imangitou manggarra'a si Paulus tadea'u arie inai su Yerusalem. ⁵Arawe napawe nasuete tempone iami uatana'a isudde, iami nanantangngi mangitou, wufu iami nanassute amatanni ami. Imangitou sarangkanambone ringannu anangnge wufu awingnge nanguntudi ami sara liuddu soa. Poiaroddi su winggi n apanne, iami sarangkanambone inumalintuda see inumalomanna. ⁶Wua udde iami natatabeate, see iami sinuma'ete apalla wufu imangitou napulete watukku waje.



Soa Tirus (21:3)

⁷Iami sidutu nassenggotte wuassu Tirus watukku Ptolemais. Poia-rod-di iami inaitte nattembo manga tuṛrangnga apan mangngimanna, ana waugu mangonggolu tabea simangitou, wua udde natana'e allo massallo ringanni mangitou. ⁸Tiṛṛabbine iami nassenggotte apia, see na'omate su Kaisarea. Isudde iami inaitte ringannu mabawatti'u ṛengetannu Mawu, aranne Filipus, see natana'e su waḷene. Itou sangkatou wuassu wallattu sire pitu apan napile su Yerusalem. ⁹Sire appata anangnge maṛṛuala suete inonggoḷannu Mawu Ruata asingkata tadea'u wotongnge mama-singkattu Watti'u Aḷaḷuassa wuassu Mawu Ruata. ¹⁰Napawe manga pira allo aḷannune polaroddi, nirumantate sangkatou nabi wuassu Yu-dea aranne Agabus. ¹¹Itou nirumanta ringanni ami ana see nanganu papeṛṛetti Paulus. Ringannu papeṛṛetta udde itou nama'issa ledda wuṛṛu limane sassane ana see nabbisara, "Ete indi apan niapaasingkattu Ghaṛṛaho Mawu Ruata: Tatahuannu papeṛṛetta indi sarun ṛapusannu manga taumata n Yahudi ereindi su Yerusalem, wuṛṛu itantilla su manga taumata waḷine Yahudi."

¹²Napawe iami naaringikka udde, iami wuṛṛu manga tuṛrangnga apan uatana'a su Kaisarea sinumaḷande si Paulus tadea'u itou tawe inai watukku Yerusalem. ¹³Arawe itou sinumimbakka, "Apa hunane tuṛrangnga lulluai ereindi na'oma n sara naungku nasusa? Ia'u nasaddiate waḷine tumba'u sametanna polaroddi, arawe nasaddiate lai mate ana waugu Mawu Yesus." ¹⁴Paulus maddiri madingingikka siami, ne iami tate nangingaddi tou. "Walatte apulu Mawu sassane mariaddi," unni ami.

¹⁵Napawe uatana'e isudde manga pira allo aḷannune, iami nanahim-punte sarannapa ng kami see inaitte watukku Yerusalem. ¹⁶Sire pira tuṛrangnga wuassu Kaisarea inai lai tumantalongnga su adio'a ringanni ami, manguntuddi ami su waḷe Manason ana waugu ete su waḷe

n tou iami mangintała. (Manason sangkatou taumata n Siprus apan małannute naola'a mallałarřenggenno Mawu Yesus.)

Paulus nattembo si Yakobus

¹⁷Su tempo iami na'omate su Yerusalem, manga tuřrangnga isudde nanałoho siami ringannu naungnga apan małuassa. ¹⁸Tiřrabbine Paulus inaita su adio'a ringanni ami mattembo si Yakobus; Manga piařra'u jamaatta uasemodda lai isudde. ¹⁹Napawe suete nattabea simangitou, Paulus nabbaťi'a simangitou aławo'u inolaanna apan suete niola'u Mawu Ruata sulałummi tou su wallattu manga taumata apan wałine Yahudi. ²⁰Napawe suete nadaringikka watti'i Paulus udde, imangitou sarangkanambone nadalote Mawu Ruata. Wua udde imangitou nabbisara si Paulus, "Tuřrangnga Paulus! Tuřrangnga řinone maasingkatta manungku su řiwunete taumata n Yahudi mangngimanna Mawu Yesus. Ete imangitou sarangkanambone udde taumata apan sidutu tuttuřrutta mappaamattu Tita n Musa. ²¹Wuřru orassa indi imangitou naaringikke manungku tuřrangnga mangngařra'a anambo n taumata n Yahudi apan uatana'a su wallattu pabbawalaga waine, tadea'u mamallossu Tita n Musa. Tuřrangnga mannantiro simangitou tadea'u imangitou tawe mapassunattu ałarřana'i mangitou, ara'e tumuřrutta inanamannu Yahudi. ²²Orassa indi manga taumata n Yahudi apan nangngimante udde sarun maaringikka manungku tuřrangnga isindi. Nariaddi ereapa orassa indi? ²³Mappianne tuřrutte tatantiro ng kami. Pia sire appatta isindi apan suete na'ire Mawu. ²⁴Ne řinone tuřrangnga inai mallaghu pangangukkassa wadangnga su adio'a ringanni mangitou wuřru waerřete sasannane tadea'u imangitou wotongngete lungguřřanna. Ringannu aroddi sarun lumiatta'a su anambo n taumata manungku apa apan niaringiřřanni mangitou su ola'u tuřrangnga udde awusu, ana wangu tuřrangnga sassane lai mappaamattu Tita n Musa. ²⁵Arawe su ola'u taumata apan wałine taumata n Yahudi apan nangngimante Mawu Yesus, iami suete napaapiddu suratta simangitou su ola'u řarřawessu hatto ng kami, manungku imbařrangnga umanna anna apan suete pinasubba paałuanna, tawe wotongnge ma'inumma řarřa, ara'e uminassa winatangnga apan nate niatongnga; wuřru tawe wotongnge ma'ola'a inolaanna apan laleo."

²⁶Ne Paulus inaita ringannu sire appata taumata udde see nallaghute m pangangukkassa wadangnga su adio'a ringanni mangitou su allo tiřrabbine. Wua udde imangitou sinumutta su Wałe Mawu namasingkatta manungku ete pira allo lai lałaghu m pangangukkassa udde masue wuřru sasamba n sangkatou-sangkatou ionggole.

Paulus sinametta su Waļe Mawu

²⁷Napawe tempo pitu allo udde masuete, manga pira taumata n Yahudi wuassu Asia naasilo si Paulus sulaļummu Waļe Mawu. See imangitou nangahe taumata nambo, wua udde nanametta si Paulus, ²⁸lapiddu u'ui, "Ei, manga taumata n Israel, ontoļe! Ete indi taumatane apan mammalintadu aļawo'u wanua mangngarra'a anambo n taumata manga aļarra'a apan ipannompolla pabbawalagu Israel, wuŗru mannompola Tita Musa wuŗru mannompolla Waļe Mawu indi. Wuŗru orassa indi ewe'e itou lai mangapiddu manga taumata apan waļine Yahudi su mutta sulaļummu Waļe Mawu wuŗru mandaleo tampa na'ukkassa indi!" (²⁹Imangitou nabbisara arodđi ana waugu imangitou suete naasilo si Trofimus taumata n Efesus udde su soa su adio'a ringanni Paulus; wuŗru imangitou massunna manungku Paulus suete nangapiddi tou sinumutta sulaļummu Waļe Mawu.)

³⁰Laļorŗo n soa nassongkakka, wuŗru manambo taumata tinu-maļangnga maddulu. Imangitou nanametta si Paulus wuŗru namoļengnga sitou sinumabangnga wuassu Waļe Mawu. Orassa udde lai ngara Waļe Mawu niŗruuda. ³¹Tantaļanna mangangaļiba'ukka udde maddea'a mamate si Paulus, pia taumata namasingkatta su tembonannu tantara n Roma manungku laļorŗo n soa n Yerusalem nassongkakke. ³²Tembonannu tantara n Roma udde lapiddu nangahe sire pira tantara tepelle wuŗru tantara waine see maļiha-ļihakka inai ringanni mangitou su tampa m pabbawuļoanna udde. Napawe taumata nambo udde naasilo piaŗrangnge wuŗru tantarane, imangitou naddote mamuulla si Paulus. ³³Piaŗrangnge udde inaite ringanni Paulus see nanametta sitou, wuŗru nandolokku taumata niapaŗrapussa sitou. Wua udde piaŗrangnge naiwaļo su ola'u isai Paulus wuŗru apa apan suete niolangnge. ³⁴Sangkawageanganna wuassu taumata nambo udde sinumimbakka arendi, wuŗru sangkawageanganna lai sinumimbakka arodđi. Saŗrene naaļiba'ukke arodđi olangnge, na'oma n sara piaŗra'u tantara udde tawe naasingkatta apa apan suete nariaddi. Ana waugu udde itou nandolokka tadea'u Paulus iapidda su tampa mangitou. ³⁵Su tempo imangitou nangapiddi tou sara tuadda, mangangaļiba'ukka udde naŗrimpulunna arodđi aŗraginne na'oma n sara Paulus sarun ehetannu manga tantara. ³⁶Imangitou tatantalongannu mangangaļiba'ukka wuassu liudde apan u'ui, "Patete itou!"

Paulus mannahekku watanganne

³⁷Aroddi sumuttate su tampa n tantara, Paulus nabbisara su tembonanne udde, "Wotongnge ia'u massinaukka tała ng kadio'a ringanni Tuangnga?"

"I'o wotongnge massinaukku Yunani?" aiwało n tembonanne udde. ³⁸"Amungkangngu aroddi i'o wałine taumata n Mesir apan allo nałiu ma'ola'a hio see nantałangngu appatu řiwu su atoune mangangalıba'ukka pia ahidde sinumutta su wadda'a?"

³⁹Paulus sinumimbakka, "Ia'u taumata n Yahudi; ia'u tumana'u soa n Tarsus soa ahewałanne su Kilikia. Tułunga'o ia'u pahahattoa'u manga taumata udde."

⁴⁰Ne napawe Paulus niwala mabbisara, Paulus dirumarisikke su tuadda, see namate n limane. Taumata nambo nallannaba. Wua udde Paulus nabbisara simangitou sulałummu wisara n Ibrani. Paulus nabbisara,

22 "Manga iamangnga wuřru manga tuřrangnga sarangkanambone! Ia'u sarun manapputu atatułi'u siamiu. Daringiře'ol!" ²Napawe imangitou naaringikka Paulus nabbisara sulałummu wisara n Ibrani, imangitou lembo nallannaba lai. Ne Paulus nanassute tałaane. ³"Ia'u taumata n Yahudi," unni Paulus, "ia'u niasungkangnga su Tarsus su leta'u Kilikia arawe ia'u niwuwunna isindi su Yerusalem, wuřru niařraanna ringannu ma'uduppa wuassu huru wahewa Gamaliel sulałummu Tita apan nionggolli Musa su iupungngu ałamona ng kite. Ere lai manga tuřrangnga sarangkanambone isindi, allo indi, ia'u lai mařrimadda su manara Mawu Ruata. ⁴Ia'u marmate ma'oma n sara mallałarřenggenno ałarřa'a wakku udde nate. Imangitou sarangkanambone mapia esakka ara'e lai wawine, ta'u sinametta wuřru tinarřo sulałummu tuttupanna. ⁵Imam wahewa sassane wuřru anambo Mallařruungngu Agama wotongnge mattiala manungku ia'u tawe mangawusu. Ana wagu ete imangitou udde suete nangonggolu suratta wawało su manga taumata n Yahudi su Damsyik. Ringannu suratta udde ia'u wotongnge manametta poiarddi manga taumata apan mangngimanna ałarřa'a udde wuřru mangapiddi mangitou su Yerusalem iřruumanna."

Paulus nabbatti'u apa apan suete nariaddi sitou

(WMR. 9:1-19, 26:12-18)

⁶"Su tempo ia'u tantałanna su amatanna wuřru maranite n Damsyik, su tempo allattune, sambau semakka apan tumanite masemakka atonna inařřombanganne natuakka wuassu langitta namałiwutta sia'u.

⁷Ia'u narra'a su leta'a see ia'u naaringikka sambau tingikka nabbi-sara sia'u, 'Saulus, Saulus! Anio i'o mandaleo Sia'u?' ⁸See ia'u nai-walo, 'Isai I'o Mawu?' 'Ia'u eteudde Mawu Yesus taumata Nazaret udde apan raddaleoannu,' sasimbakke. ⁹Manga taumata isudde sua-dio'a ringangu naasilo semakka udde arawe imangitou tawe naaring-ikka tingikka apan nabbisara sia'u. ¹⁰See ia'u naiwalo apia, 'Apa rinone ta'u olaanna Mawu?' Mawu sinumimbakka, 'Darisikke wufru roote su Damsyik. Poiaroddi i'o sarun pasingkatanna su ola'u apa apan ipaapulu Mawu Ruata sarun olaannu.' ¹¹Ia'u nawuta ana waugu semakka apan malangitta udde. Nariaddi manga hawe'u nangehetta sia'u sinumutta su Damsyik.

¹²Isudde pia sangkatou aranne Ananias. Itou sangkatou apan susi wufru matufru mappamattu Tita n Musa. Anambo n taumata n Yahudi apan uatana'a su Damsyik mangngaddatta sitou. ¹³Itou nirumanta nattembo sia'u, see nirumarisikka su sandirangu wufru nabbisara, 'Tufrangu Saulus, rinone i'o maasilo apia!' Orassa udde lai ia'u tinumagekka see naasilo sitou. ¹⁴Wua udde itou nabbisara sia'u, 'Mawu Ruata iupunggu alamona ng kite suete namile si'o, tadea'u i'o maasingkatta pandumme wufru maasilo Mawu Yesus, Allangu Mawu Ruata apan nanipussa apulu Mawu Ruata see madaringikka tingikku Mawu Yesus sassane. ¹⁵I'o saruu maola'a daroloanna mammasingkatta su anambo n taumata apa apan suete niasiloannu wufru niaringirannu. ¹⁶Orassa indi ariete i'o marrado malannu. Darisikke wufru paisarranite. Salandete su Mawu tadea'u i'o iapaaliu wuassu manga rosanu.'"

Mawu Ruata nandolokki Paulus massinaukka su saruannu pabbawalaga waine apan waline Yahudi

¹⁷"Ia'u nabelengnga watukku Yerusalem, wufru napawe ia'u u'aliomanna su Wale Mawu, ia'u niintarfoannu Gharraho Mawu Ruata. ¹⁸Ia'u naasilo Mawu; Itou nabbisara sia'u, 'Paalihakke manantang-gu Yerusalem, ana waugu manga taumata isindi tawe madaring-ikka tatialanu su ola'u riri-U.' ¹⁹Ia'u nabbisara, 'Mawu, imangitou ma-singkatta atonna manungku ia'u suete sinumutta su manga wale m pattatarramawuanna maddea'a manametta simangitou wufru mamuulla manga taumata apan mangngimanna Si'o. ²⁰Aroddi lai napawe matatia-lanu Stefanus nipate, ia'u sassane isudde, wufru ia'u lai inumire su ola'u pamamate udde. Ewe'e ete ia'u lai uariaga laubbu manga taumata apan namate sitou.' ²¹Arawe Mawu nabbisara apia lai sia'u, 'Roote, ana waugu Ia'u sarun mandolokku inai su tampa apan marau ringannu manga taumata apan waline Yahudi.'"

²²Manga taumata ta'e sidutu uararingikka si Paulus mabbisara, arawe su wisara apan pangudusanne imangitou inumui ma'ikkatta, "Pate taumata ereudde. Tawe rinone itou mabbiakka!" ²³Lapiddu u'ui imangitou mangngalabbu paliwungngi mangitou wuṛṛu mannongkakku awu watukku winalanganna. ²⁴Ne tembonannu tantara n Roma namarenta, tadea'u Paulus iapidda su tampa mangitou, tadea'u itou parikisanna isudde ringannu araragissa see asingkatanna anio manga taumata n Yahudi u'ui aroddi sitou. ²⁵Arawe su tempo Paulus rarapusanate wuṛṛu suete nipuulla, Paulus nabbisara su tembonannu tantara apan uarisikka isudde, "Apa wotongnge mamuulla sangkatou tumana'u araratuannu Roma, tantanna itou taambe niparikisanna?"

²⁶Naaringikka udde, piarra'u tantara udde inaite ringannu tembonannu tantara wuṛṛu nabbisara, "Apa sarun olaanni ite lamangnga? Taumata indi tumana'u araratuannu Roma!"

²⁷Ne tembonannu tantara udde inaite ringanni Paulus wuṛṛu naiwaḷo, "Waḷoa'e siami, atonna i'o tumana'u araratuannu Roma!"

"Ore," sasimbakki Paulus, ia'u tumana'u araratuannu Roma. ²⁸Tembonanne udde nabbisara apia, "Ia'u naola'a tumana'u Roma ringannu namaekka tumanite manambo!"

Paulus sinumimbakka, "Arawe ia'u niasungkangnga naola'a sangkatou tumana'u araratuannu Roma." ²⁹Orassa udde lai manga tantara apan mamarikissa si Paulus udde, sinumorrota, wuṛṛu tembonanne udde nata'utta ana waugu itou suete narapussa si Paulus, sumbaḷi Paulus tumana'u araratuannu Roma.

Paulus su saruannu Mallarṛuungngu Agama

³⁰Tembonannu tantara n Roma udde mangke maapulu maasingkatta anio taumata n Yahudi mapaasala m Paulus. Ana waugu udde tirabbine itou namaggo manga imam tembonanne, wuṛṛu Mallarṛuungngu Agama maammula. See Paulus nipallose wuassu mantungnge, wua udde niapidda sinumaruanna simangitou sarangkanambone.

23 Paulus nanutudda manga mallarṛuungnga udde see nabbisara, "Manga turṛangku! Na'oma n sara allo indi ia'u tawe naependamma sala su saruannu Mawu Ruata sulalummu naungku su ola'u ia'u mabbiakka." ²Su tempo Paulus nabbisara aroddi, Imam Wahewa Ananias nandolokku taumata apan uarisikka su sandiranni Paulus niapapero morrongngi Paulus. ³Ne Paulus nabbisara imam wahewa udde, "Mawu Ruata sarun mamero si'o, taumata lilangkamaḷe'a apan ma'iellega na'ukkassa! I'o uaianna isudde mamarikissa sia'u

tumuṛṛuttu Tita n Musa, wutte'e i'o sassane nilumawangnga Tita udde ringannu nandolokku taumata niapapero sia'u!"

⁴Manga taumata su sandiṛṛanni Paulus nabbisara si Paulus, "I'o mangngadio'a imam wahewa Mawu Ruata!" ⁵Paulus sinumimbakka, "Oh, ia'u wagga, manga tuṛṛangnga, manungku itou imam wahewa. Atonna sulaḷummu Wuke Susi pia uawoṛṛetta, 'Imbaṛṛangnga i'o mangngadio'a piaṛṛa'u pabbawalagu."

⁶Paulus naasilo manungku sambageanganna wuassu mallarṛuungnga udde taumata n Saduki, wuṛṛu sambageanganna lai taumata n Farisi. Ana waugu udde itou nabbisara su manga mallarṛuungnga udde, "Manga tuṛṛangnga! Ia'u sangkatou taumata pabbawalagu taumata n Farisi. Ia'u niparikisanna isindi ana waugu ia'u mangngimanna manungku manga taumata nate sarun mabbiakka apia." ⁷Napawe itou nabbisara aroddi, manga taumata n Farisi wuṛṛu manga taumata n Saduki nanattakke uatatiakka, na'oma n sara ṛa'ianna udde napesangnga natahia rua ng kawageanganna. (⁸Ana waugu manga taumata n Saduki pia addapanne manungku taumata nate tate mabbiakka apia, manungku tawe mala'ekatta, wuṛṛu tawe lai manga ghaṛṛaho, arawe manga taumata n Farisi mangngimanna sarangkanambone udde.) ⁹Ne nariaddite hio wahewa. Manga pira taumata n Farisi apan naola'a huru n agama dirumarisikka wuṛṛu nanompolla. Imangitou nabbisara, "Tumuṛṛutta siami, taumata indi tawe saḷane saran adio'a! Asinungka pia ghaṛṛaho ara'e mala'ekatta apan mabbisara sitou!"

¹⁰Patatatiakka udde naola'a aroddi ahewalle na'oma n sara piaṛṛangnge udde nata'utta, aṛṛengenne Paulus rimpulananni mangitou. Nariaddi itou nandolokku tantarane inai mangalappa si Paulus wuassu pattangngannu manga taumata udde see niapidda su tampa mangitou.

¹¹Rabbi nanansunna, Mawu Yesu nirumarisikka su sandiṛṛanni Paulus wuṛṛu nabbisara, "Paatoḥassa naungngu! I'o suete nattiala su ola'u riri-U su Yerusalem. I'o ṛinone lai mabatti'u udde su Roma."

Ammuḷannu taumata mamate si Paulus

¹²Tiṛṛabbine ruaallo atonna, manga taumata n Yahudi, nanattakke maammula. Imangitou nassalu tawe umanna ara'e ma'inumma amungkangngu imangitou taambe naapate si Paulus. ¹³Appatu puḷo pia lebbene taumata apan uaammulla isudde. ¹⁴Imangitou inaitte ringannu manga imam tembonanne wuṛṛu manga piaṛṛa'u Yahudi lapiddu nabbisara, "Iami suete nassalu suadio'a, tawe umanna wuṛṛu ma'inumma saran adio'a amungkangngu iami taambe naapate si Paulus. ¹⁵Ne orassa indi manga tuṛṛangnga ringannu manga Mallarṛuungngu Agarna ṛinone

mapaapiddu suratta su tembonannu tantara n Roma udde ipadorongnga itou mangapiddi Paulus mabelengnga sumaruanna siamiu, paṛrimau napa iamiu mamarikissa apia hattone ringannu ma'uduppa. Wuṛṛu iami uasasadiate mamate sitou tantaḷanna itou taambe na'oma isindi."

¹⁶Arawe ana'u wawine m Paulus naaringikka pandumanni mangitou udde. Ne itou inaitte su tampa n tantara wuṛṛu namasingkattu watti'a udde si Paulus. ¹⁷See Paulus namaggo sangkatou piaṛrangnge wuṛṛu nabbisara sitou. "Apira'a ana'a umbasanna indi su tembonanne; itou pia apa iwaḷo sitou." ¹⁸Piaṛra'u tantara udde nangapiddu ana'a umbasanna udde su tembonanne wuṛṛu nabbisara sitou, "Paulus taumata tataṛranganna udde, namaggo sia'u wuṛṛu nadorongnga tadea'u ia'u mangapiddu ana'a umbasanna indi si Tuangnga; itou piaddu iwaḷo."

¹⁹Tembonanne udde nangagassa lima ng kana'a umbasanna udde, see nangapiddi tou sassane su sandiṛṛanne wuṛṛu naiwaḷo, "I'o mabatti'u apa sia'u?"

²⁰Ana'a umbasanna udde sinumimbakka, "Manga taumata n Yahudi suete na'ire madorongnga si Tuangnga mangapiddi Paulus sumaruanna Mallaṛṛuungngu Agama tiṛṛabbi, paṛrimau napa imangitou mamarikissa apia hattone ringannu ma'uduppa. ²¹Arawe arie Tuangnga madaringikka darorongngi mangitou udde, ana waugu appatu puḷo pia lebene taumata apan tantaḷanna uaimbuni mangampangnga sitou su ḷaḷanna. Imangitou sarangkanambone suete nassalu tawe umanna wuṛṛu ma'inumma amungkangngu imangitou taambe naapate si Paulus. Orassa indi imangitou nasaddiate; ete uaraṛṛaddo sasimbakki Tuangnga." ²²Tembonannu tantara udde nabbisara, "Arie pabbaḷoa'a sisai-sai manungku i'o suete nangalae sia'u." See itou nandolokku ana'a umbasanna udde niapaapule.

Paulus niuntudda si Feliks

²³Wua udde tembonannu tantara udde namago rua ng katou piaṛra'u tantara, ana see itou nabbisara sitarua, "Saddiaite rua ṛasutta tantara suadio'a ringannu pitu m puḷo tantara uasa'e awaḷo wuṛṛu rua ṛasutta tantara pia sambeangnge ana see inaitte amatta puḷla sio ṛabbi indi lai watukku Kaisarea. ²⁴Saddiaite lai awaḷo sa'eanni Paulus wuṛṛu apira'e itou ringannu saḷamatta ma'oma su waḷe Gubernure Feliks." ²⁵See tembonannu tantara udde namoṛṛetu suratta tingikke ereindi,

²⁶"Apan awantuhanne Gubernure Feliks. Tabea wuassi Klaudius Lisias! ²⁷Taumata indi suete sinamettu manga taumata n Yahudi wuṛṛu ete adio'a pateanni mangitou, amungkangngu ia'u tawe nirumanta ringannu tantara'u wuṛṛu nanaḷamatta sitou; ana waugu ia'u naaringikka

manungku itou tumana'u araratuannu Roma. ²⁸Ana waugu ia'u maapulu maasingkata apa pasasalaane apan iaansili mangitou sitou, ne ia'u nangapiddi tou su Mallarpuungngu Agama mangitou. ²⁹Ne nasemakke itou tawe pasasala apan wotongnge maarpuumanna sitou ringannu ruumanna pateanna ara'e itarpo su tutupanna. Alae mangitou tumba'u ana waugu tita n agama mangitou sassane. ³⁰Wua udde ia'u niwaloanna manungku pia ire laleo wuassu manga taumata n Yahudi sitou. Ana waugu udde ia'u napa'untudi tou ringanni Tuangnga Gubernure. Wuppu ia'u suete nandolokku mangangalaene mangapiddu alae mangitou si Tuangnga."

³¹Ne manga tantara udde napaamate manara mangitou. Imangitou nangalappa si Paulus see nangapiddi tou rabbi udde lai na'oma n sara su Antiparis. ³²Tirabbine imangitou namalate n tantara apan uasa'e awalo manassu amatanne ringanni Paulus, wuppu imangitou nabelengke su tampa mangitou. ³³Napawe tantara uasa'e awalo udde na'omate su Kaisarea, imangitou nangonggolu suratta udde su gubernure, see Paulus tinantilla sitou. ³⁴Napawe gubernure suete nabbasa n suratta udde, itou naiwalo si Paulus wuassu apa darantane. Napawe itou naasingkata manungku Paulus wuassu Kilikia, ³⁵itou nabbisara, "Apianne! Ia'ute mamarikissa hattonu, amungkangngu manga taumata apan nangalaenu na'omate isindi." See itou namarenta tadea'u Paulus taranganna sulalummu wale n araratuanni Herodes.

Paulus nialae manga taumata n Yahudi

24 Lima allo wua udde, Imam Wahewa Ananias wuppu manga pia'ra'u Yahudi inaita watukku Kaisarea uapiddu sangkatou mangangatokku hatto aranne Tertulus. Imangitou sinumaruanna si Gubernure Feliks wuppu nangalae m Paulus. ²Napawe Tertulus niwagoanna su saruanna, itou mangngansilla si Paulus arendi,

"Tuangnga Gubernure Apan Mawantuga! Sulalummu pia'ra'i Tuangnga wanua ng kami tawe gione. Wuppu ana waugu apapande n Tuangnga lai manambo apapia apan suete niola'i Tuangnga su pabbawalagi ami. ³Sarangkanambone udde mangke sassa'ohooanni ami ringannu aadiangkamanna wuppu aaddatta apan nangillembu su alawo'u tampa. ⁴Arawe tadea'u tawe manggolo'a tempo n Tuangnga manambo, ia'u madorongnga amungkangngu wotongnge Tuangnga madingikka aalae ng kami apan maautta indi. ⁵Niasombanganni ami taumata indi mangangaliba'ukka apan maasilaka. Su alawo'u tampa itou ma'ola'a hio su wallattu manga taumata n Yahudi wuppu itou naola'a pia'ra'u pandumannu manga taumata Nazaret. ⁶Ewe'e itou lai suete naannamma

nandaleo arannu Waje Mawu, arawe iami nanametta sitou. [Iami mapandumma mamarikissa sitou tumuruttu tita n agama ng kami sassane. ⁷Arawe tembonannu tantara Lisias nangarfo sitou wuassi ami, ⁸wurru namarenta tadea'u mangangalaene sumaruanna si Tuangnga.] Amungkangngu Tuangnga mamarikissa taumata indi, Tuangnga sassane sarun madaringikka wuassi tou manungku atonna sarangkanambone apan ipangngalae ng kami sitou." ⁹Manga taumata n Yahudi tinumantalongnga lai nangalae m Paulus wurru nangngimante alawo'u wisara apan niwisara n Tertulus.

Paulus nanahekku watanganne su saruanni Feliks

¹⁰see gubernure udde nangonggolu tempo si Paulus, manungku itou wotongnge massinaukka. Ne Paulus nabbisarate, "Ia'u masingkatta Tuangnga naola'a mallarungnga su wanua indi pirate tonna alannune. Ana waugu udde ia'u lulluassa mamasingkattu watti'a indi su saruanni Tuangnga. ¹¹Tuangnga wotongnge manarassida sassane manungku tawe nilumebbe wuassu mapulo. dua su allone nalju ia'u nirumanta su Yerusalem umaliomanna. ¹²Wurru tawe saran paassa manga taumata n Yahudi udde naaratingnga sia'u uatatiakka ringannu sangkatou, ara'e nangammullu taumata ana mangaliba'ukka, mapia su Waje Mawu, ara'e su waje m pattatarramawuanna ara'e su alawo'u tampa sulalummu soa. ¹³Imangitou lai tawe maasemakka manga alae mangitou si Tuangnga su ala'u watanganku. ¹⁴Atonna rinone ia'u manga'u si Tuangnga manungku ia'u massubba Mawu Ruata n iupungngu alamona ng kami tumuruttu alarra'u Mawu Yesus apan sassunnanni mangitou nassala. Arawe ia'u ta'e mangngimanna sarangkanambone apan uaworretta sulalummu Wuke Musa wurru Wuke Manga Nabi. ¹⁵Ere lai imangitou, ia'u lai pia antimma su Mawu Ruata manungku anambo n taumata sarun mabbiakka apia wuassu papate – taumata mapia, ara'e lai taumata laleo! ¹⁶Ana waugu udde ia'u sidutu ma'ola'a apapia, tadea'u naungku waresi su saruannu Mawu Ruata wurru waresi su saruannu taumata.

¹⁷Napawe pirate tonna tawe uatana'a su Yerusalem, ia'u nabelengke apia su Yerusalem nangapiddu sasumbala roitta su pabbawala'u wurru nangapiddu aonggolla sasamba su Mawu Ruata. ¹⁸Su tempo ia'u tantallanna mammanara udde, imangitou naaratingnga sia'u su Waje Mawu, napawe ia'u suete nallaghu m pangangukasa wadangnga. Tawe taumata nambo isudde ringanku, wurru tawe pagahahio lai su tempo udde. ¹⁹Tumba'u pia sire pira taumata n Yahudi wuassu leta'u Asia. Ete imangitou rinone mangapiddu alae mangitou si Tuangnga isindi, amungkangngu imangitou piaddu ipangalae'u. ²⁰Ara'e wala'e manga taumata

indi sassane mangalae n ala'leo apa apan niasombanganni mangitou sia'u su tempo ia'u niapaasaruanna Mallarungu Agama. ²¹Niaringiranni mangitou tumba'u wisara sampaddi indi apan niwisara'u su saruanni mangitou eteudde: Ia'u niparikisanna allo indi ana waugu ia'u mangngi-manna manungku manga taumata nate sarun iapaawiakka apia."

²²See Feliks apan naasingkate manambo ala'ra'u Mawu Yesus, nanguddussu ammulanna udde. "Ia'u sarun nanguddussu hatto indi," unni tou, "amungkanngu tembonannu tantara Lisias nirumantate." ²³See itou nandolokku piarra'u tantara apan uariaga si Paulus udde, tadea'u sidutu uatarangnga si Paulus, arawe ringannu nangonggolu loakke adio'a sitou wurru namala manga hawene mangonggolu hausanna apan ipaapulune.

Paulus su saruanni Feliks wurru Drusila

²⁴Manga pira allo wua udde, Feliks nirumanta raringanannu awingenge aranne Drusila; itou sangkatou taumata n Yahudi. See Feliks nandolokku taumata niapaalappa si Paulus, wua udde Feliks nadaringikka si Paulus nassinaukka su ola'u pangangimanna si Kristus Yesus. ²⁵Arawe napawe Paulus nanassute wisarane su ola'u atatujidda wurru asasabare wurru su ola'u pallaruumanna su allo ng kiamatta, Feliks nata'utta see nabbisara, "To wotonggete mapule orassa indi. Ia'u sarun mamago si'o apia amungkanngu pia tempone." ²⁶Tantalanna udde Feliks pia antimma sarun maasomba roitta wuassi Paulus. Ana waugu udde itou masokka mandolokku taumata mangaalappa si Paulus magahahatto n tou.

²⁷Napawe daruate tonna, Perkius Festus nallojossa si Feliks naola'a gubernure. Wurru ana waugu Feliks maapulu massa'o'u naungngu manga taumata n Yahudi, itou namala m Paulus sulajummu tuttupanna.

Paulus maapulu maggatto apia su tembonanne atanggaranne

25 Tallu allo napawe Festus na'omate su wanua udde, itou inaitte wuassu Kaisarea watukku Yerusalem. ²Poiaroddi manga imam tembonanne wurru manga piarra'u Yahudi nangalae si Festus alae mangitou su ola'i Paulus. Imangitou sidutu massa'oi Festus ³tadea'u wuassu apapia naungnge simangitou, itou mandolokku taumata mangapiddi Paulus watukku Yerusalem; ana waugu imangitou suete na'ire mamate sitou su tangnga n dalanna. ⁴Arawe Festus sinumimbakka, "Paulus tantalanna tataranganna su Kaisarea; wurru ia'u sa-

ssane lai tate maľannu mabelengnga poiaronddi. ⁵Nariaddi wala'e manga taumata papunnane su wallatti amiu inai suadio'a ringangu watukku Kaisarea wuřu magahatto poiaronddi, amungkangu itou suete na'ola'a sambau pasasala."

⁶Napawe suete natana'a su Yerusalem irarungngu ualute ara'e mapulo allo lai, Festus nabelengke watukku Kaisarea. Tirabbine itou na'ola'a ammulu mamarikissa wuřu nandolokka tadea'u Paulus alapanna iapaasaruanna sitou. ⁷Napawe Paulus na'omate, manga taumata n Yahudi apan nirumantate su Yerusalem dirumarisikka namaliwutta sitou, wuřu nanattakke mangngalae alae apan mawakkata su ola'i tou. Arawe imangitou tawe maasemakka manga alae udde. ⁸Sulalummu sasinaukke, Paulus nabbisara, "Ia'u tawe inolaanna apan nassala su saruannu Tita Musa ara'e su saruannu Wale Mawu ara'e su saruannu Kaisar Roma."

⁹Arawe Festus maapulu massalo'u taumata n Yahudi. Ne itou naiwalo si Paulus, "To maapulu inai watukku Yerusalem parikisanna poiaronddi su saruangu su ola'u manga alae indi?"

¹⁰Paulus sinumimbakka, "Ia'u tantallanna uarisikka su saruannu mallarungngu Kaisar Roma; wuřu ete su tampa udde ia'u sarun parikisanna. Tuangnga sassane masingkatta manungku ia'u tawe sala su saruannu manga taumata n Yahudi. ¹¹Amungkangu ia'u suete nilumawangnga tita wuřu ma'ola'a inolaanna apan maaruumanna ma'oma n sara pateanna, ia'u maluassa pateanna. Arawe amungkangu alae mangitou udde awusu, tawe saran sangkatou wotongge manantillu riri'u simangitou. Ia'u madorongnga parikisanna su saruannu mallarungngu Kaisar!"

¹²Napawe suete na'ire ringannu manga mananantirone, Festus nabbisara, "To madorongnga parikisanna su saruannu mallarungngu Kaisar, nariaddi i'o rinone inai sumaruanna Kaisar."

Paulus su saruanni Agripa wuřu Bernike

¹³Tawe nalannu wua udde, Ratu Agripa wuřu Bernike nirumanta su Kaisarea mabalo n tabea si Festus. ¹⁴Napawe imangitou uatana'e isudde manga pira allo, i Festus nana'a n hatto m Paulus si Agripa. Festus nabbisara, "Isindi pia sangkatou taumata tatauranganna apan tinantanggi Feliks. ¹⁵Su tempo ia'u su Yerusalem, manga imam tembonanne wuřu manga piarra'u Yahudi nangalae n taumata udde wuřu madorongnga tadea'u ia'u maaruumanni tou. ¹⁶Arawe ia'u sinumimbakka manungku taumata n Roma tawe wotongge manantillu taumata iwala aroddi iapaaruumanna, amungkangu isai nialae taambe

nasasaruanu mangangalaene wuṛṛu massinaukka manahékku ririne. ¹⁷Nariaddi su tempo imangitou nirumanta isindi, ia'u tawe naṛṛado maḷannu lai. Tiṛṛabbine ia'u lapiddu na'ola'a ammuḷannu mamamarikissa wuṛṛu nandolokka tadea'u taumata udde iapiddu su maruanna sia'u. ¹⁸Napawe mangangalae udde dirumarisikka mangngapiddu aalae mangitou, imangitou tawe napaasingkattu saran sambau aḷaḷeone ere ta'u sassunnanna apan iaalae mangitou. ¹⁹Imangitou tumba'u nassaḷa sunna ringanni tou su ola'u agama mangitou sassane wuṛṛu su ola'u sangkatou apan aranne Mawu Yesus. Taumata udde natete, arawe Paulus mangke mannohassu pangangimanne manungku taumata udde wiakka. ²⁰Ana waugu ia'u niaḷiwune su ola'u ereapa ia'u wotongnge maasomba sasimbakku manga hatto udde, ia'u naiwaḷo si Paulus, apa itou inai lai watukku Yerusalem wuṛṛu hattone parikisanna poiaronddi. ²¹Arawe Paulus nadorongnga tadea'u hattone parikisannu mamamarikissa atangaṛanne, itou madorongnga tadea'u itou sidutu tataṛranganna, ma'oma n sara hattone iṛṛawessu Kaisar. Ana waugu udde ia'u namarenta tadea'u itou sidutu tataṛranganna, ma'oma n sara ia'u pia tempone manguntudi tou ringannu Kaisar." ²²See Agripa nabbi-sara si Festus, "Ia'u sassane lai maapulu madaringikka taumata udde." "Tiṛṛabbi Tuangnga wotongnge madaringikka sitou," sasimbakki Festus.

²³Tiṛṛabbine Agripa wuṛṛu Bernike nirumanta ringannu laḷaghu n awawantuga. Imangitou sinumutta su tampa m pamarikisanna suadio'a ringannu manga ahewaḷannu tantara wuṛṛu manga papunna su soa udde. Wuassu parenta m Festus, Paulus niapasuttate. ²⁴See Festus nabbisara, "Tuangnga Agripa wuṛṛu sarangkanambone apan uaammulla! Taumata indi suete nialae manga taumata n Yahudi sia'u, mapia su Yerusalem ara'e lai isindi. Imangitou nadorongnga ringannu u'ui manungku itou tawe wotongnge iwala wiakka. ²⁵Arawe ia'u tawe naasomba saran sambau inolaanne apan wotongnge maṛṛuumanna sitou ma'oma n sara pateanna. Wuṛṛu ana waugu itou sassane nadorongnga hattone parikisanna ringannu Kaisar, ia'u naṛṛawessa mangipiddi tou ringannu Kaisar. ²⁶Arawe ia'u taambe naasomba sasimbakka apan masemakka su ririne see ia'u maapamoṛṛettu suratta si Kaisar. Ana waugu udde ia'u napaasaruanni tou si Tuangnga sarangkanambone, nangillembu apan awantuhanne Tuangnga Agripa! Pandumangu eteudde tadea'u napawe nasuete pamamarikissa indi, ia'u piaddu iwoṛṛeta. ²⁷Ana waugu tumuṛṛuttu apulu'u, tawe ṛinone mapaapiddu sangkatou taumata n ruumanna ringannu tawe asingkatanna pasasaḷane apan niola'i tou."

Paulus nanahekku watanganne su saruanni Agripa

26 Agripa nabbisara si Paulus, "I'o iwala massinaukka manahekku watanganu." Ne Paulus namatte n limane see nassinaukka ereindi,

²"Wabbantuhanna Tuangnga Agripa! Ia'u mangke lulluassa ana waugu ia'u wotongnge maasinaukka su saruanni Tuangnga su ola'u alawo'u alae manga taumata n Yahudi marria'a su riri'u, ³nipangillembu lai ana waugu Tuangnga masingkatta atonna addatta inanaramanna wurru manga hatto n taumata n Yahudi. Ana waugu udde ia'u sumalande tadea'u Tuangnga madaringikka ringannu sabare ia'u manala'a.

⁴Anambo n taumata n Yahudi masingkatta ereapa ia'u mabbiakka ro'e n ia'u ta'e umbasanna. Imangitou masingkatta manungku ro'e n ia'u umbasanna, ia'u mabbiakka su wallattu manga pabbawala'u sassane su Yerusalem. ⁵Malannute imangitou masingka'u. Wurru imangitou maapulu, imangitou wotongnge mabatti'a manungku ro'e n paarorone ia'u mabbiakka ere sangkatou taumata m Farisi ringannu tutturutta alawo'u atoranna apan tawe aliuanna sula'ummu agama ng kami. ⁶Wurru orassa indi ia'u uarisikka isindi parikisanna ana waugu ia'u mangngimanna paaire apan niola'u Mawu Ruata su ipunggu alama ng kami. ⁷Ete paaire udde lai apan aantimannu sire mapulo dua pabbawalagu Israel, na'oma n sara imangitou mangke mattarra mawu Mawu Ruata allo wurru rabbi. Wurru ana waugu ia'u mangngimanna paaire udde, Tuangnga apan mawantuga, ia'u niapaasala manga taumata n Yahudi. ⁸Anio manga turangnga manga taumata n Yahudi tawe mangngimanna manungku Mawu Ruata mapaauiakku taumata nate apia?

⁹Dorone ia'u sassane lai pia addapatta manungku ia'u rinone ma'ola'a manga alawo'a ipanalaru Mawu Yesus wuassu Nazaret udde. ¹⁰Wurru atonna inolaanna udde suete ta'u niola'a su Yerusalem. Ringannu suratta tarino wuassu manga imam tembonanne, ia'u suete nantarro manambo taumata apan maturrutta Mawu Ruata su tuttu-panna. Ewe'e ia'u lai inumire manungku imangitou rinone pateanna. ¹¹Masokka ia'u manansara simangitou su wale m pattatarramawuanna, tadea'u mamata'i mangitou massinaaddu apa apan pangngimananni mangitou. Aroddi alosone naungku simangitou, na'oma n sara watukku manga soa waine lai, ia'u sarun inai mangenggenna simangitou poiardi."

Paulus nabbatti'u apa apan suete nariaddi sitou

(WMR. 9:1-19, 22:6-16)

¹²"Ringannu pandumma udde lai ia'u nangapiddu surattu taffino wuassu manga imam tembonanne wuṛṛu inaite watukku Damsyik. ¹³Wuṛṛu su tempo ia'u su tangnga n daḷanna, su tempo allattune, Tuangnga apan mawantuga, ia'u naasilo sambau semakka wuassu langitta, apan semakke massemarranna wuassu matannallo. Semakka udde natuakka namaliwutta sia'u wuṛṛu manga taumata apan u'amatta suadio'a ringanku. ¹⁴Iami sarangkanambone narra'a su leta'a. See ia'u naaringikka tingikka nabbisara sia'u sulalummu wisara n Ibrani, 'Saulus, Saulus! Anio i'o mangke mandaleo Sia'u! I'o sarun maapendamma sassane raddanggu, amungkanggu i'o sidutu lullawanga piaṛṛa'i Tou apan naola'a Mawunu.' ¹⁵Ne ia'u nabbisara, 'Isai I'o Mawu?' Wuṛṛu Mawu sinumimbakka, 'Ete Ia'u Mawu Yesu apan raddaleoannu udde. ¹⁶Pabbangunte wuṛṛu darisikke! Ia'u nattingkapasilo m batangang-Ku si'o pandummanne i'o Ta'u itenega maola'a mangangimbe-U. I'o rinone mamasingkatta su taumata waine apa apan niasiloannu allo indi su ola'u riri-U wuṛṛu apa apan sarun ipantingidda si'o su tempo apan sarun rumanta. ¹⁷Ia'u sarun mapaalunu wuassu pabbawalagu Israel wuṛṛu wuassu pabbawalaga waine apan waiṇe Yahudi. Ia'u sarun mandolokku inai ringanni mangitou iapawu'a mata mangitou, ¹⁸tadea'u imangitou sumabangnga wuassu ararandumma wuṛṛu sumutta su asasemakka; tadea'u imangitou maiu wuassu wawono'u Setanna, see mangngimante Mawu Ruata. Ne ringannu mangngimanna sia'u, manga rosa mangitou sarun ampunganna wuṛṛu imangitou sarun mareengnga su pabbawalagu Mawu Ruata apan suete nipile.'"

Paulus nanaḷa'a manarane

¹⁹"Ana waugu udde, Tuangnga Agripa, ia'u sidutu mattinsahadda tutturutta sondappa apan suete ta'u nisengkamma wuassu Mawu Ruata udde. ²⁰Ringannu uahahatti ia'u namasingkatta su manga taumata manungku imangitou rinone mawalu wuassu manga rosa mangitou, wuṛṛu manantillu wadangngi mangitou su Mawu Ruata see lumiatta'a sulalummu wiakki mangitou manungku imangitou nawaḷute wuassu manga rosa mangitou. Ia'u namasingkattu watti'a udde paarorone su Damsyik, wua udde su Yerusalem wuṛṛu su ahewallu Yudea wuṛṛu su wallattu manga taumata apan waiṇe Yahudi. ²¹Ne ana waugu udde manga taumata n Yahudi nanametta sia'u su Waiṇe Mawu wuṛṛu madda'a mamate sia'u. ²²Arawe na'oma n sara orassa indi ia'u mangke

su lu'addu Mawu Ruata, na'oma n sara lai ia'u wotongnge dirumari-sikka isindi mangonggolu tiala'u su anambo n taumata – timmade ara'e dario'a. Apa apan iwabatti'u indi tawe paŕŕalane wuassu apa apan suete niapasingkattu manga nabi wuŕŕu Musa; ²³eteudde manungku Ratu m Punnu Saŕamatta apan pina'ire Mawu Ruata udde ŕinone matataŕrangnga, wuŕŕu maola'a taumata paarorone apan mabbiaikka apia wuassu papate, tadea'u ringannu udde Itou wotongnge mamasing-kattu asasemakka – eteudde asasaŕamatta – mapia su manga taumata n Yahudi aroddi lai su manga taumata apan waŕine Yahudi."

²⁴Tantaŕanna Paulus massinaukka, Festus niuumi, "I'o nabewate Paulus! Apapandenu apan manambo udde naawewate si'o!" ²⁵Arawe Paulus sinumimbakka, "Ia'u tawe wewa, Awantuhanne. Manga wi-sara apan iwabbisara'u udde atonna wuŕŕu sinumabangnga wuassu ŕingirŕanna apan masemakka. ²⁶Tuangnga Agripa sassane lai masing-kattu manga hatto udde. Ana waugu udde ia'u waŕŕani mabbisara su saruanni Tuangnga ringannu masema-semakka. Ia'u mangngimanna manungku tawe saran sangkapaddi wuassu hatto udde apan awagananni Tuangnga, ana waugu sarangkanambone udde tawe nariaddi su manga tampa apan uawuni. ²⁷Wabantuhanna Tuangnga Agripa, apa Tuangnga mangngimanna wisara apan niapaasingkattu manga nabi? Ia'u mam-mendamma Tuangnga lai mangngimanna!"

²⁸See Agripa nabbisara si Paulus, "Sunnanu maŕuassa mamolengnga sia'u maola'a taumata n Saŕŕani sulaŕummu tempo adio'a indi?" ²⁹"Sulaŕummu tempo adio'a ara'e sulaŕummu tempo maŕo'engnga," sa-simbakki Paulus, "Ia'u umaŕiomanna su Mawu Ruata tadea'u Tuangnga Agripa wuŕŕu manga mawu sarangkanambone apan uararingikka sia'u allo indi wotongnge maola'a ere ia'u – tabene'e tumba'u ŕaŕrapussa indi!"

³⁰Panginsueanne tuangnga ratu, gubernure wuŕŕu Bernike, see anambo n taumata waine dirumarisikka. ³¹Napawe su liuddete, imangi-tou uahahatto sangkatou ringannu waine, "Taumata indi tawe inolaanne saran sambau apan wotongnge maarŕuumanna sitou pateanna ara'e itaŕŕo su tuttupanna." ³²See Agripa nabbisara si Festus, "Taumata indi wotongngete ipallōsa, amungkangngu itou tate manassu hattone parikisanna su mallarŕuungngu Kaisar."

Paulus nassenggotta watukku Roma

27 Napawe naŕŕawesse manungku iami inaitte massenggotta watukku Italia, Paulus wuŕŕu manga pira taumata apan tataŕranganna waine tinantilla si Yulius, piaŕŕa'u tantara n Roma apan isassago lai "Tantara n Kaisar". ²Iami sinuma'ete su apalla apan nirumanta wua-

ssu Adramitium, wua udde sinuma'ete apalla udde apan nasaddiate massenggota watukku manga tatuljanna su leta'u Asia. Aristarkhus, sangkatou taumata n Makedonia apan nirumanta wuassu Tesalonika nassenggotte lai suadio'a ringanni ami. ³Tiřrabbine iami na'omate su Sidon. Paulus papaduljananni Yulius ringannu mapia. Itou niwala mattembo manga hawene tadea'u imangitou wotongnge mangonggolu sarannapa apan pappandumanne. ⁴Wua isudde iami nanassute pasasenggotti ami. Ana waugu uasomakka anginna, iami nassenggotta rudurukka apannu tarřanusa n Siprus apan tawe arřinoannu anginna. ⁵Wua udde iami namarete tahařoangnga apan uasaruanna Kilikia wuřru Pamfilia see na'omate su Mira su wanua Likia. ⁶Isudde piařra'u tantara udde naasomba sambau apalla wuassu Aleksandria apan inai watukku Italia. Ne iami nangingkatte su apalla udde.

⁷Manga pira allo alannune iami massenggota tumanite maliwue atonna, wuřru ringannu masahadda atonna panginsueanne iami na'omate araune sara soa n Knidus. Wua udde ana waugu hati m banua ta'e lařeo, iami tawe nanassu pasasenggotti ami su mona paarorone. Ne iami nassenggotte watukku timukka su tarřanusa n Kreta su mabbi tongokku Salmone tadea'u iami tawe arřinoannu anginna. ⁸Ringannu nallome iami nassenggotta rudurukka apannu tarřanusa udde, wuřru panginsueanne iami na'omate su sambau tampa aranne Tatuljanna Mařramaga tawe marau wuassu soa n Lasea.



Pabbalangoanna mařransanga (27:8)

⁹Su tempo udde Allo Wahewa m Paddarame n taumata n Yahudi naljute. Manambo tempo naholo'a siami, na'oma n sara tate tempone lai iami massenggota lenakka. Ana waugu udde Paulus nanantiro arendi simangitou, ¹⁰"Manga tuřrangnga, tumuřruttu adapa'u tumanite maasilaka amungkangngu iite manassu amatanni ite. Iite sarun maasomba asasilaka wařine tumba'u luranni ite wuřru apalla sasa'eanni ite, arawe niawa ng kite lai wotongnge mawulj." ¹¹Arawe piařra'u tantara udde

tumanite mangngimanna mangangulinna wuŕru apitennu apalla wuassu mangngimanna manga wisara m Paulus. ¹²Tatuŕianna isudde tumanite n daŕeo su manga apalla apan mabaŕango su tempo masunge. Ana waugu udde anamboanne mamanara ng kapalla mappulute massenggota apia manantangngu tatuŕianna udde, ana waugu imangitou maapulu madda'a ma'omate su Feniks wuŕru matana'a poiaronddi aŕannune napawe tempo n runia masunge naŕiudde. Feniks eteudde tatuŕianna su Kreta apan uasaruanna anginna taŕranganna wuŕru anginna paŕonna.

Tandia'a su tahaŕoangnga

¹³Su tempo udde anginna timukka tuttiuppe masi'ome. Ne mama-manara ng kapalla maŕrangngo manungku imangitou wotongngete massenggota apia. Ne imangitou nabatunte waŕango see nassenggotte rudurukka apannu taŕranusa n Kreta. ¹⁴Arawe tawe naŕannu wua udde, anginna ma'ikkatta tinumiuppa – eteudde anginna apan isassago lawassiiitta – tinumiuppa wuassu ammaranne, ¹⁵wuŕru namappa'u apalli ami. Ana waugu apalli ami tawe maapasenggota ana waugu massomakka anginna, ne iami nangilloŕote wuŕru namalate ng kapalla ia'elekku anginna. ¹⁶Iami niaŕindumanna adio'a, su tempo sinumabbi samba'a n timukku taŕranusa n Kauda apan adio'a udde. Isudde ringannu nallome lai iami mannaŕrangnga peŕo ng apalli ami. ¹⁷Napawe pelo udde naŕureante su apalla apia, apalla udde ete nitohassa niwa'isannu taŕi nipamaŕiwutta apalla udde. Ana waugu matta'utta isiladde su ranassu anne n Sirtis apan mawawo, senggota nioŕote see apalla niwalate iappaapiddu anginna. ¹⁸Anginna sidutu mandi'uŕru, na'oma n sara tiŕrabbine lurannu apalla iradammete su tahaŕoangnga. ¹⁹Allo manansunna lai mamanara ng apalla udde nandamme aŕawo'u lurannu apalla su tahaŕoangnga ringannu lima mangitou sassane. ²⁰Maŕannu iami tawe naasilo matannallo wuŕru anumpitanna, wuŕru anginna mangke sidutu tuttiuppa. Panginsueanne iami inawuŕianu antimma mabbiakka.

²¹Manga pira allo aŕannune manga taumata tawe umanna. Ne Paulus inaite dirumarisikka su wallatti mangitou see nabbisara, "Manga tuŕrangnga! Amungkangngu iamiu nadaringikka tantiro'u wuŕru iite tawe nassenggotta wuassu Kreta, iite tawe niahoharannu sarannapa wuŕru narugi ereindi. ²²Arawe orassa indi lai ia'u madorongnga tadea'u naungngi amiu paahewalla. Tawe saran sangkatou wuassu manga tuŕrangnga apan uasa'e apalla indi mate; iite tumba'u awuŕiannu apalla indi. ²³Ana waugu naallawanna mala'ekattu Mawu Ruata apan sassubbangku, eteudde Mawu Ruata apan uatahuanna sia'u nirumanta ringanku. ²⁴Mala'ekatta udde nabbisara, 'Arie paata'utta, Paulus! Ana waugu i'o sarun sumaruanna si Kaisar. Wuŕru ana waugu wuassu apapia

naungngu Mawu Ruata si'o, anambo n taumata apan uasa'e apalla sua-dio'a ringannu sarun masalamatta ana waugu i'o lai isudde.' ²⁵Ana waugu udde manga turrangnga, rinone manga turrangnga pia antimma! Ana waugu ia'u mangngimanna Mawu Ruata manungku sarangkanam-bone sarun matipussa ere niwalo n Tou sia'u. ²⁶Arawe iite sarun irang-kalle su sambau apannu taranusa."

²⁷Su rabbi appulone appatta, iami tanta'anna ualallatto su Ta-haloangngu Adria. Irtarangngo rabbi mattangnga mamamanara ng apalla naapendamma apalla maranite ammaranne. ²⁸Nariaddi imangi-tou nangukku tali aiitannu watu ipanguukka alalummu taha'loangnga. Inauuranna tampa udde alalumme marani n appatu pulo su meterrene. Tawe nalannu wua udde imangitou nanguukka apia, see niauranna taha'loangnga isudde tumba'u tallu m pulo su meterrene. ²⁹Imangitou matta'uttu apalla isiladde su watu n sahatta ne imangitou namontollu walango appata su petone, wurru uantimma amungkangngu wotongge paa'ihakke maallo. ³⁰Malanna-lannaba manga mamamanara ng apalla maannamma tuma'angnga manantangngu apalla. Imangitou nanossokku pelo wurru mangngawusu manungku imangitou manossokku walango wuassu mona ng apalla. ³¹Arawe Paulus naba'lo su pia'ra'u tantara wurru manga tantara su apalla udde, "Amungkangngu mamamanara ng apalla indi tawe matana'a su apalla, manga turrangnga sarangkanam-bone tawe masalamatta." ³²Ana waugu udde manga tantara narassatta tali m pelo udde na'oma n sara pelo udde nielekke.

³³Napawe maranite n allo, Paulus nandolokki mangitou sarangka-nambone niapaanna. Paulus nabbisara, "Mapulote appata su allone manga turrangnga sarangkanambone uararaddo ringannu atata'utta, wurru tawe umanna sara ng kadio'a. ³⁴Ia'u madorongnga tadea'u iamiu umanna adio'a. Udde mapia siamiu tadea'u iamiu matohassa apia. Ana waugu turrangnga sarangkanambone sarun masalamatta ma'oma su am-maranne ringannu tawe auranganne." ³⁵Wua nabbisara aroddi i Paulus nanganu roti see naadiangkamanna su Mawu Ruata su saruanni mangi-tou sarangkanambone. Wua udde itou nattahia roti udde see niumante. ³⁶Ne imangitou sarangkanambone natohasse apia, wurru inumante su sampunna apia. ³⁷Sulalummu apalla udde la'orrone sarangkanambone rua rasutta pitu m pulo annuma su atoune. ³⁸Napawe suete niumanna imangitou namontollu luranna manga gandumma su taha'loangnga ta-dea'u apalla maranna.

Apalla nisiladde

³⁹Napawe allote, mamamanaranna apalla naasilote ammaranne, arawe imangitou wagga ammarannu apa udde. Imangitou naasilo sam-

bau tongokke ringannu apanne. Nariaddi imangitou mappandumma amungkangngu wotongge imangitou mabaŋango isudde. ⁴⁰Ne manga taŋi m baŋango niŋassatta see manga waŋango udde niwalate nilumak-kuba su tahaŋoangnga. Naŋrindo'u udde lai imangitou namu'a manga taŋi apan ua'iitta a'uŋinna. Wua udde imangitou nanduittu senggota su mona ng apalla tadea'u anginna mangapiddu apalla udde watukku ammaranne. ⁴¹Arawe apalla udde nattu'a su ranassa. Monane nisiladde wuŋu tate umaŋore, arawe wageangngu petone naŋrimunsa'a nirapannu lua'a wahewalla.

⁴²Manga tantara su apalla udde pia pandumma mamate anambo n taumata n ŋuumanna, ana waugu imangitou matta'utta aŋŋengenne piaddu umalangnga watukku ammaranne see tumalaŋnga. ⁴³Arawe piaŋa'u tantara udde naningaddu pandumanni mangitou udde ana waugu itou maapulu manaŋamatta si Paulus. Itou nandolokku anambo n taumata apan masingkatta umalangnga tumumpa rorone wuŋu umalangnga watukku apanne; ⁴⁴wuŋu ingana'a waine manantuŋŋutta ringannu uaagassa manga pappala ara'e pesangngu apalla udde. Ringannu laŋanne aroddi, iami na'omate su ammaranne ringannu saŋamatta.

Su Malta

28 Napawe na'omate su ammaranne ringannu saŋamatta, iami naa-sinkate manungku taŋŋanusa udde aranne Malta. ²Tumana'u taŋŋanusa udde masarŋionto'a atonna siami. Imangitou nanaŋoho siami sarangkanambone ringannu mapia wuŋu nakkunuttu putungnga huna ng kami ana waugu mangunguŋŋintŋke wuŋu runia lai masunge. ³Paulus nangammullu alu, see nironsoŋa su putungnga. Tantaŋanna itou mandonsolu putungnga, atoanna sambua sinumabangnga, ana waugu naa-pendamma saŋihangngu putungnga udde, see nangi'i lima m Paulus. ⁴Napawe tumana'u taŋŋanusa udde naasilo atoanna udde ua'ele su ta'iakki Paulus, imangitou uahahatto sangkatou ringannu waine, "Tau-mata indi asinungka taŋŋa pate, ana waugu salaiwe itou naŋiute wua-ssu papate su tahaŋoangnga, Mongannu Atatuŋidda tawe mamala n tou wiakka." ⁵Arawe Paulus namappa'u atoanna udde su putungnga ringannu tawe naappendamma taddu'a sara ng kadio'a. ⁶Imangitou masunna manungku tate maŋannu lai ta'iakki Paulus humanne ara'e aŋŋengenne itou mate. Arawe napawe naŋrado allannune tawedu na-riaddi sitou, ŋiŋiŋanni mangitou nawaŋu see imangitou nabbisara manungku Paulus sangkatou monganna.

⁷Tawe marau wuassu tampa udde pia leta'a pussa'a m Publius, tembonanne atanggarranne su taranusa udde. Ringannu alaluassu naungnge itou nanaloho siami maola'a rahone tallu allo alannune. ⁸Tempo udde iamangnge marada'a, masunge wufru ma'uru. Paulus inaite na'ellega timmade marada'a udde, see inumaljomanna wufru namita sitou na'oma n sara itou napia. ⁹Ana waugu inolaanna udde, anambo n taumata apan marada'a su taranusa nirumanta ringanni Paulus, see imangitou niapaapiate. ¹⁰Manambo aonggolli mangitou siami, wufru napawe iami inaite nassenggotta apia, imangitou nanguntudu walunni ami su apalla.

Wuassu Malta watukku Roma

¹¹Napawe tallute wulanna poiarddi iami nassenggotte wuassu wanua taranusa udde wufru sinuma'ete apalla wuassu Aleksandria apan uawalango su taranusa udde su tempo n runia masunge. Apalla udde uapaattu wanerra "Monganna Rindua Kastor wufru Poluks." ¹²Iami nabbalango su soa Sirakusa wufru natana'a isudde tallu allo alannune. ¹³Wua isudde iami nassenggotte apia rudurukka apanne na'omate su soa n Regium. Tirabbine anginna mannattake tuttiuppa wuassu timukka, na'oma n sara tumba'u sulalummu rua allo iami na'omate su soa m Putioli. ¹⁴Isudde iami nassomba n sire pira taumata apan mangngimanna Mawu Yesus, wufru ana waugu aahe mangitou iami natana'a ringanni mangitou sangkamisa alannune. See iami nassenggotte watukku Roma. ¹⁵Manga turangnga su Roma apan mangngimanna Mawu Yesus naaringikka watti'a su ola'i ami, na'oma n sara imangitou nirumanta sara Pasakku Apius wufru Pangangillooanna Tatallu see nanaloho siami. Napawe i Paulus nassomba mangitou, itou namantugga Mawu Ruata wufru naungnge nabali matohassa.

Su Roma

¹⁶Napawe na'omate su Roma, Paulus niwala matana'a sassane wufru rariagannu sangkatou tantara.

¹⁷Napawe tallute allo, Paulus namaggo manga piarra'u taumata n Yahudi su tampa udde. Wufru napawe imangitou suete naammulla, itou nabbisara simangitou, "Manga turangnga! Ia'u tawe pasasala su saruannu pabbawalagi ite, ara'e nilumawangnga addatta inanaramanna apan sinengkammi ite wuassu iupungngu alamona ng kite. Salaiwe aroddi ia'u sinametta su Yerusalem wufru tinantilla su manga taumata

n Roma. ¹⁸Napawe hatto'u niparikisante, imangitou namallo'u, ana waugu ia'u niasingkatanna tawe passasala'u saran sambau, apan wotong-nge maaruumangu ringannu ruumanna pateanna. ¹⁹Arawe ana waugu manga taumata n Yahudi mannañare, ia'u nangapiddu hatto'u parikisanna su mallaruumangu Kaisar Roma. Ia'u na'ola'a udde wañine ana waugu ia'u pia sambau alae su saruannu pabbawala'u sassane. ²⁰Wurru ana waugu udde ia'u madorongnga maisasommba ng kamiu, maggahatto ng kamiu; ana waugu ia'u rarrapusanna, ana waugu Punnu Sałamatta apan aantimannu pabbawalagu Israel."

²¹See imangitou nabbisara sitou, "Iami taambe naasengkamma saran paassa suratta wuassu Yudea su ola'u turrangnga. Wurru tawe sangkatou turrangnga wua poiaroddi apan nangapiddu watti'a su ola'u turrangnga ara'e nabatti'u alaleo n turrangnga. ²²Arawe iami maapulu lai madingikka watti'u pangangimannu, ana waugu iami sarangkanambone suete naaringikka taumata manggalusa'a alarra'a apan pangngimanannu udde."

²³Ne imangitou wurru Paulus nanantunnu sambau allo pasasombanna. Su allo udde manambo taumata nirumanta su tampa atatanaanni Paulus. Wuassu ruaallo madatingngu bawallo Paulus mannañ'a wurru mabatti'a simangitou watti'a su ola'u ereapa Mawu Ruata mamarenta ere sangkatou Ratu. Ringanni nappaattu manga tatialane sulaummu Wuke Musa wurru Wuke Manga Nabi, Paulus mangke maddea'a tadea'u imangitou mangngimanna Mawu Yesus. ²⁴Piaddu mangngimanna watti'i Paulus, arawe piaddu lai apan tawe mangngimanna. ²⁵Ringannu ringidda uata'ae imangitou nanantangngu tampa udde, napawe Paulus nabbisara arendi simangitou, "Mangke atonna papasingkattu Gharraho Mawu Ruata si Nabi Yesaya su iupungngu alamona ng kamiu! ²⁶Mawu Ruata nabbisara,

'Roote wañoa'a su pabbawalaga indi:

Iamiu sidutu maaringikka, arawe tawe maasunna;

iamiu sidutu mannutukka

arawe wagga apa apan sarun mariaddi.

²⁷Ana waugu ringirannu pabbawalaga indi mañumute

tañinga mangitou nabengelle

wurru mata mangitou suete niarributa.

Indi mariaddi tadea'u mata mangitou tawe maasilo,

tañinga mangitou tawe maaringikka,

ringiranni mangitou tawe maasunna,

wurru arie mabelengnga ringang-Ku,

see la'u mapapia mangitou."

²⁸Panginsueanne Paulus nabbisara, "Manga turrangnga ñnone maasingkata manungku su ola'u watti'u asasalamatta wuassu Mawu Ruata ora-

ssa indi suete niapaasingkatta su manga pabbawalaga waine apan waline Yahudi. Imangitou sarun tumurutta!" [29Napawe Paulus suete nabbi-sara aroddi, manga taumata n Yahudi nanantangngu tampa udde lapi-ddu nattatiakka sangkatou ringannu waine.]

³⁰Rua tonna alannune Paulus uatana'a su Roma, su wale apan sasewanne sassane. Itou maluassa manarimmattu anambo n taumata apan rudanta mattembo sitou. ³¹Wurru ringannu warrani itou mabatti'a simangitou su ola'u ereapa Mawu Ruata mamarenta ere sangkatou Ratu wurru su ola'u Mawu Yesus Kristus. Paulus nabbatti'u udde ringannu tawe galahene wurru tawe mangngangu'a'ukke.

SURATTI PAULUS SU JAMAATTU ROMA

WISARA TAŁAANE

Suratti Paulus Su Jamaattu Roma, niwořretta mapaasaddia mangitou su patatembone simangitou. Tumuruttu waidde, Paulus sarun mammanara tała ng kadio'a su wallattu manga taumata n Sařrani poiारoddi, wua udde ringannu sasumbala mangitou, itou inai watukku Spanyol. Paulus namořrettu suratta indi ipanała'a n atapasannu agama n Sařrani wurru manga atoranne apan matatařrino su ipabbiakku manga taumata n Sařrani.

Napawe suete nattabea su manga taumata n Jamaattu Roma, wurru namasingkatta simangitou aaliomanne simangitou, Paulus namasingkattu lałorřo n suratti tou indi: "Ringannu Watti'u Ałałuassa udde Mawu Ruata mannantiro ereapa lałanne paa'aukku taumata ringannu Mawu Ruata maola'a mapia apia; lałanne eteudde ringannu mangngimanna Mawu Ruata, wuassu paarorone saran pangudusanne" (1:17).

Wua udde Paulus nanała'a n lałorřone udde. Anambo n taumata – mapia Yahudi ara'e lai wałine Yahudi – limbakkuanna apia paa'aukke ringannu Mawu Ruata, ana waugu sarangkanambone suadio'a su-lałummu tařrino n rosa. Paa'aukku taumata ringannu Mawu Ruata masułe apia amungkangngu taumata mangngimanna Mawu Yesus Kristus. Wua udde Paulus nanała'a su ola'u pabbawiakka wakku apan aapendamannu taumata amungkangngu su sambau ringanni Kristus. Wiakka wakku udde maola'a ana waugu paa'aukka apan wakku ringannu Mawu Ruata. Taumata apan suete nangimanna Mawu Yesus, mabbiakka su paddarame ringannu Mawu Ruata, wurru Ghařraho Mawu Ruata mapaalıu n tou wuassu tařrino n rosa wurru papate. Sulałummu tatıalane 5-8 Paulus nanała'a lai pandumannu manga tita Mawu Ruata wurru tařrino Ghařraho Mawu Ruata sulałummu pabbiařrannu taumata mangngimanna. Wua udde Paulus nanała'a lai manungku taumata n Yahudi wurru wałine Yahudi nawalı lai sulałummu pandumannu Mawu Ruata su anambo n taumata. Paulus narřawessa manungku panano'e Mawu Yesus wuassu taumata n Yahudi nasuttate lai su pandumannu

Mawu Ruata ipantulungngu taumata pangiananne wuassu **darangngu**-Ne sulaŋummu Mawu Yesus Kristus. Paulus mangngimanna manungku taumata n Yahudi tawe sidutu manno'e Mawu Yesus. Panginsueanne Paulus namorretta su ola'u ereapa taumata rinone mabbiakka maola'a taumata n Saŋrani, nangillembote su ola'u ereapa olangnge mappaa-mattu **darangngu** sulaŋummu paa'aukka ringannu manga taumata waine. Ana waugu udde Paulus namile manga alaŋra'a ereindi: mangngimbe Mawu Ruata, udde manara n taumata n Saŋrani su araratuanna wuŋru su sansulungnga taumata n Saŋrani, wuŋru alaŋwo'u manga hatto n daŋummu naungnga. Paulus nangudussu suratta indi ringannu manga tanatane sassaane wuŋru manga daralo su Mawu Ruata.

Lalorone

Panattaranne wuŋru punnu ringidda	1:1-17
Hausannu taumata su ola'u asasaŋamatta	1:18-3:20
Lalaŋnu asasaŋamatta wuassu Mawu Ruata	3:21-4:25
Wiakka wakku ana waugu uaaukka ringanni Kristus	5:1-8:39
Israel sulaŋummu pandumannu Mawu Ruata	9:1-11:36
Pallaŋagu n Saŋrani	12:1-15:13
Panginsueanne wuŋru tabea m Paulus	15:14-16:27

1 Manga tuṛrangnga sarangkanambone su Roma apan arangnguannu **1** Mawu Ruata wuṛṛu apan suete niwagoannu Mawu Ruata maola'a aḷaṛrang-Nge.

Mawu Ruata suete namile wuṛṛu ia'u sassane niapaatenega mam-masingkattu Watti'u Aḷaḷuassa wuassu Mawu Ruata. ²Watti'u Aḷaḷuassa udde suete nipa'ire Mawu Ruata su tempo rorone sulaḷummu manga nabi-Ne wuṛṛu nawoṛrette sulaḷummu Wuke Susi. ³Watti'u Aḷaḷuassa udde mabbatti'u Ana'u Mawu Ruata, eteudde Mawu ng kite Yesus Kristus. Su ola'u saṛrene ere taumata, Itou pabbawalagi Daud, ⁴arawe su ola'u saṛre m pangangimanna Itou udde Ana'u Mawu Ruata. Udde nilumiatta'a sulaḷummu taṛrino apan wahewalla sulaḷummu pabbawangun-Ne wuassu papate. ⁵Sulaḷummi Tou lai Mawu Ruata nangonggolu aḷamatta sia'u maola'a rasul, tadea'u ia'u - mangadatta Mawu Yesus - mangngehetta manga taumata wuassu aḷawo'u pabbawalaga tadea'u mangngimanna wuṛṛu tumuṛrutta. ⁶Pandumannu wisara aḷawo'u pabbawalaga eteudde iamiu lai apan uatana'a su Roma; iamiu lai suete niwagoanna maola'a taumata n Mawu Yesus Kristus. ⁷Ana waugu udde ia'u namoṛrettu suratta indi siamiu.

Antimanna Mawu Ruata Iamangngi ite wuṛṛu Mawu Yesus Kristus mangonggolu aḷamatta wuṛṛu aḷaḷuassa siamiu.



Lalanna maloangnga su soa n Roma (1:6)

Aaḷiomanna aadiangkamanna

⁸Paarorone sulaḷummi Yesus Kristus, ia'u maadiangkamanna su Mawu Ruata ana waugu manga tuṛrangnga sarangkanambone; ana waugu ahewallu runia naaringikke manungku iamiu mangngimanna

atonna su Mawu Yesus Kristus. ⁹Ia'u sidutu uanaungnga siamiu amungkangngu ia'u umaliomanna. Mawu Ruata matatialane manungku apa apan iwabbatti'u udde atonna. Tumba'u Itou Mawu Ruata apan sasubbangu ringannu ahewallu naungku ringannu namasingkattu Watti'u Aļaļuassa su ola'u Anang-Nge. ¹⁰Ia'u sussaļande ringannu atonna su Mawu Ruata, antimanna Itou mamala'u orassa indi inai mattembo siamiu. ¹¹Ana waugu ia'u mangke maapulu atonna maisasomba ng kamiu tadea'u ia'u wotongnge mattahia darangngu wuassu Ghařraho Mawu Ruata ipannohassa siamiu. ¹²Pandumangu eteudde ana waugu iite su sambau suete nangimanna Mawu Yesus Kristus, ne iite wotongnge lai uatathassa sangkatou ringannu sangkatou.

¹³Manga tuřrangnga! Ia'u maapulu tadea'u iamiu maasingkata manungku masokkate ia'u pia pandumma mattembo siamiu arawe sidutu mangke pia haļahene. Ia'u maapulu tadea'u su wallatti amiu lai, manara'u pia gessine ere lai manara'u apan suete nabbua su wallattu manga taumata apan waļine Yahudi su manga tampa waine. ¹⁴Ana waugu ia'u pia manara'u su saruannu aļawo'u pabbawalaga; apan pia addanne wuřru ta'e luļu, apan pia asingkanne ara'e lai apan taambe asingkanne. ¹⁵Ana waugu udde ia'u maapulu atonna mamasingkattu Watti'u Aļaļuassa udde siamiu apan uatana'a su Roma lai.

Tařrino n Watti'u Aļaļuassa udde

¹⁶Ia'u mangngimanna atonna Watti'u Aļaļuassa udde, ana waugu Watti'a udde atathassu Mawu Ruata ipanaļamatta anambo n taumata apan mangngimanna; paarorone taumata n Yahudi, wuřru pabbawalaga waine lai. ¹⁷Ana waugu ringannu Watti'u Aļaļuassa udde Mawu Ruata napaaliatta'a ereapa laļanne paa'aukka taumata ringannu Mawu Ruata maola'a apia; laļanne eteudde ringannu mangngimanna Mawu Ruata, wuassu panattaranne saran pangudusanne. Udde ere lai uaworřetta sulaļummu Wuke Susi, "Taumata apan mangngimanna Mawu Ruata ma'oma n sara paa'aukka ringannu Mawu Ruata maola'a apia, taumata udde sarun masalaļamatta!"

Pasasaļa n taumata

¹⁸Wuassu surga Mawu Ruata napaaliatta'u asasa'u-Ne su anambo n rosa wuřru aļaleo n taumata, ana waugu aļaleo mannaļare taumata ma'illaļa aļarřa'u Mawu Ruata apan atonna. ¹⁹Apa apan wotongnge asingkatannu taumata su ola'u Mawu Ruata natualage sulaļummu

naungngu taumata, ana waugu Mawu Ruata sassane suete napaaljiatta'a su taumata. ²⁰Ro'e n Mawu Ruata nandiaddi runia, pallalagu Mawu Ruata apan tawe asiloanna, eteudde olangnge ere Mawu Ruata wuŕru taŕŕino-Ne apan uatialu, wotongnge asunnannu taumata wuassu aławo'u niriaddianne. Nariaddi taumata tawe pangaiananne mapaarŕino m batanganne. ²¹Taumata maaillaŕa Mawu Ruata, arawe taumata maddiri mangadata Sitou ere sangkatou Mawu Ruata wuŕru tawe lai maadiangkamanna Sitou. Arawe taumata sidutu maŕŕingiddu aławo'a apan tawe gunane; naungngi mangitou nadandumpe. ²²Imangitou mammendammanungku imangitou pandete, wutte'e imangitou woddo. ²³Waŕlinewe Mawu Ruata apan uata'a sassubanni mangitou, ewe'e manga paaŕuanna apan naaljhida riadianna apan wotongnge mate; eteudde taumata, manu'u winalanganna, winatangnga leddane appata wuŕru winatangnga apan tuttondo n roone.

²⁴Ana waugu udde Mawu Ruata namala mangitou tuttuŕrutta apulu naungngi mangitou ma'ola'a alaŕeo na'oma n sara imangitou lai ma'ola'a alaŕeo su sansuŕungngu taumata. ²⁵Mawu Ruata apan naŕŕino, nihan-tianni mangitou ringannu sarannapa awusu. Waŕline mandariaddi ewe'e apan niriaddine udde sassubanna wuŕru a'imbeanni mangitou. Sumbali iapa nandiaddi udde apan ŕinone raloanna sarangkaŕo'engnge! Amin.

²⁶Ana waugu taumata inolaanne aroddi, ne Mawu Ruata namala mangitou tuttuŕrutta apulu mangitou apan laŕeo. Manga wawine mangitou maddirite manga esakka ere lai inanaramannu taumata ewe'e uaa'apulute wawine rundussa wawine. ²⁷Aroddi lai esakka, imangitou tate lai uaa'apulu m wawine, ewe'e apulu mangitou tumba'u su esakka rundussa esakka. Esakka ma'ola'a inolaanna apan maasili su saruannu rundussa esakka, na'oma n sara imangitou manengkamma wawaŕline uasuŕungngu inolaanne apan laŕeo udde.

²⁸Ana waugu taumata maddirite lai ma'illaŕa Mawu Ruata, ne Mawu Ruata namalate n ŕingiddi mangitou malaŕeo, na'oma n sara imangitou ma'ola'a manga inolaanna apan ŕinone tawe wotongnge olaanna. ²⁹Naungngi mangitou napene n aławo'u alaŕeo, aławo'u awusu; napene n awawaŕiu, awawukku'a, wuŕru mannihikka taumata waine, napene n apulu mamate, uawawuŕo, mallinga wuŕru mangngune. Imangitou apulune ma'umbilangnga taumata waine, ³⁰apulune mandaleo arannu taumata waine; imangitou mawunga wuŕru tawe atoranne, apan maddantinnu Mawu Ruata wuŕru mataŕŕupassi. Imangitou pande madaea'a laŕanne wakku ipadea'a alaŕeo. Imangitou lullawanna timmadde; ³¹imangitou maddiri massunna taumata waine; imangitou maŕawangnga wuŕru tawe apedamma mantuŕungngu taumata. ³²Imangitou masingkata manungku tumuŕruttu tita Mawu Ruata, taumata apan ma'ola'a sarangkanambone udde ŕinone iŕruumanna pateanna. Salaiwe aroddi, imangi-

tou ta'e lai ma'ola'a inolaanna udde; wuɽɽu ewe'e inumire lai amung-kangngu taumata waine ma'ola'a udde.

Ruumannu Mawu Ruata

2 Ana waugu udde, manga tuɽɽangnga, isai i'o tuɽɽangnga, na'oma n sara i'o tuɽɽangnga maapulu mapaasala n taumata waine? Tuɽɽangnga tawe ahidda ipallindumma rininu. Ana waugu amung-kangngu i'o mapaasala n taumata waine, sumbali tuɽɽangnga sassane ma'ola'a ere inolaanni mangitou, ne tuɽɽangnga naɽɽuumannu watangannu sassane lai. ²Ite masingkata manungku amungkangngu Mawu Ruata maɽɽuumannu manga taumata apan inolaanne ereudde, apan niola'u Mawu Ruata udde tawe salane. ³Arawe iamiu, manga tuɽɽangnga, ma'ola'a sassane lai manga inolaanna apan ipangngansilli amiu su manga taumata waine! Wuɽɽu su ringiddi amiu, iamiu wotong-nge maɽɽiudda wuassu ruumannu Mawu Ruata? ⁴Ara'e iamiu mangngadio'a darangngu Mawu Ruata wuɽɽu ahewallu naung-Nge see asasabare-Ne apan aroddi ahewalle? Iamiu masingkatta manungku Mawu Ruata mapaaɽiatta'u apapia naung-Nge ana waugu Itou maapulu tadea'u iamiu mawaɽu wuassu manga rosanu. ⁵Arawe pua ng kamiu maattika wuɽɽu maddiri mawaɽu. Ana waugu udde ete iamiu sassane apan ma'ola'a ruumannu aatambanna awakkane su Allo ng Kiamatta, napawe Mawu Ruata mapaaɽiatta'u asasa'u-Ne ringannu ruumanna apan su rinone. ⁶Ana waugu Mawu Ruata sarun mabaɽissa anambo n taumata uas-suɽungngu inolaanne. ⁷Mawu Ruata mangonggolu wiakka tutune wuɽɽu saran maɽannu-lannu simangitou apan sidutu ma'ola'a apapia tadea'u maasomba apan awantuhanne, wuɽɽu apan aaddatanna wuɽɽu apan sa-run uatialu. ⁸Arawe manga taumata apan tumba'u maɽringiddu ri-rine sassane wuɽɽu maddiri tumuɽɽutta Mawu Ruata, ewe'e tuttuɽɽutta aɽaɽeo, manga taumata udde lembo n aasa'uannu Mawu Ruata. ⁹Suapa n taumata apan maapulu ma'ola'a aɽaɽeo sarun masansara wuɽɽu matataɽɽangnga; paarorone taumata n Yahudi, wuɽɽu lai manga pab-bawalaga waine. ¹⁰Arawe anambo n taumata apan maapulu ma'ola'a apapia sarun onggolaɽannu Mawu Ruata awawantuga wuɽɽu aaddata see aɽaɽuassa; paarorone su taumata n Yahudi, aroddi lai manga pabbawa-laga waine. ¹¹Ana waugu Mawu Ruata ma'ellega anambo n taumata udde nassuɽungnga.

¹²Manga taumata m pabbawalaga waine marosa ana waugu wagga n tita n agama n taumata n Yahudi. Nariaddi imangitou iɽruumanna su liuddu atoranna udde. Arawe manga taumata n Yahudi apan marosa suete naasingkatta udde; ana waugu udde imangitou sarun parikisanna

tumurruttu tita udde. ¹³Ana waugu taumata mabelengnga apia ringannu Mawu Ruata, waiine ana waugu taumata udde suete naasingkata tita n agama Yahudi, ewe'e ana waugu itou tutturuttu apa apan uaworretta sulaḷummu tita udde. ¹⁴Manga taumata m pabbawalaga waine wagga n tita n agama Yahudi. Arawe amungkangngu imangitou wuassu apulu mangitou sassane tutturuttu parenta n tita udde, ete naungngi mangitou sassane mangngatokki mangitou, salaiwe imangitou tawe maaillaḷa tita n agama Yahudi. ¹⁵Pallaḷagu mangitou napaaliatta'a manungku apa apan suete nirolokku tita udde uaworretta su naungngi mangitou. Laḷummu naungngi mangitou lai mapaaḷiatta'u olangnge udde, ana waugu imangitou sassane tarra assa iapaasaḷa wuḷḷu iapaarḷino n ringiddi mangitou. ¹⁶Ete aroddi sarun mariaddi su allo apan suete tinantunna udde. Su allo udde – tumurruttu Watti'u Aḷaḷuassa apan ta'u niwatti'a – Mawu Ruata sulaḷummi Yesus Kristus, sarun mamarikissa aḷawo'u addapingngu naungnga wuḷḷu ringiddu anambo n taumata.

Taumata n Yahudi wuḷḷu tita n taumata n Yahudi

¹⁷Arawe orassa indi ereapa su manga turḷangnga sassane? Turḷangnga mangnga'u ririnu taumata n Yahudi. Turḷangnga mangke tutturuttu tita n agama Yahudi wuḷḷu turḷangnga lulluassa ana waugu paa'aukku turḷangnga ringannu Mawu Ruata. ¹⁸Turḷangnga naasomba manga tatantiro wuassu tita udde, na'oma n sara i'o masingkatu pandummu Mawu Ruata wuḷḷu masingkata mamile suapa apianne. ¹⁹I'o mangngimanna manungku ete i'o turḷangnga piaḷḷa'u taumata wuta wuḷḷu asasemakki mangitou apan uatana'a sulaḷummu ararandumma; ²⁰turḷangnga mangngaḷḷa'a taumata apan tawe addane, wuḷḷu manantiro manga taumata woddo. Iamiu mangngantimma manungku sulaḷummu tita n agama Yahudi turḷangnga maasomba aḷawo'u asingkata wuḷḷu aḷaḷḷa'a apan atonna. ²¹Turḷangnga mangngaḷḷa'a taumata waine; ei anio turḷangnga tawe maa'aḷḷa'a watangannu sassane? I'o mangngaḷḷa'a taumata tadea'u arie panna'o, arawe i'o sassane manna'o! ²²I'o mangngaḷḷa'a taumata tadea'u arie sumandaga, arawe i'o sassane sussandaga! I'o maddantinnu pasasubba paaḷuanna, arawe i'o sassane mangngaḷappa sarannapa wuassu waiḷe m paaḷuanna. ²³I'o mammunga manungku i'o uatahuanna tita Musa, arawe i'o sassane mangngadio'a Mawu Ruata ringannu tawe tumurruttu tita-Ne. ²⁴Sulaḷummu Wuke Susi uaworretta arendi, "Ana waugu iamiu, manga taumata n Yahudi, arannu Mawu Ruata niaḷuandahanna su wallattu pabbawalaga waine."

²⁵Amungkangngu i'o maturruttu tita n agama Yahudi, ne i'o apan suete nissunatta udde pia gunane lai. Arawe amungkangngu i'o tawe

ninumaramma tutturputta manga inolaanna apan iradolokka sulaḷummu tita udde ne sunatta udde tawe gunane sara ng kadio'a. ²⁶Arawe amungkangngu sangkatou wāḷine Yahudi tawe nissunatta, tutturputta tita n agama Yahudi, wāḷinewe Mawu Ruata suete namaḷi n tou maola'a taumata apan suete nissunatta? ²⁷Wurru manga taumata apan tawe nissunatta udde sarun mappasala ng kamiu taumata n Yahudi, ana waugu i'o uatahuanna tita n agama Yahudi wurru i'o nissunatta, arawe i'o lullawanna tita udde. Imangitou tawe nissunatta, arawe ete imangitou apan tutturputta tita n agama Yahudi. ²⁸Ana waugu taumata n Yahudi tutune wāḷinewe taumata tumba'u aranne taumata n Yahudi; wurru taumata apan atonna-tonna nissunatta, wāḷinewe taumata apan nissunatta tumba'u su wadangnga. ²⁹Arawe sangkatou Yahudi apan tutune eteudde taumata apan naungnge naungngu Yahudi; wurru sunatta apan tutune eteudde sunatta su naungnga apan mammanarannu Ghaḥḥaho Mawu Ruata, wāḷinewe niworretta sulaḷummu wuke. Taumata ereudde, manengkamma daralo wuassu Mawu Ruata, wāḷine wuassu taumata.

3 Amungkangngu aroddi, apa auntunganne maola'a taumata n Yahudi? Wurru apa lai auntunganne tutturputta atorannu sunatta? ²Natantunna manambo auntunganne! Paarorone, ana waugu ete su taumata n Yahudi Mawu Ruata nanantillu manga wisara Mawu Ruata. ³Arawe ereapa amungkangngu sambageanganna taumata n Yahudi tawe tumurputta? Apa ana waugu Mawu Ruata tawe umakkanna? ⁴Natantuna tawe! Ana waugu nasemakke manungku Mawu Ruata sidutu atonna, salaiwe alaḥo'u taumata mammahia. Sulaḷummu Wuke Susi uaworretta,

"Ṛinone i'o aatialanna atonna sulaḷummu apa apan iwabbisaranu, wurru i'o maauntungnga su tempo i'o parikisanna."

⁵Arawe amungkangngu taḥḥino Mawu Ruata lembo nilumiatta'e, ana waugu iite ma'ola'a pasasala, apa sarun iwisara ng kite? Manungku Mawu Ruata wengkolla amungkangngu itou maḥḥumannni ite? (Atonna aiwalo indi maḥḥia'a su taumata.) ⁶Atonna-tonna tawe! Ana waugu amungkangngu Mawu Ruata tawe atatula, ereapa Itou wotongnge mamarikissa runia indi?

⁷Arawe amungkangngu manga inolaanna apan nassala, apa apan naḥḥino su ola'u Mawu Ruata lembo n lumiatta'a ma'oma n sara Itou raloanna, anio taumata apan ma'ola'a alaḥeo udde ta'e iapaasala ere taumata marosa? ⁸Wurru anio iite tawe wotongnge niabbisara, "Mappianne iite ma'ola'e alaḥeo tadea'u lumiatta'e apapia?" Atonna pia manga taumata apan mangngadio'a sia'u ringannu mabbisara manungku ia'u suete nabbisara aroddi. Manga taumata ereudde rinone iḥḥumannu Mawu Ruata.

Tawedu saran sangkatou apan tinumurrutta apulu Mawu Ruata

⁹Ei, apa iite taumata n Yahudi mappianne wuassu taumata m pabbawalaga waine? Mangke tawe! Ere suete ta'u niwisara manungku mawae taumata n Yahudi ara'e pabbawalaga waine, sarangkanambone udde tatahuanannu rosa. ¹⁰Ere uaworretta sula'ummu Wuke Susi,

"Tawe saran sangkatou apan naffino,

¹¹ tawe saran sangkatou apan maasunna wu'ru tawe saran sangkatou apan massubba Mawu Ruata.

¹²Anambo n taumata nangindaute m watanganne wuassu Mawu Ruata;

sarangkanambone niali'wunete.

Tawe saran sangkatou apan ma'ola'a apapia; saran sangkatou tawe!

¹³Tonggolanni mangitou naali'hida ere la'labinganna apan wawu'anna. Manga awusu wu'ru wahia mangengelekka wuassu lila mangitou, wu'ru wiwikki mangitou mapasabanggu aaluandaga, ere wisa ng atoanna.

¹⁴ Morrongngi mangitou napene n wawontoga wu'ru wawansaga.

¹⁵Lempangngi mangitou malihakka amungkanggu inai mannansara wu'ru mamate taumata.

¹⁶ Ananawo wu'ru asasusa, iaasi'i mangitou su alawo'u tampa.

¹⁷Imangitou wuta su ola'u la'annu alaluassa,

¹⁸ wu'ru tawe massubba Mawu Ruata."

¹⁹Orassa indi iite masingkata manungku sarangkanambone apan uaworretta sula'ummu tita n agama Yahudi, udde hunane su manga taumata apan paparentannu tita udde. Ringannu aroddi tawe saran sangkatou wotongnge maasimbakka wu'ru ahewallu runia indi wotongnge iapaasala Mawu Ruata. ²⁰Ana waugu tawe saran sangkatou apan wotongnge maaukka apia ringannu Mawu Ruata ana waugu taumata udde tutturutta manga inolaanna sula'ummu tita n agama. Arawe tita udde tumba'u mammasingkata su taumata manungku taumata udde marosa.

Ereapa Mawu Ruata mamala n taumata maaukka apia ringanni Tou

²¹Arawe orassa indi Mawu Ruata suete namantingiddu la'anne ere-apa taumata maaukka ringanni Tou; wu'ru la'anne udde tawe sulungnge ringannu tita n agama Yahudi. Manga Wuke Musa wu'ru Wuke Manga Nabi maba'lo lai olangnge udde, ²²manungku Mawu Ruata ta'e mang-

ngonggolu tempone su taumata maaukka ringanni Tou, tumba'u amung-
kangngu taumata mangngimanna Mawu Yesus Kristus. Mawu Ruata
na'ola'a indi hunane su anambo n taumata apan mangngimanna si Kris-
tus, ana waugu tawe parʔalanne: ²³Anambo n taumata narosate wuʔru
maraute Mawu Ruata apan sarun manaʔamatta simangitou. ²⁴Tumba'u
ana waugu darangngu Mawu Ruata nionggola ringannu tawe bawajinne,
paa'aukku taumata ringannu Mawu Ruata maola'a mapia lai; laʔanne
eteudde; taumata niapaaliu Mawu Yesus Kristus wuassu rosa. ²⁵Mawu
Ruata nanantillu Mawu Yesus tadea'u ringannu papate-Ne udde tau-
mata iapaaliatta'a mapallosa wuassu pasasala amungkangngu imangitou
mangngimanna Sitou. Mawu Ruata na'ola'a aroddi ana mapaaʔiatta'u
atatuʔide. Ana waugu su tempo naliu Mawu Ruata suete nanabare
manga rosa n taumata, na'oma n sara Itou tate naʔruumanni mangi-
tou. ²⁶Arawe orassa indi Itou mammangalo rosa ana mapaaʔiatta'u
atatuʔidde. Ringannu olangnge aroddi Itou mapaaʔiatta'a manungku
watanan-Ne tawe bahiane; wuʔru anambo n taumata mangngimanna
Mawu Yesus, nareengnga taumata apan naaukke apia ringannu Mawu
Ruata.

²⁷Ana waugu udde tate lai pangaiananne iite mamunga. Anio
aroddi? Ana waugu iite tuttuʔrutta apa apan uawoʔretta sulaʔummu tita
n agama Yahudi? Waʔine, Arawe ana waugu iite mangngimanna. ²⁸Ana
waugu pangudusanne arendi: Taumata isaggo uauukka apia ringannu
Mawu Ruata, waʔinewe ana waugu itou tuttuʔrutta apa apan uawoʔretta
sulaʔummu tita n agama Yahudi, ewe'e ana waugu itou mangngimanna
Mawu Yesus Kristus.

²⁹Ara'e Mawu Ruata udde, tumba'u Mawu Ruata n taumata n
Yahudi. Waʔinewe Itou Mawu Ruata m pabbawalaga waine lai? Ore
atonna Itou Mawu Ruata m pabbawalaga waine lai! ³⁰Ana waugu
Mawu Ruata tumba'u sambau. Ete Itou apan namala n taumata n
Yahudi maaukka apia ringannu Mawu Ruata ana waugu imangitou
mangngimanna. Wuʔru ete Itou lai apan namala manga taumata n
pabbawalaga waine maaukka apia ringannu Mawu Ruata, udde lai ana
waugu imangitou mangngimanna. ³¹Apa indi atappasanne manungku
amungkangngu iite mangngimanna Mawu Yesus, iite tumaliudde tita n
agama Yahudi? Atonna-tonna tawe! Ewe'e ringannu pangangimanni ite
udde, iite mangngarega n tita udde.

Abraham maola'a tuʔadda

4 Amungkangngu aroddi, apa apan wotongnge iwisara su ola'i Abra-
ham iupungngu aʔamona m pabbawalagi ite? Ereapa watti'u
pabbiaʔanne? ²Amungkangngu manga inolaanne nisengkammu Mawu

Ruata, na'oma n sara itou nareengnga taumata apan maaļuassa naungngu Mawu Ruata, ne itou lai pia pangaiananne lumuassa. Arawe itou tawe mamunga su saruannu Mawu Ruata. ³Sulaļummu Wuke Susi uawořetta, "Abraham mangngimanna Mawu Ruata, wuřru ana waugu pangangimanne indi itou tinarimmattu Mawu Ruata maola'a sangkatou taumata apan maaļuassa naungngu Mawu Ruata." ⁴Taumata apan mammanara, manarimmattu laļantakke wuřru laļantake udde waļine maola'a sambau aonggola ana waugu eteudde pussaane. ⁵Arawe pia taumata tawe mangantimma su manarane sassane; itou mannantillu watanganne su Mawu Ruata apan napaalįatta'a manungku taumata marosa sarun maaliu wuassu passasaļane. Pinangianannu pangangimanne udde Mawu Ruata nanarimmatta sitou maola'a taumata apan maaļuassa naungngu Mawu Ruata. ⁶Aroddi lai su addapatti Daud; ana waugu itou nabbisara saļamatte lumala'a su taumata apan suete tinarimmattu Mawu Ruata ere taumata apan maaļuassa naung-Nge, wuřru Mawu tawe mandeengngu manga inolaannu taumata udde. Daud nabbisara arendi,

⁷"Laļumanna'a su taumata apan pasasaļane niampunganna wuřru manga rosane suete nilabingngu Mawu Ruata!

⁸Laļumanna'a su taumata apan manga rosane tawe nireengu Mawu Ruata!"

⁹Tanne wisara laļumanna'a indi tumba'u wisara su taumata apan tuttuřrutta atorannu sunatta? Ara'e lai iwabbisara su taumata apan tawe tumuřrutta atorannu sunatta? Suete nisaggo ng kami paarorone, manungku Abraham tinarimmattu Mawu Ruata maola'a sangkatou taumata apan maaļuassa naung-Nge, ana waugu Abraham mangngimanna Mawu Ruata. ¹⁰E, angngerate Mawu Ruata mapaalįatta'u olangnge udde? Su tempo Abraham taambe nisunatta ara'e suete nisunatta? Atonna tantaļanna itou taambe nisunatta, waļine napawe itou suete nisunatta. ¹¹Itou nisunatta murine, wuřru sunatti tou tumba'u maola'a sambau tatiala manungku Mawu Ruata suete nanengkamma sitou maola'a taumata apan maaļuassa naungngu Mawu Ruata. Itou tinarimmattu Mawu Ruata su tempo itou taambe tinumuřrutta atorannu sunatta. Wuřru Abraham naola'a iamangngu manga taumata apan mangngimanna Mawu Ruata, wuřru ana waugu itou suete tinarimmattu Mawu Ruata maola'a sangkatou taumata apan maaļuassa naung-Nge, salaiwe imangitou tawe tumuřrutta atorannu sunatta. ¹²Abraham lai iamangngu manga taumata mangngimanna apan tuttuřrutta atorannu sunatta. Itou lai iamangngu manga taumata mangngimanna waļine tumba'u ana waugu imangitou tuttuřrutta atorannu sunatta, arawe imangitou lai apan mabbiakka ringannu mangngimanna Mawu Ruata, ere lai Abraham su tempo itou taambe tinumuřrutta atorannu sunatta.

Paaire Mawu Ruata nisengkamma ana waugu mangngimanna Mawu Ruata

¹³Mawu Ruata na'ire si Abraham wuṛṛu pabbawalage manungku runia indi sarun maola'a pussa'a n Abraham. Mawu Ruata na'ire aroddi waḷine ana waugu Abraham matuṛṛutta tita n agama Yahudi, arawe ana waugu itou mangngimanna Mawu Ruata na'oma n sara itou tinarimmattu Mawu Ruata maola'a sangkatou taumata apan maaluassa naung-Nge. ¹⁴Ana waugu amungkangngu tumba'u manga taumata apan tuttuṛṛutta su manga tita n agama Yahudi apan sarun manengkamma paaire Mawu Ruata, ne pangangimanne su Mawu Ruata tawe gunane saran adio'a, wuṛṛu paaire Mawu Ruata lai wahia atonna. ¹⁵Tita n agama Yahudi mandanta n ruumannu Mawu Ruata. Arawe amungkangngu tawe tita, ne tawe laḷawangnga lai.

¹⁶Nariaddi paaire Mawu Ruata udde pinangaiananne wuassu pangangimannu taumata su Mawu Ruata. Udde maola'a sambau paaire su anambo n pabbawalagi Abraham manungku paaire udde nionggola simangitou maola'a sambau aonggola apan tawe bawalinne wuassu Mawu Ruata; waḷine tumba'u simangitou apan matuṛṛutta tita n agama Yahudi, arawe simangitou lai apan mangngimanna Mawu Ruata ere Abraham mangngimanna Sitou. Ana waugu ete Abraham udde iamangngi ite sarangkanambone, su ola'u pangangimanna. ¹⁷Ana waugu Mawu Ruata nabbisara arendi si Abraham, "Ia'u suete nandiaddi si'o iamangngu aḷawo'u pabbawalaga." Aroddite Mawu Ruata nangonggolu paaire udde si Abraham. Wuṛṛu Abraham mangngimanna Sitou. Ete Itou Mawu Ruata apan mapaawiakku taumata nate; ete Itou lai Mawu Ruata apan ringannu tumba'u mabbisara ma'ola'a apa apan taambe naola'a su runia, mariaddi su runia. ¹⁸Abraham sidutu mangngantimma wuṛṛu mangngimanna salaiwe tate antimma lai. Ana waugu udde itou naola'a iamangngu aḷawo'u pabbawalaga. Ere uawoṛretta sulalummu Wuke Susi, "Pabbawalagu sarun mariaddi manambo atonna." ¹⁹Abraham tempo udde masingkata manungku itou tate lai maasomba pabbawalaga, ana waugu itou tumanite n timmadde, wuṛṛu uukke maranite maffasutta su tonane; see lai Sara awingnge udde tinna. Arawe pangangimanni Abraham tawe naurangnga. ²⁰Itou sidutu mangngimanna wuṛṛu tawe mappapadua su paaire Mawu Ruata. Ewe'e naatohassa lai pangangimanni tou, na'oma n sara sidutu itou mangke maddalo Mawu Ruata. ²¹Itou mangngimanna atonna manungku Mawu Ruata wotongnge manipussa paaire-Ne. ²²Ana waugu udde Abraham nitarimmatu Mawu Ruata maola'a taumata apan maaluassa naungngu Mawu Ruata. ²³Wisara "tinarimmatta maola'a sangkatou taumata apan maaluassa naungngu Mawu Ruata"

uaworretta wāline tumba'u si Abraham sassane, ²⁴arawe siite lai. Iite sarun itarimmata ere sangkatou taumata apan maaļuassa naungngu Mawu Ruata, ana waugu iite mangngimanna Mawu Ruata apan suete napaa-wiakku Mawu Yesus, Mawu ng kite wuassu papate. ²⁵Mawu Yesus udde suete tinantilla iapapate ana waugu manga rosa ng kite, see Itou nia-paawiakku Mawu Ruata apia, tadea'u iite maaukka apia ringannu Mawu Ruata.

Maaukka apia ringannu Mawu Ruata

5 Orassa indi iite suete naaukka apia ringannu Mawu Ruata, ana waugu iite mangngimanna. Wurru ana waugu udde iite mabbiakka sulaļummu paddarame ringannu Mawu Ruata sulaļummu Mawu ng kite Yesus Kristus. ²Ana waugu iite mangngimanna Mawu Yesus, ne Itou namala ng kite mamendamma darangngu Mawu Ruata, wurru ringannu darangngu udde, iite lulluassa ana waugu iite pia antimma manungku iite sarun maappendamma alaļuassa apan ionggolu Mawu Ruata! ³Wurru nangillembu wua isudde, iite lai lulluassa sulaļummu asasusa, ana waugu iite masingkata manungku asasusa ma'aola'a taumata marimadda, ⁴wurru ararimadda ma'aola'a taumata tawe awono'anna; ete indi apan mapaaļiatta'u pangangantimma. ⁵Pangangantimma ereindi tawe mapaaddio'u naungngi ite, ana waugu naungngi ite suete nillořoannu Mawu Ruata ringannu darangngu-Ne. Mawu Ruata nammanara udde ringannu Gharřaho-Ne, apan suete nionggola siite.

⁶Su tempo iite sulaļummu aļallome, Kristus nate ana waugu iite, su tempo apan suete nitantunu Mawu Ruata; sumbaļi iite manga taumata marau Mawu Ruata. ⁷Su sangkatou taumata apan matuļida lai taumata maddiri mate. Asinungka hunane tumba'u su sangkatou apan mapia, piaddu lai maapulu mate. ⁸Arawe Mawu Ruata napaaļiatta'u darangngu-Ne siite su tempo Mawu Yesus nate ana waugu iite, su tempo iite ta'e sulaļummu rosa. ⁹Orassa indi iite naaukke apia ringannu Mawu Ruata sulaļummu papate n Kristus; ana waugu udde sulaļummete iite masaļamatta lai wuassu asasa'u Mawu Ruata ana waugu Kristus. ¹⁰Amungkangngu su tempo iite uasaseettu Mawu Ruata, naasomba paddarame ringanni Tou sulaļummu papate n Anang-Nge, lembonete orassa indi paa'aukki ite ringannu Mawu Ruata mapiate apia, natan-tunte iite sarun masaļamatta lai sulaļummu wiakki Kristus. ¹¹Wurru nangillembu wua isudde, iite lai lullala'a ana waugu apapia Mawu Ruata sulaļummu Mawu ng kite Yesus Kristus. Ana waugu sulaļummu Mawu Yesus, iite orassa indi naappendampe paa'aukki ite apan mapia udde ringannu Mawu Ruata.

Adam wuɾɾu Kristus

¹²Rosa sinumutta sulalummu runia wuassu sangkatou taumata, wuɾɾu wuassu rosa udde nilumappute papate. Sombangnge, papate udde nangeɾrote n anambo n taumata, ana waugu sarangkanambone marosate. ¹³Tantalanna tita n agama Yahudi taambe nionggola, rosa sulalumpe n runia. Arawe rosa taambe niapaasala ana waugu taambe tita apan lallawanganna. ¹⁴Arawe ro'e n su tempo n Adam na'oma n sara tempo n Musa, papate uataɾɾino anambo n taumata. Ewe'e lai manga taumata apan tawe na'ola'a pasasala ere niola'i Adam, manga taumata udde lai sulalummu taɾɾino m papate.

Eteudde Adam tulada n Tou apan sarun rumanta salimmurine. ¹⁵Arawe itarua udde uapapaɾɾala; ana waugu aonggololu Mawu Ruata mannamboanna marau amungkangngu isulungngu pasasala apan niola'i Adam. Pasasala n sangkatou naaola'a taumata nambo nate. Lembo n ahewalanne lai bawalissu darangngu Mawu Ruata wuɾɾu asasalamatta apan nionggola su anambo n taumata, sulalummu apapia naungngu sangkatou taumata, eteudde Mawu Yesus Kristus. ¹⁶Aonggololu Mawu Ruata lai lembo n anamboanne wuassu rosa n taumata sangkatou udde. Ana waugu napawe sangkatou taumata na'ola'a pasasala, sinumbbangke wisara laɾɾawessa, "Nassala". Arawe napawe manambote taumata na'ola'a rosa, dirumantate aonggololu Mawu Ruata apan namasingkata manungku, "Tawe nassala". ¹⁷Ana waugu pasasala n sangkatou, papate nangeɾro n taumata nambo wuassu taumata sangkatou udde. Lembo n ahewalanne lai wawalissu apa apan niola'u sangkatou taumata waine lai, eteudde Yesus Kristus. Sulalummu Mawu Yesus Kristus, Mawu Ruata suete nangalamatta anambo n taumata, wuɾɾu ringannu tawe bawalinne madea'a imangitou masasangkapia apia ringannu Mawu Ruata; imangitou sarun mamarenta su runia indi sulalummi Kristus.

¹⁸Nariaddi, su ereapa laɾawangngu sangkatou taumata nangeɾro n anambo n taumata iɾruumanna, aroddi lai inolaannu sangkatou taumata apan tuttuɾɾutta apulu Mawu Ruata, na'ola'a anambo n taumata nalju wuassu pasasala wuɾɾu nionggolannu wiakka. ¹⁹Wuɾɾu su ereapa anambo n taumata naola'a taumata marosa ana waugu sangkatou taumata apan maɾawangnga, aroddi lai manambo taumata iwala masasangkapia apia ringannu Mawu Ruata ana waugu pia sangkatou apan matuɾɾutta Mawu Ruata.

²⁰Apan nangagillu tita n agama Yahudi eteudde Mawu Ruata sassane. Arawe napawe taumata lembo n tuttuɾɾutta tita udde, imangitou lembo n lullawangnga wuɾɾu ma'ola'a rosa su saruannu Mawu Ruata. Arawe salaiwe taumata lembo ma'ola'a rosa, Mawu Ruata lembo ma-

ranggu lai simangitou. ²¹Ne, iite rinone mate ana waugu iite ma'ola'a rosa. Arawe Mawu Ruata mandangngu siite wuŕŕu nangagilu laŕanne siite mabelengnga apia ringanni Tou. Wuŕŕu ana waugu paa'aukki ite ringannu Mawu Ruata naola'e mapia, Itou nangonggola apia wiakka tutune wuŕŕu sara maŕannu-laŕnu siite sulaŕummu Yesus Kristus Mawu ng kite.

Nanantanggu rosa wuŕŕu mabbiakka uaaukka ringanni Kristus

6 Amungkanngu aroddi, apa apan sarun iwisara ng kite? Rinonewe iite sidutu ma'ola'a rosa, tadea'u Mawu Ruata lembo mandangngu siite? ²Tawe! Rosa tate lai uataŕŕino siite, nariaddi, ŕatadde iite sidutu mabbiakka ringannu ma'ola'a rosa? ³Manga tuŕrangnga masingkata manungku su tempo iite nissaŕŕani, iite ni'aukka ringannu Mawu Yesus Kristus? Indi pandumanne iite iapaaukka ringannu papate-Ne. ⁴Ringannu sasaraŕŕani udde iite nilabingnga su sambau ringanni Kristus wuŕŕu nate suadio'a ringanni Tou, tadea'u su ereapa Kristus niapaawiakka wuassu papate, wuassu taŕŕino n Iamangnga apan mawantuga, aroddi lai iite wotongnge maapendama wiakka apan wakku.

⁵Amungkanngu iite naaukke ringannu Mawu Yesus, ana waugu iite nate su sambau ringanni Tou, iite maola'a sambau ringanni Tou lai, ana waugu iite suete niapaawiakka apia ere lai Itou. ⁶Iite masingkata manungku pallaŕagu ng kite apan tabbe suete nipate su adio'a ringanni Kristus su alu arussa tadea'u taŕŕino m pallaŕagu ng kite apan marosa udde niramme; ringannu aroddi iite tate lai allangngu rosa. ⁷Ana waugu amungkanngu sangkatou mate, taumata udde maŕiu wuassu taŕŕino n rosa. ⁸Amungkanngu iite suete nate suadio'a ringanni Kristus, iite mangngimanna manungku iite lai sarun mabbiakka su adio'a ringanni Tou. ⁹Ana waugu iite masingkatta manungku Kristus suete niapaawiakka apia wuassu papate wuŕŕu Itou tate mate apia; papate tate lai uataŕŕino watangan-Ne. ¹⁰Papate apan naŕŕia'a si Kristus ete-udde papate ana waugu rosa. Udde nariaddi tumba'u paassa ma'oma n sarangkaŕo'engnge. Wuŕŕu pabbiaŕŕanne apan suete niamatan-Ne orassa indi eteudde mabbiakka hunane su Mawu Ruata. ¹¹Iamiu rinone maŕrangngo n ririnu lai mate ana waugu rosa, arawe mabbiakka sulaŕummu paa'aukka apan matohassa ringannu Mawu Ruata sulaŕummu Yesus Kristus.

¹²Ariete lai mapaawala n rosa mamarenta pabbiaŕŕanna su runia tadea'u i'o tate tumuŕrutta apulu apan laŕeo. ¹³Arie lai i'o manantillu wageangngu wadangngu su taŕŕino n rosa ana waugu ipaatta su manga



Ahi arussa su wowo n wuidda (6:6)

pandumanna apan laŕeo. Arawe tantila'e ririnu su Mawu Ruata ere taumata apan suete niingkata wuassu papate watukku pabbiaŕanna. Tantila'e ahewallu ririnu su Mawu Ruata tadea'u ipaatta ma'ola'a apulu Mawu Ruata. ¹⁴Rosa tate wotongnge mamarenta siamiu, ana waugu iamiu tate mabbiakka su parenta tita n agama Yahudi arawe su aŕungngu aŕamattu Mawu Ruata.

Allangnga su apulu Mawu Ruata

¹⁵Orassa indi apa panginsueanne? Wotongnge iite ma'ola'a rosa ana waugu iite tate su parenta tita n agama Yahudi, ewe'e su aŕungngu taŕrino n aŕamattu Mawu Ruata? Atonna-tonna tawe! ¹⁶Iamiu ma-singkatte manungku amungkangngu iamiu manantillu watangannu su sangkatou ipa'ola'a apulune, ne ete iamiu udde allangngu taumata apan tatturŕutanni amiu – tanne allangngu rosa apan nangapiddi amiu su papate, ara'e allangnga apan tutturŕutta Mawu Ruata, wuŕru ringannu aroddi sarun maaukka apia ringannu Mawu Ruata. ¹⁷Arawe adiangkamanna su Mawu Ruata! Ana waugu paarorone iamiu naola'a allangngu rosa, arawe orassa indi iamiu ringannu ahewallu naungngu tutturŕutta aŕaŕra'a naŕrino apan suete nionggola siamiu. ¹⁸Iamiu suete nipallosa wuassu rosa, wuŕru orassa indi naola'e allangngu apulu Mawu Ruata. ¹⁹Ana waugu pasasunnanu aroddi aŕomene, ia'u mappaattu manga ola'u patataŕruallangnga tadea'u iamiu wotongnge maasunna. Dorone iamiu mannantillu ririnu maola'a allangngu manga inolaanna

apan maarantina wuɾɾu apan laɭeo su pandumanna apan laɭeo. Arod-di lai orassa indi, ɾinone iamiu manantillu ahewallu watanganni amiu maola'a allangngu apulu Mawu Ruata su pandumannu Mawu Ruata sas-sane.

²⁰Su tempo iamiu paparentannu rosa, iamiu tawe paparentannu apulu Mawu Ruata. ²¹Su tempo udde auntunganna apa apan niseng-kammi amiu wuassu manga inolaanna apan orassa indi maasili siamiu amungkangngu olaanna? Manga inolaanna udde tumba'u mangapidda su papate! ²²Arawe orassa indi iamiu suete niapaaliu wuassu rosa, wuɾɾu naola'e allangngu Mawu Ruata. Auntungannu eteudde manungku i'o mabbiakka tumba'u hunane su Mawu Ruata wuɾɾu su olangnge udde sarun mandanta n wiakka tutune wuɾɾu saran maɭannu-ɭannu. ²³Ana waugu papate udde sombangngu paɖdarosa; arawe wiakka tutune wuɾɾu saran maɭannu-ɭannu su sambau ringanni Kristus Yesus Mawu ng kite eteudde aonggolu Mawu Ruata siite ringannu tawe bawaliinne.

Tita m paa'awingnga maola'a tuɭada

7 Manga tuɾrangku! Tuɾrangnga sarangkanambone naasingkatte tita udde. Nariaddi iamiu masingkata manungku taɾɾino n tita su sangkatou taumata tumba'u mariaddi amungkangngu taumata udde ta'e wiakka. ²Sangkatou wawine apan plate awingnge, tuɭaddane, tuttuɾrutta tita n awingnge amungkangngu awingnge ta'e wiakka. Amungkangngu awingnge natete, itou naɭiute wuassu tita n awingnge udde. ³Amungkangngu wawine udde mabbiakka ringannu sangkatou esakka waine su tempo awingnge ta'e wiakka, ne wawine udde isassago sinumandaga. Arawe amungkangngu awingnge natete, ne sulalummu tita, wawine udde naɭiute. Wuɾɾu amungkangngu itou naawingnga apia ringannu sangkatou esakka waine, ne itou tawe sinumandaga. ⁴Arod-di lai iamiu, manga tuɾrangku. Su tita n agama Yahudi iamiu natete, ana waugu iamiu suete niapaaukka ringannu wadangngi Kristus wuɾɾu naola'a pussa'a-Ne apan suete niapaawiakka apia wuassu papate. Itou niapaawiakka wuassu papate tadea'u iite maola'a pia gunane su lantakku hati Mawu Ruata su aɭo'engngu pabbiaɾrani ite. ⁵Ana waugu dorone, iite mabbiakka tuttuɾrutta pallaɭagu n taumata. Su tempo udde manga apulu apan ma'aola'a rosa, apan nilumapputa ana waugu tita n agama, uataɾɾino su wadangngi ite. Ana waugu udde iite ma'ola'a inolaanna apan maapate. ⁶Arawe orassa indi iite tate lai aaitannu tita n agama Yahudi. Iite natete wuassu tita apan dorone uaparenta siite. Iite tate lai tumuɾrutta ere tatuɾrutta apan dorone, tuttuɾrutta tita apan uawoɾɾetta.

Orasa indi iite tumuɣrutte ringannu ta tuɣrutta wakku apan nipanti-ngiddu Ghaɣraho Mawu Ruata siite.

Tita wuɣru rosa

⁷Amunkangngu aroddi, apa ipabbisara ng kite? Manungku tita n agama Yahudi laɣeo? Asinungka tawe. Arawe ete tita udde apan nangaɣra'a sia'u su ola'u rosa. Ia'u sarun tawe maasingkatta awa-waɣiu udde apa, amunkangngu tawe tita n agama namasingkatta. "Imbaɣrangnga waɣiu." ⁸Sulaɣummu tita n agama, rosa pia tempone mapaalaputu aɣawo'u apulu apan waɣiu sulaɣummu naungku, ana waugu amunkangngu tawe tita n agama, ne rosa lai mate. ⁹Ia'u dorone mabbiakka tawe tita n agama. Arawe napawe tita n agama nirumanta, rosa mannattake mabbiakka wuɣru ia'u natete. ¹⁰Ne tita n agama udde, apan paarorone tuaddane mangngonggolu wiakka, ewe'e saɣimurine nandanta m papate sia'u. ¹¹Ana waugu wuassu laɣummu tita n agama udde, rosa naasomba tempone namahia wuɣru namate sia'u.

¹²Tita n agama udde wuassu Mawu Ruata, wuɣru aɣawo'u parenta sulaɣummu tita udde nirumanta wuassu Mawu Ruata, aroddi atuɣide wuɣru apiane. ¹³Ei, apa indi atappasanne manungku apapia udde mandanta m papate sia'u? Asinungka tawe! Tumba'u rosa apan mandanta m papate udde. Ringannu mappaattu apapia, rosa mandanta m papate sia'u, tadea'u pallaɣagu n rosa aasiloanna ringannu masemakka. Wuassu laɣummu manga parenta Mawu Ruata, niatialanna manungku laɣeo atonna rosa udde.

Pattatiakka sulaɣummu wadangngu taumata

¹⁴Iite masingkata manungku tita n agama Yahudi inasaputanne wuassu Ghaɣraho Mawu Ruata; arawe ia'u indi taumata lome. Ia'u suete niwaɣu'a naola'a allangngu rosa. ¹⁵Ana waugu ia'u sassane tawe maasunna pallaɣagu'u. Manga inolaanna apan ipaapulu'u, tawe ta'u olaanna, arawe manga inolaanna ipaadiɣi'u, udde a'olaangku. ¹⁶Ne, amunkangngu ia'u ma'ola'a manga inolaanna apan tawe ipaapulu'u udde, atappasanne manungku tita n agama Yahudi udde mapia. ¹⁷Nariaddi, waɣinewe ia'u pia inolaanna udde, ewe'e rosa apan uaparenta sia'u. ¹⁸Ia'u masingkata manungku tawe saran sambau apan mapia sulaɣummu riri'u, eteudde su pallaɣagu'u ere sangkatou taumata. Ana waugu ia'u lai pia apulu ma'ola'a apapia, arawe ia'u tawe maatuɣrutta. ¹⁹Ia'u tawe ma'ola'a apapia apan ipaapulu'u; arawe ia'u ma'ola'a inolaanna apan

laʔeo, apan ipaaddiri'u. ²⁰Amungkangngu ia'u ma'ola'a manga inolaanna apan tawe ipaapulu'u, udde atappasanne waʔinewe ia'u apan ma'ola'a manga inolaanna udde, ewe'e rosa apan uaparenta sia'u.

²¹Nariaddi, ia'u nakkawessa manungku tita indi ʔinone pangimananni ite: eteudde manungku amungkangngu ia'u maddiri ma'ola'a apapia, ne tumba'u aʔaʔeo apan lumatto su riri'u. ²²Naungku maapulu n tita Mawu Ruata, ²³arawe ia'u naatutukka manungku sulaʔummu riri'u pia lai tita waine apan uaagassa parenta – eteudde tita apan uapapaʔrara n tita apan suete nia'u naungku. Ana waugu udde ia'u mangke paparentannu tita n rosa apan uaparenta sulaʔummu riri'u. ²⁴⁻²⁶Ne, aroddite ola'u riri'u; ia'u tuttuʔrutta tita Mawu Ruata ringannu ʔingirrangku, arawe ringannu pallaʔagu'u ere sangkatou taumata, ia'u uasuffubawa su rosa. Tumanite naʔongonna ia'u indi! Isai maapulu manaʔamatta sia'u wuassu wadangnga indi apan mangngapi'u su papate? Adiangkamanna su Mawu Ruata! Itou maapulu manaʔamatta sia'u sulaʔummu Mawu Yesus Kristus.

Mabbiakka tumuʔruttu Ghaʔraho Mawu Ruata

8 Orassa indi tate lai ʔuumanna simangitou apan mabbiakka su sambau ringannu Mawu Yesus. ²Ana waugu tita n Ghaʔraho Mawu Ruata apan na'ola'a siite mabbiakka su sambau ringannu Mawu Yesus Kristus apan suete napaaliu'u wuassu tita apan maarosa wuʔru maa'ate. ³Apa apan tawe ia'ola'u tita n agama, ana waugu iite taumata lome, udde suete niola'u Mawu Ruata. Mawu Ruata napaarau n rosa wuassu pallaʔagu n taumata ringannu nandolokku anang-Nge sassane, apan nirumanta ere sangkatou taumata apan marosa, ana waugu manubussa rosa. ⁴Mawu Ruata na'ola'a udde tadea'u apulu-Ne apan niapaaliatta'a sulaʔummu tita n agama Yahudi udde wotongnge olaanna sulaʔummu wadangngi ite apan mabbiakka tuttuʔrutta Ghaʔraho Mawu Ruata wuʔru waʔine tuttuʔrutta pallaʔagu n taumata. ⁵Manga taumata apan mabbiakka tuttuʔrutta pallaʔagu n taumata, sidutu maʔringidda apa apan ipaapulu m pallaʔagu n taumata. Arawe manga taumata apan mabbiakka tuttuʔrutta Ghaʔraho Mawu Ruata sidutu maʔringiddu apa apan ipaapulu Mawu Ruata. ⁶Amungkangngu ʔingirannu paparentannu pallaʔagu n taumata, ne sombangnge udde papate. Arawe amungkangngu ʔingirannu paparentannu Ghaʔraho Mawu Ruata, ne sombangnge eteudde mabbiakka su paddarame ringannu Mawu Ruata. ⁷Taumata apan ʔingiranne paparentannu pallaʔagu n taumata, taumata udde uasasettu Mawu Ruata, ana waugu taumata udde maddiri tumuʔrutta tita

Mawu Ruata; wuŕru atonna itou tawe maatuŕrutta apulu Mawu Ruata. ⁸Manga taumata apan mabbiakka tuttuŕrutta pallaŕagu n taumata, tawe maaluassa naungngu Mawu Ruata.

⁹Arawe iamiu tawe mabbiakka tuttuŕrutta apulu n taumata. Iamiu mabbiakka tuttuŕrutta Ghaŕraho Mawu Ruata – amungkangngu atonna-tonna Ghaŕraho Mawu Ruata uaparenta sulaŕummu watanganni amiu. Taumata apan tawe uatahuanna Ghaŕraho n Kristus, taumata udde waŕine tatahuananni Kristus. ¹⁰Arawe amungkangngu Kristus mabbiakka sulaŕummu ririnu, ne salaiwe wadangngu mate ana waugu rosa, arawe Ghaŕraho Mawu Ruata sidutu mangngonggolu wiakka siamiu, ana waugu paa'aukki iamiu ringannu Mawu Ruata mapiate. ¹¹Amungkangngu Ghaŕraho Mawu Ruata apan napaawiakki Kristus wuassu papate, mabbiakka sulaŕummu ririnu, ne Itou apan napaawiakki Kristus wuassu papate udde, mapaawiakku ririnu lai apan wotongnge mate udde. Itou na'ola'a udde ringannu Ghaŕraho-Ne apan mabbiakka sulaŕummu ririnu.

¹²Ana waugu udde, manga tuŕrangnga, iite pia manara mandiaga; arawe waŕine manara su paa'apulu m pallaŕagu n taumata; iite tawe wotongnge mabbiakka tumuŕruttu apulune. ¹³Amungkangngu iamiu mabbiakka tuttuŕrutta apulu n taumata, iamiu sarun mate; arawe amungkangngu ringannu taŕrino n Ghaŕraho Mawu Ruata, iamiu lapiddu mamallossu manga pallaŕagunu apan marosa, ne iamiu sarun mabbiakka. ¹⁴Manga taumata apan ahetannu Ghaŕraho Mawu Ruata, imangitou udde alaŕrana'u Mawu Ruata. ¹⁵Ana waugu Ghaŕraho apan suete nionggolu Mawu Ruata siamiu, tawe ma'ola'a siamiu allangnga, ma'oma n sara iamiu mabbiakka sulaŕummu atata'utta. Arawe Ghaŕraho Mawu Ruata udde nandiaddi siamiu maola'a alaŕrana'u Mawu Ruata. Wuŕru ringannu taŕrino n Ghaŕraho Mawu Ruata udde, iite mammago Mawu Ruata "Iamangnga, o Iamanku!" ¹⁶Ghaŕraho Mawu Ruata suadio'a ringannu ghaŕraho ng kite napaaliatta'a ete iite udde alaŕrana'u Mawu Ruata. ¹⁷Ne, amungkangngu ete iite alaŕrana'u Mawu Ruata, ne iite lai mananahuanna apan sarun manengkamma manga alaŕmatta apan suete nissaddia Mawu Ruata su manga alaŕranang-Nge. Iite sarun manengkamma suadio'a ringanni Kristus apa apan suete nissaddia Mawu Ruata Sitou; ana waugu amungkangngu iite uatataŕranga su sambau ringanni Kristus, iite sarun wantuhanna lai su sambau ringanni Kristus.

Awawantuga sarangkaŕo'engnge

¹⁸Anambo n asasusa apan aapendamanni ite orassa indi, tumuŕruttu addapa'u, tawe iasulungnga sara ng kadio'a ringannu awawantuga apan

sarun iapaaliatta'a siite. ¹⁹Ahewallu pati'uppu runia uaraṛṛado ringannu ɾintulu tempone Mawu Ruata mapaaḷiatta'u aḷaṛṛanang-Nge. ²⁰Ana waugu pati'uppu runia niwalate mawinasa, waḷine ana waugu apulune sassane, arawe ana waugu Mawu Ruata namalate n tou aroddi. Salaiwe aroddi pia lai antimma arendi: ²¹manungku su sambau tempo pati'uppu runia sarun iapaaliu wuassu taṛṛino apan maawinasa wuṛṛu sarun mawaḷi sumutta su aḷaḷuassa wuṛṛu wantuhanna su sambau ringannu aḷaṛṛana'u Mawu Ruata.

²²Iite masingkata manungku sara orassa indi ahewallu pati'uppu runia sussaḷande ana waugu asasusa, naaḷihida ere sangkatou inangnga uatataṛṛanga su tempo mangunsiwe. ²³Wuṛṛu waḷine tumba'u pati'uppu runia sassane sussaḷande; iite sassane lai sussaḷande sulaḷummu naungngi ite. Iite suete nanengkamma Ghaṛṛaho Mawu Ruata, aonggolu Mawu Ruata apan paarorone, arawe iite lai ta'e uaraṛṛado Mawu Ruata mapaaḷiu ng kite wuassu sarangkanambone, wuṛṛu manga'u siite maola'a aḷaṛṛanang-Nge. ²⁴Ana waugu ringannu mangngantimma, iite sarun maṣalamatta. Arawe amungkangngu apa apan aantimanni ite suete niasiloanni ite, ne udde waḷine lai antimma. Ana waugu isai lai mangan-timma apa apan suete niasiloanne? ²⁵Arawe amungkangngu iite mangngantimma apa apan taambe niasiloanni ite, ne iite ɾinone uaraṛṛado ringannu asasabare.

²⁶Aroddi lai Ghaṛṛaho Mawu Ruata nirumanta mantuḷungngi ite amungkangngu iite lome. Ana waugu iite wagga ereapa ɾinone iite umaḷiomanna; Ghaṛṛaho udde sassane sumaruanna Mawu Ruata sumaḷande huna ng kite ringannu ahewallu ɾintulu, na'oma n sara tawe iawisara. ²⁷Ne Mawu Ruata, apan masingkatu laḷoṛṛo naungngu tau-mata, maasunna apulu n Ghaṛṛaho udde; ana waugu Ghaṛṛaho udde sussaḷande Mawu Ruata huna ng kaḷaṛṛana'u Mawu Ruata wuṛṛu nasuḷungngu apulu Mawu Ruata.

²⁸Iite masingkata manungku Mawu Ruata mangngatokku aḷawo'u inolaanna indi, na'oma n sara mabbua mapia hunane su manga tau-mata apan marangngu Sitou wuṛṛu apan niwagoan-Ne ringannu apulu-Ne sassane. ²⁹Imangitou lai suete nipile Mawu Ruata, wuṛṛu suete nitantuna lai wuassu paarorone maola'a massuḷungngu Anang-Nge, eteudde Yesus Kristus. Ringannu aroddi Anang-Nge naola'a paarorone su wallattu anambo n manga tuṛṛangnga. ³⁰Ete aroddi Mawu Ruata namaggo simangitou apan suete nipile paarorone; wuṛṛu imangitou apan niwagoanne udde, niwala maaukka apia ringanni Tou. Wuṛṛu imangitou apan niwala apia maaukka ringannu Mawu Ruata, nanganu wageangnge sulaḷummu awawantugu Mawu Ruata sassane.

Darangngu Mawu Ruata sulaŕummu Mawu Yesus Kristus

³¹Apa apan wotongnge iwisara orassa indi su ola'u sarangkanambone udde? Amungkanngu Mawu Ruata uasamba'a siite, isai wotongnge lumawangnga siite? ³²Anang-Nge sassane tawe niakkan-Ne, ewe'e tinantilli Tou hunane siite sarangkanambone, řatade Itou tawe mangonggolu aławo'u hausanna waine siite? ³³Isai wotongnge mapaasala ng kite taumata apan suete nipile Mawu Ruata, amungkanngu Mawu Ruata sassane napaaliatta'a manungku iite tawe salane? ³⁴Apa pia taumata apan mapaasala ng kite? Kristus Yesus sarun manamba'a siite. Ete Itou apan suete nate, ara'e ete Itou apan suete nabbiakka apia wuassu papate wuřru tampane ringannu Mawu Ruata, isudde Itou mammarenta. ³⁵Apa pia taumata apan wotongnge maningaddi Kristus umakkanni ite? Wotonggewe asasusa maasingaddi Tou, ara'e asasahadda, ara'e pananasara, ara'e arařrutumma, ara'e paa'asiangnga, ara'e asasilaka, ara'e papate? ³⁶Sulaŕummu Wuke Susi uawořretta arendi,

"Su aľo'engngu allo iami mabbiakka uasaruanna papate ana waugu
To Mawu.

Iami niola'a naalihida ere domba apan řatante."

³⁷Tawe! Ewe'e sulaŕummu sarangkanambone udde iite naasomba auntunganna apan nasuungnga ana waugu Itou apan niumakkani ite! ³⁸Ana waugu ia'u mangngimanna atonna, manungku su ahewallu runia, mapia ete papate aroddi lai sulaŕummu mabbiakka, mapia ete mala'ekatta aroddi lai tembonannu runia, mapia ete papata'utta tempo indi aroddi lai su tempo addantane, ara'e manga tařrino apan waine; ³⁹mapia ete manga inolaanna su langitta, ara'e su wowo n runia ara'e sarannapa lai waine, sarangkanambone udde tawe wotongnge maasingaddu aakkannu Mawu Ruata siite, ere suete niapaasingkati Tou su pabbiarřani Kristus Yesus Mawu ng kite.

Mawu Ruata wuřru aľarřanang-Nge apan napile

9 Apa apan sarun iwisara'u indi atonna ana waugu ia'u tatahuananni Kristus. Ia'u tawe mamahia. Naungku apan ahetannu Ghařřaho Mawu Ruata mannohassa sia'u lai manungku wisara'u indi atonna. ²Ia'u tumanite massusa wuřru naungku uatatařranga sansara ³ana waugu manga tuřrangnga sambalahangku. Ana waugu ete simangitou, ia'u sassane maľuassa wontohannu Mawu Ruata wuřru iapaataľei wuassi

Kristus. ⁴Ete imangitou udde pabbawalaga apan nipile wuṛru Mawu Ruata nanga'u simangitou maola'a aḷaṛṛanang-Nge sassane, lapiddu na-paaliatta'u taṛṛino-Ne simangitou. Itou na'ola'a paaire simangitou wuṛru nangonggolu tita n agama simangitou. Mawu Ruata namasingkata simangitou ereapa imangitou ṛinone mattaṛramawu wuṛru imangitou suete nanengkamma lai manga paaire-Ne. ⁵Ete imangitou udde papapulunna wuassu iupungngu aḷamona ng kite. Kristus su olangnge ere sangkatou taumata wuassu pabbawalagi mangitou. Itou lembo n atanggarranne wuassu sarangkanambone. Paddalote Mawu Ruata sarangkaḷo'engnge! Amin.

⁶Ia'u tawe pandumma mamasingkata manungku paaire Mawu Ruata tate ipaatta lai; arawe waḷine anambo n taumata n Israel udde pabbawalaga apan nipile Mawu Ruata. ⁷Waḷine anambo n papapulunni Abraham udde maola'a aḷaṛṛana'u Mawu Ruata. Ana waugu Mawu Ruata nabbisara si Abraham, "Tumba'u papapulunni Ishak apan isaggo papapulunnu." ⁸Udde atappasanne manungku papapulunni Abraham apan maola'a aḷaṛṛana'u Mawu Ruata, tumba'u papapulunne apan niasungkangnga ana waugu paaire Mawu Ruata; wuṛru waḷine anambo n papapulunne. ⁹Ana waugu paaire Mawu Ruata ereindi, "Su tempo apan suete tinantunna, Ia'u sarun mabelengnga, wuṛru Sara sarun maasomba sangkatou ana'a esakka."

¹⁰Wuṛru indi lai: Ribka mangunsiwe n rua ng katou ana'a esakka wuassu iamangnga sambau; eteudde Ishak iupungngu aḷamona ng kite.

¹¹Tantalanna ana'a darua udde taambe niasungkangnga, Mawu Ruata suete nanantunnu aḷaṛṛanang-Nge apan nipile manansunna. Pamamile Mawu Ruata udde tawe uaantimma apa apan wotongnge olaannu taumata, arawe uaantimma wawaggo Mawu Ruata sassane. Ana waugu su tempo ana'i Ribka rua ng katou esakka udde taambe maaola'a manara mapia ara'e laḷeo, ¹²Mawu Ruata suete namasingkata si Ribka, "Iaangnge sarun mangimbe tuarine." ¹³Sulaḷummu Wuke Susi uaworretta manungku Mawu Ruata namasingkata ereindi, "Yakub arangnguang-Ku, arawe Esau ipaadi-U."

¹⁴Apa panginsueannu ṛingiranni ite orassa indi? Manungku Mawu Ruata udde tawe matulida? Atonna Mawu Ruata udde matulida!

¹⁵Ana waugu Mawu Ruata nabbisara si Musa, "Ia'u sarun mapaaljatta'u aḷamatta su taumata apan Ia'u maapulu mangalamatta, Ia'u sarun mapaaljatta'u darangngu-U su taumata arangnguang-Ku." ¹⁶Nariaddi, Mawu Ruata nakkawessa udde waḷinewe ana waugu su apulu n taumata ara'e su pamamanara n taumata, ewe'e su apapia naungngu Mawu Ruata su taumata apan suete nipile-Ne udde. ¹⁷Ana waugu sulaḷummu Wuke Susi uaworretta, "Mawu Ruata nabbisara su Ratu Mesir, 'Ia'u ma'ola'a si'o ratu ana waugu sambau pandumanna indi, eteudde tadea'u

ringannu rininu Ia'u mapaaljatta'u araratuang-Ku wuŕru ma'ola'a arang-Ku asingkatannu laŕoŕo n runia.'" ¹⁸Nariaddi Mawu Ruata mandangu sangkatou, amungkanngu Mawu Ruata maapulu aroddi. Mawu Ruata mammala n sangkatou taumata maławangnga, amungkanngu Mawu Ruata maapulu aroddi lai.

Asasa'u Mawu Ruata wuŕru apapia naungngu Mawu Ruata

¹⁹Ne, tuŕrangnga sarun mabbisara sia'u, "Amungkanngu aroddi anio Mawu Ruata ta'e mapaasala n taumata? Wałine tawe saran sangkatou wotongnge maapaningadu apulu Mawu Ruata?" ²⁰Arawe, tuŕrangnga! Tuŕrangnga tumba'u sangkatou taumata. Wuŕru tuŕrangnga tawe waŕrani sumimbakka Mawu Ruata! Wotonggewe tampa m bunga maiwało, isai taumata na'ola'a sitou, "Anio i'o na'ola'a sia'u arendi?" ²¹Wałinewe taumata apan na'ola'a tampa m bunga udde na'ola'a leta'a udde walate apulu naungngi tou? Wuassu sangkompenga leta'a taumata udde nallanginnu tampa m bunga udde darua hatine; sambau mapia wuŕru sambau lai tawe tumanite n mapia.

²²Aroddi lai apa apan suete niola'u Mawu Ruata. Itou maapulu mapasabangngu naung-Nge laleo wuŕru mapaaljatta'u taŕrino-Ne. Arawe Itou masabbare su saruanni mangitou apan sarun iŕruumanna ana waugu napaasa'u n Tou. ²³Mawu Ruata lai maapulu mapaaljatta'a siite alałuassa apan nasuungnga apan nionggola siite taumata arangnguan-Ne. Iite suete nisaddianni Tou manengkamma alałuassa udde. ²⁴Ete iite apan suete niwaggoan-Ne, wałine tumba'u wuassu pabbawalagu Yahudi, arawe lai wuassu manga pabbawalaga waine. ²⁵Ana waugu sulałummu wuke Nabi Hosea, Mawu Ruata nabbisara,

"Manga taumata apan wałine pabbawala-U,
sarun isaggo 'Pabbawala-U'.

Pabbawalaga apan ipaadiri-U,
sarun isaggo-U 'Arangnguang-Ku'.

²⁶Wuŕru su tampa udde iapaasingkata su taumata 'Iamiu wałine alaŕrana-U,'

isudde manga taumata sarun isaggo alaŕrana'u Mawu Ruata apan wiakka."

²⁷Nabi Yesaya nabbisara ringannu maŕragissa su ola'u pabbawalagu Israel, "Salaiwe reengannu pabbawalagu Israel anambone ere anne su tahałangnga, tumba'u matułungnga apan masalamatta; ²⁸ana waugu Mawu tate małannu lai mandanta n ruumanna su laŕoŕo n runia."

²⁹Yesaya nabbisara arendi lai, "Unnu wisara Mawu Ruata Lembo

Matarrino tawe nanantangngu papapulunna siite, iite naola'e ere Sodom wuŕru Gomora."

Paa'aukku alarrana'u Mawu Ruata ringannu Watti'u Alaluassa wuassu Mawu Ruata

³⁰Nariaddi, audusanne iwisara arendi: Manga pabbawalaga waine apan waline Yahudi tawe madea'a tadea'u paa'aukki mangitou ringannu Mawu Ruata maola'a apia. Arawe ana waugu imangitou mangngimanna, ne Mawu Ruata na'ola'a paa'aukki mangitou ringanni Tou naola'a apia. ³¹Arawe manga taumata n Yahudi sidutu madea'a tumurŕutta tita, tadea'u paa'aukki mangitou ringannu Mawu Ruata masasangkapia apia. Arawe imangitou tawe naasomba hessine. ³²Anio imangitou tawe naasomba hessine? Ana waugu imangitou na'ola'a udde ringannu tawe mangngimanna Mawu Ruata, ewe'e su laŕanni mangitou sassane. Ne imangitou nema'a natara su "Watu Atataranna". ³³Su ola'u watu udde sulalummu Wuke Susi uaworŕetta arendi,

"Paanaunge indi: Su Sion suete Ta'u niaddo sambau watu

apan sarun atarannu taumata;

eteudde sambau watu wahewa apan sarun mangema'u taumata.

Arawe taumata apan mangngimanna Sitou

tawe sumassilla."

10 Manga turŕangnga! Ia'u maapulu atonna tadea'u pabbawala'u masalamatta. Wuŕru ia'u atonna-tonna u'aljomanna su Mawu Ruata huna mangitou. ²Ia'u waŕrani mabbisara manungku imangitou maŕutu atonna mattarŕamawu Mawu Ruata. Arawe apulu mangitou udde tawe pinangiananne wuassu asingkattu Mawu Ruata. ³Imangitou wagga olangnge Mawu Ruata ma'ola'a paa'aukku taumata ringanni Tou maola'a apia. Wuŕru ana waugu imangitou maapulu tumurŕutta apulu mangitou sassane, ne imangitou maddiri tumurŕutta su laŕanna apan niaŕra'u Mawu Ruata. ⁴Tita n agama suete nitipussi Kristus. Nariaddi suapa n taumata apan mangngimanna si Kristus, paa'aukki mangitou ringannu Mawu Ruata maola'a apia.

Asasalamatta udde hunane su anambo n taumata

⁵Musa namorŕetta manungku taumata apan uasasangkapia Mawu Ruata pinangiananne wuassu tita n agama, taumata udde sarun mabbia akka ana waugu tuturŕutta tita n agama udde. ⁶Arawe su ola'u

laḷannu taumata masasangkapia Mawu Ruata pinangiananne mangngimanna Mawu Ruata, Wuke Susi namasingkata arendi, "Ariete i'o mabbisara sulaḷummu naungngu, 'Isai apan sarun masengkengnga su surga?" (atappasanne mangapiddi Kristus sumossokka), 'ara'e, 'Isai apan sarun sumossokka su runia n taumata nate?" (atappasanne mappaa-wiakki Kristus wuassu papate)." ⁸Pandumanne arendi, "Watti'a wuassu Mawu Ruata udde marani atonna ringanni ami; su moṛṛongngu wuṛṛu sulaḷummu naungngu." Eteudde watti'a apan iapaasingkati ami, watti'a manungku taumata ṛinone mangngimanna. ⁹Ana waugu amung-kangngu tuṛrangnga mangnga'u ringannu moṛṛongngu manungku "Yesus udde Mawu", wuṛṛu i'o mangngimanna sulaḷummu naungngu manungku Mawu Ruata suete napaawiakku Mawu Yesus wuassu papate, i'o sa-run masaḷamatta. ¹⁰Ana waugu ringannu naungnge taumata mangngimanna, na'oma n sara Mawu Ruata nanengkamma sitou naola'a sangkatou taumata apan uasasangkapia Mawu Ruata. Wuṛṛu ringannu moṛṛongnge taumata mangnga'u, na'oma n sara itou naasomba asaḷamatta. ¹¹Sulaḷummu Wuke Susi uawoṛṛetta, "Taumata apan mangngimanna tawe iapaasusa." ¹²Udde mariaddi su anambo n taumata, ana waugu tawe paṛṛalane taumata n Yahudi wuṛṛu taumata m pabbawalaga waine. Mawu Ruata apan sambau eteudde Mawu Ruata n anambo n taumata. Itou mangngonggolu aḷamatta manambo-nambo su anambo n taumata apan ma'ituḷungnga Sitou. ¹³Sulaḷummu Wuke Susi uawoṛṛetta, "Anambo n taumata apan madorongnga su Mawu, sarun masaḷamatta."

¹⁴Arawe ereapa laḷanne taumata wotongnge maituḷungnga su Mawu amungkangngu imangitou taambe nangimanna? Wuṛṛu ereapa imangitou wotongnge mangngimanna Mawu amungkangngu imangitou taambe naaringikka su ola'i Tou? Wuṛṛu ereapa lai imangitou wotongnge maaringikka Watti'u Mawu amungkangngu tawedu mamasingkata? ¹⁵Wuṛṛu ereapa taumata wotongnge mangapiddu watti'a udde amungkangngu imangitou tawe nirolokka? Sulaḷummu Wuke Susi uawoṛṛetta arendi, "Apiawe eteapa daranta manga taumata apan uaapiddu Watti'u Aḷaḷuassa wuassu Mawu Ruata!" ¹⁶Arawe tawe anambo n taumata mannengkamma Watti'u Aḷaḷuassa udde. Ana waugu Yesaya nabbi-sara, "Mawu, isaite apan mangngimanna watti'i ami?" ¹⁷Ana waugu udde manga taumata mangngimante ana waugu imangitou naaringikke watti'a, wuṛṛu watti'a niaringiṛṛana ana waugu pia taumata apan nama-singkata su ola'i Kristus.

¹⁸Arawe ia'u maiwaḷo: Atonnawe imangitou taambe naaringikka watti'a udde? Atonna suete! Ana waugu sulaḷummu Wuke Susi uawoṛṛetta arendi,

"Tingikki mangitou niaringiṛṛante su ahewallu runia,
manga wisara mangitou na'omate sara petakku runia."

¹⁹Ia'u maiwało apia: Apa pabbawalagu Israel taambe naasingkata? Wala'e aiwało udde paarorone simbarrani Musa. Musa nabbisara, "Arendi lai unnu Mawu Ruata,

'Ia'u sarun ma'ola'a siamiu tawe małuassa su saruannu sambau pabbawalaga apan wałine ałarřana-U
wurru Ia'u sarun ma'ola'a siamiu masa'u su pabbawalaga apan longonna.'"

²⁰Yesaya lembo n wařřani lai. Itou nabbisara,

"Arendi lai unnu Mawu Ruata,

'Manga taumata tawe madea'a sia-U, suete nassomba-U;
wurru Ia'u nattingkapasilo n riri-U simangitou apan tawe maiwało-U.'"

²¹Arawe su ola'u pabbawalagu Israel Yesaya nabbisara, "Arendite unnu Mawu Ruata, 'Su ało'engngu allo Ia'u mangnguľukku lima-U su sambau pabbawalaga apan maławangnga wurru tawe tumurřutta.'"

Apapia naungngu Mawu Ruata su pabbawalagu Israel

11 Ia'u maiwało: Apa Mawu Ruata suete nandamme m pabbawala-Ge sassane? Atonna tawe! Ia'u sassane sangkatou taumata n Israel papapulunni Abraham, wurru wuassu řuanganni Benyamin. ²Tawe! Mawu Ruata tawe nandamme m pabbawala-Ge apan suete nipile-Ne ro'e n paarorone. Manga turřangnga masingkata apa apan uaworřetta sulaľummu Wuke Susi su ola'i Elia, su tempo itou nangalae n hatto n taumata n Israel su Mawu Ruata, Elia nabbisara, ³"Mawu, manga taumata suete namate manga nabi-Nu wurru narřimunsa'a manga tampa m pangangadoannu sasambanu Mawu. Ete ia'u sassane nallambe wurru imangitou lai maapulu mamate sia'u." ⁴Apa sasimbakku Mawu Ruata si Elia? Mawu Ruata sinumimbakka, "Ia'u suete nanantangngu pitu řiwu su atoune hunane su riri-U sassane. Taambe saran paassa imangitou nassubba paaluanna Baal." ⁵Aroddi lai orassa indi: Pia sire pira manga taumata apan suete nipile Mawu Ruata ana waugu ałaman-Ne. ⁶Itou namile simangitou ana waugu pinangianannu ałaman-Ne wurru wałine ana waugu pinangiananne pallaľagu mangitou. Ana waugu amungkangngu pamamile Mawu Ruata udde pinangiananne wuassu pallaľagu n taumata, ne ałamattu Mawu Ruata udde wałinewe ałamatta apan tutune.

⁷Nariaddi, ereapate? Pabbawalagu Israel tawe naasomba apa apan radeaanni mangitou. Naasomba udde tumba'u sire pira taumata wuassu ammuľanna adio'a apan suete nipile Mawu Ruata. Ingana'a waine sarangkanambone nabbali maławangnga su wawaggo Mawu Ruata.

8 Ana waugu sulaḷummu Wuke Susi uaworretta arendi, "Mawu Ruata na'ola'a naungnga wuṛṛu ṛingiddi mangitou nabbaḷi maattika; wuṛṛu na'oma n sara orassa indi mata mangitou tawe maasilo wuṛṛu taḷinga mangitou tawe maaringikka." **9** Daud nabbisara lai,

"Wala'e manga andeangngi mangitou maola'a waḷati'a simangitou sassane,

wuṛṛu maola'a loṛrangnga, tampa mangitou manawo wuṛṛu maṛṛimunsa'a!

10 Wala'e mata mangitou maddanduma tadea'u imangitou tawe maasilo;

wuṛṛu wala'e imangitou maola'a aḷudungnga sarangkaḷo'engnge."

11 Ia'u maiwaḷo apia; Su tempo n taumata n Yahudi nanawo, apa udde mariaddi tadea'u imangitou maṛṛimunsa'a? Atonna-tonna tawe! Arawe ana waugu imangitou marosa, ne pabbawalaga waine naasomba asasaḷamatta, na'oma n sara taumata n Yahudi tawe maḷuassa su pabbawalaga waine udde. **12** Ana waugu pabbawalagu Yahudi nassaḷa wuṛṛu maddiri tumuṛṛutta apulu Mawu Ruata, ne manga pabbawalaga waine niaḷamatannu Mawu Ruata. Nangillembu lai amungkangngu paa'aukku pabbawalagu Yahudi ringannu Mawu Ruata maola'a mapia; ne maggewaḷanna lai aḷamatta apan sarun ionggolu Mawu Ruata!

Asasaḷamattu pabbawalaga waine apan waḷine Yahudi

13 Arawe orassa indi mappianne ia'u mabbisara su manga tuṛrangnga apan waḷine Yahudi! Aḷannune indi, naola'a rasul su pabbawalaga waḷine Yahudi, ia'u lembo mangngarega manara'u. **14** Ia'u mangngantimma, ia'u wotongnge mapaaḷapputu naungnga laḷeo su pabbawala'u sassane, tadea'u ringannu laḷanne udde ia'u wotongnge manaḷamatta sambageanganna wuassi mangitou. **15** Ana waugu imangitou tawe tinarimmattu Mawu Ruata, ne paa'aukku runia ringannu Mawu Ruata naola'e apia; nangillembu lai amungkangngu imangitou tinarimmattu Mawu Ruata! Udde nassuḷungngu ere taumata nate nabbiakka apia!

16 Amungkangngu roti sampaddi apan paarorone suete nionggola su Mawu Ruata, udde atappasanne rotine sarangkanambone udde nionggola su Mawu Ruata lai. Wuṛṛu amungkangngu ṛamuttu alu udde lai pussa'a Mawu Ruata udde atappasanne manga rannane lai pussaa-Ne. **17** Sangkawageanganna wuassu manga ranna ng kalu zaitun – eteudde manga taumata n Yahudi – niattibba. Wuṛṛu su lanna'u attibba udde nireeta ranna ng kalu zaitunna luḷu, eteudde manga tuṛrangnga apan waḷine Yahudi. Tuṛrangnga nireeta isudde tadea'u tuṛrangnga maattermma aḷawo'a apan mapia wuassu pabbawiakku ṛimuudu manga

taumata n Yahudi. ¹⁸Ana waugu udde ariete iamiu mangngadio'a simangitou apan suete nitonto ere ranna udde. Iamiu rinone mannungnga manungku iamiu tumba'u rannane. Wurrū wāline ranna apan mangngonggolu anna su ramunne, ewe'e ramutta apan mangngonggolu anna su rannane.

¹⁹Arawe i'o sarun mabbisara, "Ore, arawe manga ranna udde nitonto tadea'u ia'u wotongnge ireeta su alune!" ²⁰Udde mangke atonna. Arawe imangitou niramme ana waugu imangitou tawe mangngimanna, arawe turrangnga tinarimmatta ana waugu turrangnga mangngimanna. Nariaddi imbarrangnga turrangnga mamunga ana waugu udde; arawe rinone i'o pia apendamma mata'utta. ²¹Ana waugu amungkanngu Mawu Ruata tawe umakkannu taumata n Yahudi iramme ere manga ranna tutune udde, arie passunna manungku Itou mappau mandam-menu! ²²Nariaddi isindi iite naasilo aroddi apiane Mawu Ruata wurrū aroddi aattike lai Itou. Itou marragissa su saruanni mangitou apan marosa, arawe naungngi Tou masarriorito'a si'o - sambaliate i'o sidutu mabbiakka wuassu darangngu-Ne. Amungkanngu tawe, i'o lai sarun iramme. ²³Wurrū su ola'u manga taumata n Yahudi udde, amungkanngu imangitou mawalu wuassu pallaḷagu tawe mangngimanna, imangitou sarun itarimmatta apia; ana waugu Mawu Ruata pia tarriṇo manarimmatti mangitou apia. ²⁴Turrangnga apan wāline wuassu pabbawalagu Yahudi udde, naaliḥida ranna ng kalu zaitun apan luḷu. Ei, amungkanngu i'o uatata'ae sulaḷummu pallaḷagunu, wotongnge ireeta su alu zaitun tutune, lembonete manga taumata n Yahudi apan nisumandingnga su manga ranna ng kalu zaitun tutune udde. Natantunna malluasanne Mawu Ruata mamelengngi mangitou su punnu alu n zaitunni mangitou sassane.

Darangngu Mawu Ruata su anambo n taumata

²⁵Manga turrangnga! Ia'u mangantimma iamiu arie mamendamma manungku iamiu masingkate n sarangkanambone. Ana waugu pia sambau apan ipaapulu Mawu Ruata, arawe taambe niasingkatannu taumata. Wurrū ia'u maapulu iamiu maasingkata; eteudde indi: Sangkawageanganna wuassu taumata n Yahudi apan maḷawangnga, arawe pallaḷagu mangitou udde tumba'u ma'oma su tempone, napawe anambo n taumata apan wāline Yahudi apan rudanta ringannu Mawu Ruata udde natimute. ²⁶Ete aroddi anambo n taumata n Yahudi sarun masaḷamatta. Ana waugu sulaḷummu Wuke Susi uaworretta arendi,

"Ratu m Punnu Saḷamatta sarun rumanta wuassu Sion;

Itou sarun manubbussa anambo n alaḷeo m papapulunni Yakub.

²⁷Ia'u sarun mangagilu paaire indi simangitou
su tempo Ia'u mangampungnga manga rosa mangitou."

²⁸Ana waugu taumata n Yahudi maddiri manengkamma Wattu'u Alaluassa wuassu Mawu Ruata, ne imangitou naola'a seettu Mawu Ruata; wuŕru udde maola'a auntungannu manga turrangnga apan waline Yahudi. Arawe ana waugu suete nipile Mawu Ruata, ne manga taumata n Yahudi sidutu raddanguannu Mawu Ruata ana waugu iupungngu alamona mangitou. ²⁹Ana waugu amungkangngu Mawu Ruata mamile taumata wuŕru mangalamatta taumata udde, Mawu Ruata tawe mangule apia apa apan suete niolang-Nge. ³⁰Dorone iamiu maddiri tumurutta Mawu Ruata. Arawe orassa indi Mawu Ruata suete napaaliatta'a manungku iamiu naliute wuassu pasasala, ana waugu taumata n Yahudi maddiri tumurutta. ³¹Aroddi lai su manga taumata n Yahudi udde. Orassa indi imangitou maddiri tumurutta Mawu Ruata, tadea'u iamiu iapaaliatta'a manungku iamiu naliute wuassu passasala. Arawe imangitou lai sarun iapaaliu wuassu passasala. ³²Ana waugu Mawu Ruata suete namala n taumata paparentannu lalawangnga, tadea'u Itou wotongnge mapaaaliatta'u darangngu-Ne simangitou sarangkanambone.

Daralo su Mawu Ruata

³³Ala atonna Mawu Ruata! Wahewalla atonna apapande-Ne wuŕru asingka-Ne! Isai wotongnge maasingkata alawo'u manga larawen-Ne? Isai wotongnge maasunna manga olangnge Itou mammanara?

³⁴Sulalummu Wuke Susi uaworretta arendi,

"Isai wotongnge maasingkata ringirannu Mawu?

Isai wotongnge manantiro Sitou

³⁵Isai suete nangonggolu sarannapa su Mawu

na'oma n sara itou wotongnge madorongnga wawalinne?"

³⁶Mawu Ruata apan nandiaddi sarangkanambone. Sarangkanambone udde wuassu Mawu Ruata wuŕru udde lai hunane su Mawu Ruata. Paddalote Mawu Ruata ma'oma n sarangka'o'engnge! Amin.

Mabbiakka huna Mawu Ruata

12 Manga turrangnga! Mawu Ruata tumanite mapia siite. Ana waugu udde ia'u sumaŕande siamiu ringannu ahewallu naungnga tadea'u iamiu manantillu wadangngi amiu maola'a sambau sasamba apan wiakka su Mawu Ruata sassane wuŕru maaluuassa naung-Nge. Patatarramawunu su Mawu Ruata rinone lai aroddi. ²Imbarrangnga

mattanno apulu n runia indi. Wala'e Mawu Ruata mandiaddi ririnu maola'a wakku, tadea'u iamiu pia awawalu. Ringannu aroddi iamiu wotongnge maasingkata apulu Mawu Ruata – eteudde apa apan mapia wufu apan maaluaasa naung-Nge wufu apan nasuungnga.

³Mawu Ruata suete nangonggolu alamatta sia'u. Ana waugu udde ia'u manantiro su tufangnga sarangkanambone; imbarangnga mamen-dama ririnu mattanggarana wuassu apan rinone. Rinone iamiu mattiala watanganni amiu ringannu awawawo naungnga; sangkatou-sangkatou mattiala watanganne tumufuttu asingkata apan suete nionggolu Mawu Ruata sitou ana waugu mangngimanna Mawu Yesus. ⁴Wadangngi ite manambo wageangnge. Manga wageangnge udde pia manarane sambau-sambau. ⁵Aroddi lai matatarino siite. Salaiwe iite sarangkanambone manambo, arawe iite naola'a wadangnga sambau ana waugu iite su sambau ringanni Kristus. Wufu iite sambau-sambau uaukka su sambau ringannu waine maola'a wageangnga wuassu wadangnga sambau. ⁶Iite sambau-sambau pia alamattu manara apan uapaparala. Manga alamatta udde nionggolu Mawu Ruata siite tumufuttu darangngu-Ne. Ana waugu udde iite sarun mappattu alamatta udde. Taumata apan pia alamatta mamasinkatu Watti'a wuassu Mawu Ruata sarun mabbatti'u watti'a wuassu Mawu Ruata udde, tumufuttu atatohassi tou sassane. ⁷Taumata apan pia alamatta ipantulungngu taumata waine, rinone atonna-tonna mantulungngu taumata waine. Taumata apan pia alamatta manantiro, rinone itou atonna-tonna manantiro. ⁸Taumata apan pia alamatta mangngonggolu sasasa su taumata waine, rinone atonna-tonna mangonggolu sasasa su taumata waine, taumata apan pia alamatta mantulungngu taumata waine ringannu darotongnge, rinone ma'ola'a udde ringannu naungnga mawawo wufu maluassa. Taumata apan pia alamatta mammiar'a, rinone atonna-tonna mammiar'a. Taumata apan pia alamatta mamasilo n darangngune su taumata waine, rinone ma'ola'a ringannu naungnga maluassa.

⁹Pandangngute ringannu ahewallu naungngu. Paaraua'a alaleo, wufu pa'ola'e apapia. ¹⁰Rinone manga tufangnga uararangngu sangkatou ringannu waine wufu uaa'akkanna ere manga taumata apan uasangkaturangnga sulaumu amonanna sambau, wufu rinone iamiu ualaliu roro mangonggolu addatta. ¹¹Pammanarate ringannu marimadda. Arie mangkete wolo'a. Pammanara su Mawu ringannu atatohassa wuassu Gharraho Mawu Ruata. ¹²Rinone iamiu mangngan-timma Mawu ringannu maluassa, paasabare sulaumu asasusa, wufu paarimadda umaliomanna. ¹³Patatulungnga mapaasuungngu hausannu manga taumata n Sarani waine wufu salohoiwe manga tufangnga su pangangimanna sambau apan ta'e awaganannu, ringannu naungnga maluassa sulaumu wafenu.

¹⁴Paddorongke su Mawu Ruata tadea'u Itou mangalamatta manga taumata apan maffragissa siamiu. Ore, paddorongke Mawu Ruata mangalamatta simangitou, arie pangane. ¹⁵Lalluasse su sambau ringannu manga taumata apan lulluassa, wuɽɽu luaite ringanni mangitou apan lulluai. ¹⁶Pabbiakke su paddarame sangkatou ringannu waine. Imbaɽrangnga mamunga, arawe sulunga'a ririnu ere taumata apan manarane mawawo su aellegu awadaalla. Arie mamendamma ririnu apan-deanne wuassu ɽinone.

¹⁷Amungskangngu taumata mandaleo si'o, arie walisanu alaɽeo. Ola'e apa apan mapia su aellegu awadaalla. ¹⁸Wuassu sambaanu padea'a mabbiakke su paddarame ringannu taumata nambo. ¹⁹Manga tuɽrangku! Arie saran paassa i'o mangune, wala'e Mawu Ruata maffrumanna. Ana waugu sulaɽummu Wuke Susi uawoɽretta, "Ete Ia'u apan mabaɽissa, Ia'u sarun maffrumanna, unnu wisara n Mawu." ²⁰Arawe amungskangngu seenu maɽunussa, itou ongoɽe n anna, wuɽɽu amungskangngu itou marou, painuma'a itou. Ana waugu ringannu na'ola'a aroddi, tuɽrangnga namansili sitou. ²¹Arie mapaawala n ririnu iapiddu alaɽeo, arawe ɽinone iamiu mapaanawo ng kaɽaleo ringannu apapia.

Tatuɽɽuta su tembonannu runia

13 Suapa n taumata ɽinone matuɽɽutta su tembonanne, ana waugu tawe tembonanne apan tawe naasomba taɽɽino wuassu Mawu Ruata. Wuɽɽu tembonanne apan uaparenta orassa indi, mappaamattu manarane wuassu darolokku Mawu Ruata. ²Ana waugu udde taumata apan mannompola tembonanne udde, nassulungngu lai mannompola apa apan suete tinantunnu Mawu Ruata. Wuɽɽu taumata apan ma'ola'a aroddi sarun iɽrumanna. ³Ana waugu taumata apan ma'ola'a apapia arie mata'uttu tembonanne. Tumba'u taumata apan ma'ola'a alaɽeo apan ɽinone mata'utta. Amungskangngu i'o maapulu tadea'u i'o tawe mata'uttu tembonanne, i'o ɽinone ma'ola'a apapia, ne i'o sarun raloanna. ⁴Ana waugu tembonanne udde, allangngu Mawu Ruata apan mammanara hunane ipadde'a apapianu. Arawe amungskangngu i'o ma'ola'a alaɽeo, i'o ɽinone mata'utti tou, ana waugu walineuwe tawe mangalene itou maffrumannu taumata. Ete itou allangngu Mawu Ruata, apan mangngonggolu ɽuumannu Mawu Ruata su manga taumata apan ma'ola'a alaɽeo. ⁵Ana waugu udde ɽinone i'o matuɽɽutta tembonanne – waline tumba'u ana waugu i'o maddiri iɽrumanna, arawe ana waugu ahewallu apulu naungngu.

⁶Eteudde lai pinangananne anio tuɽrangnga mammaekke wose, ana waugu tembonanne udde mamamanara Mawu Ruata apan mappaa-

mattu manara Mawu indi. ⁷Nariaddi waerrete su tembonanne apa apan rinone turrangnga mamaekka sitou. Waerrete wose, amungkangu turrangnga rinone mamaekka wose, wufru waerrete beane amungkangu turrangnga rinone mamaekka bea. Imbei imangitou apan rinone imbeanna wufru aaddatewe imangitou apan rinone addatanna.

Manara su sandingananna

⁸Imbarrangnga pia awallasa sisai-sai, tabene'e uawawallasa darangngu sangkatou ringannu waine. Ana waugu taumata apan marangngu su sansulungnge taumata, suete nanuungngu anambo n tita Musa. ⁹Ana waugu tita n agama Yahudi eteudde: Imbarrangnga sumandaga, imbarrangnga mamate, imbarrangnga manna'o, imbarrangnga numemma n sarannapa n taumata waine; sarangkanambone udde niamulle ringannu tita waine, suete nisari tumbau naola'a tita sambau eteudde, "Pandangngu sansulungngu taumata ere lai i'o mandangngu ririnu sassane." ¹⁰Taumata apan mandangngu taumata waine tawe ma'ola'a alafeo su taumata udde. Nariaddi taumata apan mandangngu sansulungnge eteudde taumata apan suete tinumufrutta anambo n tita n agama.

¹¹Su liuddu sarangkanambone udde iamiu maasingkata manungku tempo indi eteudde temponu mapu'o wuassu atatiilla. Ana waugu tempone iite iapaasalamatta maranite orassa indi, wuassu iite wakute mannattaka mangngimanna. ¹²Rabbi maranite maliudda; wufru ete lai adio'a allote. Nariaddi mappianne iite mangillolo ma'ola'a inolaanna apan marandumma. Iite rinone mapaasuungngu watanganni ite ringannu ahidda asasemakka. ¹³Iite rinone ma'ola'a inolaanna apan aaddatanna ere su inanaramanne a'olaannu taumata su tempo allo; imbarrangnga maddamea tumanite manampaliu, ara'e mabbu'anna. Imbarrangnga sumandaga, ara'e pia palla lagu tawe addane. Imbarrangnga mabbawulo, ara'e mangune. ¹⁴Wala'e Mawu Yesus Kristus mangatokku apa apan sarun olaanna. Wufru imbarrangnga tumufrutta palla lagu n taumata marosa ipamatu'a apulu naungnga.

Imbarrangnga mapaasala n turrangngu

14 Taumata apan pangangimanne ta'e mattulungnga rinone sengkamanna ringannu mapia su wallattu manga turrangnga. Arie pattatiakka ringanni tou su ola'u pangangimanne. ²Pia taumata mangngimanna manungku itou wotongnge umanna alawo'u anna. Arawe pia lai taumata waine apan lome pangangimanne; itou mammendama

manungku itou tumba'u wotongnge mabbiakku sayore. ³Taumata apan u'anna tawe mamile, arie mangadio'a taumata apan u'anna tumba'u anna suete tinantunne; wuɽɽu taumata apan tumba'u u'anna anna suete tinantunne, arie lai mapaasala n taumata apan u'anna alawo'u anna, ana waugu Mawu Ruata suete nanarimmatti tou. ⁴Isai tuɽrangnga, na'oma n sara tuɽrangnga mamarikissa allangngu taumata waine? Mapia ete allangnga udde nema'a ara'e dirumarisikka, udde singkate mawune. Wuɽɽu atonna allangnga udde sarun dumarisikka matuɽida, ana waugu Mawu wotongnge mapararisikki tou matuɽida.

⁵Pia taumata mammendama sambau allo apan apianne wuas-su manga allo waine, arawe pia lai taumata waine mammendama manungku manga allo udde uasuɽungnga. Wala'e sambau-sambau manantunu apulu naungnge sassane. ⁶Taumata apan tumba'u mappaattu manga allo apianne, taumata udde ma'ola'a aroddi ana waugu ipangaddata Mawu. Taumata apan u'anna alawo'u anna, ma'ola'a aroddi ana waugu ipangaddata Mawu, ana waugu itou maadiangkamanna Mawu Ruata ana waugu pabbawiakka udde. Aroddi lai taumata apan tumba'u u'anna anna suete nipilene, taumata udde lai mangadatta Mawu wuɽɽu u'aljomanna su Mawu Ruata. ⁷Tawe saran sangkatou wuassi ite apan mabbiakka hunane su watanganni ite sassane, wuɽɽu tawe saran sangkatou apan mate hunane su watanganne sassane. ⁸Amungkanngu iite mabbiakka, iite mabbiakka hunane su Mawu. Wuɽɽu amungkanngu iite mate, iite lai mate hunane su Mawu. Nariaddi wiakka ara'e nate, iite udde tatahuanannu Mawu. ⁹Kristus natete wuɽɽu nabbiakke apia. Ana waugu udde Itou naola'a Mawu manga taumata wiakka wuɽɽu lai manga taumata apan natete. ¹⁰Nariaddi, manga tuɽrangnga! Apa hunane mapaasala n tuɽrangngu apan su pangangimanna sambau? Wuɽɽu apa hunane tuɽrangnga mangngadio'a sitou? Iite sarangkanambone sarun sumaruanna Mawu Ruata tadea'u parikisanna. ¹¹Sulaɽummu Wuke Susi uawoɽetta,

"Mangeke atonna," wisara Mawu,

"sangkatou-sangkatou sarun massubba su saruang-Ku;

wuɽɽu sangkatou-sangkatou sarun manga'u manungku ete Ia'u
Mawu Ruata."

¹²Nariaddi iite sambau-sambau ɽinone pia sasimbakka su ola'u alawo'u inolaanni ite su Mawu Ruata.

Imbaɽrangnga mangaɽiwu n tuɽrangngu

¹³Ana waugu udde arie iite mapaasala n sangkatou ringannu sangkatou. Arawe padea'e tadea'u iamui tawe ma'ola'a inolaanna apan

ma'ola'a tuŕrangngu su pangangimanna sambau awono'anna wuŕru marosa. ¹⁴Ana waugu ia'u uaaukke ringannu Mawu Yesus, ne ia'u mangke mangngimanna manungku tawe saran sambau anna apan maarosa; arawe olangnge udde maarosa sangkatou taumata, amungkangngu taumata udde massunna manungku udde maarosa. ¹⁵Arawe amungkangngu ringannu apa apan aannanannu, sangkatou tuŕrangnga su pangangimanna sambau niapaasusa naungnge, ne tuŕrangnga tawe nappaamattu paddarame. Amungkangngu Kristus suete nate ana waugu sangkatou taumata, arie mamala n taumata udde maŕaŕeo ringannu apa iwabboonu. ¹⁶Ana waugu udde arie mamala n sarannapa apan mapia siamiu, sunnannu taumata waine laŕeo. ¹⁷Ana waugu amungkangngu Mawu Ruata mangatokku pabbawiakku sangkatou, apa apan wotongnge annananni tou ara'e inumanne, tawe tumani mahuuu. Ahunanne eteudde manungku taumata udde tuttuŕrutta apulu Mawu Ruata, maa-pendamma aŕaŕuassu naungnga wuŕru mannengkamma aŕaŕuassa apan nionggolu Ghaŕraho Mawu Ruata. ¹⁸Taumata apan mangngimbe Kristus olangnge aroddi, taumata udde maŕuassa naungngu Mawu Ruata, wuŕru aadatannu taumata waine.

¹⁹Ana waugu udde pandumanni ite ŕinone sidutu su manga inolaanna apan mandanta m paddarame wuŕru uatatuŕlungnga. ²⁰Ariewe, ana waugu hatto n anna, i'o manggohakku apa apan suete nimmanara Mawu Ruata. Aŕawo'u anna udde wotongnge iwo'o; arawe amungkangngu anna iwabboonu udde maarosa taumata waine, i'o nassaŕate. ²¹Mappianne ariete pa'inassa ŕemessa ara'e ma'inumma anggore ara'e ma'ola'a manga inolaanna, amungkangngu inolaanna udde maarosa tuŕrangngu apan su pangangimanna sambau. ²²Wala'e apa apan pangimanannu udde, olaanna su saruannu Mawu Ruata huŕanu sassane. Taumata apan tawe pinangiananne ipamendama pasasaŕa, su apa apan sassunnane naŕŕino taumata udde su laŕumanna'a. ²³Arawe taumata apan uapapaddua umanna, wua udde umanna anna udde, taumata udde iapaasaŕa Mawu Ruata; ana waugu taumata udde tawe tinumuŕrutta apulu naungnge su ola'u apa apan naŕŕino wuŕru apan nassaŕa. Wuŕru manga aŕawo'u inolaanna apan niola'a tawe ringannu pangangimanna eteudde rosa.

Paaŕuassa'a taumata waine, arie tumba'u ririnu sassane

15 Iite apan atonna-tonna pia antimma su pangangimanni ite, ŕinone masabare su aŕawo'u wisara n taumata apan lome pangangimanne. Ariewe iite tumba'u maapulu malluassa watanganni ite sassane.

²Arawe iite sambau-sambau řinone malluassa naungngu turřrangngi ite su apapiane, tadea'u pangngangimanne aatambanna atohanne. ³Ana waugu Kristus lai tawe marřingiddu ařařuassu riri-Ne sassane. Sulařummu Wuke Susi uaworřetta arendi, "Ařawo'u ařuandaga apan ni-pangaluandaga si'o, narřia'e Sia'u." ⁴Sarangkanambone apan naworřette sulařummu Wuke Susi udde ipannantiro siite. Ana waugu ařařa'a apan nisengkammi ite wuassu Wuke Susi mammařu siite maola'a masabare wuřru matohassa na'oma n sara iite wotongnge mangngantimma Mawu Ruata. ⁵Sařandeanna su Mawu Ruata apan mangonggolu asabare wuřru lařimbata su taumata, mantuřungngi amiu mabbiakka su paa'aukka tumuřrutu tuřada n Kristus Yesus. ⁶Ringannu naungnga sambau turřrangnga sarangkanambone wotongnge maddalo Mawu Ruata, Ia-mangngu Mawu ng kite Yesus Kristus.

Watti'u Ařařuassa su manga pabbawalaga apan wařine Yahudi

⁷Ana waugu udde řinone manga turřrangnga uararingikka sangkatou ringannu waine ringannu naungnga mařuassa, ere lai Kristus nanařoho siamiu ipaddalo Mawu Ruata. ⁸Ana waugu, paanaunge, manungku Kristus suete nangimbe taumata n Yahudi tadea'u mapaařiatta'a manungku Mawu Ruata atonna mannuungngu paaire-Ne su iupungngu ařamona ng kite. ⁹Mawu Yesus lai na'ola'a manga pabbawalaga waine mammantuga Mawu Ruata ana waugu apapia naungnge simangitou. Sulařummu Wuke Susi uaworřetta arendi,

"Ana waugu udde ia'u maddalo Si'o su wallattu manga pabbawalaga, ia'u sarun mangantari aantari n daralo ipaddalo aran-Nu."

¹⁰Pia lai uaworřetta arendi,

"Lalluasse suadio'a ringannu ařařana'u Mawu Ruata apan napile, ei manga pabbawalaga!"

¹¹Wuřru indi lai,

"Paddalote Mawu Ruata, ei anambo n pabbawalaga, řinone anambo n taumata maddalo Sitou!"

¹²Wuřru indi lai apan niwařo n Yesaya,

"Wuassu papapulunni Isai sarun rumanta sangkatou taumata apan sarun mamarenta manga pabbawalaga; wuřru ete Sitou manga pabbawalaga udde sarun mangantimma."

¹³Ete Mawu Ruata apan pangngantimanni amiu. Sařandeanna Itou mallořo naungngu ringannu ařařuassa wuřru paddarame ana waugu iamiu mangngimanna Sitou, tadea'u ringannu tarřino n Gharřaho Mawu Ruata iamiu lembo mangngantimma Mawu Ruata.

Anio Paulus namorretti suratta ringannu marraigissa

¹⁴Manga tuffangu! Ia'u mangngimanna manungku manambo atonna apapia siamiu. Iamiu lai masingkatu sarangkanambone wufu wotongnge lai mangarra'a sandingananna. ¹⁵Arawe su ola'u manga inolaanna apan suete nitantunna, ia'u mapaanaungnga siamiu ringannu atonna sulaumu suratta indi, ana waugu Mawu Ruata suete nangong-golu manara udde sia'u. ¹⁶Itou suete na'ola'a sia'u mangangimbe n Kristus Yesus tadea'u irolokka su manga pabbawalaga apan wafine Yahudi. Wufu ia'u naola'a sangkatou imam, apan mammasingkattu Wattiu Alaluassa wuassu Mawu Ruata, tadea'u manga taumata apan wafine Yahudi maola'a sambau sasamba su Mawu Ruata apan wotongnge sengkamanni Tou. Doronganna Gharraho Mawu Ruata ma'ola'a simangitou sambau sasamba apan apianne su Mawu Ruata sassane. ¹⁷Nariaddi, ana waugu ia'u suete naaukka ringanni Kristus Yesus, ne ia'u wotongnete lumuassu manara'u indi su Mawu Ruata. ¹⁸Ia'u wafani mabbisara aroddi tumba'u su ola'u apa apan suete niola'i Kristus sia'u ipa'ola'a manga taumata wafine Yahudi tuttuffutta Mawu Ruata. Ia'u mammanara udde ringannu manga wisara ara'e lai ringannu manga inolaanna see lai palalagu, ¹⁹wufu manga alarindu'a wufu manga inolaanna apan wahe-walla; sarangkanambone udde wuassu taffino n Gharraho Mawu Ruata. Wattiu Alaluassa su ola'u Mawu Yesus suete ta'u niapaasingkatta su anambo n taumata, nanattaka wuassu Yerusalem na'oma n sara watukku Ilirikum. ²⁰Apulu'u eteudde mamasinkatu Wattiu Alaluassa wuassu Mawu Ruata su manga tampa suapa n taumata taambe naaringikka si Kristus. Ana waugu ia'u maddiri mapararisikku manara su rapappake apan niaddo n taumata waine. ²¹Sulaumu Wuke Susi uaworretta,

"Manga taumata apan taambe naaringikka wattia su ola'i Tou, sarun maasilo;

wufu imangitou apan taambe naaringikka, sarun maasunna."

Pandumanni Paulus inai watukku Roma

²²Ana waugu udde, ia'u masokkate aalibatanna inai mattembo siamiu. ²³Arawe orassa indi manara'u su wageanggu manga wageangu leta'a udde nasuete. Pirate tonna nangkaliu ia'u maapulu mattembo siamiu. ²⁴Parrangatte amungkanggu ia'u sumabbi soa atata-naannu sulaumu amatanku watukku Spanyol, ia'u mangantimma wotongnge maissomba ng kami wufu lumuassa tala ng kadio'a ringanni amiu. Wua udde ia'u mangantimma iamiu wotongnge mal-

laḷima sia'u su amatanku watukku Spanyol udde. ²⁵Arawe orassa indi ia'u maapulu inai watukku Yerusalem mangapiddu sasumbala su jamaattu Mawu Ruata poiarddi. ²⁶Ana waugu manga jamaatta su Makedonia wuṛru Akhaya maapulute mangonggolu sasumbala su manga tuṛrangnga apan asiangnga su wallattu jamaattu Mawu Ruata su Yerusalem. ²⁷Ringannu naungnga maḷuassa imangitou nakkawessa ma'ola'a udde. Atonna ṛinone imangitou mantuḷungngu manga tuṛrangnga apan asiangnga su Yerusalem; ana waugu wuassu manga taumata n Yahudi udde, manga taumata waḷine Yahudi suete nanengkamma aḷamatta wuassu Mawu Ruata. Nariaddi manga taumata waḷine Yahudi ṛinone lai mantuḷungngu taumata n Yahudi ringannu manga aḷamatta ere manga darotongnga. ²⁸Amungskangngu ia'u suete nanginsue manara'u indi, wuṛru manantilla simangitou apan uatana'a su Yerusalem sasumbala apan suete niammulla udde, ne ia'u inai watukku Spanyol sumabbi soa atatanaannu. ²⁹Amungskangngu ia'u rumanta ringannu, sulaḷummete ia'u rumanta mangapiddu manambo aḷamatta wuassi Kristus siamiu.

³⁰Ringannu arannu Mawu ng kite Yesus Kristus, wuṛru ringannu darangngu apan nionggolu Ghaṛraho Mawu Ruata, ia'u sumaḷande siamiu, doronganna iamui suadio'a u'aḷiomanna su Mawu Ruata huna manara'u. ³¹Aaḷiomante tadea'u Mawu Ruata mamallossu riri'u wuassu lima manga taumata apan tawe mangngimanna su Yudea, wuṛru tadea'u manara'u ipangapiddu sasumbala watukku Yerusalem itarimatu aḷaṛṛana'u Mawu Ruata ringannu naungnga maḷuassa poiarddi. ³²Ringannu aroddi, amungskangngu Mawu Ruata maapulu, ia'u wotongnge rumanta ringanni amui, ringannu naungnga maḷuassa. Wuṛru ia'u wotongnge maapendama aḷaḷuassu naungnga su pattangnganni amui. ³³Antimanna Mawu Ruata, apan nangonggolu paddarame su taumata, uatana'a ringanni amui sarangkanambone. Amin.

Tabea wuassia'u sassane

16 Ia'u maapulu mamasingkatta siamiu su ola'u tuṛrangngi ite, Febe. Itou massumbala jamaatta su Kengkrea. ²Tarimmata'e itou ere sangkatou wuassu jamaattu Mawu. Ne aroddite manga taumata apan mangngimanna Mawu Ruata ṛinone uatatarimmata sangkatou ringannu sangkatou. Tuḷungaawe itou, amungskangngu itou mappandumma sasumbala wuassi amui, ana waugu itou sassane suete nangonggolu sumbala su taumata nambo – nareengnga lai ia'u.

³Waḷoa'a tabea'u si Priskila wuṛru si Akwila, manga hawe'u apan suadio'a mammanara manara n Kristus Yesus. ⁴Imangitou maranite mate, ana waugu maapulu manaḷamatta sia'u. Ia'u maadiangkamanna

simangitou – wuṛṛu waḷine tumba'u ia'u, arawe anambo n jamaatta wuassu pabbawalaga waine apan waḷine Yahudi lai maadiangkamanna simangitou. ⁵Waḷoa'a lai tabea'u su jamaatta apan uasemodda su waḷe mangitou.

Tabea si Epenetus apan aranguanguku. Ete itou taumata apan paarorone nangimanna si Kristus su leta'u Asia. ⁶Tabea'u lai si Maria. Itou suete nammanara maṛṛimada ana waugu iamiu. ⁷Waḷoa'a lai tabea'u si Andronikus wuṛṛu si Yunias. Itarua wuṛṛu ia'u papapulunnu sangkatou wuṛṛu iami suete niṛṛuumanna su sampunna. Tantaḷanna ia'u taambe nangimanna si Kristus, imangitou doronete nangimanna. Imangitou tinumelengnga su wallattu manga rasul.

⁸Tabea si Ampliatus, aranguanguku, ana waugu itou susampunna ringanguku su sambau ringannu Mawu Ruata. ⁹Waḷoa'a tabea'u si Urbanus, hawe ng kite apan mammanara su sampunna ringanni ite ana waugu Kristus. Wuṛṛu tabea'u lai si Stakhis apan aranguanguku. ¹⁰Tabea'u si Apeles, Tatuṛṛunne si Kristus niatialante. Tabea lai su laḷorṛo m baḷe Aristobulus, ¹¹wuṛṛu si Herodion. Iambua pabbawalaga sambau. Aroddi lai tabea'u su manga tuṛṛangnga pangangimanna sambau su waḷe Narkisus.

¹²Tabea'u si Trifena wuṛṛu si Trifosa apan mammanara maṛṛimadda mangngimbe Mawu, wuṛṛu si Persis apan aranguanguku. Itou lai suete nammanara maṛṛimadda manara Mawu. ¹³Tabea si Rufus wuṛṛu inangngene, apan iwaratta sia'u ere inangu sassane. Eteudde Rufus taumata nipile Mawu wuṛṛu raddaloanna. ¹⁴Waḷoa'a lai tabea'u si Asinkritus, Flegon, Hermes, Patrobas, Hermas wuṛṛu tuṛṛangnga sarangkanambone apan pangangimanna sambau ringanni mangitou. ¹⁵Tabea si Filologus wuṛṛu Yulia; si Nereus wuṛṛu tuṛṛangnge wawine; si Olimp as wuṛṛu anambo n taumata mangngimanna suadio'a ringanni mangitou.

¹⁶Patatabeate ringannu uararangngu su pasasangkatuṛṛangannu taumata n Saṛṛani. Anambo n jamaatti Kristus nananata n tabea mangitou su manga tuṛṛangnga.

Tatantiro panginsueanne

¹⁷Manga tuṛṛangnga! Ia'u sumaḷande ringannu lembone: Paatehamma su saruannu manga taumata apan ma'ola'a patatatiakka wuṛṛu mannongkakku pangangimannu taumata su Mawu. Olangnge udde uapapaṛṛala apa apan suete niarṛa'a siamiu. Arie paggawei taumata ereudde. ¹⁸Ana waugu manga taumata inolaanne aroddi, waḷinewe mammanara manara n Kristus Mawu ng kite, ewe'e tumba'u map-paaluassu apulu naungngi mangitou sassane. Ringannu sasaḷo'a wuṛṛu

manga wisara apan mapia, imangitou mammahia manga taumata apan wagga ng apa-apa. ¹⁹Anambo n taumata naasingkate manungku iamiu maturruta su alarra'u Watti'u Alaluassa wuassu Mawu Ruata. Wurru ia'u maluassa su inolaanni amiu udde. Ia'u maapulu tadea'u iamiu pande su inolaanna apan mapia, wurru longonna su inolaanna apan laleo. ²⁰Mawu Ruata apan nangonggolu paddarame su taumata, malihakke mandolokku Setanna massurubawa su tarinonu wurru marrimunsa'a sitou.

Antimanna manga turangnga sidutu alamatanni Yesus Kristus Mawu ng kite!

²¹Timotius, hawe'u nabbaŋo n tabeane siamiu. Aroddi lai Lukius, Yason wurru Sosipater, iami indi pabbawalaga sambau.

²²Namorrettu suratta indi eteudde ia'u, Tertius. Ia'u nabbaŋo n tabea m pasasangkaturangnga siamiu.

²³Gayus napaapiddu n tabea lai siamiu. Ia'u uatana'a su walene wurru jamaatti ami lai mattaramawu isudde. Erastus, tembonannu mananahipunna roittu soa, napaapiddu tabeane lai siamiu. Aroddi lai turangngi ite Kwartus.

[²⁴Antimanna Mawu ng kite Yesus Kristus mangalamatta turangnga sarangkanambone. Amin.]

Pangudusannu suratta

²⁵Daralo su Mawu Ruata! Itou uatarino mannohassa pangangimannu turangnga nassulunggu Watti'u Alaluassa wuassu Mawu Ruata apan ta'u iapaasingkatta su ola'u Yesus Kristus. Ia'u namasingkatu watti'a udde nassulunggu ere apa apan niapaaliatta'u Mawu Ruata; eteudde su ola'u paa'apulu Mawu Ruata apan malannute awaganannu taumata. ²⁶Arawe orassa indi, wuassu darolokku Mawu Ruata sassane, pandumanne udde suete niapaaliatta'a wurru niapasingkata su anambo n pabbawalaga ere suete niworrettu manga nabi, tadea'u imangitou sarangkanambone mangngimanna wurru tumurrutta Mawu Ruata. ²⁷Ete Itou Mawu Ruata tinggassa, Itou lembo n apandeanne.

Antimanna Itou wantuhanna sarangka'engnge sulalummu Mawu Yesus Kristus! Amin.

Tabea ng kami,
Paulus, allangngi Kristus Yesus

SURATTI PAULUS PAARORONE SU JAMAATTU KORINTUS

WISARA TALAANE

Suratti Paulus Paarorone Su Jamaattu Korintus indi niwoŕŕetta ipanaŕa'a manga hatto apan nariaddi sulaŕummu jamaatta apan suete niaparari-sikki Paulus su Korintus. Eteudde manga hatto su ola'u pabbiaŕanna wuŕru pangangimannu taumata n Saŕrani. Tempo udde Korintus naola'a sambau soa su Yunani, soa niapangadoannu pamamarentannu Akhaya nasutta su wageangngu araratuannu Roma. Soa indi, manga tumanang-nge niappaammulaŕnu alaŕo'u pabbawalaga, tinumelengnga ana waugu mapia pabbawaŕu'annu sarannapa, addanne apan matanggakke, arawe lai pallaŕagune ta'e laŕeo wuŕru ana waugu isudde tumanite n manambo hati n agama.

Apan lembo n irarŕingiddi Rasul Paulus eteudde hatto su ola'u pattataŕei wuŕru alaŕeo sulaŕummu jamaatta, wuŕru su ola'u manga hatto apulu naungnga su wawine wuŕru paa'awingnga, hatto apendammu laŕoŕro naungnga, atoranna su jamaatta, manga aonggolu Ghaŕraho Mawu Ruata, wuŕru su ola'u pabbawangunnu taumata nate. Ringannu aellega apan malaŕumma, Paulus napaaljaŕta'a ereapa Watti'u Alaŕuassa wuassu Mawu Ruata udde mannemakka manga hatto.

Tatialeane 13 namasingkattu manga hatti n darangngu apan tutune. Tatialeane indi asinungka maola'a tatialeane lembo n apianne wuassu wallattu anambo n tatialeane waine su wuke indi.

Laŕoŕrone

Paarorone	1:1-9
Aula'ukka sulaŕummu ghaŕŕedda	1:10-4:21
Hatto apulu naungnga su wawine wuŕru mabbiakka sulaŕummu amonanna	5:1-7:40
Taumata n Saŕrani wuŕru taumata apan maddiri massubba Mawu Ruata	8:1-11:1

Pabbiaṛṛannu jamaatta wuṛṛu pattataṛṛamawu	11:2–14:40
Ola’u pabbawangunni Kristus wuṛṛu manga taumata n	
Saṛṛani wuassu papate	15:1-58
Sasumbala su manga taumata n Saṛṛani su Yudea	16:1-4
Manga hatto su wadangnga sassane wuṛṛu	
pangudusanne	16:5-24

1 ¹³Manga tuṛrangnga jamaattu Mawu Ruata su Korintus! Tuṛrangnga suete niwaggoannu Mawu Ruata maola'a aḷaṛṛanang-Nge ana waugu tuṛrangnga tatahuananni Kristus Yesus, su sampunna ringannu anambo n taumata su aḷawo'u tampa apan massubba Mawu ng kite Yesus Kristus, eteudde Mawu mangitou wuṛṛu Mawu ng kite lai. Ia'u, Paulus, wuṛṛu tuṛrangngi ite Sostenes, mangngantimma doronganna Mawu Ruata Iamangngi ite wuṛṛu Mawu Yesus Kristus mangonggolu aḷamatta wuṛṛu paddarama siamiu. Ia'u namoṛṛettu suratta indi ana waugu ia'u rasulli Kristus Yesus, apan suete nitenegu Mawu Ruata sassane wuṛṛu wuassu apulu-Ne sassane lai.

Manga aḷamattu Mawu Ruata sulaḷummi Yesus Kristus

⁴Ia'u sidutu maadiangkamanna su Mawu Ruata su ola'i amiu, ana waugu iamiu suete nanengkamma aḷamattu Mawu Ruata sulaḷummi Kristus Yesus. ⁵Ana waugu iamiu tatahuanante n Kristus, ne pabbiaṛṛanu naalate su aḷawo'u inolaanna. Asingkannu su ola'u aḷawo'u inolaanna udde tumanite malaḷumma, wuṛṛu iamiu masingkata mangarra'u apapandenu udde. ⁶Udde mapaḷiatta'a manungku watti'a su ola'i Kristus aroddite naḷinna sulaḷummu naungngu, ⁷na'oma n sara iamiu tawe atalannu aḷamatta, tantaḷanna iamiu uaraṛṛado Mawu ng kite Yesus Kristus rumanta wuṛṛu ellehannu anambo n taumata. ⁸Kristus sassane sarun mandiaga siamiu ma'oma n sara pangudusanne; tadea'u su tempo Itou rumanta apia, iamiu aratinganna tawe sangkule. ⁹Mawu Ruata mangke apangimananna atonna-tonna. Ete Itou Mawu Ruata apan namaggo siamiu maola'a sambau ringannu Anang-Nge, eteudde Yesus Kristus Mawu ng kite.

Paauḷa'ukka sulaḷummu jamaatta

¹⁰Manga tuṛrangnga! Sulaḷummu arannu Mawu ng kite Yesus Kristus, ia'u sumaḷande tadea'u iamiu sarangkanambone massampi-nunutanna; tadea'u arie pia paauḷa'ukka su wallatti amiu. ¹¹Ana waugu, manga taumata wuassu amonanni Kloē nangalae sia'u manungku pia pattatiakka su wallatti amiu. ¹²Pandumangu eteudde manungku su wallatti amiu piaddu mabbisara, "Ia'u tumantalongnga si Paulus," piaddu lai mabbisara, "Ia'u tumantalongnga si Apolos," waine lai mabbisara, "Ia'u tumantalongnga si Petrus," waine lai mabbisara, "Ia'u tumantalongnga Kristus." ¹³Mangalene Kristus natahia! Paulus tawe nate nia-

rusa ana waugu ami! Iamiu lai tawe nissarrani tadea'u maola'a mal-lalarrenggenni Paulus. Walinewe aroddi?

¹⁴Aadiangkamanna ia'u tawe nanarrani saran sangkatou wuassu wallatti ami, tumba'u Krispus wurru Gayus. ¹⁵Arie pia sangkatou mabbisara manungku ia'u suete nanarrani sitou see maola'a mallalarrenggengku. (¹⁶Ore, Stefanus wurru amonanne, atonna ia'u nanarrani simangitou. Arawe su liuddu udde, su anaungku tate lai taumata waine apan nissarrani'u.) ¹⁷Kristus nandolo'u waline iapasarrani taumata, ewe'e iapapasingkatu Watti'u Alaluassa wuassu Mawu Ruata; wurru udde lai sarun ta'u olaanna ringannu tawe mappaaattu apande mabbisara ere ola'u taumata, tadea'u tarfino wuassu papate ng Kristus su alu arussa maola'a pia gunane.

Tarfino wurru apande Mawu Ruata uarandangna si Kristus

¹⁸Ana waugu su taumata apan mattuda m papate, watti'a su ola'u papate ng Kristus su alu arussa naudde watti'a wahia. Arawe siite apan suete niapaasalamattu Mawu Ruata, watti'a udde maola'a lalannu Mawu Ruata mapaaljatta'u tarfino-Ne. ¹⁹Ana waugu sulalummu Wuke Susi, Mawu Ruata nabbisara,

"Apapande n taumata pia asingkanne sarun Ta'u isongkakka, wurru pasasunna manga taumata pia si'olane Ta'u iapaawuli."

²⁰Ne, apa hunane manga taumata pia asingkane udde? Apa hunane imangitou pia si'olane udde? Apa hunane marfarfingiddu runia indi? Mawu Ruata suete napaaljatta'a manungku apapande n runia indi mangke wahia wurru awusu atonna!

²¹Ana waugu salaiwe ereapa apande n taumata, itou tawe maaillaala Mawu Ruata wuassu apandene sassane. Arawe ana waugu Mawu Ruata lembo n pande, Itou wotongnge manalamatta manga taumata apan mangngimanna Sitou wuassu Watti'a apan suete niapaasingkati ami apan sassunannu runia indi awusu. ²²Taumata n Yahudi madorongnga alarfindu'a maola'a sambau tatiala, wurru taumata n Yunani tumba'u mappandumma apapande n runia indi. ²³Arawe iite tumba'u mabbatti'i Kristus apan nate niarussa. Watti'a udde lai mammasendeka naungngu taumata n Yahudi, wurru sassunannu manga taumata waline Yahudi udde awusu. Wurru taumata apan waline Yahudi massunna udde sambau awawoddo. ²⁴Arawe su taumata apan suete niwagoannu Mawu Ruata - mapia ete taumata n Yahudi ara'e waline Yahudi - watti'a udde maola'a lalannu Mawu Ruata mapaaljatta'u tarfino wurru apande-Ne. ²⁵Ana waugu aellehanna awawoddo su Mawu Ruata, arawe eteudde

manampaļu wuassu apapande n taumata; wuṛṛu aellehanna lome su Mawu Ruata, eteudde matohasanna wuassu atatohassu taumata.

Taṛṛino Mawu Ruata wuṛṛu aḷallome n taumata

²⁶Manga tuṛrangnga! Naunge'o ereapa ola'i amiu su tempo Mawu Ruata namaggo siamiu. Tumba'u adio'a wuassu wallatti amiu apan pande, ara'e pia taṛṛinone, ara'e pia manarane matanggakka tumuṛṛuttu aellegu taumata. ²⁷Ana waugu atonna Mawu Ruata namile taumata apan sassunnannu runia indi woddo, tadea'u manga taumata pande masili. Wuṛṛu Mawu Ruata lai namile taumata apan sassunannu runia indi lome, tadea'u manga taumata apan matohassa wuṛṛu waṛṛani, masili. ²⁸Mawu Ruata namile apa apan aellehanna mawawo, asiangnga, wuṛṛu lai sassunannu runia indi tawe gunane, tadea'u Mawu Ruata maṛṛimunsa'a apa apan aellehannu runia indi apianne. ²⁹Ringannu aroddi tawe saran sangkatou mamunga m watanganne su saruannu Mawu Ruata. ³⁰Ete Mawu Ruata sassane apan ma'ola'a si'o naaukka ringanni Kristus Yesus. Sulaḷummi Kristus iite niola'a pande. Wuṛṛu sulaḷummi Tou lai Mawu Ruata na'ola'a siite nassangkapia apia ringanni Tou, iite niola'a aḷaṛṛanang-Nge apan apianne, wuṛṛu napaaliu ng kite wuassu alaḷeo. ³¹Nariaddi ere uaworretta sulaḷummu Wuke Susi, "Taumata apan maapulu mamarabunga, ṛinone mammunga su inolaannu Mawu."

Watti'u papate Mawu Yesus su alu arussa

2 Manga tuṛrangnga! Su tempo ia'u nirumanta ringanni amiu wuṛṛu namasingkata siamiu su ola'u pandumannu Mawu Ruata apan taambe niasingkatannu runia, ia'u tawe mappaattu asingkattu runia indi ara'e nabbisara ringannu wisara sasaḷo'a. ²Ana waugu ia'u suete naddiandi, manungku su aḷo'engngu allo ia'u ta'e ringanni amiu, ia'u tawe bisarane apa-apa, tumba'u su ola'i Yesus Kristus; ahewaḷanne manungku Itou suete nate su alu arussa. ³Su tempo ia'u suadio'a ringanni amiu, ia'u lome wuṛṛu mangngindo n atata'utta. ⁴Watti'a apan ta'u niapaasingkata siamiu tawe ta'u niwatti'a ringannu aḷawo'u wisara apan ipammono'a tumuṛṛutta apande n taumata. Ia'u mabbatti'a udde ringannu laḷanna apan mappatiala manungku Ghaṛṛaho Mawu Ruata uataṛṛino. ⁵Ia'u na'ola'a aroddi, tadea'u pangangimannu si Kristus tawe pinangiananne wuassu apande n taumata, ewe'e pinangiananne wuassu taṛṛino Mawu Ruata.

Apapande Mawu Ruata

⁶Salaiwe aroddi, su wallattu manga taumata apan wiakku pangangimanne nalinte, atonna, ia'u nabbisara su ola'u apapande. Arawe apapande indi walineuwe apapande n runia, ara'e apapande manga tembonanne tempo indi, apan tarrinone sarun mawuli. ⁷Apapande apan ta'u iwaŋo udde eteudde apapande wuassu Mawu Ruata. Apapande udde awaganannu runia, arawe Mawu Ruata suete nanaddia laŋumanna'i ite ro'e n runia indi taambe niriaddi. ⁸Tawe saran sangkatou wuassu manga tembonannu tempo indi apan masingkatu apapande udde. Ana waugu amungkanngu imangitou masingkate, imangitou tawe nangarussa Mawu apan mawantuga udde. ⁹Arawe olangnge udde ere uaworretta sulaŋummu Wuke Susi,

"Apa apan taambe saran paassa niasiloanna ara'e niaringirranu taumata,

wurru tawe lai saran paassa nilumatto sulaŋummu ringirranu taumata,

eteudde apan nisaddia Mawu Ruata

su manga taumata apan mandangngu Sitou."

¹⁰Arawe Mawu Ruata suete napaaliatta'a siite sulaŋummu Gharraho-Ne. Gharraho Mawu Ruata udde mammarikissa sarangkanambone, na'oma n sara manga pandumannu Mawu Ruata apan uawuni. ¹¹Ana waugu masingkatu laŋorro naungngu sangkatou eteudde gharraho n taumata udde sassane, are? Aroddi lai ola'u Mawu Ruata. Apan masingkattu laŋorro naungngu Mawu Ruata tumba'u Gharraho Mawu Ruata sassane! ¹²Wurru iite tawe nionggolannu gharraho n runia indi, ewe'e Gharraho wuassu Mawu Ruata, tadea'u iite masingkattu sarangkanambone apan suete nionggolu Mawu Ruata siite.

¹³Ana waugu udde amungkanngu iami mannaŋa'a manga inolaannu Mawu Ruata su manga taumata apan pia Gharraho Mawu Ruata, iami maddiri mamasingkata tumurruttu apapande n taumata, ewe'e tumurruttu alaŋra'u Gharraho Mawu Ruata. ¹⁴Taumata apan tawe uatahuanna Gharraho Mawu Ruata, tawe maasengkama apa apan niapaaliatta'u Gharraho udde. Ana waugu su taumata udde inolaanne naola'a sambau awawoddo. Taumata udde tawe maasunna, ana waugu inolaanne udde tumba'u wotongnge ellehannu pangangimanna. ¹⁵Taumata apan uatahuanna Gharraho Mawu Ruata wotongnge maatiala alaŋo'u inolaanna, arawe tawe saran sangkatou wotongnge maatiala Sitou. ¹⁶Sulaŋummu Wuke Susi uaworretta,

"Isai massingkatu řingirřannu Mawu?

wurřu isai wotongnge mangalařra'a Sitou?"

Ete iite apan uatahuanna řingirřanna apan uasulungngi Kristus!

Manga mangangimbe Mawu Ruata

3 Manga turřangnga, ia'u tawe su řinone maggahatto ng kamiu ere taumata uatahuanna Gharřaho Mawu Ruata. Ia'u tumba'u wotongnge maggahatto ng kamiu ere taumata apan ta'e mabbiakka tumurřuttu apulu n dunia; ere manga taumata apan ta'e ere ana'a maraddio'a sulařummu pangangimanne si Kristus. ²Dorone ia'u tumba'u wotongnge mangonggola siamiu pabbawiakku ana'a maradio'a, wařine pabbawiakku taumata timmaddete; ana waugu iamiu ta'e lome su pangangimanna. Arawe orassa indi lai iamiu ta'e lome su olangnge udde, ³ana waugu iamiu ta'e mabbiakka tumurřuttu pallařagu n taumata. Ana waugu amungkangngu iamiu ta'e uasasihikka wurřu uawawuřo sangkatou ringannu waine, wařinewe udde mapaaliatta'a manungku iamiu ta'e pia pallařagu manga taumata apan tawe maaillařa Mawu Ruata? ⁴Amungkangngu piaddu mabbisara, "Iami tumantalongnga si Paulus," wurřu waine lai mabbisara, "Ia'u tumantalongnga si Apolos," wařinewe udde mapaaliatta'a manungku iamiu ta'e pia pallařagu n taumata n dunia?

⁵Su řinone isai Apolos udde? Wurřu isai Paulus? Iami tumba'u mangangimbe Mawu Ruata, apan suete nangehetta siamiu see mangngimanna si Kristus. Iami tumba'u mappamattu manara apan nirolokku Mawu siami sangkatou-sangkatou. ⁶Ia'u massuanna wurřu Apolos mamamokkane, arawe Mawu Ruata sassane apan mamaduři sasuanna udde. ⁷Nariaddi ahunanne eteudde Mawu Ruata, ana waugu ete Itou mamaduřine. Iapa massuanna wurřu mamamokkane tawe tumanite n mahuna; ⁸itarua uassulungnga. Sangkatou-sangkatou sarun manengkamma lařantake tumurřuttu inasaharanne. ⁹Ete iami udde manga taumata apan mammanara suadio'a manara Mawu Ruata; wurřu eteudde iamiu waillu Mawu Ruata.

Manga turřangnga naola'a lai Waře Mawu Ruata. ¹⁰Ringannu apapande apan nionggolu Mawu Ruata, ia'u ere sangkatou tařra ola'a waře suete nangaddo n rapappaku waře udde, wurřu taumata waine mapararisikku waře so wowo n rapappake udde. Suapa n taumata řinone manutukka mapia-pia ereapa itou mapararisikka su rapappake udde. ¹¹Ana waugu Mawu Ruata sassane suete nangaddo n Yesus Kristus maola'a ere rapappaku waře udde; tawe rapappake apan waine. ¹²Piaddu mappararisikka su rapappake udde ringannu map-

paattu wuławanna, piaddu mappaattu sała'a, piaddu mappaattu per-mata, piaddu mappaattu alu, radduutta mamara ara'e laŕrami. ¹³Manara n sangkatou-sangkatou sarun asiloanna su tempo Kristus rumanta apia. Ana waugu su allo udde putungnga sarun manemakka manara n sangkatou-sangkatou see asiloanna. Putungnga sarun manalu'atta wuŕru manantunnu apapia n manara udde. ¹⁴Amungskangngu waŕe apan nia-pararisikku taumata su wowo n rapappake udde maŕannu matutungnga, taumata udde sarun manengkamma laŕantake. ¹⁵Arawe amungskangngu manara n taumata udde matutungnga, itou sarun marugi; itou sassane sarun masaŕamatta, arawe naaŕihida ere taumata apan naŕiu wuassu renggamu putungnga.

¹⁶Masingkatawe tuŕrangnga manungku eteudde iamiu Waŕe Mawu Ruata? Wuŕru manungku Ghaŕraho Mawu Ruata uatana'a sulaŕummi amiu? ¹⁷Amungskangngu pia taumata manggohakku Waŕe Mawu Ruata, Mawu Ruata lai sarun manggohakku taumata udde. Ana waugu Waŕe Mawu Ruata udde tumba'u hunane su Mawu Ruata sassane, wuŕru ete-udde iamiu Waŕe-Ne.

¹⁸Imbaŕrangnga piaddu sangkatou mamahia watanganne sassane. Amungskangngu pia taumata su wallatti amiu mammendama watanganne pande tumuŕruttu aulaaunu runia indi, taumata udde mabbali woddo, ta-dea'u itou atonna-tonna mabbali pande. ¹⁹Ana waugu apan sassunnannu runia pande, udde awawoddo su aellegu Mawu Ruata. Sulaŕummu Wuke Susi uawoŕretta, "Mawu Ruata mapaasala manga taumata pande sulaŕummu asingkati mangitou sassane." ²⁰Pia lai uawoŕretta arendi, "Mawu masingkata manungku ŕingirannu manga taumata pande uddewe ŕingiranna apan tawe gunane." ²¹Ana waugu udde, imbaŕrangnga piaddu sangkatou maddalo taumata, ana waugu sarangkanambone suete niong-gola maola'a pussaanu; ²²Paulus, Apolos, Petrus, runia indi, mabbiaakka wuŕru mate, tempo indi ara'e tempo apan sarun rumanta, sarangkanam-bone udde tatahuanannu. ²³Wuŕru iamiu udde tatahuanni Kristus, wuŕru Kristus tatahuannannu Mawu Ruata.

Manga rasulli Kristus

4 Ellehete iamii indi mangangimbe n Kristus, apan uapasanna ma-nara mabbatti'u manga pandumannu Mawu Ruata apan taambe nia-singkatannu runia. ²Paarorone apan řaddeaanu wuassu mangangimbe aroddi, eteudde manungku itou matuŕruta mawune. ³Mawala sia'u tawe maola'a hatto siamii – ara'e isai lai – apan maŕringidda su ola'u watangangu sassane. Ewe'e apa apan ta'u iraŕringidda su ola'u wa-tangangu sassane tawe maola'a hatto. ⁴Ia'u tawe maapendama nassala

sulaḷummu manga hatto, arawe udde waḷine tatialane manungku ia'u narṛinote. Mawu sassane manantungku ia'u nassaḷa ara'e tawe. ⁵Ana waugu udde, amungkangu taambe tempone, arie iamiu maḷiha-ḷihakka manantunna manungku sangkatou nassaḷa ara'e tawe. Paṛṛadote Mawu Ruata rumanta. Ete Itou sarun mamu'a aḷawo'u addapingnga apan ua-wuni sulaḷummu ararandumma. Ete Itou apan mamongkakku anambo n pandumanna apan uawuni sulaḷummu naungngu taumata. Su tempo udde suapa n taumata wakkute udde maasengkamma daralo wuassu Mawu Ruata apan wotongnge sengkamanni tou.

⁶Manga tuṛrangnga! Tadea'u mahuna manaranu, ia'u suete nap-paattu sarangkanambone udde si Apolos wuṛṛu su riri'u sassane. Pandumanne tadea'u wuassu tatulada ng kami udde iamiu wotongnge mangurumma apa atappasannu sasanato'a, "Pangagase su atoranna apan piate." Ringannu aroddi tawe saran sangkatou wuassi amiu wotongnge mapaatelengngu sangkatou taumata, see mangngadio'a taumata waine. ⁷Isai apan na'ola'a si'o nangillembu wuassu taumata waine? Waḷinewe sarangkanambone sinengkammu wuassu Mawu Ruata? Nariaddi, anio i'o mapaatelengngu watangannu, paṛṛimaunnapa apa apan tatahuanannu udde waḷine sambau apan nionggola? ⁸Atonna iamiu maddirite mapandumma manga sarannapa lai! Iamiu naalate! Iamiu naola'e ratu, wuṛṛu iami tawe. Apiawe eteapa amungkangngu iamiu atonna-tonna naola'e ratu, tadea'u iami wotongnge mamarenta su sambau ringanni amiu. ⁹Ana waugu tumuṛṛuttu addapa'u, iami manga rasul, suete niola'u Mawu Ruata ere apa wabbialanna su saruannu taumata wuṛṛu manga mala'ekatta. Iami naaḷihida ere taumata laḷeo apan niṛṛuumanna na'oma n sara mate su saruannu awadaalla wuṛṛu aalṛuandahannu runia. ¹⁰Ana waugu Kristus, ete iami indi taumata woddo, wuṛṛu iamiu taumata n Saṛṛani apan pande! Iami lome, iamiu matohassa, iami aalṛuandahanna, wuṛṛu iamiu raddaloanna! ¹¹Na'oma n sara orassa indi iami uatataṛrangga lunussa, wuṛṛu ararou; laubbi ami ete indi ualṛṛe; taumata mangke mannansara siami; iami tawe tampa atanaanna, ¹²iami mammanara maṛṛimadda tadea'u maasomba anna. Amungkangngu iami wontohanna, iami mabbalṛissu aḷamatta; amungkangngu iami pateanna, iami masabbare; ¹³amungkangngu taumata ma'umbilangngi ami, iami mabbalṛissu wisara apan maalṛuassa. Iami tawe nangillembu wuassu sapaddu runia indi; na'oma n sara orassa indi iami ta'e aellehanna ere sapaddu runia.

¹⁴Ia'u namoṛṛettu indi siamiu, waḷinewe pandumanne ipammansili siamiu, ewe'e ipannantiro siamiu ere aḷaṛṛana'u sassane. ¹⁵Ana waugu ete ia'u naola'a iamangngi amiu, salaiwe asinungka ere taumata n Saṛṛani, iamiu uatahuante mapuḷo riwu su atoune huru. Sulaḷummu wiakku ere manga taumata apan uauukka ringanni Kristus, ia'u naola'a

iamangngi amiu, ana waugu ete ia'u nangapiddu Watti'u Aļaļuassa siamiu su ola'i Kristus. ¹⁶Ana waugu udde ia'u sumaļande siamiu tadea'u iamiu mattanno tulada'u. ¹⁷Ana waugu udde ia'u suete nando-lokki Timotius ringanni amiu. Sangkatou mallaļarřenggeni Kristus, itou naalihida ere ana'u sassane apan aranguanna. Itou ana'a apan wotongge apangimananna. Itou sarun mapaanaungnga siamiu su ola'u laļannu pabbiarřanna apan a'olaanku, napawe ia'u mangngimante si Kristus, eteudde laļannu pabbiarřanna apan iaarřa'a su jamaatta su anambo n tampa.

¹⁸Sire pira taumata wuassu wallatti amiu namungate, ana waugu imangitou massunna ia'u tate rumanta ringanni amiu. ¹⁹Arawe amungkangu Mawu mamala'u, tate maļannu lai ia'u rumanta ringanni amiu. Su tempo udde lai ia'u sarun maasilo apa apan a'olaannu taumata mawunga udde; waļine tumba'u wisara mangitou sassane. ²⁰Ana waugu amungkangu Mawu Ruata mamarenta pabbiarřannu sangkatou taumata, olangge udde aatialanna wuassu atatoħassu pabbiarřannu taumata udde, waļine ana waugu manga wisarane. ²¹Nariaddi pamilete apa ipaapulu ng kamiu! Apa iamiu maapulu ia'u rumanta mangařřa'a ringannu mařřagissa ara'e ia'u rumanta mangařřa'a ringannu masi'ome wuřřu marangngu?

Sandaga sulaļummu jamaatta

5 Ia'u atonna suete naaringikka alae manungku su wallatti amiu pia pallaļagu sussandaga apan nipangillembu; Piaddu su wallatti amiu apan sinumandaga ringannu uatangge. Manga taumata apan wagga ma'illaļa Mawu lai maddiri ma'ola'a pallaļagu udde! ²Salaiwe aroddi, i'o ta'e matanggakka. Arawe řinone iamiu masusa wuřřu mapaasabangngu taumata ma'ola'a inolaanna ereudde wua dinganni amiu. ³⁻⁴Ere su wadangnga, ia'u marau wuassi amiu, arawe sulaļummu naungnga ia'u uatana'a su wallatti amiu. Nariaddi ia'u ma'ola'a udde ere lai ia'u su wallatti amiu, "Sulaļummu arannu Mawu Yesus Kristus, ia'u mabbaļo manungku taumata apan suete na'ola'a inolaanna apan laļeo udde, řinone iřřuumanna!" Amungkangu iamiu maammula olaawe ere ia'u lai suadio'a ringanni amiu, wuřřu ringannu tařřino Mawu ng kite Yesus, ⁵iamiu řinone manantillu taumata udde su Setanna, tadea'u wadangngu taumata udde mawinasa wuřřu ringannu aroddi ghařřahone iapaasaļamatta su tempo Mawu rumanta apia.

⁶Tawe su řinone iamiu mamunga. Asinungka iamiu naasingkate sanato'a indi, "Ragi apan adio'a ma'ola'a aompengu taponna tumuwo!" ⁷Rammea'a asuene ragi tabbe udde, eteudde ragi m paddarosa, tadea'u

iamiu maola'a ere ompengu taponna apan wakku, waresi wuassu ragi m paddarosa apan tabbe, wuṛṛu ia'u masingkata manungku iamiu atonna aroddi. Ana waugu, ramea m Paskah ng kite nasaddiate, ana waugu Kristus apan naola'a ere domba m Paskah ng kite suete niola'a sasamba. ⁸Nariaddi, wette iite mapaawantugu andeangngi ite udde ringannu roti apan tawe ragine, eteudde roti apan naola'a sasumandingngu awawaresi, wuṛṛu aḷawo'u apulu Mawu Ruata. Arie iite mallaghu andeangngu Paskah udde ringannu roti apan pia ragine tabbe, eteudde ragi m paddarosa wuṛṛu aḷaleo.

⁹Sulaḷummu sura'u apan naḷiu, ia'u namasingkatta siamiu tadea'u iamiu tawe maggawe n taumata masandaga. ¹⁰Pandumangku waḷinewe taumata masandaga ara'e waḷiu, ara'e taṛṛa wahia ara'e masasubba paaḷuanna apan tawe maaillaḷa Mawu Ruata. Waḷine! Pandumangku tawe imangitou; ana waugu amungkangngu iamiu mangindau mangitou, ne ṛinone iamiu sumabangnga atonna-tonna wuassu runia indi. ¹¹Pandumangku eteudde, manungku iamiu arie paggawe n taumata apan mangnga'u watanganne taumata n Saṛrani, arawe taumata udde masandaga, ara'e waḷiu, ara'e massubba paaḷuanna, ara'e taṛṛa umbilangngu taumata waine, ara'e taṛṛa wu'anna, ara'e taṛṛa ta'o. Uma'ianna umanna ringannu taumata udde arie lai!

¹²⁻¹³Atonna mammarikissa manga taumata waḷine Saṛrani, waḷinewe manara'u. Mawu Ruata sassane apan mammarikissa simangitou. Arawe su ola'u manga laḷoṛṛo n jamaannu, waḷinewe iamiu sassane apan ṛinone mammarikissa simangitou? Sulaḷummu Wuke Susi uawoṛṛetta, "Limbuarṛewe taumata laḷeo wuassu wallatti amiu."

Mangngalae n tuṛrangnga su mallarṛuungnga

6 Anio su wallatti amiu piaddu waṛrani inai ringannu mallarṛuungnga apan wagga Mawu Ruata, inai mangalae n tuṛrangngu apan sambau sulaḷummu pangangimanna, amungkangngu itou uawawuḷo n tuṛrangnge udde? Anio itou tawe madorongnga aḷarṛana'u Mawu Ruata manginsue hatto udde? ²Apa iamiu wagga manungku aḷarṛana'u Mawu Ruata sarun mammarikissa runia indi? Nariaddi, amungkangngu atonna iamiu mammarikissa runia indi, apa iamiu tawe maapanginsue manga hatto mallarṛuungnga apan tawe gunane? ³Apa iamiu wagga manungku iite sarun mammarikissa manga mala'ekatta? Nangillembo lai su ola'u manga hatto m pabbiaṛanna su miallo-miallo! ⁴Napawe amungkangngu nilumapputa manga hatto ereudde, apa iamiu mangalae su manga taumata apan tawe manarane sulaḷummu jamaatta? ⁵Tumanite maa-sili! Asinungka su wallatti amiu pia sangkatou pande apan wotong-

nge manginsue pattatiakka su wallattu manga tuṛrangnga apan rundussa Saṛrani! ⁶Arawe anio sangkatou taumata n Saṛrani inai ringannu taumata waḷine Saṛrani mangalae m pabbawawuḷone ringannu tuṛrangnge Saṛrani lai!

⁷Arie inai maggahato n taumata apan waḷine Saṛrani; su ola'u pattatiakka su wallatti amiu udde naola'e sambau aḷallome siamiu. Mappianne iamiu woddoanna, ara'e ruggianna! ⁸Arawe ete iamiu sassane apan na'ola'a taumata waine ringannu tawe su ṛinone. Iamiu sassane lai mandugi taumata waine. Wuṛru udde niola'i amiu su manga tuṛrangnga apan sambau sulalummu pangngimanna. ⁹Massingkate iamiu manungku manga taumata apan tawe tumuṛrutta apulu Mawu Ruata, tawe maola'a aḷaṛrana'u Mawu Ruata? Arie aawusuanna! Manga taumata apan sussandaga, manga taumata apan massubba paaḷuanna, apan mannalangnga wawine, apan ma'ola'a inolaanna apan maasili su sansuḷungnge, ¹⁰apan manna'o, apan waḷiu, apan taṛra wu'anna, apan taṛra umbilangngu taumata waine, wuṛru taṛra ḷinga taumata waine – anambo n taumata ereudde, tawe maola'a aḷaṛrana'u Mawu Ruata. ¹¹Sire pira su wallatti amiu dorone pia pallaḷagune ereudde. Arawe orassa indi iamiu niapaaliatta'a waresi wuassu rosa. Iamiu naola'e pussa'a Mawu Ruata sassane. Iamiu nabelengke apia ringannu Mawu Ruata, ana waugu iamiu mangngimanna Mawu Yesus Kristus, wuṛru ana waugu taṛrino n Ghaṛraho wuassu Mawu Ruata ng kite.

Paata'e watangannu ipamantuga Mawu Ruata

¹²Piaddu mabbisara manungku suapa n taumata wotongnge ma'ola'a aḷawo'u inolaanna. Arawe mawala sia'u tawe sarangkanambone udde pia gunane. Nariaddi salaiwe ia'u wotongnge ma'ola'a aḷawo'u inolaanna, arawe ia'u maddiri mapaawala n watangangu paparentannu aḷawo'u inolaanna. ¹³Piaddu lai mabbisara manungku anna tumba'u hunane su tianna, wuṛru tianna nissaddia pangadoannu anna. Arawe itarua udde tawe ipaattu Mawu Ruata. Wadangngu taumata tawe wotongnge ipaatta ipa'ola'a sandaga, ewe'e tumba'u hunane ipamantuga Mawu Ruata. Wuṛru Mawu sarun mappaduḷi wadangnga udde. ¹⁴Mawu Ruata suete napaawiakku Mawu Yesus wuassu papate, aroddi lai Mawu Ruata sarun mapaawiakki ite ringannu taṛrino-Ne.

¹⁵Manga tuṛrangnga masingkata manungku wadangngu eteudde wageangngu wadangngi Kristus. Nariaddi wotongngewe ia'u manganu sambau wageangngu wadangngi Kristus, see olaanna wageangngu wadangngu sangkatou wawine masandaga? Mangke tawe wotongnge! ¹⁶Ara'e asinungka iamiu ta'e wagga manungku taumata apan uaammulla sua-

dio'a ringannu sangkatou masandaga, maola'a sambau ringannu taumata masandaga udde! Ana waugu sulaŕummu Wuke Susi uaworretta, "Itarua naola'e sambau." ¹⁷Arawe taumata apan napaa'aukku watanganne ringannu Mawu, Gharraho Mawu wurru Gharraho n taumata udde naola'e sambau.

¹⁸Pangindaute manga inolaanna sussandaga. Ana waugu anambo n dosa waine apan niola'u taumata, nariaddi su liuddu wadangngu taumata udde. Arawe taumata apan sussandaga, udde mangalene ma'ola'a rosa lai su wadangnge sassane. ¹⁹Iamiu rinone masingkata manungku eteudde wadangngu atatanaannu Gharraho Mawu Ruata. Gharraho udde uatana'a sulaŕummi amiu. Wurru Gharraho Mawu Ruata sassane apan nangonggolu Gharraho udde siamiu. Wadangngu walineuwe pussaanu. Udde pussa'a Mawu Ruata. ²⁰Mawu Ruata suete namalli siamiu wurru nasuete m baekke. Ana waugu udde, paata'e wadangngu aroddi olangnge ma'oma n sara Mawu Ruata wantuhanna.

Manga aiwalo su ola'u paa'awingnga

7 Orassa indi ia'u maapulu mabbisara su ola'u hatto apan isassago ng kamiu sulaŕummu surannu. Amungskangngu sangkatou esakka tawe naawingnga, udde mapia. ²Arawe tadea'u tawe awono'anna ma'ola'a alaŕo'u alaŕeo, mappianne suapa n taumata esakka pia awingnge sassane wurru suapa n taumata wawine pia awingnge lai sassane. ³Awingnge esakka rinone manuungngu sumbalane su awingnge wawine, wurru awingnge wawine rinone manuungngu sumbalane ere awingnge wawine su awingnge esakka; sangkatou-sangkatou manipussa sasumbalane sangkatou ringannu waine. ⁴Awingnge wawine tawe maatahuanna wadangnge sassane; apan uatahuanna sitou eteudde awingnge esakka. Aroddi lai awingnge esakka tawe maatahuanna wadangnge sassane; apan maatahuanna sitou eteudde awingnge wawine. ⁵Arie sangkawinganna udde matataŕei sangkatou ringannu waine. Wotonge ewe'e tumba'u taŕa ng kadio'a, sambaliate udde apulu n tarua. Ringannu aroddi sangkatou-sangkatou wotongnge umaliomanna ringannu tawe limbane. Arawe wua udde, rinone iamiu mabawelengnga ere sangkawinganna. Amungskangngu tawe aroddi, iamiu wotongnge awono'annu gharraho laŕeo, ana waugu iamiu tawe maataŕrangnga apulu n runia.

⁶Ia'u mabbisara arendi waline maola'a sambau darolokka, arawe sambau alaŕra'a. ⁷Rinone ia'u lembo maapulu amungskangngu anambo n taumata maola'a ere ia'u. Arawe sangkatou-sangkatou suete nanengkamma alaŕatta apan uapapaŕŕala wuassu Mawu Ruata. Sangkatou pia alaŕatta indi, waine lai pia alaŕatta udde.

⁸Su manga taumata apan taambe naawingnga, wuŕru su manga wawine apan niawaŕuanna, indete aŕaŕra'u; Mappianne i'o sidutu mabbiaŕka sassane ere ia'u. ⁹Arawe amungkangngu i'o tawe maaradannu apulunu, mappianne i'o paawingnga. Ana waugu mappianne i'o maawingnga suŕungngu'e apulunu tawe iaradanna. ¹⁰Matatarŕino simangitou apan suete naawingnga, ete indi parenta'u: (Su rinone waŕine ia'u apan nangagillu parenta indi, arawe Mawu.) Sangkatou wawine apan suete naawingnga arie manantangngu awingnge. ¹¹Arawe amungkangngu itou suete nanantangnga, itou rinone sidutu tawe maawingnga, ara'e mabelengnga ringannu awingnge. Wuŕru sangkatou awingnge esakka tawe wotongnge manindo awingnge wawine.

¹²Simangitou apan waine lai, aŕaŕra'u ereindi: – indi aŕaŕra'u sassane, waŕine Mawu – amungkangngu sangkatou Saŕrani maawingngu sangkatou wawine apan tawe mangngimanna si Kristus, wuŕru awingnge wawine maapulu mabbiaŕka ringanni tou, taumata udde tawe wotongnge manindo awingnge wawine udde. ¹³Wuŕru amungkangngu sangkatou wawine Saŕrani pia awingnge sangkatou apan tawe mangngimanna si Kristus, wuŕru awingnge esakka maapulu mabbiaŕka su sambau ringanni tou, ne wawine udde tawe wotongnge manindo awingnge esakka udde. ¹⁴Ana waugu awingnge esakka apan tawe mangngimanna iwaŕi maola'a reengannu aŕaŕrana'u Mawu Ruata ana waugu itou naawingngu wawine apan suete naola'a pussa'a Mawu Ruata. Aroddi lai wawine apan tawe mangngimanna, iwaŕi maola'a pussa'a Mawu Ruata ana waugu itou naawingngu wawine apan suete naola'a pussa'a Mawu Ruata. Amungkangngu tawe aroddi, aŕaŕrana'i mangitou uatatana'a aŕaŕrana'u apeŕka, sumbaŕi manga aŕaŕrana'a udde nireengnga maola'a aŕaŕrana'u Mawu Ruata. ¹⁵Arawe amungkangngu taumata apan tawe mangngimanna udde manantangngu awingnge wawine ara'e esakka apan Saŕrani, arie pama'ungnga sitou. Sulaŕummu olangnge indi wawine ara'e esakka udde naliute, ana waugu Mawu Ruata maapulu tadea'u iamiu mabbiaŕka ringannu uasampinunutanna. ¹⁶Ana waugu i'o sangkatou awingnge wawine – apan nangimante Mawu – ereapa i'o wotongnge maasingkata ringannu atonna manungku i'o tawe maapanalamatta awingngu esakka? Aroddi lai i'o naola'a awingnga esakka Saŕrani, ereapa i'o naasingkata ringannu atonna manungku i'o tawe maapanalamatta awingngu wawine?

Pabbiaŕke su ereapa i'o aehetannu Mawu

¹⁷Rinone sangkatou-sangkatou mangngatokku pabbawiakke tumuŕrutu aehettu Mawu ere suete tinantunnu Mawu Ruata sitou su tempo

Mawu Ruata namaggo sitou see mangngimanna Sitou. Eteudde tita apan ta'u iaarra'a su alawo'u jamaatta. ¹⁸Nassulungnga ere amungkangngu sangkatou taumata suete nissunatta su tempo itou naasengkamma wawaggo Mawu Ruata, ne imbarrangnga taumata udde maddea'a mappassa manga tatiala n sunatta udde. Aroddi lai amungkangngu sangkatou taumata taambe nissunatta su tempo itou nanengkamma wawaggo Mawu Ruata, imbarrangnga taumata udde maisunatta. ¹⁹Ana waugu tutturutta tita n sunatta ara'e tawe tumurutta, sarangkanambone tawe gunane. Ahunanne tumba'u tumurutta manga tita Mawu Ruata. ²⁰Rinone suapa n taumata sidutu mabbiakka sulaumu olangnge ere lai su tempo itou naasomba wawaggo Mawu Ruata. ²¹Amungkangngu su tempo i'o waggoanna, i'o udde sangkatou allangnga, ariewe i'o masusa maringiddu olangnge udde. Arawe amungkangngu su paassa i'o maasomba tempone maliu wuassu alawo'u manara, paata'e tempo udde. ²²Ana waugu sangkatou allangnga apan suete nangimanna Mawu, naola'e taumata n Mawu. Wurru sangkatou apan napallose apan mangngimante Mawu, naola'e allangngi Kristus. ²³Mawu Ruata suete namalli si'o wurru nasuete m baekke. Ana waugu udde, imbarrangnga i'o manantillu wadangngu maola'a allangngu taumata. ²⁴Nariaddi, manga turrangnga, naunge, ereapa ola'i amiu su tempo niwagoanna, rinone i'o sidutu mabbiakka ereudde suadio'a ringannu Mawu Ruata.

Su ola'u manga taumata apan taambe naawingnga wurru manga inawaluanna

²⁵Orassa indi su ola'u manga taumata apan taambe naawingnga. Su ola'u hatto udde, ia'u tawe naasengkamma parenta wuassu Mawu. Arawe narino su manga taumata apan ana waugu alamattu Mawu wotongnge pangimananna, ia'u maapulu mangonggolu tatantiro'u.

²⁶Mannaungnga alawo'u asasusa apan mammaarangnga orassa indi, ia'u mammendama mappianne amungkangngu taumata sidutu mabbiakka olangnge naalihida ere su orassa indi. ²⁷Amungkangngu i'o plate awingnga, arie paringidda manindo awingngu. Amungkangngu i'o taambe awingngu, ariete padea'a awingnga. ²⁸Arawe amungkangngu i'o maawingnga, udde wafine rosa. Aroddi lai amungkangngu sangkatou marfuala maawingnga, udde tawe manungku itou marosa. Tumba'u imangitou apan maawingnga, udde sumaruanna anambo n asasusa. Wurru ia'u maapulu iamui maliu wuassu manga asasusa udde.

²⁹Pandumangku arendi, manga turrangnga: lite tate tempone lai manambo. Manattaka orassa indi, suapa n taumata apan plate awingnge,

ɾinone itou mabbiaƙƙa naalɪhida ere tawe awingnga; ³⁰taumata apan lulluai, pabbiaƙƙe pailalɪhidda ere itou tawe asasusa naungnga; taumata apan lullage, pailalɪhidda ere tawe lulluassa; taumata apan suete namalli, pailalɪhidda ere itou tawe uatahuanna apa-apa; ³¹wurru manga taumata uamanara sulalummu manara n runia, ɾinone mabbiaƙƙa pailalɪhidda ere itou tawe limbatannu manara udde. Ana waugu tate malannu lai runia indi, sulalummu olangnge ere orassa indi sarun mawuli!

³²Ia'u maapulu tadea'u turɾangnga maliu wuassu asasusa. Taumata apan tawe awingnge sarun manidutu n ɾingidde su inolaannu Mawu, ana waugu itou maapulu malluassa Mawu. ³³Arawe taumata apan plate awingnge sarun marɾingidda manambo su ola'u runia indi, ana waugu itou maapulu malluassa naungngu awingnge; ³⁴apanganne ɾingirɾanne natahia. Sangkatou wawine apan tawe awingnge, ara'e sangkatou marɾuala, sarun marɾingidda manambo su ola'u Mawu, ana waugu itou maapulu tadea'u wadangnge sarangkanambone maola'a pussa'a Mawu Ruata. Arawe sangkatou wawine apan plate awingnge, manidutu n ɾingirɾanne su ola'u paddarunia indi, ana waugu itou maapulu malluassa naungngu awingnge.

³⁵Ia'u namorɾettu sarangkanambone indi hunane su apapiannu sassane, walɪne ringannu pandumma maningaddu indi wurru maningaddu udde. Ipaapululu'u tumba'u tadea'u turɾangnga ma'ola'a apapia wurru apan su ɾinone, tadea'u i'o wotongnge manidutu n ɾingirɾannu su Mawu.

³⁶Amungkangngu sangkatou mamendama tawe mapaaammattu apa apan su ɾinone su saruannu tunangane, amungkangngu itou tawe maarɾadannu apulu n dunia, wurru itou mammendama maapulute maawingngu marɾuala udde, wala'e itou ma'ola'a apa apan pappendamanne mapia. Itou tawe marosa, amungkangngu itarua maawingnga. ³⁷Arawe amungkangngu sangkatou suete nakkawessa sulalummu naungnge tawe maawingnga ringannu tunangane wurru apulune udde tawe niwata'a, ne inolaanne udde mapia, sambalɪate itou matohassa su apulune udde. ³⁸Apianne eteudde, taumata apan naawingnga, mapia inolaanne, wurru taumata apan tawe naawingnga, lembo n apianne lai inolaanne.

³⁹Sangkatou wawine apan suete naawingnga tatahuanannu awingnge esakƙa tumba'u tantallanna awingnge udde wiakƙa. Arawe amungkangngu awingnge natete, wawine udde wotonggete maawingnga apia ringannu sangkatou esakƙa apan ipaapulune; sambalɪate paa'awingnga udde paa'awingngu taumata n Saɾrani. ⁴⁰Arawe itou lembo ma'untunganna amungkangngu tate maawingnga apia. Udde addapa'u sassane, arawe ia'u mammendama manungku wisara'u udde eteudde ringannu tarɾino Gharraho Mawu Ruata.



Mawu n taumata n Yunani (8:5)

Su ola'u anna apan nionggola maola'a sasamba su paaļuanna

8 Orassa indi su ola'u anna apan nionggola maola'a sasamba su paaļuanna. Atonna ere unnu wisara n taumata, "Iite sarangkanam-bone pandete." Arawe apapande ma'ola'a taumata mabbali mawunga, arawe paa'akkana mangngapia taumata. ²Taumata apan massunna manungku itou masingkattu sarangkanambone, su rinone itou taambe naasingkata sara aļalumanne. ³Arawe taumata apan atonna-tonna maranggu Mawu Ruata, itou asingkatannu Mawu Ruata.

⁴Su ola'u hatto u'anna anna apan suete nionggola sasamba su paaļuanna, iite masingkata manungku paaļuanna udde ere ola'u sambau apan tawe baddi'a. Wuŗru iite masingkata lai manungku Mawu Ruata tumba'u sambau; tawe baļine. ⁵Atonna manambo lai apa apan isassago monganna, wuŗru mawu, mapia udde ete su langitta, ara'e lai su wowo n runia. ⁶Arawe siite, Mawu Ruata tumba'u tinggassa. Itou Iamangnga apan nandiaddi sarangkanambone. Ete hunane Sitou iite mabbiakka. Wuŗru Mawu tumba'u sambau lai, eteudde Yesus Kristus. Sulaļummi Tou sarangkanambone niriaddi, wuŗru ana waugu ete Itou iite wiakka.

⁷Salaiwe aroddi, tawe anambo n taumata masingkatu olangnge udde. Piaddu taumata paarorone wiasane massubba paaļuanna. Nariaddi, ana waugu udde na'oma n sara orassa indi lai imangitou ta'e uapendama manungku anna, apan suete pinasubba paaļuanna, eteudde annu paaļuanna. Ne amungkangngu imangitou umanna anna udde, imangitou


uapendama udde rosa; ana waugu pangangimanni mangitou ta'e lome. ⁸Su rinone anna sassane tawe maaola'a paa'aukki ite ringannu Mawu Ruata maola'a lembo mapia. Amungkanngu iite umanna anna udde, iite tawe maasomba auntunganna apa-apa. Aroddi lai amungkanngu iite tawe umanna anna udde, iite lai tawe marugi sara ng kadio'a.

⁹Arawe paatehamma, arie ma'oma n sara mariaddi manungku taumata waine maola'a marosa - ana waugu pangangimanne ta'e lome - ana waugu i'o walate apulu ma'inolaanna sarangkanambone. ¹⁰Pandumangku arendi: Unnu wisara i'o, pia pangangimanna apan matohassa, tantallanna u'anna su tampa m paaluanna. Wua udde pia sangkatou naasilo si'o ua'ianna u'anna isudde. Amungkanngu pangangimannu taumata udde lome, waline udde maawarrani taumata udde umanna anna apan suete pinasubba paaluanna udde? ¹¹Wurru ana waugu udde, ne pangangimannu naola'a taumata pangangimanne lome udde umaliwu. Sumbali Kristus nate hunane su taumata udde lai. ¹²Wurru amungkanngu i'o ma'ola'a pasasala ereudde su saruannu manga turrangnga apan Sarrani - eteudde i'o nanggohakku pangangimanni mangitou apan lome - ne i'o narosa su saruanni Kristus. ¹³Ana waugu udde, amungkanngu anna maaola'a si'o marosa, ne ia'u tate uminassa remessa lai. Ana waugu arrengeenne turrangu marosa ana waugu ia'u.

Alawo'u tarfino wurru manara manga rasul

9 Walinewe ia'u taumata uapallose? Walinewe ia'u sangkatou rasul? Apa ia'u taambe naasilo Mawu Yesus, Mawu ng kite? Apa iamiu walinewe ina'ule n manara'u su Mawu? ²Amungkanngu lai manga taumata waine maddiri manga'u sia'u sangkatou rasul, adiongke iamiu mangnga'u udde! Ana waugu wiakku ere sangkatou taumata n Sarrani maola'a tatiala manungku ia'u sangkatou rasul.

³Amungkanngu pia taumata mapaasala'u, ia'u sarun sumimbakka arendi: ⁴Apa ia'u tawe wotongnge manengkamma anna wurru ua'e ana waugu manara'u? ⁵Apa ia'u tawe wotongnge mangapiddu sangkatou awingnga taumata n Sarrani ringanku sula'ummu amatanku, ere lai niola'u manga turrangnga Mawu Yesus wurru manga rasul waine, nasutta lai Petrus? ⁶Ara'e tumba'u Barnabas wurru ia'u sassane iradolokka iaparea'a wiakka sassane? ⁷Taweddu sangkatou tantara apan rinone mada'a pabbawiakke sassane sula'ummu amulannu tantara udde! Tawe mabbawaiilla apan massuannu anggore su waille see tawe umanna wua n anggore wuassu waille udde! Tawe mandariaga apan mappaduli domba, see tawe ma'inumma susu wuassu manga dombane udde!



Sapi tantaḷanna maṛṛinda gandumma (9:9)

⁸Ia'u namasingkatu olangnge udde waḷine tumba'u pinangiananne apan ianaramanna su pabbiaṛṛanna miallo-miallo, arawe ana waugu Wuke Susi namasingkata lai su olangnge udde. ⁹Sulaḷummu Wuke Musa uawoṛṛetta, "Sapi apan tantaḷanna maṛṛinda gandumma ana see matontonga watune wuassu raene, arie paṛṛapinge moṛṛongnge." Apa tumba'u sapi apan pappaduḷianannu Mawu Ruata? ¹⁰Ara'e udde pandumanne siite? Atonna udde niwoṛṛetta siite. Ana waugu tau-mata apan mammanara waille wuṛṛu taumata apan mammaresi am-mene, su ṛinone mammanara ringannu mangngantimma maasengkama sangkawageanganna wuassu hessi n manarane. ¹¹Iami suete nangasi'u wualannu Ghaṛṛaho sulaḷummu pabbiaṛṛannu. Ne amungkangngu iami mangitingnga manga aḷamattu runia wuassi amiu, apa udde atap-pasanne manungku iami madorongnga tumanite manambo wuassi amiu? ¹²Amungkangngu manga taumata wotongnge mangantimma indi wuassi amiu, waḷinewe iami lai lembo n pia taṛṛino wuassi mangitou?

Arawe ia'u taambe nappaattu taṛṛino udde. Arawe ia'u lembo maa-pulu maningkuḷu sarangkanambone udde, wuassu ia'u mapaaḷaputu manga inolaanna apan mannaḷare manara mamasingskatu Watt'i'u Aḷaḷuassa su ola'i Kristus. ¹³Tuṛṛangnga lai masingkate manungku tau-mata apan mammanara su Waḷe Mawu Ruata mannengkamma wiakki mangitou wuassu Waḷe Mawu Ruata. Wuṛṛu manga taumata apan mam-maduḷi tampa n sasamba, maasomba sambageanganna wuassu sasamba apan niola'a sasamba isudde. ¹⁴Aroddi lai Mawu suete nanantunna manungku taumata apan mabbatti'u Watt'i'u Aḷaḷuassa udde ṛinone maasomba pabbawiakke wuassu manarane udde.

¹⁵Arawe taambe saran paassa ia'u nappaattu manga taṛṛino udde. Wuṛṛu ia'u namoṛṛettu suratta indi waḷinewe lai ringannu pandumanna

tadea'u manga taffino udde olaanna orassa indi sia'u. Mappianne ia'u mate, sulungge'e ia'u awuljannu inolaanna apan ilallala'u udde. ¹⁶Ana waugu amungkangngu udde tumba'u su ola'u mabbatti'u Wattiu Aļaļuassa wuassu Mawu Ruata, ne ia'u tawe maapamunga, ana waugu Mawu Ruata suete namarenta sia'u iapamanara. Nasilakate ia'u, amungkangngu ia'u tawe nabbatti'u Wattiu Aļaļuassa udde! ¹⁷Unnu wisara ia'u mappaamattu manara udde wuassu apulu'u sassane, ne ia'u wotongnge mangantima laļantake. Arawe ia'u mamasingkattu Wattiu Aļaļuassa udde ana waugu udde manara'u. Ia'u nirolokku Mawu Ruata iapa'ola'a manara udde. ¹⁸Amungkangngu aroddi, apa bawaekke sia'u? Indi bawaekke: manungku ia'u wotongnge mamasinkatu Wattiu Aļaļuassa udde ringannu tawe mamakkata saran sangkatou iapasumbala sia'u, ana waugu ia'u maddiri madorongnga bawaekke su ola'u ia'u mabbatti'u Wattiu Aļaļuassa udde.

¹⁹Ia'u indi walnewe allangngi sai-sai; ia'u uapallosa. Salaiwe aroddi, ia'u suete na'ola'a watangangu indi maola'a allangngu anambo n taumata. Ia'u na'ola'a udde tadea'u ia'u wotongnge mapaasalamattu anambo n taumata sulaļummi Kristus. ²⁰Su saruannu taumata n Yahudi, ia'u naola'a ere taumata n Yahudi tadea'u ia'u wotongnge mapaasalamattu taumata n Yahudi hunane si Kristus. Su saruannu manga taumata apan mabbiakka tuttuřrutta tita Musa, ia'u naola'a ere ia'u lai tuttuřrutta tita udde, salaiwe ia'u řinone tawe aittannu tita udde. Ia'u na'ola'a udde tadea'u ia'u wotongnge mamolengnga simangitou maola'a mallalařrenggenni Kristus. ²¹Su saruannu taumata waline Yahudi, ia'u mattingkaola'a naalihida taumata waline Yahudi, apan mabbiakka su liuddu tita Musa. Ia'u na'ola'a udde tadea'u ia'u wotongnge maawolengnga simangitou maola'a mallalařrenggenni Kristus. Arawe udde tawe'e manungku ia'u tawe tumuřrutta manga parenta Mawu Ruata; arawe ia'u sidutu iappiařra'u manga parenta wuassi Kristus. ²²Su pattangngannu manga taumata apan pangangimanne lome, ia'u lai mattingkaola'a ere sangkatou apan pangangimanne lome tadea'u ia'u wotongnge maawolengnga simangitou maola'a mallalařrenggenni Kristus. Aunne, ia'u ma'ola'a sarangkanambone hunane su anambo n taumata tadea'u ringannu laļanne salaiwe ereapa lai ia'u wotongnge manalamatta sangkawageanganna wuassi mangitou.

²³Sarangkanambone udde ta'u niola'a huna n Wattiu Aļaļuassa wuassu Mawu Ruata, tadea'u ia'u lai aļamatanna. ²⁴Tuřrangnga lai masingkatta manungku sulaļummu tandinganna anambo matatalumma tuttaļangnga, arawe tumba'u sangkatou manengkamma laļantake. Ana waugu udde taļangke aroddi apiane, ma'oma n sara i'o maasengkamma laļantake. ²⁵Suapa n taumata apan sulaļummu latihanna, uatatařranga aļawo'u apulu. Itou na'ola'a udde ana waugu itou maapulu eleannu

wunga tatiala na'untungnga, eteudde wunga apan ma'lihakka tumolangnga. Arawe iite indi uatataranga sula'ummu ala'wo'u apulu, ana waugu iite maapulu eleannu wunga apan tawe tumolangnga. ²⁶Ana waugu udde ia'u tutta'angnga ringannu tudda apan natantunna. Ere su tandingannu uaa'o'a, ia'u tawe walate ao'ane. ²⁷Ia'u namala m wadanku ar'raanna ringannu matohassa ma'oma n sara ia'u wotongnge maasingkatta atonna. Ia'u ma'ola'a aroddi, ana waugu ia'u maddiri ma'oma n sara mariaddi manungku napawe ia'u mangahe taumata waine mattandinganna ia'u sassane tawe niwali ara'e nito'e.

Sasingadda su ola'u paa'uanna

10 Manga tu'rangnga! Rinone tu'rangnga mannaungnga apa apan suete nariaddi su iupunggu ala'mona ng kite su tempo imangitou uatantalongnga si Musa. Imangitou sarangkanambone nialindumannu winabbawa wu'ru ringannu sala'matta tinumumbe su Tahaloangnga Ma'ramu. ²Tadea'u maola'a mallal'ar'gengenni Musa, imangitou sarangkanambone nissar'ani sula'ummu winabbawa wu'ru sula'ummu tahaloangnga udde. ³Imangitou sarangkanambone u'anna annu Ghar'raho m pangangimanna apan uasulungnga, ⁴wu'ru ma'inumma ua'e n Ghar'raho m pangangimanna apan uasulungnga. Imangitou sarangkanambone ma'inumma wuassu wowo m batu Ghar'raho m pangangimanna apan ualu'adda simangitou; wowo m batu eteudde Kristus sassane. ⁵Salaiwe aroddi, Mawu Ruata tawe maluassa wuassu anamboanne su wallatti mangitou, ana waugu udde manga winalunanni mangitou uataler'rongnga su wadda'a.

⁶Sarangkanambone udde maola'a tuladda siite, iapaanaungnga siite tadea'u tawe numemma manga inolaanna apan la'eo ere imangitou. ⁷Wu'ru tadea'u iite lai tawe massubba paa'uanna ere lai a'olaannu sangkawageanganna wuassi mangitou. Sula'ummu Wuke Susi uawor'retta, "Ne pabbawalaga udde mannattake u'anna wu'ru ma'inumma, wu'ru massa'laingnga ipassubba paa'uanna." ⁸Iite tawe wotongnge ma'ola'a manga inolaanna sussandaga udde ere suete niola'u sangkawageanganna wuassi mangitou. Ana waugu rua m pulo tallu su riwune taumata wuassi mangitou nate sula'ummu allo massallo ana waugu ma'inolaanna ere udde. ⁹Iite tawe wotongnge maannamma Mawu ere suete niola'u sangkawageanganna wuassi mangitou rorone, na'oma n sara imangitou nate nipul'issu atoana mawisa. ¹⁰Iite tawe wotongnge lai sumungkuta, ere suete niola'u sangkawageanganna wuassi mangitou rorone, na'oma n sara imangitou nipate n Mala'ekattu Papate.

¹¹Sarangkanambone udde mariaddi simangitou, maola'a tulada su manga taumata waine. Wuṛru sarangkanambone udde uaworretta lai, maola'a pananaunganna siite. Ana waugu iite orassa indi mabbiaikka su tempo panginsueanne.

¹²Taumata apan massunna watanganne uarisikka matohassa, rinone paatehamma; arie itou ma'oma n sara marra'a. ¹³Aḷawo'u wawono'a apan niasombanganni amiu, eteudde wawono'a apan masokkate nia-pendamannu taumata. Arawe Mawu Ruata sidutu uaaggasa paaire-Ne. Itou maddiri mamalanu wono'anna nangillembu wuassu pangangimanni amiu. Su tempo iamiu nia'omannu wawono'a, Itou sarun mamanti-ngiddu laḷanna siamiu tadea'u maola'a matohassa wuṛru iamiu wotongnge maatarangnga.

¹⁴Ana waugu udde, manga turangnga apan arangnguanna, rinone iamiu maddantinu pasassubba paaḷuanna. ¹⁵Ia'u mabbisara siamiu ere su manga taumata pande. Rinone iamiu maringidda sassane wisara'u indi. ¹⁶Su tempo iite ma'inumma anggore ringannu maadiangkamanna su Mawu Ruata, walineuwe udde mapaaljatta'a manungku iite uauukka ringanni Kristus sulalummu papate-Ne? Wuṛru su tempo iite mattahia roti annananna suadio'a, walineuwe udde mapaaljatta'a manungku iite uauukka sulalummu wadangngi Kristus? ¹⁷Ana waugu tumba'u pia sambau roti, wuṛru iite sarangkanambone u'anna roti sambau udde lai, ne iite apan manambo indi naalihidda wadangnga sambau.

¹⁸Ore panutukka manga taumata n Yahudi. Imangitou apan u'anna anna uarandangnga su tampa m pangadoannu sasamba, eteudde manga taumata apan uauukka ringannu tampa udde. ¹⁹Apa pandumangu su olangnge udde? Paaḷuanna ara'e lai anna apan ipassubba paaḷuanna udde tawe gunane sara ng kadio'a. ²⁰Apa apan niaddo su tampa n sasamba ipasubba paaḷuanna, tawe ipasubba Mawu Ruata, ewe'e ia'onggolla su manga gharraho laḷeo. Wuṛru ia'u maddiri iamiu uauukka ringannu gharraho laḷeo. ²¹Iamiu tawe wotongnge ma'inumma wuassu tampa pa'inumannu Mawu, wuṛru wuassu tampa pa'inumannu gharraho laḷeo lai. Iamiu tawe wotongnge umanna su medda Mawu, wuṛru wuassu medda gharraho laḷeo lai. ²²Ara'e iite maapulu Mawu naung-Nge malaḷeo? Apa iite mattohasanna wuassu Mawu?

²³Unnu taumata, "Iite wotongnge ma'ola'a aḷawo'u apa ipaapulu ng kite." Atonna! Arawe tawe anambo n apa ipaapulu ng kite udde pia gunane. "Iite wotongnge ma'ola'a walate naungngi ite" – arawe tawe sarangkanambone ipaapulu ng kite udde maatamba pabbiaṛrani ite. ²⁴Arie pia sangkatou taumata maddea'a asasuungngu ririne sassane. Suapa n taumata sarun maddea'a hausannu taumata waine.

²⁵Iamiu wotongnge umanna aḷawo'u apa apan iwabaḷu'a su pasakku remessa. Ariete panutukka asuene, salaiwe pia manga apen-

damma maddiri sulalummu naungngu. ²⁶Ana waugu sulalummu Wuke Susi uaworretta, "Runia indi ringannu anambo n laŋorone udde tatahuanannu Mawu."

²⁷Amungkangngu iamiu waggoannu sangkatou waŋine taumata n Saŋrani umanna, wuŋru iamiu umitu'a wawaŋo udde, ante apa apan niimbe si'o. Ariete panutukka wuassuapa darantane anna udde, tadea'u tawe manga apendamma maddiri wuassu laŋummu naungngu. ²⁸Arawe amungkangngu piaddu mabbisara siamiu, "Anna indi suete pinasubba paaŋuanna," arie umanna anna udde, ana waugu mapaasuungngu apulu n taumata udde wuŋru ana waugu tingikku naungnga. ²⁹Pandumangku waŋine tingikka wuassu laŋummu naungngu, arawe tingikku laŋummu naungngu taumata udde.

Asinungka piaddu maiwaŋo, "Ei anio apulu'u pia taumata maningadda? ³⁰Amungkangngu ia'u sarun umanna anna ringannu maadiangkamanna su Mawu Ruata, anio taumata sarun mapaasaŋa'u wuassu anna udde, salaiwe ia'u suete naadiangkamanna su Mawu Ruata ana waugu anna udde?"

³¹Aŋawo'u apa apan a'olaanni amiu - tuŋrangnga umanna ara'e tuŋrangnga ma'inumma - ola'e sarangkanambone udde ipamantuga Mawu Ruata. ³²Pabbiakke aroddi olangnge ma'oma n sara tuŋrangnga tawe ma'ola'a taumata waine ma'ola'a rosa; apa imangitou taumata n Yahudi ara'e taumata waŋine Yahudi, ara'e lai jamaattu Mawu Ruata. ³³Pabbiakke ere ia'u. Ia'u maddea'a mapaaŋuassu naungngu anambo n taumata wuassu aŋawo'u inolaanna, ringannu tawe pandumanne mapaaŋuassu riri'u sassane. Tudde'u eteudde tumba'u tadea'u imangitou sarangkanambone wotongnge masaŋamatta.

11 Pattannote pallaŋagu'u, ere ia'u lai mattanno pallaŋagu n Kristus.

Su ola'u mappaattu tatindungngu pua su tempo mammisa

²Ia'u maddalo siamiu ana waugu iamiu sidutu mannaungnga sia'u wuŋru tuttuŋrutta aŋaŋra'a apan ta'u nionggola siamiu. ³Arawe ia'u maapulu lai iamiu maasingkata sambau hatto, eteudde manungku apan maola'a tembonannu aŋawo'u taumata esakka eteudde Kristus; apan maola'a tembonannu awingnge wawine eteudde awingnge esakka, wuŋru apan maola'a tembonanne wuassu Kristus eteudde Mawu Ruata. ⁴Amungkangngu sangkatou esakka su tempo umaŋiomanna ara'e su tempo mapaasingkatu watti'a wuassu Mawu Ruata su saruannu awadaalla, uapaattu tatindunga su pua, ne taumata udde mangngaŋuandaga Kristus. ⁵Wuŋru amungkangngu sang-

katou wawine su tempo umaļiomanna ara'e su tempo mapaasingkatu watti'a wuassu Mawu Ruata su saruannu awadaalla, tawe uapaattu tatindungnga, ne wawine udde mangngadio'a awingnge apan uaparenta sitou. Udde nassuļungngu ere pua m wawine udde suete nilungguka. ⁶Ana waugu amungkangngu sangkatou wawine maddiri manindunga puane, mappianne utangnge poļoanna. Arawe amungkangngu sangkatou wawine poļoanna puane ara'e huntinganna utangnge, ne udde sambau laļobbosa sitou. Ana waugu udde mappianne itou mappaattu tatindunga. ⁷Esakka tawe wotongnge mappaattu tatindunga, ana waugu itou naaļihida hambarannu inolaan-Ne wuŗru awawantugu Mawu Ruata. Arawe wawine maola'a hambarannu awawantugu esakka, ⁸ana waugu esakka tawe niola'a wuassu wawine, ewe'e wawine niola'a wuassu esakka. ⁹Esakka lai tawe niola'a hunane su wawine, ewe'e wawine niola'a ana waugu hunane su esakka. ¹⁰Ana waugu udde tadea'u mapaaļuassu manga mala'ekatta, sangkatou wawine řinone mappaattu tatindunga maola'a tatiala manungku itou su aļungngu parenta ng kawingnge. ¹¹Salaiwe aroddi sulaļummu iite mabbiakka naola'a tau-mata n Saŗrani, wawine tawe maawiakka sassane uataļei wuassu esakka, wuŗru esakka lai tawe maawiakka sassane uataļei wuassu wawine. ¹²Ana waugu salaiwe wawine paarorone niola'a wuassu esakka, arawe wua isudde esakka inasungkangnga wuassu wawine; wuŗru aļawo'u sarangkanambone darantane wuassu Mawu Ruata.

¹³Manga tuŗrangnga paannama sassane maŗringiddu hatto indi: Apa mapia sangkatou wawine u'aliomanna su Mawu Ruata su saruannu awadaalla, ringannu tawe uapaattu tatindunga? ¹⁴Wuassu asingkattu awadaalla, iamiu suete niaŗraanna manungku amungkangngu esakka utangnge maļo'e, udde sambau apan tawe su řinone. ¹⁵Arawe su wawine, uta'a nionggola sitou ipanaappa puane, wuŗru uta'a maļo'e udde naola'a awawantuge. ¹⁶Aroddi amungkangngu piaddu maapululu matatiakka su ola'u hatto indi, tumba'u sambau ta'u iwaļo eteudde manungku mapia iite ara'e manga jamaattu Mawu Ruata waine, sarangkanambone tumba'u pia sambau inanaramanna udde sulaļummu jamaatta, waine wua isudde tawe wotongnge.

Andeangngu Mawu

¹⁷Su ola'u manansunna indi; ia'u tawe maddalo siamiu. Pamamisa ng kamiu waļine mapaaļiatta'u apapia, ewe'e aļaļeo. ¹⁸Paarorone ia'u naaringikka, manungku sulaļummu ammuļanni amiu pia manga ammuļanna apan uatatiakka. Wuŗru ia'u maŗrangngo manungku mannamboanna watti'a udde atonna. ¹⁹Narřinote amungkangu pia patatiakka su wallatti

amiu, tadea'u sarun asiloanna isai-sai taumata n Sarrani tutune. ²⁰Arawe su tempo iamiu maammula, apa niola'i amiu udde wajinewe andeangngu Mawu. ²¹Ana waugu su tempo u'anna iamiu sambau-sambau uapapulajro manganganu anna sassane, na'oma n sara piaddu tawe niattuiranne, arawe ingana'a waine niwu'anne. ²²Anio aroddi? Wajinewe i'o pia balenu? I'o wotongnge umanna wufru ma'inumma isudde! Ara'e i'o maapulu mangaluandaga jamaattu Mawu Ruata wufru mapaasili n taumata asiangnga? Apa ta'u iwisara siamiu? Rinone ia'u maddalo siamiu? Tawe! Saran paassa tawe maddalo siamiu.

²³Ana waugu apan ta'u iarra'a siamiu, udde ta'u sinengkamma wuassu Mawu sassane; manungku su rabbi udde su tempo Mawu Yesus, Mawu ng kite nilaleo, itou nanganu roti. ²⁴wufru napawe Itou suete naadiangkamanna su Mawu Ruata ana waugu roti udde, Itou namesangnga roti ringannu lima-Ne, see nabbisara, "Ete indi wadangu Ku apan tinantilla ana waugu iamiu. Ola'e indi sambau pananaunganna Sia'u." ²⁵Aroddi lai napawe suete inumanna, Itou nanganu mangko n angore see nabbisara, "Angore indi eteudde paaire Mawu Ruata apan wakku, nitohassu rarra-U. Suapa n tempo iamiu ma'inumma indi, olaawe indi ipannaungnga Sia'u." ²⁶Atonna suapa n tempo iamiu umanna roti wufru ma'inumma angore indi, iamiu mapaasingkatu papate Mawu ma'oma n sara Itou rumanta.

²⁷Ana waugu udde, taumata apan u'anna roti Mawu ara'e ma'inumma angore wuassu Mawu ringannu tawe su rinone, taumata udde marosa su saruannu Mawu apan suete nanantillu wadang-Nge wufru rarra-Ne. ²⁸Nariaddi, suapa n taumata rinone mamarikissa ririne paarorone, wua udde itou wotongnge umanna roti wufru ma'inumma angore udde. ²⁹Ana waugu amungkangngu taumata umanna roti wufru ma'inumma angore tawe mangngimanna manungku saliwangnga udde uasamputu wadangngu Mawu, taumata udde u'anna wufru ma'inumma tumba'u ipanengkamma ruumannu Mawu Ruata su wadangnge sassane. ³⁰Ana waugu udde manambo wuassu wallatti amiu apan marada'a wufru lome, wufru piaddu lai apan nate. ³¹Arawe amungkangngu iite mamarikissa wadangngi ite rorone, iite tawe ifruumannu Mawu Ruata. ³²Arawe amungkangngu iite ifruumannu Mawu Ruata, Itou sarun mamuulla siite, tadea'u tawe maruumanna suadio'a ringannu runia indi.

³³Ana waugu udde, manga turangku, amungkangngu iamiu maammula see umanna su saliwangngu Mawu, iamiu rinone ualalajrado. ³⁴Amungkangngu piaddu malunussa, itou rinone umanna asuene su wale. Amungkangngu iamiu maddaringikka alarra'a indi, ammulannu pamamisanu tawe mapaaranta n ruumanna wuassu Mawu Ruata su wadangngi amiu sassane. Su ola'u manga hatto apan waine, sarun italaa'u siamiu, amungkangngu ia'u rumanta isindi.

Alamatta wuassu Gharraho Mawu Ruata

12 Orassa indi su ola'u manga alamatta apan nionggolu Gharraho Mawu Ruata. Su olangnge udde, ia'u maapulu iamiu maasingkata apa apan su rinone. ²Paanaunge manungku su tempo iamiu taambe naailla Mawu, iamiu niawono'anna massubba paa'uanna apan mou. ³Iamiu rinone maasingkata, manungku taumata apan ahetannu Gharraho Mawu Ruata tawe maapabbisara, "Niawontohante Mawu Yesus!" Arodidi lai tawe saran sangkatou wotongnge mabbisara, "Tumba'u Mawu Yesus udde Mawu!" amungkangngu taumata udde tawe ahetannu Gharraho Mawu Ruata.

⁴Pia manambo hati n alamatta wuassu Gharraho Mawu Ruata, arawe sarangkanambone nionggolu Gharraho apan sambau. ⁵Pia manambo lai hati manara ipangimbe Mawu, arawe Mawu apan a'imbeanna udde, Mawu tinggassa lai! ⁶Piaddu uapapa'rala lai su ola'u mammanara manara Mawu, arawe apan nangonggolu atatohassa ipammannara su alawo'u taumata, eteudde Mawu tinggassa lai. ⁷Su apapia ng kite sarangkanambone, Gharraho Mawu Ruata mammanara su taumata sambau-sambau. ⁸Su sangkatou taumata, Gharraho udde mangngonggolu apande ipabbisara ringannu sarraungnga. Su taumata waine Gharraho apan uasulungnga udde mangngonggolu apande ipana'a su ola'u Mawu Ruata. ⁹Gharraho apan sambau udde lai mangngonggola su sangkatou taumata, apande apan nangillemba ipangimanna si Kristus; arawe su taumata waine Gharraho udde mangngonggolu tarino ipangngapia taumata. ¹⁰Su sangkatou nionggolannu tarino ipa'ola'a alarindu'a wufu su waine nionggolannu alamatta ipabbati'u alawo'u pandumannu Mawu Ruata. Wufu su waine lai Gharraho udde nangonggolu apande ipamile suapa alamatta wuassu Gharraho Mawu Ruata wufu suapa apan waline. Piaddu nionggolannu apande ipabbisara ringannu alawo'u sasinaukka apan maarindu'a, wufu piaddu lai nionggolannu apande ipana'a atappasannu manga sasinaukka udde. ¹¹Sarangkanambone udde mammanarannu Gharraho apan sambau udde lai; sangkatou-sangkatou nionggolannu alamatta uapapa'rala tumurruttu apulu n Gharraho udde sassane.

Manambo wageangnge arawe wadangnga sambau

¹²Eteudde Kristus naola'a wadangngu taumata; wadangnga udde sambau, arawe naola'a wuassu manambo wageangnge. Anambo n wageangnge udde, salaiwe manambo, naola'a wadangnga sambau. ¹³Arodidi

lai iite sarangkanambone, mapia taumata n Yahudi, see lai taumata wałine Yahudi, manga allangnga, ara'e manga taumata napallose; iite sarangkanambone suete nissarřani n Gharřaho apan uasulungnga udde. Iite lai sarangkanambone sarun maapendama Gharřaho apan sambau udde ringannu tawe urangnge.

¹⁴Ana waugu wadangnga udde sassane tawe tumba'u naola'a wuassu wageangnga sambau arawe wuassu wageangnge manambo. ¹⁵Amungkangu ledda mabbisara, "Ia'u wałine lima, ana waugu udde ia'u wałine wageangngu wadangnga," udde tawe atapasanne manungku ledda udde wałine wageangngu wadangnga. ¹⁶Wurřu amungkangngu talinga mabbisara, "Ana waugu ia'u wałine mata, ne ia'u wałine wageangngu wadangnga," udde lai tawe atappasanne manungku talinga udde wałine wuassu wageangngu wadangnga. ¹⁷Unnu wisara ahewallu wadangnga udde tumba'u mata sassane, ereapa wadangnga udde wotongnge maaringikka? Ara'e ahewallu wadangnga udde tumba'u naola'a talinga, ereapa wadangnga udde wotongnge manimbua? ¹⁸Iite naasilo manungku Mawu Ruata apan suete nangaddo manga wageangnge udde su wadangnga. Sambau-sambau niaddo Mawu Ruata su tampane tumurřuttu apulu-Ne. ¹⁹Amungkangngu sarangkanambone tumba'u wageangnge sambau, suapa apan isassago wadangnga? ²⁰Nariaddi atonna manambo wageangnge, arawe wadangnga tumba'u sambau.

²¹Ana waugu udde, mata tawe wotongnge mabbisara su lima, "Ia'u maddirinu!" ara'e pua mabbisara ledda, "Ia'u maddirinu!" ²²Ewe'e manga wageangngu wadangnga apan sassunanna lome udde, mangke pappandumanni ite; ²³wurřu manga wageangnge apan sassunnanni ite tawe aregane, eteudde manga wageangnge apan lembo manambo iaarega ng kite. Manga wageangngu wadangnga apan aasiloanna tawe marřamaga udde lembo n iaarega ng kite. ²⁴Manga wageangngu wadangnga apan aasiloanna mapiate maddirite iaarega ng kite. Mawu Ruata suete nangatokku wadangngi ite aroddi olangnge, na'oma n sara wageangnge apan tawe tumanite n maarega, lembo manambo iaarega. ²⁵Ringannu aroddi wadangnga udde tawe natahia; sambau sambau wageangnga, mangngarega wageangnge waine. ²⁶Amungkangngu wageangnge sambau uapendama rada'a, anambo n wageangnge waine marada'a lai; amungkangngu wageangnge sambau raloanna, anambo n wageangnge waine lulluassa suadio'a.

²⁷Turřangnga sarangkanambone apan suadio'a, eteudde wadangngi Kristus wurřu iamiu sambau-sambau lai eteudde wageangnge wuassu wadangnga udde. ²⁸Aroddi lai sulalummu jamaatta, Mawu Ruata suete nangatokku tampa n alawo'u taumata: Paarorone manga rasul; aruane manga nabi, atallune manga huru, see imangitou apan ma'ola'a alarřindu'a, wua udde imangitou apan nionggolannu alamatta

mapaapia n taumata waine, ara'e ma'ola'a mamamiaffa'a, ara'e lai ia-paawisara ringannu alawo'u sasinaukka apan maaffindu'a. ²⁹Imangitou udde waline sarangkanambone rasul, ara'e nabi, ara'e lai huru. Tawe sarangkanambone pia taffino ipa'ola'a alaffindu'a, ³⁰ara'e mapaapia n taumata, ara'e mabbisara ringannu alawo'u sasinaukka apan maaffindu'a, ara'e mannappasu manga sasinaukka udde. ³¹Ana waugu udde, rinone iamiu mammanara atonna-tonna ana see maasomba alamatta apan lembo n apianne.

Arawe manansunna indi ia'u mangaffa'a siamiu lalanna apan apianne.

Darangngu

13 Salaiwe ia'u wotongnge mabbisara ringannu alawo'u wisara n taumata, wuffu wisara mala'ekatta, arawe ia'u tawe mandangngu taumata waine, ne manga wisara'u udde tumba'u tingikka apan mate-lengnga arawe tawe mangalene. ²Salaiwe ia'u pande mabbatti'u watti'a wuassu Mawu Ruata, wuffu maassunna anambo n hatto apan malalumma, wuffu masingkatu manga alawo'a wuffu lembo mangngimanna Mawu Ruata na'oma n sara wotongnge maaingkatu wowone, arawe ia'u tawe mandangngu taumata waine, ne ia'u tawe aregane sara ng kadio'a! ³Salaiwe anambo n darotongku, ta'u ionggola su taumata asiangnga, wuffu ia'u manantillu wadanku tutunganna, arawe ia'u tawe mandangngu taumata waine, ne sarangkanambone udde tawe gunane sara ng kadio'a.

⁴Taumata apan marangngu taumata waine, masabbare wuffu naungnge mapia. Itou tawe mapaasabangngu naungnga laleo, tawe talimorronganna, tawe mamarabunga. ⁵Itou taumata tawe mamara-bunga, taumata tawe maffagissa, itou tawe mamata'u taumata waine tumurrutta apulune sassane, tawe lai malihakka umaludda, wuffu tawe mangune. ⁶Taumata apan marangngu manga taumata waine, maddiriri ng kala'leo, itou tumba'u maluassa su apapia. ⁷Itou maffaddana sumaruanna alawo'u wawono'a wuffu maapulu mangngimanna apan apianne wuassu alawo'u taumata; sulalummu olangnge apan tumanite n susa, taumata apan mandangngu udde tawe awulianu antimma wuffu masabbare maffado sarangkanambone apan sarun mariaddi.

⁸Tawe tempone, manungku taumata udde tawe maddarangngu. Orassa indi pia taumata apan masingkata mabbatti'u Watti'a wuassu Mawu Ruata, arawe itou sarun mangillolo mabbatti'u watti'a udde. Orassa indi piaddu masingkata mabbisara sulalummu alawo'u sasinaukka apan maaffindu'a, arawe itou sarun mangillolo mabbisara su-

laɭummu manga sasisaukka udde. Orassa indi pia taumata apan masingkatu anambo n inolaanna, arawe saɭimmurine apa apan aasingkatanni mangitou udde sarun abbuljananna. ⁹Ana waugu asingkatu ite wuɖɖu apapande ng kite mabbatti'u watti'a wuassu Mawu Ruata, ta'e pia auranganne. ¹⁰Saɭimmurine sarun a'omanna tempone Mawu Ruata ma'ola'a sarangkanambone nasuungnga, wuɖɖu apan tawe nasuungnga udde sarun mawuɭi.

¹¹Su tempo ia'u ta'e aɭaɖɖana'a, ia'u mabbisara ere wisara n dario'a, apendanku ere apendammu dario'a, wuɖɖu ringiɖɖanku ere ringiɖɖannu dario'a. Orassa indi ia'u timmaddete, pallaɭagu'u ere pallaɭagu n dario'a, nirammete. ¹²Apa apan aasiloanni ite orassa indi eteudde nassuɭungngu lintau maɭabukka su saɖɖuminanna. Arawe iite sarun maasilo ringannu matilangnga. Orassa indi ia'u ta'e wagga n sarangkanambone, arawe saɭimmurine ia'u sarun maasingkata sarangkanambone ere lai Mawu Ruata namasingkatu sarangkanambone su ola'u riri'u.

¹³Nariaddi, su orassa indi pia tatallu inolaanna apan sidutu a'olaanni ite: pangangimanna, pangangantimma wuɖɖu uararangngu. Ahunanne wuassu tatallu udde eteudde mandangngu taumata waine.

Manga pira tataɭa'a su ola'u aɭamatta wuassu Ghaɖɖaho Mawu Ruata

14 Rinone iamiu madea'a suapa m botongnge mandangngu manga taumata waine. Wuɖɖu padea'a lai manengkamma manga aɭamatta apan ionggolu Ghaɖɖaho Mawu Ruata, lembonete lai apande ipamasingkatu apulu Mawu Ruata su taumata. ²Taumata apan mabbisara sulaɭummu sasinaukka apan maaɖɖindu'a, taumata uddé waɭinewe mabbisara su taumata; itou mabbisara su Mawu Ruata. Tawe taumata apan maasunna wisarane, ana waugu Ghaɖɖaho Mawu Ruata apan na'ola'a sitou mabbisara manga inolaanna apan tumba'u asingkatannu Mawu Ruata. ³Mawaɭi'a, taumata apan mammasingkatu watti'a wuassu Mawu Ruata, namasingkattu watti'a udde lai su taumata; ipannohassa pangangimanni mangitou, ipangonggolu sasasa simangitou wuɖɖu ipallimbata naunggi mangitou. ⁴Taumata apan mabbisara sulaɭummu sasinaukka apan maaɖɖindu'a tumba'u mannohassa ririne sassa, arawe taumata apan mammasingkatu watti'a wuassu Mawu Ruata, mantuɭungngu jamaatta maola'a mapia.

⁵Lembo n apianne amungkangngu iamiu sarangkanambone wotongnge mabbisara ringannu alawo'u sasinaukka apan maaɖɖindu'a. Arawe lembo n apianne eteudde amungkangngu iamiu wotongnge niabbatti'u

manga apulu Mawu Ruata. Ana waugu taumata apan mabbatti'u watti'a wuassu Mawu Ruata, maggewaļanna wuassu taumata apan mabbisara ringannu aļawo'u sasinaukka apan maarřindu'a; waine lai olangnge amungkangngu taumata apan mabbisara sulaļummu aļawo'u sasinaukka apan maarřindu'a udde wotongnge manala'a apa apan iwabbisarane udde, tadea'u anambo n jamaatta maasomba hessine, ara'e wuane. ⁶Amungkangngu unnu wisara ia'u rumanta ringanni amiu wurřu ia'u mabbisara sulaļummu sasinaukka apan maarřindu'a, apa hunane udde siamiu? Tawe gunane sara ng kadio'a! Waine lai olangnge amungkangu ia'u mamassingkatu sambau pandumannu Mawu Ruata, ara'e ia'u manala'a su ola'u ereapa Mawu Ruata, ara'e ia'u mapaasingkatu watti'a wuassu Mawu Ruata, ara'e ia'u manggarřa'a.

⁷Manga sarannapa n musikka apan tawe niawane sara ng kadio'a ere libidde wansi wurřu kecapi, amungkangngu aantarine tawe nanglanganna ringannu mapia, ereapa taumata maasingkata antari apan nannalanganne udde? ⁸Sambau lai sasumandingnge waine: Amungkangngu trompeta walate atuntingikke, isai masasaddia mapapangalo?

⁹Aroddi lai apapandenu mabbisara ringannu aļawo'u sasinaukka apan maarřindu'a. Amungkangngu i'o ringannu apandenu udde mabbisara wisara apan tawe iasunna, tawe saran sangkatou lai wotongnge maasunna apa iwabbisaranu udde. Wisaranu udde sarun mawuļi tawe tutukke.

¹⁰Su runia indi pia sasinaukka aroddi anambone, arawe tawe saran sambau lai wuassu manga sasinaukka udde apan tawe atappasanne. ¹¹Arawe amungkangngu ia'u tawe maasunna sasinaukka apan iwabbisara n taumata, ne taumata apan nappaattu sasinaukka udde, ere taumata raho sia'u; aroddi lai ia'u su saruanni tou. ¹²Su ola'i amiu sassane, ia'u masingkata manungku iamiu maapulu atonna-tonna maasomba aļamatta wuassu Gharřaho Mawu Ruata. Arawe lembo n apianne, řinone iamiu madea'a mappaattu apandenu mantuļungngu jamaatta ana see aatambanna apiane.

¹³Ana waugu udde taumata apan mabbisara sulaļummu sasinaukka apan maarřindu'a, řinone madorongnga wuassu Mawu Ruata tadea'u itou onggolannu lai apande ipannala'a apa apan iwabbisarane udde. ¹⁴Ana waugu amungkangngu ia'u umaliomanna ringannu sasinaukka apan maarřindu'a, gharřaho'u atonna u'aliomanna, arawe řingirřrangku tawe mammanara.

¹⁵Nariaddi, řinone ia'u ma'ola'a apa? Indi apan sarun ta'u olaanna: Ia'u sarun umaliomannu gharřaho'u, arawe ia'u sarun umaliomanna lai ringannu řingirřrangku. Ia'u sarun mangantari ringannu gharřaho'u, arawe ia'u maapulu lai mangantari ringannu řingirřrangku. ¹⁶Ana waugu amungkangngu tuřrangnga maadiangkamanna su Mawu Ruata tumba'u ringannu gharřahonu sassane, wurřu pia taumata waine apan tawe maasunna sasinaukka maarřindu'a wuassu Gharřaho Mawu Ruata udde, ne taumata udde tawe maappa-

bhisara, "Ia'u lai maapulu" su aadiangkamannu udde; ana waugu itou wagga apa apan iwabbisaranu udde. ¹⁷Salaiwe aaliomanna aadiangkamanna su Mawu udde lembo mapia, arawe aaliomannu udde mangke tawe gunane sara ng kadio'a su taumata waine.

¹⁸Ia'u maadiangkamanna su Mawu Ruata ana waugu ia'u sassane wotongnge mabbisara sulaḷummu aḷawo'u sasinaukka apan maarindu'a nangillembu wuassu manga tuffrangnga sarangkanambone. ¹⁹Arawe sulaḷummu manga ammulanna ipassubba Mawu, ia'u mappianne mappaattu lima ng kapadi wisara apan wotongnge asunnannu taumata wuassu mappaattu su riwune wisara sulaḷummu sasinaukka apan maarindu'a. Ia'u mappianne maapulu aroddi, tadea'u ia'u wotongnge mangarra'a taumata.

²⁰Manga tuffrangnga! Arie parringidda ere aḷarḷana'a. Sulaḷummu aḷaleo, rinone iamiu uatatana'a ere ana'a maradio'a. Arawe sulaḷummu pararringidda, rinone iamiu maola'a taumata apan timmadete. ²¹Sulaḷummu Wuke Susi uaworretta arendi,

"Mawu nabbisara, 'Ringannu talaḷoarannu manga taumata apan mabbisara ringannu sasinaukka tawe iasunna,

Ia'u sarun mabbisara su pabbawalaga indi.

Wurru lai ringannu talaḷoarannu manga taumata raho, ia'u sarun mabbisara su pabbawala-U;

salaiwe aroddi, imangitou maddiri maddaringikka wisara-U."

²²Nariaddi aḷamatta ipabbisara ringannu aḷawo'u sasinaukka apan maarindu'a eteudde maola'a tatiala su taumata apan tawe mangngimanna, waline su taumata apan mangngimanna. Wurru aḷamatta ipam-masingkatu pandumannu Mawu Ruata su taumata eteudde tatiala su taumata apan mangngimanna, waline su taumata apan tawe mangngimanna. ²³Ana waugu, amungkanngu unnu wisara sulaḷummu ammulanna jamaatta, aḷawo'u jamaatta mabbisara sulaḷummu aḷawo'u sasinaukka apan maarindu'a, wua udde nirumanta sire pira taumata raho, ara'e manga taumata waline Sarrani, taumata udde sarun massunna siamiu sarangkanambone nabbewate! ²⁴Arawe amungkanngu iamiu sarangkanambone mabbatti'u watti'a wuassu Mawu Ruata, see nirumanta sangkatou apan waline Sarrani ara'e sangkatou raho, ne manga inolaanna apan niapaasingkati amiu sarangkanambone sarun mappaḷiatḷa'u manga rosa n taumata udde wurru mabaḷi maatutukka manga rosane. ²⁵Manga inolaanna apan uawuni sulaḷummu naungnge saruu iapaḷiatḷa'a, na'oma n sara itou sumallungu watanganne see massubba Mawu Ruata. Itou sarun manga'u, manungku Mawu Ruata atonna tonna su pattangnganni amiu.

Atoranna sulaḷummu jamaatta

²⁶Nariaddi, manga tuṛrangnga, apa atappasanne sarangkanambone udde? Amungkanngu iamui maammula massubba Mawu piaddu mangngantari, piaddu mangngarra'a, piaddu lai mammasingkatu pandumannu Mawu Ruata, piaddu mabbisara sulaḷummu sasinaukka apan maarrindu'a, wuṛru piaddu mannaḷa'a apa apan iwabbisara udde. Arawe sarangkanambone udde ṛinone olaanna ipangarra'a wuṛru ipangngapia sarangkanambone. ²⁷Amungkanngu piaddu mabbisara sulaḷummu sasinaukka apan maarrindu'a, ṛinone darua ara'e mattingka nambo sire tallu ualaḷoḷossa mabbisara. Wuṛru ṛinone piaddu mannaḷa'a apa apan iwabbisara n taumata udde. ²⁸Amungkanngu tawedu wotongnge mannaḷa'a, ne manga taumata apan mabbisara sulaḷummu sasinaukka apan maarrindu'a udde ṛinone mangilloḷo mabbisara su ammuḷanna udde. Wala'e imangitou mabbisara tumba'u sulaḷummu naungnge su Mawu Ruata. ²⁹Darua ara'e sire tallu apan uatahuanna watti'a wuassu Mawu Ruata ṛinone mamasingkatu watti'a udde tantaḷanna waine marringiddu apa apan iwabbisara udde. ³⁰Arawe unnu wisara watti'u Mawu Ruata nirumanta su sangkatou waine apan ua'ianna su ammuḷanna udde, ne taumata apan tantaḷanna mabbisara, ṛinone mangilloḷo. ³¹Ringannu atokke aroddi, manga tuṛrangnga sarangkanambone, sangkatou ringannu sangkatou wotongnge mapaasingkatu Watti'u Mawu Ruata; tadea'u sarangkanambone wotongnge manengkamma alaṛra'a wuṛru maola'a lembo mangngimanna. ³²Aḷamatta wuassu Ghaṛraho ipammasingkatu watti'u Mawu Ruata wotongnge iapiarra'u taumata apan mammasingkatu watti'a udde. ³³Mawu Ruata eteudde Mawu apan maapulu uatokka mapia; itou waḷine Mawu Ruata apan maapulu m patatiakka.

Ere lai nariaddi sulaḷummu anambo n jamaattu Mawu Ruata, ³⁴wawine ṛinone maḷannaba su tempo n ammuḷannu jamaatta. Imangitou tawe iwala mabbisara. Imangitou tawe wotongnge maola'a piaṛrangnge; udde uasulungngu tita n agama. ³⁵Amungkanngu imangitou maapulu maasingkata manga apa, imangitou ṛinone maiwaḷo awingngi mangitou su waḷe. Tumanite n maasili amungkanngu sangkatou wawine massinaukka sulaḷummu ammuḷannu jamaatta.

³⁶Apa wisara Mawu Ruata nirumanta wuassi amiu? Ara'e tumba'u siamiu sassane wisara udde niwaḷo? ³⁷Amungkanngu pia taumata uatahuanna aḷamatta ipammasingkatu watti'u Mawu Ruata, ara'e itou pia aḷamatta waine wuassu Ghaṛraho Mawu Ruata, taumata udde ṛinone manutukka manungku apa apan ta'u niworretta indi eteudde darolokka wuassu Mawu. ³⁸Arawe amungkanngu piaddu maddiri manengkamma indi, imbaṛrangnga mappandumma sitou.

³⁹Ana waugu udde, manga turřangnga, pattinsahadde mamma-singkatu watti'u Mawu Ruata, arawe arie paningaddu taumata apan maapulu mabbisara sulalummu alawo'u sasinaukka apan maarřindu'a. ⁴⁰Arawe sarangkanambone řinone olaanna ringannu mapia wuřru uaa-tokka.

Su ola'i Kristus niapaawiakka apia wuassu papate

15 Wuřru orassa indi, manga turřangnga, ia'u maapulu iamiu mannaungnga apia Watti'u Alaluassa wuassu Mawu Ruata apan dorone ta'u niapaasingkata siamiu. Iamiu mannengkamma, wuřru mangngimanna si Kristus ana waugu Watti'u Alaluassa udde. ²Amungkangngu iamiu uaagassa atonna su watti'a apan iwabbatti'u udde, ne Watti'u Alaluassa udde manalamatta siamiu; tabene'e amungkangngu iamiu mangngimanna ringannu tawe pasasunna.

³Apa apan suete ta'u niwalo siamiu eteudde apan suete ta'u ni-sengkamma lai. Ahunanne eteudde, ere uaworřetta sulalummu Wuke Susi, ia'u mabbatti'a siamiu manungku Mawu Yesus nate ana waugu manga rosa ng kite; ⁴manungku Itou nilabingnga, arawe wua udde nabbiakka apia su allo atallune. Udde lai uaworřetta sulalummu Wuke Susi. ⁵Ia'u namasingkata lai siamiu manungku Kristus apan suete niapaawiakka apia udde nattingka pasilo m batangan-Ne lai si Petrus, wua udde su mapulo dua rasul. ⁶Wua udde Itou naipasilo m batangan-Ne lai su sire lima řasutta mallalarřenggen-Ne sangkarřindo'a. Anamboanne wuassu manga taumata udde ta'e wiakka orassa indi, tumba'u sire pira ng katou apan natete. ⁷Wua udde Kristus naipasilo m batangan-Ne lai si Yakobus wuřru wua udde su anambo manga rasul.

⁸Panginsueanne atonna Itou naipasilo m batangan-Ne sia'u lai - ia'u ere ana'a adio'a apan wakku niasungkanga taambe su tempone! ⁹Eteudde ia'u rasullu Mawu apan awawoanne. Ia'u tawe su tampane isaggo rasul, ana waugu ete ia'u apan suete nanansara jamaattu Mawu Ruata. ¹⁰Arawe ana waugu alamattu Mawu Ruata, ia'u naola'a lai ere olangnge ia'u orassa indi. Wuřru talawe tawe gunane Mawu Ruata nangampungna sia'u. Ewe'e ete ia'u mammanara marřimadda wuassu anambo manga rasul waine. Arawe udde řinone waline ia'u mattinsahadda, udde sahaddu Mawu Ruata apan marangngu sia'u wuřru mammanara suadio'a ringanku. ¹¹Nariaddi, salaiwe wuassi sai iamiu nanengkamma Watti'u Alaluassa udde - apa udde wuassia'u ara'e wuassu manga rasul waine - udde tawe maola'a hatto. Apianne eteudde iamiu mabbatti'u Watti'u Alaluassa udde wuřru iamiu mangngimanna.

Su ola'u taumata iapaawiakka apia wuassu papate

¹²Amungskangngu iwabbatti'i ami eteudde manungku Kristus suete niapaawiakka wuassu papate, anio pia wuassu wallatti amiu mabbisara manungku taumata nate tawe iapaawiakka apia? ¹³Amungskangngu atonna taumata nate tawe iapaawiakka apia, udde atappasanne Kristus lai tawe niapaawiakka apia wuassu papate. ¹⁴Wurru amungskangngu Kristus tawe niapaawiakka apia wuassu papate, ne tawe gunane iami mabbatti'u manga apa apan tawe gunane lai su pangangimanni amiu, ana waugu pangangimanni amiu udde tawe pinangiananne apa-apa. ¹⁵Nangillemba wua isudde, nasemakke manungku iamiu mangngawusu su ola'u Mawu Ruata, ana waugu iami mabbatti'a manungku Mawu Ruata suete napaawiakki Kristus wuassu papate, wutte'e Mawu Ruata tawe napaawiakki tou apia - amungskangngu atonna taumata nate tawe iapaawiakka apia! ¹⁶Ana waugu amungskangngu taumata nate tawe iapaawiakka apia, ne Kristus lai tawe niapaawiakka wuassu papate. ¹⁷Wurru amungskangngu Kristus tawe niapaawiakka apia, ne pangangimannu tumba'u waliawa tawe gunane; udde atappasanne iamiu ta'e sula'ummu paddaros wurru tawe antimma mapia sara ng kadio'a. ¹⁸Udde atappasanne lai manungku manga taumata n Sarani apan natete, udde tawe antimma lai. ¹⁹Amungskangngu antimmi ite si Kristus tumba'u natalla su wiakki ite sula'ummu runia indi, ne wuassu anambo n pabba-walagu taumata sula'ummu runia indi, ete iite ara'eoanne!

²⁰Arawe nasemakke Kristus suete niapaawiakka apia wuassu papate. Indi maola'a watarrune manungku manga taumata apan natete sarun mabbiakka apia. ²¹Ana waugu papate sinumutta sula'ummu runia wuassu sangkatou taumata, aroddi lai mabbiakka apia wuassu papate nionggola su taumata ana waugu sangkatou taumata lai. ²²Su ereapa anambo n taumata nate ana waugu nareengnga su sambau ringanni Adam, aroddi lai saranganambone sarun iapaawiakka, ana waugu nareengnga su sambau ringanni Kristus. ²³Arawe sangkatou-sangkatou sarun iapaawiakka tumurrutta wageangnge: Paarorone Kristus, wua udde napawe su tempo Itou rumanta apia, manansunna wageangngu manga taumata apan nareengnga tatahuananni Kristus. ²⁴Wua udde mariaddite Kiamatta. Su tempo udde Kristus sarun mangagassa alawo'u araratuanna, alawo'u tarriño, wurru alawo'u atatohassa; wua udde Itou sarun manantillu tarriño-Ne ere sangkatou ratu, su Mawu Ruata lamangngi ite. ²⁵Kristus rinone sidutu uaparenta ma'oma n sara Mawu Ruata ma'ola'a seetti Kristus massurrubawa si Kristus. ²⁶Seetta panginsueanne apan sarun iapasurrubawa eteudde papate. ²⁷Sula'ummu Wuke Susi uaworretta arendi, "Mawu Ruata suete na'ola'a alawo'a su runia

indi massurubawa Sitou." Nasemakke manungku pandumannu wisara "alawo'a" udde tawe nasutta Mawu Ruata sasane, apan na'ola'a alawo'a masurubawa si Kristus. ²⁸Arawe napawe sarangkanambone masurubawa su alunggu parenta n Kristus, ne Itou sassane, ete-udde Ana'u Mawu Ruata, sarun massurubawa m batangan-Ne su Mawu Ruata apan suete na'ola'a ulilimpi'uppa masurubawa Sitou. Ne Mawu Ruata lai sarun mamarenta sarangkanambone.

²⁹Amungkanggu taumata nate tawe iapaawiakka apia, anio pia taumata sassaranianna huna n taumata nate? Apa hunane imangitou ma'ola'a olangnge udde? Amungkanggu atonna taumata nate tate iapaawiakka apia lai, apa hunane imangitou ma'ola'a olangnge udde? ³⁰Wurru apa lai hunane iami sumaruanna silaka su alawo'u tempo? ³¹Manga turangnga! Miallo-miallo ia'u uatataranga asasusa, ana waugu ia'u lulluassu pabbiarani amiu, ana waugu iamiu nangimante si Kristus Yesus, Mawu ng kite. ³²Amungkanggu udde tumba'u wuassu taumata sassane, apa auntunganne sia'u mammanara naalihida ere uasaruanna winatangnga warani su soa indi, su Efesus? Amungkanggu atonna taumata nate tate iapaawiakka apia, ei, mappianne iite tumurutta sasanato'a indi: "Wette iite umanna wurru ma'inumma wurru lumuassa, ana waugu tirrabi lai iite sarun mate."

³³Arie awahianna! Pagahahawe apan laleo, mandaleo pallaagu mapia. ³⁴Atimpu'ote orassa indi, wurru ariete lai ma'ola'a rosa. Iamiu rinone masili, manungku su wallatti amiu piaddu taambe naailla la Mawu Ruata.

Wadanggu taumata napawe suete niapaawiakka apia wuassu papate

³⁵Asinungka piaddu maiwalo, "Ereapa taumata nate iapaawiakka apia? Wadangnga ereapa apan nionggola simangitou, napawe imangitou niapaawiakka apia?" ³⁶Woddo atonna! Amungkanggu iamiu massuannu wualanna sulajummu leta'a, wualanna udde tawe tumuwo, amungkanggu wualanna udde tawe mate asuene. ³⁷Wurru wualanna apan nisuanu su leta'a udde - asinungka wualannu ganduma ara'e wualanna waine - eteudde tumba'u watu m bualanna udde sassane, waline alawo'u sasuanne apan sarun tumuwo udde. ³⁸Mawu Ruata sassane sarun mangoggola su wualanna udde sarrene apan tumuruttu aellegi Tou mapiate su sasuanu udde. Su alawo'u wualanna, Mawu Ruata nangoggolu sarre su sasuanu sambau-sambau.

³⁹Wadanggu manga inolaannu Mawu Ruata apan pia niawane, tawe sarangkanambone uasulungga. Taumata uatahuanna wadangnga

uasulungnga, manga winatangnga pia lai wadangnge parralane; manga manu'u winalanganna lai parralane ola'u wadangnge, wuŕru manga inassa lai parralane lai ola'u wadangnge.

⁴⁰Aroddi lai manga sarannapa su langitta wuŕru manga sarannapa su runia. Sarannapa su langitta sambau-sambau pia ararramagge sassane, wuŕru manga sarannapa su runia aroddi lai. ⁴¹Ararramaggu matannallo uapaparala n ararramaggu wulanna. Manga anumpitanna lai pia ararramagge sassane. Ewe'e manga anumpitanna udde lai sambau-sambau uapaparala ararramagge.

⁴²Aroddi lai olangnge ringannu taumata nate apan sarun iapaa-wiakka apia. Wadangnga apan nilabingnga eteudde wadangnga apan wotongnge marrenessa, arawe wadangnga apan iapaawiakka apia, eteudde wadangnga apan tawe mawukku'a. ⁴³Su tempo wadangnga udde nilabingnga, wadangnga udde laleo wuŕru lome, arawe su tempo itou iapaawiakka apia, eteudde itou wadangnga apan mapia wuŕru matohassa. ⁴⁴Su tempo nilabingnga, wadangnga udde wuassu runia; arawe napawe nabbiakke apia, ne wadangnga udde wadangnga apan nionggolu Gharraho Mawu Ruata. Pia wadangnga wuassu runia, pia lai wadangnga wuassu Mawu Ruata. ⁴⁵Sulalummu Wuke Susi uaworretta arendi, "Taumata paarorone eteudde Adam, naola'a riadianna apan wiakka," arawe Adam panginsueanne eteudde Gharraho apan mangngonggolu wiakka. ⁴⁶Apan nirumanta paarorone eteudde ola'u wadangnga, waline ola'u gharraho. Gharraho nirumanta salimmurine. ⁴⁷Adam paarorone niola'a wuassu leta'a, arawe Adam aruane nirumanta wuassu surga. ⁴⁸Manga taumata n runia indi naalihida Adam paarorone, apan niola'a wuassu leta'a, arawe manga taumata n surga eteudde ere Itou apan nirumanta wuassu surga. ⁴⁹Su ereapa iite orassa indi eteudde naalihida si Adam apan niola'a wuassu leta'a, ne iite sarun mattingkaola'a ere Itou apan nirumanta wuassu surga udde.

⁵⁰Pandumangku, manga turangnga, eteudde: wadangnga apan niola'a wuassu parra wuŕru remessa, tawe maasutta su Runia Waku Mawu Ruata; wuŕru wadangnga apan wotongnge mate tawe mattatana'a sarangka'o'engnge.

⁵¹Paatuturre addapingnga indi: Tawe sarangkanambone iite sarun mate, arawe iite sarangkanambone sarun waluanna. ⁵²Olangnge udde sarun mariaddi mamaŕoro sulalummu sangkarondapu mata, su tempo trompeta iapatuntingikka panginsueanne. Ana waugu su tempo nia-ringikka tingikku trompeta udde, manga taumata nate sarun iapaa-wiakka apia ringannu wadangnga apan tate mate, wuŕru iite sarangkanambone sarun waluanna. ⁵³Wadangngi ite apan wotongnge mate indi rinone hantiannu wadangnga apan tawe mate, wuŕru wadangnga apan wuassu runia, sarun hantiannu wadangnga apan tawe mate,

wurru wadangnga wuassu runia sarun hantiannu wadangnga wuassu su surga. ⁵⁴Amungkangngu wadangnga apan wotongnge mate suete nihantiannu wadangnga apan tawe mate, wurru wadangnga wuassu runia, suete nihantiannu wadangnga wuassu surga, su tempo udde matipusse apa apan uaworretta sulałummu Wuke Susi, "Papate suete niaļuanna; auntunganna nia'omante!"

⁵⁵"Ei papate, suapa auntungannu?

Ei papate, suapa tarřinonu?"

⁵⁶Tarřino m papate eteudde rosa, wurru rosa mappamattu apulune sulałummu tita n agama. ⁵⁷Arawe aadiangkamanna su Mawu Ruata; Itou nangonggolu auntunganna sulałummi Yesus Kristus Mawu ng kite.

⁵⁸Ana waugu udde, manga turřangnga apan arangnguanna, řinone iamiu matohassa wurru sidutu mangngimanna. Pammanarate sidutu su Mawu ringannu atonna-tonna, ana waugu iamiu masingkatta manungku sarangkanambone apan mammanaranni amiu udde su Mawu, tawe maholo'a.

Sasumbala su sansuļungngu taumata n Sarřani

16 Orassa indi su ola'u roitta apan ipassumbala ng kamiu su sansuļungngu taumata n Sarřani, ia'u mangarřa'a tadea'u iamiu ma'ola'a ere tatantiro apan ta'u nionggola su manga jamaatta su Galatia. ²Su allo paarorone suapa n allo misa, řinone turřangnga sarangkanambone marřae n roitta, sambau-sambau tumurřuttu asombangitou. Addoa'e roitta udde ma'oma n sara ia'u rumanta, tadea'u orassa udde lai tate madea'a mangammula. ³Napawe ia'u narantate, ia'u sarun mandolokku manga taumata apan ipaapulu ng kamiu. Ia'u sarun mangonggolu surattu papasingkata, tadea'u imangitou mangapiddu roitta sasumbala udde watukku Yerusalem. ⁴Wurru amungkangngu aellehanna mapia manungku ia'u lai inai ringanni mangitou, ne ia'u sarun inai sua-dio'a ringanni mangitou.

Řiinni Paulus

⁵Ia'u sarun mattembo siamiu napawe ia'u sumabbi Makedonia, ana waugu ia'u maapulu sumabbi isudde. ⁶Wotongnge lai ia'u matana'a taļa ng kadio'a ringanni amiu, asinungka aļannune su tempo masunge. Wua udde iamiu wotongnge mantuļungku manassu amatangu watukku tampa manansunna. ⁷Ia'u maddiri mattembo siamiu amungkangngu

tumba'u umotongnga tala ng kadio'a. Amungkangngu Mawu mamala'u, ia'u maapulu matana'a malannu ringanni amiu.

⁸Tantalanna udde ia'u sarun matana'a su soa indi, su Efesus, ma'oma n sara allo m Pentakosta. ⁹Manambo allo'u isindi ipammanara matara apan pia gunane, salaiwe manambo lai taumata mannalare.

¹⁰Amungkangngu Timotius rumanta, salohoi itou ringannu mapia tadea'u itou maappendama maluassa matana'a ringanni amiu ana waugu itou ere lai ia'u mammanara manara Mawu. ¹¹Arie ma'oma n sara piaddu mangngadio'a sitou. Sumbalaite itou tadea'u itou wotongnge manassu amatanne apia mattudda'u ringannu salamatta, ana waugu ia'u uaraardo rarantane suadio'a ringannu manga tufangnga waine.

¹²Su ola'u tufangngi ite Apolos, paapirate ia'u mabalo sitou tadea'u itou su sambau ringannu tufangnga apan waine inai mattembo siamiu. Arawe itou taambe mangngimanna atonna manungku itou sarun inai orassa indi. Arawe amungkangngu pia tempone, itou sarun rumanta.

Pangudusannu suratta

¹³Rinone iamiu paatehamma wufu matohassa sulaummu pabbia-rannu ere taumata n Sarani. Pammanarate ringannu warani wufu paatohassa. ¹⁴Sarangkanambone apan a'olaanni amiu, olaawe ringannu darangngu.

¹⁵Iamiu asinungka massingkatti Stefanus wufu amonanne; imangitou apan paarorone naola'a taumata n Sarani su Akhaya. Imangitou ringannu ahewallu naungnge mammanara tumba'u mangngimbe pabbawalagu Mawu Ruata. ¹⁶Ia'u madorongnga ringannu atonna-tonna tadea'u iamiu tumufututa papiara'u manga taumata ereudde, wufu manga taumata waine apan mammanara suadio'a wufu mangngimbe suadio'a ringanni mangitou.

¹⁷Ia'u maluassa su raranta n Stefanus, Fortunatus wufu Akhaikus. Imangitou naola'a hahanti ng kamiu sia'u. ¹⁸Imangitou suete nalluassa naungku, ere imangitou nalluassa naungngu. Manga taumata ere udde rinone aaddatanna.

¹⁹Manga jamaatta su Asia nannanata n tabea mangitou siamiu. Akwila wufu Priskila wufu jamaatta apan uammulla su wale mangitou lai napaapiddu tabea n taumata n Sarani apan napene n rintulu.

²⁰Anambo n tufangnga isindi nannanata n tabea siamiu.

Patatabeate ringannu mapia su saruannu tufangnga taumata n Sarani.

²¹Ia'u manamba lai isindi tabea'u apan niwofre'u sassane: *Tabea wuassia'u, Paulus.*

22 Taumata apan tawe mandangu Mawu, walá'e itou awontohanna!
Maranatha – Mawu ng kami, rantate!

23 Antimanna Mawu Yesus mangalamatta siamiu.

24 Napaapiddu lai darangu siamiu sarangkanambone apan naaukka
suadio'a ringanni Kristus Yesus.

Tabea ng kami,
Paulus

SURATTI PAULUS ARUANE SU JAMAATTU KORINTUS

WISARA TAŁAANE

Suratti Paulus Aruane Su Jamaattu Korintus niwořetta su tempo apan masahadda sulałummu paa'aukki Paulus ringannu jamaatta udde. Pia manga wageangngu jamaatta udde apan aellehanna ere ola'u mannałare si Paulus, arawe Paulus napaalıatta'a manungku itou maapulu m paddarame. Itou namasilo n ałaluassu naungnge su tempo olangnge udde nariaddi.

Su wageangnge paarorone suratti Paulus indi mannała'a su ola'u paa'aukke ringannu jamaatta su Korintus. Itou nanała'a isudde anio itou mannaggu ringannu marřagissa anambo n laławangnga wuřru aaluandaga su ririne apan suete niola'u jamaatta udde. Napawe suete nabatti'u olangnge udde, wua udde itou namasilo n ałaluassa, manungku tatagune apan nangillembu udde suete nandanta n awawału wuřru paddarame. Wua udde itou nangahe tadea'u jamaatta udde mangammulu sasumbala ipantułungngu manga taumata n Sařrani apan mabbiakka susa su Yudea. Su manga addoanne panginsueanne, Paulus nangapiddu sasimbakki tou su ola'u sangkatou rasul su saruannu sire pira taumata su Korintus apan massunna ririne sassane rasul tutune, wuřru mangngansila si Paulus rasul awusu.

Lałorřone

Paarorone	1:1-11
Paulus wuřru jamaatta su Korintus	1:12-7:16
Sasumbala su manga taumata n Sařrani su Yudea	8:1-9:15
Sasimbakki Paulus su ola'u tarřinone ere sangkatou rasul	10:1-13:10
Panginsueanne	13:11-14

1 Manga turrangnga jamaattu Mawu Ruata su Korintus wuṛṛu alaṛṛana'u Mawu Ruata sarangkanambone su ahewallu leta'u Akhaya.

Ia'u Paulus, rasulli Kristus Yesus, apan nitenega wuassu apulu Mawu Ruata, suadio'a ringannu turrangngi ite Timotius, ²mangngantimma doronganna Mawu Ruata Iamangngi ite wuṛṛu Mawu Yesus Kristus mangonggolu alaṛṛamatta wuṛṛu paddarame siamiu.

Paulus naadiangkamanna su Mawu Ruata

³Daralo su Mawu Ruata, Iamangngu Mawu ng kite Yesus Kristus. Itou Iamangnga lembo mapia naung-Nge, wuṛṛu Itou Mawu Ruata apan mangngonggolu atatohassa su naungngu taumata. ⁴Itou mannohassa naungngi ami sulaḷummu asasusa apan aapendamanni ami, tadea'u ringannu atatohassa apan nisengkammi ami wuassu Mawu Ruata udde, iami lai wotongnge manohassa naungngu taumata nambo sulaḷummu asasusa. ⁵Manga asasusa apan niapendamanni Kristus manambote lai aapendamanni ami. Wuṛṛu lai sulaḷummi Kristus naungngi ami lembo natoḥassa. ⁶Amungkangngu iami uasaruanna asasusa, udde pandumanne ipannohassa naungngu, tadea'u iamiu masalaṛṛamatta. Amungkangngu naungngi ami tohasanna, ne iamiu lai tattohasanna ma'oma n sara iamiu maola'a masabbare sulaḷummu manga asasusa ere lai niapendamanni ami. ⁷Iami sidutu mangngimanna wuṛṛu tawe humago'a su ola'i amiu, ana waugu iami masingkata manungku iamiu lai suadio'a uatataṛṛanga ringanni ami. Wuṛṛu ana waugu udde iamiu lai nitohassa suadio'a ringanni ami.

⁸Manga turrangnga! Iami maapulu iamiu lai maasingkata su ola'u asasusa apan niapendamanni ami su leta'u Asia. Asasusa apan pasannananni ami udde tumanite n mawakkata mannasa'i ami ma'oma n sara iami tate antimma mabbiakka apia; ⁹papendamanna ere ola'u suete nitantuna irruumanna pateanna. Arawe olangnge udde mariaddi tadea'u iamiu tawe mangngimanna atatoḥassu wadangngu sassane, ewe'e su Mawu Ruata apan mapaawiakku taumata nate. ¹⁰Ete Itou apan suete nanaḷamatta siami wuassu silaka wuṛṛu papate apan wahewa udde. Wuṛṛu ete Itou sarun manaḷamatta siamiu su allo saḷimmurine, ana waugu ete Sitou iami mangngantimma. ¹¹Iami mangngimanna manungku ringannu manga aaliomannu huna ng kami, Mawu Ruata sarun manaḷamatta siami lai wuassu papate. Mawu Ruata mangonggolu alaṛṛamatta siami maola'a sambau sasimbakku anambo n aaliomanni amiu siami wuṛṛu ana waugu udde, manambo taumata maadiangkamanna su Mawu Ruata.

Paulus namaļu ɣiinnu amatanne

¹²Iami lulluassa, ana waugu laɭummu naungngi ami mangngonggolu antimma siami manungku wiakki ami su runia indi – nangillembo paa'aukki ami ringanni amiu – suete niapaamatti ami ringannu naungnga matulidda wuɣɣu waresi. Iami na'ola'a udde, waɣine ringannu apande n taumata, arawe ringannu atatohassa apan nionggolu Mawu Ruata. ¹³⁻¹⁴Apan niwoɣɣetti ami udde siamiu tumba'u su ola'u inolaanna apan wotongnge iawasa wuɣɣu asunnanni amiu. Orassa indi iamiu tawe maasunna siami ringannu atonna, arawe ia'u mangngantimma iamiu sarun atonna-tonna maasunna siami. Ringannu aroddi, su tempo Mawu Yesus rumanta apia, iamiu sarun lumuassi ami ere lai iami lulluassa ana waugu iamiu.

¹⁵Ana waugu ete pangangimanna udde ia'u paarorone maapulu mattembo siamiu tadea'u iamiu maasomba alaɣatta paarua anambone. ¹⁶Ia'u lai pia ira-ira mattembo siamiu sulalummu amatangu watukku Makedonia wuɣɣu umotongnga lai apia sulalummu amatangu mabelengnga, tadea'u iamiu wotongnge massumbala sia'u manassu amatangu watukku Yudea. ¹⁷Arawe ia'u suete namaļu ɣiinna udde; ei, apa udde mapaaɣiatta'a manungku naungku tawe matatana'a? Su tempo naɣɣiinna, apa ia'u naɣɣiinna tumuɣɣuttu apulu'u sassane, tanaɣanna'a adio'a mabbisara, "Ore", wuɣɣu tanaɣanna'a adio'a mabbisara "Tawe"? ¹⁸Ringannu arannu Mawu Ruata apan apangngimananna, paaire'u siamiu waɣinewe "Ore" wuɣɣu "Tawe". ¹⁹Ana waugu Yesus Kristus, Ana'u Mawu Ruata, apan nipaasingkati Silas, Timotius; wuɣɣu ia'u sassane lai, waɣinewe taumata "Ore" wuɣɣu "Tawe". Arawe udde na ola'a sasimbakka "Ore" wuassu Mawu Ruata. ²⁰Ana waugu sulalummi Tou Mawu Ruata suete nabbisara "Ore" su alaɣo'u paaire-Ne. Ana waugu udde iite mabbisara "Amin" su Mawu Ruata ana waugu Yesus Kristus. Iami na'ola'a aroddi tadea'u Mawu Ruata wantuhanna. ²¹Mawu Ruata sassane apan na'ola'a siami wuɣɣu siamiu uauukka su sambau ringanni Kristus ete Itou lai sassane apan namile siite hunane Sitou. ²²Ana waugu udde Mawu Ruata suete nanga'u siite maola'a pussa'a-Ne wuɣɣu mangonggolu Ghaɣɣaho-Ne sulalummu naungngi ite, apan maola'a sambau wataɣɣu manungku Itou sarun mangonggolu siite sarangkanambone apan suete pina'ire n Tou.

²³Mawu Ruata maola'a tiala'u – ana waugu Itou masingkatu laɣoɣo naungku – manungku ia'u tawe nariaddi watukku Korintus, ana waugu ia'u maddiri ma'ola'a naungngi amiu masusa. ²⁴Ia'u tawe mamata'i amiu su ola'u apa apan pangimananni amiu, ana waugu iamiu lembo

mangngimanna si Kristus. Ia'u tumba'u mammanara su sambau ringanni amiu tadea'u iamiu lembo lulluassa.

2 Ana waugu udde ia'u suete nakkawessa tate lai rumanta ringanni amiu ana waugu patatemo'u apan maasusa siamiu. ²Ana waugu amungkangngu ia'u mapaasusa ng kamiu, isai lai apan wotongnge mallimbatta naungku, amungkangngu waline manga taumata udde lai apan suete niapaasusa'u naungnge? ³Ana waugu udde ia'u namoŕrettu suratta udde siamiu. Ia'u maddirite mattembo siamiu, see mapaasusa ng kamiu, sumbaŕi ete iamiu malluassa sia'u. Ana waugu ia'u mangngimanna manungku amungkangngu ia'u lulluassa, ne iamiu sarangkanam-bone lulluassa lai. ⁴Ia'u namoŕrettu suratta siamiu ringannu naungnga massusa wuŕŕu ipabbawata'a wuŕŕu ringannu manambo mapaaturo n allo mata. Pandumangku waline tadea'u iamiu masusa, arawe tadea'u iamiu maatutukka manungku ia'u lembo mandangngu siamiu.

Pangangampungnga sisai apan nassaŕa

⁵Amungkangngu pia taumata apan nallaŕra'u asasusa, ne olangnge udde niola'i tou waline tuddane sia'u, ewe'e su tuŕrangnga sarangkanam-bone ara'e asinungka sangkadoanna wuassu tuŕrangnga. Ia'u maddirite tumanite n maffragissa sitou. ⁶Su taumata apan ereudde, ruumanna apan ionggola sitou wuassu taumata anamboanne su wallatti amiu, wotongngete. ⁷Orassa indi iamiu rinone mangampungna sitou wuŕŕu mangonggolu sasasa lai sitou tadea'u itou tawe tumanite n masusa naungnge ma'oma n sara tate antimma sara ng kadio'a. ⁸Ana waugu udde ia'u sumaŕande, tadea'u iamiu mapaaŕiatta'a apia sitou, manungku iamiu atonna-tonna marangngu sitou. ⁹Ia'u namoŕrettu suratta udde siamiu ringannu pandumanne maannamma siamiu, tanne iamiu sidutu maa-pulu tumuŕrutta manga tatantiro'u. ¹⁰Amungkangngu iamiu mangampungna taumata apan suete nassaŕa siamiu, ne ia'u lai mangampungna taumata udde. Ana waugu apa apan suete niampungangku - amungkangngu atonna ta'e pia apan ta'u ampunganna - udde ampungangku su saruanni Kristus maola'a apapia ng kamiu. ¹¹Ia'u na'ola'a udde tadea'u Setanna tawe maapanganu tempone ipamarenta siite, ana waugu iite masingkatu manga pandumanne.

Asasinggawangngi Paulus su Troas

¹²Su tempo ia'u na'omate su Troas ringannu pandumanna mabbatti'u Watti'u Alaluassa su ola'i Kristus, Mawu suete namu'a laŕanna

sia'u ipammanara su tanpa udde. ¹³Arawe ia'u tawe matammuda ana waugu taambe napassomba n turrangngi ite Titus poiaronddi. Ne ia'u nadorongke mapule su manga taumata su tanpa udde see inaita watukku Makedonia.

Aauntunga ana waugu Kristus

¹⁴Arawe aadiangkamanna su Mawu Ruata! Itou sidutu manggehetta siami tumantalongnga su amatanni Kristus ana waugu iami mabbia akka su sambau ringanni Tou. Mawu Ruata nappaatti ami tadea'u watti'a su ola'i Kristus massa jawukka naalihida haluru mawangngi su alawo'u tanpa. ¹⁵⁻¹⁶Ana waugu iami naalihida haluru n amania apan mawangngi, apan tinutungngu Mawu Yesus hunane su Mawu Ruata. Su saruannu manga taumata apan mattuda m papate, iami indi naalihida haluru m papate apan maapate; arawe su taumata nambo apan tantallanna iapaasalamatta, iami indi naalihida haluru mawangngi apan mandanta m pabbawiakka. Ei, isai wotongnge maasuungngu manara indi? ¹⁷Iami tawe naalihida ere taumata nambo apan ma'ola'a Wattiu Mawu Ruata ere sarannapa walu'anna. Manga pandumanni ami udde waresi, ana waugu iami nirolokku Mawu Ruata. Wufu Mawu Ruata sassane ua'ellega manungku iami mammasingkatu watti'a udde naola'a alalangngi Kristus.

Mangangimbe m paaire wakku

3 Apa indi aasiloanna ere ola'u iami maddalo watanganni ami lai? Ara'e wotongnge mariaddi iami mappandumma surattu daralo siamiu, ara'e wuassi amiu, ere lai raddeannu taumata waine? ²Ete i'o sassane surattu daralo ng kami, apan uaworretta sulalummu naungngi ami apan wotongnge asingkatanna wufu iwasa n taumata nambo. ³Imangitou sassane wotongnge maasilo manungku turangnga naola'a suratta apan niworretti Kristus, wufu niapaapidda siami. Suratta udde waline niworrettu tinta, arawe ringannu Gharraho Mawu Ruata apan wiakka; waline lai su wowo m batu pamamorretanna, arawe sulalummu naungngu taumata.

⁴Iami mabbisara aroddi ana waugu pangangimanni ami su saruannu Mawu Ruata sulalummi Kristus. ⁵Iami tawe sambau pinangiananne mappalatta'a manungku iami wotongnge mammanara manara indi, arawe Mawu Ruata nangonggolu apande udde siami. ⁶Ete Itou apan na'ola'a siami mappammanara su sambau paaire apan wakku; paaire apan uantimma Gharraho Mawu Ruata, waline su tita apan uaworretta. Ana

waugu apan uaworretta udde mangngapiddu papate, arawe Għarḥaho Mawu Ruata udde mangngonggolu wiakka.

⁷Su tempo paaire apan mangngapiddu papate udde niola'a wuṛru ni-paangnga su watu, semakku Mawu Ruata lullansiangnga ringannu sus-salendapa su hati Musa. Semakke aroddi atilangnge na'oma n sara walagu Israel tawe maasilo hati Musa, salaiwe lansiangnga su hatine udde maḷabukke su tempo udde. Ne amungkangngu maaola'a paaire apan mangngapiddu papate udde nitenega ringannu awawantuga apan aroddi ahewalle, ⁸asinungka paaola'a paaire apan nionggolu Għarḥaho Mawu Ruata nitenega lembo mawantuga lai. ⁹Amungkangngu paaire apan maṛruumannu taumata udde aroddi awantuge, lembo mabbantuhanna lai paaire apan maaola'a taumata masasangkapia ringannu Mawu Ruata. ¹⁰Wotongnge iwisara manungku apa apan paarorone mawantuga, tate bantuge lai ana waugu awawantuga apan orassa indi. ¹¹Amungkangngu piaddu maataṛrangnga tumba'u sangkatempo, aroddi awantuge, sambau apan aḷannuane lembo n awantuhanne.

¹²Ana waugu iami uatahuanna antimma ereudde, ne iami waṛrani mabbisara aroddi. ¹³Iami tawe ere Musa apan mallindumma hatine ringannu tatindunga tadea'u walagu Israel taweddu maasilo semakku Mawu Ruata tantaḷanna mappaddumma wuṛru mawuḷi wu-assu hatine. ¹⁴Ringiddi mangitou nawuḷite. Wuṛru na'oma n sara allo indi lai ringiṛranni mangitou ta'e laḷindummannu tatindungnga su tempo imangitou mabbasa manga wuke m paaire tabbe udde. Laḷindumma udde mante mawu'a amungkangngu taumata uauukka ringanni Kristus. ¹⁵Orassa indi lai, napawe imangitou mabbasa manga Wuke Musa, laḷindumma udde ta'e ualḷindumma ringiṛranni mangitou. ¹⁶Arawe amungkangngu pia sangkatou rumanta sumaruanna Mawu, laḷindumma udde sarun wu'anna wuassu hati n taumata udde. ¹⁷Ne, Mawu apan iwabbatti'a isindi, eteudde Għarḥaho. Wuṛru suapa n pia Għarḥaho Mawu, isudde lai pia aḷaḷuassa. ¹⁸Orassa indi hati ng kite tawe laḷindummannu tatindunga wuṛru iite mangngapiddu awawantugu Mawu Yesus. Wuṛru ana waugu udde iite sidutu waḷuanna maola'a ere Itou; mallannu iite maola'a mawantuga. Awawantuga udde wuassu Għarḥaho, wuṛru Għarḥaho udde eteudde Mawu.

Darotongnga wuassu surga sulaḷummu tampa apan niola'a wuassu leta'a

4 Iami ma'ola'a manara indi ringannu ahewallu naungngu Mawu Ruata. Ana waugu udde iami tawe mangilloḷo. ²Iami tawe map-aattu inolaanna marandumma apan maasili. Iami maddiri mamma-

nara ringannu mangngapande ara'e mammaɽelongngu wisara Mawu Ruata. Iami mangngimbe Mawu Ruata ringannu naungnga apan matɽida tumuɽruttu apulu-Ne. Ana waugu udde, iami mangngantimma anambo n taumata ma'ellega siami ringannu mapia sulaɽummu naungnge. ³Amungkangngu Watti'u Aɽaɽuassa apan niapaasingkati ami udde taambe niasunnanna, ne tumba'u manga taumata apan mattuda m papate apan tawe maasunna. ⁴Monganna laɽeo apan uaparenta runia indi nakkapingnga ringirannu manga taumata apan tawe mangimanna udde. Monganna apan sidutu mannalare simangitou tadea'u imangitou tawe maasilo semakka wuassu Watti'u Aɽaɽuassa udde, su ola'u awawantugi Kristus, apan naola'a lihiddu Mawu Ruata. ⁵Watti'a apan iwabbatti'i ami udde waɽinewe watti'a su ola'i ami sassane. Watti'a uddewe watti'a su ola'i Kristus; manungku eteudde Itou Mawu; wuɽru ete iami manga allang-Nge ana waugu Itou. ⁶Mawu Ruata mabbisara, "Rinone wuassu laɽummu araranduma sumabangnga asasemakka," Mawu Ruata lai apan napaasabangngu semakka wuassu laɽummu naungngi ite, tadea'u ringiɽranni ite masemakka ipassunna awawantugu Mawu Ruata apan lulansiangnga su hati n Kristus.

⁷Arawe darotongngu surga apan maɽramaga udde iaapiddi ami su wadangngi ami apan tawe aregane indi apan niola'a wuassu leta'a. Ringannu aroddi nilumiatta'e manungku awawantugu taɽrino udde su Mawu Ruata waɽine siami. ⁸Iami niapaasala wuassu aɽawo'u tampa, arawe iami tawe nia'uɽuhanni mangitou. Iami tuttiangnga arawe iami tawe awuɽiannu antimma. ⁹Manambo apan uasaseetti ami, arawe tawe saran paassa iami uatana'a sassane. Wuɽru salaiwe masokka iami puuɽanna ma'oma n sara manawo, arawe iami tawe mate. ¹⁰Sidutu iami uapendama papate Mawu Yesus su wadangngi ami, tadea'u pabbawiak-Ke lai lumiatta'a su wadangngi ami. ¹¹Su aɽo'engngu allo iami mabbiaakka, iami sidutu ia'umpangngu papate ana waugu Kristus, tadea'u ringannu aroddi wiakki Kristus lai wotongnge lumiatta'a su wadangngi ami apan marosa indi. ¹²Indi atappasanne manungku sulaɽummu wadangngi ami papate tantaɽanna mappaamattu taɽrinone, arawe iami lulluassa, manungku ete wiakka apan tantaɽanna mammanara sulaɽummu wadangngu.

¹³Sulaɽummu Wuke Susi pia bisara arendi, "Ia'u mangngimanna ana waugu udde ia'u mabbisara." Ne ringannu atatohassu mangngimanna ereudde lai, iami mabbisara ana waugu iami mangngimanna. ¹⁴Iami pia antimma manungku Mawu Ruata apan suete napaawiakku Mawu Yesus, sarun mapaawiakki ami lai ringannu Mawu Yesus, wuɽru mangapiddi amiu wuɽru iami su saruan-Ne. ¹⁵Sarangkanambone udde hunanu sassane. Ana waugu lembo n aatambanna taumata uapendama darangngu Mawu Ruata, lembo manambo lai aaliomanna apan

iaaļiomanna su Mawu Ruata; ringannu aroddi Mawu Ruata wanutuhanna.

Mabbiakka ringannu mangngimanna

¹⁶Ana waugu udde iami tawe mangilloļo. Salaiwe sulaļummu wadangngi ami aļaleo aatambanna, arawe su pangangimanna iami a'olaanna wakku su miallo-miallo. ¹⁷Wuŗru asasusa apan tawe tumanite n mawakkata indi, apan tumba'u papendamanni ami taļa ng kadio'a, sarun mangonggolu hessine siami sambau aļaluassa apan wahewalla wuŗru tawe pangudusanne. Aļaluassa udde maggewaļanna marau amungkangngu isuļungngu asasusa udde sassane. ¹⁸Ana waugu iami tawe ma'innunu manga inolaanna apan aasiloanna, arawe apa apan tawe aasiloanna. Apan aasiloanna tumba'u taļa ng kadio'a, arawe apa apan tawe aasiloanna udde maļannu-ļannu sarangkaļo'engnge.

5 Ana waugu iami masingkata manungku amungkangngu waļe – ete-udde wadangnga – apan atatanaanni ite su runia indi ihohakka, Mawu Ruata sarun manaddia waļe ng kite su surga, apan niola'u Mawu Ruata sassane wuŗru tawe mahohakka sarangkaļo'engnge. ²Sulaļummu waļe su orassa indi, iite sussaļiomanna, ana waugu iite maapulute atonna matana'a su waļe su surga udde. ³Ete waļe udde wadangngi ite apan wakku. ⁴Su aļo'engngu allo iite uatana'a sulaļummu waļe wuassu runia indi, iite sussaļiomanna ana waugu winabbawa ng kite mawakkata. Waļinewe ana waugu iite maapulu mapallosa wuassu wadangngi ite, apan wuassu runia indi, ana waugu iite maapulu mappaattu wadangnga wuassu surga udde, ana see wadangngi ite apan wotongnge mate indi pia tarrino apan wiakka. ⁵Apan mannaddia siite su olangnge udde, ete-udde Mawu Ruata sassane, wuŗru Itou nangonggolu Ghaŗraho-Ne siite maola'a sambau wataŗru.

⁶Ana waugu udde naungngi ami sidutu uapendama atatohassa. Iami masingkata manungku tantaļanna iami ta'e uatana'a sulaļummu wadangngi ami indi, iami marau wuassu waļe apan sarun atanaanni ami suadio'a ringannu Mawu. ⁷Ana waugu iami mabbiakka pinaugiananne wuassu mangngimanna si Kristus, waļine pinagiananne wuassu apa apan aasiloanna, ⁸ana waugu udde naungngi ami masabbare. Iami mappianne mapallosa wuassu wadangngi ami indi, tadea'u wotongnge matana'a suadio'a ringannu Mawu. ⁹Ana waugu udde iami sidutu madea'a atonna-tonna ipalluassa naung-Nge, mapia tantaļanna iami ta'e uatana'a su waļe ng kami isindi, ara'e poiarroddi. ¹⁰Ana waugu atonnate iite sarangkanambone sarun iapaasaruanna pamamarikisanni Kristus, wuŗru sangkatou-sangkatou sarun maasomba wawaļinne uasuļungngu inolaanne su runia indi – ala'uanna mapia ara'e ala'uanna laļeo.

Uaaukka ringannu Mawu Ruata sulaʔummi Kristus

¹¹Iami masingkata apa atappasanne mata'uttu Mawu; ana waugu iami maapulu mangarʔa'a taumata see mangngimanna ola'u wadangngi ami. Mawu Ruata maailaʔa siami, wuʔru ia'u mangantimma iamiu lai maailaʔa siami sulaʔummu naungngu. ¹²Ringannu indi iami tawe madorongnga tadea'u iamiu maddalo wadangngi ami. Iami tumba'u mangonggolu sambau pinangiananne apan mapia siamiu tadea'u iamiu maʔuassa siami, tadea'u iamiu masingkata ereapa iamiu sumimbakka manga taumata apan tumba'u ma'ellega pahuddu taumata waʔine ma'ellega pallaʔagune. ¹³Amungkangngu iami atonna aasiloanna nabewate, udde ana waugu manara Mawu Ruata. Wuʔru amungkangngu iami aasiloanna ringiʔranna masemakka udde ana waugu hunane siamiu. ¹⁴Ete darangngu n Kristus apan uatarrino siami; wuʔru iami naatutukke manungku amungkangngu sangkatou suete nate huna n taumata nambo, ne atappasanne manungku taumata sarangkanambone suete nate. ¹⁵Kristus nate ana waugu anambo n taumata, tadea'u manga taumata apan wiakka, tate lai mabbiakka huna m wadangnge sassane, arawe mabbiakka huna ng Kristus apan suete nate wuʔru niapaawiakka apia ana waugu hunane simangitou.

¹⁶Ana waugu udde, iami tate lai manguukka taumata tumuʔruttu aʔaannu taumata. Atonna iami suete nanguukka Kristus wuassu pahuddu taumata, arawe orassa indi tate. ¹⁷Taumata apan suete naaukka ringanni Kristus, maola'a taumata wakku atonna-tonna. Apan tabbe naʔiute – sarangkanambone naola'e wakku. ¹⁸Sarangkanambone udde nimmanara Mawu Ruata. Sulaʔummi Kristus napaa'aukki ite apia ringanni Tou, see nandolokki ite tadea'u manga taumata waine wotongnge lai pia paa'aukka ringannu Mawu Ruata.

¹⁹Iami namasingkata manungku sulaʔummi Kristus, Mawu Ruata napaa'aukku taumata apia ringannu watangan-Ne. Mawu Ruata na'ola'a udde ringannu tawe naʔringiddu pasasaʔa apan suete niola'u taumata su saruannu watangan-Ne. Wuʔru iami suete nirolokku Mawu Ruata iapapasinkatu Watt'i'a udde.

²⁰Nariaddi ete iami udde daroloʔranni Kristus. Sulaʔummi ami Mawu Ruata nabbalo n tanata-Ne. Sulaʔummu aranni Kristus iami sumaʔande, sengkamawe lima Mawu Ruata apan namala ng kamiu uaaukka apia ringanni Tou. ²¹Kristus tawe pasasaʔane, arawe Mawu Ruata na'ola'a Sitou uapasanna rosa ng kite, tadea'u iite maaukka apia ringannu Mawu Ruata ana waugu susambau ringanni Kristus.

6 Ana waugu iami mammanara suadio'a ringannu Mawu Ruata, ne iami sumaɓande arie iamiu ma'ola'a tawe gunane apapia naungngu Mawu Ruata udde. ²Sulaɓummu Wuke Susi, Mawu Ruata nabbisara,

"Su tempo apan ipaapulu, Ia'u suete naddaringikka Si'o,
wurru su allo m pananaɓamatta, Ia'u suete nantulungngu."

Naunge paapia-pia, ete orassa indi tempo apan ipaapulu-U udde. Ete orassa indi tempone ipanaɓamatta.

³Iami maddiri manara ng kami iapaasaɓa. Ana waugu udde iami tawe mangonggolu pinangiananne su sangkatou ipa'ola'a olangnge udde. ⁴Arawe sulaɓummu aɓawo'u inolaanna iami mapaaɓiatta'a manungku ete iami allangngu Mawu Ruata. Ana waugu aɓawo'u hati n asasusa suete niapendamanni ami ringannu sabare; ⁵iami nisansaranna, niɓruumanna, wurru niɓrimpulunanna, iami mammanara maɓɓimadda, maɓawa matiilla, wurru masokka lai tawe maasomba anna. ⁶Ringannu pia inolaanna mapia, pande, masabbare, wurru naungnga mapia, iami mapaaɓiatta'a manungku iami udde allangngu Mawu Ruata. Wurru lai ringannu uaantimma tatuɓungnga wuassu Gharraho Mawu Ruata, wurru ringannu darangngu apan su ɓinone, ⁷wurru ringannu mabbatti'a watti'u Mawu Ruata wurru ringannu tarɓino Mawu Ruata, iami mapaaɓiatta'a manungku iami indi allangngu Mawu Ruata. Iami uaagassa apulu Mawu Ruata maola'a ahiddi ami ipamangalo ara'e ipannohassa wadangngi ami. ⁸Iami aaddatanna, arawe haggalusaanna lai, raddaloanna, wurru aaɓuandahanna lai. Salaiwe iami mabbiakka matuɓidda, iami aansilanna tarɓa awusu. ⁹Iami sassunnanna taumata awagananna, arawe iami asingkatannu awadaalla. Iami sassunnanna nate, arawe wutte'e iami ta'e wiakka. Salaiwe iami sassansaranna, iami tawe nate. ¹⁰Salaiwe naungngi ami massusa, arawe iami sidutu lulluassa lai. Iami aellehanna asiangnga, arawe iami suete napaa'ala n taumata nambo. Iami aellehanna tawe darotongnga, arawe su ɓinone iami uatahuanna sarangkanambone.

¹¹Manga turɓangnga apan arangnguanna su Korintus! Iami suete nabbisara uahahati siamiu. Anambo n laɓorɓo naungngi ami suete niwaɓo siamiu. ¹²Iami manutuba naungngi ami siamiu, tumba'u iamiu mammuni naungngi ami siami. ¹³Orassa indi, wala'e ia'u mabbisara ere aɓarɓana'u sassane. Wu'ate lai naungngi ami siami.

Aɓarɓa'a sumaruanna manga taumata apan tawe pangangimanne

¹⁴Arie maammulu manga taumata apan tawe mangngimanna Mawu Yesus; udde tawe su ɓinone. Tawe mariaddi apapia maammulu aɓaɓeo! Tawe mariaddi asasemakka maammulu araranduma. ¹⁵Tawe mariaddi

Kristus maammulu Setanna. Apa sulungnge taumata n Sarrani wuɾɾu taumata woline Sarrani? ¹⁶Apa sulungnge Waɭe Mawu wuɾɾu waɭe m paaɭuanna? Iite indi Waɭe Mawu, eteudde Mawu Ruata apan wiakka. Mawu Ruata sassane nabbisara,

”Ia’u sarun matana’a su pattangnganni mangitou,
wuɾɾu mabbiakka suadio’a ringanni mangitou.

Ia’u sarun maola’a Mawu Ruata mangitou
wuɾɾu imangitou sarun maola’a aɭaɾɾana-U.

¹⁷Ana waugu udde,
tantanga’e manga taumata apan tawe maaillaɭa Mawu Ruata udde,
wuɾɾu pattingkaɾraete m batangannu wuassi mangitou.

Arie paa’aukka ringannu apa apan maarantina
ne ia’u sarun manengkamma siamiu.

¹⁸Ia’u sarun maola’a Iamangngu,
wuɾɾu iamiu sarun maola’a aɭaɾɾana-U
ete aroddi wisara Mawu Apan Lembo Mataɾɾino.”

7 Manga tuɾɾangnga apan arangnguanna! Anambo n paaire udde tuddane siite. Ana waugu udde ɾinone iite mamesi watanganni ite. Rinone iite mata’uttu Mawu Ruata, tadea’u iite wotongnge mabbiakka sassane huna Mawu ringannu nasuungnga.

Aɭaɭuassi Paulus

²Salohoitte iami sulaɭummu naungngu. Iami tawe nassaɭa su sangkatou taumata, tawe taumata apan niwodoanni ami. Iami tawe saran paa-ssa mangngaɭiwu n darotongngu sangkatou taumata lai. ³Ia’u mabbisara aroddi, woline ana see mapasaɭa ng kamiu. Ana waugu ere suete ni-wisara’u paarorone, iami lembo marangngu siamiu wuɾɾu ete iite sang-gaweanna ma’oma n sara mate. ⁴Ia’u mangngimanna atonna siamiu. Wuɾɾu lai ia’u maɭuassa atonna siamiu! Salaiwe iami naasomba ma-nambo asasusa, naungku naɭuassa ana waugu iamiu. Naungku lembo n lulluassa!

⁵Napawe iami na’omate su Makedonia lai, iami tawe naaillolo. Wu-assu aɭawo’u inolaanna iami naasomba asasusa: wuassu inolaanna waine pattatatiakka, wuassu naungnga sassane atata’utta. ⁶Arawe aadiang-kamanna, Mawu Ruata sidutu mannohassa naungngu taumata apan niaɭiwune, Itou nalluassa siami ringannu daranta n Titus. ⁷Naungngi ami naɭuassa woline tumba’u ana waugu Titus nirumanta ewe’e lai ana waugu itou nabbatti’a ereapa naungnge naɭuassa ana waugu iamiu. Itou namasingkata siami manungku iamiu maapulu atonna maisasomba’u;

manungku iamiu sussassilu pallaḷagunu paarorone wuṛṛu orassa indi maḷuassa manamba'a sia'u. Olangnge udde naaḷuassa sia'u lai.

⁸Salaiwe sura'u naasusa naungngu, ia'u tawe sumassilla namoṛṛettu suratta udde. Atonna su tempo ia'u naasilo manungku suratta wuassia'u udde naasusa siamiu – salaiwe asasusanu udde tumba'u taḷa ng kadio'a – ia'u sussassilla lai. ⁹Arawe ia'u orassa indi lulluassa – waḷine ana waugu naungngu nasusa, ewe'e ana waugu asasusanu udde naawaḷu pallaḷagunu. Atonna asasusanu udde su laḷannu apulu Mawu Ruata. Nariaddi, iami tawe namoddo siamiu. ¹⁰Ana waugu asasusa ereudde mawaḷu naungnga apan mandanta n asasaḷamatta. Wuṛṛu taumata tawe sumassilla su olangnge udde. Arawe asasusa apan su laḷannu apulu n taumata maawawa papate. ¹¹Annama'a iamiu panutukka, apa asombangani amiu wuassu asasusa apan su laḷannu apulu Mawu Ruata! Sombangnge eteudde iamiu atonna-tonna maṛṛusahadda manilangnga apan maḷabukka! Iamiu naola'a maddantinu rosa, iamiu mata'utta, iamiu marangngu, iamiu naola'a matohassa, iamiu maapulu maṛṛuumannu taumata nassaḷa! Sulaḷummu aḷawo'u hatto indi, iamiu suete napaalḷatta'a manungku iamiu tawe nassaḷa.

¹²Nariaddi, salaiwe ia'u suete namoṛṛettu suratta udde, ia'u namoṛṛetta, waḷine ana waugu taumata nassaḷa udde. Waḷine lai ana waugu taumata apan uatataṛṛanga pasasaḷa udde. Ia'u namoṛṛettu suratta udde tadea'u su saruannu Mawu Ruata iamiu maatutukka sassane aroddi ahewalle naungngi ami siamiu. ¹³Ana waugu udde naungngi ami naḷuassa. Ringannu lulluassa, iami lai lullala'a ana waugu naasilo laḷuassi Titus, naungnge lulluassa ana waugu iamiu sarangkanambone. ¹⁴Ia'u atonna suete namarabunga ng kamiu sitou. Aadiangkamanna, iamiu tawe namansili sia'u. Anambo n apa apan suete niwaḷo ng kami siamiu udde atonna. Aroddi lai apa apan ipamarabunga ng kami su ola'i amiu si Titus udde niatialanna atonna. ¹⁵Orassa indi itou lembo marangngu siamiu ana waugu itou mannaungnga ereapa iamiu sarangkanambone tuttuṛṛutta piarṛangnge, wuṛṛu ereapa iamiu manarimmatti tou ringannu maaddatta wuṛṛu matuṛṛuta. ¹⁶Ia'u maḷuassa tassuḷungnge, ana waugu iamiu aapangimananna su aḷawo'u inolaanna.

Roitta sasumbala wuassu manga taumata n Sarṛani

8 Manga tuṛṛangnga, iami maapulu iamiu maasingkata lai su ola'u ereapa apiane Mawu Ruata su manga jamaattu Makedonia. ²Imangitou suete niannamannu manga asasusa apan mawakkata. Arawe su patangngannu manga asasusa udde, imangitou lulluassa, wuṛṛu naungnge masarṛionto'a ipangonggolu sumbala ipantuḷungngu taumata waine,

salaiwe imangitou asiangnga. ³Ia'u wotongnge makkawessa manungku imangitou nangonggolu ahewallu asombangi mangitou, ewe'e lai pia lebbene. Ringannu taweddu nandolokka, ⁴imangitou madorongnga siami amungkangngu wotongnge imangitou mantulungnga lai mangonggolu sumbala su pabbawalagu Mawu Ruata su Yudea. ⁵Imangitou nangonggolu mannamboanna wuassu apa apan aantimanni ami. Imangitou paarorone nanantillu watanganne su Mawu, wua udde siami lai, ere ipaapulu Mawu Ruata. ⁶Ana waugu udde iami nandolokki Titus - apan nanattaku manara indi - tadea'u itou manassu manara apan mapia indi su wallatti amiu lai. ⁷Iamiu apianne wuassu alawo'u taumata; iamiu apianne su ola'u pangangimanna, su ola'u mapaasabangngu ringidda, su ola'u asingkata, sulalummu alawo'u hati manara, wufu sulalummu darangngu siami. Ana waugu udde, mappianne iamiu lai apianne sulalummu manara apan mapia indi.

⁸Ia'u tawe nandolokka udde maola'a sambau parenta. Arawe ringannu namasilo aroddi arimadde taumata waine mantulungngu taumata sansulungnge, ia'u lai maapulu maasingkata na'oma n sara suapa, darangngunu. ⁹Ana waugu iamiu masingkata atonna manungku iite lembo n aranguanni Yesus Kristus Mawu ng kite. Itou ala, arawe Itou nattingkaola'a asiangnga ana waugu iite, tadea'u ringannu paa'asiangnge udde iamiu maola'a ala.

¹⁰Tumufututu addapa'u, su rinone iamiu manginsue manara apan suete nitattaka tonna naliu. Ana waugu ete iamiu apan paarorone narungidda wufu nanattaku manara indi. ¹¹Orassa indi rinone iamiu manassute manara udde tumufututu auatannu. Rinone iamiu marimadda manginsue manara udde, su ereapa iamiu lai rorone marimadda marungiddu manara udde. ¹²Amungkangngu iamiu maapulu mangonggola, ne Mawu Ruata sarun manengkamma aonggolu udde pinangiananne wuassu apa apan pia siamiu; wafine pinangiananne wuassu apa apan tawe siamiu.

¹³⁻¹⁴Ia'u atonna-tonna tawe pandumma mamallossu taumata waine wuassu winabbawane, wufu mammakkata siamiu. Arawe ana waugu iamiu orassa indi sulalummu asasuungnga, ne narinote iamiu mapaa-suungngu auranganni mangitou. Napawe iamiu pia auranganne, wufu imangitou su asasuungnga, ne imangitou sarun mantulungngi amiu. Ringannu aroddi rua ng kawageanganna uatatulungnga. ¹⁵Sulalummu Wuke Susi uaworetta,

"Taumata apan pia darotongnge manambo,
tawe lumbembe,
wufu taumata apan darotongnge mattulungnga,
tawe asueanne."

Titus wuŕŕu manga hawene nirolokka suadio'a

¹⁶Lembo maadiangkamanna iami su Mawu Ruata ana waugu Itou suete na'ola'a si Titus maŕrimadda ere iami mantuŕlungngi amiu. ¹⁷Ana waugu Titus waŕine tumba'u maŕuassa manipussu darorongngi ami, arawe itou lai aroddi aŕrimadde mantuŕlungngi amiu na'oma n sara wuassu apulune sassane itou nakkawessa rumanta ringanni amiu. ¹⁸Suadio'a ringanni tou iami nandolokku sangkatou tuŕrangnga apan aadatannu anambo n jamaatta ana waugu manarane mammasingkatu Wattu'u Alaŕuassa wuassu Mawu Ruata. ¹⁹Wua udde lai, taumata isa-sŕago'u udde suete nipile lai wuŕŕu nitantunu manga jamaatta ipand-inganna siami su amatanni ami. Ana waugu iami sarun umamatta mamasingkattu sasumbala udde, tadea'u Mawu wantuhanna, wuŕŕu tadea'u iamiu maasilo manungku iamiu maapulu mantuŕlungnga.

²⁰Iami mateha-tehamma tadea'u tawe taumata mapaasaŕa ng kami su ola'u padarorongnga sumbala apan wahewa indi. ²¹Iami maddiri mangawusu waŕine tumba'u su lantakku hati Mawu, ewe'e su saruannu taumata lai.

²²Suadio'a ringanni Titus wuŕŕu tuŕrangnge udde, iami lai nandolokku sangkatou tuŕrangnge waine. Iami masokkate naannama sitou wuŕŕu inasingkatanna itou sidutu maapulu mantuŕlungnga. Wuŕŕu orassa indi, itou maapulu mantuŕlungngi amiu, ana waugu itou pia antimma wahewa siamiu. ²³Su ola'i Titus, itou udde hawe'u, apan mammanara ringanku mantuŕlungngi amiu. Wuŕŕu su ola'u tuŕrangnge darua udde, apan inai suadio'a ringanni tou, ete imangitou udde taumata apan nirolokka manga jamaatta wuŕŕu naola'a sambau awawantugi Kristus. ²⁴Iami mangantima iamiu mapaaŕiatta'u darangngunu simangitou, tadea'u anambo n jamaatta masingkata manungku iamiu marangngu simangitou wuŕŕu manungku apa apan ilalluassi ami su ola'i amiu udde atonna.

Sasumbala su taumata labissa Saŕŕani

9 Rinone ia'u lai lasa'e mamorŕettu suratta siamiu su ola'u sasumbala apan tantaŕanna niroho su pabbawalagu Mawu Ruata su Yudea. ²Ia'u masingkata iamiu maapulu mantuŕlungnga, wuŕŕu ia'u suete nilumuassi amiu su manga taumata n Makedonia. Ia'u nabbisara simangitou, manungku ro'e n tonna naŕiu manga tuŕrangnga su Akhaya nasaddiate mangonggolu sumbala. Wuŕŕu apulunu udde naatohassa lai apulu n sangkawageanganna wuassi mangitou. ³Orassa indi ia'u nandolokki Titus wuŕŕu tuŕrangnge rua ng katou ringanni amiu tadea'u apa

apan ilalluassi ami su ola'i amiu tawe maola'a awusu marasai. Nariaddi iamiu rinone nasaddiate, ana waugu ia'u nabbaŋo simangitou iamiu nasaddiate rumanta su manara udde. ⁴Ia'u sussingawangnga arrengeenne pia taumata n Makedonia apan tumantalongnga sia'u su tempo ia'u rumanta ringanni amiu. Wuŋru amungkangngu imangitou naaratingnga manungku iamiu taambe naasaddia, uare asasili eteapa siami, ana waugu iami suete nabbaŋo simangitou manungku iami lembo mangngimanna siamiu! Wuŋru iamiu sassane lai masili. ⁵Ana waugu udde ia'u mamendama rinone mandolokki mangitou udde ringanni amiu malliu ŋoro ana see mapanaddia sasumbala apan suete pina'ire ng kamiu udde. Udde ta'u niola'a tadea'u amungkangngu ia'u rumanta, aonggoli amiu udde nasaddiate. Ringannu aroddi, nilumiatta'e manungku aonggolu udde nionggola ringannu naungnga maŋuassa wuŋru waŋine ana waugu niwata'a.

⁶Paanaunge! Taumata apan mangngasi'u wualanna mampaadio'a, sarun mangitingnga hessine adio'a lai. Arawe taumata apan mangngasi'u wualanna manambo-nambo sarun mangitingnga lai hessine manambo. ⁷Suapa n taumata rinone mangonggola tumurruttu aŋaŋuassa naungnge. Arie itou mangonggola ringannu uapapadua ara'e ipabba-wata'a, ana waugu Mawu Ruata mandangngu taumata apan mangonggola ringannu naungnga maŋuassa. ⁸Mawu Ruata uataŋŋino mangonggola siamiu aŋamatta apan manambo-nambo, tadea'u iamiu sidutu uatahuanna apa apan ipaapulu ng kamiu; wuŋru iamiu lai sarun pia lebbene ipa'ola'a apapia wuŋru pasasumbala su taumata waine. ⁹Sulaŋummu Wuke Susi uaworŋetta arendi su ola'u Mawu Ruata,

"Itou mannaŋiawukka su taumata asiangnga;
apapia naungnge uata'a saran maŋannu-ŋannu."

¹⁰Mawu Ruata apan nanaddia wualanna su mangangasi'a wuŋru pabba-wiakki ite. Itou lai sarun manaddia wuŋru mapaanambo n hessine apan niasi'i amiu tadea'u hessi n apapia naungngu aatambanna lai. ¹¹Ringannu aroddi iamiu sarun maasuungnga sulaŋummu manga hausannu na'oma n sara iamiu sidutu wotongnge mangonggola ringannu naungnga maŋuassa. Wuŋru manga aonggoli amiu apan tattahianni ami, ma'aola'a taumata nambo maadiangkamanna su Mawu Ruata. ¹²Ana waugu inolaanna mapia apan niola'i amiu indi waŋine tumba'u mannuungngu aurangannu pabbawalagu Mawu Ruata, arawe udde ma'aola'a taumata nambo maadiangkamanna su Mawu Ruata. ¹³Wuŋru wuassu apapia ng kamiu udde, manambo taumata n Sarŋani su Yudea sarun maddalo Mawu Ruata ana waugu imangitou naasilo taturruti amiu su Watti'u Aŋaŋuassa su ola'i Kristus apan tatantalonganni amiu udde. Imangitou lai maddalo Mawu Ruata, ana waugu iamiu naungnge mapia mattahia simangitou wuŋru su anambo n taumata waine sarannapa

apan pia siamiu. ¹⁴Ne imangitou sarun umaļiomanni amiu ringannu apendammu darangngu ana waugu Mawu Ruata naung-Nge lembo mapia siamiu. ¹⁵Rinone iite maadiangkamanna su Mawu Ruata ana waugu aonggole apan wahewalla udde!

Paulus napaatohassu manarane

10 Orassa indi ia'u, Paulus, maapulu mabbaļo n sambau hatto siamiu. Ia'u indi, unnu taumata, masarřionto'a amungskangngu uasasaruanna ringanni amiu, arawe warřani amungskangngu mararau. Ne ana waugu asasarřionto'a wurřu apapia naungngi Kristus, ²ia'u sumalānde arie mamata'u ma'ola'a tumanite n marřagissa siamiu napawe manga taumata apan mabbisara manungku iami mammanara ana waugu apulu n runia indi. ³Iami atonna ta'e mabbiakka sulaļummu runia, arawe iami tawe mammanara tumurřutta apulu n runia indi. ⁴Manga ahidda apan ipappaatti ami sulaļummu manara ng kami walānewe ahidda wuassu runia indi, arawe ahidda wuassu Mawu Ruata uatařřino. Ringannu manga ahidda udde iami marřimunsa'a manga tampa mangitou; iami manniko'u manga patatatiakka ⁵wurřu manggohakku tanda'u atatanggakka apan niola'a ipanompolla asingkattu Mawu Ruata. Iami nanametta řingirřannu manga taumata wurřu na'ola'a simangitou massurřubawa si Kristus. ⁶Wurřu amungskangngu iamiu suete tinumurřutta ringannu atonna-tonna, iami uasaddiate marřuumannu anambo n taumata apan maddiri tumurřutta.

⁷Rinone iamiu maatutukka inolaanna apan atonna. Amungskangngu sangkatou mangngimanna manungku itou tatahuananni Kristus, řinone itou managu watanganne sassane wurřu manualaga manungku iami lai tatahuananni Kristus ere lai itou. ⁸Ia'u tawe masili amungskangngu ia'u mannamboanna mamarabunga n tarřino apan suete nionggolu Mawu siami, ana waugu tarřino udde nionggola ipangapia siamiu, walānewe ipandaļeo. ⁹Ia'u maddiri iamiu massunna manungku ia'u mammata'utta siamiu ringannu manga sura'u. ¹⁰Taumata mabbisara, "Manga suratti Paulus udde marřagissa wurřu marřaubba, arawe amungskangngu itou sassane udde su pattangnganni ite, naungnge masarřionto'a wurřu manga wisarane tawe atappasanne sara ng kadio'al!" ¹¹Rinone taumata ereudde manutukka manungku amungskangngu iami su pattangnganni ami, inolaanni ami narřino ere niworřetti ami sulaļummu manga suratti ami.

¹²Iami tawe lai warřani manumandinga ara'e manuļunggu watanganni ami massuļunggu manga taumata apan uapendaina watanganne matanggakka. Tumanite m woddo imangitou! Imangitou ma'ola'a auļanne sassane wurřu mannanda watanganni mangitou sa-

ssane ringannu aulʼanne udde. ¹³Iami tawe aroddi. Amungkangngu iami mamarabunga, iami tawe lumiu passaranne. Iami uatana'a sulalummu passaranu leta'a pammanaranna apan suete tinantunnu Mawu Ruata siami. Wurfu iamiu nasutta sulalummu wageangngu leta'a udde. ¹⁴Nariaddi, su tempo iami nattembo siamiu wurfu nangapiddu Watti'u Alaluassa su ola'i Kristus siamiu, iami tawe nallinga passaranu leta'a pammanaranni ami. ¹⁵Iami tawe naddalo watanganni ami su manara n taumata waine apan su liuddu passaranu apan suete tinantunnu Mawu Ruata siami. Arawe iami sidutu sulalummu passaranu apan suete tinantunnu Mawu Ruata siami wurfu mangngantimma manungku iamiu lembo mangngimanna si Kristus, tadea'u iami wotongnge mapp'ola'a manara apan lembo n ahewalanne su wallatti ami. ¹⁶Ringannu aroddi iami wotongnge lai mabbatti'u Watti'u Alaluassa udde su manga soa waine ringannu tawe mamarabunga manara ng kami apan suete niola'a su tampa m pamanarannu taumata waine.

¹⁷Sulalummu Wuke Susi uaworretta, "Taumata apan sidutu lulluassu sambau sarannapa, rinone lai lumuassu apa apan suete niola'u Mawu." ¹⁸Ana wangu taumata apan raddaloanna eteudde taumata apan raddaloannu Mawu, waline taumata maddalo watanganne sassane.

Paulus wurfu manga rasul awusu

11 Wala'e ia'u mattingka woddo adio'a. Wotongnge are? ²Ia'u luffintulunu, ere Mawu Ruata sassane lai luffintulu ng kamiu. Iamiu ere sangkatou mafualala apan ta'e susi wurfu suete nipa'ire'u iapaawingngu sangkatou umbasanna, eteudde Kristus. ³Arawe ia'u sussinggawangnga ringirannu, sarun awono'anna tawe tumuffutta si Kristus, ere Hawa paarorone lai inawono'annu atoanna. ⁴Ana wangu ellehanna iamiu maluassa manarimmattu taumata apan rumanta ringannu wurfu manggarra'u Mawu Yesus waine - waline Mawu Yesus apan niapaasingkati ami siamiu. Wurfu iamiu lai malutu manaloho gharraho wurfu "watti'u alaluassa" apan uapaparrala n Gharraho Mawu Ruata wurfu Watti'u Alaluassa apan suete nitarimmatti amiu wuassi ami.

⁵Ia'u tawe maappendama sara ng kadio'a manungku ia'u mabba-woanna wuassu "manga rasul" apan pande udde! ⁶Asinungka ia'u tawe tumani masingkata mabbisara, arawe su ola'u asingkata, ia'u waline taumata woddo. Udde suete niapaaliatta'a siamiu su alawo'u inolaanna.

⁷Su tempo ia'u mabbatti'u Watti'u Alaluassa wuassu Mawu Ruata siamiu, ia'u tawe nadorongnga iamiu mappaduli sia'u; wurfu ringannu aroddi ia'u napaawawo n wadanku. Ia'u na'ola'a udde see iamiu

maola'a matanggakka. Apa udde maola'a sambau pasasa'a su saruannu? ⁸Su tempo ia'u manggarra'a siamiu, ia'u papadulanannu manga jamaatta waine. Wotongnge iwisara ia'u nandugi manga jamaatta udde tadea'u wotongnge mantulunggi amiu. ⁹Amungkanngu su tempo udde ia'u sulalummu paa'asiangnga, ia'u tawe mapaasusa saran sangkatou wuassu wallatti amiu. Anambo n apa apan pappandumanku suete nissaddia n manga turrangnga apan nirumanta wuassu Makedonia. Ia'u uariaga mapia-pia tadea'u ia'u tawe mapaasusa ng kamiu su alawo'u inolaanna, wufru ia'u sidutu uariaga tadea'u olangnge udde tawe mawalu. ¹⁰Ala'ua'u indi tawe iapappassa suapa n tampa su leta'u Akhaya, ana waugu alara'i Kristus apan narinno udde sia'u. ¹¹Anio ia'u mabbisara aroddi? Apa ana waugu ia'u tawe mandangngu siamiu? Mawu Ruata masingkata manungku ia'u marangngu!

¹²Apa apan a'olaanku orassa indi sidutu mammanarangku tadea'u "manga rasul" apan waine udde tawe pangiananne mapamarabunga m watanganne wufru mabbisara manungku imangitou mammanara ere lai iami. ¹³Manga taumata ere udde, uddewe rasul awusu. Imangitou mammanara manggawusu taumata wufru mattingkaola'a naalihida ere manga rasul wuassi Kristus. ¹⁴Tawe iaherangnga palla'agu mangitou aroddi, ana waugu Setanna lai sassane mattingkaola'a naalihida ere mala'ekattu asasemakka! ¹⁵Nariaddi tawe iaherangnga lai amungkanngu mammanara n Setanna mattingkaola'a naalihida ere mangangimbe apan tutturutta apulu Mawu Ruata. Panginsueanne imangitou lai sarun manengkamma wawalinne apan uasulungngu inolaanni mangitou.

Asasusa m Paulus ere sangkatou rasul

¹⁶Ta'u isule lai apia: Arie piaddu massunna sia'u woddo. Arawe amungkanngu iamiu massunna sia'u aroddi, wala'ewe ia'u apan woddo indi mamarabunga lai adio'a. ¹⁷Manansunna indi sarun ta'u iwalo ala'ua'u, arawe waline Mawu apan nandolo'u mabbisara n olangnge udde. Su olangnge indi atonna-tonna ia'u mabbisara naalihidda taumata woddo. ¹⁸Atonna manambo taumata apan lulluassu manga inolaannu runia, nariaddi ia'u maapulu lumuassa lai ere imangitou. ¹⁹Iamiu ringannu naungnga maluassa masabbare su saruannu taumata woddo, ana waugu iamiu mammendama ririnu apandeanne! ²⁰Iamiu mangke mammala n taumata mapataruallanggi amiu, ara'e manggapande manaranu wufru mangganu auntunganna wuassi amiu, ara'e mammendama ririne mattanggarranna wuassi amiu wufru warrani mameru siamiu. ²¹Ia'u massili manga'u manungku iamiu tumanite n lome ma'ola'a ereudde.

Arawe apa apan ilalluassu taumata waine ringannu warrani, ia'u lai warrani! (Ia'u mabbisara ere taumata woddo). ²²Imangitou taumata n Ibrani? Ia'u lai taumata n Ibrani. Imangitou taumata n Israel? Ia'u lai taumata n Israel. Papapulunni Abraham imangitou? Ia'u lai aroddi ere imangitou! ²³Imangitou lai daroloranni Kristus? Aringiranna naalihida ere ia'u inawuljante n apande, arawe atonna ia'u daroloranna apan lembo n apianne wuassi mangitou sarangkanambone! Ia'u arimaranne mammanara, ia'u asokkanne itarro sulaummu tuttupanna, ia'u asokkanne sansaranna wurru masokka lai maranite n mate. ²⁴Paalimate ia'u sassansarannu taumata n Yahudi ringannu pappuulanna paatallu m pufo sio anambone. ²⁵Paatallu ia'u nipuullu manga taumata n Roma; ia'u lai suete niwaretannu watu. Paatallu lai naapendama nirrammo ng kapalla su tahafoangnga, wurru paassa ia'u uafallatto su tahafoangnga alannune massallo sarabbbi. ²⁶Masokka ia'u ma'ola'a amamatta apan pia silakane: silakannu manawangnga, silaka mangangarro, silaka wuassu taumata n Yahudi ara'e lai wuassu taumata wafine Yahudi, silaka sulaummu soa, silaka su liuddu soa, silaka su tahafoangnga, wurru silaka wuassu manga turfangnga apan mangnga'u ririne Sarrani wutte'e wafine. ²⁷Ia'u mattingkasahadda wurru mammanara marimadda: pattarra assa tawe matiilla, tawe umanna, tawe ma'inumma, masokka ia'u umamatta malunussa, aamansungeanna, ana waugu tawe laubba wurru tawe tampa atatanaanna. ²⁸Su liuddu sarangkanambone udde, mamiallo ia'u sussingawangnga lai su ola'u anambo n jamaatta. ²⁹Amungkangngu piaddu lome, ia'u lai mammendama lome su sambau. Amungkangngu piaddu nanawo su rosa, naungku lai massusa.

³⁰Ne, amungkangngu ia'u mammarabunga n sambau inolaanna, ne ia'u mammarabunga manga inolaanna apan mapaaljatta'u alallome'u. ³¹Mawu Ruata, Iamangngu Mawu Yesus masingkata manungku ia'u tawe mangawusu. Aranne raloanna saran malannu-lannu. ³²Su tempo ia'u uatana'a su Damsyik, gubernure apan uaparenta isudde su alungngu parenta n Ratu Aretas, nandolokku tantara mandiaga ngara n soa udde see iapasametta sia'u. ³³Arawe ringannu sambau so'anna wahewa ia'u niulukka su sambau lorrangnga su paggala watu udde. Aroddi ia'u nalju wuassu lima n gubernure udde.

Sondapa wurru aellega apan nionggolu Mawu Ruata si Paulus

12 Atonna tawe auntunganne amungkangngu mamarabunga. Arawe ia'u lai maapulu mamarabunga manga inolaanna apan niapaasilo Mawu Ruata sia'u sulaummu sondapa ara'e sulaummu aellega. ²Ia'u maaillaja sangkatou Sarrani apan mapulote appata su tonnane nalju

niapaasengkengnga su tampa atanggarranne su surga. (Ia'u wagga tanne wadangnge atonna-tonna nasengkengnga ara'e tumba'u sambau aellega – tumba'u Mawu Ruata sassane masingkata.) ³⁴Ta'u isule paassa apia: Ia'u masingkata manungku taumata indi nasengkengnga niapaasutta su Firdaus. (Ia'u wagga tanne wadange atonna-tonna nasengkengnga, ara'e udde tumba'u sambau aellega – tumba'u Mawu Ruata apan masingkata.) Poiaroddi taumata sarun maaringikka manga inolaanna apan tawe iasi'attu taumata wufu isassingadda su taumata mabbisara n wisara udde. ⁵Ete su ola'u taumata udde apan ta'u ipammunga, wafine su ola'u wadangu sassane. Su ola'u wadangu sassane, tumba'u manga inolaanna apan mapaalatta'u alallome'u eteudde apan ta'u ipammunga. ⁶Unnu wisara ia'u lai maapulu mamarabunga n sambau inolaanna, ia'u maddiri mattalimoronganna apan awusu; ia'u sarun mabbisara ringannu atonna. Arawe ia'u maffadannu riri'u, tadea'u tawe taumata massunna ia'u nangillembu wuassu apa suete niasiloanni tou su inolaangu ara'e apa apan suete niaringiranni tou su wisara'u.

⁷Arawe tadea'u ia'u tawe tumanite n mamarabunga ana waugu aellega apan wahewalla udde, ia'u nionggolannu lihiddu radda'a su wadangu apan maola'a ahiddu Setanna. Radda'a udde nionggola ipamuulla sia'u, tadea'u ia'u tawe mamarabunga. ⁸Paatallu ia'u u'aljomanna su Mawu Ruata tadea'u radda'a udde marau wuassia'u. ⁹Arawe Mawu sinumimbakka, "Ia'u mandangu si'o wufu ete indi wuannu; ana waugu tarino-U ahewallanne amungkangu i'o sulalammu alallome." Ana waugu udde naungku maluassa mamarabunga n alallome'u, ana waugu amungkangu ia'u lome, ne su tempo udde ia'u maappendama manungku Kristus uariagga sia'u ringannu atotohan-Ne. ¹⁰Nariaddi ia'u lulluassa ringannu alallome'u. Ia'u lai lulluassa amungkangu ana waugu Kristus ia'u nialuandahanna, ia'u naasomba asasusa, a'enggenanna, wufu ia'u naappendama sahadda. Ana waugu amungkangu ia'u lome, su tempo udde ia'u naola'a matohassa.

Asasinggawangni Paulus su inolaannu manga taumata n Korintus

¹¹Atonna ia'u suete nattanno ere taumata woddo – arawe ete iamui na'ola'a sia'u aroddi. Rinone ete iamui maddalo sia'u. Ana waugu salaiwe ia'u tawe aregane sara ng kadio'a, ia'u mangke ere "manga rasul" apan wahewalla udde! ¹²Manga alarrindu'a wufu manga inolaanna apan tumanite m wahewalla wufu manga manara apan wahewalla suete niapaasilo ringannu sabare siamiu, ipattiala manungku ia'u sangkatou rasul. ¹³Sulalammu inolaanna apa iamui tawe pandumanna, amungkang-

ngu isumandinga ringannu manga jamaatta waine? Asinungka tumba'u su **ola'u** inolaanna indi: manungku ia'u tawe mapaasusa ng kamiu ana **waugu** massumbala sia'u. Ampunge ia'u su pasasala'u udde!

¹⁴Orassa indi paatallute ia'u nasaddiate inai mattembo siamiu. **Wurru** ia'u maddiri mapaasusa ng kamiu, ana waugu apulu'u walinewe **apa** apan tatahuananni amiu, ewe'e ririnu. Ana waugu waline alarrana'a **apan** maddea'a wiakka iapaanna su hagu'rangnge, ewe'e ete hagu'rangnga udde mappaduli alar'ranangnge. ¹⁵Ana waugu udde ringannu naungnga maluassa ia'u manantillu alawo'u darotongku siamiu, ewe'e wadanku sassane lai. Amungkangngu ia'u aroddi arangngune siamiu **apa** iamiu tawe mandangngu sia'u?

¹⁶Ne, iamiu nattaturrutante manungku ia'u tawe saran paassa na-paasusa ng kamiu. Arawe piaddu mabbisara manungku ia'u indi mangngapande; manungku ia'u naasomba auntunganna wuassi amiu ana **waugu** ia'u mangngapande. ¹⁷Tawe mariaddi! Apa wuassu manga tau-mata apan ta'u nirolokka siamiu udde ia'u mangnganu auntunganne **wuassi** amiu? ¹⁸Ia'u suete nandolokki Titus inai mattembo siamiu, **wurru** ia'u nandolokku tur'rangnga waine apan Sar'rani inai su sambau ringanni tou. Apa Titus nanganu auntunganna wuassi amiu? Arawe iambua **mammanara** ringannu pandumma apan uasulungnga **wurru** ma'ola'a ringannu inolaanna apan uasulungnga!

¹⁹Wotongnge mariaddi iamiu massunna, alannunete indi iami tatalanna mangngambangnga watanganni ami su saruanni amiu? Iamiu niali'wune atonna! Mawu Ruata masingkata manungku alawo'u wi-sara ng kami udde tumuruttu apulu ng Kristus. **Wurru** alawo'u inolaanni ami udde niola'a ipanniohassa pangangimanni amiu. ²⁰Ia'u sussingawangnga manungku su tempo ia'u mattembo siamiu, ia'u naa-ratingnga tawe ere apa apan aantimangku. Ar'rogenne aratinganna pia-ddu uawawulo, naungnge laleo, naungnge maloso, tumba'u madea'a hausannu watanganne, uaaumbilangnga, mappawawulo, mawunga **wurru** ma'ola'a patatatiakka. ²¹Ia'u mata'utta amungkangngu su tempo ia'u ru-manta Mawu Ruata sarun mapaawawo'u su saruanni amiu **wurru** ia'u sarun lumuai ana waugu manambo su wallatti amiu dorone marosa, tawe mawalu, **wurru** tawe mangillolo ma'ola'a manga inolaanni mangi-tou apan sussandaga, naga'imutanna **wurru** tawe su rinone.

**Manga pira alarra'a panginsueanne
wurru tabea**

13 Indi atallunete ia'u rumanta mattembo siamiu. Sula'ummu Wuke Susi uaworretta, "Suapa n hatto rinone pia matatialane darua ara'e sire tallu, wakkute udde hatto udde atonna." ²Manga taumata

su tempo naliu suete na'ola'a rosa wuɾɾu anambo n taumata waine, suete niwaɭoangu paarorone su tempo ia'u aruane nattembo siamiu. Orassa indi ana waugu ia'u maraute ringanni amiu, ia'u mabaɭo apia amungkangngu ia'u rumanta lai, tawe saran sangkatou wuassi mangitou apan maliu wuassu ruumanna. ³Ne iamiu sarun maasomba anambo n tatialane apan ipaapulu ng kamiu manungku Kristus atonna-tonna mabbisara sia'u. Amungkangngu Kristus mamasingkata siamiu, Itou tawe mamasingkata ringannu aɭallome, arawe ɾinone Itou mapaaɭiatta'u taɾɾino-Ne su wallatti amiu. ⁴Atonna su tempo Itou niarussa, Itou lome, arawe orassa indi Itou mabbiaikka ringannu taɾɾino Mawu Ruata. Iami lai lome sulaɭummu wiakki ami apan uaukka ringanni Kristus, arawe napawe sumaruanna siamiu, iami lai matohassa su sambau ringanni Kristus ana waugu taɾɾino Mawu Ruata.

⁵Annama'o iamiu maannammu watanganni amiu sassane, apa iamiu atonna-tonna mabbiaikka ana waugu mangngimanna si Kristus! Iamiu sarun maatutukka manungku Kristus Yesus udde sulaɭummu naungngi amiu! – waine lai olangnge amungkangngu iamiu tawe mangngimanna atonna-tonna. ⁶Ia'u mangantimma iamiu maatutukka manungku iami waɭinewe taumata maɭihakka awono'anna. ⁷Iami u'aɭiomanna su Mawu Ruata antimanna Itou mantuɭungngi amiu ana see tawe ma'ola'a pasasaɭa. Waɭinewe mapaaɭiatta'a manungku iami indi pande mammanara, arawe tadea'u iamiu tuttuɾɾutta apulu Mawu Ruata – sa-laiwe aellehanna iami tawe tumuɾɾutta, udde tawe apane! ⁸Ana waugu iami tawe maapa'ola'a sambau inolaanna apan uataae ringannu apan naɾɾino; iamiu sarun tumuɾɾutta apan naɾɾino. ⁹Iami lulluassa amungkangngu iami lome wuɾɾu iamiu matohassa. Iami u'aɭiomanna lai tadea'u iamiu maola'a masuungnga. ¹⁰Ana waugu udde, ia'u namoɾɾettu suratta indi su tempo ia'u taambe uatana'a su pattangnganni amiu. Ringannu aroddi, amungkangngu ia'u rumantate, ia'u tawe mamarenta ringannu maɾɾagissa su saruanni amiu ringannu taɾɾino apan nionggolu Mawu sia'u. Taɾɾino udde nionggola ipannohassa pangangimanni amiu, waɭinewe ipandaleo siamiu.

¹¹Panginsueanne, manga tuɾrangnga, ɾinone iamiu lumuassa, wuɾɾu padea'a, tadea'u iamiu maola'a masuungnga. Sengkamawe aɭawo'u tatantiro'u. Rinone iamiu naungnga sambau wuɾɾu mabbiaikka su padda-rame. Mawu Ruata Lembo Maakkanna wuɾɾu masarɾionto'a udde sarun matana'a ringanni amiu.

¹²Paa'adattawe sangkatou ringannu sangkatou, ringannu aakkanna ere passasangkatuɾrangannu taumata n Saɾɾani.

Anambo n aɭaɾɾana'u Mawu Ruata napaapiddu tabea siamiu.

13 Mawu Yesus Kristus manganamatta siamiu, Mawu Ruata mandangu siamiu, wurru Gharraho Mawu Ruata uaintarro siamiu sarangkambone!

Tabea ng kami,
Paulus

SURATTI PAULUS SU MANGA JAMAATTU GALATIA

WISARA TAŁAANE

Napawe Watti'u Ałaluassa su ola'u Mawu Yesus nanattakke iapaa-singkatta wuřru nitarimmata su wallatu manga taumata wałine Yahudi, nasappute aiwało, anio amungkangngu maola'a sangkatou taumata n Sařrani apan tutune, taumata řinone tumuřrutta tita n agama Yahudi. Paulus namasingkata manungku olangnge udde tawe gunane – manungku atonna-tonna tumba'u sambau pinangiananne apan mapia su ipabbiakku taumata n Sařrani eteudde mangngimanna si Kristus. Ringannu pangangimanna udde paa'aukku taumata ringannu Mawu Ruata maola'a mapia apia. Arawe manga taumata apan lullawangnga si Paulus suete nirumanta su manga jamaatta su Galatia, eteudde sambau Provinsi n Roma su leta'u Asia Adio'a. Imangitou pia adapatta manungku tadea'u masasangkapia apia ringannu Mawu Ruata, taumata řinone tumuřrutta tita n agama Yahudi.

Suratti Paulus Su Manga Jamaatta su Galatia indi niworřeta ipantułungngu manga taumata apan niałiwu manga ałarřa'a nassała udde, tadea'u imangitou mabelengnga apia tumuřrutta ałarřa'a apan nařřino udde. Paulus nanattaku wisara manungku itou wotongnge lai isago rasullu Mawu Yesus Kristus. Ringannu uahahati Paulus nabbi-sara manungku itou niwagoana maola'a rasul apan niarantanne wu-assu Mawu Ruata, wałine wuassu taumata. See lai manarane tudane paarorone eteudde su taumata apan wałine Yahudi (1:2). Wua udde Paulus nabbatie m pandumanne manungku paa'aukku taumata ringannu Mawu Ruata maola'a mapia apia tumba'u mangngimanna Mawu Ruata (3-4). Sulałummu manga aaddoanne panginsueannu wuke indi (5-6), Paulus mangngařřa'a manungku darangngu wuassu taumata n Sařrani nirumanta ana waugu itou mangngimanna si Kristus, ringannu aroddi naaola'a taumata udde tuttuřruta pallałagu n taumata n Sařrani.

Lalorrone

Panattaranne	1:1-10
Tarino m Paulus ere sangkatou rasul	1:11-2:21
Watti'u Alaluassa su ola'u daranggu Mawu Ruata	3:1-4:31
Walate apulu naungngu taumata n Sarani wurru manarane	5:1-6:10
Panginsueanne	6:11-18

1 ¹³Manga turrangnga manga jamaatta su wageangngu Galatia, Ia'u, Paulus, wurru anambo n turrangnga taumata n Sarrani apan suadio'a ringanku, mangngantima doronganna Mawu Ruata Iamangngi ite wurru Mawu Yesus Kristus mangonggolu alamatta wurru paddarame siamiu.

Ia'u naola'a rasul waline ana waugu wuassu taumata, ara'e ana waugu nitenegu taumata, ewe'e ana waugu Yesus Kristus Mawu Ruata Iamangngi ite apan suete napaawiakki Tou apia wuassu papate. ⁴Tutturuta apulu Mawu Ruata Iamangngi ite, Kristus nanantillu watangan-Ne maola'a sasamba ana waugu manga rosa ng kite, tadea'u iite iapaasalamatta wuassu tempo apan laleo indi. ⁵Daralo su Mawu Ruata ma'oma n sara malannu-lannu! Amin.

Tumba'u sambau Wattu'u Alaluassa

⁶Ia'u tinumiangnga su ola'u manga turrangnga! Iamiu niwagoannu Mawu Ruata ana waugu darangngu ng Kristus, arawe orassa indi iamiu aroddi alihakke tinumaliudda Mawu Ruata wurru mangngimanna "wattu'u alaluassa" apan uapaparala m Wattu'u Alaluassa wuassu Mawu Ruata. ⁷Tumurruttu atonna tate lai "wattu'u alaluassa apan waine". Tumba'u pia manga taumata apan mammasingkata siamiu "wattu'u alaluassa", su ola'i Kristus apan niwalolongngi mangitou na'oman sara iamiu nialiwwene. ⁸Taumata apan mabattu'u "wattu'u alaluassa" apan uapaparala wuassu Wattu'u Alaluassa apan suete niapaasingkati ami, wala'e itou irruumannu Mawu Ruata – salaiwe taumata udde, iami sassane ara'e mala'ekatta wuassu surga! ⁹Iami suete nabbisara paarorone, orassa indi ia'u mabbisara paassa lai: Taumata apan mammasingkata siamiu "wattu'u alaluassa" apan uapaparala m Wattu'u Alaluassa apan suete niaringirrani amiu wuassi ami, taumata udde rinone irruumannu Mawu Ruata!

¹⁰Apa ringannu olangnge udde pendamanna ere ia'u mangngantima a'uannu taumata? Atonna-tonna tawel! Ia'u tumba'u mangngantima panga'uanna wuassu Mawu Ruata. Apa ia'u sidutu mattinsahadda mam-molengnga naungngu taumata tadea'u ia'u maaluaassa taumata? Amung-kangngu inolaangku sidutu aroddi, ia'u walineuwe allangngi Kristus.

Ereapa lajanne Paulus nabbaji rasul

¹¹Manga turrangnga rinone maasingkata manungku Wattu'u Alaluassa apan iwabbattu'u udde darantane waline wuassu taumata. ¹²Ia'u tawe nanengkamma wattu'a udde wuassu taumata, wurru tawedu sangkatou apan nangarra'a sia'u. Mawu Yesus Kristus sassane apan namu'a lalorro n Wattu'u Alaluassa udde sia'u.

¹³Asinungka iamiu suete naaringikka su ola'u ia'u mabbiakka dorone eteudde sangkatou apan mangngimanna agama n Yahudi. Iamiu masingkata ereapa arragine ia'u su jamaatu Mawu wuŕŕu ereapa arragine ia'u mappanduma mamate simangitou. ¹⁴Sulaŕummu mappaamattu agama n Yahudi, ia'u nangillembu wuassu anambo n taumata n Yahudi apan santuwo'u. Ia'u maŕŕimada su ola'u manga inolaannu addatu iupungngu ala'mona ng kami.

¹⁵Arawe ana waugu apapia naungngu Mawu Ruata, Itou namile sia'u tantaŕanna ia'u taambe niasungkanga wuŕŕu namago sia'u iapa'imbe Sitou. ¹⁶Mawu Ruata nanualagu Anang-Nge sia'u tadea'u Watti'u Alaŕuassa su ola'u Anang-Nge wotongnge iwatti'u su manga taumata waŕine Yahudi. Su tempo udde ia'u tawe inai ringannu sangkatou madorongnga alaŕra'a. ¹⁷Ia'u lai tawe inai ringannu manga taumata su Yerusalem apan maddoroneanna wuassia'u naola'a rasul. Arawe ia'u inaita watukku leta'u Arab, see wua isudde nabelengke apia watukku Damsyik. ¹⁸Tallu tonna wua udde, ia'u inaita watukku Yerusalem maisasomba m Petrus. Ia'u uatana'a ringanni tou tumba'u mapuŕo lima su allone ala'nune. ¹⁹Ia'u tawe nassomba manga rasulle waine, tabbene'e Yakobus, tuŕrangngu Mawu.

²⁰Apa apan ta'u niwoŕŕeta indi atonna. Mawu Ruata masingkata manungku ia'u tawe mangawusu!

²¹Wua udde ia'u inaita watukku manga wageangngu Siria wuŕŕu Kilikia. ²²Na'oma n sara tempo udde manga jamaattu Saŕrani su Yudea taambe naaillaŕa sia'u ringannu uahahati. ²³Imangitou tumba'u maaringikka taumata mabbisara, "Taumata apan dorone mandaleo siami, orassa indi mabatti'u pangangimanna apan dorone ihagohakki tou." ²⁴Ne imangitou nadalote Mawu Ruata ana waugu ia'u.

Paulus wuŕŕu manga rasul apan waine

2 Mapuŕo appata su tonnane wua udde, ia'u nabelengke watukku Yerusalem su sambau ringanni Barnabas, wuŕŕu uaapidi Titus. ²Ia'u inai watukku Yerusalem ana waugu Mawu Ruata suete napaaljaatta'a sia'u manungku ia'u rinone inai. Wuŕŕu sulaŕummu sambau ammuŕanna apan tumba'u ringannu manga piaŕrangnge poiaronddi, ia'u mannaŕa'a m Watti'u Alaŕuassa apan iwabatti'u su manga taumata apan waŕine Yahudi. Ana waugu ia'u maddiri manara'u dorone, ara'e manara'u tempo indi maola'a tawe mangalene. ³Titus, apan uaammungnga sia'u, eteudde sangkatou taumata n Yunani, arawe itou tawe niwata'a tumuŕrutta atorannu sunatta, ⁴salaiwe pia manga taumata mammata'u olangnge udde. Imangitou udde manga taumata apan sinumutta awagananna sulaŕummu ammuŕanni ite wuŕŕu mattingkaola'a ere tuŕrangnga. Imangi-

tou sinumutta ringannu maḷanna-ḷannaba mannaṛrassida aḷaḷuassa apa niola'i ite ana waugu iite uaukke ringanni Kristus. Imangitou maapulu mapaawelengngi ite su olangnge paarorone ere sangkatou allangnga, ⁵arawe iami maddiri sumorṛota sara ng kadio'a wuassi mangitou, ana waugu iami maapulu mandiaga tadea'u Watti'u Aḷaḷuassa udde mangke uatana'a waresi ringanni amiu.

⁶Manimbe aroddi, tawe inolaanna wakku apan radeaannu manga taumata apan aellehanna ere piaṛrangnge wuassia'u – mawala sia'u tawe paṛḷalanne amungkangngu imangitou piaṛrangnge ara'e tawe, ana waugu Mawu Ruata tawe mamile hati. ⁷Arawe manga taumata apan aellehanna piaṛrange udde mangnga'u manungku Mawu Ruata suete napamanara'u mamasingkatu Watti'u Aḷaḷuassa su taumata waḷine Yahudi, ere lai Itou suete napamanara m Petrus namasingkatu Watti'u Aḷaḷuassa udde su taumata n Yahudi. ⁸Ana waugu Mawu Ruata nangonggolu atatohassa si Petrus maola'a rasullu taumata n Yahudi, wuṛṛu nangonggola lai atatohassa sia'u maola'a rasullu taumata waḷine Yahudi. ⁹Yakobus, Petrus wuṛṛu Yohanes, apan aellehanna naola'a manga piaṛṛa'u ja-maatta, mangnga'u manungku Mawu Ruata suete nangonggolu manara indi sia'u. Ne imangitou naa'agassa lima ringanni Barnabas wuṛṛu ia'u, maola'a sambau tatiala m pagaha hawe. See imangitou wuṛṛu iami sambaidda manungku iami sarun mammanara su wallatu manga pabbawalaga waḷine Yahudi, wuṛṛu imangitou su wallatu taumata n Yahudi. ¹⁰Tumba'u sambau darorongngi mangitou eteudde tadea'u iami umakkannu taumata asiangnga. Wuṛṛu ia'u sidutu maḷuassa mammanara udde.

Paulus nanagu si Petrus su Antiokhia

¹¹Su tempo Petrus nirumanta su Antiokhia, ia'u nanagu sitou ringannu uahahati, ana waugu pallaḷagune nassaḷa. ¹²Paarorone itou inuma'ianna u'anna suadio'a ringannu manga tuṛṛanga apan waḷine Yahudi. Arawe napawe manga taumata daroloṛrani Yakobus naran-tate, itou nassaḷu marau wuassu manga tuṛṛanga apan waḷine Yahudi wuṛṛu maddirite umanna suadio'a ringanni mangitou, ana waugu mat-ta'uttu manga taumata apan maapulu anambo n taumata udde su-natanna. ¹³Manga tuṛṛangnga Yahudi apan waine lai nattanno ere li-langkamaḷe'i Petrus, na'oma n sara Barnabas niawoheanna lai nattanno pallaḷagu mangitou. ¹⁴Aroddi ia'u naasilo manungku pallaḷagu mangitou uapapaṛḷala n atatuliḍdu Watti'u Aḷaḷuassa udde, ia'u nabbisara si Petrus su saruannu awadaalla apan uasemodda isudde. ¹⁵Amungkangngu Tuṛṛangnga sangkatou Yahudi apan buatte nabbiakka naaliḥidda tau-

mata wāline Yahudi, anio Turřrangnga orassa indi maapulu mamata'u **manga** taumata waine mabbiakka ere taumata n Yahudi?"

Taumata n Yahudi wuřru wāline Yahudi niapaasaŋamatta ana waugu mangngimanna si Kristus

¹⁵Atonna tumuřrutta tanpa inariadianna, iami indi taumata n Yahudi wuřru wāline "taumata wāline Yahudi apan marosa." ¹⁶Salaiwe aroddi iami masingkata manungku taumata nasasangkapia Mawu Ruata tumba'u ana waugu mangngimanna si Yesus Kristus, wuřru wāline ana waugu tuttuřruta tita n agama. Iami sassane lai mangngimanna Mawu Yesus Kristus tadea'u iami masasangkapia Mawu Ruata wuassu pangangimanni ami udde, wāline ana waugu mappaaattu tita n agama. Ana waugu mappaaattu tita n agama, tawe saran sangkatou masasangkapia apia ringannu Mawu Ruata. ¹⁷Iami mappandumma masasangkapia apia ringannu Mawu Ruata ringannu mabbiakka uaukki Kristus. Arawe amungkangngu suete na'ola'a aroddi, inauranna iami ta'e lai "manga taumata marosa" ere lai manga taumata wāline Yahudi, apa indi atappasanne manungku ete Kristus apan naarosa siami? Natan-tuna tawe! ¹⁸Amungkangngu ia'u manattakke mapararisikka apia atorannu tita n agama apan suete ta'u nihohakka, ne ia'u napaalġatta'a manungku ia'u suete na'ola'a lumaŋawangnga tita udde. ¹⁹Arawe ia'u natete su saruannu tita n agama - nipate n tita udde sassane - tadea'u ia'u wotongnge mabbiakka hunane su Mawu Ruata. Ia'u suete niarussa su sambau ringanni Kristus. ²⁰Orassa indi wālineuwe ia'u mabbiakka, arawe ete Kristus apan mabbiakka sulaŋummu wadangu. Wiakka apan irarřringi'u orassa indi eteudde mabbiakka ipangngimanna Ana'u Mawu Ruata apan marangngu sia'u wuřru suete nanantillu waŋangan-Ne ana waugu ia'u. ²¹Ia'u tawe mangngadio'a darangngu Mawu Ruata. Amungkangngu paa'aukku taumata ringannu Mawu Ruata mabbali mapia apia ana waugu mappaamattu tita n agama, udde mangalene papate n Kristus tawe gūnane!

Tumuřrutta tita n agama ara'e mangngimanna si Kristus

3 Manga turřrangnga taumata n Galatia! Iamiu woddo atonna. Tanne iamiu niarřrinoante n wawono'i sai? Papate n Kristus su alu arussa suete ta'u tinaŋa'a ringannu masema-semakka siamiu! ²Annama'a waŋoa'a sia'u inolaanna sambau indi: Apa iamiu suete nanengkamma Gharřaho Mawu Ruata ana waugu mappaamattu tita n agama, ara'e ana waugu iamiu naaringikka Watti'u Aŋaluassa wuassu Mawu Ruata

wurru mangngimanna si Kristus? ³Anio iamiu aroddi awoddone! Iamiu mannattake mabbiakka wakku ringannu Gharraho Mawu Ruata, ratadde orassa indi iamiu maapulu maasomba asasuungnga wuassu auatannu sassane? ⁴Tate gunane sarangkanambone apan suete niapendamanni amiu udde? Ratadde tawe gunane! ⁵Mawu Ruata nangonggolu Gharraho-Ne siamiu wurru na'ola'a manga alarindu'a su wallatti amiu. Apa Mawu Ruata na'ola'a udde ana waugu iamiu mappaaamattu tita n agama ara'e ana waugu iamiu maddaringikka Wattu'u Alaluassa udde wurru mangngimanna si Kristus?

⁶Udde ere lai uaworretta sulaumu Wuke Susi su ola'i Abraham - arendi, "Abraham mangngimanna Mawu Ruata wurru ana waugu pangangimanne udde itou nitarimattu Mawu Ruata maola'a taumata apan maaluaassa naungngu Mawu Ruata." ⁷Nariaddi rinone iamiu manutukka manungku taumata apan atonna-tonna papapulunni Abraham eteudde taumata apan mangngimanna Mawu Ruata. ⁸Wuke Susi suete na'ellega paarorone manungku Mawu Ruata namala manga taumata waline Yahudi masasangkapia apia ringannu Mawu Ruata, amungkangngu imangitou mangngimanna Sitou. Wattu'u Alaluassa udde nipaasingkata paarorone si Abraham sulaumu paaire indi, "Wuassi'o, Mawu Ruata sarun mangalamatta alawo'u pabbawalagu taumata su wowo n runia indi." ⁹Araham mangngimanna, ne itou nialamatanna. Aroddi lai anambo n taumata apan mangngimanna sarun alamatanna suadio'a ringanni Abraham.

¹⁰Manga taumata apan uatundeeta su tita n agama, sarangkanambone mabbiakka su alungngu awawontoga. Ana waugu sulaumu Wuke Susi uaworretta, "Taumata apan tawe tumurutta mappaaamattu sarangkanambone apan uaworretta sulaumu Wuke Tita n Agama, awontohannu Mawu Ruata!" ¹¹Tawe saran sangkatou apan masasangkapia Mawu Ruata ana waugu mappaaamattu tita n agama. Olangnge udde suete niapaalatta'a sulaumu Wuke Susi, "Tumba'u taumata apan mangngimanna Mawu Ruata na'oma n sara paa'aukke ringannu Mawu Ruata maola'a mapia apia, sarun maralukka!" ¹²Arawe tita n agama tawe maola'a pangaiannu pangangimanna. Sulaumu Wuke Susi uaworretta manungku taumata apan mappaaamattu tita n agama, sarun maralukka ana waugu tita udde.

¹³Arawe Kristus namallosi ite wuassu awawontogu tita n agama. Itou na'ola'a udde ringannu namala n watangan-Ne awontohanna ana waugu iite. Ana waugu sulaumu Wuke Susi uaworretta, "Niawontohante taumata apan nate niele su alu pangangeleanna." ¹⁴Kristus na'ola'a aroddi tadea'u alamatta apan pina'ire Mawu Ruata si Abraham ionggola lai su manga taumata waline Yahudi. Ringannu aroddi iite lai apan

mangngimanna Mawu Ruata, wotongnge manengkamma Gharraho, apan pina'ire Mawu Ruata udde.

Tita n agama ara'e paaire Mawu Ruata

¹⁵Manga turrangnga! Mappianne ia'u mappaaamattu sambau tuladda wuassu apa apan suete niapendamanna miallo-miallo. Amungkangngu taumata ma'ola'a sambau paaire wuɽɽu paaire udde suete nia'u su sambau, ne tawe saran sangkatou apan wotongnge mamaɽu paaire udde, ara'e manamba paaire udde. ¹⁶Manga paaire Mawu Ruata niola'u Mawu Ruata si Abraham wuɽɽu lai hunane su taumata papapulunni Abraham. Sulaɽummu Wuke Susi tawe uawoɽɽetta "wuɽɽu su manga taumata pappapulunni Abraham", atappasanne eteudde anambo n taumata. Apan uawoɽɽetta isudde eteudde "wuɽɽu hunane su taumata papapulunnu", atappasanne tumba'u sangkatou, eteudde Kristus. ¹⁷Apan ta'u iwaɽo isindi eteudde indi: paaire Mawu Ruata suete niola'a wuɽɽu niwaidda paarorone. Tita n agama apan nionggolla 430 su tonnane wua isudde tawe maawaɽu paairene wuɽɽu maapappassa paaire Mawu Ruata udde. ¹⁸Ana waugu amungkangu aonggolu Mawu Ruata uatundeeta su tita n agama, ne tate lai aonggola apan pina'ire. Ewe'e ana waugu Mawu Ruata suete na'ire si Abraham, ne Mawu Ruata nangonggolu udde sitou.

¹⁹Amungkangu aroddi, ipa'ura tita n agama nionggolla? Sasimbakke eteudde manungku tita udde nipanamba tadea'u mapaaɽiatta'u laɽawangngu taumata. Tita n agama udde tumba'u ipappaatta ma'oma n sara daranta n sangkatou papapulunni Abraham, apan nisaggo sulaɽummu paaire Mawu Ruata si Abraham. Tita n agama udde niwaɽo manga mala'ekatta ringannu paɽelene sangkatou taumata. ²⁰Ne, ɽinone pia darua m wageange, wakkute udde pia sangkatou paɽelene. Arawe Mawu Ruata tawe mappanduma paɽelene, ana waugu Itou sassane mammanara.

Atatohassu tita n agama

²¹Apa udde atappasanne manungku tita n agama uapapaɽɽala m paaire Mawu Ruata? Tawe! Ana waugu amungkangngu tita n agama nionggolla maola'a laɽannu wiakku taumata, ne taumata wotongnge masangkapia Mawu Ruata ringannu laɽanne tumuɽɽutta tita n agama. ²²Arawe sulaɽummu Wuke Susi uawoɽɽetta manungku anambo n pabawalagu taumata mangke uatana'a su aɽungngu taɽɽino n rosa. Ana waugu udde, aonggola apan pina'ire pinangiananne wuassu mangngimanna Mawu Yesus Kristus nionggolla simangitou apan mangngimanna.

²³Tantaḷanna taambe nia'omanna tempone iite mangngimanna Mawu Yesus Kristus, iite laḷu'arannu tita n agama ringannu mapia; iite naalihida niṛrimputa ma'oma n sara pangangimanni iite udde lumiatta'a. ²⁴Ringannu aroddi, tita n agama naola'a mandariaga siite ma'oma n sara Kristus rumanta ma'ola'a siite masasangkapia Mawu Ruata ana waugu iite mangngimanna si Kristus. ²⁵Orassa indi, ana waugu nia'omante tempone taumata sarun mangngimanna si Kristus, ne iite tate lai rariagannu tita n agama.

²⁶Ana waugu iamiu mangngimanna si Kristus Yesus, ne iamiu uaukka ringanni Tou; wuṛru ana waugu udde iamiu maola'a aḷaṛṛana'u Mawu Ruata. ²⁷Iamiu sarangkanambone suete nisarṛani sulaḷummu aranni Kristus, nariaddi iamiu suete nanengkamma sulaḷummu watanganni amiu pallaḷagu n Kristus sassane. ²⁸Sulaḷummu olangege indi tate lai paṛṛalane su wallatu taumata n Yahudi wuṛru taumata waḷine Yahudi, su wallatu allangnga wuṛru tawe allangnga, su wallatu esakka wuṛru wawine. Iamiu sarangkanambone sambau ana waugu Kristus Yesus. ²⁹Amungkangngu iamiu tatahuanni Kristus ne eteudde iamiu papapulunni Abraham. Ne iamiu sarun manengkamma apa apan suete pina'ire Mawu Ruata.

4 ¹⁻²Arawe ṛinone ta'u itaḷa'a ringannu masemakka, tantaḷanna sangkatou malloḷossa pussa'a n iamangnge uukke ta'e mamawo, pia taumata apan ualu'adda sitou wuṛru mammaduḷi sitou ma'oma n sara iamangnge wotongnge manantilu pussa'a udde sitou. Itou a'olaanna naola'a ere allangnga salaiwe ṛinone itou uatahuannu anambo n darotongnge udde. ³Aroddi lai iite: Tantaḷanna iite taambe natimmade, iite mattaṛruallangnga manga ghaṛṛaho apan uaparenta runia indi. ⁴Arawe napawe su temponete, Mawu Ruata mandolokku Anang-Nge su Runia. Anang-Nge udde niasungkanga wuassu sangkatou wawine wuṛru mabbia akka su aḷungngu parenta n tita n agama. ⁵Ringannu aroddi Itou namallosu manga taumata apan mabbia akka su aḷungngu parenta n tita n agama; tadea'u iite lai wotongnge maola'a aḷaṛṛana'u Mawu Ruata.

⁶Ana waugu ete iamiu udde aḷaṛṛana'u Mawu Ruata, Mawu Ruata nandolokku Ghaṛṛaho n Anang-Nge sinumutta sulaḷummu naungngu wuṛru naungku, eteudde Ghaṛṛaho apan mabbisara, "Iamangnga, oh Iamangku." ⁷Nariaddi, iamiu waḷine lai allangnga, ewe'e ana'a. Wuṛru ana waugu iamiu ana'u Mawu Ruata, ne Mawu Ruata sarun mangonggola siamiu aḷawo'u sarannapa apan suete nisaddia-Ne su manga aḷaṛṛanang-Nge.

Asasinggawangngi Paulus su manga taumata n Galatia

⁸Dorone iamiu tawe maaillaḷa Mawu Ruata, ana waugu udde iamiu naola'a allangngu manga taṛṛino apan iraṛrangngo ere mawu, arawe rinone waḷine Mawu Ruata. ⁹Arawe orassa indi iamiu maaillaḷa Mawu Ruata, ara'e mappianne lai isago, Mawu Ruata maaillaḷa siamiu. Ne anio iamiu maapulu mabelengnga apia su manga ghaṛraho n runia indi, apan lome wuṛṛu asiangnga? Anio iamiu ta'e maapulu mai'allangnga apia su manga ghaṛraho udde? ¹⁰Iamiu mallaghu manga allo, manga wuḷanna, wuṛṛu manga tonna apan suete nitantunna. ¹¹Ia'u sussinggawangnga, aṛṛengenne asasaha'u indi siamiu tawe gunane.

¹²Manga tuṛrangnga! Ia'u sumaḷande siamiu tadea'u iamiu maola'a ere ia'u. Ana waugu ia'u lai suete naola'a ere iamiu. Iamiu tawe na'ola'a pasasaḷa su saruanguku. ¹³Asinungka iamiu ta'e maanaungnga apa apan naa'ola'a sia'u paarorone namasingkatu Watti'u Aḷaḷuassa udde siamiu. Panattaṛṛanne ana waugu ia'u nirumadda'a. ¹⁴Su tempo udde iamiu maddintingu, salaiwe wadangu naola'a ere wawono'a apan wahewalla siamiu. Ewe'e iamiu mannarimma'u ere lai nanarimmatu mala'ekattu Mawu Ruata ara'e ere manarimmatta si Kristus Yesus sassane. ¹⁵Iamiu lulluassa atonna su tempo udde. Arawe orassa indi, suapate aḷaḷuassa udde? Ia'u masingkata manungku su tempo udde iamiu maapulu mallasso'a mata ng kamiu sassane wuṛṛu ionggola sia'u, amungkangngu udde wotongnge olaanna. ¹⁶Apa iamiu orassa indi massunna sia'u ere seetta, ana waugu ia'u mabatti'u apapia siamiu?

¹⁷Manga taumata waine udde ringannu maṛṛimada maddea'a siamiu, arawe manga pandumanni mangitou laḷeo. Imangitou tumba'u maapulu mapataḷei ng kamiu wua dingani ami, tadea'u iamiu tumanta-longnga simangitou ringannu maṛṛimada. ¹⁸Atonna mapia amungkangngu maṛṛimada su anambo n inolaanna apan mapia, sambaliate sidutu aroddi wuṛṛu arie tumba'u amungkangngu ia'u su sambau ringanni amiu. ¹⁹Manga aḷaṛṛana'u aṛangnguanna! Ia'u orassa indi uatataṛṛanga lai ana waugu iamiu. Ia'u uatataṛṛanga ere sangkatou inangnga apan uatataṛṛanga su tempo mangunsiwe. Ia'u sidutu sarun matataṛṛanga, amungkangu pallaḷagu n Kristus taambe nusippa su wadangu! ²⁰Ia'u maḷutu atonna matana'a su sambau su wallatti amiu orassa indi, tadea'u ia'u wotongnge maggahatto ringanni amiu ringannu tingikka apan paṛṛalane, ana waugu ia'u wagga sarun ma'ola'a apa lai ringanni amiu!

Hagar wuṛṛu Sara maola'a tuḷada

²¹Manga tuṛṛangnga apan maapulu mabbiakka su aḷungngu parenta manga tita n agama, paddaringikka sia'u! Ia'u sarun mamasingkata siamiu apa apan su ṛinone uawoṛṛetta sulaḷummu Wuke Tita n Musa. ²²Isudde uawoṛṛetta manungku Abraham pia dua ng katou ana'a: Inangngu ana'a sangkatou udde sangkatou allangnga, wuṛṛu inangngu ana'a waine udde sangkatou waḷine allangnga. ²³Ana'a wuassu wawine apan naola'a allangnga, niasungkanga ere inanaramanne ana waugu itou wuassu apalu n taumata. Arawe wuassu wawine waḷine allangnga, niasungkanga ana waugu pina'ire Mawu Ruata. ²⁴Indi wotongnge ipaatta maola'a sambau sasumandinga. Rua ng katou wawine udde, paṛṛimaunnapa darua paaire: sambau wuassu Wowo n Sinai – eteudde Hagar; aḷaṛṛanangnge niasungkanga maola'a allangnga. ²⁵Nariaddi, eteudde Hagar Wowo n Sinai, su leta'u Arab. Itou pinanumandingannu Soa n Yerusalem wuṛṛu anambo n tumanangnge apan orassa indi ta'e naola'a allangnga. ²⁶Arawe Yerusalem apan su surga eteudde Yerusalem waḷine allangnga, wuṛṛu eteudde inangngi ite. ²⁷Ana waugu sulaḷummu Wuke Susi uawoṛṛetta,

"Paḷaḷuasse i'o wawine tinna, apan tawe saran paassa nangunsiwe!

Lallala'e wuṛṛu paggiote i'o apan saran paassa tawe namendama taddu'a mangngunsiwe!

Ana waugu wawine apan tinantangu awingnge sarun maasomba ana'a lembon anamboanne

wuassu wawine apan mabbiakka ringannu awingnge."

²⁸Manga tuṛṛangnga! Eteudde iamiu sassane aḷaṛṛana'u Mawu Ruata apan niasungkanga ana waugu paaire Mawu Ruata; iamiu udde uasulungngi Ishak. ²⁹Su tempo udde ana'a apan niasungkanga tumuṛṛuttu apulu n taumata, mammate ana'a apan niasungkanga ana waugu apulu Ghaṛṛaho Mawu Ruata. Aroddi lai orassa indi. ³⁰Arawe apa apan uawoṛṛetta sulaḷummu Wuke Susi? Isudde uawoṛṛetta arendi: "Limbuarṛete allangnga wawine udde su sambau ringannu anangnge, ana waugu ana'a wuassu allangnga wawine udde tawe uatahuanna su sambau ringannu ana'a wuassu waḷine allangnga udde." ³¹Nariaddi, manga tuṛṛangnga, iite indi waḷinewe aḷaṛṛana'a wuassu sangkatou allangnga wawine; eteudde iite manga ana'a wuassu wawine apan waḷine allangnga.

Paa'aggasa apapallosi amiu

5 Iite orassa indi naliute, ana waugu Kristus suete namallosi ite! Ana waugu udde paa'agassa apapallosa udde, wufru ariete pattingka allangnga apia.

²Paanaunge, amungkangngu iamiu madorongnga maisunatta, udde mangalene Kristus tawe gunane siamiu. Nabbisara wisara indi, ete-udde ia'u sassane, Paulus. ³Paassa lai ia'u mappaanaungnga su tau-mata apan ma'isunatta, manungku itou rinone mappaamattu anambo n tita n agama! ⁴Amungkangngu iamiu maapulu masasangkapia apia ringannu Mawu Ruata wuassu lajumu tita n agama, udde atap-pasanne paa'aukku ringanni Kristus nabassute. Ringannu aroddi iamiu mabbiakka su liudduarangngu Mawu Ruata. ⁵Arawe siami indi, iami manggantima manungku ringannu tulungannu Gharraho Mawu Ruata wufru sulajumu pangangimanni ami si Kristus, Mawu Ruata namala ng kami masasangkapia apia ringanni Tou. ⁶Ana waugu amungkangu iite suete naaukka ringanni Kristus Yesus, su ola'u tumufrutta ara'e maddiri tumufrutta atorannu sunatta tate maola'a sambau hatto lai. Lembon apianne tumba'u mangngimanna si Kristus, wufru udde nilumiatta'a sulajumuarangngu ng kite su taumata waine.

⁷Dorone iamiu mammanara ringannu mapia! Orassa indi anio iamiu maddirite tumufrutta apia apulu Mawu Ruata? Isai suete nassalo'i amiu? ⁸Natantuna iapa ma'ola'a udde walnewe Mawu Ruata apan suete namago siamiu! ⁹"Ragi adio'a sarun mapaatuwo n anambo n taponina niluakka," unnu taumata. ¹⁰Salaiwe aroddi ia'u ta'e mangngimanna manungku ringiranni amiu tawe nawalu, ana waugu iite suete naaukka ringanni Kristus. Wufru ia'u mangngimanna manungku isai-sai apan mangngaliwu n ringirannu, sarun irruumannu Mawu Ruata.

¹¹Matataffino sia'u, manga tuffangnga, anio ia'u mangke ipasseetta amungkangu ia'u ta'e mammasingkata manungku sunatta udde ta'e wotongnge? Amungkangngu atonna ia'u ta'e mammasingkata aroddi, ne bawalo'u su ola'u arussa ng Kristus tawe maaola'a patatiakka. ¹²Lembon apianne manga taumata apan mangngaliwu n ringirannu udde mappianne lapiddu sumabanga wuassu jamaatta!

¹³Iamiu suete niwagoanna maola'a taumata apan napallose. Arawe arie mappaattu apapallosi amiu udde sidutu ma'ola'a apulu naungngi amiu sassane. Arawe rinone iamiu sidutu uaa'akkana wufru sidutu uaa'imbe. ¹⁴Anambo n tita n agama naammulle sulajumu parenta sambau indi, "Rinone iamiu uararangngu su sansulungngu taumata ere lai iamiu mandangngu wadangngu sassane." ¹⁵Arawe amungkangu iamiu

mangke uaarřautta, paatemhamma, panginsueanne iamiu marřimunsa'a suadio'a.

Apulu n Gharřaho Mawu Ruata wuřru apulu n taumata

¹⁶Pandumangku arendi: Wala'e Gharřaho Mawu Ruata mangehetta siamiu wuřru ariewe mabbiakka tumuřrutta apulu m pallařagu n taumata. ¹⁷Ana waugu apulu n taumata uatataae n apulu n Gharřaho Mawu Ruata, wuřru apulu n Gharřaho Mawu Ruata uatataae n apulu n taumata. Itarua mangke tawe massomba, na'oma n sara iamiu tawe maaola'a apa apan ipaapulu ng kamiu. ¹⁸Arawe amungkangu Gharřaho Mawu Ruata mangnehetta siamiu, ne iamiu tawe paparentannu tita n agama.

¹⁹Apulu m pallařagu n taumata nilumiatta'a sulařummu manga inolaanna apan lařeo, nallařuhuranna, wuřru tawe su řinone; ²⁰sulařummu pasasuba monganna, wuřru tararoti; sulařummu pasaseetta, uawawuřo, mallu'adda awingnge, mařihakka masa'u, wuřru tumba'u marřingiddu watanganne sassane; patatařei wuřru uasasamba'a, ²¹mangngune, mabbu'anna, tarřa ramea wuřru ařawo'u inolaanna waine. Sulařummu sarangkanambone udde ia'u mapaanaungnga siamiu orassa indi, su ereapa lai ia'u napaananungnga siamiu rorone, manungku manga taumata apan ma'ola'a inolaanna ereudde tawe maola'a ařarřana'u Mawu Ruata.

²²Arawe, amungkangu manga taumata aehetannu Gharřaho Mawu Ruata hessine eteudde: Imangitou uararangngu, imangitou lullua-ssa, imangitou pia atatammudu naungnga, imangitou masabare wuřru mapia su saruannu taumata waine, imangitou matuřrutta, ²³imangitou masarřionto'a, wuřru wotongnge maatarřangnga apulu nanungnga. Tawe tita n agama apan manningaddu manga inolaanna ereudde. ²⁴Manga taumata apan naola'e pussa'a n Kristus Yesus, manga taumata udde suete nanantangngu pallařagu n taumata ringannu ařawo'u apulu naungnge wuřru pallařagune. ²⁵Gharřaho Mawu Ruata suete nangonggola siite wiakka apan wakku; ana waugu udde ete Itou lai řinone mangatokku wiakki ite. ²⁶Ite tawe wotongnge mattingkawunga, wuřru maddařařeo naungnga, wuřru uaa'une sangkatou ringannu waine.

Uatatuřlungga

6 Manga tuřřangnga! Amungkangngu sangkatou niaratinganna ma'ola'a rosa, řinone iamiu mabbiakka tuttuřrutta Gharřaho Mawu Ruata, mangehetta taumata udde mabelengnga su lařanna apan narřino. Arawe iamiu řinone ma'ola'a udde ringannu masarřionto'a wuřru paariagai arie

ma'oma n sara iamiu sassane lai awono'anna. ²Rinone iamiu uata-tuɽungnga uapasanna winabbawa n taumata waine tadea'u ringannu aroddi iamiu tuttuɽruta parenta n Kristus. ³Amungkangu sangkatou massunna watanganne mappianna, wutte'e tawe, taumata udde nangawusu watanganne sassane. ⁴Suapa n taumata, ɽinone mamarikissa sassane apa pallaɽagune mapia ara'e laɽeo. Amungkangu mapia, itou wotongnge mamarabunga n inolaanne udde. Arawe arie itou manumandingi tou ringannu apa apan a'olaannu taumata waine. ⁵Ana waugu sangkatou-sangkatou ɽinone mamasanna winabbawane sassane.

⁶Taumata apan mannengkama aɽaɽa'i Kristus, ɽinone mattahia ringannu hurune anambo n apa apan mapia apan tatahuannanni tou.

⁷Arie awahianna. Mawu Ruata tawe ianalangnga! Apa apan isuanna eteudde lai apan itinganna. ⁸Amungkangu taumata massuanna tumuɽruttu pallaɽagu n taumata, itou sarun mangitingnga apapate wuassu pallaɽagune udde. Arawe amungkangu itou massuanna tumuɽruttu piaɽa'u Ghaɽraho Mawu Ruata, itou sarun mangitingnga wiakka tutune wuɽɽu maɽannu-ɽannu wuassu Ghaɽraho Mawu Ruata. ⁹Ana waugu udde arie iite mawusa ma'ola'a manga inolaanna mapia; ana waugu amungkangu iite tawe illoɽone mammanara manara udde su paassa iite sarun mangitingnga wuane. ¹⁰Nariaddi, tantaɽanna ta'e pia tempo siite, ɽinone iite ma'ola'a apapia su anambo n taumata, nipangillembu su manga tuɽranggi ite apan sulaɽummu pangangimanna sambau.

Iapaanaungnga wuɽɽu tabea'u

¹¹Paatutuɽre paapia-pia wageangnge indi apan ta'u niwoɽreta sassane ringannu woɽretta apan wahahewalla. ¹²Manga taumata apan maapulu mapaatolo m batanganne ringannu inolaannu runia, ete imangitou apan mappandumma mamata'i amiu tumuɽrutta atorannu sunatta. Arawe imangitou na'ola'a udde tumba'u tadea'u imangitou tawe sansarannu taumata n Yahudi ana waugu arussa Mawu Yesus. ¹³Manga taumata apan tuttuɽruta atorannu sunatta lai tawe tumuɽrutta tita n agama. Arawe imangitou maapulu iamiu sunatanna, tadea'u imangitou wotongnge lumuassa manungku iamiu tinumuɽrutta atoranna udde. ¹⁴Arawe ia'u atonna-tonna maddiri lumuassu aɽawo'u apa, tumba'u su Mawu ng kite Yesus Kristus apan nate niarussa. Wuɽɽu ana waugu Itou suete nate niarussa, ne runia tate mangalene lai sia'u, wuɽɽu ana waugu runia indi, pendamangku ia'u lai ere natete. ¹⁵Nisunatta ara'e tawe nisunatta udde tawe maola'a hatto. Apianne eteudde maola'a taumata wakku. ¹⁶Su taumata apan mabbiakka ringannu ɽingidda udde, aroddi lai su

anambo n alarɔana'u Mawu Ruata, ia'u mangngantima Mawu Ruata sarun mangonggolu paddarame wurru alaman-Ne.

¹⁷Wua udde, arie pia sangkatou lai mapaasusa'u lai, ana waugu su wadanku pia manga tatiala manungku ia'u mallalarɔrenggennu Mawu Yesus.

¹⁸Doronganna Mawu ng kite Yesus Kristus sidutu mangalamatta manga turɔrangnga. Amin.

Tabea ng kami,
Paulus

SURATTI PAULUS SU JAMAATTU EFESUS

WISARA TAŁAANE

Sulałummu *Suratti Paulus Su Jamaattu Efesus*, mamamořrene ma-paatalagu Pandumannu Mawu Ruata tadea'u "Uřili m pati'uppu Runia, mapia su surga ara'e su runia, maola'a sambau ringanni Kristus ere sangkatou tembonanne" (1:10). Suratta indi maola'a lai sambau wawaggo su alařřana'u Mawu Ruata tadea'u imangitou maatutukka lařořro m pandumanna mapia wuassu Mawu Ruata mappa'aukka anambo n pabbawalagu taumata sulałummi Kristus.

Sulałummu wageangnge paarorone surattu Efesus indi niapaa-singkatta ereapa paa'aukka udde mariaddi. Ipanala'a n olangnge udde itou nabbatti'u ereapa Mawu Ruata lamangnga suete namile alařřanang-Nge, ereapa Mawu Ruata sulałummi Yesus Kristus Anang-Nge, nang-ampunga wuřru namallosu alařřanang-Nge wuassu rosa, wuřru ere-apa paaire Mawu Ruata udde tohasannu Ghařřaho Mawu Ruata. Sulałummu wageangnge aruane, niwařo su manga mabbawasane tadea'u imangitou mabbiakka su paddarame tadea'u pasasambau mangitou maola'a ere pabbawalaga apan mangngimanna si Kristus, wotongnge mariaddi.

Maddea'a mapaałiatta'a manungku alařřana'u Mawu Ruata naola'e sambau ana waugu naaukke ringanni Kristus, mamamořrene nappaattu mangapira sasanato'a. Jamaatta eteudde ere wadangnga wuřru Kristus maola'a temboanne, ara'e ere sambau waře apan niapararisikka su rapappake watu eteudde Kristus, ara'e ere sangkatou wawine wuřru Kristus naola'a awingnge. Mamamořrene lembon natuno su tempo naanaungnga alařřamattu Mawu Ruata sulałummi Kristus, na'oma n sara manga sasanato'a apan nipaatta sulałummu suranne niapaałiatta'a manungku naungnge lembon wahewalla ringannu adiangkamanna wuřru daralo su Mawu. Manga inolaanne niellehanne wuassu darangngu n Kristus, wuassu papate-Ne, pangangampu-Nge, apapia naung-Nge wuřru awawantu-Ge.

Laloŋŋone

Panattarŋanne	1:1-2
Kristus wuŋŋu gharreda-Ne	1:3-3:21
Mabbiakka waku ere taumata n Saŋŋani	4:1-6:20
Panginsueanne	6:21-24

1 Aļarřana'u Mawu Ruata su Efesus, apan matuřřutta Mawu Yesus Kristus!

²Ia'u Paulus, rasulli Kristus Yesus wuassu apulu n Mawu Ruata, mangngantimma doronganna Mawu Ruata Iamangngi ite wuřřu Mawu Yesus Kristus mangnggolu aļamatta wuřřu paddarame siamiu.

Aļamattu Ghařřaho Mawu Ruata sulaļummi Kristus

³Dalo su Mawu Ruata, Iamangngu Mawu ng kite Yesus Kristus!

Itou nangaļamatta siite ringannu aļawo'u aļamattu Mawu Ruata sulaļummu surga, ana waugu iite uaukka ringanni Kristus. ⁴Tantaļanna runia indi taambe nariaddi, Mawu Ruata suete namile siite sulaļummi Yesus Kristus ringannu pandumanna tadea'u iite maola'a pussa'a-Ne sassane wuřřu tawe saļane su saruan-Ne. Ana waugu darangngu n Mawu Ruata, ⁵ne, Itou suete nanantuna paarorone manungku sulaļummi Yesus Kristus, Itou sarun manga'u siite maola'a manga aļarřanang-Nge sassane. Wuřřu atonna eteudde apan tipusanni Tou. ⁶Dalo su Mawu Ruata apan mawantuga, ana waugu sulaļummu Anang-Nge apan arangnguanna, Itou lembon marangngu siite.

⁷Ana waugu wuassu papate n Kristus, iite nipallosu Mawu Ruata, atappasanne manungku Itou suete nangampungu siite wuassu manga rosa ng kite. ⁸Itou na'ola'a udde ana waugu Itou lembon marangngu siite, wuřřu darangngu udde nionggolla siite ringannu aļawo'u apande wuřřu asingkata. ⁹Tumuřřuttu apulu-Ne sassane, Mawu Ruata nama-singkata siite addapingngu manara-Ne; Itou suete nabbisara manungku manara-Ne udde sarun insueanna sulaļummi Kristus. ¹⁰Manara udde eteudde tadea'u aļawo'a, mapia udde su surga ara'e su runia, maola'a sambau ringanni Kristus ere sangkatou tembonanne. Wuřřu olangnge udde sarun insueannu Mawu Ruata amungkangu nia'omante tempone.

¹¹Mawu Ruata mammanara aļawo'a tumuřřuttu apulu-Ne wuřřu řarřawen-Ne sassane. Ro'e n paarorone Itou suete namile siite, ana waugu Itou maapulu tadea'u iite maola'a aļarřanang-Nge ana waugu uaukka ringanni Kristus. ¹²Wala'e iite, apan paarorone mangngantima si Kristus, maddalo Mawu Ruata ana waugu awawantu-Ge!

¹³Iamiu lai suete naola'a aļarřana'u Mawu Ruata su tempo iamiu naaringikka tanata Mawu Ruata, eteudde Watti'u Aļaļuassa apan nangonggolu asasaļamatta siamiu. Iamiu mangngimanna Mawu Yesus Kristus, ana waugu udde Mawu Ruata nangonggolu tatiala pussa'a-Ne siamiu, eteudde Ghařřaho-Ne apan suete pina'ire-Ne. ¹⁴Ghařřaho udde naola'a watařřu manungku iite sarun manengkamma apa apan suete pina'ire Mawu Ruata su aļarřanang-Nge. Indi mangngonggolu antimma

siite manungku Mawu Ruata sarun mamallosu ałarřanang-Nge. Dalo su Mawu Ruata ana waugu awawantu-Ge!

Aalıomanni Paulus

¹⁵Ana waugu udde, ro'e n ia'u naaringikka manungku iamiu mangngimanna Mawu Yesus, wuřru iamiu suete niumakkanu anambo n ałarřana'u Mawu Ruata, ¹⁶ia'u tawe illołone maadiangkamanna su Mawu Ruata su ola'i amiu. Sidutu ia'u mannago ng karannu su tempo ia'u u'alıomanna. ¹⁷Ia'u sussałande tadea'u Mawu Ruata ng kite Yesus Kristus, Iamangnga apan mawantuga, nangonggolu Gharřaho-Ne siamiu. Gharřaho udde sarun ma'ola'a siamiu pande, wuřru sarun mapaalıatta'u Mawu Ruata siamiu na'oma n sara iamiu maaillała Sitou. ¹⁸Ia'u sumałande tadea'u Mawu Ruata mamu'a řingirřannu ma'oma n sara maola'a masemakka; tadea'u iamiu maasunna apa apan aantimanni amiu wuassu Mawu Ruata apan namago siamiu. Wuřru lai tadea'u iamiu maasingkata aroddi anambone ałamatta apan marřamaga apan suete nissaddia Mawu Ruata su ałarřanang-Nge; ¹⁹wuřru aroddi ahewalle Mawu Ruata mammanara ringannu napene n tarřino su wadangngi ite apan mangngimanna. Tarřino Mawu Ruata udde naalıhida tarřino apan ahewałanne, ²⁰apan nipaatti Tou su tempo napaawiakki Kristus apia wuassu papate wuřru nangonggola Sitou aiananna atanggarranne su sambau ringannu Mawu Ruata su surga.

²¹Aiananni Kristus udde mattanggarrane marau wuassu aławo'u aianannu pamarenta, aławo'u tembonanne, aławo'u piarřangge, aławo'u manga tuangnga wuřru isai lai apan suete nionggolannu aiananne apan matanggakka, mapia udde mabbiakka su tempo indi, ara'e mabbiakka su tempo addantane. ²²Mawu Ruata napasuřrubbawa n sarangkanambone udde su ałunggu parenta n Kristus, wuřru nangonggoli Kristus su jamaatta maola'a tembonannu aławo'u jamaatta. ²³Eteudde jamaatta wadangngi Kristus, nisuungngi Tou apan napasuungngu sarangkanambone su aławo'u tampa.

Wuassu papate mattuda n awawiakka

2 Dorone iamiu natete sulałummu pangangimanna ana waugu iamiu marosa wuřru nilumawangnga manga parenta Mawu Ruata. ²Su tempo udde iamiu tuttuřruta aławo'u apulu n runia indi; eteudde iamiu matuřrutta su tembonannu winalanganna, eteudde gharřaho apan marosa indi uaintarřo sulałummu naungngu manga taumata apan mad-

diri tumurutta Mawu Ruata. ³Dorone iite sarangkanambone lai uasulunggi mangitou; iite mabbiakka tutturuta pallaḷagu ng kite taumata wurru mammanara manara apan maaluaassa wadangnga wurru ringiranni ite. Su tempo udde iite naola'a manga taumata apan niarriaannu asasa'u Mawu Ruata, ere lai manga taumata waine.

⁴Arawe aroddi ahewalle darangngu Mawu Ruata! Itou aroddi marangngu siite, ⁵na'oma n sara su tempo iite ta'e nate sulaḷummu gharraho ana waugu manga laḷawangngi ite, Itou napaawiakki ite apia su sambau ringanni Kristus. Nariaddi tumba'u apapia naungngu Mawu Ruata iamiu naasomba asalaḷamatta. ⁶Ana waugu iite uauukka ringanni Kristus Yesus, Mawu Ruata napaawiakki ite apia su sambau ringanni Tou, tadea'u iite mamarenta lai suadio'a ringanni Tou sulaḷummu surga. ⁷Mawu Ruata na'ola'a udde tadea'u su tempo apan rumanta, taumata wotongnge maasilo aroddi ahewalle darangngu Mawu Ruata. Darangngu udde niapaasilo Mawu Ruata sulaḷummu apapia naung-Nge siite sulaḷummi Kristus Yesus. ⁸⁻⁹Mawu Ruata niuḡakkani amiu, ana waugu udde Itou nanaḷamatta siamiu, ana waugu iamiu mangngimanna Mawu Yesus. Asalaḷamatti amiu udde waḷinewe asombangu asasahaddu sassane. Sarangkanambone udde aonggolu Mawu Ruata. Nariaddi, tawe saran sangkatou apan wotongnge mamunga m watanganne su olangnge udde. ¹⁰Ete iite indi riadiannu Mawu Ruata, wurru wuassi Kristus Yesus, Mawu Ruata na'ola'a siite, tadea'u iite mammanara manga inolaanna apan mapia apan suete nissaddia n Tou siite.

Su sambau ana waugu Kristus

¹¹Manga turrangnga apan waḷine Yahudi! Paanaunge ririnu su tempo rorone: Iamiu isassago "taumata tawe nissunatta" unnu taumata n Yahudi apan mangnga'u ririne suete nissunatta (pandumanne apan suete naasomba tatiala niola'u taumata su wadangngi mangitou). ¹²Su tempo udde iamiu tawe uauukka ringanni Kristus, iamiu taumata lo'a apan tawe nasutta su pabbawalaga apan nipile Mawu Ruata. Iamiu tawe nasutta sulaḷummu paaire apan niola'u Mawu Ruata ringannu pabbawala-Ge. Iamiu mabbiakka sulaḷummu runia indi tawe antimma wurru tawe Mawu Ruata. Iamiu tawe nasutta sulaḷummu paaire apan niola'u Mawu Ruata ringannu pabbawala-Ge. Iamiu mabbiakka sulaḷummu runia indi tawe antimma wurru tawe Mawu Ruata. ¹³Arawe orassa indi, ana waugu iamiu suete naauukka ringanni Kristus Yesus, iamiu apan rorone marau, suete niapaarani ana waugu papate n Kristus. ¹⁴Ana waugu Kristus sassane mandarame ng kite. Itou napaaukku manga taumata n Yahudi wurru manga taumata waḷine Yahudi

naola'a sambau pabbawalaga. Tanda'a passaranna su wallatti mangitou, eteudde pasaseetta, suete niŕrimunsa'i Kristus ringannu nanantillu watangan-Ne sassane. ¹⁵Tita n agama Yahudi ringannu manga parenta wuŕru manga atoranne suete nipappasi Kristus tadea'u pabbawalaga darua udde maola'a sambau pabbawalagu taumata wakku, apan uaukka ringanni Tou. Ringannu olangnge udde Kristus nangapiddu paddarame. ¹⁶Wuassu papate-Ne su alu arussa, Kristus napaukku pabbawalaga darua udde, wuŕru nandame n mangitou ringannu Mawu Ruata, na'oma n sara nawulite pasaseetta udde. ¹⁷Ana waugu udde Mawu Yesu ni-rumanta namasingkattu Watti'u Alaŕuassa su ola'u paddarame udde siamiu; mapia siamiu waŕine taumata n Yahudi apan rorone marau wuassu Mawu Ruata, ara'e lai su taumata n Yahudi apan marani Mawu Ruata. ¹⁸Sulaŕummi Kristus, iite sarangkanambone – mapia taumata n Yahudi ara'e taumata waŕine Yahudi – wuassu Ghaŕraho Mawu Ruata man sambau, wotongnge mangundani n lamangnga.

¹⁹Ana waugu udde, iamiu tate lai nasutta taumata lo'a ara'e taumata n liudde. Orassa indi iamiu nareengke pabbawalagu Mawu Ruata. Iamiu lai naola'e alaŕrana'u laŕoŕro n araratuannu Mawu Ruata. ²⁰Iamiu lai suete niapararisikka su rapappakke apan niaddo manga rasul wuŕru manga nabi, ringanni Kristus Yesu sambau watu apan apianne. ²¹Ete Itou apan ngatokku ahewallu waŕe udde naola'a Waŕe Mawu Ruata apan tumba'u hunane su Mawu. ²²Ana waugu mabbiakka uaukka ringanni Kristus, iamiu lai tantaŕanna iapararisikka su sambau ringannu manga taumata waine maola'a sambau Waŕe Mawu Ruata; isudde Mawu Ruata uatana'a ringannu Ghaŕraho-Ne.

Manara m Paulus su taumata waŕine Yahudi

3 Ana waugu udde ia'u Paulus, nitaŕro su tuttupanna ana waugu Kristus Yesu maola'a huna ng kamiu taumata waŕine Yahudi. ²Asinungka iamiu suete naaringikka manungku Mawu Ruata, ana waugu apapia naung-Nge, Itou suete nangonggola sia'u manara indi hunane siamiu. ³Mawu Ruata namasingkattu addapingngu manara-Ne wuŕru nabaŕo sia'u. (Su olangnge indi suete ta'u niworŕeta aŕiu rosone ringannu maautta, ⁴wuŕru amungkangu iamiu mabbasa, iamiu sarun maasunna addapingi Kristus ere lai ia'u maasunna.) ⁵Dorone addapingnge udde tawe niapaasingkatta su taumata, arawe orassa indi Ghaŕraho Mawu Ruata suete namasingkata su manga rasul wuŕru nabi-Ne. ⁶Addapingnga udde ete indi: Sulaŕummi Watti'u Alaŕuassa udde, taumata waŕine Yahudi, maapendamma lai manga alaŕattu Mawu Ruata apan dorone nissaddia tumba'u su taumata n Yahudi.

Manga taumata wāline Yahudi naola'e wageangngu wadangnga sambau, wuṛṛu manengkamma lai suadio'a apa apan suete pina'ire Mawu Ruata sulalummi Kristus Yesus.

⁷Mawu Ruata nangonggulu alamatta sia'u – eteudde manara – mam-masingkatu Watti'u Aḷaḷuassa udde. Ia'u nanengkamma manara udde wuassu taṛṛino Mawu Ruata apan mammanara sulalummu naungku. ⁸Su wallatu anambo n aḷaṛṛana'u Mawu Ruata, ete ia'u araḷeoanne. Arawe Mawu Ruata nangonggolu alamatta indi sia'u: Manara mammasingkatu Watti'u Aḷaḷuassa su taumata wāline Yahudi su ola'u paa'ala ng Kristus apan tawe masue; ⁹wuṛṛu lai tadea'u wuassia'u anambo n taumata maasingkata ereapa Mawu Ruata, Mandariaddi ulili m pati'uppa indi, napaamattu manara-Ne ro'e n dorone apan iadappingnga su runia. ¹⁰Pandumannu Mawu Ruata eteudde, tadea'u orassa indi, wuassu jam-aatta sarangkanambone apan uaagassa taṛṛino su winalanganna masingkatu apande Mawu Ruata su aḷawo'u inolanne. ¹¹Mawu Ruata na'ola'a udde wuassu manara-Ne apan tawe panginsueanne, apan niolang-Nge sulalummi Kristus Yesus Mawu ng kite. ¹²Ringannu mangngimanna si Kristus wuṛṛu ana waugu uaaukka ringanni Tou, iite niwala wotongnge mangundani Mawu Ruata ringannu napene m pangangimanna. ¹³Ana waugu udde darorongku eteudde: arie paasinggawangnga su ola'u asasusa'u indi ana waugu iamiu, ana waugu sarangkanambone udde huna n apapianu.

Darangngu n Kristus

¹⁴Ana waugu udde ia'u niuamāintudda su saruannu Iamangnga. ¹⁵Ete wuassi Tou suapan pabbawalaga su surga wuṛṛu su runia menengkamma pallaḷagu-Ne apan apianne. ¹⁶Ia'u u'āliomanna doronganna Mawu Ruata apan mawantuga maapulu manohassa naungngu ringannu Ghaṛraho-Ne. ¹⁷Doronganna ana waugu iamiu mangngimanna si Kristus, Kristus matana'a sulalummu naungngu, wuṛṛu wiakku niwantanna wuṛṛu niparentannu darangngu. ¹⁸Ia'u u'āliomanna doronganna suadio'a ringannu anambo n pabbawalaga Mawu Ruata, iamiu wotongnge maasunna aroddi ahewalle wuṛṛu aḷo'engnge wuṛṛu atanggakke wuṛṛu aḷalumme darangngu ng Kristus, ¹⁹apan ringannu ringiṛṛannu taumata tawe iasunna sara ng kadio'a. Doronganna iamiu maaillala darangngu ng Kristus udde, na'oma n sara iamiu mapene n aapulu Mawu Ruata apan nasuungnga.

²⁰Ringannu taṛṛino Mawu Ruata apan maṛṛimadda mammanara sulalummu naunggi ite, Mawu Ruata wotongnge ma'ola'a mannamboanne wuassu apa apan wotongnge doronganni ite ara'e irarṛingiddi

ite. ²¹Rinone Mawu Ruata wantuhanna sara marrawa mappulunna sulalummu jamaatta, wuassi Kristus Yesus. Daralo su Mawu Ruata saran malannu-lannu! Amin.

Paa'aukku wadangnga

4 Ana waugu udde ia'u - sangkatou taumata n ruumanna, apan nitaranganna ana waugu mangngimbe Mawu - sussalande siamiu: pabbiakke uaturruta ere io sangkatou taumata apan suete niwagoannu Mawu Ruata. ²Rinone naungngi amiu sidutu mawawo, masarriorito'a, wufru masabare. Paasiloa'a darangngunu ringannu uatatu lungnga sangkatou ringannu waine. ³Pammanarate paarimadda su ipabbiakka su paddarame tadea'u paa'aukka apan niola'u Gharraho Mawu Ruata udde mangke pappadulananna. ⁴Tumba'u pia badangnga sambau, wufru Gharraho sambau. Aroddi lai iamiu suete niwagoanna su pangangan-timma sambau apan uasulungnga. ⁵Mawu tumba'u sambau, sambau pangangimanna, wufru sambau pananarrani, ⁶wufru Mawu Ruata man sambau apan naola'a lamangngu anambo n n taumata. Ete Itou Mawu n ulili m pati'uppa, apan mammanara sulalummu sarangkanambone, wufru uatarfino sulalummu sarangkanambone.

⁷Iite sangkatou-sangkatou mannengkamma sambau aonggola tumuruttu apa apan nionggoli Kristus. ⁸Sulalummu Wuke Susi uaworretta,

"Su tempo Itou niuwawitta su tampa

apan atanggaranne,

Itou uaapiddu manambo taumata n ruumanna;

wufru Itou nangonggolu manga aonggola su taumata."

⁹Ne, amungkangu iwisara "Itou niuwawitta" atappasanne manungku Itou paarorone suete sinumossokka na'oma n sara su tampa awawoanne su runia indi. ¹⁰Wufru Itou apan suete sinumossokka udde, ete Itou lai apan niuwawitta na'oma n sara su tampa atanggaranne wuassu alawo'u langitta na'oma n sara ulili m pati'uppa nialorroannu daranta-Ne. ¹¹Ete Itou apan "nangonggolu manga aonggola su taumata"; sangkawageanganna nitenega naola'a rasul, waine naola'a nabi; wufru waine lai naola'a mamamasingkatu Wattiu Alaluassa udde, wufru waine lai netenega naola'a manga huru wufru mamamaduli jamaatta. ¹²Indi niolang-Nge tadea'u alarrana'u Mawu Ruata masuungnga wufru wotongnge mangimbe Mawu wufru mapararisikku wadangngi Kristus. ¹³Ringannu aroddi iite sarangkanambone naola'a sambau ana waugu pangangimanna apan uasulungnga wufru pasasunna apan uasulungnga su ola'u Ana'u Mawu Ruata. Wufru iite naola'a manga taumata timmade apan mallannu aatambanna asasuungnge ere Kristus. ¹⁴Ne iite tate maola'a

lai ałarřana'a apan niałiwune, wuřru iaapiddu aławo'u hati n ałarřa'u manga taumata apan tařra awusu. Imangitou mangngalıwu n taumata ringannu wawahia mangitou. ¹⁵Tawe! Mappianne iite mapaałiatta'u manga inolaanna apan atonna wuřru ringannu naungnga apan napene n darangngu, na'oma n sara su aławo'u inolaanna iite małannu-łannu masuungnga ere lai Kristus, apan naola'a tembonanni ite. ¹⁶Sulałummu piařra-Nge, anambo n wageangngu wadangnga udde uatokka mapia, wuřru pinasasamputu manga latto'anne sambau-sambau. Wuřru amungkangu suapan wageangnge udde mammanara su atokke, ne ahewallu wadangnga udde sarun tumuwo mabbalı timmade wuřru matohassa sulałummu darangngu.

Mabbiakka wakku sulałummi Kristus

¹⁷Ana waugu udde ringannu arannu Mawu, ete indi apan ta'u iwało wuřru ipanohassa: ariete lai mabbiakka ere taumata apan tawe maaillałala Mawu Ruata, wuřru marřingiddu runia indi. ¹⁸Řingirřanni mangitou marandumpe. Imangitou tawe maaillałala pabbiařřanna apan nionggolu Mawu Ruata, ana waugu imangitou atonna-tonna tawe asingkatta sara ng kadio'a su ola'u Mawu Ruata. Imangitou aroddi, ana waugu tawe maddaringikka Mawu Ruata. ¹⁹Imangitou tate lai apendamma massili, na'oma n sara imangitou tuttuřřuta apulu naungnga, wuřru mabbiakka sussandaga walate apulu naaungngi mangitou.

²⁰Arawe Kristus Yesus apan asingkatanni amiu wałinewe aroddi! ²¹Iamiu suete naaringikka su ola'i Tou! Wuřru naola'a sangkatou mallałarřenggen-Ne, iamiu suete niařřaanna lai su ola'u pallałagu Mawu Ruata apan tatahuannanni Tou! ²²Ana waugu udde tantanga'e pallałagu n taumata tabbe ringannu ola'u pabbiařřana tabbe apan tantałanna ihagohakku manga apulu n runia apan mangngalıwu. ²³Řinone ahewallu naungngu wuřru řingirřannu limbakkuanna. ²⁴Řinone iamiu mabbiakka ere taumata wakku apan niola'a uatuřřutu apulu naungngu Mawu Ruata; eteudde ringannu pallałagu apan atonna, matułidda wuřru susi.

²⁵Ana waugu udde manga tuřřangnga sarangkanambone, ariete mangawusu. Pa'ola'e mapia sangkatou ringannu sangkatou, ana waugu iite sarangkanambone uddewe suadio'a naola'a wageangngu wadangi Kristus. ²⁶Amungkangu iamiu masa'u, arie mamala n asasa'unu udde maarosa siamiu. Arie masa'u su ało'engngu allo, ²⁷tadea'u Setanna tawe tempone mamono'a siamiu. ²⁸Taumata apan inanaramanne manna'o řinone itou mangilloło manna'o. Mappianne itou mammanara tadea'u maasomba anna ringannu su řinone wuřru wotongnge mantułungngu taumata apan pia awunne. ²⁹Amungkangu iamiu maggahatto, arie

mappaattu wisara laleo. Pappaatte n manga wisara apan mannan-tiro wuṛru mantuḷungnu taumata waine. Manga wisara ereudde sarun mapaaranta n apapia su manga taumata apan naddaringikka. ³⁰Arie mapaasusa naungngu Ghaṛṛaho Mawu Ruata. Iamiu suete nissarṛani ringannu Ghaṛṛaho Mawu Ruata. Ghaṛṛaho udde lai maola'a sambau wataṛru manungku Allo m Padarame sarun rumanta ringanni amiu. ³¹Timbuḷianete alaṛwo'u taddu'u naungnga, mangngune wuṛru massa'u. Ariete lai umui wuṛru mallela. Ariete lai pia apendamma maddan-tina ara'e apendamma waine lai apan uasuḷungngu apendamma udde. ³²Arawe ṛinone naungngi amiu waresi wuṛru uaa'akkana sangkatou ringannu waine, wuṛru uaaonggolu ampunga ere lai Mawu Ruata nang-ampunga siamiu sulaḷummi Kristus.

Mabbiakka sulaḷummu asasemakka

5 Ete iamiu udde alaṛṛana'u Mawu Ruata apan arangnguan-Ne, ana waugu udde iamiu ṛinone mattanno tuḷada Mawu Ruata. ²Wiakku ṛinone aintaṛroannu darangngu, ere lai Kristus marangngu siite. Itou nanantillu watangan-Ne ana waugu iite, maola'a sambau sasamba apan mawangngi wuṛru maaluaassa naungngu Mawu Ruata.

³Ete iamiu udde alaṛṛana'u Mawu Ruata. Ana waugu udde, manga inolaanna sussandaga wuṛru ipaadiṛi Mawu, ara'e awawaḷiu tawe ṛinone olaanna su wallatti amiu. Arie ma'oma n sara taumata waine pia sasimbakka ipabbisara manungku iamiu ma'ola'a inolaanna ereudde lai. ⁴Tawe su laḷanne lai iamiu mapaasabangngu manga wisara laleo wuṛru tawe su ṛinone. Ewe'e ṛinone iamiu u'aḷiomanna su Mawu Ruata. ⁵Panutukka paapia-pia: taumata apan pallaḷagune sussandaga, ara'e tawe matataṛrino, ara'e waḷiu (pallaḷagu ereudde nassuḷungngu lai massubba paaḷuanna), taumata udde tawe masutta su pabbawalaga apan paparentanni Kristus wuṛru Mawu Ruata.

⁶Iambaṛṛanga iamiu awusuannu manga hatto awusu. Ana waugu, ete manga hatto indi, apan maasa'u Mawu Ruata su saruannu manga taumata apan maḷawangnga Sitou. ⁷Nariaddi, imbaṛṛanga maggahawe manga taumata ereudde. ⁸Iamiu sassane dorone sulaḷummu ararandumma. Orassa indi iamiu naola'e alaṛṛana'u Mawu, nariaddi iamiu orassa indi sulaḷummu asasemakka. Ana waugu udde iamiu ṛinone mabbiakka sulaḷummu asasemakka. ⁹Ana waugu wuassu asasemakka udde lumapputa alaṛwo'u inolaanna apan mapia, matuḷidda, wuṛru waresi su aelleḡu Mawu Ruata. ¹⁰Paddea'awe maailaḷa apa apan maaluaassa naungngu Mawu. ¹¹Arie ma'ola'a inolaanna apan tawe gunane apan a'olaannu manga taumata apan mabbiakka su laḷummu araranduma.

Arawe rinone iamiu mannualaga inolaanna ereudde. (¹²Ana waugu inolaanni mangitou a'olaanna ringannu ma'immbuni udde ipagahatto lai maasilite.) ¹³Alawo'u inolaanna apan tatařranganna sulařummu asasemakka, sarun asiloanna ringannu matilangnga. ¹⁴Ana waugu anambo n apa apan aasiloanna ringannu matilangnga, eteudde asasemakka. Ana waugu udde suete niwisara,

"Apu'ote, i'o apan mattiilla,

wuřru pabbangunte wuassu papate!

Kristus sarun lumansiangnga si'o."

¹⁵Ana waugu udde, panutukka paapia-pia ereapa i'o mabbiakka. Arie mabbiakka ere taumata woddo; pabbiakke ere taumata pande. ¹⁶Paahuna'a mapia-pia tempo apan tatauannu, ana waugu tempo indi tempo apan lařeo. ¹⁷Arie awodoanna, ewe'e panarřasidde apa apan ipaapulu Mawu.

¹⁸Imbarřangnga iamiu iwu'annu anggore, ana waugu udde maařařeo siamiu. Arawe rinone iamiu intarřoannu Gharřaho Mawu Ruata. ¹⁹Pappaatte manga wisara Mazmur, antari daralo wuřru antari n taumata n Sarřani sulařummu manga hatto ng kamiu. Rinone iamiu ringannu naungnga apan mařuassa, mangngantari n daralo su Mawu. ²⁰Sidutu wuřru su alawo'u manara, rinone iamiu maadiangkamanna su Mawu Ruata Iamangnga, sulařummu aranni Yesus Kristus Mawu ng kite.

Rua sangkawinganna

²¹Tadea'u ipangadatta si Kristus, rinone iamiu uatatařantupa sangkatou ringannu waine.

²²Wawine, padaringikka awingnge esakka ere lai madaringikka Mawu. ²³Ana waugu esakka maola'a piařa'u awingnge wawine, ere lai Kristus naola'a tembonannu jamaatta wuřru Itou sassane lai Ratu m Punnu Sařamattu jamaatta apan naola'a wadang-Nge. ²⁴Ere lai jamaatta tuttuřruta si Kristus, aroddi lai su alawo'u inolaanna, wawine rinone tumuřrutta awingnge esakka.

²⁵Esakka, paarangngue awingngu wawine, ere lai Kristus marangngu jamaatta wuřru nate su alu arussa ana waugu jamaatta udde. ²⁶Kristus na'ola'a ereudde tadea'u Itou wotongnge mamaresi jamaatta udde ringannu ařarřang-Nge wuřru ringannu ua'e n sasarřani, tadea'u wua udde Itou wotongnge manantilla su Mawu Ruata. ²⁷Ringannu aroddi Kristus napararisikku jamaatta udde ringannu mawantuga wuřru na'ukkassa su saruan-Ne, ringannu tawe sangkule ara'e angngone. ²⁸Aroddi lai esakka rinone mandangngu awingnge wawine ere lai itou

mandangngu wadangnge sassane. Taumata apan mandangngu awingnge atappasanne ere lai itou mandangngu wadangnge sassane. (²⁹Taambe nariaddi pia taumata maddantinnu wadangnge sassane. Arawe, itou mammadulū wuṛṛu mandiaga ere lai Kristus mammadulū jamaan-Ne. ³⁰Iite masingkattu udde, ana waugu iite wageangngu wadangi Kristus.) ³¹Sulalummu Wuke Susi uaworretta, "Ana waugu udde sangkatou esakka sarun manantangngu hagurangnge maola'a sambau ringannu awingnge wuṛṛu itarua sarun maola'a sambau." ³²Tatialane udde pia atappasanne apan malalumma. Wuṛṛu ta'u isumandinga ringannu paa'aukki Kristus wuṛṛu jamaatta. ³³Arawe tatialane udde pia sasampange lai ringanni amiu; Rinone suapan esakka mandangngu awingnge wawine ere lai itou mandangngu wadangnge sassane wuṛṛu rinone suapan wawine mangaddatta awingnge esakka.

Aḷarṛana'a wuṛṛu hagurangnga

6 Manga aḷarṛana'a! Maola'a mallarṛenggeni Kristus, paaturṛuta hagurangngu ana waugu eteudde apan rinone olaannu. ²"Pangaddatta si papanu ruam mamanu" eteudde parenta Mawu Ruata paarorone ringannu paaire, ³eteudde: "Tadea'u i'o su aḷaluassa wuṛṛu uukku maḷo'engnga su runia indi."

⁴Manga turṛangnga apan naola'a iamangnga! Imbarṛanga walate apulu ma'inolaanna aḷarṛanangngu, ma'oma n sara naungngi mangitou masa'u. Arawe paddulianete imangitou ringannu mapia wuṛṛu ringannu aḷarṛa'u Mawu.

Allangnga wuṛṛu mawune

⁵Manga turṛangnga apan naola'a allangnga! Paaturṛuta parenta mawunu su runia indi. Olaawe udde ringannu apendamma maaddata wuṛṛu maturṛuta ringannu atonna-tonna naalḷihida ere a'olaanni amiu si Kristus sassane. ⁶Arie ma'ola'a aroddi tumba'u su tempo iamiu aellehanna, tumba'u ana see maasomba daralo wuassu taumata. Arawe rinone iamiu ma'ola'a udde ere sangkatou allangngi Kristus apan tantaḷanna tutturṛuta apulu Mawu Ruata ringannu ahewallu naungnga. ⁷Manara apan a'ola'anni amiu ere sangkatou allangnga udde rinone iamiu mammanara ringannu naungnga maḷuassa su Mawu apan a'imbeanni amiu, wuṛṛu tawe tumba'u su taumata. ⁸Paanaunge manungku suapan taumata, mapia allangnga ara'e taumata tawe allangnga, sarun manengkamma wawalinne wuassu Mawu su inolaanna mapia apan niola'i tou.

⁹Manga turrangnga apan naola'a mawu! Rinone pallaḷagu ng kamiu arodidi lai su saruannu manga allangngu. Ariete mappaattu wawansaga. Paanaunge manungku iamiu wuṛru manga allangngu udde, uasulungnga pia sangkatou mawu, eteudde Mawu apan su surga. Itou, tawe mamile hati.

Ahiddu Mawu apan nasuungnga

¹⁰Pangudusanne, rinone iamiu maola'a matohassa ringannu atatohasa apan niasombanganni amiu wuassu Mawu, ana waugu iamiu uaukka ringanni Tou. ¹¹Paata'e aḷawo'u peddetu pangalo apan nionggolu Mawu Ruata si'o, tadea'u iamiu wotongnge mando'oppa apapande apan laḷeo wuassu Setanna. ¹²Ana waugu iite mammanara, walṇewe lumawangnga atatohasu manga setanna apan uaparenta su tempo apan laḷeo indi. Iite lumawangnga atatohasu manga gharraho laḷeo apan uaparenta winalanganna. ¹³Ana waugu udde, orassa indi, luṛrea'e aḷawo'u paddetu pangalo Mawu Ruata, tadea'u su allo apan laḷeo udde, iamiu wotongnge lumawangnga laḷarṛagu seetta. Wuṛru tadea'u napawe iamiu mammangalo sara m pangudusanne, iamiu ta'e matohassa.

¹⁴Rinone iamiu mangke uatehamma. Paata'e tatuṛruta su Mawu Ruata maola'a aiitta lawassa, wuṛru atatuḷidda maola'a laungngu wuassu atta'a. ¹⁵Rinone iamiu sidutu mabatti'u Watti'u Aḷaḷuassa apan mangngapiddu paddarame maola'a aampakku leddanu. ¹⁶Suapan tempo paata'e pangangimannu su Mawu maola'a sambau ahidda laḷinduma; ringannu pangangimanna udde iamiu wotongnge maapaddumma anambo n anaanna pia putungnge wuassu setanna. ¹⁷Anute asalaḷamatta udde maola'a sambau araposa waja, wuṛru wisara Mawu Ruata maola'a sambau haḷele wuassu Gharraho Mawu Ruata. ¹⁸Ola'e sarangkanambone udde, lapiddu u'aḷiomanna madorongnga tuḷungannu Mawu Ruata. Su aḷo'engngu tempo, aḷiomante su ereapa Gharraho Mawu Ruata ua'ehetta siamiu. Rinone iamiu sidutu uatehamma wuṛru arie iamiu mangilloḷo. Aḷiomante sidutu huna n anambo n aḷarṛana'u Mawu Ruata. ¹⁹Wuṛru aḷiomante lai huna ng kamiu, tadea'u su tempo ia'u mabbisara, Mawu Ruata mangonggola sia'u manga wisara apan narṛino. Wuṛru tadea'u ia'u ringannu warṛani wotongnge mabatti'u addappingu Watti'u Aḷaḷuassa udde. ²⁰Ana waugu ete Watti'u Aḷaḷuassa udde, ia'u naola'a sangkatou daroloṛṛana, wuṛru orassa indi sulaḷummu tuttupanna. Aḷiomante tadea'u ia'u warṛani mabbisara su ola'u Watti'u Aḷaḷuassa udde, su ereapa ia'u rinone mabbisara.

Tabea pangudusanne

²¹Tikhikus, turangi ite wuŕru mangangimbe apan matuŕrutta su-
laŕummu manara Mawu, sarun mamasingkata siamiu aŕawo'u ino-
laangku, tadea'u iamiu masingkattu ola'u watangangu wuŕru manara'u.
²²Ana waugu udde ia'u nandolokki tou ringanni amiu mamasingkatu
ola'i ami siamiu sarangkanambone, tadea'u naungngu maŕuassa.

²³Salandeanna su Mawu Ruata Iamangnga, wuŕru Mawu Yesus
Kristus mamala n anambo n jamaatta uaukka wuŕru uararangngu wuŕru
sidutu mangngimanna si Kristus. ²⁴Salandeanna Mawu Ruata sarun
mangaŕamatta siamiu sarangkanambone apan mandangngu Mawu ng
kite Yesus Kristus ringannu darangngu apan tawe masue.

Tabea ng kami,
Paulus

SURATTI PAULUS SU JAMAATTU FILIPI

WISARA TAŁAANE

Jamaatta su Filipi eteudde jamaatta paarorone apan niapararisikki Paulus su Eropa. Filipi addone su wagengngu Makedonia, sambau provinsi n araratuannu Roma. *Suratti Paulus Su Jamaattu Filipi* indi niworřeta su tempo Paulus sulałummu tuttupanna. Naungnge su tempo udde sussingawangnga ana waugu pia mamamanara n Sařřani apan mannałare sitou. Wuřřu lai ana waugu sulałummu jamaattu Filipi udde pia manga taumata apan mangngařřa'u manga ałařřa'a mangngałiwu. Salaiwe aroddi suratti Paulus indi tingikke maałuassa wuřřu napene n m pangangantima. Anio aroddi? Tawe baine tumba'u ana waugu Paulus lembon mangngimanna si Kristus.

Paulus namorřetu suratta indi ana waugu paarorone itou maadiangkamanna su jamaattu Filipi wuassu aonggola apan suete nisengkamma wuassi mangitou su tempo itou sulałummu asasusa. Wuřřu sulałummu suratta udde lai itou mangngonggolu sasasa simangitou, tadea'u imangitou wařřani wuřřu matammuda sumaruanna asasusa. Itou napaanaungnga simangitou, tadea'u imangitou masarřionto'a ere Mawu Yesus, wuřřu tawe paparentannu apendamma mawunga wuřřu marřingiddu ririne sassane. Itou napaanaungnga simangitou manungku tumba'u ana waugu ałamattu Mawu Ruata sassane, Mawu Ruata na'ola'a simangitou uaukka ringanni Kristus ana waugu pangangimanni mangitou Sitou, wałine ana waugu imangitou matuřřuta mappaaamattu manga atorannu agama apan suete nitantuna sulałummu tita n agama Yahudi. Manan-suna Paulus namorřeta lai su ola'u ałaluassa wuřřu paddarame apan nionggolu Mawu Ruata su manga taumata apan mabbiakka uaukka ringanni Kristus.

Tatjala n suratta indi eteudde wisarane su ola'u ałaluassa, atatohassu naungnga, paa'aukka wuřřu asasabare n taumata n Sařřani sulałummu ipanna'innu pangangimanne si Kristus wuřřu sulałummu mabbiakka ere sangkatou taumata n Sařřani. Suratta indi mapaałiatta'a lai manungku aroddi arangngune Paulus su jamaattu Filipi udde.

Lafurione

Panattaranne	1:1-11
Ola'i Paulus sassane	1:12-26
Pabbawiakku taumata n Sarani	1:27-2:18
Ira-ira si Timotius wurru Epafroditus	2:19-30
Pananaungnga su manga seetta wuassu liudde wurru wuassu laumme	3:1-4:9
Paulus wurru manga hawene su Filipi	4:10-20
Panginsueanne	4:21-23

1 Manga tuṙrangnga aḷarṙana'u Mawu Ruata sarangkanambone apan uatana'a su Filipi, wuṙṙu apan uaukke ringanni Kristus Yesus. Wuṙṙu manga tuṙrangnga piaṙrangnge see lai matatuḷungngu jamaatta!

Ia'u, Paulus, suadio'a ringanni Timotius, manga allangngi Kristus Yesus, ²mangantimma doronganna Mawu Ruata Iamangngi ite wuṙṙu Mawu Yesus Kristus mangonggolu aḷamatta wuṙṙu paddaramame siamiu.



Soa Filipi (1:1)

Aḷiomanni Paulus su jamaatta

³Suapawe ia'u maanaungnga siamiu, ia'u maadiangkamanna su Mawu Ruata. ⁴Wuṙṙu suapan ia'u umaḷiomanni amiu sarangkanambone, ia'u u'aḷiomanna ringannu naungnga maḷuassa. ⁵Ia'u maadiangkamanna su Mawu Ruata ana waugu ro'e n paarorone na'oma n sara orassa indi, iamiu suete nallaḷima sia'u mamasingkatu Watti'u Aḷaḷuassa wu-assu Mawu Ruata. ⁶Mawu Ruata sassane apan nanattakku manara apan mapia udde siamiu, wuṙṙu ia'u mangantimma Itou sarun manassu manara udde ma'oma n sara masue su allo Kristus Yesus rumanta apia. ⁷Atonna su tampane ia'u pia apendamma ereudde su saruanni amiu, ana waugu iamiu sarangkanambone sidutu marani su naungku. Ana waugu iamiu lai suadio'a ringanku, nanengkamma aḷamatta apan nionggolu Mawu Ruata sia'u: mapia orassa indi tantaḷanna ia'u sulaḷummu tut-tupanna ara'e lai su tempo ia'u su liudde ana waugu mangngesakku Watti'u Aḷaḷuassa udde. ⁸Mawu Ruata masingkatta manungku ia'u atonna-tonna luṙṙintulu ng kamiu ringannu apendamu darangngu wuassi Kristus Yesus sassane.

⁹Ete indi aḷiomangku siamiu: doronganna iamiu lembon mandangu Mawu Ruata wuṙṙu sansuḷungngu taumata wuṙṙu sidutu aatambanna sulaḷummu asingkatta apan ṙinone wuṙṙu ṙingiranna apan pande. ¹⁰Ringannu aroddi iamiu masingkatta mamile apa apan apianne, wuṙṙu

wiakku na'ukkassa wuassu angngo ara'e aławo'u aansilla su allo Kristus rumanta apia. ¹¹Wiakku sarun lumambalanna ringannu pallaḷagu apan atonna-tonna mapia apan darantane tumba'u wuassi Yesu Kristus sassane; ne Mawu Ruata sarun wantuhanna wuḥḥu raloanna.

Mabbiakka huna ng Kristus

¹²Ia'u maapulu iamiu maasingkata, manungku' manga inolaanna apan suete nariaddi sia'u, ewe'e naaola'a manambo taumata madaringikka wuḥḥu mangngimanna Watti'u Aḷaḷuassa udde. ¹³Pangilluḷeanne, anambo n mandariaga waḷe n araratuanna wuḥḥu manga taumata su soa indi masingkata manungku ia'u niḥḥuumanna ana waugu ia'u mabbatti'i Kristus. ¹⁴Wuḥḥu ia'u niḥḥuumanna indi naatamba manga taumata n Saḥḥani su soa indi lembon mangngimanna lai Mawu, na'oma n sara imangitou lembon waḥḥani lai mamasinkatu tanata Mawu Ruata ringannu tawe matta'utta.

¹⁵Atonna pia sire pira wuassu wallatti mangitou apan mabbatti'i Kristus ana waugu naungnge laḷeo wuḥḥu maapulu mattatiakka, arawe waine mabbatti'i Kristus ana waugu pia pandumma apan mapia. ¹⁶Manga taumata indi na'ola'a aroddi ana waugu imangitou mandangu Mawu Ruata wuḥḥu sia'u, ana waugu imangitou masingkata manungku Mawu Ruata suete napamanara'u mapaaḷiatta'a manungku Watti'u Aḷaḷuassa udde atonna. ¹⁷Arawe taumata waine mabbatti'i Kristus ringannu pandumma laḷeo; imangitou mabbatti'a hunane su wadangi mangitou sassane. Ringannu udde imangitou mangngantima wotongnge mapaaḥusa'u sulummu ḥuumanna.

¹⁸Arawe tawe apane! Ana waugu salaiwe ereapa, mapia udde a'olaanna ringannu pandumma apan mapia ara'e ringannu pandumma apan nassaḷa, ne Kristus mangke iwabbatti'a lai; nariaddi ia'u lulluassa. Wuḥḥu ia'u sidutu uapendamma aroddi, ¹⁹ana waugu ia'u masingkata manungku ringannu manga aḷiomannu udde wuḥḥu ringannu sasumbala Gharraho n Yesu Kristus, ia'u sarun ipallosa. ²⁰Lembon ipaapulu'u wuḥḥu aantimanna eteudde tadea'u imbarangnga ia'u tawe maa'sue manara'u. Arawe ia'u mangantimma tadea'u suapan tempo, nangillemba orassa indi, ia'u wotongnge maola'a waḥḥani ma'oma n sara ringannu ahewallu apulun waddangu - mapia ia'u wiakka ara'e ia'u nate - Kristus mangke wabantuhanna. ²¹Ana waugu matatarrino sia'u, tudda n wia'u tumba'u si Kristus Wuḥḥu mate udde auntunganna. ²²Arawe amungkangu ringannu mabbiakka su runia indi, ia'u wotongnge ma'ola'a manara lembon pia gunane, ne ia'u wagga suapa apan sarun ta'u pileanna. ²³Ia'u wabollenganna wuassu rua m ba'a. Ia'u maa-

pulu atonna manantangngu runia indi see inai matana'a ringanni Kristus, ana waugu eteudde lembon apianne; ²⁴arawe ana waugu hunane su wadangu udde, mappianne amungkangu ia'u sidutu uatana'a su runia. ²⁵Ia'u mangngimanna su olangnge udde. Ana waugu udde ia'u masingkata, ia'u sidutu uatana'a ringanni amiu sarangkanambone, tadea'u wotongnge mantulunggi amiu maola'a lembon matohassa wurru lembon maluassa sulalummu pangangimanna su Mawu. ²⁶Ana waugu udde, amungkangu ia'u mabelengnga apia ringanni amiu, iamiu apan suete naaukka ringanni Kristus Yesus sarun maatahuanna lembon manambo lai pangiananne su ipalluassu riri'u.

²⁷Ne, apianne orassa indi eteudde manungku iamiu mabbiakka mapia ere su ipaapulu m Watti'u Alaluassa su ola'i Kristus udde. Ringannu aroddi tanne ia'u wotongnge mappassomba ng kami ara'e tate, ia'u sarun maaringikka manungku iamiu sidutu uaukka wurru mammanara suadio'a tumba'u sambau pandumma wurru sambau apulu; eteudde huna m pangangimanna apan uasulungngu Watti'u Alaluassa wuassu Mawu Ruata udde. ²⁸Rinone iamiu sidutu warrani; arie matita'uttu manga seennu. Ringannu aroddi iamiu mapaaljatta'a manungku imangitou sarun marugi, wurru iamiu sarun maauntunga, ana waugu Mawu Ruata sassane apan mangonggolu auntunganna siamiu. ²⁹Ana waugu Mawu Ruata suete nangonggolu alamatta siamiu, waline tumba'u ipangimanna si Kristus, arawe lai matataarangnga asasusa ana waugu Kristus. ³⁰Orassa indi iamiu suadio'a ringangu sulalummu manara apan uasulungnga; eteudde apan suete niasiloanni amiu, mammanarangu rorone, wurru apan ta'e mammanarangu sara orassa indi, ere lai suete niaringirani amiu su orassa indi.

Asasarriinto'a wurru awawantugi Kristus

2 Iamiu matohassa, ana waugu iamiu uaukka ringanni Kristus. Wurru iamiu nialiwurrana ana waugu Kristus mandangngu siamiu! Iamiu aebetannu Gharraho Mawu Ruata, wurru iamiu lai uararangngu wurru uasasumbala sangkatou ringannu waine. ²Ne, annama'a iamiu atonna-tonna mapaalwassu naungku ringannu manga inolaanna indi: Pabbiakke ringannu naungnga sambau, ringannu darangngu apan uasulungnga, ringannu ringiranna apan uasulungnga wurru tudda apan uasulungnga. ³Arie ma'ola'a sambau inolaanna hunane su watangannu sassane, ara'e ipamarabunga. Arawe rinone iamiu sangkatou-sangkatou ringannu masarriinto'a ma'ellega taumata waine mappianne wuassu watangannu sassane. ⁴Paaellehe aurangannu taumata waine; arie tumba'u au-

rangannu watangannu sassane. ⁵Rinone iamiu pia apendamma ere Yesus Kristus:

⁶Su pinangiananne Itou nassulungngu Mawu Ruata,
arawe Itou tawe mamendamma manungku
olang-Nge ere Mawu udde rinone
matatana'a aroddi Sitou.

⁷Arawe, Itou namallosu sarangkanambone
see naola'a ere sangkatou allangnga.

Itou naola'a ere taumata,
wurru aasiloanna mabbiakka ere taumata.

⁸Itou napaawawo n watangan-Ne, wurru mabbiakka
ringannu maturruta su Mawu Ruata na'oma
n sara nate –
eteudde nate niarussa.

⁹Ana waugu udde Mawu Ruata namengketa Sitou,
su atanggaranne see nangonggolu tarfino Sitou
apan ahewalanne wuassu alawo'u tarfino apan waine.

¹⁰Ne, tadea'u ipangadatta Mawu Yesus,
anambo n riadianna su surga,
wurru su runia,
see lai su alungngu runia
sarun massubba Sitou.

¹¹Imangitou sarangkanambone sarun manga'u manungku ete Yesus
Kristus udde Mawu;
ringannu aroddi Mawu Ruata lamangnga wantuhanna.

Lullansiangnga ere semakka apan mannemakka runia

¹²Ana waugu udde, manga turangnga apan arangnguanna, su ereapa
iamiu sidutu maturruta sia'u su tempo ia'u uatana'a su pattangnganni
amiu, ne nangillemba orassa indi su tempo iite mararaute, rinone iamiu
sidutu tuturruta sia'u. Iamiu suete nisalammattu Mawu Ruata, nariaddi
sidutu pammanarate tadea'u paddaramenu maola'a masuungnga. Ola'e
udde ringannu addata wurru taturruta su Mawu Ruata, ¹³ana waugu
Mawu Ruata sassane apan mammanara sulalammu ririnu ipa'ola'a
siamiu mawala wurru wotongnge maaluaassa naungngu Mawu Ruata.

¹⁴Manarate alawo'u manara ringannu tawe sumungkuta ara'e ma-
tatiakka. ¹⁵⁻¹⁶Ringannu aroddi iamiu mapaalatta'a manungku ete-
udde iamiu alarrana'u Mawu Ruata apan tawe angngone, mabbiakka

ringannu matulida wuṛṛu narṛino su pattangnanu taumata laḷeo wuṛṛu marosa. Wuṛṛu su tempo iamiu namasingkata simangitou wattī'a apan mangngonggolu wiakka, ṛinone iamiu maola'a ere semakka apan lul-lansianga mannemakka runia. Amungkangu iamiu mabbiaakka ere-udde, ne ia'u pia pangiananne maapendamma aḷaḷuassa su ola'i amiu su tempo Mawu Yesus rumanta apia. Udde maola'a tatialane manungku manara'u pia gunane wuṛṛu pia gessine.

¹⁷Asinungka ia'u sarun pateanna wuṛṛu ṛarṛa'u maola'a ere sambau sasamba manampaḷiu wuassu sasamba ng kamiū su Mawu Ruata maola'a sambau tatiala manungku iamiu mangngimanna Sitou. Amungkangu udde atonna ṛinone maola'a aroddi, ia'u maadiangkamanna su olangnge udde wuṛṛu lulluassa suadio'a ringanni amiu. ¹⁸Aroddi lai ṛinone iamiu mammendama aḷaḷuassa wuṛṛu lullala'a suadio'a ringanku.

Timotius wuṛṛu Epafroditus

¹⁹Ia'u mangngimanna manungku ringannu tulungannu Mawu Yesus, ia'u ringannu maḷihakka nandolokki Timotius ringanni amiu, tadea'u ia'u maasomba aḷaḷuassu naungku su ola'u wattī'i amiu. ²⁰Tumba'u Timotius sassane taumata apan ṛingiranne nassulungku, wuṛṛu atonna-tonna maṛringiddu laḷumanna'i amiu. ²¹Sarangkanambone apan waine tumba'u maṛringiddu watanganne sassane, waḷine huna n Yesus Kristus. ²²Iamiu sassane naasilote tialane manungku Timotius pia gunane. Itou suete nammanara maṛrimadda ringanku mabatti'u Wattī'u Aḷaḷuassa wuassu Mawu Ruata. Iambua naaḷihida ana'a wuṛṛu iamangnga. ²³Ana waugu udde, napawe ia'u naasingkata manungku su ereapa hatto'u udde nasuete, ia'u sarun mandolokki tou ringanni amiu. ²⁴Ia'u mangngimanna manungku ringannu tulungannu Mawu, ia'u sassane lai tawe maḷannu sarun mattembo siamiu.

²⁵Su ola'u turrangi ite Epafroditus apan nirolokki amiu mal-laḷima sia'u, ia'u mammendama mappianne itou irolokka iapaawelengnga ringanni amiu apia. Itou suete nallaḷima sia'u sulaḷummu manara'u. ²⁶Itou maapulu atonna maisasomba ng kamiū sarangkanambone, wuṛṛu itou u'ambulisadda ana waugu iamiu suete naaringikka wattī'a manungku itou marada'a. ²⁷Atonna itou marada'a na'oma n sara maranite n mate. Arawe Mawu Ruata niuṛakkani tou; wuṛṛu waḷine tumba'u sitou sassane, arawe sia'u lai, tadea'u ia'u tawe lembon masusa apia. ²⁸Ana waugu udde maggewaḷanna apulu'u mandolokki tou mabelengnga apia ringanni amiu, tadea'u iamiu lumuassa apia amungkangu massombate apia ringanni tou, wuṛṛu naungku lai mabbali ma-

tammuda. ²⁹Nariaddi, saŋohoite itou ringannu ahewallu aŋaŋuassu naungnga ere sangkatou tuŋŋa sulaŋummu pangangimanna sambau. Addate anambo n taumata ere itou. ³⁰Su huna n manara ng Kristus, itou ete adio'a mate; itou nanantillu niawane ipantuŋŋu sulaŋummu arannu.

Atatuŋidda apan tutune

3 Panginsueanne, manga tuŋŋangu, ŋinone iamiu lumuassa ana waugu iamiu suete naaukka ringannu Mawu. Ia'u tawe maapendamma masahadda manuŋe apia apa apan suete niwoŋŋeta siamiu paarorone; ana waugu olangnge udde mapia su asasaŋamannu. ²Paatehamma su saruannu manga taumata apan ma'ola'a inolaanna laŋeo, manga taumata apan wotongnge isago 'asu'. Imangitou mammata'a tadea'u manga taumata udde iapa sunatta. ³Sumbaŋi ete iite manga taumata apan suete nanarimmattu sunatta apan tutune, waŋinewe imangitou. Iite massubba Mawu Ruata ringannu aehettu Gharaŋho Mawu Ruata sassane, wuŋŋu iite maadiangkamanna ana waugu iite mabbiaŋka su sambau ringanni Kristus Yesus. Iite tawe uatundeeta su manga inolaanna apan a'olaannu taumata. ⁴Su ŋinone ia'u wotongnge tumundeeta su manga inolaannu taumata udde. Ana waugu amungkangu pia sangkatou apan uapendamma itou pia pangianannu antimma su inolaannu taumata su runia indi, ia'u nangillembu lai. ⁵Ia'u nissunatta su tempo uukka ualu allo. Ia'u niasungkanga ere sangkatou Israel, wuassu pabbawalagi Benyamin; ia'u taumata n Ibrani tutune. Sulaŋummu tatuŋŋuta su manga tita n agama n Yahudi, ia'u nasutta su reengannu taumata n Farisi. ⁶Ia'u lembon mammanara maŋŋimada na'oma n sara ia'u mammate'jamaatta. Amungkangu ellehanna wuassu tita n agama n Yahudi, ia'u sangkatou taumata mapia apan tawe saŋane. ⁷Arawe ana waugu Kristus, ne sarangkanambone apan dorone sassunnangu sambau auntunganna, orassa indi naola'a sambau apan maarugi. ⁸Waŋine tumba'u manga inolaanna udde; arawe lai alaŋo'u inolaanna apan sassunnangu ere manga inolaanna tumba'u maarugi. Apan tatahuanangu orassa udde lembon maareganne; eteudde maaillaŋa si Kristus Yesus Mawu'u. Ana waugu Kristus, ne ia'u suete namallosu manga alaŋo'a. Aellehangku sarangkanambone udde ere sapadda, tadea'u ia'u wotongnge maasomba si Kristus, ⁹wuŋŋu atonna-tonna uaukka ringanni Tou. Pasasambau apan mapia ringannu Mawu Ruata tate ta'u manaranna sassane, ringannu tutuŋŋuta tita n agama. Orassa indi ia'u pia paa'aukka apan mapia ringannu Mawu Ruata, ana waugu ia'u mangngimanna si Kristus. Nariaddi, paa'aukka apan mapia udde darantane wuassu Mawu Ruata, wuŋŋu pinangianne ana waugu mangngimanna si Yesus Kristus. ¹⁰Tumba'u sambau

apan ipaapulu'u eteudde tadea'u ia'u maaillaŋa si Kristus, wuŋru maapendamma tarŋino apan napaawiakki Tou wuassu papate. Ia'u maapulu matatarŋanga suadio'a ringanni Tou wuŋru maola'a uasuŋungnga ere Itou su ola'u papate-Ne. ¹¹ Wuŋru ia'u mangantimma manungku ia'u sassane sarun iapaawiakka apia wuassu papate.

Tumaŋangnga maddumatingngu pattudanna

¹² Ia'u tawe mabbisara manungku ia'u naasombate auntunganna, ara'e nasuungke. Arawe ia'u sidutu maddea'a maapangarŋo aonggola apan suete nissaddia n Kristus Yesus. Ana waugu udde Itou suete nangarŋo sia'u, wuŋru niola'a pussa'a-Ne. ¹³ Natantuna, manga turŋangnga, atonna ia'u tawe naapendamma manungku ia'u suete naapangarŋo aonggola udde. Arawe pia sambau apan ta'u olaanna, eteudde timbuŋianante apa apan su liu'u wuŋru mangke mattinsahadde tadea'u maasomba apa su saruanguku. ¹⁴ Ana waugu udde ia'u sidutu tuttaŋangnga mattuda n tampa pangudusanne ana see maasomba auntunganna, eteudde mabbiakka su surga; ana waugu udde Mawu Ruata namago siite sulalummi Kristus Yesus.

¹⁵ Iite sarangkanambone apan timmaddete su pangangimanna, ŋinone mabbiakka aroddi. Arawe amungkangu su wallatti amiu pia ŋingiranna waine, ne Mawu Ruata sarun manala'a lai siamiu. ¹⁶ Arawe olangnge udde ŋinone inunuannu: Iite ŋinone uatana'a mabbiakka tumuŋrutta atoranna apan suete niola'i ite na'oma n sara orassa indi.

¹⁷ Manga turŋangnga sarangkanambone! Pattannote tuŋada'u. Iami suete nangonggolu tuŋada apan narŋino, ana waugu udde paatutuŋre paapia-pia manga taumata apan mattanno tuŋada ng kami udde. ¹⁸ Ia'u masokkate mamasingkata siamiu, wuŋru orassa indi ta'u isule apia ringannu lulluai, manungku pia manambo taumata apan mabbiakka mangngaŋiwu n atappasannu papate n Kristus su alu arussa. ¹⁹ Wiakku manga taumata ereudde panginsueanne papate, ana waugu mawu mangitou eteudde apulu m wadangngi mangitou sassane. Manga inolaanna apan maasili, eteudde ipammunga mangitou; ana waugu imangitou tumba'u marŋingiddu manga inolaanna apan ipaapulu n runia indi. ²⁰ Arawe ete iite tumana'u araratuannu surga. Ete wua isudde Ratu m Punnu Saŋamatti ite, Mawu Yesus Kristus, sarun rumanta. Ete Itou apan mangke rarŋadoanni ite. ²¹ Wadangngi ite apan lome wuŋru wotongnge marŋenessa indi, sarun waŋuanni Kristus maola'a ere wadang-Nge sassane apan mawantuga. Itou wotongnge ma'ola'a udde ana waugu Itou uatahuanna tarŋino mapassuŋrubawa n sarangkanambone.

Manga tatantiro

4 Ana waugu udde, manga turrangu apan arangguanna, arod-dite rinone iamiu mabbia akka ringannu atonna-tonna mangngimanna Mawu. Naungku maapulu maisasomba ng kamiu! Ete iamiu ipaapulu'u apan maaluaassa naungku.

²Turrangu wawine Euodia wurru turrangu Sintike! Ia'u madorongnga suapan wotongnge iradua naungnge sambau ere manga taumata apan pangangimanne lai sambau. ³Su hawe'u apan maturruta, ia'u madorongnga lai tadea'u turranga massumbala wawine darua udde. Imangitou suete nammanara marimadda ringangu mabatti'u Watti'u Alaluassa wuassu Mawu Ruata; ere lai Klemen wurru anambo n taumata waine apan mammanara suadio'a ringangu. Manga aranni mangitou uaworretta sulalummu Wuke n Taumata Wiakka.

⁴Antimanna iamiu sidutu lulluassa ana waugu iamiu suete nabbiakka su sambau ringannu Mawu. Paassa lai ia'u mabbisara: lalluasse!

⁵Rinone anambo n taumata wotongnge maasilo pallaagu naungngu apan mapia. Ana waugu tate malannu lai Mawu sarun rumanta. ⁶Arie paasinggawanga su ola'u manga apa. Sulalummu alawo'u inolaanna, aaliomante wurru padorongke su Mawu Ruata. Apa apan ipaapulu ng kamiu, waloa'e udde sidutu su Mawu Ruata ringannu wisara aadiangkamanna. ⁷Ne paddarame wuassu Mawu Ruata apan tawe asunnannu taumata, sarun mallu'adda naungngu wurru ringirannu apan suete naaukka ringanni Kristus.Yesus.

⁸Panginsueanne, manga turrangnga, lorroite ringirannu ringannu inolaanna apan mapia, apan wotongnge raloanna, eteudde inolaanna apan narinno, maaddata, apan matulida, waresi, masarionto'a, wurru mapia. ⁹Ola'e apa apan a'urumanna wurru asengkamani amiu wuassia'u: mapia wuassu manga wisara ara'e lai wuassu manga inolaangu. Mawu Ruata punnu paddarame, sarun mangalamatta siamiu.

Wisara aadiangkamanna

¹⁰Sulalummu wia'u apan uaukka ringannu Mawu, ia'u naapendamma lalumanna'a wahewa, ana waugu aroddite alannune, orassa indi iamiu pia tempone lai maringiddu wadangu. Pandumangu walineuwe manungku iamiu naabuli'ute; atonna iamiu uanaungnga sia'u, arawe iamiu tawe maasomba tempone mapaalatta'u aakkanne. ¹¹Ia'u namasingkatu indi walineuwe ana waugu ia'u awussa, ana waugu ia'u suete nangurumma alarra'a mammendamma nasuungnga ringannu apa apan

piate. ¹²Ia'u suete namendamma mabbiakka asiangnga, wuŕŕu mabbiakka su asasuungnga. Ia'u naaillalate addapingnge, ereapa sumaruana olange apan aroddi araleone; mapia su tempo maļuassa ara'e lai su tempo susa, mapia su tempo ala ara'e lai su tempo asiangnga. ¹³Ringannu tarŕino apan nionggoli Kristus sia'u, ia'u pia atatohassa sumaruanna alawo'u asasusa sarangkanambone.

¹⁴Arawe iamiu suete nantulungku sulalummu asasusa'u; wuŕŕu apa apan niola'i amiu udde atonna wuŕŕu mapia. ¹⁵Manga turrangnga tau-mata n Filipi! Iamiu sassane masingkata atonna manungku su tempo ia'u nanantangngu Makedonia rorone, su tempo Watti'u Alaluassa udde niapasingkata paarorone, ete iamiu sambau jamaatta apan nallalima sia'u; iamiu apan namendamma auntunganna wuŕŕu araruggi su sambau ringanku. ¹⁶Su tempo ia'u su Tesalonika wuŕŕu mappandumma sasumbala, nilumebete wuassu paassa iamiu nandoho n sasumbala sia'u. ¹⁷Udde waline ia'u tumba'u maapulu manengkamma aonggola. Apa apan ipaapulu'u eteudde, tadea'u ia'u wotongnge maasilo manga pabbawua n manaranu apan maatamba auntungannu. ¹⁸Ia'u suete nanengkamma sarangkanambone - ewe'e nilumebete lai! Anambo n aonggola apan niroho ng kamiu sia'u, suete nitarimmata wuassi Epafroditus. Orassa indi ia'u uatahuanna anambo n apa apan pappandumangu. Manga aonggola wuassi amiu eteudde maola'a sambau sasamba halurune mawangngi apan nionggole su Mawu Ruata wuŕŕu nisengkammu Mawu Ruata ringannu naungnga maļuassa. ¹⁹Mawu Ruata apan sassubbangku, apan napene m paa'ala sulalummi Kristus Yesus, sarun manuungngu hausannu. ²⁰Dalo su Mawu Ruata lamangngi ite saran malannu-lannu! Amin.

Tabea panginsueanne

²¹Waloa'a tabea'u su anambo n alarŕana'u Mawu Ruata apan ua'aukka ringanni Kristus Yesus. Wuŕŕu sengkamma lai tabea wuassu manga turranga apan suadio'a ringanku isindi. ²²Anambo n pabbawalagu Mawu Ruata su soa indi, nengilembote imangitou apan wuassu wale n araratuanni Kaisar, nandoho n tabea siamiu.

²³Doronganna Mawu Yesus Kristus mangalamatta turranga sarangkanambone.

Tabea ng kami,
Paulus wuŕŕu Timotius

SURATTI PAULUS SU JAMAATTU KOLOSE

WISARA TAŁAANE

Kolose eteudde sambau soa su leta'u Asia adio'a, su samba'a n Ra'i soa Efesus. Wałine Paulus apan napararisikku jamaatta su Kolose indi, arawe su tempo itou nandolokku manga mamamanara wuassu Efesus, soa wahewa su propinsi Roma su leta'u Asia adio'a, itou lai uapendama manungku itou lai ualu'adda jamaatta su Kolose udde. Paulus naaringikke watti'a manungku sulałummu jamaatta udde pia manga huru mangngařra'u manga ałarřa'a nassała. Manga huru udde mangke mangngařra'a manungku tadea'u maailała Mawu Ruata wuřru maasomba asalałamatta ringannu nasuungnga, taumata řinone massubba "manga ghařraho apan uatařrino wuřru uaparenta ulili m pati'uppa". Wua udde lai, unnu manga huru udde, taumata řinone matuřrutta lai mappattu manga atorannu sunatta, wuřru mappalli wuřru manga waine lai.

Suratti Paulus Su Jamaattu Kolose indi niworřeta ipammasingkattu ałarřa'u Sařrani apan nařrino wuřru manningadu ałarřa'a nassała apan iaarřa'u manga huru awusu udde. Punnu suratta indi namasingkata manungku Yesus Kristus wotongnge mangonggolu Asalałamatta apan nasuungnga wuřru manungku manga ałarřa'a waine udde tumba'u mappaarau n taumata wuassi Kristus. Sulałummi Kristus, Mawu Ruata suete nandiaddi runia indi, wuřru wuassi Kristus lai, Mawu Ruata nanałamatta. Tumba'u wuassu lałummu paa'aukka ringanni Kristus, runia pia antimma maasomba asalałamatta. Nanansuna Paulus nanała'a m paa'aukku ałarřa'a mawantuga udde ringannu pabbawiakku taumata n Sařrani.

Řinone iapaasingkatta isindi manungku Tikhikus – apan uaapiddu suratta indi watukku Kolose si Paulus – daringananni Onesimus, allangnga apan nirolokki Paulus ana waugu iapaawelengnga ringannu mawune, eteudde Filemon, sangkatou lałorřo n jamaatta su Kolose.

Lalorrone

Paarorone	1:1-8
Pallaḷagu wurru manara n Kristus	1:9-2:19
Wiakka wakku apan niapendamanniu manga taumata n Saḡḡani	2:20-4:6
Panginsueanne	4:7-18

1 ^{1,2}Manga turrangnga alarrana'u Mawu Ruata su Kolose apan tutturruta uauukka ringanni Kristus!

Ere sangkatou rasulli Kristus Yesus, – apan nitenegu Mawu Ruata – ia'u, Paulus, su sambau ringannu turrangi ite Timotius, mangantimma doronganna Mawu Ruata Iamangngi ite mangonggolu alamatta wurru paddarame siamiu.

Aaljomannu aadiangkamanna

^{3,4}Iamiu suete naaringikka manungku iamiu mangngimanna Mawu Yesus Kristus wurru iamiu marangngu anambo n alarrana'u Mawu Ruata. Ana waugu udde su tempo iami u'aljomanni amiu, iami sidutu maadiangkamanna su Mawu Ruata, Iamangngu Mawu ng kite Yesus Kristus. ⁵Iamiu mangngimanna wurru iamiu marangngu, ana waugu mangngantimma apa apan suete nissaddia Mawu Ruata su surga huna ng kamiu. Iamiu suete naaringikka su olangnge udde, su tempo Watti'u Alaluassa udde niapaasingkata siamiu. ⁶Watti'a wuassu Mawu Ruata udde nassaliawukke su ahewallu runia, wurru wiakku taumata sidutu aalamatannu watti'a udde, ere lai wiakku nialamatanna ro'e n su tempo iamiu naaringikka ola'u darangngu Mawu Ruata wurru atonna-tonna nusippa sulaummu naungngu. ⁷Olangnge udde niapaasingkati Epafraas siamiu, hawe apan arangnguanni ami. Itou udde allangngi Kristus apan maturruta mammanara huna ng kite. ⁸Ete wuassi tou iami naaringikka manungku ringannu tarrino wuassu Gharraho Mawu Ruata iamiu wotongnge maddarangngu.

⁹Ana waugu udde iami sidutu u'aljomanni amiu ro'e n iami naaringikka su ola'i amiu. Iami nadorongnga su Mawu Ruata tadea'u Gharraho Mawu Ruata mangonggolu apande wurru asingkata siamiu, na'oma n sara iamiu maasunna apa ipaapulu Mawu Ruata. ¹⁰Ringannu aroddi iamiu wotongnge mabbiakka tutturruta apulu Mawu Ruata, wurru sidutu malluassa naungnge, na'oma n sara sulaummu alawo'u inolaanna iamiu wotongnge mamasilo manga inolaanna apan mapia. Wurru asingkati amiu su ola'u Mawu Ruata sarun aatambanna lai. ¹¹Doronganna ringannu tarrino Mawu Ruata apan mawantuga, iamiu tohasanna ma'oma n sara iamiu wotongnge matataranga ringannu sabare wurru naungnga maluassa ¹²wurru ringannu wisara adiangkamanna su Iamangnga. Ana waugu ete Iamangnga udde apan nandiaddi siamiu wotongnge manengkamma apa apan nissaddia Mawu Ruata su alarranang-Nge sulaummu araratuan-Ne apan masemakka. ¹³Itou suete namallosi ite wuassu tarrino n araranduma wurru nangingkati ite sulaummu aratuannu Anang-Nge apan arangnguan-Ne. ¹⁴Wuassu Anang-Nge udde



Aaŋiomanna (1:9)

iite suete nipallosa; atappasanne manga rosa ng kite suete niam-punganna.

Kristus wuŕru manara-Ne

¹⁵Eteudde Kristus hambaranna apan matualaga wuassu watangannu Mawu Ruata apan tawe asiloanna; eteudde Kristus Ana'a pahuŕlune, apianne wuassu manga aŕawo'u inolaanna. ¹⁶Ana waugu ete sulaŕummi Tou Mawu Ruata nandiaddi aŕawo'u manga apa su surga wuŕru su wowo n runia, aŕawo'u apa apan aasiloanna wuŕru apa apan tawe asiloanna, nasutta lai alawo'u gharraho apan uatarŕino wuŕru uaparenta. Ahewallu runia indi niola'a sulaŕummi Kristus wuŕru hunane si Kristus. ¹⁷Tantaŕanna taambe nariaddi sarangkanambone, Kristus uddete dorone. Wuŕru ana waugu Itou lai, ne aŕawo'u inolaanna su tampanete sambau-sambau. ¹⁸Ete Itou tembonannu wuassu wadang-Nge, eteudde jamaatta, ana waugu ete Itou punnu pabbawiakku jamaatta udde. Ete Itou Ana'a pahuŕlune, apan paarorone niapaawiakka apia wuassu papate, tadea'u Itou sassane apan maola'a apianne wuassu aŕawo'u riadianna. ¹⁹Mawu Ruata sassane mappandumma tadea'u alawo'u riadianna sulaŕummu wadangngu Mawu Ruata, aompaanna lai ringannu nasuungnga su wadangngu Anang-Nge. ²⁰Wuŕru sulaŕummu Anang-Nge udde lai Mawu Ruata narŕingida mandiaddi manga aŕawo'a maaukka apia

ringanni Tou – mapia udde su runia, ara'e lai su surga. Mawu Ruata nandiaddi udde wuassu papate n Anang-Nge su alu arussa.

²¹Dorone iamiu marau Mawu Ruata. Iamiu masseetti Tou ana waugu pallaḷagunu wuṛṛu ringirranu laleo. ²²Arawe orassa indi, ringannu papate n Anang-Nge, Mawu Ruata na'ola'a paa'aukki amiu ringanni Tou maola'a mapia apia. Ringannu olangnge udde iamiu wotongnge iapidda sumaruanna Mawu Ruata sulaḷummu asasuungnga, atatuliḍda wuṛṛu tawe saḷane. ²³Arawe iamiu rinone sidutu matuṛṛuta mangngimanna wuṛṛu matohassa uarisikka su pangangimannu. Imbaranga iamiu mamallosu antimma apan suete nionggolla siamiu su tempo iamiu nanengkamma Watti'u Aḷaḷuassa wuassu Mawu Ruata. Watti'a udde suete niapaasingkata su anambo n taumata su ahewallu runia. Wuṛṛu ana waugu udde lai ia'u, Paulus, naola'e daroḷorran-Ne.

Pangangimbe m Paulus su jamaatta

²⁴Orassa indi ia'u maḷuassa matataṛṛanga huna ng kamiu. Ana waugu ringannu asasusa m wadangu, ia'u manuungngu apa apan ta'e rinone niapendamanni Kristus su jamaan-Ne, eteudde wadang-Nge. ²⁵Mawu Ruata nandolo'u maola'a mangangimbe jamaan-Ne huna ng kamiu. Ia'u rinone mapaasingkatu watti'a wuassu Mawu Ruata, sarangkanambone; ²⁶eteudde watti'a ro'e n aḷamonane apan sidutu iaadapingu Mawu Ruata su anambo n taumata, arawe orassa indi niapaaliatta'a su aḷaṛṛanang-Nge. ²⁷Su aḷaṛṛanang-Nge udde Mawu Ruata maapulu mapaliatta'a aroddi apiane wuṛṛu awantuge addapinge udde su anambo n pabbawalagu taumata. Addapinge eteudde: Kristus udde sulaḷummu wadangu, atappasanne iamiu lai sarun maappendamma awawantugu Mawu Ruata. ²⁸Eteudde Kristus apan iwabbatti'i ami su anambo n taumata. Iami mapaanaungnga wuṛṛu mangngarra'a simangitou sarangkanambone ringannu aḷawo'u apande. Tudda ng kami eteudde tadea'u suapan taumata wotongnge iapidda ringannu Mawu Ruata, ere sangkatou taumata apan nahurangke su pangangimanna, ana waugu suete naaukka ringanni Kristus. ²⁹Su ipadea'a olangnge udde ia'u mammannara ringannu maṛṛimadda. Ia'u mammanara ringannu ahewallu atatohassa apan nionggoli Kristus sia'u wuṛṛu apan mammanara sulaḷummu wadangu ringannu napene n taṛṛino.

2 Ia'u maapulu iamiu maasingkata ereapa ahewalle ia'u mammanara huna ng kamiu, wuṛṛu huna mangitou su Laodikia see anambo n taumata apan tawe maaillaḷa si'u sassane. ²Sarangkanambone indi ta'u olaanna tadea'u naungngi mangitou maola'a matohassa wuṛṛu imangitou

uararangngu ma'oma n sara imangitou uasampinunutanna. Ringannu aroddi imangitou atonna-tonna maasunna wuɽɽu mangngimanna see lai maaillaɭa addapingu Mawu Ruata, eteudde Kristus sassane. ³Ete Kristus apan nani'attu aɭawo'u apande wuɽɽu asingkattu Mawu Ruata apan dorone uawuni.

⁴Ia'u namasingkatu indi tadea'u iamiu tawe uwahianni sai-sai apan pande mamaɭonotta siamiu. ⁵Ana waugu salaiwe ia'u uatana'a marau wuassi amiu, ere lai ia'u uatana'a su wallatti amiu. Wuɽɽu ia'u lulluassa maasilo siamiu uasampinunutanna wuɽɽu matohassa sulaɭummu pangangimanna si Kristus.

Pabbawiakka apan nasuungnga

⁶Manga tuɽrangnga suete nanengkamma si Kristus Yesus maola'a. Mawu. Ana waugu udde ɽinone iamiu mabbiakka su sambau ringanni Tou, ⁷wuɽɽu maɽɽamutta su laɭummi Tou. Rinone iamiu mapararisikku wiakku ringanni Kristus maola'a rapappake. Rinone iamiu lembon mangngimanna si Kristus, tuttuɽɽutta apa apan suete niaɽɽa'a siamiu. Wuɽɽu ɽinone naungngi amiu lulluassa ringannu wisara aadiangkamanna.

⁸Rinone iamiu paatehamma, arie ma'oma n sara piaddu mamono'a siamiu ringannu manga aɭaɽɽa'u taumata apan tawe gunane, ewe'e tumba'u mangngaliwu. Manga aɭaɽɽa'a udde waɭine wuassi Kristus, ewe'e wuassu ɽingirɽannu taumata sassane wuɽɽu wuassu manga ghaɽɽaho n tembonannu runia. ⁹Ana waugu ahewallu paa'apulu Mawu Ruata uatana'a sulaɭummi Kristus, eteudde su ola'u taumatane. ¹⁰Wuɽɽu ana waugu mabbiakka uaaukka ringanni Kristus, iamiu lai niongoɭannu wiakka apan nasuungnga. Ana waugu Kristus udde tembonannu aɭawo'u ghaɽɽaho apan uataɽɽino wuɽɽu uaparenta.

¹¹Ana waugu uaaukka ringanni Kristus, iamiu suete nisunatta, waɭine ringannu sunatta apan niola'u taumata, ewe'e sunatta apan niola'i Kristus, apan namallosi amiu wuassu taɽɽino m pallalagu apan marosa. ¹²Ana waugu su tempo iamiu nissaɽɽani, iamiu nilabinga su sambau ringanni Kristus; wuɽɽu ringannu sasaaɽɽani udde lai iamiu niapaawiakka apia su sambau ringanni Kristus ana waugu iamiu mangngimanna taɽɽino Mawu Ruata apan suete napaawiakki Kristus wuassu papate. ¹³Dorone, iamiu natete su pangangimanna ana waugu iamiu marosa, wuɽɽu ana waugu iamiu tawe nisunatta ere sangkatou taumata, Arawe orassa indi Mawu Ruata napaawiakki amiu su sambau ringanni Kristus. Mawu Ruata suete nangampunga alawo'u rosa ng kite, ¹⁴wuɽɽu tate nanusi surattu utangnga su saruanni ite, apan nangonggolu atoranna mawakkata siite. Ringannu nangarussa n suratta udde su alu arussa, Mawu Ruata

namappasa anambo n aalae su saruanni ite. ¹⁵Su alu arussa udde Kristus na'ola'a aławo'u gharraho apan uaparenta wuṛṛu uataṛṛino naola'a tawe atatoḥanne. Imangitou naola'a wawialannu awadaalla su tempo Kristus nangapiddi mangitou ere taumata n ruumanna sulalummu amamattu awawantu-Ge.

¹⁶Ana waugu udde, imbarṛanga mamala n taumata mapaasala ng kami su ola'u umanna ara'e ma'inumma ua'e, ara'e su ola'u manga allo wahewa n agama, ara'e manga ramea m wuṛṛanna wakku, ara'e su ola'u allo n Sabatta. ¹⁷Sarangkanambone udde tumba'u mappaellegu inolaanna apan sarun rumanta, arawe semakku aławo'u inolaanna udde ete-udde Kristus! ¹⁸Imbarṛanga iamiu mapaawala m watangannu rugianu taumata apan mangngawusu naungnge mawawo wuṛṛu massubba manga mala'ekatta. Taumata udde mawunga ringannu manga ringiṛṛannu runia wuṛṛu mamarabunga manga sondapi tou sassane, ¹⁹na'oma n sara tate mangngimanna si Kristus apan naola'a tembonanne. Su aḷunggu piaṛṛa'i Kristus, ahewallu wadanga papaduḷiananna wuṛṛu niammula manga latto'anne, see tinumuwo tumuṛṛuttu apulu Mawu Ruata.

Mate wuṛṛu wiakka su sambau ringanni Kristus

²⁰Iamiu natete su sambau ringanni Kristus, wuṛṛu suete nipallosa wuassu manga gharraho apan uataṛṛino runia indi. Ne anio iamiu mabbiakka ere taumata apan ta'e paparentannu runia indi? Anio iamiu ta'e tuttuṛṛuta manga atoranna ereindi, ²¹"Arie pamita indi", "Arie pattemma udde" "Arie pangeṛṛeta indi"? ²²Anambo n atoranna udde eteudde aławo'u inolaanna apan amungkangu ipaatta, maola'a tate gunane lai. Udde tumba'u manga atoranna wuṛṛu aḷaṛṛa'a apan niola'u taumata. ²³Atonna aellehanna olangnge udde mapia; ringannu darolokke tadea'u taumata massubba mala'ekatta, mapaawawo n ririne wuṛṛu mannansara watanganne; arawe sarangkanambone udde tawe gunane ipangehetta apulu n taumata.

3 Iamiu suete niapaawiakka apia su sambau ringanni Kristus. Ana waugu udde ṛinone iamiu mammanara tadea'u maasomba apapia wuassu surga, suapa Kristus uaparenta ringannu Mawu Ruata. ²Timmona'a ringiṛṛannu su inolaanna isudde, arie su manga inolaanna su runia. ³Ana waugu iamiu natete, wuṛṛu wiakku uawuni su sambau ringanni Kristus sulalummu Mawu Ruata. ⁴Ne, punnu wiakku apan tune eteudde Kristus wuṛṛu napawe itou asiloanna, ne iamiu lai sarun rumanta suadio'a ringanni Tou sulalummu atatulide!

Wiakka tabbe wuɾɾu wiakka wakku

⁵Ana waugu udde, tantanga'e paa'apulu n runia apan maɯwinasa ririnu, ere sandaga, manga inolaanna apan tawe matataɾɾino, apulu naungnga, tawe masabare, apulu apan laleo, wuɾɾu awawaɭiu (ana waugu awawaɭiu udde nassuɭungngu massubba paaɭuanna). ⁶Manga inolaanna ereudde mapaaɭatto n wontogu Mawu Ruata su manga taumata apan maɭawangnga. ⁷Dorone iamiu sassane lai tuttuɾɾuta manga apulu udde, su tempo iamiu paparentannu inolaanna udde.

⁸Arawe orassa indi ɾinone iamiu mandammem manga inolaanna laleo wuassu ririnu; ariete masa'u, ara'e mandona ara'e pia naungnga maddintinu taumata waine. Arie saran paassa sumabangnga wuassu moɾɾongu manga wisara laɭela ara'e wisara apan laleo. ⁹Arie panga-wusu sangkatou ringannu waine, ana waugu wiakka tabbe ringannu aɭawo'u pallaɭagune suete niramme ng kamiu. ¹⁰Iamiu orassa indi suete nionggolannu wiakka wakku. Imiu taumatate wakku, apan si-dutu lallimbakuannu mandiriaddine eteudde Mawu Ruata, tumuɾɾuttu pahudde sassane. Pandumanne eteudde tadea'u iamiu maaillaɭa Mawu Ruata ringannu mapia-pia. ¹¹Ana waugu wuassu inolaanna udde, nawuɭite aɭawo'u apendamma mappapaɾɾala n taumata n Yahudi wuɾɾu waɭine Yahudi, taumata nisunatta wuɾɾu taumata tawe nisunatta, tate lai paɾɾalane su wallatu taumata raho wuɾɾu taumata woddo; su wallatu allangnga wuɾɾu waɭine allangnga, ana waugu Kristus uddewe uatahuanna sarangkanambone, wuɾɾu Itou uaaukka ringanni mangitou sarangkanambone!

¹²Eteudde tuɾɾanga sarangkanambone aɭaɾɾana'u Mawu Ruata. Mawu ruata marangngu siamiu wuɾɾu namile siamiu maola'a pussa'a-Ne sassane. Ana waugu udde iamiu ɾinone mapaaɭiatta'u apapia, iamiu ɾinone uasasangkapia, masaɾɾionto'a, masaɾɾiologa wuɾɾu mataɾɾanga su asasusa. ¹³Iamiu ɾinone masabare sangkatou ringannu waine, wuɾɾu maapulu mangampunga sangkatou ringannu waine. Mawu ringannu naungnga maɭuassa mangampunga siamiu, nariaddi iamiu lai ɾinone mangampunga sangkatou ringannu waine. ¹⁴Wuɾɾu apianne eteudde: Iamiu ɾinone uararangngu ana waugu ete darangngu udde map-paa'aukku manga tuɾɾangnga sarangkanambone ma'oma n sara masuungnga. ¹⁵ɾinone manga pangudusannu hatto udde insueannu paddarame apan nionggoli Kristus sulaɭummu naungngu. Ana waugu Mawu Ruata namago siamiu maola'a sambau wadange, tadea'u iamiu mabbiaikka sulaɭummu paddarame wuassi Kristus udde. ɾinone iamiu maa-diangkamanna. ¹⁶ɾinone manga aɭaɾɾa'i Kristus apan napene n aɭamatta umusippa sulaɭummu naungngu. ɾinone iamiu uatatantiro wuɾɾu

uuaonggolu alarra'a lembon apianne. Antaria'e Mazmur wufru manga daralo see manga antari n Sarrani; pangantarite huna Mawu Ruata ringannu apendamu aadiangkamanna sulaumu naungngu. ¹⁷Alawo'u apa apan a'olaanni amiu ara'e sulaumu wisara, rinone udde olaanna wufru iwisara sulaumu arannu Mawu Yesus. Aaljomante su Mawu Ruata Iamangnga ana waugu inolaannu Mawu Yesus siamiu.

Paa'aukku taumata sulaumu wiakka apan wakku

¹⁸Manga turangnga apan naola'a awingnga wawine! Paaturuta su awingngu esakka, ana waugu aroddite pallaagunu ere sangkatou taumata n Sarrani.

¹⁹Manga turangnga apan naola'a awingnge esakka! Paarangnge awingngu wawine. Arie manggala'a simangitou.

²⁰Manga alarrana'a! Eteudde manara ng kamiu taumata n Sarrani sidutu tuturuta hagurangngu, ana waugu eteudde maaluaassa naungngu Mawu Ruata.

²¹Manga turangnga apan naola'a iamangnga! Arie mapaasusa naungngu manga alarranangngu ma'oma n sara imangitou masusa naungnge.

²²Manga turangnga apan naola'a allangnga! Sulaumu alawo'u inolaanna, rinone iamiu maturuta mawunu su runia indi. Arie tumuruta simangitou tumba'u su tempo imangitou uariaga siamiu, ana waugu iamiu maapulu raloanna. Paaturuta simangitou ringannu naungnga waresi, ana waugu iamiu mangngaddatta Mawu. ²³Alawo'u manara apan nionggolla siamiu, rinone manaranni amiu ringannu ahewallu naungnga, parimaunapa eteudde Mawu apan a'imbeanni amiu, wufru waline tumba'u taumata. ²⁴Paanaunge manungku iamiu sarun manengkamma lalantake wuassu Mawu Ruata. Apa apan nissaddia Mawu su alarranang-Nge, eteudde sarun ionggola siamiu. Ana waugu mawu apan atonna eteudde Kristus sassane. ²⁵Wufru isai-sai apan na'ola'a pasasala, sarun mamasanna manga pasasane udde; ana waugu Mawu tawe mamile hati.

4 Manga turangnga apan naola'a tuangnga! Rinone iamiu ma'ola'a manga allangngu ringannu apapia wufru atatujidda. Paanaunge manungku iamiu pia sangkatou tuangnga su surga.

Manga tatantiro

²Rinone iamiu umaļiomanna ringannu ma'uddupa wuŗŗu maantaga, lapiddu maadiangkamanna su Mawu Ruata. ³Iami lai aaljomana'a tadea'u Mawu Ruata mangoggolu allo mapia siami manaļiawukku watti'a su ola'a addapingi Kristus. Ana waugu olangnge udde ne ia'u orassa indi uatana'a sulaļummu tuttupanna. ⁴Aaljomante tadea'u ia'u wotongnge manaļa'a n addapinga udde ringannu masema-semakka, su ereapa pandumanne.

⁵Sulaļummu paa'aukki amiu ringannu manga taumata apan tawe mangngimanna, rinone iamiu mabbiakka su atatulidda wuŗŗu mapp'a'attu aļawo'u tempo mapia udde, ringannu mapia-pia. ⁶Rinone manga inolaanna apan iwabbisara ng kamiu sidutu maaļuassa wuŗŗu apangimananna. Rinone iamiu maasingkata ereapa rinone iamiu sumimbakka manga aiwaļo n taumata.

Panginsueannu suratta wuŗŗu tabea

⁷Tikhikus, tuŗrangngi ite apan arangnguanna, sarun mamasingkata siamiu su ola'a alawo'u inolaanku. Itou matammuda mammanara ringanni ami huna Mawu. ⁸Ia'u nandolokki tou ringanni amiu pandumanne tadea'u iamiu maasingkata ola'i ami wuŗŗu iamiu iapaaļuassa. ⁹Onesimus sarun inai su sampunna ringanni Tikhikus; itou sangkatou wuassu walahannu. Itou taumata matuŗrute, wuŗŗu iami marangngu sitou. Itou wuŗŗu Tikhikus sarun mamasingkata siamiu alawo'u apa apan nariaddi su tampa'u indi.

¹⁰Aristarkus, apan sulaļummu tuttupanna suadio'a ringanku, nandoho n tabea siamiu. Aroddi lai Markus, tuŗrangi Barnabas. (Iamiu suete nirohoannu watti'a ipanansomakka sitou amungkangu itou rumanta ringanni amiu.) ¹¹Tabea lai wuassi Yesus apan aranne lai isas-sago Yustus. Wuassu manga taumata n Yahudi apan nangimante Mawu Yesus, tumba'u imangitou n tallu apan orassa indi mammanara suadio'a ringanku mapp'aamattu manara Mawu Ruata. Imangitou atonna-tonna mantulungku.

¹²Tabea wuassi Epafra. Itou lai wuassu walahannu. Itou allangngi Kristus Yesus, apan sidutu u'ajiomanni amiu ringannu maŗrimadda. Itou sussaļande Mawu Ruata tadea'u pangangimannu mabaļi matohassa wuŗŗu iamiu atonna-tonna natimmaddete, tadea'u iamiu lai nasuungnga tuttuŗruta apulu Mawu Ruata. ¹³Itou naasilo sassane manungku itou suete nammanara maŗrimada hunane siamiu wuŗŗu su manga taumata

su Laodikia wuṛṛu Hierapolis. ¹⁴Doktere Lukas, apan arangnguanni ite, wuṛṛu Demas nandoho n tabea siamiu.

¹⁵Waḷoa'a lai tabea ng kami su manga manga tuṛrangnga Saṛṛani su Laodikia; wuṛṛu lai si Nimfa, wuṛṛu su manga jamaatta apan mattaṛṛamawu su waḷene sambau-sambau. ¹⁶Napawe suratta indi suete niwasa ng kamiu, suapa m botongnge wasa'a lai ringannu jamaatta su Laodikia. Aroddi lai iamiu sassane ṛinone mabbasa n suratta apan sarun iroho wuassu Laodikia siamiu. ¹⁷Wuṛṛu waḷoa'a si Arkhipus, "Insuete manara apan nionggolla si'o ipangngimbe Mawu."

¹⁸*Tabea wuassia'u, Paulus.* Ia'u sassane apan namoṛṛetu addoanne indi. Arie paabuḷiane manungku ia'u ta'e sulaḷummu tuttupanna!

Doronganna Mawu mangaḷamatta siamiu.

Tabea ng kami,
Paulus

SURATTI PAULUS PAARORONE SU JAMAATTU TESALONIKA

WISARA TAŁAANE

Tesalonika eteudde sambau inanggu Soa n Makedonia, sambau provinsi araratuannu Roma. Jamaatta su Tesalonika niapararisikki Paulus napawe itou nanantangke m Filipi. Arawe tawe nałannu wua udde, manga taumata n Yahudi apan naungnge laleo si Paulus mannat-take mannompolla manara m Paulus eteudde mabatti'u ałarra'u Sařrani su manga taumata wałine Yahudi apan suete namasilo n apulune su agama n Yahudi. Ringannu naungnga niwata'a Paulus nanantangu Tesalonika wuřru inaita watukku Berea. Wua udde napawe itou na'omate su Korintus, itou nanengkamma suratta wuassi Timotius, hawene sang-kamanaranna, su ola'u jamaatta su Tesalonika.

Nariaddi, *Suratti Paulus Apan Paarorone Su Jamaattu Tesalonika* niworřeta ipangonggolu sasasa wuřru atatohassa simangitou. Paulus maadiangkamanna su watti'a apan niaringiřrani tou su ola'u pangangimanna wuřru darangngu mangitou. Itou napaanaungnga simangitou su ola'u wiakki tou sassane su tempo ta'e uatana'a su pattangnganni mangitou. Napawe suete namasingkattu sarangkanambone udde, Paulus sinumimbakka manga aiwało mangitou su ola'u daranta n Kristus aruane. Amungkangu sangkatou taumata n Sařrani mate tantałanna Kristus taambe rumanta apia, wotongngewe taumata udde manengkamma wiakka tutune wuřru saran małannu-łannu wuassi Kristus? Tingngerate Kristus rumanta? Paulus nanantiro tadea'u imangitou sidutu mammanara ringannu matammuda lapiddu uararřaddo daranta n Kristus ringannu napene n antimma.

Laloꝛꝛone

Panattaꝛꝛanne	1:1
Aadiangkamanna wuꝛꝛu daralo	1:2-3:13
Tatantiro su ola'u ereapa ꝛinone pallaꝛagu n taumata n Saꝛꝛani	4:1-12
Taꝛa'a su ola'u daranta n Kristus aruane	4:13-5:11
Manga tatantiro panginsueanne	5:12-22
Panginsueanne	5:23-28

1 Manga tuṙrangnga jamaatta su Tesalonika apan naola'a aḷaṙṙana'u Mawu Ruata Iamangnga wuṙṙu Mawu Yesus Kristus:

Iami, eteudde Paulus, Silas wuṙṙu Timotius mangngantimma do-
ronganna Mawu Ruata mangonggolu aḷamatta wuṙṙu paddarame
siamiu.



Soa Tesalonika (1:1)

Wiakka wuṙṙu pangangimannu manga taumata n Tesalonika

^{2,3}Iami sidutu ù'aḷiomanna su Mawu Ruata ana waugu manga
tuṙrangnga sarangkanambone. Suapan iami umaḷiomanna su Mawu Ruata
wuṙṙu Iamangngi ite, iami sidutu mannaungnga siamiu. Iami sidutu
u'aḷiomanni amiu. Iami mannaungnga ereapa iamiu napaaliatta'a su-
laḷummu pallaḷagu manungku iamiu mangngimanna si Kristus, ereapa
iamiu mandangngu taumata waine, na'oma n sara iamiu mangngimbe
simangitou, wuṙṙu ereapa iamiu mangantimma ringannu matohassa su
Mawu ng kite Yesus Kristus. ⁴Iami masingkatta manga tuṙrangnga,
manungku Mawu Ruata mandangngu siamiu wuṙṙu suete namile siamiu
maola'a pussa'a-Ne sassane. ⁵Ana waugu iami namasingkatu Watti'u
Aḷaḷuassa siamiu waḷine tumba'u ringannu wisara, arawe lai ringannu
taṙṙino, wuṙṙu Ghaṙṙaho Mawu Ruata. Wuṙṙu iami mangngimanna
atonna atatuliḷdu Watti'u Aḷaḷuassa udde. Iamiu masingkata ereapa
iami mabbiakka ana waugu iamiu su tempo iami uatana'a su pattanganni
amiu. ⁶Iamiu uantantalongnga pallaḷagu ng kami wuṙṙu tuḷada Mawu.
Salaiwe iamiu tumanite n uatataṙṙanga, iamiu mannaḷoho ringannu
naungnga maḷuassa watti'a apan iwabbatti'i ami siamiu. Aḷaḷuassa

udde nionggolu Ghaṛraho Mawu Ruata. ⁷Ringannu udde iamiu naola'a tuḷadda su anambo n taumata n Saṛrani su Makedonia wuṛru Akhaya. ⁸Ana waugu nanattakka wuassi amiu, watti'a su ola'u Mawu suete nia-paasingkata na'oma n sara watukku Makedonia wuṛru Akhaya. Wuṛru waḷine tumba'u udde lai; arawe watti'a su ola'u ereapa iamiu nangi-manna Mawu Ruata na'omate su aḷawo'u tampa, na'oma n sara iamii lasa'e lai maggahato n aḷawo'u hatto siamii. ⁹Anambo n taumata udde uahahatto su ola'u ereapa iamii nanaḷoho siami su tempo iamii dorone nirumanta ringanni amiu. Imangitou uahahatto su ola'u ereapa iamii nanantangu pasasubba paaḷuanna wuṛru nirumanta ringannu Mawu Ruata tinggassa apan wiakka wuṛru mattaṛramawu Sitou. ¹⁰Imangitou uahahatto lai su ola'u ereapa iamii manggantimma daranta n Ana'u Mawu Ruata wuassu surga, eteudde Mawu Yesus, apan suete niapaa-wiakku Mawu Ruata wuassu papate. Ete Mawu Yesus udde lai apan manaḷamatta siite wuassu asasa'u Mawu Ruata apan sarun rumanta.

Pamamanara Paulus su Tesalonika

2 Manga tuṛrangnga! Iamii sassane masingkata manungku patatembu ng kami siamii pia gunane. ²Iamii masingkata manungku ro'e n iamii taambe nirumanta ringanni amiu su Tesalonika, iamii suete niapaasusa wuṛru niaḷuandahanna su Filipi. Arawe salaiwe manambo taumata mandooppa siami, Mawu Ruata ng kite suete nangonggolu awawarṛani siami ipabbatti'u Watti'u Aḷaḷuassa siamii apan darantane wuassi Tou. ³Iamii nangahe siamii waḷine sambau inolaanna apan niuḡaliwu; wuṛru lai waḷine ringannu pandumma apan wengkola wuṛru ipangngawusu. ⁴Tawe! Iamii tawe nabbisara see ipalluassa naungngu taumata, ewe'e ipalluassa naungngu Mawu Ruata, apan mannaḷu'atta naungngi ami. Ana waugu iamii aellehannu Mawu Ruata wotongnge manaḷiawukku Watti'u Aḷaḷuassa udde. ⁵Iamii sassane masingkata manungku tawe saran paassa iamii nassaḷo'a ara'e nangawusu siamii ipamuni m pandumma apan laḷeo udde. Mawu Ruata mattatiale! ⁶Iamii lai tawe mappandumma daralo wuassu taumata - mawae wuassi amiu ara'e wuassu taumata waine. Rinone maola'a sangkatou rasulli Kristus iamii wotongnge madorongnga sarannapa siamii. ⁷Arawe iamii masarṛionto'a su tempo iamii uatana'a su wallatti amiu, ere sangkatou inangnga uapadduḷi aḷarṛanangge. ⁸Ana waugu darangngu ng kami, iamii uasaddia mangonggolla siamii waḷine tumba'u Watti'u Aḷaḷuassa wuassu Mawu Ruata udde arawe wiakki ami lai. Ana waugu iamii tumanite n marangngu siamii! ⁹Asinungka iamii ta'e maanaungnga ereapa arṛimade iamii mattinsahadda wuṛru mammanara. Allo ṛabbi

iami mammanara tadea'u iami tawe mapaasusa n saran sangkatou wu-
assi amiu su tempo iami mammasingkatu Wattu'u Alaļuassu Mawu
Ruata udde siamiu.

¹⁰Iami mabbiakka ringannu na'ukkassa, su rinone wuṛṛu tawe ang-
ngone su saruanni amiu apan mangngimante si Kristus. Ete iamiu
udde naola'a tiala ng kami; aroddi lai Mawu Ruata. ¹¹Iamiu masing-
kata manungku iami ma'ola'a siamiu sambau-sambau ere sangkatou ia-
mangnga mammaduḷi alaṛṛanangge. ¹²Iami mannantiro siamiu, iami
mangngonggolu sasasa siamiu wuṛṛu iami mammata'a tadea'u iamiu ma-
bbiakka aroddi olangnge ma'oma n sara maalūassa naungngu Mawu
Ruata. Ana waugu Mawu Ruata suete namago siamiu maola'a laḷorṛo n
Runia Waku Mawu Ruata wuṛṛu mamendamma awawantu-Ge.

¹³Pia lai sambau hatto waine apan naola'a siami sidutu maadiang-
kamanna su Mawu Ruata. Hatto udde eteudde, manungku su tempo
iami mammasingkatu wattu'u Mawu Ruata siamiu, iamiu naddaringikka
wuṛṛu nanengkamma wattu'a udde waḷine ere wattu'a wuassu taumata,
arawe wattu'a apan atonna-tonna wuassu Mawu Ruata. Ete Itou apan
mammanara sulalummu watangannu apan mangngimanna si Kristus.
¹⁴Manga turṛangnga, asasusa apan niapendamanni amiu, suete niapen-
damannu manga jamaattu Mawu Ruata su Yudea apan naola'a pussa'a
n Kristus Yesus. Iamiu naapendamma asasusa wuassu pabbawalagi amiu
sassane, ere lai niapendamannu manga jamaattu Mawu Ruata su Yu-
dea udde wuassu wageangngu manga taumata n Yahudi. ¹⁵Manga tau-
mata udde namate Mawu Yesus wuṛṛu manga nabi, see nanansara siami.
Imangitou masseettu anambo n taumata, wuṛṛu Mawu Ruata atonna-
tonna tawe maalūassa simangitou. ¹⁶Ewe'e imangitou lai mammalaatta
siami mabatti'a su manga walaga waḷine Yahudi wattu'a apan wotongnge
maasaḷamatta manga walaga udde. Ringannu aroddi manga taumata n
Yahudi udde sidutu mannamba rosa mangitou na'oma n sara reenganne
masuungnga. Wuṛṛu orassa indi imangitou panginsueanne niarantannu
asasa'u Mawu Ruata!

Apulu m Paulus mattembo paassa lai manga taumata n Tesalonika

¹⁷Arawe manga turṛangnga, ro'e n iami nattalei taḷa ng kadio'a
wuassi amiu - nattalei su mata arawe su naungnga tawe - iami
lembon mannaungnga siamiu wuṛṛu mappandumma atonna-tonna ana
see massomba ng kamiu apia! ¹⁸Iami maapulu inai mattembo siamiu;
wuṛṛu ia'u, suete naannamma na'oma n sara paarua, arawe Setanna
mammalaatta siami. ¹⁹Atonna ete iamiu aantimanna wuṛṛu maalūassa

siami. Ana waugu napawe Mawu Yesus rumanta, wuṛṛu iite sumaruanna Sitou, ne ete iamiu apan maaļuassa siami! ²⁰Atonna ete iamiu ilallala'a wuṛṛu maaļuassa siami!

3 Panginsueanne apulu ng kami tate niataṛranganna. Ana waugu udde iami maṛringidda mappianne iami itantanga sassane su Atena, ²tantaḷanna iami nandolokku tuṛṛangi ite Timotius. Itou sangkatou mamamanara Mawu Ruata apan mammanara suadio'a ringanni ami mam-masingkatu Watt'i'u Aḷaļuassa su ola'i Kristus. Iami nandolokki Timotius ringanni ami tadea'u itou mannohassa siamiu wuṛṛu mangong-golu sasasa siamiu ana see lembon mangngimanna lai si Kristus. ³Ringannu aroddi tawe saran sangkatou wuassi ami apan sumorṛota ana waugu asasusa ng kite indi. Iamiu sassane masingkata manungku manga asasusa udde nasutta sulaḷummu pandumannu Mawu Ruata siite. ⁴Su tempo iami ta'e su sambau ringanni ami, iami suete namasingkata siamiu su paarorone manungku iite sarun matataṛranga. Wuṛṛu udde atonna-tonna suete nariaddi; iamiu sassane masingkatte. ⁵Ana waugu udde ia'u nandolokki Timotius, ana waugu ia'u maapulu atonna maasingkata ereapa araṛrimaddi ami mangngimanna si Kristus. Ia'u sussingawangnga ana waugu Setanna wotongnge mamono'a siamiu ma'oma n sara anambo n asasahaddi ami maola'a tate gunane.

⁶Orassa indi Timotius nabelengke wuṛṛu suete nabbatti'a siami watt'i'a maaļuassa su ola'u ereapa iamiu mangngimanna si Kristus wuṛṛu uararangngu. Itou namasingkata siami manungku iamiu sidutu mangngado m pananaunganna mapia su ola'i ami sulaḷummu naungngu. Wuṛṛu iamiu maapulu maisasomba ng kami, ere lai iami maapulu maisasomba ng kamiu. ⁷Ana waugu udde manga tuṛṛangnga, sulaḷummu aḷawo'u asasusa wuṛṛu patatuṛṛaddanni ami, iami niaḷiwuṛṛanu watt'i'i ami. Pangangimannu si Kristus naahewalla naungngi ami ⁸na'oma n sara orassa indi iami naappendamma atonna-tonna mabbiakka, sambaliate iamiu sidutu uarisikka matohassa, uauukka ringannu Mawu. ⁹Aroddi ahewalle appendammu aadiangkamanni ami su Mawu Ruata su aḷawo'u aḷaļuassa apan niappendamanni ami su saruan-Ne ana waugu iamiu. ¹⁰Allo ṛabbi iami sussaḷande Sitou ringannu awawira n daḷummu naungnga, tadea'u iami wotongnge masasomba sassane ringanni ami ipanuungngu apa apan ipaapulu ng kamiu see ipangimanna si Kristus aroddi olangnge.

¹¹Antimanna Mawu Ruata Iamangngi ite sassane, wuṛṛu Mawu ng kite Yesus Kristus manulidda laḷanni ami ipadumatingngi ami! ¹²Antimanna Mawu ma'ola'a siamiu lembon marangngu sangkatou ringannu waine wuṛṛu lembon marangngu su anambo n taumata, na'oma n sara darangngunu udde aatambanna, ere lai darangngu ng kami siamiu. ¹³Ringannu aroddi Mawu sarun manohassa naungngu, na'oma n

sara iamiu ma'ukkasa wuŕru tawe saŕane su saruannu Mawu Ruata Ia-mangngi ite, su tempo Mawu ng kite Yesus rumanta suadio'a ringannu anambo n taumata apan naola'a pussa'a-Ne.

Wiakka apan maaŕuassa naungngu Mawu Ruata

4 Panginsueanne manga tuŕrangnga, iami suete nanuŕada siamiu su ola'u ereapa iamiu ŕinone mabbiakka malluassa naungngu Mawu Ruata. Atonna iamiu suete nabbiakka ereudde. Arawe orassa indi su-laŕummu taŕŕino Mawu Yesus, iami sumaŕande siamiu wuŕru mamata'i amiu tadea'u iamiu lembon maddea'a lai olangnge udde! ²Ana waugu iamiu suete naasingkata manga tatantiro apan suete nionggoli ami siamiu sulaŕummu taŕŕino Mawu Yesus. ³Ete indi ipaapulu Mawu Ruata tadea'u iamiu tumba'u mabbiakka ringanni Tou, susi, mangngindau n aŕawo'u pallaŕagu apan laŕeo. ⁴Suapan esakka su wallatti amiu ŕinone maasingkata ereapa mabbiakka ringannu awingnge wuŕru ringannu ino-laanna apan maaŕuassa naungngu Mawu Ruata wuŕru taumata. ⁵Arie mabbiakka tuttuŕruta apulu n daŕummu naungngu su saruannu awingngu, ere niola'u manga taumata apan tawe maaillaŕa Mawu Ruata. ⁶Sulaŕummu olangnge ereudde, arie saran sangkatou ma'ola'a pasasaŕa su tuŕrange, ara'e mallinga. Dorone iami suete napaanaungnga ringannu atonna siamiu, manungku Mawu sarun maŕruumannu manga taumata apan ma'ola'a manga pasasaŕa ereudde. ⁷Mawu Ruata mammago siite, waŕine tadea'u see iite mabbiakka sussandaga, ewe'e tadea'u iite mabbiakka maaŕuassa naungngu Mawu Ruata. ⁸Taumata apan tawe madaringikka aŕaŕra'a indi waŕinewe tawe madaringikka taumata, arawe tawe madaringikka Mawu Ruata apan nangonggolu Ghaŕraho-Ne susi siamiu.

⁹Tate gunane lai iami mamorŕettu suratta siamiu su ola'u ereapa iamiu ŕinone mandangngu manga tuŕrangnga apan sambau su pangangimanna. Iamiu sassane suete niaŕraannu Mawu Ruata ana see iamiu uararangngu. ¹⁰Wuŕru olangnge indi suete niapaalŕatta'i amiu su saruannu manga tuŕrangnga apan pangangimanna sambau su Makedonia. Arawe manga tuŕrangnga, iami sumaŕande atonna siamiu, tadea'u wiakki amiu maola'a lembon apianne lai. ¹¹Pattinsahadde mabbiakka ringannu matammuda wuŕru tawe mailaŕo'a su hatto n taumata waine. ŕinone iamiu mammanara maddea'a anni amiu sassane, ere lai iami dorone suete nandolokki amiu.

¹²Amungkangu iamiu mabbiakka arodidi, iamiu tate uatundeetta sisai-sai, wuŕru manga taumata apan tawe mangngimanna si Kristus, sarun mangaddatta siamiu.



Daranta n Mawu

¹³Manga turřangnga, iami maapulu tadea'u iamiu maasingkata apa apan řinone su ola'u manga taumata apan natete; tadea'u iamiu tawe masusa naungnga ere manga taumata waine apan tawe antimme. ¹⁴Iite mangngimanna manungku Mawu Yesus suete nate wuřru nabbiakka apia. Ana waugu udde iite mangngimanna lai manungku Mawu Ruata sarun mapaawiakku apia anambo n taumata apan mangngimanna Mawu Yesus wuřru apan natete, tadea'u imangitou mabbiakka su sampunna ringanni Tou.

¹⁵Tumuřruttu olangnge udde, indete alařra'u Mawu apan iapaassing-kati ami siamiu; Su tempo Mawu Yesus rumanta, iite apan ta'e wiakka, tawe malliu řoro manga taumata apan natete dorone. ¹⁶Pařradote mala'ekatta mawantuga sarun umui ringannu tingikka ma'ikkatta wuřru trompetu Mawu Ruata iapatuntingikka maola'a sambau tatiala iapa-saddia. See Mawu Yesus sassane sarun sumossokka wuassu surga, wuřru manga taumata n Sařrani apan natete sarun iapaawiakka dorone. ¹⁷Wua udde, iite apan ta'e wiakka su tempo udde sarun masengkenga su sampunna ringanni mangitou sulařummu winabbawa maisasomba Mawu Ruata su winalanganna. See iite matana'e ringannu Mawu saran mařannu-řannu. ¹⁸Ana waugu udde, řinone iamiu uatatohassa naungnga ringannu mappamattu manga wisara indi.

Paasaddiate su daranta n Mawu

5 Manga turrangnga, iami salaiwe lasa'e mamorrettu suratta siamiu angnerate tempone apan na'etta'a, manga olangnge udde sarun mariaddi. ²Ana waugu iamiu sassane masingkata ringannu masemakka manungku allo n daranta Mawu udde sarun rumanta ere tarra ta'o su tempo rabbi. ³Amungkangu taumata mabbisara, "Sarangkanambone malannaba wurru matammuda," ne ete su tempo udde inarrombanganne imangitou sarun arriaannu papate wurru tawe saran sangkatou apan wotongnge maatajangnga. Olangnge udde sarun mariaddi sangkarondapa, ere taddu'u sangkatou wawine apan sarun mangunsiwe. ⁴Arawe iamiu walineuwe taumata apan mabbiakka sulaummu araranduma, na'oma n sara allo udde naarindu'a siamiu ere daranta n sangkatou tarra ta'o. ⁵Turranga sarangkanambone eteudde taumata apan mabbiakka sulaummu asasemakka; iamiu nasutta su allo apan masemakka. Iite waline taumata apan mabbiakka sulaummu araranduma, ara'e nasutta su rabbi apan maranduma. ⁶Ana waugu udde imbaranga iite tumba'u mattiilla ere taumata waine. Iite rinone uariaga wurru ringiranni iite rinone masemakka. ⁷Su tempo rabbi taumata mattiilla, wurru su tempo rabbi lai taumata mabba'i wu'anna. ⁸Arawe iite indi manga taumata apan nasutta su allo apan masemakka; ana waugu ringiranni iite rinone masemakka. Iite rinone sidutu manggimanna Mawu wurru mandangngu manga taumata waine wurru manggantimma ringannu atonna manungku Mawu Ruata sarun manalamatta siite. Eteudde ahidda apan ualindumma siite sulaummu manara luma-wangnga araranduma. ⁹Mawu Ruata namile siite waline iruumanna, arawe tadea'u maasomba asalamatta wuassu Mawu ng kite Yesus Kristus. ¹⁰Itou nate huna ng kite, tadea'u su tempo Itou rumanta apia - tanne iite ta'e wiakka, ara'e natete - iite wotongnge mabbiakka su sambau ringanni Tou. ¹¹Ana waugu udde rinone iamiu sidutu uasasasa wurru uatathassa ere lai o'laanni amiu orassa indi.

Manga tatantiro panginsueanne wurru tabea

¹²Manga turrangnga, iami sumalande tadea'u iamiu mangadata tau-mata apan mammanara su pattangngani amiu; eteudde imangitou apan suete nipile Mawu mamiarra'a wurru manantiro siamiu. ¹³Pangaddatta simangitou ringannu mapia-pia wurru ringannu paddarangngu ana waugu ipannaungnga apa apan suete niola'i mangitou. Pabbiakke sidutu ringannu paddarame.

¹⁴Iami madoronga lai, Manga turrangnga, taggue ringannu padda-rame taumata apan maddiru mammanara; tohassa naungngu taumata apan matta'utta; tulunga'a taumata apan wotongnge iatulunga, wurru paasabare su saruannu awadaalla. ¹⁵Paariagai tadea'u arie pia tau-mata apan mabalissu alaleo ringannu alaleo. Paddea'e sidutu ringannu ma'ola'a apapia, sangkatou ringannu waine wurru su anambo n taumata.

¹⁶Rinone iamiu sidutu lulluassa, ¹⁷wurru sidutu u'aljomanna. ¹⁸Sulalummu alawo'u inolaanna rinone iamiu maadiangkamanna, ana waugu eteudde ipaapulu Mawu Ruata wuassi amiu taumata apan mabbiakka uauukka ringanni Kristus Yesus.

¹⁹Arie manarranga Gharraho Mawu Ruata. ²⁰Arie mangadio'a manga watti'a apan nionggolu Gharraho Mawu Ruata. ²¹Sarangkanambone rinone iannamma, wurru apapia sarun tatturrutanna. ²²Pangindaute n alawo'u hati n alaleo.

²³Antimanna Mawu Ruata sassane nangonggolu paddarame siite, ma'ola'a siamiu taumata apan atonna-tonna mabbiakka huna Mawu Ruata sassane. Doronganna Mawu Ruata mallu'adda ahewallu wadangngu, mapia gharraho, rimuudda, wurru lai wadangngu, ma'oma n sara tawe sangkule su tempo Mawu ng kite Yesus Kristus rumanta apia. ²⁴Mawu Ruata, apan suete namago siamiu, sarun ma'ola'a olangnge udde ana waugu Itou tawe maabbuli.

²⁵Aljomana'a iami, manga turrangnga!

²⁶Paa'adate sarangkanambone ringannu aakkannu pasasangkaturrangannu taumata n Sarrani.

²⁷Sulalummu tarfino Mawu, ia'u sumafande tadea'u iamiu mabbasa n suratta indi su anambo n turanga apan sambau su pangangimanna.

²⁸Antimanna Mawu ng kite Yesus Kristus mangalamatta siamiu.

Tabea ng kami,
Paulus

SURATTI PAULUS ARUANE SU JAMAATTU TESALONIKA

WISARA TAŁAANE

Ałalışu su ola'u daranta n Kristus aruane ta'e sidutu maalapputu manga hatto sulałummu jamaattu Tesalonika. *Suratti Paulus Aruane Su Jamaattu Tesalonika* niwořřeta ipanginsue manga hatto udde. Imangitou pia řingiranna manungku tempone Kristus rumanta aruane nia'omante. Řingiranna udde nassała, unni Paulus. Ana waugu tantałanna Kristus taambe nabelengnga watukku runia, arařřagissa wuřřu ałalışo su runia sarun aatambanna, dorone ipapiařřa'u sangkatou apan asingkatanna "Taumata Laleo" wuřřu apan mannałare si Kristus.

Paulus mangke mannantiro su mabbawasane manungku imangitou sidutu mangngimanna si Kristus, salaiwe wiakki mangitou susa wuřřu imangitou řinone matatařřanga. Paulus mannantiro tadea'u imangitou sangkatou-sangkatou mammanara ipaddea'a wiakki mangitou, ere lai Paulus wuřřu manga hawene. See lai inangitou mařřimada ma'olala apapia.

Lałorřone

Panattařřanne	1:1-2
Daralo wuřřu darolokka	1:3-12
Tatała'a su ola'u daranta n Kristus	
aruane su runia	2:1-17
Tatantiro su ola'u ereapa řinone	
pallałagu n taumata n Sařřani	3:1-15
Panginsueanne	3:16-18

1 Manga tuṛrangnga jamaatta su Tesalonika, apan naola'a pabbawalagu Mawu Ruata Iamangngi ite wuṛṛu Mawu Yesus Kristus! Iami eteudde Paulus, Silas wuṛṛu Timotius ²mangngantimma doronganna Mawu Ruata Iamangnga wuṛṛu Mawu Yesus Kristus mangonggolu aḷamatta wuṛṛu paddarame siamiu.

Ru'umanna apan ola'anna su daranta n Kristus

³Manga tuṛrangnga, iami sidutu ma'adiangkamanna su Mawu Ruata ana waugu iamiu. Wuṛṛu mangngimanna si Kristus, wuṛṛu iamiu lembon uararangngu sangkatou ringannu waine. ⁴Ana waugu udde anio iamiu uahahatto su ola'i amiu suapan iami mattembo manga jamaattu Mawu Ruata. Ringannu maḷuassa iami mabatti'a ereapa iamiu sidutu mangngimanna si Kristus sulaḷummu pananansara wuṛṛu asasusa apan niapendamanni amiu.

⁵Isindi nasemakke aroddi atuḷidde pamamarikissu Mawu Ruata: Iamiu suete natataṛrangnga ana waugu Runia Waku Mawu Ruata, ana waugu udde iamiu wotongnge sumutta sulaḷumme. ⁶Itou sarun ma'ola'a atatūḷidda, wuṛṛu sarun mabaḷissu asasusa su taumata apan napaasusa ng kamiu. ⁷Wuṛṛu siamiu apan orassa indi uatataṛrangnga – aroddi lai siami – Mawu Ruata sarun mangonggolu aḷaḷuassa su allo Mawu Yesus sumossokka wuassu surga wuṛṛu mamasilo m batangan-Ne ringannu manga mala'ekatta apan matohassa, ⁸wuṛṛu ringannu putungnga apan mabbanala. Itou sinumossoka maṛṛuumannu manga taumata apan tawe mangngimanna Mawu Ruata wuṛṛu maddiri mabbiakka su apulu m Watti'u Aḷaḷuassa su ola'u Mawu ng kite Yesus Kristus. ⁹Manga taumata udde sarun manengkamma ruumanna papate sarangkaḷo'enge, iramme su liudde wuassu ammuḷannu taumata Mawu wuṛṛu wuassu taṛṛino-Ne apan mawantuga; ¹⁰sarangkanambone udde sarun mariaddi su allo Itou rumanta apia ana wantuhannu aḷaṛrang-Ne wuṛṛu addatannu anambo n taumata apan mangngimanna. Iamiu lai isudde su sambau ringannu pabbawalagu Mawu Ruata udde, ana waugu iamiu suete nangimanna watti'a apan niapaasingkati ami siamiu.

¹¹Ana waugu udde iami sidutu u'aḷiomanni amiu. Iami u'aḷiomanna tadea'u Mawu Ruata ma'ola'a siamiu wotongnge mabbiakka tumuṛṛutta apulu-Ne; ana waugu udde Itou namaggo siamiu. Doronganna Mawu Ruata, ringannu taṛṛino-Ne, manuungngu apulu-Ne ma'ola'a apapia, wuṛṛu manuungngu anambo n manara apan a'olaanni amiu ana waugu mangngimanna si Kristus. ¹²Ringannu aroddi Mawu ng kite Yesus Kristus wantuhanni amiu, wuṛṛu iamiu lai wantuhannu Mawu Yesus

ana waugu apapia naungngu Mawu Ruata ng kite wuŕru Mawu Yesus Kristus.

Taumata laŕeo

2 Su ola'u daranta Mawu ng kite Yesus Kristus, wuŕru su ola'u iite iammulle iapaatana'a suadio'a ringanni Tou, ete indi ta'u doronganna siamiu: ²Arie maŕiha-ŕihakka umaŕingu ara'e umambuŕisada ana waugu watti'a manungku nia'omante allone Mawu Yesus rumanta apia. Asinungka watti'a udde darantane wuassu sambau watti'u nabi, ara'e wuassu sambau aŕaŕra'a; ara'e wotongnge mariaddi piaddu nabbi-sara manungku iami suete namoŕreta aroddi sulaŕummu sambau suratti ami. ³Salaiwe ereapa, arie mapaawala n taumata mangawusu siamiu. Ana waugu tantaŕanna taambe nia'omanna allo udde, ŕinone mariaddi dorone olangnge indi: Manambo taumata sarun massinaada, maddan-dilli Kristus; wuŕru Taumata Laŕeo apan suete nitantuna iapaasutta su naraka, sarun mamasilo m batanganne. ⁴Ringannu mawunga Itou sarun lumawangnga wuŕru mananggaku watangan-Ne su anambo n inolaanna apan sassubbannu taumata, ara'e anambo n paaŕuanna apan sassunnannu taumata udde Mawu Ruata. Ewe'e lai Itou sarun uma'ianna sulaŕummu Waŕe Mawu Ruata wuŕru mamasingkata manungku eteudde Itou Mawu Ruata.

⁵Naunge, manungku ia'u suete namasingkata siamiu sarangkanambone udde, su tempo ia'u ta'e su sambau ringanni ami. ⁶Wuŕru iamiu masingkata apa apan orassa indi ta'e maawae sarangkanambone udde mariaddi. Paŕradote su tempo apan suete tinantunu Mawu Ruata, Taumata Laŕeo udde sarun rumanta. ⁷Atatohassa apan mammanara aŕaŕeo udde mannatakke mammanara ringannu maŕanna-ŕannaba, arawe ta'e tataŕranganna. Napawe mananaŕrange udde suete niapaasaliu, ⁸wakkute udde asiloante Taumata Laŕeo udde. Napawe Mawu Yesus ruman-tate, Itou sarun mamate Taumata Laŕeo udde ringannu singangu wu-assu moŕro-Nge, wuŕru mamate sitou ringannu asasemakku daranta-Ne. ⁹Taumata laŕeo udde sarun rumanta ringannu sambau taŕŕino apan wahewalla wuassu Setanna. Itou sarun ma'ola'a aŕawo'u hati n aŕaŕŕindu'a wuŕru manga inolaanna apan wahewalla napene m bawahia. ¹⁰Itou sarun mappaattu aŕawo'u awusune apan laŕeo ipangaŕiwu manga taumata apan sarun mate. Imangitou sarun mate ana waugu tawe maddaringikka wuŕru maddiri m wattia'a apan naŕŕino wuassu Mawu Ruata apan wotongnge manaŕamatta simangitou. ¹¹Ana waugu udde Mawu Ruata na-paaranta n taŕŕino apan mangngaŕiwu mangitou, na'oma n sara imangi-tou nangimanna watti'a apan nassaŕa udde. ¹²Sombange, anambo n tau-

mata apan maapulu n rosa wuŕŕu tawe mangngimanna apa apan su řinone udde sarun iřruumanna.

Iamiu nipile ana waugu iapaasařamatta

¹³Manga tuřrangnga apan arangnguannu Mawu! Řinone iamiu sidutu maadiangkamanna su Mawu Ruata su ola'i amiu, ana waugu ro'e n paarorone Mawu Ruata suete namile siamiu iapaasařamatta. Olangnge udde mariaddi wuassu apa apan nimmanara Ghařřaho Mawu Ruata siamiu tadea'u iamiu maola'a ařařřana'u Mawu Ruata apan susi wuŕŕu ana waugu iamiu mangngimanna watti'u Mawu Ruata. ¹⁴Ana waugu udde Mawu Ruata namago siamiu sulařummu Watti'u Ařařuassa apan niapaasingkati ami siamiu. Mawu Ruata namago siamiu, ana waugu Itou maapulu tadea'u iamiu lai maappendama awawantugu Mawu ng kite Yesus Kristus. ¹⁵Ana waugu udde, Manga tuřrangnga, darisikke paatohassa wuŕŕu pangagasse sidutu su manga ařařřa'a apan suete nionggoli ami siamiu, mapia udde uahahati ara'e lai su suratta.

¹⁶⁻¹⁷Doronganna Mawu ng kite Yesus Kristus sassane, wuŕŕu Mawu Ruata Iamangngi ite mallimbatta wuŕŕu manohassa naungngu, tadea'u iamiu wotonge maamanara wuŕŕu mamasingkatu apapia. Ana waugu Mawu Ruata marangngu siite, wuŕŕu ana waugu apapia naung-Nge Itou napaatammuda wuŕŕu mangngantimma apapia.

Aařiomana'awe iamii

3 Panginsueanne, Manga tuřrangnga, aařiomana'awe iamii. Aařiomante tadea'u watti'a wuassu Mawu wotongnge sidutu mas-sařawukka ringannu mařihakka wuŕŕu sengkamanna ringannu mapia, ere lai suete nariaddi siamiu dorone. ²Aařiomante lai tadea'u Mawu Ruata manařamatta siami wuassu manga taumata lařeo. Ana waugu tawe anambo n taumata mangngimanna watti'a wuassu Mawu udde.

³Arawe Mawu matuřřuta. Itou sarun manohassa siamiu wuŕŕu mallu'adda siamiu wua si Lařeo. ⁴Wuŕŕu iamii mangngimanna atonna su Mawu su ola'i amiu, manungku iamii tantařanna mammanara wuŕŕu sidutu mammanara apa apan iradolokki ami siamiu.

⁵Doronganna Mawu mangehetta siamiu ana see wotongnge lembon maasunna manungku Mawu Ruata marangngu siamiu wuŕŕu manungku Kristus nangonggolu atatamudda siamiu.

Sidutua'a su mammanara

⁶Manga tuɽrangnga, wuassu taɽɽino Mawu Yesus Kristus, iami nandolokka tadea'u iamiu mangindau manga tuɽrangnga, apan mabbiakka wolo'a, wuɽɽu maddiri tumuɽrutta manga alaɽɽa'a apan niapaasingkati ami simangitou. ⁷Iamiu sassane masingkata manungku iamiu sarun mattanno tuɽadda ng kami. Iami tawe su awawolo'a su tempo iami uatana'a ringanni amiu. ⁸Iami tawe mammo'o n annu taumata ringannu tawe mamaekka. Ewe'e allo ɽabbi iami mammanara mattinsahadda tadea'u iami tawe mapaasusa n sai-sai wuassu wallatti amiu. ⁹Iami ma'ola'a udde waline ana waugu iami maapulu manuɽadda siamiu. ¹⁰Su tempo iami ta'e uatana'a su pattanganni amiu, iami nangonggolu atoranna indi, "Taumata apan maddiri mammanara, tawe wotongnge umanna."

¹¹Iami nabbisara arendi ana waugu iami naaringikka manungku pia manga taumata su wallatti amiu apan mabbiakka su amamalassa. Imangitou tawe mammanara, tumba'u ma'ilalo'a su hatto n taumata waine. ¹²Wuassu taɽɽino Mawu Yesus Kristus iami nandolokku manga taumata udde wuɽɽu niapaanaungnga, tadea'u imangitou mammanara ringannu matammuda wuɽɽu maddea'a wiakki mangitou sassane.

¹³Arawe iamiu arie paawusa ma'ola'a apapia. ¹⁴Asinungka ta'e pia taumata apan maddiri tumuɽrutta apa apan niapaasingkati ami sulaɽummu suratta indi. Paatehamma su saruannu taumata ereudde wuɽɽu arie maggawe n tou tadea'u itou masili. ¹⁵Arawe arie itou olaanna ere seetta; tumba'u tantiroite itou ere sangkatou tuɽrangnga.

Manga wisara panginsueanne

¹⁶Eteudde Mawu punnu paddarame ng kite. Doronganna Itou sidutu manonggolu paddarame siamiu su ala'wo'u inolaanna. Doronganna Mawu makkundinganna tuɽrangnga sarangkanambone.

¹⁷*Tabea wuassia'u, Paulus.* Ia'u sassane namoɽɽetu wageangnge indi. Ete indi tiala apan ta'u niwoɽɽeta sulaɽummu anambo n suratta niwoɽɽe'u.

¹⁸Doronganna Mawu ng kite Yesus Kristus mangaɽamatta tuɽrangnga sarangkanambone.

Tabea ng kami,
Paulus

SURATTI PAULUS PAARORONE SI TIMOTIUS

WISARA TALAANE

Timotius udde sangkatou taumata n Saṛrani apan ta'e wakku su leta'u Asia adio'a, apan naola'a hawe wuṛru masasumbala m Paulus su laḷummu manara m Paulus. Iamangngi Timotius sangkatou taumata n Yunani wuṛru inangngene sangkatou taumata n Yahudi. Sulaḷummu *Su-ratti Paulus Paarorone Si Timotius*, niwaḷo tatallu hatto apan pia passam-paanne sambau ringannu waine.

Paarorone eteudde iapaanaungnga si Timotius su ola'u manga alaṛra'a apan nassaḷa nissombanganna sulaḷummu jamaatta. Manga alaṛra'a udde naola'a sambau alaṛra'a nipallaḷo'annu alaṛra'u Yahudi wuṛru alaṛra'u waḷine Yahudi pinangianannu pangangiamanna manungku ulili m pati'uppa naḷaleote wuṛru asasaḷamatta tumba'u asombanganna amungkangu taumata pia asingkata su ola'u addapinga udde, wuṛru tuttuṛṛuta mianga atorṛanna ere manga atoranna tawe wotongnge maawingnga, mappalli n manga anna wuṛru waine lai.

Aruane, eteudde manga tatantiro si Timotius su ola'u pamamaduli jamaatta wuṛru su ola'u patataṛramawu. Nisemakka sitou pallaḷagu n taumata apan wotongnge maola'a mallalu'adda wuṛru masasumbala jamaatta. Panginsueanne Timotius niaṛraanna su ola'u ereapa itou wotongnge maola'a sangkatou allangngi Yesu Kristus apan mapia wuṛru su ola'u winabbawane su alaḷawo'u taumata apan naola'a reengannu jamaatta.

Laḷorone

Paarorone	1:1-2
Manga tatantiro su jamaatta wuṛru manga mamamanarane	1:3-3:16
Manga tatantiro si Timotius su ola'u manarane	4:1-6:21

1 ¹²Timotius, ana'u apan tutune sulaḷummu Mawu! Suratta indi wuassia'u, Paulus, rasulli Kristus Yesus wuassu parenta Mawu Ruata, Punnu Saḷamati ite wuṛṛu wuassu parenta n Kristus Yesus, pangantimanni ite.

Doronganna Mawu Ruata Iamangnga wuṛṛu Kristus Yesus Mawu ng kite mangonggolu alaṃatta, darangngu wuṛṛu paddarame siamiu.

Paatehamma su alaṛṛa'a mangngaḷiwu

³Ia'u maapulu tadea'u i'o sidutu uatana'a su Efesus ere lai suete ta'u niwaḷo si'o su tempo ia'u inai watukku Makedonia. Ana waugu su Efesus pia sire pira taumata apan mannaḷiwukku alaṛṛa'a nassaḷa, wuṛṛu i'o ṛinone maningaddi mangitou. ⁴Waḷoa'a simangitou tadea'u ariete lai maddaringikka manga wa'e wuṛṛu manga watti'u arariaddiannu pabbawalaga apan tawe panginsueanne. Sarangkanambone udde tumba'u mandanta m pabbawawuḷo, wuṛṛu tawe mappaamattu pandumannu Mawu Ruata apan tumba'u wotongnge aillaḷanna sulaḷummu pangangimanna Sitou. ⁵Pandumannu tatantiro'u udde tadea'u taumata wotongnge maatahuanna naungnga waresi, wuṛṛu laḷummu naungnga apan susi, ana see atonna-tonna mangngimanna Mawu, wuṛṛu ringannu aroddi, wotongnge uararangngu sansuḷungnge. ⁶Pia sambageanganna taumata apan maddirite mabbiakka ereudde lai, wuṛṛu inumaḷiwute sulaḷummu patatiakka apan tawe gunane. ⁷Imangitou maapulu maola'a manga huru n agama, wutte'e imangitou sassane tawe maasunna manga wisara apan ipappaatti mangitou ara'e manga inolaanna apan iapaasingkati mangitou ringannu ahewallu naungnga.

⁸Iite masingkata manungku tita n agama udde mapia, amungkaṅgu ipaatta ringannu mapia. ⁹Ṛinone naunganna manungku tita niola'a waḷine hunane su taumata mapia, ewe'e su taumata apan maḷawangnga tita, manga taumata laḷeo, taumata maḷawangnga, su taumata marosa, taumata tawe agamane, taumata tumba'u maṛṛingiddu runia, su taumata apan namate iamangnge wuṛṛu inangngene, wuṛṛu manga taṛṛa pate sarangkanambone, ¹⁰su manga taumata masandaga, esakka uapulu n esakka, maṛṛarampasa, taṛṛa wahia, matatiala awusu, wuṛṛu suapan taumata apan ma'ola'a inolaanna lullawangnga alaṛṛa'a apan naṛṛino. ¹¹Alaṛṛa'a udde niasombanganna sulaḷummu Watti'u Alaḷuassa apan pananaḷiwukke tinantilla sia'u, eteudde Watti'u Alaḷuassa wuassu Mawu Ruata apan mawantuga wuṛṛu ṛinone raloanna.

Apendamma aadiangkamanna ana waugu alamattu Mawu Ruata

¹²Ia'u maadiangkamanna si Kristus Yesus Mawu ng kite. Itou suete nangonggolu atatohassa si'u ipangimbe Sitou, wuŕŕu Itou mammen-dama manungku ia'u wotongnge su manara udde, ¹³salaiwe dorone ia'u mangngaŕuandaga wuŕŕu mandaleo see mangngadio'a Sitou. Arawe Mawu Ruata marangngu sia'u, ana waugu su tempo udde ia'u taambe nangimanna, nariaddi ia'u wagga apa apan a'olaangku. ¹⁴Wuŕŕu ia'u niaŕamattannu Mawu ng kite. Itou nangonggolu atatohassa si'u ipangimanna Sitou wuŕŕu mandangngu taumata sansuŕungnga. Apande udde nionggolla siite sarangkanambone apan uaaukke ringanni Kristus Yesus. ¹⁵Mangke atonna wisara indi - ana waugu udde ŕinone sengkamanna wuŕŕu pangimananna - : "Kristus Yesus nirumanta su runia indi ana waugu manaŕamatta taumata marosa." Wuŕŕu ete ia'u taumata marosa apan lembon alaŕeanne. ¹⁶Ana waugu udde Mawu Ruata marangngu sia'u, tadea'u Kristus Yesus wotongnge mapaaŕiatta'u anambo n asasabare-Ne sia'u, taumata apan arosanne indi. Wuŕŕu indi maola'a sambau tuŕada su anambo n taumata apan mangngimanna Sitou wuŕŕu maasomba wiakka tutune wuŕŕu maŕannu-ŕannu. ¹⁷Mawu Ruata, Ratu su aŕo'engngu tempo, ŕinone addatanna wuŕŕu sidutu raloanna, ana waugu ete Itou punnu saŕamatta sarangkaŕo'engnge, apan tawe iasilo wuŕŕu tinggassa! Amin.

¹⁸Timotius, ana'u, Manara indi ta'u itantilla si'o, mannaungnga ta-nata Mawu Ruata apan niapaasingkatu manga nabi sulaŕummu jamaatta su ola'u ririnu. ŕinone tanata udde maola'a waŕunna si'o sulaŕummu manaranu apan mapia. ¹⁹Pammanarate ringannu pangangimanna apan atonna wuŕŕu ringannu laŕummu naungnga apan waresi. Pia manga taumata apan tawe maddaringikka tingikku laŕummu naungnge, na'oma n sara naŕŕimunsa'e pangangimanni mangitou. ²⁰Su wallatti mangitou eteudde Himeneus wuŕŕu Aleksander. Taumata darua udde suete ta'u niŕŕuumanna tinantilla su Setanna, tadea'u imangitou mangilloŕo mallobosa Mawu Ruata.

Patataŕramawu n Jamaatta

2 Paarorone, ia'u sumaŕande tadea'u sasaŕande, aaŕiomanna, wuŕŕu aaŕiomannu awadaalla, see adiangkamanna iwaŕo su Mawu Ruata huna n anambo n taumata; ²huna manga ratu wuŕŕu huna anambò n taumata apan uataŕŕino. Padorongke tadea'u iite wotongnge mabbiakka ringannu matammuda wuŕŕu paddarame su Mawu Ruata ringanni pal-

laʔagu apan mapia. ³Eteudde apianne wuʔru maaluassa naungngu Mawu Ruata, Punnu Saʔamatti ite. ⁴Itou maapulu tadea'u anambo n tau-mata maasomba asasaʔamatta wuʔru masingkatu apapia. ⁵Ana waugu, tumba'u pia sambau Mawu Ruata, wuʔru tumba'u sangkatou mananangnga n Mawu Ruata wuʔru taumata, eteudde Kristus Yesus. ⁶Itou sangkatou taumata apan suete nanantillu watangan-Ne ipamalloso anambo n taumata wuassu manga rosa mangitou. Ringannu udde Mawu Ruata napaaliatta'a su tempo apan na'etta'a, manungku Itou maapulu tadea'u anambo n taumata masalaʔamatta. ⁷Wuʔru ana waugu eteudde ia'u ni-rolokka inai ringannu manga taumata waiʔine Yahudi iapapasingkata simangitou watti'a su ola'u pangangimanna apan atonna. Apan ta'u iwabbatti'a indi udde atonna, Ia'u tawe mamahia.

⁸Ia'u maapulu tadea'u suapan tampa m papunna esakka umaliomanna ringannu naungnga susi, tawe asasa'u ara'e pabbawawuʔo.

⁹Rinone papunna wawine mallogakka watanganne ringannu tawe ete pia lembone wuʔru mappedetu pedeta pia atoranne. Arie mappaattu uta'a atokke maasili ara'e manga laʔogakka wuʔawanna ara'e mutiara, ara'e laubba aregane massagada. ¹⁰Arawe rinone wawine mallogaka watanganne ringannu manga pallaʔagu apan mapia su ereapa udde rinone olaannu wawine apan massubba Mawu Ruata. ¹¹Wawine rinone mangngurumma ringannu maʔannaba wuʔru matuʔruta. ¹²Ia'u mapasaʔa amungkangu wawine manggaʔra'a ara'e mamarenta esakka; imangitou rinone maʔannaba. ¹³Ana waugu paarorone nariaddi eteudde Adam wua udde Hawa. ¹⁴Wuʔru waiʔine Adam, ewe'e ete wawine apan niawono'anna, na'oma n sara nilumawangnga parenta Mawu Ruata. ¹⁵Salaiwe aroddi, wawine sarun masalaʔamatta ringannu mangunsiwe n ana'a, sambaliate itou ringannu masarʔionto'a sidutu mangngimanna si Kristus wuʔru sidutu marangngu taumata waine wuʔru mabbiakka huna Mawu Ruata sassane.

Mallaʔu'adda jamaatta

3 Mangke atonna wisara'u indi, "Taumata apan maapulu maola'a mallaʔu'adda jamaatta, maapulu n sambau manara apan maarega." ²Sangkatou mallaʔu'adda jamaatta rinone taumata tawe saʔane, tumba'u sangkatou awingnge, masabare, pande, wuʔru maaduna; itou maapulu manoloʔo raho su waiʔene, wuʔru wotongnge manggaʔra'a taumata; ³arie taumata tarʔa wu'anna, ara'e tarʔa wawuʔo. Ewe'e itou rinone sangkatou masarʔionto'a, wuʔru maʔutu m paddarame. Tawe wotongnge itou waiʔu n roitta. ⁴Rinone itou masingkata mangatokku laʔorʔo m baiʔene ringannu mapia, wuʔru manggaʔra'a alaʔranangnge matuʔruta wuʔru maadatta sitou. ⁵Ana waugu amungkangu taumata wagga manga-

tokku laŋorŋo m waŋene sassane, ereapa itou wotongnge mangatokku jamaattu Mawu Ruata? ⁶Sangkatou mallalu'ada jamaatta tawe wotongnge taumata wakkute sinumutta Saŋrani, ana waugu takka itou mabbali mawunga see awontohanna ere Setanna dorone. ⁷Rinone itou taumata apan pia aranne mapia sulaŋummu soa; ana waugu amungkangu tawe aroddi, ne itou sarun aluandahannu taumata, na'oma n sara manawo su lima n Setanna.

Masasumbala jamaatta

⁸Rinone masasumbala jamaatta lai taumata mapia wuŋru matulida; tawe walu n roitta tawe tumanite n manambo ma'inumma anggore. ⁹Rinone imangitou matohassa su pangangimanna ringannu naungnga waresi su alarra'u pangangimannu taumata n Saŋrani apan suete nia-paaliatta'u Mawu Ruata. ¹⁰Rinone imangitou iannamma asuene, wuŋru amungkangu imangitou tawe saŋane, wakkute udde imangitou wotongngete massumbala sulaŋummu jamaatta. ¹¹Awingngi mangitou lai rinone taumata mapia, waŋine taumata apan tarra watti'u wahia. Imangitou rinone masingkata matturadana, wuŋru tawe mamahia su alawo'u inolaanna. ¹²Masasumbala jamaatta rinone awingnge tumba'u sambau. Rinone itou masingkata mangatokku alarra'angnge wuŋru laŋorŋo m waŋene ringannu mapia. ¹³Manga taumata apan massumbala ringannu mapia sulaŋummu jamaatta, sarun addatanna wuŋru lembon warani mabbisara su ola'u pangangimanni mangitou si Kristus.

Addapingu agama ng kite

¹⁴Ia'u mangantimma tate malanu lai ia'u sarun mattembo si'o. Sa-laiwe aroddi, ia'u namorretu suratta indi lai si'o, ¹⁵tadea'u amungkangu ia'u malannu, i'o masingkate ereapa iite mabbiakka maola'a pabbawalagu Mawu Ruata, eteudde jamaattu Mawu Ruata apan wiakka. Ete jamaatta indi apan naola'a alu tatungkale wuŋru rapappaku alarra'a apan narŋino wuassu Mawu Ruata. ¹⁶Tawedu saran sangkatou wotongnge massinaada, aroddi ahewalle addapingu agama ng kite:

Itou namasilo m watanganne sulaŋummu lihiddu taumata,
wuŋru niapaaliatta'u Gharraho Mawu Ruata,
see aellehannu manga mala'ekatta.

Wattinge niapararingikka su wallatu manga pabbawalaga,
wuŋru Itou apangimananna su ahewallu runia
wuŋru niapaasengkenga su surga.

Manga huru awusu

4 Gharraho Mawu Ruata ringannu masemakka nabbisara manungku su tempo apan sarun rumanta, sangkawageanganna taumata sarun massinaaddi Kristus. Imangitou sarun tumurutta manga gharraho apan manggaliwu wuŕru tumantalonga manga alaŕra'u gharraho laŕeo, ²apan niapaasingkatu taumata lilangkamaŕe'a wuŕru taŕra wahia. Laŕummu naungngu manga taumata udde marandumpe. ³Imangitou manggara'a taumata ana see tawe maawingnga wuŕru tawe umanna anna ipappalli. Sumbaŕi anna udde niola'u Mawu Ruata iapaanna ringannu aadiangkamanna Sitou wuassu taumata apan suete nangimanna si Kristus wuŕru naailaŕate alaŕra'a apan atonna wuassu Mawu Ruata. ⁴Alawo'u saranapa apan niola'u Mawu Ruata udde mapia, wuŕru tawe saran sambau lai apan sarun ipappalli amungkangu suete nisengkamma ringannu aadiangkamanna su Mawu Ruata. ⁵Ana waugu alaŕmatta wuassu Mawu Ruata wuŕru aaliomanna mauola'a anna udde tawe palline.

Mangangimbe si Kristus Yesus apan mammanara ringannu mapia

⁶Amungkangu i'o mangara'u sarangkanambone udde su manga tuŕŕanga su pangangimanna sambau, i'o sarun maola'a mamamanara n Kristus Yesus apan mammanara ringannu mapia. Wuŕru i'o sidutu mappaduŕi niawanu ringannu wisara Mawu Ruata apan pangngimananni ite, wuŕru ringannu manga alaŕra'a apan atonna apan suete nipangimanannu alaŕnunete indi. ⁷Paarau'a manga watti'a wawahia apan tawe gunane. Rinone waŕangngu inaramma su pabbiaŕanna mattaŕramawu. ⁸Mannarammu waŕangnga tumba'u adio'a hunane, aŕawe mannarammu pangangimanna mahuna su alawo'u inolaanna, ana waugu pia paaire su ipabbiakka tempo indi wuŕru tempo addantane. ⁹Olangge udde atonna wuŕru rinone sengkamanna wuŕru pangngimananna ringannu ahe-wallu naungnga. ¹⁰Ana waugu udde iite mammanara maŕrimadda, ana waugu iite pia antimma atonna su Mawu Ruata apan wiakka; eteudde Punnu Saŕamattu anambo n taumata, nangillemba taumata apan mangngimanna.

¹¹Tantiroa'e sarangkanambone udde wuŕru doŕoŕa'e manga taumata tumurutta. ¹²Arie mamala n sangkatou, taumata ma'ellega si'o adio'a ana waugu i'o ta'e umbasanna. Araŕe rinone i'o maola'a tuŕada su manga taumata apan mangngimanna hattonu wuŕru pallaŕagunu, su ola'u darangngunu su sansuŕungu wuŕru mangngimanna Mawu Yesus

Kristus, ringannu naungnga apan waresi. ¹³Tantalanna udde, ma'oma n sara ia'u rumanta, i'o rinone paarimadda mabbasa n Wuke Susi su saruannu manga taumata, wuɽɽu mannasa simangitou wuɽɽu manggarra'a simangitou. ¹⁴Arie i'o maabuli mappaattu apande wuassu Gharraho Mawu Ruata apan nionggolla si'o su tempo manga piarra'u jamaatta nangaddo n lima mangitou su wowo m puanu, wuɽɽu manga nabi namasingkatu tanata Mawu Ruata su ola'u ririnu. ¹⁵Pammanarate sarangkanambone udde ringannu atonna-tonna, tadea'u manaranu asiloannu awadaalla. ¹⁶Paariagai ririnu wuɽɽu paariagai lai alarrangngu. Rinone i'o maturruta ma'ola'a sarangkanambone udde, ana waugu ringannu aroddi i'o sarun manalamatta mapia su ririnu sassane aroddi lai manga taumata apan maddaringikka si'o.

Pamamanara su saruannu manga taumata apan pangangimanna sambau

5 Arie i'o tumanite n marragissa mamulo taumata mattimaranna wuassi'o arawe ahei itou maddaringikka wisaranu, olaawe itou ere imangngu. Aroddi lai manga taumata umbasanna, marɽuala, olaawe ere turɽangu, ²wuɽɽu manga wawine timmade ere inangngu. Wuɽɽu manga marɽuala rinone olaannu ere sangkatou tuari, ringannu pallaɽagu apan waresi.

³Addate manga wawine walu apan atonna-tonna mabbiakka sassane. ⁴Arawe amungkangu sangkatou wawine walu pia alarrana'a ara'e manga pulunna, ete imangitou udde apan paarorone onggojannu tatantiro manungku imangitou rinone ma'ellega lalummu wale n mangitou, wuɽɽu mabbalissa apapia n timmade wuɽɽu iupungngi mangitou. Ana waugu pallaɽagu udde mauuassa naungngu Mawu Ruata. ⁵Wawine walu apan atonna-tonna sassane, wuɽɽu tawe isai-sai apan wotongnge mammaduli sitou, tumba'u uaantimma Mawu Ruata. Allo rabbi itou sidutu u'aljomanna su Mawu Ruata madorongnga tulungan-Ne. ⁶Arawe wawine walu apan maapulu mabbiakka maluassa, itou natete salaiwe itou ta'e wiakka. ⁷Waloa'e manga tatantiro indi simangitou, tadea'u imangitou mabbiakka tawe salane. ⁸Arawe amungkangu pia taumata apan tawe mamaduli manga turɽange, nangillemba ete lalorro m balene sassane, taumata udde nassinaaddu pangangimanne; itou maddaleoanne wuassu taumata apan tawe mangngimanna.

⁹Tumba'u wawine walu apan naaturruta atoranna indi wotongnge iworreta sulummu arannu manga wawine walu; apan uukke tawe maurangnga wuassu annumu pulo su tonnane, dorone tumba'u paassa mawingnga, ¹⁰tinumelennga ere sangkatou wawine apan ma'ola'a apapia,

ereindi: itou suete namaduḷi manga aḷaṛṛanangnge ringannu mapia, naungnge maḷuassa mangimbe raho matana'a su waḷene, mangimbe manga taumata mangngimanna, massumbala manga taumata susa, wuṛṛu mammanara atonna-tonna aḷawo'u manara apan mapia.

¹¹Arie pabboṛṛeta'a su wuke udde manga wawine waḷu apan ta'e dario'a. Ana waugu amungkangu apendammu apulu naungngi mangitou matohassa apia, imangitou maapulu maawingnga apia, wuṛṛu manantanke n Kristus. ¹²Ne imangitou nassaḷa ana waugu tawe tinumuṛṛuta paaire apan nionggolla sitou. ¹³See lai imangitou mangke manggolo'a allo uawaḷeḷenganna sussutta su waḷe n taumata. Wuṛṛu araḷeoanne lai eteudde imangitou mandaḷeo arannu taumata waine wuṛṛu sussutta su hatto n taumata waine see uahahatto manga inolaanna apan tawe ṛinone ipagahatto. ¹⁴Ana waugu udde ia'u maapulu tadea'u manga wawine waḷu ta'e dario'a maawingnga apia, maasomba ana'a wuṛṛu mammaduḷi laḷoṛṛo m baḷe, tadea'u manga seetti ite tawe maasomba tempone mandaḷeo aranni ite. ¹⁵Ana waugu pia manga wawine waḷu apan niaḷiwunete tinumantalongnga ghaṛṛaho laḷeo. ¹⁶Arawe amungkangu sangkatou wawine n Saṛṛani pia sangkatou laḷoṛṛo n waḷene inawaḷuanna, itou ṛinone massumbala manga wawine waḷu udde; arie pabbala'a jamaatta mapaduḷi simangitou. Ringannu aroddi jamaatta wotongnge massumbala manga wawine waḷu apan atonna-tonna tawe tuṛṛange.

¹⁷Piaṛṛa'u jamaatta apan ma'ola'a manarane ringannu mapia, ṛinone onggolaṇnu aaddata paarua anambone, nangillembu wuassi mangitou apan maṛṛimadda mannase wuṛṛu mangarṛa'a. ¹⁸Ana waugu sulaḷummu Wuke Susi uawoṛṛetta, "Sapi apan tantaḷanna maṛṛinda ganduma mapataḷei watu n ganduma wuassu raene, arie pa'iitta moṛṛonge," wuṛṛu lai "Taumata apan mammanara ṛinone manengkamma laḷantake." ¹⁹Arie manengkamma aansilla su saruannu sangkatou piaṛṛa'u jamaatta, tabane'e tohasannu rua ng katou sakassi ara'e nallebe wua isudde. ²⁰Taumata apan ma'ola'a rosa, ṛinone tagguanna su saruannu anambo n jamaatta, tadea'u ingana'a waine lai matta'utta.

²¹Su saruannu Mawu Ruata, Kristus Yesu wuṛṛu manga mala'ekatta apan napile, ia'u sumaḷande tadea'u i'o tumuṛṛutta manga tatantiro indi ringannu tawe massunna laḷeo su saruanni sai-sai ringannu tawe masasamba'a. ²²Arie tumanite maḷihakka mangaḷamatta sangkatou itenega maola'a mangangimbe Mawu. Amungkangu taumata waine marosa, arie lai aḷiuannu rosa udde. Paariagai ririnu tadea'u sidutu waresi.

²³Arie lai tumba'u ma'inumma ua'e; pa'inumma lai anggore adio'a ipallaḷima tinainu mammanara, ana waugu i'o masokka rumadda'a.

²⁴Rosa n sambageanganna taumata, ro'e n ṛaambe niparikisanna, niasiloante ringannu masemakka. Arawe rosa n taumata waine wakḷute asingkatanna saḷimurine. ²⁵Aroddi lai manga inolaanna mapia lapiddu

asiloanna. Wurru apan masahadda asiloanna, tawe sidutu mangke uawuni.

6 Manga taumata n Sarrani apan naola'a allangnga, rinone massunna manungku mawu mangitou rinone addatanna, tadea'u taumata tawe wotongnge mandaleo arannu Mawu Ruata ara'e alarra'i ite. ²Manga allangnga apan mawune taumata n Sarrani, tawe wotongnge mangngadio'a mawune ana waugu imangitou labbisa taumata n Sarrani. Ewe'e rinone imangitou mangimbe mawu mangitou udde ringannu lembon apiane lai, ana waugu mawu apan a'imbeanna ringannu mapia, eteudde sambau taumata mangngimanna apan arangnguanna.

Alarra'a apan tawe su rinone wurru paa'ala tutune

Sarangkanambone indi rinone iarra'a wurru itantironu. ³Isai-sai apan mangngarra'u alarra'a uapaparrala n alarra'a apan narrino wuassu Mawu ng kite Yesus Kristus, wurru ringannu alarra'u agama ng kite, ⁴ete itou taumata mawunga wurru wagga n apa-apa! Radange eteudde apulune uasasimbaka wurru uatatiakka su ola'u manga wisara na'oma n sara sumappute naungnga laleo, patatalei, aluandaga, wurru pasasunna apan laleo, ⁵wurru pasase'etta apan tawe masue. La'annu ringiddu manga taumata udde nialiwunete wurru nassalate. Imangitou massunna manungku wotongnge maala wuassu agama.

⁶Atonna agama mangngonggolu auntunganna apan wahewalla, amungkangu taumata maluassa ringannu sarannapa apan tatahuananne. ⁷Ana waugu tawe saran sambau apan niapiddi ite sula'ummu runia indi, wurru tawe saran sambau sarannapa apan iapiddi ite watukku liudde! ⁸Nariaddi amungkangu pia anna wurru laubba, udde wotongngete. ⁹Arawe taumata apan maapulu maola'a ala, inawono'anna wurru niasamettu alawo'u aapulu apan woddo wurru mandaleo. Manga aapulu udde ma'ola'a taumata marrimunsa'a wurru masilaka. ¹⁰Ana waugu wuassu aapulu n roitta, lumappute alawo'u alaleo. Pia sambageanganna taumata apan maddea'a roitta na'oma n sara tate tumurritta lai alarra'u Sarrani, ana see imangitou niarriaannu manambo asasusa narrimunsa'a naungngi mangitou.

Manga tatantiro si'o sassane

¹¹Arawe ete i'o taumata tatahuanannu Mawu Ruata, nariaddi i'o rinone mangindau n sarangkanambone udde. Padea'a maola'u taumata mapia su aellegu Mawu Ruata, apan mattarramawu Mawu Ruata, mang-

ngimanna si Kristus, mandangngu sansulunge, masabare sulaŕummu asa-susa, wuŕru masarŕionto'a. ¹²Pabbiakke atonna-tonna maola'a sangkatou taumata n Sarŕani tadea'u i'o wotongnge maapaŕarŕo aonggolu wiakka tutune wuŕru maŕannu-ŕannu. Ana waugu eteudde Mawu Ruata namago si'o su tempo i'o nanga'u su saruannu awadaalla manungku i'o mangngimanna si Kristus. ¹³Wuŕru orassa indi su saruannu Mawu Ruata apan nangonggolu niawa su aŕawo'u sarannapa, wuŕru su saruanni Kristus Yesus apan nangonggolu tatiala atonna si Pontius Pilatus, ia'u madorongnga indi wuassi'o: ¹⁴Paaturŕute anambo n parenta udde ringannu naungnga waresi wuŕru tawe urangnge ma'oma n sara Mawu ng kite Yesus Kristus rumanta apia. ¹⁵Daranta-Ne sarun itantunnu Mawu Ruata sassane su tempone apan narŕino. Tumba'u Itou sassane uatahuanna; Itou mawantuga, Ratu wuassu aŕawo'u ratu, wuŕru Mawu wuassu aŕawo'u mawu. ¹⁶Ete Itou apan tawe arŕinoannu papate; Itou mabbiakka sulaŕummu asasemakka apan tawe wotongnge aundanianni sai-sai. Tawe saran sangkatou taumata apan suete naasilo, ara'e wotongnge ma'ellega Sitou. Ete Sitou addata wuŕru tarŕino ma'oma n sara maŕannu-ŕannu! Amin.

¹⁷Su manga taumata ala su runia indi, ŕinone i'o madorongnga tadea'u imangitou arie mamunga wuŕru arie mangantimma manga saranapa apan tawe tantune - ereudde paa'ala. Imangitou ŕinone pia antimma su Mawu Ruata apan mangonggolu aŕawo'a siite ringannu manambo tadea'u iite wotongnge maatemma paa'ala udde. ¹⁸Padorongke simangitou mapaaŕiatta'u apapia, ringannu ma'ola'a aŕawo'u inolaanna apan mapia, masarŕionto'a, wuŕru laghune mapia. ¹⁹Ringannu aroddi imangitou mangngammulu paa'ala apan maola'a sambau roitta uaraddo apan mapia su tempo addantane. Wuŕru ringannu udde imangitou sarun maasomba wiakka ma'oma n sara maŕannu-ŕannu, eteudde wiakka apan tutune.

²⁰Apa apan suete tinantilla siamiu, paariagai udde mapia-pia, Timotius! Paarau manga hatto apan tawe gunane wuŕru patatatiakka su ola'u inolaanna apan mangŕaŕiwu isassago "Asingkata". ²¹Ana waugu pia manga taumata apan mabbisara manungku imangitou pia asingkata udde, na'oma n sara massaŕate amatta wuassu manga aŕarŕa'u Sarŕani apan pinangimananni mangitou paarorone.

Antimanna Mawu Ruata mangaŕamatta manga turŕangnga.

Tabea ng kami,
Paulus

SURATTI PAULUS ARUANE SI TIMOTIUS

WISARA TAŁAANE

Suratti Paulus Aruane Si Timotius, wageangnge ahewałanne wawořre-tannu manga tatantiro si Timotius sassane, eteudde hawe sangkama-naranna wuřru masasumbala apan ta'e dario'a. Punnu lałořro n tantan-tirone eteudde tadea'u Timotius masabare. Itou tattantiroanna wuřru sassasanna tadea'u sidutu matuřruta mannaławukku watti'a su ola'u Mawu Yesus Kristus see lai uaaggasa Paaire Tabbe wuřru Watti'u Ałaluassa wuassu Mawu Ruata, salaiwe uasaruanna asasusa wuřru pat-tatiakka.

Timotius sassane niapaanaungnga tadea'u tawe lumało'a sulałummu pattatiakka apan woddo wuřru tawe gunane. Pattatiakka ereudde tawe gessine apa-apa, tumba'u mandaleo řingidu taumata apan maddaring-ikka pattatiakka udde.

Su saruannu sarangkanambone udde Timotius niapaanaungnga ta-dea'u mattanno tulađa m wiakki Paulus – eteudde pangngangimanne si Kristus, asasabarene, darangngune, atatammude, wuřru asasusa apan niapendamanne sulałummu pananansara sitou.

Lałořrone

Paarorone	1:1-2
Daralo wuřru sasasa	1:3-2:13
Tatantiro wuřru iapaanaungnga	2:14-4:5
Tala'a su ola'u wiakki Paulus	4:6-18
Panginsueanne	4:19-22

1 ¹⁻²Timotius, ana'u apan aranguanna! Ia'u Paulus, namorretu suratta indi si'o, wuɽɽu mangngantimma doronganna Mawu Ruata lamangnga wuɽɽu Mawu ng kite Kristus Yesus mangonggolu aɽamatta, darangngu wuɽɽu paddarame si'o.

Wuassu apulu Mawu Ruata, ia'u nitenega naola'a rasulli Kristus Yesus wuɽɽu nirolokka mamasingskatu wiakka apan pina'ire Mawu Ruata. Wiakka udde nisengkammi ite ana waugu iite uauukka ringanni Kristus Yesus.

Aadiangkamanna wuɽɽu tatantiro

³Ia'u umaɽiomanna su Mawu Ruata apan a'imbeangku ringannu awawira naungnga ere lai suete niola'u iupungngu aɽamona'u dorone. Ia'u sidutu maadiangkamanna su Mawu Ruata, napawe ia'u maanaungnga si'o sulaɽummu aɽiomanna, mapia allo ara'e ɽabbi. ⁴Ia'u maanaungnga asasusa naungngu. Ana waugu udde ia'u maapulu tassuɽunge maisasombanu tadea'u atonna-tonna ia'u maɽuassa, ⁵Ia'u maanaungnga pangangimannu apan atonna-tonna si Kristus, ere lai pangangimanni iupungngu Lois wuɽɽu inangngu Eunike. Wuɽɽu ia'u mangantimma i'o lai pia pangangimanna ereudde. ⁶Ana waugu udde ia'u mapaanaunga si'o mapawiakku aɽamatta apan nionggolu Mawu Ruata si'o su tempo ia'u nangado n lima'u si'o. ⁷Ana waugu Ghaɽraho apan nionggolu Mawu Ruata siite, waɽinewe Ghaɽraho apan ma'ola'a siite mataɽo. Arawe Ghaɽraho Mawu Ruata udde maatohassa siite, nepene n darangngu wuɽɽu maɽɽaddannu watanganne.

⁸Ana waugu udde arie masili mangonggolu tatiala su ola'u Mawu ng kite, wuɽɽu arie lai masili su ola'u riri'u, apan niɽruumanna ana waugu Itou. Arawe ɽinone i'o ringannu atatohassa wuassu Mawu Ruata, sidutu sulaɽummu asasusa lai ana waugu Watti'u Aɽaɽuassa udde. ⁹Mawu Ruata mannaɽamatta siite wuɽɽu namago siite, tadea'u maola'a aɽaɽanang-Nge. Itou na'ola'a udde waɽine ana waugu apa apan suete nimmanara ng kite, ewe'e ana waugu panduman-Ne sassane wuɽɽu darangngu-Ne. Itou nandangngu siite sulaɽummi Kristus Yesus ro'e n runia indi taambe niriaddi. ¹⁰Wuɽɽu orassa indi, Mawu Ruata napaaɽiatta'u aɽamanne siite ringannu daranta n Ratu m Punnu Saɽamatti ite Kristus Yesus. Mawu Yesus napassuɽrubawa n tarrino m papate wuɽɽu nangapiddu wiakka sarangkaɽo'enge sulaɽummu Watti'u Aɽaɽuassa udde.

¹¹Su ipabbatti'u Watti'u Aɽaɽuassa uddewe Mawu Ruata namile sia'u maola'a rasul wuɽɽu huru. ¹²Ana waugu udde ia'u natataɽranggu sarangkanambone indi, arawe ia'u sidutu mangngimanna, ana waugu

ia'u masingkata atonna, isai apan pangimananku. Ia'u mangantimma manungku apa apan suete nitantilli Tou sia'u, Itou lai wotongnge maa-riaga udde saran Allo ng Kiamatta. ¹³Tantuṛrute ringannu atonna-tonna aḷaṛṛa'a mapia indi apan suete ta'u nionggolla siamiu. Wuṛṛu ṛinone i'o sidutu uaagasa pangangimanna wuṛṛu darangngu apan naola'a tatahuananni ite ana wauḡu uauukka ringanni Kristus Yesus. ¹⁴Ringannu sumbala wuassu Ghaṛṛaho Mawu Ruata apan wiakka sulaḷummu wadangi ite, ṛinone i'o uariaga ringannu mapia-pia manga inolaanna maa-regga apan suete tinantilla si'o.

¹⁵I'o masingkata manungku anambo n taumata su leta'u Asia suete nanantangku, nasutta lai Figelus wuṛṛu Hermogenes. ¹⁶Arawe laḷoṛṛo m baḷe n Onesiforus masokkate malluassa naungku. Doronganna Mawu mapaaḷiatṛa'u darangngu-Ne simangitou. Salaiwe ia'u sulaḷummu tut-tupanna, Onesiforus tawe masili n inolaangku udde. ¹⁷Aroddi ia'u na'omate su Roma, itou lapiddu nadea'a sia'u na'oma n sara itou nas-somba'u. ¹⁸Wuṛṛu i'o masingkata manungku su Efesus itou masokka mantuḷungku. Doronganna Mawu mapaaḷiatṛa'u darangngu-Ne sitou su allo Mawu mamarikissa anambo n pabbawalagu taumata.

Tantara n Kristus apan matuṛṛuta

2 Timotius, ana'u! Ṛinone i'o mabbali matohassa ana wauḡu aḷamattā apan nionggolla siite, ana wauḡu iite uauukka ringanni Kristus Yesus. ²Aḷaṛṛa'a paarorone suete niaringiṛṛanu wuassia'u su saruannu awa-daalla, ṛinone itantillu su manga taumata apan wotongnge apangi-mananna wuṛṛu pande mangarra'a taumata waine.

³I'o ṛinone sarun matataṛṛanga lai ere tantara n Kristus Yesus apan matuṛṛuta. ⁴Sangkatou tantara apan tantaḷanna mammanara, maddiri mammanara hausanne sassane, ana wauḡu itou maapulu malluassa naungngu tembonanne. ⁵Sangkatou mattandinganna tawe maauntunga sulaḷummu sambau tandinganna, amungkangu itou tawe tumuṛṛutta manga atoranne. ⁶Mabbawailla apan suete nammanara maṛṛimada, ete itou apan paarorone maasomba hessi n sinuananne. ⁷Ringira'a wisara'u udde, ana wauḡu Mawu saruṇ mangonggolu ṛingidda si'o ipassunna sarangkanambone udde.

⁸Naungete indi: Watti'u Aḷaḷuassa apan ta'u niapaasingkata udde, eteudde watti'a su ola'i Yesus Kristus, papapulunni Daud; ete Itou Kristus apan nabbiakka apia wuassu papate. ⁹Ana wauḡu mabatti'u Watti'u Aḷaḷuassa udde, ia'u natataṛṛanga; ewe'e lai na'oma n sara niṛṛapussa ere sangkatou taumata laḷeo. Arawe wisara Mawu Ruata tawe iaṛṛapussa. ¹⁰Ana wauḡu udde ia'u tawe matta'uttu sarangkanam-

bone udde hunane su manga taumata apan suete nipile Mawu Ruata, tadea'u imangitou lai maasomba asasaŋamatta apan ionggola sulalummi Kristus Yesus, wuŋŋu tatantalongannu awawantuga saran maŋannu-ŋannu.

¹¹Mangke atonna wisara'u indi,

"Amungkangu iite suete nate suadio'a ringanni Tou,
iite sarun mabbiakka lai suadio'a ringanni Tou.

¹²Amungkangu iite sidutu matammuda,

iite sarun mamarenta lai suadio'a ringanni Tou.

Amungkangu iite massinaadi Tou,

Itou lai sarun massinaadi ite.

¹³Amungkangu iite maŋawangnga

Itou sidutu maturŋuta

ana waugu Itou tawe maapanompolla watangan-Ne sassane."

Allangnga apan naasomba daralo

¹⁴Ŋinone i'o mapaanaungnga su manga taumata su ola'u sarang-kanambone indi. Su saruannu Mawu Ruata, tantiroi imangitou, tadea'u tawe mattatiakka su ola'u manga wisara wakku. Udde tawe gunane, ewe'e tumba'u mangngaŋiwu manga taumata apan maddaringikka.

¹⁵Ŋinone i'o mammanara atonna-tonna tadea'u i'o a'uannu Mawu Ruata mola'a sangkatou taumata apan wotongnge mangimbe Sitou. Pappandumpe tadea'u i'o tawe masili su ola'u manaranu, ewe'e mangngaŋŋa'u aŋaŋŋa'a apan su ŋinone wuassu Mawu Ruata. ¹⁶Pangindau manga hatto tawe gunane wuŋŋu mangaluandaga Mawu Ruata. Manga hatto ereudde tumba'u maaola'a taumata lembon daŋeo. ¹⁷Aŋaŋŋa'u manga taumata udde maaliu ere radda'a kanker apan mahiadda. Su wallatti mangitou nasutta lai Himeneus wuŋŋu Filetus. ¹⁸Imangitou suete nalliu wuassu aŋaŋŋa'a apan su ŋinone, wuŋŋu nangaŋiwu m pangangimannu sangkawageanganna taumata. Imangitou nabbisara manungku pabbawangunna wuassu papate suete nariaddi. ¹⁹Arawe pinangiananne matohassa apan niola'u Mawu Ruata, tawe ia'io'a. Su wowone uaworŋetta arendi, "Mawu masingkatu manga taumata pussa'a-Ne", wuŋŋu "Taumata apan mabbisara manungku itou pussa'a Mawu, taumata udde ŋinone tate ma'ola'a inolaanne apan nassaŋa".

²⁰Sulalummu waŋe apan wahewalla pia aŋawo'u sarannapa. Piaddu niola'a wuassu saŋa'a ara'e, wuŋawanna, arawe piaddu lai wuassu alu ara'e leta'a. Pia ipapaatta su pandumanna apan mawantuga, wuŋŋu pia lai ipappaatta su tudda inanaramanna. ²¹Taumata apan mammaresi watanganne wuassu anambo n aŋaŋeo, taumata udde sarun ipaatta su pandumma apan apianne. Itou maola'a pussa'a apianne wuŋŋu mahuna



su mawune. Itou sasaddianna ipaatta su aławo'u manara apan mapia. ²²Pangindau manga lałumanna'u taumata dario'a. Pabbiakke tumuřruttu apulu Mawu Ruata, paatuřruta su aławrangnge wuřru paarangngu taumata sansuřlunga, wuřru pia atatammudu naungnga. Pabbiakke aroddi suadio'a ringanni mangitou apan sussařande madorongnga tuřlunganna su Mawu ringannu naungnga waresi. ²³Arie lumařo'a su pattatiakku manga taumata woddo apan waggan apa-apa. Iō masingkata manungku sarangkanambone udde tumba'u mapaařapputu pattatiakka. ²⁴Taumata apan mammanara manara Mawu tawe řinone mattatiakka; itou řinone masarřionto'a su anambo n taumata, wuřru wotongnge mangarřa'a taumata ringannu mapia wuřru masabare. ²⁵Itou řinone ringannu masi'ome mangarřa'a manga taumata mařawanga; doronganna Mawu Ruata sarun mangonggolu allo su manga taumata udde mawařu wuassu manga rosa mangitou wuřru ma'illala aławřa'a su řinone. ²⁶Ringannu aroddi imangitou maatutukke apia, wuřru napallose wuassu sedda n Setanna apan suete nangiitta simangitou wuřru mammata'i mangitou tumantalongnga apulune.


Manga allo panginsueanne

3 Naunge'o indi: Su manga allo panginsueanne sarun pia asasusa manambo. ¹Taumata tumba'u mařingiddu ririne sassane, apulune roitta, mawunga wuřru tařimorřonganna. Imangitou tařra adio'a taumata, tařra rona timmade, wagga maadiangkamana, wuřru maddantinu ino-

laannu Saṛrani. ³Imangitou maddiri mandangngu taumata sansulunge, tawe mangonggolu ampunga, imangitou apulune mandaleo arannu taumata waine, taṛra wata'a, imangitou maffaggisa, wuṛru maddiri n apapia. ⁴Imangitou apulune mandaleo taumata, mawunga wuṛru tawe maffingidda maḷo'e. Imangitou apulune tuttuṛruta laḷumanna'u runia wuassu tumuṛṛutta aḷaṛra'u Mawu Ruata. ⁵Salaiwe su ola'u wadanga, imangitou matuṛṛuta mappamattu tita n agama, arawe maddiri manengkamma laḷoṛro n watiti'u agama udde sassane. Paarau manga taumata ereudde. ⁶Pia su wallatti mangitou apan suete sinumutta su manga waḷe, see mammono'a manga wawine lome apan anamboanne rosane wuṛru paparentannu anambo n apulune. ⁷Manga wawine udde sidutu mammiṛra'a, arawe tawe saran paassa maasunna aḷaṛra'a apan atonna wuassu Mawu Ruata. ⁸Su ereapa Yanes wuṛru Yambres nilumawangnga si Musa rorone, aroddi lai manga taumata udde nilumawangnga aḷaṛra'a wuassu Mawu Ruata. Ringidi mangitou nahohakke, wuṛru pangangimanni mangitou nisiladde. ⁹Arawe imangitou tawe maasomba apa-apa, ana waugu awawoddo mangitou sarun asingkatannu anambo n taumata, ere lai nariaddi si Yanes wuṛru Yambres.

Manga tatantiro

¹⁰Arawe i'o suete tinumuṛṛuta manga aḷaṛra'u, pallaḷagu'u, wuṛru tudda pabbiṛrangku. I'o suete naasilo sassane ereapa ia'u atonna-tonna mangngimanna si Yesus Kristus wuṛru marangngu su sansulungngu taumata. I'o lai masingkatu asasabare'u wuṛru atatammu'u. ¹¹I'o naasilote sia'u sassansaranna wuṛru ia'u uatataṛranga. I'o masingkatu anambo n apan nariaddi sia'u su Antiokhia, su Ikonium, wuṛru su Listra; wuṛru i'o masingkata lai anambo n asasusa'u! Arawe Mawu nanaḷamatta sia'u wuassu sarangkanambone udde. ¹²Atonna anambo n taumata apan maapulu mabbiakka mattaṛramawu, wuṛru mabbiakka uauukka ringanni Kristus Yesus sarun sansaranna, ¹³arawe manga taumata laḷeo wuṛru manga taumata taṛra ḷinga sarun mabbali lembon aḷeoanne. Imangitou mallinga taumata waine, wutte'e imangitou sassane niaḷinganna lai. ¹⁴Arawe i'o, Timotius, ṛinone i'o sidutu uaaggasa manga aḷaṛra'a narṛino apan suete niaṛra'a si'o wuṛru pangimanannu atonna; ana waugu i'o masingkata isai manga hurunu. ¹⁵Iōṛinone mannaungnga manungku ro'e n ta'e dario'a i'o masingkate m Wuke Susi. Wuke Susi udde wotongnge mangonggolu pasasunna si'o tadea'u maasomba asalaḷamatta sulaḷummu pangangimanna si Kristus Yesus. ¹⁶Sarangkanambone apan uawoṛṛetta sulaḷummu Wuke Susi, tinantiro Mawu Ruata wuṛru pia gunane ipangaṛra'a aḷaṛra'a su ṛinone, ipanaggu, wuṛru ipangapia apan nassaḷa,



Tampa m pananahipunanna wuke tempo n dorone (3:15)

wurru ipangarra'a taumata tadea'u mabbiakka tumuruttu apulu Mawu Ruata. ¹⁷Ringannu Wuke Susi udde taumata apan mangngimbe Mawu Ruata wotongnge peddetannu asasuungnga su alawo'u manara apan mapia.

4 Kristus Yesus sarun rumanta apia su runia indi mamarikissa manga taumata apan wiakka wurru nate; wurru Itou sarun rumanta marenta ere sangkatou Ratu. Ana waugu udde ia'u sumalande siamiu su saruannu Mawu Ruata wurru Kristus Yesus; ²Rinone i'o mamasingkatu watti'a wuassu Mawu Ruata udde, wurru sidutu mammata'a tadea'u taumata maddaringikka, apa imangitou maapulu ara'e maddiri. Rinone i'o mapaangimannu taumata, manta'e m pasasala, wurru mangonggolu sasasa simangitou. Arra'ete taumata ringannu anambo n asasabare. ³Ana waugu sarun a'omanna tempone taumata maddirite lai madingikika alarra'a apan narfino. Arawe imangitou sarun tumurutta apulu mangitou sassane, wurru mangammulu huru manambo iapaarra'u manga inolaanna apan mapia su aringikku talinga n mangitou. ⁴Imangitou sarun marapinga talinga su watti'a atonna, arawe sarun madingikika wa'e tawe gunane. ⁵Salaiwe aroddi, i'o rinone uaparenta watangannu sulalummu alawo'a apan mariaddi. Paasabare sulalummu asasusa, ola'e manaranu mabatti'u Watti'u Alaluassa udde wurru amata'e ringannu mapia-pia manaranu ere sangkatou mangangimbe Mawu Ruata.

⁶Su ola'u riri'u, nia'omante tempone ia'u sarun mate maola'a sambau sasamba su Mawu Ruata. Tate malannu lai ia'u sarun manantangngu runia indi. ⁷Ia'u suete nattalumma ringannu mapia-pia, wurru na'omate

su akkitta panginsueanne. Ia'u sidutu tuttuṛṛuta Mawu Yesus saran pangudusanne. ⁸Wuṛṛu orassa indi laṅantaku naauntunga uaraṛṛaddo sia'u. Su Allo ng Kiamatta, Mawu, Mallaṛṛuungnga apan matuḷidda udde sarun manantillu laṅantake udde sia'u, ana waugu ia'u mabbiakka uauukka ringannu Mawu Ruata. Wuṛṛu waḷine tumba'u ia'u sassane apan manengkamma laṅantake udde, arawe lai anambo n taumata apan uaraṛṛaddo daranta Mawu ringannu ahewallu naungnga.

Manga tatantiro panginsueanne

⁹Rantate ringanku ringannu maḷiha-ḷihakka, ¹⁰ana waugu Demas suete nanantangku ana waugu nandangute runia indi. Itou nanute watukku Tesalonika. Kreskes nabatukke n Galatia, wuṛṛu Titus watukku Dalmatia. ¹¹Tumba'u Lukas natantanga ringanku, ana waugu itou wotonge mallaḷima manara'u. ¹²Ia'u suete nandolokki Tikhikus inai watukku Efesus. ¹³Amungkangu i'o rumanta, apira'a laubbu sunge apan ta'u tinantanga su Troas su waḷe n Karpus. Apira'a lai manga wuke'u, lembonete manga wuke apan suranne niola'a wuassu pisi.

¹⁴Aleksander, taṛṛa ola'a witu'a udde suete na'ola'a manga inolaanna apan laḷeo sia'u. Mawu sarun mabbaḷissa sitou tumuṛṛuttu inolaanne. ¹⁵I'o sassane ṛinone paatehamma sitou, ana waugu itou maddiri madda-ringikka watti'i ite.

¹⁶Su tempo ia'u paarorone sinumimbakka, tawe saran sangkatou apan uaringanna sia'u; sarangkanambone nanantangku. Doronganna Mawu Ruata tawe mapaasala n mangitou su olangnge indi! ¹⁷Arawe Mawu uaringanna sia'u. Itou nangonggolu atatohassa na'oma n sara ia'u wotongnge mamasingkatu ala'wo'u Watti'u Alaḷuassa udde, tadea'u daringiṛṛanu anambo n taumata apan waḷine Yahudi. ¹⁸Wuṛṛu ia'u napallose wuassu papate. Atonna Mawu Ruata sarun mamalloso wuassu ala'wo'u pandumma apan laḷeo su riri'u. Itou sarun mangapi'u ringannu salaṃatta sulaḷummu araratuan-Ne su surga. Ṛinone Itou wantuhanna saran maḷannu-ḷannu! Amin.

Tabea Panginsueanne

¹⁹Tabea'u si Priskila wuṛṛu Akwila wuṛṛu su amonanni Onesiforus.

²⁰Erastus uatana'a su Korintus, wuṛṛu Trofimus suete tinantangku marada'a su Miletus. ²¹Amungkangu wotongnge rantate tantaḷanna taambe tempo n masunge.

Ebulus, Pudes, Linus, wuꞖꞖu Klaudia nandoho n tabea mangitou si'o;
aroddi lai anambo n tuꞖꞖanga waine sulaꞖummu pangangimanna sambau.

²²Doronganna Mawu makkundinganna si'o.

Doronganna Mawu mangaꞖamatta Manga tuꞖꞖangnga!

Tabea ng kami,
Paulus

SURATTI PAULUS SI TITUS

WISARA TALAANE

Titus eteudde sangkatou taumata waline Yahudi apan suete sinumutta agama n Sarrani ana see naola'e ringanna sangkamanaranna wufu massumbala si Paulus sulaumu manarane. Suratta indi tuddane si Titus apan su tempo udde uatana'a su Kreta ana waugu suete tinantangi Paulus poiarddi iapapadduli jamaatta. Pia tatallu hatto apan iapaasingkatta sulaumu suratta indi.

Paarorone, Titus niapaanaungnga su ola'u pallaagu n taumata apan wotongge maola'a piara'u jamaatta. Hatto udde iapaasingkatta ana waugu pallaagu manga taumata su Kreta anamboanne laleo. Aruane, Titus nitantiroanna su ola'u ereapa rinone itou mangarra'a alawo'u taumata apan naola'a reengannu jamaatta udde, eteudde ammulannu taumata esakka wufu wawine apan timmaddete (rinone lai mangarra'a manga taumata maddario'anna wuassi mangitou), ammulannu taumata dario'a, wufu taumata allangnga. Panginsueanne Titus niarraanna su ola'u ereapa rinone pallaagu n taumata n Sarrani. Ahunanne eteudde manungku taumata n Sarrani rinone masarrioronto'a wufu maapulu m padarame, arie maddantinnu taumata, arie maapulu m pattatiakka ara'e mandanta m pabbawawulo.

Lalorone

Panattaranne	1:1-4
Manga piara'u jamaatta	1:5-16
Manara n alawo'u ammulannu taumata sulaumu jamaatta	2:1-15
Tatantiro wufu iapaanaungnga	3:1-11
Panginsueanne	3:12-15

1 Ana'u Titus! Ia'u, Paulus, namorretu suratta indi ere ola'u sangkatou allangngu Mawu Ruata wuɽɽu rasulli Yesus Kristus. Ia'u nipile wuɽɽu nirolokka mantuɽungu manga taumata apan nipile Mawu Ruata tadea'u maola'a matohassa sulaɽummu pangangimanni mangitou. Ia'u lai ɽinone mangehetta simangitou tadea'u maasingkatu alaɽɽa'a apan naɽɽino niaɽɽa'u agama ng kite. ²Alaɽɽa'a udde pinangiananne wuassu antimma manungku iite sarun manengkamma wiakka tutune wuɽɽu maɽannu-ɽannu. Mawu Ruata suete na'ire m wiakka udde ro'e n panattaɽɽannu runia indi - wuɽɽu tawe mariaddi Mawu Ruata manga-wusu. ³Su tempo apan suete nitantunna, Mawu Ruata mapaaɽiatta'u paaire-Ne udde sulaɽummu tanata-Ne. Tanata udde suete niwaɽo si'u, wuɽɽu ia'u namasingkatu tanata udde ana waugu darolokku Mawu Ruata Punnu Saɽamatti ite.

⁴Titus, eteudde i'o atonna-tonna ana'u, ana waugu i'o wuɽɽu ia'u suadio'a suete nangimanna si Kristus.

Ia'u mangantimma doronganna Mawu Ruata Iamangnga wuɽɽu Kristus Yesus Ratu m Punnu Saɽamatti ite, mangonggolou alaɽmatta wuɽɽu pa-ddarame si'o.

Manara n Titus su Kreta

⁵Ia'u manantangngu su Kreta tadea'u i'o wotongnge mangatokku manga manara apan ta'e wotongnge iaatokka. Wuɽɽu tadea'u lai i'o mamile manga piaɽɽa'u jamaatta su alaɽo'u soa. Wuɽɽu paanaunge manga tantiro'u indi: ⁶Sangkatou piaɽɽa'u jamaatta ɽinone sangkatou apan tawe saɽane; itou ɽinone tumba'u uatahuanna awingnga sangkatou; manga alaɽɽanangnge ɽinone mangngimanna si Kristus wuɽɽu waɽinewe ana'a laɽeo wuɽɽu tawe iaatokka. ⁷Mallaɽu'ada jamaatta udde taumata apan mangngatokku manara Mawu Ruata, tawe wotongnge itou pia pasasaɽane. Tawe wotongnge mawunga ara'e taɽɽa wuɽo, ara'e taɽɽa wu'anna, ara'e taɽɽa wawuɽo ara'e waɽiu n roitta. ⁸ɽinone itou maɽuassa manarimmattu taumata su waɽene, maapulu manga inolaanna apan mapia, wotongnge maɽɽadannu aapulu naungnge, matuɽidda, susi wuɽɽu ma'uddupa. ⁹Itou ɽinone uaaggasa atonna alaɽɽa'a apan wotongnge apangimananna, ere lai suete niaɽɽa'a sitou. Ringannu aroddi itou wotongnge manantiro taumata ringannu alaɽɽa'a su ɽinone, wuɽɽu mapaaɽiatta'u pasasaɽa manga taumata apan lullawangnga Sitou.

¹⁰Ana waugu manambo taumata apan maapulu mabbawuɽo, lembo-nete manga taumata apan dorone agamane Yahudi; imangitou mangngawusu taumata waine ringannu aawusu mangitou. ¹¹Manga taumata ereudde ɽinone sappingana moɽɽonge, ana waugu imangitou

mannongkakku anambo n amonanna ringannu manga alaŕra'a apan laŕeo. Imangitou ma'ola'a udde tumba'u ana waugu maapulu maddea'a auntunganna apan tawe su řinone! ¹²Suete su paassa nabi mangitou sassane, inarantanne wuassu Kreta lai, nabbisara, "Manga tau-mata n Kreta sidutu mangngawusu, wuřru ere winatangnga maŕařra'a apan a'ombanganna wuřru wolo'a." ¹³Apa apan suete niwisara nabi udde mangke atonna. Ana waugu udde řinone i'o managu simangitou ringannu mařrařisa; tadea'u imangitou sidutu uaagassa alaŕra'a su řinone, ¹⁴wuřru tate lai mangngimanna manga watti'u n Yahudi ara'e manga atoranna apan niola'u manga taumata maddiri n alaŕra'a apan nařrino udde. ¹⁵Sarangkanambone udde susi su manga taumata apan susi. Arawe su manga taumata apan řingiranne laŕeo wuřru tawe pangangimanne, tawe sambau sarannapa apan susi, ana waugu řingiranne wuřru lařummu naungngi mangitou nalaleote! ¹⁶Imangitou mabbisara manungku imangitou maaillaŕa Mawu Ruata, wutte'e inolaanni mangitou massinaaddu Mawu Ruata. Imangitou maarantinna, wuřru imangitou tawe tumuřrutta, ete imangitou udde taumata apan tawe maaola'a manarane apan mapia.

Manga pinangianannu alaŕra'a apan nařrino

2 Arawe i'o Titus, řinone i'o mangarra'u alaŕra'a apan su řinone. ²Arra'ete manga timadde esakka, tadea'u imangitou mařradanna, pande wuřru mabbiakka ere sangkatou taumata apan řinone addatanna. Řinone lai imangitou uaaggasa alaŕra'a apan su řinone wuassu Mawu Ruata, mandangu ringannu ahewallu naungnga wuřru matatařrainga ringannu sabare. ³Aroddi lai řinone i'o mangarra'a manga wawine apan timmaddete tadea'u pallaŕagu mangitou matatařrino su taumata apan mabbiakka tumuřrutta apulu Mawu Ruata sassane. Tawe wotongnge imangitou mangaluandaga taumata waine, wuřru tawe wotongnge tařra inumma ua'e maawu'anna. Řinone imangitou mangarra'u manga alaŕra'a apan mapia, ⁴tadea'u ringannu alaŕra'a udde imangitou wotongnge maapangarra'a manga mařruala mandangu awingnge wuřru alařranangge, ⁵maola'a pande, mabbiakka susi wuřru maola'a inangnga su laŕořro m baŕe apan mapia wuřru masallunga awingnge. Ringannu aroddi tawe saran sangkatou apan wotongnge mapaasala m watti'u Mawu Ruata.

⁶Aroddi lai, tantiroi lai manga alařrana'a umbasana tadea'u imangitou lai masiřrongnga. ⁷Su alaŕawo'u inolaanna řinone i'o maola'a tuŕada m pallaŕagu apan mapia. Amungkangu i'o mangarra'a, řinone i'o tawe mamahia wuřru atonna-tonna. ⁸Pappaatte n manga wisara mapia, apan

tawe iapaasala n taumata, tadea'u manga seennu masili ana waugu tawe inolaanna laleo apan wotongnge iwatti'i mangitou su ola'i ite.

⁹Manga allangnga rinone masallunga mawune, wuɽɽu maalɽuassa naungnge sulaɽummu alaɽo'u inolaanna. Imangitou tawe wotongnge manompolla, ¹⁰ara'e manna'o. Rinone imangitou mapaaɽiatta'a manungku imangitou sidutu uatana'a mapia wuɽɽu matammuda, tadea'u ringannu pallaɽagu mangitou udde taumata maddalo alaɽɽa'u Mawu Ruata, Punnu Saɽamatti ite.

¹¹Ana waugu Mawu Ruata suete napaaɽiatta'u darangngu-Ne ipanaɽamatta anambo n taumata. ¹²Darangngu Mawu Ruata udde mangngaɽɽa'a siite tadea'u tate lai mabbiakka uapapaɽɽala n apulu Mawu Ruata wuɽɽu tate tumuɽɽutta apulu n runia. Iite niaɽɽaanna mabbiakka sulaɽummu runia indi ringannu masingkata manabare, matuɽida wuɽɽu matuɽɽuta Mawu Ruata. ¹³Orassa indi iite tantaɽanna uaraɽɽaddo Allo apan aantimanni ite udde; su Allo udde runia sarun maasilo awawan-tugi Yesus Kristus, eteudde Mawu Ahewaɽanne wuɽɽu Ratu m Punnu Saɽamatti ite. ¹⁴Itou suete nanantillu watangan-Ne ana waugu iite wuɽɽu ana waugu mamallosi ite wuassu alaɽo'u alaɽeo, wuɽɽu na'ola'a siite sambau pabbawalaga apan naɽiu wuassu alaɽo'u rosa wuɽɽu tumba'u naola'a pussa'a-Ne sassane, wuɽɽu maɽɽimada ma'ola'a apapia.

¹⁵Tantiroa'e sarangkanambone udde, wuɽɽu aɽɽa'ete see tagguete manga madararingikka si'o ringannu saɽɽaungnga. Arie mapaaɽala n saran sangkatou mangadio'a si'o.

Pallaɽagu n taumata n Saɽɽani

3 Paanaunga'a su manga laɽoɽo n jamaatta tadea'u imangitou matuɽɽuta manga piaɽɽange wuɽɽu tembonannu araratuanna, see matuɽɽuta wuɽɽu maapulu ma'ola'a manga inolaanna apan mapia. ²Waɽoa'a simangitou tadea'u tawe mangaɽuandaga ara'e matatiakku manga taumata, ewe'e mabbiakka masaɽɽionto'a. Rinone imangitou sidutu masambiolo su saruannu anambo n taumata. ³Ana waugu dorone iite sassane lai woddo, niumaɽiwu wuɽɽu maɽawangnga. Iite niallangngu alaɽo'u aapulu n runia; iite mabbiakka ringannu pandumanna apan laleo wuɽɽu mangngune, wuɽɽu uasaseetta. ⁴Arawe Mawu Ruata, Punnu Saɽamatti ite napaaɽiatta'u darangngu-Ne wuɽɽu apapia naung-Nge siite. ⁵Itou nanaɽamatta siite, waɽine ana waugu iite suete na'ola'a apapia, ewe'e ana waugu Itou sassane tinumaɽantupi ite. Itou nanaɽamatta siite sulaɽummu Ghaɽɽaho Mawu Ruata, apan nangonggolu arariadianna wakku siite wuɽɽu wiakka wakku ringannu nangukkassu ɽaɽɽa-Ne siite. ⁶Mawu Ruata namobbokku Ghaɽɽaho-Ne siite sulaɽummu Anang-Nge

Yesus Kristus, Ratu m Punnu Sałamatti ite, ⁷tadea'u wuassu darangngu Mawu Yesus, iite wotongnge maaukka apia ringannu Mawu Ruata wuŕŕu iite maasomba wiakka tutune wuŕŕu saran maŕannu-ŕannu apan aantimanni ite. ⁸Wisara indi atonna-tonna.

Ia'u maapulu i'o mangarŕa'u olangnge indi, tadea'u manga taumata apan mangngimanna Mawu Ruata atonna-tonna maddea'a ma'ola'a manga manara apan mapia wuŕŕu mahuna su anambo n taumata. ⁹Pangindaute manga pattatiakka apan tawe gunane, manga watti'u aŕamona, pattatiakka wuŕŕu pabbawawuŕo su ola'u tita n agama. Sarangkanambone udde tawe gunane wuŕŕu tawe gessine. ¹⁰Taumata apan mandanta m pattatiakka sulaŕummu jamaatta, ŕinone itou tagguanna paassa ara'e paarua; wua udde ariete lai maggawe n tou. ¹¹I'o masingkate manungku taumata ereudde laŕeo wuŕŕu manga rosane ma-paaliatta'a manungku itou nassaŕa.

Manga tatantiro panginsueanne

¹²Napawe ia'u suete nandolokki Artemas ara'e Tikhikus ringannu, paalihakke maddea'a tempone rumanta ringangu su Nikopolis, ana waugu ia'u pia apulu matana'a isudde su aŕannu n tempo masunge. ¹³Pattinsahadde ringannu atonna-tonna manumbala si Zenas, mapapande n tita udde, wuŕŕu Apolos, tadea'u imangitou wotongnge inai umamatta wuŕŕu tawe asueannu manga apa. ¹⁴Manga taumata ng kite ŕinone mangurumma aŕarŕa'a, ma'ola'a inolaanna apan mapia tadea'u wotongnge mapaasuungngu sarannapa apan ipaapulune; arie ma'oma n sara imangitou mabbiakka tawe gunane.

¹⁵Manga tuŕŕanga sarangkanambone apan suadio'a ringangu, nandoho n tabea siamiu. Waŕoa'a tabea ng kami su manga hawe ng kite apan su pangangimanna sambau.

Doronganna Mawu mangalamatta tuŕŕanga sarangkanambone.

Tabea ng kami,
Paulus

SURATTI PAULUS SI FILEMON

WISARA TALAANE

Filemon eteudde sangkatou taumata n Sarani apan tinumelengnga wuru alimangke naola'a reengannu jamaatta su Kolose. Itou uatahuanna sangkatou allangnga aranne Onesimus. Allangnga udde nasaliute wua dinganni Filemon, mawune udde, wua udde awagananna naola'a ereapa itou naggawete m Paulus su tempo Paulus sulalummu tutupanna. Ringannu alarra'i Paulus, Onesimus naola'e taumata n Sarani.

Suratti Paulus si Filemon indi naola'a ere sambau sasalande Paulus tadea'u Filemon maapulu maddame m Onesimus, allangnge udde, apan tantalanu nirolokki Paulus mapule. Paulus sinumalande tadea'u Filemon manarimmatti Onesimus apia, waline tumba'u ere sangkatou allangnga apan suete niampunganna, arawe lai ere sangkatou taumata n Sarani

Lalorrone

Panattaranne	1-3
Daranggu wuru pangangimanni Filemon	4-7
Darorongnga su ola'i Onesimus	8-22
Panginsueanne	23-25

1 Turřanga Filemon, hawe wuřru ringanni ami! Ia'u, Paulus, sangkatou taumata n ruumanna ana waugu Kristus Yesus, su sampunna ringannu turřangi ite Timotius, manorřetu suratta indi si'o, ²wuřru su jamaatta apan uammulla su wafenu; wuřru su wawine ng kite Afia, wuřru hawe sangkamanaranni ite Arkhipus.

³Iami mangantimma doronganna Mawu Ruata Iamangngi ite wuřru Mawu Yesus Kristus mangonggolu alamatta wuřru paddarame siamiu.

Aakkanna wuřru pangangimanni Filemon

⁴Suapan ia'u umaliomanna, ia'u mannago n arannu turřanga wuřru maadiangkamanna su Mawu Ruata. ⁵Ana waugu ia'u naaringikka manungku turřanga atonna-tonna mangngimanna Mawu Yesus wuřru mandangngu anambo n alarřa'u Mawu Ruata. ⁶Ia'u u'aliomanna tadea'u pasasangkaturřangi ite ere manga taumata mangngimanna sarun maggesi m pasasunna apan lembon wahewalla su alawo'u alamatta apan tatahuananni ite ana waugu uaukka ringanni Kristus. ⁷Turřanga Filemon, darangngunu su anambo n alarřana'u Mawu Ruata maaľuassa sia'u wuřru mangonggolu sasasa sia'u! Anambo n alarřana'u Mawu Ruata nilumuassa ana waugu i'o.

Sasaľande huna n Onesimus

⁸Ana waugu udde, ere sangkatou turřanga apan su pangangimanna sambau, ia'u wotongnge mandolokku ma'ola'a apa apan sarun olaannu. ⁹Arawe ana waugu ia'u marangngu si'o, ia'u tumba'u madorongnga. Ia'u indi sangkatou timmade wuřru orassa indi ta'e tatařranganna sulaľummu tutupanna ana waugu Kristus Yesus. ¹⁰Ia'u Paulus, mangapiddu sambau darorongnga si'o su ola'i Onesimus, ana'u sulaľummi Kristus. Ana waugu sulaľummu tutupanna indi ia'u naola'e iamangngu pangangimanne. ¹¹Dorone itou tawe gunane si'o, arawe orassa indi itcu plate gunane, wafine tumba'u si'o sassane, arawe sia'u lai.

¹²Orassa indi taumata arangnguangku udde nirolokke apia ringannu. ¹³Rinone ia'u pia apulu manarřanga sitou ringangu maola'a hahantinu, tadea'u itou wotongnge massumbala sia'u, su alannune ia'u tatařranganna sulaľummu tutupanna indi ana waugu mammasingkatu Watti'u Alaluassa wuassu Mawu Ruata. ¹⁴Arawe ia'u maddiri ma'ola'a apa-apa amungkangu taambe naasomba paaire wuassi'o. Ia'u lembon maapulu amungkangu i'o mammanara ringannu apulu naungngu sassane; ia'u maddiri matatangngu.

¹⁵Asinungka Onesimus narraenu tala ng kadio'a tadea'u i'o wotongnge maasomba sitou apia sarangka'o'engnge. ¹⁶Orassa indi itou woline tumba'u sangkatou allangngu, itou nangillembo wua isudde. Itou uddewe nassulungngu taumata n Sarrani apan arangnguanna. Itou lembon mahuna si'u, lembonete lai si'o! Itou lembon mahuna lai mapia ere sangkatou allangnga aroddi lai ere sangkatou turanga sula'ummu Mawu!

¹⁷Ana waugu udde, i'o ma'ellega sia'u ere sangkatou hawe sula'ummu paa'aukku taumata n Sarrani, tarimmata'e apia Onesimus ere lai i'o nanarimmatti ia'u. ¹⁸Amungkangu itou nassa'a ara'e pia apa niwallasanna si'o, ia'ute mamaekka sarangkanambone udde. ¹⁹Ne, mappianne ia'u mamorreta sassane isindi: *Ia'u Paulus, sarun mamaekka sarangkanambone*. (Salaiwe tate ta'u iapaanaungnga manungku i'o sassane lai nabbalassa si'u, eteudde wiakku apan wakku ere sangkatou taumata n Sarrani.) ²⁰Ana waugu udde, ringannu arannu Mawu, annama'a tulunga'a ia'u, paa'usa'a naungku nassulungngu ere sangkatou turanga sula'ummi Kristus.

²¹Ia'u namorretu suratta indi ringannu mangngimanna manungku i'o sarun tumurutta darorongku. Ewe'e ia'u lai masingkata i'o sarun ma'ola'a nangillembo wua isudde. ²²Tantalanna udde tulunga'a ia'u sadiwai wabbo'a su wale'nu, ana waugu ia'u mangngantimma Mawu Ruata sarun madaringikka aaliomannu manga turangnga sarangkanambone wuru mangapi'u apia ringanni amiu.

Tabea panginsueanne

²³Epafra, apan suadio'a ringanku sula'ummu tutupanna ana waugu Kristus Yesus, nandoho n tabeane si'o. ²⁴Sengkamma lai tabea manga hawe'u: Markus, Aristarkhus, Demas wuru Lukas.

²⁵Doronganna Mawu Yesus Kristus manga'amatta siamiu.

Tabea ng kami,
Paulus

SURATTA SU TAUMATA N IBRANI

WISARA TAŁAANE

Suratta Su Taumata n Ibrani indi tuddane su sambau ammulannu tau-mata n Sarrani, apan sidutu uasaruanna wawono'a, asinungka sarun ma-ssinaddu pangangimanni mangitou si Kristus. Mamamofretu suratta indi mattinsahadda mannasa simangitou tadea'u imangitou sidutu mangngi-manna. Ana waugu udde itou napaaliatta'a manungku eteudde Yesus Kristus pallaławannu Mawu Ruata apan nasuungnga. Tatallu hatto apan niapaasingkatu mamamofretu suratta indi. Paarorone, eteudde Mawu Yesus Ana'u Mawu Ruata - Ana'a apan uatarřino saran małannu-lannu. Ana'u Mawu Ruata udde mapaałiatta'u taturru-Ne su lamang-nga sulałummu asasusa-Ne. Ana waugu Ana'u Mawu Ruata, Mawu Ye-sus mattanggarřana wuassu manga nabi sulałummu Paaire Tabbe. Itou lai mattanggarřana wuassu mala'ekatta ara'e lai Musa sassane. Aruane, Mawu Ruata suete napaaliatta'a manungku Mawu Yesus eteudde imam apan tawe panginsueanne apan mattanggarřane wuassu manga imam sulałummu Paaire Tabbe. Atallune, sulałummu Mawu Yesus, taumata apan mangngimanna Sitou niapaaliu wuassu rosa wuřru atata'utta wuřru wuassu papate. Ana waugu Imam Wahewa, Mawu Yesus nangonggolu asasałamatta tutune su taumata, apan tawe ia'onggola ringannu mang-ngapiddu sasamba wuřru manga inolaanna waine sulałummu agama n Yahudi. Manga ammulanna udde tumba'u mangngonggolu tuładane wuassu asasałamatta tutune udde, waine tawe.

Ringannu namasingkatu manga tułada m pangangimannu manga piarřange apan tinumelengke sulałummu watti'u taumata n Israel (addo-
anne 11), mamamofretu suratta indi mannantiro mabbawasane tadea'u
sidutu matuřruta. Sulałummu addoanne 12 itou mannasa simangitou
tadea'u tutuřruta saran panginsueanne, ringannu tumba'u ma'ellega
Mawu Yesus. Itou mannasa simangitou lai tadea'u masabare su asasusa
wuřru masabare mamasanna aławo'u aaluandaga wuřru soddo'a su wa-
dangi mangitou. Pangudusannu suratta indi eteudde tatantiro wuřru ta-
nata.

Lalorrone

Paarorone: Eteudde Kristus pallaławannu Mawu	
Ruata apan nasuungnga	1:1-3
Kristus mattanggarana wuassu mala'ekatta	1:4-2:18
Kristus mattanggarana wuassi Musa wurru Yosua	3:1-4:13
Apapia manara n Kristus ere sangkatou imam	4:14-7:28
Apapia m paaire n Kristus	8:1-9:28
Apapia su sasamba n Kristus	10:1-39
Hunane pangangimanna	11:1-12:29
Tatantiro wurru wisara panginsueanne	13:1-25

Mawu Ruata nabbisara sulaḷummu Anang-Nge

1 Su tempo rorone Mawu Ruata masokka uahahatto n iupungngi ite sulaḷummu manga nabine ringannu mappaaṭtu anambo n daḷanna.
²Arawe su tempo panginsueanne indi Itou uahahatto ng kite sulaḷummu Anang-Nge. Sulaḷummu Anang-Nge indi Mawu Ruata nandiaddi uḷilim pati'uppa. Wuṛṛu Mawu Ruata suete nanantuna lai manungku ete Anang-Nge indi apan manahuanna aḷawo'u sarangkanambone. ³Ete Itou apan napaatualagu awawantugu Mawu Ruata apan lullendapa; ete Itou hambarana apan masemakka wuassu wadangu Mawu Ruata sassane. Ete Itou lai apan mammaduḷi paa'aukku uḷilim pati'uppa indi ringannu renetan-Ne apan lembon mataṛṛino. Napawe Itou suete namala n taumata nipallosa wuassu manga rosa mangitou, Itou inuma'ianna su addera n araratuanna su surga su sambau ringannu Mawu Ruata, tembonanne apan atanggaṛṛanne.

Awawantugu Ana'u Mawu Ruata

⁴Ana'a udde naasombate aianan-Ne apan lembon atanggaṛṛanne wuassu mala'ekatta, wuṛṛu aranna apan nionggolu Mawu Ruata Sitou lai lembon awantuhanne wuassu aranna apan nionggolla su mala'ekatta.
⁵Taambe saran paassa Mawu Ruata nabbisara arendi su sangkatou mala'ekatta,

"Ete I'o Ana'u;

su allo indi Ia'u maola'a lamangngu."

Taambe saran paassa lai Mawu Ruata nabbisara arendi su ola'u manga mala'ekatta, su aḷawo'u tampa,

"Ia'u sarun maola'a lamangnge,

wuṛṛu itou sarun maola'a Ana-U."

⁶Arawe su tempo Mawu Ruata nandolokku Anang-Nge pahuḷu watukku runia indi,

Mawu Ruata nabbisara arendi,

"Anambo n mala'ekattu Mawu Ruata ṛinone massubba Ana'u udde."

⁷Su ola'u manga mala'ekatta udde, Mawu Ruata nabbisara arendi,

"Mawu Ruata nandiaddi manga mala'ekan-Ne nabbali anginna,

wuṛṛu manga allang-Nge nabbali renggamu putungnga."

⁸Arawe su Ana'a udde, Mawu Ruata nabbisara,

"Addera n araratuannu, oh Mawu, sarun ma'oma n sara maḷannu-ḷannu!

Araratuannu udde araratuanna apan matuḷida.

⁹I'o maapulu n atatujidda, wuṛṛu maddantinu awawengkola;
ana waugu uddewe Mawu Ruata, Mawu Ruata-Nu namile Si'o,
wuṛṛu nangonggolu awawantuga Si'o apan mandanta n alaḷuassa,
nilumambalanna wuassu manga hawe-Nu."

¹⁰Mawu Ruata lai nabbisara,

"I'o, Mawu, apan su aḷamonane nandiaddi runia,
wuṛṛu I'o sassane nandiaddi langitta.

¹¹Sarangkanambone udde sarun mawuḷi,
wuṛṛu mabbali tabbe ere laubba;
arawe I'o sarun tawe mawaḷu.

¹²Uḷilim pati'uppa indi sarun lappuan-Nu ere laubba,
wuṛṛu sarun hantia-Nu ringannu waine.

Arawe I'o saran paassa tawe mawaḷu,
wuṛṛu wiak-Ku tawe pangudusanne."

¹³Tawe saran paassa Mawu Ruata nabbisara arendi su saran sangkatou
mala'ekatta,

"Aiana'e su samba'a uanang-Ku,
ma'oma n sara manga seennu Ta'u iapaasubba Si'o."

¹⁴Amungkangu aroddi, manga mala'ekatta udde apa imangitou? Ete
imangitou udde manga ghaṛṛaho apan mangngimbe Mawu Ruata, wuṛṛu
apan iradolokku Mawu Ruata iapaatulungngu manga taumata apan
sarun manengkamma asasaḷamatta.

Asasaḷamatta apan wahewalla

2 Ana waugu udde iite ṛinone lembon mangaggasa atonna-tonna
manga aḷaṛṛa'a apan suete niaringiṛṛani ite, tadea'u iite tawe
manantangngu pangangimanni ite. ²Manga tanata apan niapaasingkatu
mala'ekatta su iupungngi ite udde nasemakke atonna, wuṛṛu taumata
apan tawe tumuṛṛutta ara'e ma'ola'a, sarun manengkamma ruumanna
apan uasulungngu pallaḷagune. ³Apa lai ringannu asasaḷamatta apan
maggewaḷanne wuassu manga tanata udde! Amungkangu iite tawe
mangngimanna su asasaḷamatta udde, iite sarun tawe maḷiu wuassu
ruumanna. Ana waugu ete Mawu sassane apan paarorone namasing-
kattu asasaḷamatta udde, wuṛṛu manga taumata apan paarorone naaring-
ikka suete napaatualagu atatujiddu watti'a udde siite. ⁴Su liuddu udde,
Mawu Ruata mannohassa tatiala manga taumata udde ringannu na'ola'a
aḷawo'u hati n aḷaṛṛindu'a wuṛṛu manga inolaanna apan wahewalla see
lai nattahia manga aonggolu Ghaṛṛaho Mawu Ruata tumuṛṛuttu apulu-
Ne sassane.

Wawu'a laḷanna su taumata iapaasaḷamatta

⁵Manga mala'ekatta tawe naasomba taḷḷino wuassu Mawu Ruata ipamarenta runia wakku apan sarun rumanta, eteudde runia apan tantaḷanna ipagahato ng kite indi. ⁶Arawe su sambau wageangnge sulaḷummu Wuke Susi uaworretta arendi,

"Apate taumata udde, o Mawu Ruata, na'oma n sara I'o sidutu uanaungnga sitou?

Taumata tumba'u taumata, arawe I'o sidutu mappaduḷi simangitou!

⁷Su tempo apan maḷihakka I'o mandiaddi sitou mabbawoanna adio'a wuassu mala'ekatta.

I'o nangonggolu ai'ananna sitou apan mawantuga wuḷḷu lembon aaddatanna.

⁸ See lai na'ola'a sitou tembonannu sarangkanambone."

Ne, amungkangu iwisara manungku Mawu Ruata nandiaddi taumata "tembonannu sarangkanambone", udde atappasanne manungku tawe saran sambau apan tawe su aḷungngu taḷḷino n taumata. Salaiwe aroddi, iite orassa indi tawe maasilo taumata uataḷḷino sarangkanambone. ⁹Arawe iite suete naasilo Mawu Yesu uataḷḷino! Itou niwawo adio'a wuassu mala'ekatta tumba'u taḷa ng kadio'a, tadea'u su apapia naungngu Mawu Ruata Itou wotonge mate ana waugu anambo n taumata. Iite ma'ellega Itou orassa indi nionggolannu aiananna apan mawantuga wuḷḷu lembon aaddatanna, ana waugu Itou suete natataḷḷanga na'oma n sara nate. ¹⁰Atonna su ḷinonete Mawu Ruata - apan nandiaddi uḷilimpatu'uppa ringannu paḷduman-Ne sassane - nandiaddi Mawu Yesu mananaḷamatta apan nasuungnga sulaḷummu asasusa. Ringannu aroddi Mawu Ruata wotongnge mangahe taumata nambo iapaawantuga suadio'a ringannu Mawu Yesu. Ana waugu ete Itou mamamu'a laḷanna simangitou tadea'u wotongnge iapaasaḷamatta.

¹¹Mawu Yesu namaresi taumata wuassu manga rosa mangitou; wuḷḷu Itou apan namaresi udde; see imangitou apan niwaresi udde, uatahuanna Mawu Iamangnga sambau. Ana waugu udde Mawu Yesu tawe masili manga'u simangitou maola'a manga tuḷḷang-Nge. ¹²Mawu Yesu nabbisara su Mawu Ruata,

"Ia'u sarun mamasingkata su manga tuḷḷang-Ku su olang-Ngu udde.

Ia'u sarun maddalo Si'o sulaḷummu ammuḷanni mangitou."

¹³Mawu Yesu nabbisara lai, "Ia'u sarun mangantimma Mawu Ruata." Wuḷḷu Itou nabbisara lai, "Indiwe Ia'u, su sambau ringannu aḷaḷḷana'a apan suete nionggolu Mawu Ruata Sia'u."

¹⁴Ana waugu manga taumata apan nisaggo n Tou ana'a udde, ete-udde sangkatou taumata apan wotonge mate, ne Mawu Yesus sassane naola'a uasulungngi mangitou wuŕru mabbiaŕka sulaŕummu ola'u taumata. Itou na'ola'a aroddi, tadea'u ringannu papate-Ne Itou wotongnge maŕrimunsa'a Setanna apan uataŕŕino papate. ¹⁵Ringannu olange aroddi Itou namallosu manga taumata apan su aŕo'engngu pabbiaŕŕane naola'a allangnga ana waugu matta'uttu papate. ¹⁶Nilumiatta'e manungku waŕine mala'ekatta apan nituŕlungi Tou, ewe'e papapuluni Abraham. ¹⁷Indi atappasanne manungku Itou ŕinone maola'a uasulunga ringannu manga tuŕŕa-Nge sulaŕummu aŕawo'a. Wuŕru ringannu udde Itou wotongnge maola'a Iman Wahewa apan matuŕŕuta wuŕru marangngu. Ringannu manara-Ne udde rosa n taumata wotongnge aampunganna. ¹⁸Wuŕru ana waugu Itou sassane suete natataŕŕanga wuŕru niwono'anna, Itou naapattuŕlungu manga taumata apan niaŕŕiaannu wawono'a, ana waugu Itou sassane suete niwono'anna wuŕru natataŕŕanga.

Mawu Yesus maggewaŕanna wuassi Musa

3 Manga tuŕŕangnga sansulungnga Saŕŕani apan suete niwagoannu Mawu Ruata lai! Annama'a ŕingiŕŕa'a paalaŕumma su ola'u Mawu Yesus indi! Mawu Ruata nandolokki Tou sassane maola'a Imam Wahewa sulaŕummu agama apan pangngimananni ite. ²Itou matuŕŕuta Mawu Ruata apan suete namile Sitou su manara udde, ere lai Musa rorone matuŕŕuta mappaamattu manarane su Waŕe Mawu Ruata. ³Arawe Mawu Yesus lai ŕinone addatanna lembon ahewaŕanne wuassi Musa. Ana waugu taumata apan mapararisikku waŕe, ŕinone maasomba aaddata maggewaŕanne wuassu waŕe udde sassane. ⁴Atonna aŕawo'u waŕe piaddu mapararisikke, arawe namangunna sarangkanambone eteudde Mawu Ruata sassane. ⁵Musa matuŕŕuta ere sangkatou mangangarŕa'a su Waŕe Mawu wuŕru mabatti'u manga inolaanna apan sarun iapaasingkatu Mawu Ruata su tempo apan sarun rumanta. ⁶Arawe Kristus matuŕŕuta ere sangkatou Ana'a apan uariaga Waŕe Mawu Ruata. Wuŕru ete iite indi Waŕe Mawu Ruata, amungkangu iite sidutu maŕŕimadda wuŕru sidutu mangngimanna maasomba apa apan aantimanni ite.

Pangangilloŕo n alaŕŕana'u Mawu Ruata

⁷Ana waugu udde, ere su wisara n Ghaŕŕaho Mawu Ruata,
⁸"Amungkangu su allo indi iamiu maaringikka tingikku Mawu Ruata,

⁸ ariewe iamiu maddiri maddaringikka,
ere iupungngu ałamonanu,
su tempo imangitou nilumawangnga Mawu Ruata, wuřru
nanału'atta Mawu Ruata su wadda'a.

⁹"Poiaroddi iupungngu ałamonanu namono'a Sia'u, wuřru nanału'atta
Sia'u,' unnu Mawu Ruata,
'sumbałi imangitou naasilote inolaang-Ku appatu puło su
tonnane ałannune.'

¹⁰Ana waugu udde Ia'u nasa'u simangitou wuřru Ia'u nabbisara,
'Imangitou sidutu maddiri tumuřrutta wuřru tawe tumuřrutta
manga parenta-U.'

¹¹Ia'u nasa'u wuřru nassalu,
'Imangitou sarun tawe maasutta su soa udde
wuřru mangilloło ringang-Ku.'"

¹²Manga tuřrangnga, paatehamma arie ma'oma n sara piaddu sang-
katou wuassu wallatti amiu apan pia naungnge aroddi alałeone wuřru
tawe pangangimanne, na'oma n sara itou mabelengnga wuřru mangin-
dau Mawu Ruata apan wiakka! ¹³Nariaddi, tadea'u tawe saran sang-
katou wuassu wallatti amiu apan awono'annu rosa na'oma n sara
lumawangke Mawu Ruata, řinone iamiu uatataggu su miallo-miallo
tantałanna iite ta'e mabbiakka su tempo apan isassago "Allo Indi" su-
lałummu Wuke Susi. ¹⁴Iite saranganambone uddewe sanggaweanna su-
lałummu manara ringanni Kristus, sawałiate saran pangudusanne iite
uaaggasa pangangimanna apan tatahuananni ite ro'e n paarorone.

¹⁵Ete indi apan uawořretta sulałummu Wuke Susi,

"Amungkangu su allo indi iamiu naaringikka tingikku Mawu Ruata,
imbařrangnga iamiu tawe madaringikka, ere iupungngu ałamona,
su tempo imangitou lullawangnga Mawu Ruata."

¹⁶Ne, isai manga taumata apan madaringikka tingikku Mawu Ruata
see nilumawangnga Sitou? Eteudde anambo n taumata apan nipařra'i
Musa sinumabanga wuassu leta'u Mesir, are? ¹⁷Wuřru sisai lai Mawu
Ruata nasa'u appatu puło su tonnane ałannune? Ete simangitou apan
marosa, apan nanawo see nate su wadda'a, are? ¹⁸Su tempo Mawu
Ruata nassalu arendi, "Imangitou sarun tawe maasutta su soa udde ana
see maasomba pangillołoanna ringang-Ku" – isai lai apan ipapandumu
Mawu Ruata? Apan ipappandume eteudde manga taumata apan lul-
lawangnga Mawu Ruata, are? ¹⁹Orassa indi iite naasunnate manungku
imangitou tawe maasutta, ana waugu imangitou tawe mangngimanna
Mawu Ruata.

4 Aroddi paaire Mawu ta'e ipappaatta, wuřru iite sarun iapailloło
ere suete nipa'ire-Ne. Nariaddi, řinone iite mandiaga tadea'u arie
piaddu sangkatou wuassu wallatti amiu apan tawe maatemma allo m

pangilloloanna apan suete nipa'ire udde. ²Ana waugu Watti'u Aļaļuassa udde suete niapaasingkata siite ere lai simangitou. Arawe simangitou watti'a udde tawe gunane. Ana waugu su tempo imangitou naaringikka, imangitou tawe mangimanna. ³Arawe iite apan mangngimanna manengkamma pangangillolo apan suete nipa'ire Mawu Ruata udde. Udde uasulunga ringannu apa apan suete niwaļo Mawu Ruata, arendi,

"Ia'u nasa'u wuŗu nassalu,

'Imangitou sarun tawe maasutta

wuŗu maasomba pangilloloanna su sambau ringang-Ku.'" "

Mawu Ruata nabbisara aroddi salaiwe manara-Ne nasuete ro'e n Itou nandiadi runia indi. ⁴Ana waugu su ola'u allo appitune, pia uaworretta sulaļummu Wuke Susi arendi, "Su allo appitune Mawu Ruata nangillolo wuassu anambo n manara-Ne." ⁵Su olangnge udde lai niworretta arendi, "Imangitou sarun tawe maasutta su wanua udde see maasomba pangilloloanna su sambau ringang-Ku." ⁶Nariaddi imangitou apan paarorone atonna naaringikka watti'a su ola'u Watti'u Aļaļuassa udde, tawe maasengkamma pangangillolo udde ana waugu imangitou tawe mangngimanna. Amungkangu aroddi natualage manungku pia manga taumata waine apan wotonge maasengkamma pangangillolo udde. ⁷Ana waugu Mawu Ruata suete nanantunu sambau allo apan waine lai, apan isassago "Allo Indi". Manga pira tonna wua udde Mawu Ruata nabbisara su olangnge udde sulaļummi Daud, su addoanne apan ere niworretta tanginna,

"Amungkangu su allo indi iamiu maaringikka tingikku Mawu Ruata, imbaŗanga iamiu tawe maddaringikka."

⁸Amungkangu unnu wisara Yosua suete nangonggola su manga taumata udde pangangillolo apan pina'ire Mawu Ruata, ne Mawu Ruata tate mabbisara apia su ola'u allo waine. ⁹Nariaddi, su pabbawalagu Mawu Ruata ta'e pia paaire pangangillolo ere lai Mawu Ruata nangillolo su allo appitune udde. ¹⁰Ana waugu taumata apan nanengkamma pangangillolo apan nipa'ire Mawu Ruata sitou udde, sarun mangillolo lai wuassu anambo n manarane, ere lai Mawu Ruata. ¹¹Ana waugu udde, wette iite maddea'a ringannu atonna-tonna ana see maasengkamma allo m pangangilloloanna apan suete nipa'ire Mawu Ruata udde. Arie pia sangkatou wuassiite tawe maasomba ere imangitou rorone, ana waugu tawe mangngimanna Mawu Ruata.

¹²Wisara Mawu Ruata eteudde wisara apan wiakka wuŗu matohassa; maroroanna wuassu haļeļe rorone rua m ba'a. Wisara udde uusippa ma'oma n sara su wallatu niawa wuŗu gharraho; ma'oma n sara su wallattu manga passi'uanna wuŗu duŗri n liudda, na'oma n sara maasingkata aļaļummu ringiranna wuŗu apulu naungngu taumata. ¹³Taweddu sambau riadianna apan uawuni su aellegu Mawu Ruata.

Aḷawo'u sarannapa uatantole wuṛru wawu'anna su saruan-Ne. Wuṛru iite sarun mangongolu sasimbakka Sitou.

Mawu Yesus Imam Wahewa lembon mawantuga

¹⁴Ana waugu udde iite ṛinone uaaggasa matohassa su panga'uannu pangangimanni ite. Ana waugu iite uatahuanna Imam Wahewa lembon mawantuga, apan suete sinumutta na'oma su saruannu Mawu Ruata – eteudde Yesus Kristus Ana'u Mawu Ruata. ¹⁵Imam Wahewalli ite udde waṛnewe imam apan tawe maapendama manga aḷallome ng kite. Arawe Itou suete niwono'anna sulaḷummu aḷawo'u inolaanna, ere iite lai sassane; tumba'u Itou tawe na'ola'a rosa! ¹⁶Ana waugu udde, wette iite ringannu awawarṛani sumaruanna Mawu Ruata apan mammarenta ringannu naungnge mapia. Mawu Ruata sarun umakkana wuṛru mangaḷamatta siite tadea'u iite maasomba tuḷunganna marṛino su tempone.

5 Suapan imam wahewa nipile wuassu wallatu taumata, wuṛru ni-tenega iapa'imbe Mawu Ruata maola'a mangangapiddu tingikki mangitou. Manarane eteudde mangngapiddu manga aonggola su Mawu Ruata wuṛru sasamba ipangampungu rosa. ²Imam wahewa udde sassane lome su aḷawo'u inolaanna wuṛru ana waugu udde itou wotongnge mattingkaola'a masarṛionto'a su saruannu taumata apan wagga n apa-apa wuṛru apan niuḷaliwu n daḷanne. ³Wuṛru ana waugu itou sassane lome, ne itou ṛinone mangonggolu sasamba, waṛine tumba'u ana waugu rosa n taumata, arawe ana waugu rosane lai sassane. ⁴Tawe saran sangkatou apan mapaateneḡu watanganne sassane maola'a imam wahewa. Tau-mata maola'a imam wahewa, amungkangu Mawu Ruata mamago sitou su manara udde – naaḷihida ere Harun.

⁵Aroddi lai Kristus. Itou tawe napaatenegu watanganne sassane maola'a Imam Wahewa. Mawu Ruata nabbisara Sitou,

"Ete I'o Ana-U;

su allo indi Ia'u maola'a Mawu Iamang-Ngu."

⁶Su wageangne waine Mawu Ruata nabbisara lai,

"I'o uddewe Imam sara maḷannu-ḷannu,
naaḷihida Imam Melkisedek."

⁷Su tempo Mawu Yesus mabbiakka su runia indi, Itou u'aḷiomanna wuṛru sussaḷande ringannu u'ui wuṛru lulluai su Mawu Ruata, apan wotongnge manaḷamatta Sitou wuassu papate. Wuṛru ana waugu Itou matuṛṛuta Mawu Ruata ringannu napene ng addatta, ne Itou niringirṛana. ⁸Mawu Yesus uddewe Ana'u Mawu Ruata, arawe sa-laiwe aroddi, Itou mattingkaola'a matuṛṛuta sulaḷummu asasusa-Ne. ⁹Ne

napawe Itou niola'a mananałamatta apan nasuungnga, Itou naola'a punnu asalałamatta saran małannu-łannu hunane su anambo n taumata apan matuřruta Sitou, ¹⁰wuřru Mawu Ruata lai napaalıatta'i Tou naola'a sangkatou Imam Wahewa, ere Imam Melkisedek!

Iapaanaungnga

¹¹Su ola'u a'iannu Mawu Yesus ere sangkatou Imam Wahewa, manambo apan iapaasingkati ami siamiu, arawe masahadda manala'a n udde, ana waugu iamiu małiwue atonna massunna. ¹²Su řinone nia'omante tempone siamiu maola'a huru, arawe wutte'e iamiu ta'e wotonge pangurumma lai su taumata waine su ola'u alařra'a paarorone wuassu alařra'u Mawu Ruata. Iamiu taambe maasengkamma anna apan maattika; iamiu tumba'u wotongnge ma'inumma susu. ¹³Taumata apan ta'e ma'inumma susu, atappasanne itou ta'e ana'a wakku niasungkanga; itou taambe asingkatta su ola'u apa apan nařřino wuřru apa apan nassała. ¹⁴Anna apan maattika udde wuattu taumata timmade ana waugu asingkane, wotongngete mařřingidda suapa mapia wuřru suapa apan laleo.

6 Ana waugu udde, wette iite mangasałate manassu manga alařra'a sansunne, su ola'u alařra'a mattanggařřanna su taumata n Sařřani, wuřru arie tumba'u mařřingiddu manga alařra'u agama ng kite paarorone. Arie iite manułe apia pinangianannu alařra'a manungku taumata řinone mangilloło ma'ola'a manga inolaanna apan tawe gu-nane wuřru řinone mangngimanna Mawu Ruata, ²ara'e pinangianannu alařra'a su ola'u pananařřani ara'e mangaddo n lima su wowo n taumata, ara'e su ola'u mabbiakka apia napawe suete nate, ara'e řuumanna saran małannu-łannu. ³Wette iite, amungkangu Mawu Ruata mamala, mattu-ddate n alařra'a apan manansuna!

⁴Ana waugu, manga taumata apan suete nassinaadu Mawu Ruata, tate wotongnge ařřaanna apia. Imangitou dorone sulałumpe n asase-makka wuassu Mawu Ruata, wuřru suete naatemma aonggolu Mawu. Imangitou lai suete niintařřoannu Ghařřaho Mawu Ruata. ⁵Imangitou masingkata wuassu ola'u pabbiařřani mangitou manungku wisara Mawu Ruata udde mapia, wuřru imangitou suete naapendama manga alałamatta apan napene n tařřino wuassu tempo apan sarun rumanta. ⁶Arawe wua udde imangitou nassinaadu Mawu! Apa wotongnge mangařra'a simangitou apia mawału wuassu manga rosa mangitou. Ana waugu imangitou tantałanna mangngarussa n Ana'u Mawu Ruata apia wuřru mang-gałusa'a Sitou su saruannu awadaalla.

⁷Leta'a apan mangngirrupa ua'e ng kuranna apan masokka manawo su leta'a udde, see tinuwoante manga sasuanne apan mahuna su tau-mata apan mamamadduljine, leta'a udde nialamatannu Mawu Ruata. ⁸Arawe amungkangu leta'a udde tatuwoannu manga akke wufru sa-suanna roaanna, ne leta'a udde tawe gunane wufru sarun wontohannu Mawu Ruata wufru panginsueanne tutunganna ma'oma n sara masue.

⁹Arawe manga turrangnga apan arangnguanna, salaiwe iami mabbisara aroddi, arawe iami mangngimanna su ola'i amiu. Iami mangngimanna manungku iamiu suete nanengkamma manga inolaanna apan lembon mapia, eteudde manga alamatta apan maola'a sambau wage-angnga wuassu asalamannu. ¹⁰Mawu Ruata waljine Mawu Ruata tawe matuljida. Itou tawe maabulj apa apan mammanaranni amiu Sitou; wufru darangngu apan niapaasilo ng kamiu Sitou su tempo nantulungu manga turanga apan pangangimanna sambau, dorone wufru sara orassa indi. ¹¹Iami maapulu taasulunge tadea'u iamiu sangkatou-sangkatou marimadda saran panginsueanne, ma'oma n sara iamiu manengkamma apa apan aantimanni amiu udde. ¹²Iami maddiri iamiu mabbalj wolo'a. Arawe iami maapulu tadea'u iamiu mabbia akka ere manga taumata apan mannengkama apa apan suete pina'ire Mawu Ruata, ana waugu mangngimanna Sitou wufru ana waugu uararaddo ringannu asabare.

Paaire Mawu Ruata tawe wotonge mawaļu

¹³Su tempo Mawu Ruata na'ire si Abraham, Itou nassalu manungku Itou sarun mapaatipussu apa apan suete pina'ire-Ne. Wufru ana waugu tawedu mattanggaranne wuassu Mawu Ruata, ne Itou nassalu ringannu aran-Ne sassane. ¹⁴Itou nabbisara, "Ia'u ma'ire sarun mangalamatta si'o wufru ma'ola'a pabbawalagu mabbalj manambo," ¹⁵Abraham uaraddo ringannu sabare, ne itou nanengkamma apa apan pina'ire Mawu Ruata sitou. ¹⁶Amungkangu manga taumata massalu, itou massalu ringannu arannu taumata waine apan mattanggarana wuassi tou, ne sasalu udde mangudusu alawo'u pattatiakka. ¹⁷Mawu Ruata maapulu manualaga su manga taumata apan manengkamma paaire-Ne, manungku Itou tawe mamaļu riin-Ne. Ana waugu udde Itou nanamba sasalu su paaire-Ne udde. ¹⁸Darua inolaanna udde apan tawe wotonge mawaļu: Mawu Ruata tawe mangawusu su ola'u paaire wufru sasalu-Ne. Ana waugu udde, iite apan uasirungke ringannu Mawu Ruata, nionggolannu sasasa apan matohassa ipangagassa antimma apan uawilatta su saruanni ite. ¹⁹Antimmi ite udde ere walango apan ualabinga malaļumma wufru maola'a sambau pangangaleanna apan matohassa wufru tawe

singkalone su pabbiarrani ite. Antimma udde nallapasa su laḷindumu Wabbo'a Lembon Susi su Waḷe Mawu su surga. ²⁰Mawu Yesus suete namu'a laḷanna watukku tampa udde siite, wuṛru suete sinumutta poiaroddi naola'a Imam Wahewa ng kite sara maḷannu-ḷannu, ere Imam Melkisedek.

Imam Melkisedek

7 Melkisedek indi eteudde sangkatou ratu wuassu Salem wuṛru imam wuassu Mawu Ruata Lembon Atangaranne. Su tempo Abraham nawelengnga wuassu pangalo napaarugi manga ratu, Melkisedek nirumanta nanaḷoho sitou wuṛru nangaḷamatta. ²Ne Abraham nangoggola si Melkisedek sambau wuassu mapuḷo apan niaarḷo n tou. (Aranna Melkisedek atappasanne, paarorone, "Ratu n Atatulidda"; pia atappasanne lai "Ratu m Paddarame".) ³Su ola'i Melkisedek indi tawe taḷaane suapa-suapa manungku itou pia hagurangnga ara'e iupungnga; tawe lai taḷaane su ola'u niasungkanganne ara'e papatene. Itou nassuḷunga ere Ana'u Mawu Ruata; itou udde imam saran maḷannu-ḷannu.

⁴Nariaddi, iite isindi maasilo aroddi ahewalle Melkisedek indi; itou aroddi ahewalle na'oma n sara Abraham, iamangngu aḷamona ng kite, nangoggola sitou sambau wuassu mapuḷo aḷawo'u ina'uḷe wuassu pangalo udde. ⁵Sulaḷummu tita n agama Yahudi tinantuna manungku manga imam papapulunni Lewi ṛinone manganu sambau wuassu mapuḷo addapatu taumata n Israel, eteudde manga tuṛrangḷi mangitou sassane, salaiwe imangitou suadio'a papapulunni Abraham. ⁶Melkisedek waḷinewe papapulunni Lewi, arawe itou nanengkamma lai sambau wuassu mapuḷo asombangi Abraham, wuṛru nangaḷamatta lai si Abraham apan suete lai nanengkamma manga paaire Mawu Ruata. ⁷Atonna tawe wotongnge iapaasaḷa manungku taumata apan niaḷamatanna mabbawoanna wuassu taumata apan nangaḷamatta sitou. ⁸Manga imam apan nanengkamma darorongnga sambau wuassu mapuḷo wageangnge udde, eteudde taumata apan wotongnge mate. Arawe tumuṛruttu Wuke Susi, Melkisedek apan nanengkamma aonggola sambau wuassu mapuḷo udde, eteudde taumata apan sidutu wiakka. ⁹Wotongnge iwisara, manungku Lewi - apan papapulunne nanengkamma samhau wuassu mapuḷo asombangu pabbawalagu Israel - namaekka lai wageangnge udde si Abraham, su tempo Abraham namaekka si Melkisedek. ¹⁰Salaiwe Lewi taambe niasungkanga, arawe wotongnge iwisara itou sulaḷumpe m wadangngi Abraham iupungnga aḷamonane, su tempo Melkisedek nassomba n Abraham.

¹¹Su aḷungngu piaṛra'u manga Imam Lewi, tita n agama Yahudi nionggolla su taumata n Israel. Ana waugu manga Imam Lewi dorone udde tawe maaola'a ringannu masuungnga apa apan mammanaranne,



Imammu Lewi (7:11)

ne řinone pia imam waine, eteudde apan ere Imam Melkisedek, wuřru wařine lai wuassu wageangngu Imam Harun! ¹²Ne amungkangu a'iannu manga imam nawalu, tita n agama Yahudi řinone mawalu lai. ¹³Apan ipappandumme isindi eteudde Mawu ng kite; Itou wuassu pabbawalaga waine, wuřru taambe saran paassa wuassu pabbawalage nammanara ere sangkatou imam. ¹⁴Anambo n taumata masingkata manungku Mawu ng kite niarantanne wuassu pabbawalagi Yehuda; wuřru Musa tawe saram paassa nanaggo m pabbawalaga udde su tempo itou mabbisara su ola'u manga imam.

Sangkatou imam waine ere Melkisedek

¹⁵Olangnge apan iwabbisara indi naola'a lembon matualaga lai, ringannu daranta n sangkatou imam waine ere Melkisedek. ¹⁶Itou nite-nega naola'a imam, wařine ana waugu manga atorannu taumata, arawe wuassu wiakke apan natatařrino wuřru tawe panginsueanne. ¹⁷Ana waugu sulařummu Wuke Susi niwisara, "To ewe'e sangkatou imam saran mařannu-řannu ere Imam Melkisedek." ¹⁸Nariaddi, orassa indi atoranna apan tabbe tate saileanna, ana waugu lomete wuřru tate gunane. ¹⁹Tita

n agama Yahudi tawe maaola'a sambau inolaanna apan masuungnga. Ana waugu udde iite orassa indi nionngolannu pangangantima lembon apianne; ringannu aroddi iite wotongnge mangundani Mawu Ruata.

²⁰See lai, sarangkanambone udde lapiddu ringannu sasalu wuassu Mawu Ruata. Tawe sassalu ere udde su tempo manga imam waine nitenega. ²¹Arawe Mawu Yesus nitenega maola'a imam, nappaattu sasalu, su tempo Mawu Ruata nabbisara Sitou,

"Mawu suete nassalu,

wurru Itou sarun tawe mamaļu ringidde,

'Ete I'o imam saran maļannu-ļannu.'"

²²Ringannu udde lai Mawu Yesus naola'a watarru su sambau paaire apan lembon apianne.

²³Pia lai hatto sambau: manga imam apan waine udde manambo, ana waugu imangitou sangkatou-sangkatou natete, na'oma n sara tate naasassu manarane. ²⁴Arawe Mawu Yesus mabbiakka saran maļannu-ļannu, nariaddi wuassu manarane ere sangkatou imam, tawe na'ingkata su taumata waine. ²⁵Ana waugu udde saran maļannu-ļannu Mawu Yesus wotongnge manalamatta manga taumata apan nirumanta ringannu Mawu Ruata sulaļummi Tou, ana waugu Itou mabbiakka saran maļannu-ļannu ipangapiddu sasaļande su Mawu Ruata, hunane su manga taumata udde.

²⁶Nariaddi, Mawu Yesus eteudde Imam Wahewa apan pappandu-manni ite. Itou susi; Sitou tawe niasombanganna pasasaļa ara'e rosa sara ng kadio'a. Itou nirrae wuassu manga taumata marosa, wurru niru-itta su tampa lembon atanggarranne wuassu aļawo'u langitta. ²⁷Itou tawe ere manga imam wahewa waine, apan miallo-miallo rinone mangapiddu sasamba ana waugu manga rosane sassane rorone, wua udde ana waugu rosa m pabbawalaga. Mawu Yesus nangapiddu sasamba tumba'u paassa ma'oma n sara maļannu-ļannu, su tempo Itou nattingkaola'u wadang-Nge sassane naola'a sambau sasamba. ²⁸Tita n agama Yahudi mappaatenegu taumata apan tawe nasuungnga maola'a imam wahewa. Arawe wuassu tita udde, Mawu Ruata na'ola'a paaire ringannu sasalu manungku Itou mapaaatenega maola'a sangkatou Imam Wahewa, Ana'a apan suete niola'a Ratu m Punnu Saļamatta apan nasuungnga saran maļannu-ļannu.

Mawu Yesus Imam Wahewa ng kite

8 Punnu anambo n hatto indi eteudde: Iite uatahuanna Imam Wahewa apan ereudde, apan ua'ianna mamarenta su sambau ringannu Mawu Ruata Lembon Ahebaļanne su surga. ²Itou manarane

naola'a sangkatou Imam Wahewa su Wabbo'a Lembon Susi, eteudde su-
laɽummu rasannu Mawu apan tutune, apan niapararisikku Mawu, waɽine
niapararisikku taumata.

³Aɽawo'u imam wahewa nitenega iapa'onggolu sasamba ara'e aong-
gola su Mawu Ruata. Aroddi lai Imam Wahewa ng kite; Itou ɽinone
pia dorotongnga olaanna sasamba. ⁴Unnu wisara Itou uatana'a su runia
indi, Itou tawe maola'a imam, ana waugu plate imam apan mangapi-
ddu sasamba radoronganna sulaɽummu tita n agama Yahudi. ⁵Manara
apan a'olaanni mangitou ere sangkatou imam udde, tumba'u sambau
hambaranna ara'e lintau wuassu apa apan su surga. Udde suete niapaa-
singkatu Mawu Ruata si Musa rorone, su tempo Musa maapulu ma-
pararisikku Rasannu Mawu. Mawu Ruata nabbisara arendi si Musa,
"Naunge! Sarangkanambone udde ɽinone olaannu tumuɽɽuttu tuɽadane
apan niapaasilo si'o raso su wowone." ⁶Arawe orassa indi Mawu Yesus
naasomba manara imam apan lembon awantuhanne wuassu apan nim-
manara manga imam udde. Ana waugu paaire apan niola'a su wallatu
Mawu Ruata wuɽɽu taumata, eteudde paaire apan lembon apianne ana
waugu pinangianannu paaire hunane su manga inolaanna apan lembon
apiianne.

⁷Unnu wisara tawe auranganne paaire apan paarorone, ne salaiwe
ɽasa'e ma'ola'a paaire aruane. ⁸Arawe Mawu Ruata suete naasomba
pasasaɽa su pabbawalage, na'oma n sara Mawu Ruata nabbisara,

"Naunge, sarun rumanta tempone,

Ia'u sarun makkiinnu paaire apan wakku su pabbawalagu Israel,
wuɽɽu su pabbawalagu Yehuda.

⁹Waɽine ere paaire apan niola'u Mawu Ruata su iupungngu aɽamona
mangitou

su tempo Ia'u mangngehetta simangitou sumabangnga wuassu
leta'u Mesir.

Imangitou maɽawangnga su paaire apan suete Ta'u niola'a ringanni
mangitou;

ana waugu udde Ia'u tate mappanduma simangitou.

¹⁰Arawe orassa indi, ete indi paaire apan sarun olaangu su
pabbawalagu Israel

su miallo-miallo apan sarun rumanta unnu Mawu:

Ia'u sarun mantarɽo n tita-U sulaɽummu ɽingirɽanni mangitou
wuɽɽu iworɽeta su naungngi mangitou.

Ia'u sarun maola'a Mawu Ruata mangitou,
wuɽɽu imangitou sarun maola'a pabbawala-U.

¹¹Imangitou salaiwe ɽasa'e mangarɽa'a hawene laɽorɽo n soa,
ara'e mamasingkata tuɽrangnge,
'Illaɽaite Mawu,'

Ana waugu imangitou sarangkanambone, timmade, dario'a,
sarun maa'illaḷa Sia'u.

¹²Ia'u sarun mangampunga manga pasasaḷa mangitou,
wuṛṛu tate lai mannaungnga manga rosa mangitou."

¹³Ringannu napaasingkattu sambau paaire wakku, Mawu Ruata na'ola'a
paaire apan paarorone udde natabbete wuṛṛu naḷaḷeote, wuṛṛu apa apan
tabbete sarun maḷihakke mawuḷi.

Ola'u pasasubba su runia wuṛṛu ola'u pasasubba su surga

9 Paaire apan paarorone pia manga atorannu patataṛṛamawu, wuṛṛu
pia lai tampa patataṛṛamawuanna niola'u taumata. ²Sambau rasanna
niapararisikka, apan wageangnge su saruanne nisaggo Wabbo'a Susi.
Isudde pia aianannu soḷo, wuṛṛu pia lai medda ringannu roti apan
ipasubba Mawu Ruata. ³Su wageangu laḷumme, eteudde su liuddu
pampele aruane, pia wabbo'a apan isassago Wabbo'a Lembon Susi.
⁴Sulaḷummu wabbo'a udde pia medda pangangadoannu sasamba apan
niola'a wuassu wuḷawanna panutunganna dupa, wuṛṛu pia lai Wan-
talu Paaire apan sarangkahewalle papi'unannu wuḷawanna. Sulaḷummu
wantala udde pia urinna wuḷawanna laḷorṛoannu manna, ta'inni Harun
apan nassollate, wuṛṛu rua ng kuḷappa watu pamamorretanna apan su
wowone waworretannu mapuḷo tita n Mawu Ruata. ⁵Su wowo m wan-
tala udde pia darua mala'ekatta, eteudde riadianna pia papaidde apan
mammasingkata manungku Mawu Ruata uatana'a isudde lai. Papai-
ddu mala'ekatta darua udde uasiappakka su wowo n laḷuubu Wantala,
eteudde tampa m pangangampunganna rosa. Arawe sarangkanambone
udde tawe iataḷa'a orassa indi sambau-sambau.

⁶Aroddite sarangkanambone niatokka. Miallo-miallo manga imam
sussutta sulaḷummu wageangngu saruannu rasanna udde mappaamattu
manara mangitou. ⁷Apan sussutta su wageangnge laḷumme su rasanna
udde tumba'u imam wahewa. Itou mammanara udde tumbau santonna
paassa. Udde mammanaranne ringannu mangngapiddu ṛaṛra ipassubba
Mawu Ruata ana waugu watanganne sassane wuṛṛu ana waugu manga
rosa apan niola'u pabbawalage su liuddu ringiranne. ⁸Ringannu ato-
ranna udde, Ghaṛraho Mawu Ruata napaalḷatta'a ringanu masemakka,
manungku tantaḷanna rasanna su saruanne udde ta'e uarisikka, laḷanna
suttanna watukku Wabbo'a Lembon Susi udde taambe mawu'a. ⁹Indi
maola'a hambarannu orassa indi: atappasanne manungku manga sa-
samba wuṛṛu manga aonggola winatangnga apan nionggolla su Mawu
Ruata, tawe maasuungngu laḷummu naungngu taumata apan mang-

ngapiddu aonggola udde. ¹⁰Ana waugu manga laḷaghu udde tumba'u matatarrino su anna, inumanna, wuṛṛu aḷawo'u laḷaghu m pamamaresi. Sarangkanambone udde tumba'u atorannu wadanga apan tumba'u ma'oma n sara tempone Mawu Ruata mallimbakku.

¹¹Arawe Kristus suete nirumanta ere sangkatou Imam Wahewa wuassu inolaanna apan mapia wuṛṛu piate. Su Rasannu Mawu suapa Itou mappaaamattu manarane ere sangkatou Imam Wahewa eteudde rasanna apan lembon mawantuga wuṛṛu lembon nasuungnga. Udde tawe niola'u taumata; atappasanne waḷine niarantanne wuassu runia apan niriaddi indi. ¹²Mawu Yesus sinumutta su Wabbo'a Lembon Susi sulaḷummu rasanna udde tumba'u paassa ma'oma n sara maḷannu-lannu. Su tempo udde Itou tawe nangapiddu ṛaṛṛa ng kaminga esakka ara'e ṛaṛṛa n ana'u sapi olaanna sassamba; Itou nangapiddu ṛaṛṛa n Tou sassane, wuṛṛu ringannu udde Itou nanubusa rosa ng kite saran maḷannu-lannu. ¹³Ṛaṛṛa ng kaminga wuṛṛu sapi esakka wuṛṛu awu n sassamba ana'u sapi, nipaatta ipammokka manga taumata apan laḷeo tumuṛṛuttu atorannu agama tadea'u imangitou mawaresi. Ne, amungkangu ṛaṛṛa wuṛṛu awu udde wotongnge maawaresi aḷaḷeo manga taumata udde, ¹⁴nangilembote lai ṛaṛṛa n Kristus! Sulaḷummu Ghaṛṛaho awasa, Kristus nanantillu watangan-Ne sassane su Mawu Ruata maola'a sambau sassamba apan nasuungnga. Ṛaṛṛa-Ne mammaresi laḷummu naungngi ite wuassu laḷaghu n agama apan tawe gunane, tadea'u iite wotongnge maapangimbe Mawu Ruata apan wiakka.

¹⁵Ana waugu udde Kristus naola'a Paḷelene su sambau paaire apan wakku, tadea'u taumata apan suete niwagoannu Mawu Ruata wotongnge manengkamima manga aḷamatta awasa apan suete pina'ire Mawu Ruata. Sarangkanambone udde wotongnge mariaddi ana waugu piateddu nate, eteudde Kristus; wuṛṛu papate-Ne udde namallosu manga taumata wuassu manga pasasaḷa apan niola'i mangitou su tempo paaire paarorone ta'e ipappaatta.

¹⁶Amungkangu pia suratta pussa'a, ṛinone lai pia tatialane manungku taumata apan na'ola'a suratta udde natete. ¹⁷Ana waugu suratta pussa'a tawe iapaatta tantaḷanna taumata apan na'ola'a suratta udde ta'e wiakka. Suratta udde wotongnge ipaatta tumba'u napawe taumata udde natete. ¹⁸Ana waugu udde paaire paarorone lai ṛinone tohassannu ṛaṛṛa. ¹⁹Paarorone atonna Musa namasingkatu anambo n tita n Mawu Ruata su pabbawalagu Israel. Wua udde Musa nanganu ṛaṛṛa n ana'u sapi wuṛṛu ṛaṛṛa ng kaminga esakka, see nillo'annu ua'e, wua udde nialassa su Wuke Manga Tita n Mawu Ruata wuṛṛu su anambo n pabbawalagu Israel ringannu nappaattu nannaḷo hisop wuṛṛu wambuḷu n domba lihidde ere ate. ²⁰Lapiddu ma'ola'a udde Musa nabbisara, "Ete indi ṛaṛṛa apan mannohassa paaire wuassu Mawu Ruata apan ṛinone

turritanni amiu.” ²¹Wua udde ringannu inolaanna apan uasulungnga, Musa nanebboku řarra udde lai su Rasannu Mawu wuřru su aławo’u sarannapa m patatařramawuanna. ²²Atonna tumuřrutu tita n agama Yahudi, aławo’u sarannapa a’ukkasannu řarra; wuřru rosa tumba’u wotongnge aampunganna ringannu mapaaturu n řarra.

Sasamba n Kristus namappasa rosa

²³Ringannu olangnge ereudde manga sarannapa apan mammasilo manga inolaanna su surga, řinone ukkasanna. Arawe su manga inolaanna su surga udde sassane raddeaanna sasamba apan lembon apianne. ²⁴Ana waugu Kristus tawe sinumutta su Wabbo’a Susi inolaannu taumata, apan tumba’u hambarannu Wabbo’a Susi apan řinone. Mawu Yesu sinumutta sassane su surga; poiarddi orassa indi Itou uasaruanna Mawu Ruata hunane siite. ²⁵Imam wahewa n Yahudi suapan tonna sussutta watukku Wabbo’a Lembon Susi sulařummu Waře Mawu ringannu uaapiddu řarra n sambau winatangnga. Arawe Kristus tawe sinumutta manantillu watangan-Ne masokka-sokka. ²⁶Ana waugu amung-



Imam Wahewalla su Tapa Apan Lembon Na’ukkassa (9:25)

kangu aroddi, udde atappasanne Itou masokkate matatařřanga ro’e n runia indi niriaddi. Arawe wutte’e, orassa indi su tempo apan panginsueanne indi, Itou nirumanta tumba’u paassa mamappasa rosa ringannu nanantillu wadang-Nge sassane. ²⁷Mawu Ruata suete nanantuna manungku taumata mate tumba’u paassa wuřru wua udde parikisannu Mawu Ruata. ²⁸Aroddi lai Kristus tumba’u paassa tinantilla maola’a sasamba ipanubussa rosa n anambo n taumata. Itou sarun rumanta apia su aruane, wařine manginsue hatto m paddarosa, arawe manalamatta manga taumata apan uarařřaddo daranta-Ne.

10 Tita n agama Yahudi tumba'u mangngonggolu hambaranne apan maḷabbuka su ola'u manga inolaanna mapia apan sarun ru-manta, wuṛṛu waḷine hambaranna apan su ṛinone wuassu manga ino-laanna udde. Tawe mariaddi tita udde wotongnge mapaasuunggu tau-mata apan rudanta massubba Mawu Ruata ringannu uaapiddu sasamba, salaiwe suapan tonna mannantilu manga sasamba apan uasulungnga. ²Unnu wisara, manga taumata apan massubba Mawu Ruata udde atonna-tonna suete niwaresi wuassu rosa, imangitou tate lai pia naung-nga uapendama rosa, wuṛṛu sasamba tate lai itantila. ³Arawe wutte'e manga sasamba apan tinantilla suapan tonna udde, ewe'e mappanaung-nga su taumata su ola'u manga rosa mangitou, ⁴ana waugu atonna ṛaṛṛa n sapi wuṛṛu ṛaṛṛa ng kaminga esakka tawe maatubusa rosa.

⁵Ana waugu udde su tempo Kristus sinumutta su runia, Itou nabbisara su Mawu Ruata,

'I'o tawe maapulu n aonggola wuṛṛu sasamba;
arawe I'o suete nanaddia wadanga, Sia'u.

⁶I'o maddiri n sasamba tattutungana
ara'e sassamba ipanubbusa rosa.

⁷See Ia'u nabbisara, 'Ete indi Ia'u, oh Mawu Ruata!

Ia'u nirumanta tadea'u tumuṛṛutta apulu-Nu,
ere uawoṛṛetta su ola'u riri-U sulaḷummu Wuke Susi.'

⁸Paarorone Kristus nabbisara, "I'o tawe mappandumma aonggola wuṛṛu sassamba; I'o maddiri n sasamba wuassu winatanga apan iatambuna maola'a aonggola wuṛṛu sasamba ipanubbusa rosa." Kristus nabbisara aroddi, salaiwe aḷawo'u sasamba udde nionggolla tumuṛṛuttu tita n agama Yahudi. ⁹Wua udde Kristus nabbisara, "Ete indi Ia'u, oh Mawu Ruata! Ia'u nirumanta tadea'u tumuṛṛutta apulu-Nu." Nariaddi Mawu Ruata namappasa aḷawo'u sasamba apan tabbe udde, wuṛṛu nihantiannu sassamba n Kristus. ¹⁰Yesus Kristus suete tinumuṛṛuta apa apan ipaapulu Mawu Ruata wuṛṛu nanantillu watanganne maola'a sassamba. Ringannu sasamba udde, apan niolangnge tumba'u paassa ma'oma n sara maḷannu-ḷannu, iite sarangkanambone niwaresi wuassu rosa.

¹¹Suapan imam taumata n Yahudi mappaamattu manarane ere sangkatou imam su miallo-miallo, wuṛṛu masokka itou mangonggolu sasamba uasulungnga. Arawe manga sasamba udde atonna-tonna tawe maatubbusa rosa. ¹²Arawe Kristus tumba'u nangonggolu sambau sasamba ipanubbusa rosa, wuṛṛu sasamba udde ipappaatta saran maḷannu-ḷannu. Napawe suete nanantillu sasamba udde, Kristus inuma'ianna su uanannu Mawu Ruata wuṛṛu mamarenta suadio'a ringanni Tou. ¹³Wuṛṛu orassa indi Kristus uaṛṛado ma'oma n sara Mawu Ruata ma'ola'a manga seenne massuṛṛubawa Sitou. ¹⁴Nariaddi ringannu sa-

samba sambau, Kristus napaasuungngu manga taumata apan suete niwaresi wuassu rosa.

¹⁵Su olangnge udde Gharraho Mawu Ruata nangonggolu lai tatialane siite. Gharraho Mawu Ruata mabbisara,

¹⁶’Ete indi paaire apan sarun olaang-Ku ringanni mangitou

miallo-miallo apan sarun rumanta’, unnu wisara Mawu,

’Ia’u sarun mantarro n tita-U sula lummu naungngi mangitou,

wurru mamorrettu tita udde su la lummu ringiranni mangitou.’”

¹⁷Mawu Ruata nabbisara lai, ”Ia’u tate mannaungnga manga rosa wurru manga alaleo mangitou.” ¹⁸Nariaddi, manga rosa wurru manga alaleo udde suete niampunganna, ne lasa’e lai mangonggolu sasamba ipangampungna rosa.

Wette iite mangundani Mawu Ruata

¹⁹Ne, Manga turangnga, ana waugu papate Mawu Yesus udde iite orassa indi warrani sumutta su Wabbo’a Lembon Susi. ²⁰Mawu Yesus suete namu’a sambau la’anna apan wakku siite, eteudde la’anna apan mangngonggolu pabbawiakka. La’anna udde sumabbi passaranne eteudde Kristus sassane. ²¹Wurru iite orassa indi uatahuanna sangkatou imam wahewalla, apan uariagga Wa’e Mawu Ruata. ²²Ana waugu udde, wette iite mangundani Mawu Ruata ringannu naungnga matulida wurru pangangimanna apan matohassa; ringannu naungnga apan suete niukassa wuassu apendamma apan sa’a, wurru ringannu wadangnga apan suete niukkassu ua’e waresi. ²³Rinone iite uaagasa atonna su antima apan pangimananni ite, ana waugu Mawu Ruata wotongnge apangimananna wurru Itou sarun manuungngu paaire-Ne. ²⁴Wurru rinone iite ua’aellega sandingananna, tadea’u iite wotongnge uasasasa mandangngu sansulungnga wurru ma’ola’a manga inolaanna apan mapia. ²⁵Rinone iite sidutu maammula suadio’a, wurru imbarranga wolo’a ere taumata waine. Iite rinone lembon maturruta uatatohassa, ana waugu iite masingkata manungku tate malannu lai Mawu sarun rumanta.

²⁶Ana waugu amungkangu watti’a apan atonna wuassu Mawu Ruata suete niapassingkata siite, arawe iite sidutu ma’ola’a rosa ringannu apulu naungnga, ne tate lai sasamba ipamappasa rosa ng kite. ²⁷Tumba’u sambau apan plate siite eteudde sumaruanna pamamarikisannu Mawu Ruata ringannu putungngu asasa’une apan sarun manutungnga ma’oma n sara masue manga taumata apan lullawangnga Sitou! ²⁸Taumata apan tawe tumurrutta tita apan suete nionggoli Musa, irruumanna mate ringannu tawe ampungnge, amungkangu pia sakassi darua ara’e sire tallu, itou niatialante nassala. ²⁹Aroddi awakkane ruumanna apan iong-

gola su taumata apan marinda Ana'u Mawu Ruata. Taumata udde mangngadio'a rarra m paaire Mawu Ruata, eteudde papate n Kristus apan namaresi sitou wuassu rosa. Itou mangngadio'a Gharraho apan mangngonggolu alamatta. ³⁰Iite masingkata isai Itou apan nabbisara, "Ia'u sarun mabbalissa! Ia'u sarun makkuumanna!" wuɽɽu lai nabbisara, "Mawu sarun makkuungngu alarɽanang-Nge." ³¹Asasusa eteapa amungkangu manawo su lima Mawu Ruata Apan Wiakka!

³²Naungete ereapa ola'u manga turɽanga su tempo naɽiu. Su tempo udde, napawe semakku Mawu Ruata nilumansiangnga si'o, iamiu anamboanne uatatarɽanga, arawe iamiu sidutu mammanara ringannu marɽimada. ³³Pattarɽa assa iamiu aaɽuandahanna wuɽɽu a'olaanna tawe aregane su saruannu awadaalla. Pattarɽa assa lai iamiu uatatarɽanga ringanni mangitou apan a'olaanna aroddi, ³⁴wuɽɽu iamiu lai mammen-dama su sambau, asasusa n taumata apan su tuttuɽanna. Wuɽɽu su tempo manga alaɽo'a apan tatahuananni amiu arɽoanna, iamiu na-nengkamma udde ringannu naungnga maɽuassa, ana waugu iamiu masingkata manungku iamiu ta'e uatahuanna sambau apan lembon mapia, apan matarɽanga saran maɽannu-lannu. ³⁵Ana waugu udde, arie naungnga maadio'a, ana waugu amungkangu iamiu sidutu mangngimanna, ne pia laɽantakke apan wahewalla su inolaannu udde! ³⁶Iamiu ɽinone masabare, tadea'u iamiu wotongnge mapa'ola'a apulu Mawu Ruata wuɽɽu ringannu aroddi iamiu manengkamma apa apan suete nipa'ire n Tou.

³⁷Ana waugu sulaɽummu Wuke Susi uarorɽetta,

"Ete taɽa ng kadio'a lai,
ne Itou apan sarun rumanta udde,
sarun rumanta ringannu maɽihakka;
Itou sarun tawe mangaddo maɽannu daranta-Ne.

³⁸Wuɽɽu pabbawala'u apan narɽino sarun mangngimanna wuɽɽu mabbiakka;

arawe amungkangu pia wuassu wallatti mangitou apan sussorɽota
ne Ia'u tawe maɽuassa sitou."

³⁹Iite indi waɽinewe pabbawalaga apan sussorɽota wuɽɽu u'aliwu. Arawe iite uddewe pabbawalaga apan mangngimanna Mawu Ruata wuɽɽu apan iapaasaɽamatta.

Pangangimanna

11 Pangangimanna eteudde mangngimanna atonna-tonna su manga apa apan aantimanna, atappasanne pia pangangantima su apa apan tawe asiloanna. ²Ana waugu pangangimanna, ne manga taumata su tempo naɽiu iaalaɽuassu Mawu Ruata.

³Ana waugu mangngimanna, ne iite maasunna manungku runia indi niola'u rengetannu Mawu Ruata; nariaddi, apa apan aasiloonna, niola'a wuassu apa apan tawe iasilo.

⁴Ana waugu mangngimanna, ne Habel nangonggolu sasamba apan apianne su Mawu Ruata wuassu aonggoli Kain. Ana waugu pangangimanne udde, Habel tinarimmatu Mawu Ruata naola'a sangkatou taumata apan mapia, ana waugu nilumiatta'e manungku Mawu Ruata nanengkamma aonggole. Habel natete, arawe ana waugu pangangimanne udde, ne itou ta'e uahahatto sara orassa indi.

⁵Ana waugu mangngimanna, ne Henokh tawe nate, ewe'e nasengkenga wuṛṛu niapiadda ringannu Mawu Ruata. Tawe saran sangkatou apan wotonge maisasomba n tou, ana waugu itou suete niapaasengkengu Mawu Ruata. Sulaḷummu Wuke Susi uaworretta manungku tantaḷanna Henokh taambe niapaasengkenga, itou maaḷuassa naungngu Mawu Ruata. ⁶Amungkangu tawe pangangimanna, tawe saran sangkatou apan wotongnge maaḷuassa naungngu Mawu Ruata. Ana waugu taumata apan rumanta ringannu Mawu Ruata rinone mangngimanna manungku pia Mawu Ruata, wuṛṛu manungku Mawu Ruata mangonggolu wawaḷinne su taumata apan maddea'a Sitou.

⁷Ana waugu mangngimanna, ne Nuh niapasingkatannu Mawu Ruata su ola'u apa apan sarun mariaddi su allo murine, apan tawe asiloanni tou. Nuh tinumurruta Mawu Ruata na'oma n sara itou nallanginnu apalla apan saḷimmurine niasingkatanna napanaḷamatta wadangnge wuṛṛu laḷorṛo m baḷene. Ringannu aroddi runia niṛruumanna, arawe Nuh sassane ana waugu pangangimanne niapaalḷiatta'u Mawu Ruata ere sangkatou taumata apan mapia.

⁸Ana waugu mangngimanna, ne Abraham tinumurruta Mawu Ruata su tempo Mawu Ruata namago sitou, wuṛṛu nandolokki tou inai wutukku wanua apan suete pina'ire Mawu Ruata sitou. See Abraham inaite ringannu awagananna suapa sarun patuddanni tou. ⁹Ringannu mangngimanna, Abraham natana'a ere sangkatou raho su leta'a apan suete pina'ire Mawu Ruata sitou udde. Abraham uatana'a isudde su rasanna. Aroddi lai Ishak wuṛṛu Yakub, apan nanengkamma paaire apan nassuḷungnga wuassu Mawu Ruata. ¹⁰Ana waugu Abraham tantaḷanna uaraḷḷaddo soa apan ilakki'inna wuṛṛu iaparisikku Mawu Ruata ringannu rapappake apan matohassa.

¹¹Ana waugu mangngimanna, ne Abraham wotongnge naasomba pabbawalaga wuassi Sara, salaiwe Abraham tumanite n timmade, wuṛṛu Sara lai sassane tinna. Abraham mangngimanna manungku Mawu Ruata sarun mapaatipussu paaire-Ne. ¹²Salaiwe Abraham su tempo udde ere taumata apan wadange natete, arawe itou naasomba pabbawa-

laga, apan anambone tawe iareengnga – ere anambo n anumpitanna su langitta wuṛṛu anne su winggi n apanne.

¹³Anambo n taumata udde sidutu mangngimanna ma'oma n sara mate. Imangitou tawe naasengkamma manga inolaanna apan pina'ire Mawu Ruata, arawe tumba'u ma'ellega wuṛṛu mannaḷoho wuassu marau. Wuṛṛu ringannu udde imangitou nabbalo manungku imangitou tumba'u taumata raho wuṛṛu mamamaḷintadu runia indi. ¹⁴Taumata apan nabbisara aroddi mapaaḷiatta'a ringannu masemakka, manungku imangitou tantaḷanna maddea'a wanua apan maola'a leta'a pussa'a atatanaanni mangitou. ¹⁵Waḷine wanua apan suete tinantangi mangitou udde apan sidutu irarṛingidi mangitou. Ana waugu amungkangu aroddi, ne manambote tempo simangitou ipabelengnga apia su wanua udde. ¹⁶Arawe nasemakke, manungku imangitou maapulu n sambau soa lembon mapia, eteudde Soa su surga. Ana waugu udde Mawu Ruata tawe masili amungkangu imangitou managone Mawu Ruata mangitou, ana waugu Mawu Ruata suete nanaddia sambau soa simangitou.

¹⁷Ana waugu mangngimanna lai, Abraham nanantilli Ishak maola'a sambau sasamba su tempo itou niannamannu Mawu Ruata. Ete tumba'u si Abraham Mawu Ruata nangonggolu paaire-Ne, arawe Abraham maapulu nanantillu anangnge apan man sambau udde. ¹⁸Mawu Ruata suete nabbisara si Abraham, "Wuassi Ishak indi, i'o sarun maasomba pabbawalaga apan pina'ire-U si'o." ¹⁹Abraham nangimanna manungku Mawu Ruata wotongnge mapaaḷiacki Ishak apia wuassu papate – nariaddi, wotongnge iwisara, manungku Abraham suete nanengkamma si Ishak apia wuassu papate.

²⁰Ana waugu mangngimanna, ne Ishak na'ire manga alaḡamatta si Yakub wuṛṛu si Esau su allo addantane.

²¹Ana waugu mangngimanna, tantaḷanna Yakub taambe nate, itou nangaḷamatta manga alaḡṛṛana'i Yusuf – ringannu uasandaka su pua n ta'inne wuṛṛu massubba Mawu Ruata.

²²Ana waugu mangngimanna, ne Yusuf – su tempo maranite n mate – nabbisara su ola'u sasabangu taumata n Israel wuassu Mesir, wuṛṛu nanantangu tanata, su ola'u winalaḷunanne rinone olaanna ereapa.

²³Ana waugu mangngimanna, ne haguranggi Musa namuni n tou alaḡṇnune tallu wuḷanna napawe itou niasungkanga. Imangitou na'ellega manungku itou sangkatou ana'a apan maḡṛamaga, wuṛṛu imangitou tawe matta'utta lumawangnga parenta n ratu.

²⁴Ana waugu mangngimanna, Musa napawe nahewalle, maddiri isago ana'u maḡṛuala n ratu Mesir. ²⁵Mappianne itou matataḡṛanga su sambau ringannu pabbawalagu Mawu Ruata wuassu itou mattemma alaḷuassa taḷa ng kadio'a mabbiakka su paddaros. ²⁶Musa mammen-dama manungku maareganne marau itou maasomba alaḷuandaga ana

waugu Ratu m Punnu Sałamatta apan pina'ire Mawu Ruata udde, wu-assu maasomba aławo'u darotongngu wanua n Mesir; ana waugu Musa uaantima lałantake su allo murine.

²⁷Ana waugu mangngimanna, ne Musa nanantangu Mesir ringannu tawe matta'utta su asasa'u n ratu. Musa niuamatta mattuda m pattudanne ere ola'u itou naasilote Mawu Ruata apan tawe asiloanna udde. ²⁸Ana waugu mangngimanna, ne Musa nallaghu m Paskah wurru namarenta tadea'u iwokka rarra su ngara wale n taumata n Israel taddea'u Mala'ekattu Papate tawe mamate ałarřana'a pahułu mangitou.

²⁹Ana waugu mangngimanna, ne manga taumata n Israel wotongnge tumumbe Tahałoangnga Marřamu, parřimaunnapa imangitou u'amatta su leta'a mamara, arawe manga taumata n Mesir niallupu tahałoangnga udde, su tempo imangitou maannamma tumumbe lai.

³⁰Ana waugu mangngimanna, manga taumata n Israel napaarřa'a manga darandungu Yerikho napawe imangitou namałiwutta sulałummu pitu allo ałannune. ³¹Ana waugu mangngimanna lai, ne Rahab, wawine masandaga udde, tawe niapate suadio'a ringannu manga taumata apan lullawangnga Mawu Ruata; ana waugu itou nanałoho ringannu masarřionto'a manga mallalinge n taumata n Israel.

³²Ne, ia'u wotongnge lai tawe illołone mabbisara, arawe orassa tawe natimu sia'u. Ana waugu ia'u lai taambe nanago n Gideon, Barak, Simson, Yefta, Daud, Samuel wurru manga nabi. ³³Ana waugu mangngimanna, ne imangitou suete napaarugi manga araratuanna. Imangitou ma'ola'a apa apan su řinone, na'oma n sara naasengkamma apa apan suete pina'ire Mawu Ruata. Imangitou nanggattumu manga mořrongu singa, ³⁴namaduma putungnga apan wahewalla, nałiu wuassu pappilitanu hałele. Imangitou lome, arawe nabbalı matohassa; imangitou masarřaungnga sulałummu pangalo na'oma n sara napaarugi manga tantara m pabbawalagu lumało'a. ³⁵Ana waugu mangngimanna, ne manga wawine naasomba apia manga taumatane apan natete.

Paiddu lai apan maapulu sansaranna ma'oma n sara mate, wurru maddirri ipallosa, ana waugu maapulu iapaawiakka apia su sambau ringannu pabbawiakka apan lembon mapia. ³⁶Piaddu lai aalaundahanna, pappułanna, niřrapussu řate wurru tinarřo su tuttupanna. ³⁷Imangitou tinuntungannu watu na'oma n sara nate, piaddu niponggo'u larřahari, wurru piaddu nipate n hałele. Imangitou lullallele ringannu laubba wuassu pisi n domba ara'e pisi ng kambia; imangitou asiangnga, pap-pateanna wurru sassansaranna. ³⁸Runia indi wałinewe tampa su řinone si mangitou. Imangitou lullallele su wadda'a wurru manga wuidda, see uatana'a sulałummu manga liangnga wurru sulałummu manga lorřangu leta'a.

³⁹Tumanite m wahewalla auntunganna apan niaobaannu anambo n taumata udde ana waugu pangangimanni mangitou! Arawe imangitou tawe maasengkamma apa apan suete pina'ire Mawu Ruata, ⁴⁰ana waugu Mawu Ruata pia pandumanna apan lembon apianne siite. Pandumanne eteudde manungku tumba'u uaaukka su sambau ringanni ite imangitou sarun masuungnga.

Mawu Ruata Iamangngi ite

12 Ne, su ola'i ite sassane, uapaaliwutta siite manambo atonna mattatiale! Ana waugu udde wette iite mandamme n anambo n apa apan mammakkata siite wuṛṛu rosa apan sidutu uareeta siite. Wuṛṛu wette iite ringannu ma'udduppa sumutta su pattalumanna apan sasaruannani ite. ²Rinone aellegi ite tuddane su Mawu Yesus, ana waugu ete Itou namangunna pangangimanni ite wuṛṛu nappaduḷi wuassu paarorone saran panginsueanne. Mawu Yesus natatarranga susa su alu arussa! Itou tawe mannaungnga manungku mate su alu arussa udde sambau inolaanna apan maasili. Itou tumba'u mannaungnga alaḷuassa apan sarun apendaman-Ne su allo murine. Orassa indi Itou ua'ianna su samba'a uanannu Mawu Ruata wuṛṛu mamarenta suadio'a ringanni Tou.

³Annama'a ringira'a ereapa asasusane Mawu Yesus sinumaruanna manga taumata marosa apan nilumawangnga Sitou aroddi alaṛṛage! Ana waugu udde arie maadio'a naungngu wuṛṛu mallone. ⁴Ana waugu sulalummu manaranu lullawangnga rosa, iamiu taambe saran paassa mammanara na'oma n sara napaaturo n ṛaṛṛa. ⁵Wuṛṛu imbarranga maabuḷi n tanata Mawu Ruata indi, apan nionggolla siamiu manga alaṛṛanang-Nge:

"Alaṛṛana'u, paatuturṛe paapia-pia alaṛṛa'u Mawu, wuṛṛu arie naungngu maadio'a amungkangu Itou masa'u si'o.

⁶Ana waugu Mawu mangarra'a manga taumata apan arangnguan-Ne, wuṛṛu Itou mammuulla manga taumata apan Itou suete nanga'u maola'a alaṛṛanang-Nge."

⁷Rinone iamiu manengkamma hahesekku Mawu Ruata maola'a sambau alaṛṛa'a wuassu sangkatou iamangnga. Ana waugu apa suete pia sangkatou ana'a tawe irṛuumannu iamangnge? ⁸Amungkangu iamiu tawe irṛuumanna ere alaṛṛanangnge waine indi, iamiu waline ana'a surriwa, ewe'e ana'a uata'a. ⁹Iite pia iamangnga su runia. Itou manggarra'a siite, wuṛṛu iite manggaddatta sitou. Ne, nangillembu su saruatinu Iamangngi ite su surga, natantuna iite lembon maturruta Sitou tadea'u iite wiakka. ¹⁰Hagurangngi ite su runia manggarra'a siite tumba'u su-

laɭummu tempo apan pia pattaalanne, tumurruttu apa apan su apendami mangitou mapia. Arawe Mawu Ruata manggarra'a siite hunane su apapia ng kite sassane, tadea'u iite wotongnge maola'a susi suadio'a ringanni Tou. ¹¹Atonna su tempo iite aarraanna, ruumanna udde tawe maaluassa naungngi ite, ewe'e tumba'u maasusa. Arawe maliu wua isudde, siite apan suete niarraanna, ruumanna udde ma'ola'a siite mabbiakka tutturuta apulu Mawu Ruata, wurru mangngonggolu apendamu paddarame siite.

Tatantiro wurru iapaanaungnga

¹²Ana waugu udde, tohasse limanu apan lome wurru wuunu apan mangngindo udde! ¹³Aamatte sidutu su laɭanna apan malaukka, tadea'u leddanu u'ento udde tawe maggalisa, ewe'e sarun mapia.

¹⁴Paddea'e ringannu wotongnge mabbiakka su paddarame ringannu anambo n taumata. Paddea'e lai see mabbiakka susi, tumba'u ringannu Mawu. Ana waugu tawe saran sangkatou wotongnge maasilo Mawu amungkangu itou tawe mabbiakka ereudde. ¹⁵Paariagai arie ma'oma n sara piaddu sangkatou apan sumabbanga wuassu ammulannu apapia naungngu Mawu Ruata, tadea'u tawe piaddu maola'a ere sasuanne apan pia pasangkade su pattangnganni amiu ma'oma n sara mandanta n asasusa wurru mandaleo anambo n taumata ringannu pasangkade. ¹⁶Paariagai tadea'u tawe piaddu mabbiakka sussandaga ara'e tawe mangadata inolaannu Gharraho, ere suete niola'i Esau. Itou nabbaɭu'u watanganne ere sangkatou ana'a pahulu, ana waugu tumba'u sanlama'a anna. ¹⁷Iamiu masingkata manungku wua udde Esau maapulu maasomba alamatta udde wuassu iamangnge, arawe itou nito'e. Ana waugu salaiwe ringannu laɭuai itou maddea'a laɭanne ipangapia passasane, arawe allo ipaddea'a udde nasuete.

¹⁸Manga turrangnga tawe nirumanta sumaruanna apa-apa ere sinaruanu pabbawalagu Israel dorone. Imangitou sinumaruanna apa apan wotongnge iapita, eteudde Wowo n Sinai ringannu putungnge apan lukkenggama; imangitou sinumaruanna araranduma, wasa tuudda wurru tandi'a; ¹⁹Imangitou sinumaruanna tingikku trompeta, wurru tingikka apan ma'ikkatta. Su tempo manga taumata n Israel naaringikka tingikka udde, imangitou madorongnga ringannu sasalande tadea'u tingikka udde tate mabbisara apia simangitou. ²⁰Ana waugu imangitou tawe maataranga madaringikka parenta apan niapaasingkatu tingikka udde. Ana waugu tingikka udde mabbisara, "Anambo n taumata apan namita wowone indi, tawe pilene apa udde winatanga ara'e lai isai, rinone tungannu watu ma'oma n sara mate." ²¹Apa apan niasiloannu manga

taumata n Israel udde aroddi ahewalle na'oma n sara Musa nabbisara, "Ia'u matta'utta wuɽɽu mangngindo!"

²²Arawe, iamiu suete nirumanta watukku Wuiddu Sion wuɽɽu soa Mawu Ruata apan wiakka, eteudde Yerusalem apan su surga ringannu mala'ekan-Ne su ɽiwune. ²³Iamiu uasemodda su ammula apan maaluassa - ammulannu alaɽɽana'a pahuɽu Mawu Ruata, apan manga aranne uawoɽɽetta sulaɽummu surga. Iamiu nirumanta sumaruanna Mawu Ruata, Mallarɽuungngu pabbawalagu taumata. Iamiu sumaruanna manga gharraho manga taumata mapia, apan suete niola'a nasuungnga. ²⁴Iamiu nirumanta sumaruanna Mawu Yesus, Uatangnga paaire apan wakku udde; iamiu sumaruanna ɽaɽɽa wawokka apan wotongnge maola'a tatubbusu inolaanna apan lembon apianne wuassu apan nitubbusanu ɽaɽɽa n Habel.

²⁵Ana waugu udde, paatehamma arie ma'oma n sara iamiu maddiri maddaringikka Sitou apan mabbisara udde. Imangitou apan maddiri maddaringikka Sitou apan nirumanta su runia wuɽɽu namasingkatu watti'u Mawu Ruata, tawe maataɽangngu watanganne. Lembonete lai iite indi apan uararingikka Sitou mabbisara wuassu surga! Amungkangu iite maddiri maddaringikka Sitou, iite tawe maataɽangnga wuassu ɽuumanna! ²⁶Su tempo udde tingikke naaɽɽindu'a runia. Arawe orassa indi Itou na'ire, "Paassa lai, ia'u sarun mamaɽɽindu'a waɽine tumba'u su runia ewe'e su langitta lai." ²⁷Wisara "Paassa lai" mannantiro manungku ahewallu runia apan suete niolang-Nge sarun iio'a wuɽɽu iramme, tadea'u mallambe tumba'u sarannapa apan tawe umio'a.

²⁸Ana waugu udde, ɽinone iite maadiangkamanna su Mawu Ruata, ana waugu iite nanengkamma wuassi Tou sambau araratuanna apan tawe umio'a. ɽinone iite maadiangkamanna wuɽɽu mattaɽɽamawu Mawu Ruata ringannu addata wuɽɽu atata'utta, tumuɽɽuttu pallaɽagu apan ipaapulu-Ne sassane. ²⁹Ana waugu Mawu Ruata ng kite ere putungnga apan maatutungnga.

Ereapa mapaaɽuassu naungngu Mawu Ruata

13 ɽinone iamiu sidutu mandangngu sangkatou ringannu waine ere sansuɽungngu manga taumata n Saɽɽani apan uasasangkatuɽɽanga. ²Arie humago'a mapaatana'a su waɽenu manga taumata apan ta'e awagananni amiu. Ana waugu ringannu ma'ola'a aroddi, plate taumata, ringannu tawe niatutukka suete napaatana'u mala'ekatta su waɽene. ³Naunge'o manga taumata sulaɽummu tuttuɽanna, paɽɽimau napa iamiu lai isudde sulaɽummu tuttuɽanna su sambau ringanni mangitou. Wuɽɽu

manga taumata apan a'olaanna walate apulu naungnga, řinone iamiu mannaungnga simangitou pařrimau napa iamiu lai a'olaanna aroddi.

⁴Anambo n taumata řinone mamasilo n addatta su paa'awingnga, ana waugu udde řinone sangkawinganna uararingikka sangkatou ringannu waine. Taumata apan lařeo wuřru taumata masandaga sarun parikisannu Mawu Ruata.

⁵Imbařranga wiakku paparentannu awawařiu n roitta, arawe řinone iamiu maľuassa ringannu saranapa apan tatahuananni amiu. Ana waugu Mawu Ruata suete nabbisara, "Ia'u tawe mapaawala ara'e manantangi amiu." ⁶Ana waugu udde iite wařrani mabbisara,

"Eteudde Mawu Matatuľungku,

ia'u tawe matta'utta.

Apa apan wotongnge olaannu taumata su saruangu?"

⁷Imbařranga maabuľi manga piařrangu apan namasingkatu tanata Mawu Ruata siamiu. Paaellehe ereapa imangitou mabbiakka wuřru ere-apa imangitou mate, wuřru tannoite pangangimanni mangitou. ⁸Yesus Kristus uasuluľungnga, mapia rorone, orassa indi, wuřru saran maľannuľannu. ⁹Imbařranga mapaawala n aľawo'u hati n aľařra'a maaheranga apan mangaliwu ng kamiu. Naunggi ite řinone tohasannu apapia naungngu Mawu Ruata, eteudde apan mapia; imbařranga ringannu manga atoranna su ola'u anna. Manga taumata n tiwatta apan matuřruta su manga atoranna udde tawe naasomba hunane.

¹⁰Iite uatahuanna sambau tampa n sasamba pangonggoľannu sasamba su Mawu Ruata. Wuřru manga imam apan mangngimbe Sitou sulaluľumu Rasannu Mawu, tawe su řinone umanna sasamba apan uaraddo su wowo n tampa n sasamba udde. ¹¹Rařra m winatangnga apan suete nionggolla maola'a sambau sasamba tatubbusa rosa, nia-piddu imam wahewa watukku Wabbo'a Lembon Susi, arawe wadangu winatangnga udde sassane tutunganna su liuddu paddasananna. ¹²Ana waugu udde Mawu Yesus nate lai su liuddu ngara wahewa n Soa tadea'u mamesi aľařranang-Nge wuassu rosa ringannu dařra-Ne sassane. ¹³Ana waugu udde, wette iite inai ringanni Tou su liuddu padasananna wuřru mamendama aaluandaga suadio'a ringanni Tou. ¹⁴Ana waugu su runia, iite tawe tampa atatanaanna apan maľannu; iite maddea'a tampa atatanaanna apan sarun rumanta. ¹⁵Ana waugu udde, ringannu tatangngannu Mawu Yesus, řinone iite sidutu maddalo Mawu Ruata; udde maola'a sambau aonggolu aadiangkamanni ite Sitou, apan nionggoli ite ringannu wisara m wiwikka ipaddalo aran-Ne. ¹⁶Arie maabuľi ma'ola'a apapia wuřru uatatuluľungnga, ana waugu eteindi manga sasamba apan maľuassa naungngu Mawu Ruata.

¹⁷Paatuřrute parenta manga piařrangu, wuřru paasallunga simangitou. Ana waugu imangitou sidutu mařringiddu niawanu, wuřru imangi-

tou rinone sumimbakka ola'i amiu su Mawu Ruata. Amungkangu iamiu maturruta simangitou, imangitou wotongnge mammanara ringannu naungnga maluassa; amungkangu tawe, ne imangitou sarun mammanara ringannu naungnga susa, wurru udde tawe maauntunga siamiu.

¹⁸Sidutua'e umaliomanni ami. Iami mangngimanna lalummu naungngi ami waresi, ana waugu sulummu alawo'u manara, iami sidutu maapulu ma'ola'a apa su rinone. ¹⁹Nangilembo ia'u sumalande, tadea'u iamiu umaliomangku tadea'u Mawu Ruata ringannu malihakka mangapi'u mabelengnga ringanni amiu.

Aaliomanna pangudusanne

²⁰Mawu Ruata suete napaawiakku Mawu ng kite Yesus Kristus wuassu papate. Ana waugu papate-Ne udde Itou orassa indi naola'a Malla'u'adda Mawantuga siite, eteudde manga dombane. Papate-Ne udde lai mannohassa paaire apan tawe pangudusanne apan niola'u Mawu Ruata ringanni ite. ²¹Antimanna Mawu Ruata punnu paddarame udde manuungngi amiu ringannu alawo'u apapia apan pappandumanni amiu ipa'ola'a apulu-Ne. Antimanna ringannu tatangngannu Mawu Yesus Kristus, Mawu Ruata mammanara sulummu naungngi ite, apa apan ipaapulu-Ne. Rinone Kristus raloanna saran malannu-lannu! Amin.

Pangudusannu Suratta

²²Ia'u sumalande tadea'u iamiu tumurrutta manga tatantiro'u indi ringannu masabare, ana waugu sura'u indi tawe tumanite n malo'e. ²³Rinone iamiu masingkata manungku turangi ite Timotius nipallose wuassu tutupanna. Amungkangu itou na'omate su tampa'u indi, ia'u sarun mangapiddi tou su tempo ia'u mattembo siamiu.

²⁴Waloa tabea ng kami su anambo n piarrangu wurru su anambo n pabbawalagu Mawu Ruata. Sengkama lai tabea wuassu manga turanga su Italia.

²⁵Doronganna Mawu Ruata mangelamatta manga turanga sarangkambone.

SURATTI YAKOBUS

WISARA TALAANE

Suratti Yakobus indi tuaddane su "anambo n pabbawalagu Mawu Ruata apan uasaliawukka su ahewallu runia". Ringannu mappaaatu alawo'u sasanato'a, Yakobus namorreta sula'ummu suranne indi manga tatantiro wufu alarra'a apan a'olaannu taumata n Sarani su palla'agu wufu inolaannu taumata n Sarani. Wuassu pangangimannu taumata n Sarani, itou nana'a n alawo'u inolaanna ere paa'ala wufu paa'asiangnga, wawono'a, palla'agu apan mapia, pasasunna sala, pangangimanna wufu inolaanna, manga wisara, apapande, patatatiakka, awawunga, awawawo naungnga, su ola'u mapaasala n taumata waine, matufupassi, asasabare wufu aaliomanna.

Suratta indi mangnga'ra'a manungku sula'ummu mappaaattu agama n Sarani, pangangimanna rinone rarundinganannu palla'agu.

Lalorone

Panattaranne	1:1
Pangangimanna wufu apapande	1:2-8
Paa'asiangnga wufu paa'ala	1:9-11
Sala'uta wufu wawono'a	1:12-18
Maddaringikka wufu mammanara	1:19-27
Ipaanaungnga tadea'u tawe mamile hati n taumata	2:1-13
Pangangimanna wufu inolaanna	2:14-26
Taumata n Sarani wufu manga wisarane	3:1-18
Taumata n Sarani wufu runia	4:1-5:6
Alawo'u tatantiro	5:7-20

1 Manga turrangnga alarřana'u Mawu Ruata sarangkanambone apan uasalıawukka su ahewallu runia! Tabea wuassia'u, Yakobus, allangngu Mawu Ruata wuřru allangngi Yesus Kristus.

Pangangimanna wuřru apapande

²Manga turrangnga! Amungkangu iamiu sumaruanna alawo'u hati m bawono'a, řinone itarimatti amiu ere auntunganna. ³Ana waugu iamiu masingkata, manungku amungkangu iamiu sidutu mangngimanna Mawu su tempo wabbono'anna, asombange eteudde: iamiu maola'a masabare. ⁴Riagai tadea'u asasabare naungngu udde sidutu aatambanna ma'oma n sara atonna-tonna iamiu maola'a masuungnga see tawe urangnge sara ng kadio'a. ⁵Amungkangu pia sangkatou wuassu wallatti amiu apan woddo, řinone itou sumařande su Mawu Ruata, ne Mawu Ruata sarun mangonggolu apande sitou; ana waugu su alawo'u taumata, Mawu Ruata sarun mangonggola ringannu naungnga mařuassa wuřru ringannu apendamu darangngu. ⁶Arawe taumata apan madoronga, řinone mangngimanna: itou tawe wotongnge mapapadua. Ana waugu taumata uapapadua udde ere wallade su tahařoangnga apan tattupannu anginna uawařelenganna. ⁷⁻⁸Taumata. ereudde tawe matana'a řingiranne; itou tawe mapakkawessa apa-apa su alawo'u manga apa apan niolangnge. Ana waugu udde, ariete lai itou mangantimma maasomba apa-apa wuassu Mawu.

Paa'asiangnga wuřru paa'ala

⁹Taumata n Sařřani apan asiangnga řinone lulluassa amungkangu Mawu Ruata manduitti tou. ¹⁰Wuřru taumata n Sařřani apan ala, řinone lumuassa lai, amungkangu Mawu Ruata mapaawawo n tou. Ana waugu taumata ala sarun mawuři ere wunga n ahuranganna. ¹¹Su tempo matannallo lumapputa ringannu paddisa apan mařoso, ne ahuranganna udde sarun tumolangnga ma'oma n sara manontonga wungane wuřru mawuřite lai arařřansange. Arodđi lai taumata ala; itou sarun marřimuns'a su tempo itou mappaaammattu manarane.

Sasařu'ata wuřru wawono'a

¹²Lařumanna'a su taumata apan masabare su tempo itou naasomba wawono'a. Ana waugu napawe itou naatařřanga wawono'a udde, itou sarun manengkamma lařantake, eteudde wiakka apan suete pina'ire

Mawu Ruata su manga taumata apan mandangngu Mawu Ruata. ¹³Amungkangu pia sangkatou niawono'annu wawono'a ereudde, ariewe itou mabbisara, "Wawono'a indi darantane wuassu Mawu Ruata," ana waugu Mawu Ruata tawe awono'annu ałaleo, wuřru tawe lai mamono'a saran sangkatou. ¹⁴Arawe taumata niawono'anna, amungkangu itou wolenganna wuřru panemmannu apulune sassane apan laleo. ¹⁵Wua udde, amungkangu apulune apan laleo udde tuřrutanna, ne lumappute rosa; wuřru amungkangu rosa nahurangeke, ne inuļeanne papate.

¹⁶Ariewe iamiu aawusuanna, manga tuřrangku apan aranguanna! ¹⁷Suapan aonggola apan mapia wuřru lařantake apan nasuungnga darantane wuassu surga, nisossoku Mawu Ruata, Mandariaddi aławo'u asase-makka su langitta. Itou Mawu Ruata apan tawe mawaļu, wuřru tawe lai mapaaranta n ararandumma. ¹⁸Wuassu apulu-Ne sassane Itou nandiaddi siite ałarřanang-Nge wuassu řengetan-Ne apan atonna. Itou nandiaddi udde tadea'u iite maasomba tampa apan apianne su wallatu anambo n riadian-Ne.

Maddaringikka wuřru mammanara

¹⁹Panutukke indi paapia-pia, manga tuřrangnga apan aranguanna! Suapan taumata řinone mařihakka maddaringikka, arawe mařiwue mabbisara wuřru mařannu masa'u. ²⁰Taumata mařihakka masa'u tawe maaola'a inolaanne apan mapia, apan maaļuassa naungngu Mawu Ruata. ²¹Ana waugu udde, rammea'e aławo'u inanaramanna apan nal-lařuhuranna wuřru laleo. Sengkampe ringannu awawawo naungnga wisara apan nisuannu Mawu Ruata sulařummu naungngu, ana waugu wisara udde pia tařřinone manařamatta siamiu.

²²Řinone iamiu tumuřřutta apa apan niwisara Mawu Ruata, arie tumba'u maddaringikka, na'oma n sara iamiu mangawusu watanganni amiu sassane. ²³Taumata apan maddaringikka wisara Mawu Ruata, arawe tawe tumuřřutta, udde ere taumata apan tantařanna ma'ellega hatine apan atonna su saruannu sařřuminanna. ²⁴Napawe itou naatutukke mapia-pia, itou inaita wuřru lapiddu naabuļi ereapa ola'u hatine udde. ²⁵Tita n Mawu Ruata nasuungnga wuřru pia tařřinone mamallosu taumata. Wuřru taumata apan mammarikissa wuřru mannutukka mapia-pia lapiddu tuttuřřuta tita udde, wuřru wařinewe tumba'u maddaringikka see timbuļiananna, taumata udde sarun ałamatannu Mawu Ruata sulařummu aławo'u inolaanne.

²⁶Amungkangu pia sangkatou mammadama watanganne sangkatou apan matuřřuta su agama, arawe itou tawe maariaga lilane, ne itou nangawusu watanganne sassane; patatařřamawune tawe gunane.

²⁷Tatuṛruta su agama apan waresi wuṛru tutune su aelleḡu Mawu Ruata Iamangnga eteudde: mantuḡungngu alaṛṛana'a asisi m paḡussa wuṛru manga wawine waḡu apan susa, wuṛru uariaga wadangnga sassane ta-dea'u tawe laḡeoannu runia indi.

Tatagu su pasasunna saḡa

2 Manga tuṛrangku! Ere sangkatou taumata apan mangngimanna Mawu Yesus Kristus, Mawu Apan Mawantuga, arie iamiu mamile taumata ana waugu ola'u ririne. ²Ana waugu amungkangu pia sangkatou taumata ala apan uaḡuṛre n sinsinga wuḡawanna wuṛru laubba mapia nirumanta su ammuḡannu, see nirumanta lai sangkatou asiangnga apan uaḡuṛre n laubba nahahesa'a, ³ne iamiu lembon mangngaddatta taumata laungnge mapia udde. Iamiu mabbisara sitou, "Wette Tuan, aiana'a su addera apianne indi." Arawe su taumata apan asiangnga iamiu mabbisara, "Darisikke poiaroddi," ara'e "A'iante su rapappake isindi." ⁴Ringannu ma'ola'a aroddi, iamiu na'ola'a palaḡaṛrae su wallatu sandingananni amiu wuṛru ma'ellega taumata wuassu ṛingiranna apan laḡeo.

⁵Paanaunge, manga tuṛrangnga apan arangnguanna! Taumata asiangnga su runia indi, nipile Mawu Ruata maola'a taumata ala sulaḡummu pangangimanna. Manga taumata udde sarun maola'a reengannu alaṛṛana'u Mawu Ruata ere suete nipa'ire Mawu Ruata su taumata apan mandangngu Sitou. ⁶Arawe iamiu ewe'e mangngaḡuandaga taumata asiangnga, wutte'e ete taumata ala apan mandaḡeo wuṛru mangngapidi amiu watukku pallaṛruumanna. ⁷Ete imangitou apan mangngaḡuandaga aranna awantuhanne apan nisengkammi amiu wuassu **Mawu Ruata!**

⁸Iamiu ma'ola'a su ṛinone, amungkangu iamiu tumuṛrutta tita n Araratuanna sulaḡummu wageangu Wuke Susi indi, "Pandangngu san-suḡungu ere iamiu mandangngu watangannu sassane." ⁹Arawe amungkangu iamiu mammile taumata ana waugu ola'u ririne, iamiu ma'ola'a rosa, wuṛru tita n Mawu Ruata napaḡiaṛta'a manungku eteudde iamiu lumaḡawangnga tita. ¹⁰Taumata apan nilumawanga sambau wuassu wallatu maḡa tita Mawu Ruata, udde atappasanne nilumawangnga saranganambone. ¹¹Ana waugu isai nabbisara, "Arie passandaga," ete itou lai nabbisara "Arie pamate." Nariaddi amungkangu iamiu tawe sumandaga, arawe mammate, ne iamiu lumaḡawangnga tita udde lai. ¹²Pabbisarate wuṛru pa'ola'e ere taumata apan sarun parikisanna tumuṛruttu tita ~~Mawu Ruata~~ apan mamallosu taumata. ¹³Ana waugu Mawu Ruata tawe mapaḡiaṛta'u darangngu-Ne su taumata apan tawe maaillaḡa darangngu. Arawe darangngu mattohasanna wuassu ruumanna!


Pangangimanna wuṛṛu inolaanna

¹⁴Manga tuṛṛangnga! Apa hunane taumata mabbisara, "Ia'u tau-mata apan mangngimanna", amungkangu itou tawe mapaaḷiatta'u pal-laḷagune? Wotongge pangangimanna ereudde maasaḷamatta sitou? ¹⁵Unnu wisara sangkatou tuṛṛanga esakka ara'e wawine mappanduma laubba wuṛṛu tawe maasuungngu anna su miallo-miallo. ¹⁶Apa hu-nane iamui mabbisara sitou, "Saḷamate mappattu laubba wakku wuṛṛu saḷamatta umanna!" .. amungkangu iamui tawe mangonggolu apa apan pappandumanii tou su wiakke? ¹⁷Aroddi lai ringannu pangangimanna, amungkangu tawe ipaaḷiatta'u pallaḷagu, ne pangangimanna udde tawe gunane.

¹⁸Asinungka piaddu mabbisara, "Pia taumata uatundeeta su pangangimanne wuṛṛu pia lai uatundeeta su pallaḷagune." Ia'u sarun sumimbaka, "Ta'ea'o sia'u ereapa taumata pia pangangimanna ringannu tawe pallaḷagu wuṛṛu ia'u sarun mapaa'ḷiatta'u pallaḷagu manungku ia'u pia pangangimanna." ¹⁹Iamui mangngimanna manungku Mawu Ruata tumba'u sambau, are? Ne manga ghaṛṛaho laḷeo lai mang-ngimanna wuṛṛu imangitou mangngindo ng katata'utta! ²⁰Iamui tuma-nite m woddo! Apa wotonge iapaasilo siamui manungku tawe gunane pia pangangimanna wuṛṛu tawe pallaḷagu? ²¹Pa'ellege si Abraham iu-pungu aḷamona ng kite. Itou sinengkammu Mawu Ruata ringannu mapia ana waugu pallaḷagune, eteudde su tempo itou nanantilli Ishak anangnge, su Mawu Ruata su wowo n mezbah. ²²Isindi natualage manungku pangangimanna rinone iapaḷiatta'u pallaḷagu tadea'u ma-suungnga. ²³Udde nassuḷungu wageangngu Wuke Susi indi, "Abraham mangngimanna Mawu Ruata, wuṛṛu ana waugu pangangimanne udde Mawu Ruata nanengkamma sitou naola'a sangkatou apan tinumuṛṛuta apulu Mawu Ruata." Ana waugu udde Abraham nisago "Hawe Mawu Ruata." ²⁴Natualage orassa indi, manungku taumata itarimmatu Mawu Ruata ringannu mapia ana waugu inolaannu taumata udde, wuṛṛu waḷene tumba'u ana waugu pangangimanne.

²⁵Pa'ellega lai si Rahab, wawine masandaga udde. Itou tinarimmatu Mawu Ruata ringannu mapia ana waugu pallaḷagune, eteudde su tempo itou nanarimmatu matataṛṛa so'o n taumata n Israel su waḷene wuṛṛu nantuḷungi mangitou tinumaḷangnga su laḷanna waine.

²⁶Ne, su ereapa wadanga ringannu tawe ghaṛṛaho, udde wadanga nate, aroddi lai pangangimanna tawe pallaḷagu, udde pangangimanna apan nate.



Tali pangagasanna su moŕŕongu awaŕo (3:3)

Lila n taumata

3 Manga tuŕrangnga! Arie tumanite n manambo wuassu wallatti amiu maapulu maola'a huru. Iamiu masingkata manungku iite apan naola'a huru sarun parikisanna ringannu nangillembu wuassu taumata waine. ²Iite sarangkanambone masokka ma'ola'a pasasaŕa. Arawe taumata apan taambe na'ola'a pasasaŕa ringannu manga wisarane, itou taumata nasuungnga, apan wotongnge maa'uŕinna ahewallu ririne. ³Amungkangu iite manurri n tali su moŕŕongu awaŕo tadea'u itou tumurŕutta apulu ng kite, ne iite wotongnge mamiaŕra'u ahewallu wadangu awaŕo udde. ⁴Panganute lai sambau apalla maola'a sasumandinge. Salaiwe apalla sambau inolaanna apan aroddi ahewalle wuŕru iaapidu anginna apan ma'ikkatta, arawe itou iappiaŕra'u auŕinna apan tumanite n adio'a, tumurŕuttu apulu manganguŕinna. ⁵Aroddi lai lila ng kite: salaiwe lila ng kite udde adio'a, arawe itou wotongnge mamarabunga m watanganne su manga inolaanna apan wahewalla.

Rangngoa'e aroddi ahewalle mahurangnge wotonge tutungannu putungnga apan tumanite n adio'a! ⁶Lila nassuŕungu putungnga. Su wadangi ite, itou naola'a punnu aŕaŕeo apan mannaŕiawukku aŕaŕeo su ahewallu wadangi ite. Ringannu putungnga apan darantane wuassu naraka, itou nanutungnga ahewallu wiakki ite. ⁷Aŕawo'u winatangnga maŕaŕraga, manu'u winalanganna, winatangnga tuttondo n tianne wuŕru inassa wotongnge ŕaroanna, wuŕru suete niŕŕaro n taumata. ⁸Arawe lila n taumata tawe iaŕŕaro n sangkatou taumata. Lila udde laŕeo wuŕru tawe

iapiarra'a; napene n racunna maapate. ⁹Iite mappaatta ipaadiangkamanna su Mawu Ruata Iamangngi ite, arawe lai ipammontoga sansulungngu taumata, apan suete niola'a tumuruttu lihiddu Mawu Ruata. ¹⁰Wuassu morronga apan sambau sumabanga manga wisara aadiangkamanna wurru lai wisara a'ane. Rinone tawe aroddi! ¹¹Apa piaaumatana n ua'e apan mapaasabangu ua'e mapia wurru ua'e mapetta wuassu alimatane sambau? ¹²Alu ara, manga turrangku, tawe mabbua n zaitun, wurru alu angore tawe mabbua n ara. Alimata n ua'e mapakkada tawe mapaasabangu ua'e mapia.

Apapande apan nirumanta wuassu surga

¹³Amungkangu su wallatti amiu pia sangkatou apan pande wurru pia buddine, rinone itou mapaaljatta'a ringannu mabbiakka mapia, wurru ringannu ma'ola'a inolaanna apan mapia, apan rarundingannu awawo naungnga wurru apapande. ¹⁴Arawe amungkangu iamiu tarra luadda, naungnge laleo, wurru marringiddu ririnu sassane, arie mamarabunga n apande udde, ana waugu ringannu udde iamiu mamajelongngu watti'a mapia wuassu Mawu Ruata. ¹⁵Apande ereudde tawe wuassu surga. Itou wuassu runia wurru wuassu apulu naungngu taumata, wurru wuassu setanna! ¹⁶Suapa pia lu'adda wurru pallaagu marringiddu wadangnga sassane, isudde lai asombanganna pabbawawulo wurru alawo'u inolaanna apan laleo. ¹⁷Arawe taumata apan pia apande niarantane wuassu surga, itou paarorone-ronne waresi, wua udde maapulu m padarame, masarionto'a, wurru maturruta. Itou napene n darangngu, wurru mabbua manga pallaagu apan mapia. Itou tawe manamba'a wurru tawe mallilangkama'e'a. ¹⁸Atonna apapia udde wua m bualannu padarame apan niasi'u taumata apan maapulu m padarame!

Uahahawe n runia

4 Wuassuapa darantane alawo'u pabbawawulo wurru pattatiakka su wallatti amiu? Walinewe udde nirumanta wuassu manga apulunu apan sidutu uawawulo sulalummu ririnu ana see maasomba alaluassu runia! ²Iamiu maapulu, arawe tawe maasomba, ne iamiu maapulute mate. Iamiu marrimada arawe tawe maasomba apa radeaanni amiu, ne iamiu matatiakke wurru mabawulote. Iamiu tawe maasomba apa-apa ana waugu tawe madorongnga su Mawu Ruata. ³Wurru amungkangu lai iamiu suete nadorongnga, iamiu tawe maasomba lai, ana waugu tudda n darorongngu nassala; apa apan radoronganni amiu udde tumba'u

aļāļuassu watangannu sassane. ⁴Iamiu udde taumata maļawangnga! Iamiu masingkate manungku amungkangu iamiu uahahawe n runia, ne iamiu sarun maola'a seettu Mawu Ruata? Nariaddi isai-sai apan maola'a hawe n runia indi, itou maola'a seettu Mawu Ruata. ⁵Arie massunna manungku Wuke Susi tawe pinangiananne mabbisara, "Sulaļummu wadangi ite Mawu Ruata nangado n Ghařraho apan matohassa apulune." ⁶Salaiwe aroddi, aļamattu Mawu Ruata apan nionggolla siite mattohasanna wuassu apulu n ghařraho ng kite udde. Ana waugu udde sulaļummu Wuke Susi niwořreta lai, "Mawu Ruata mandooppa taumata mawunga, arawe inuļeanne Itou mandangngu taumata apan naungnge mawowo."

⁷Ana waugu udde, paaturřute Mawu Ruata wuřřu ro'apete Setanna, ne Setanna sarun tumalaņgnga wuassi amiu. ⁸Pangundanite Mawu Ruata, ne Mawu Ruata lai sarun mangundani ng kamiu. Ukkase limanu, iamiu apan marosa! Wuřřu paatilangke naungngu, iamiu apan naungnge uapenga! ⁹Rinone atonna-tonna iamiu sumassilla wuřřu lumuai lapi-ddu lumaļo; řinone laļagenu maola'a laļuai wuřřu aļāļuannu maola'a asasusa! ¹⁰Řinone iamiu sumallungu watangannu su saruannu Mawu, ne Mawu sarun manduitti amiu.

Iapaanaungnga tadea'u arie mapaasaļa n taumata

¹¹Manga tuřrangnga, arie iamiu uaaļuandaga ara'e mapaasaļa n sangkatou ringannu waine. Taumata apan mangalaņdaga wuřřu mapaa-saļa n tuřrange sansuļunga Sařrani, itou mangngaļuandaga wuřřu mapaa-saļa n tita n Mawu Ruata. Wuřřu amungkangu iamiu mapaasaļa n tita n Mawu Ruata, udde atappasanne iamiu tawe tumuřrutta manga tita udde, ewe'e maola'a lai mapaasaļa n tita udde. ¹²Wutte'e tumba'u sangkatou apan wotongnge makkuumannu taumata wuřřu mamarikissa taumata. Eteudde Mawu Ruata apan uatařřino manaļamatta wuřřu mamate. Nariaddi, isai iamiu, na'oma n sara iamiu mapaasaļa n sansuļunga taumata?

Iapaanaungnga tadea'u arie mataļimorřonganna

¹³Manga tuřrangnga apan nabbisara, "Allo indi ara'e tiřřabbi iamī sarun inai watukku soa sambau wuřřu matana'a poiारoddi santonna aļannune ana waugu mabbaļu'a wuřřu maddea'a roitta," - daringiřře'o tatantiro'u indi. ¹⁴Apa apan sarun mariaddi su wiakku tiřřabbi, iamiu sassane lai wagga! Iamiu tumba'u ere timbulla apan aellehanna taļa

ng kadio'a, wua udde mawuḽi. ¹⁵Rinone iamiu mabbisara arendi, "Amungkangu Mawu mamala, iami sarun mabbiakka wuḽḽu mamma-nara indi ara'e udde." ¹⁶Arawe orassa indi iamiu namarabunga wuḽḽu mataḽimoḽḽonganna. Anambo n wisaranu udde nassaḽa.

¹⁷Ana waugu udde, taumata apan masingkatu apapia apan ḽinone manaranne, arawe itou tawe nammanara, taumata udde marosa.

Iapaanaungnga su manga taumata ala

5 Manga tuḽḽangnga, manga taumata ala! Padaringikka tatantiro'u. Rinone iamiu lumuai wuḽḽu lumallu ana waugu iamiu sarun matataḽḽanga asasusa! ²Paa'alanu nawukku'e. Peddenu niante m wa'u'a. ³Wuḽawanna wuḽḽu saḽaanu nitaiante, taine sarun maola'a tatiala lumawangnga siamiu wuḽḽu sarun umanna wadangu ma'oma n sara masue ere putungnga. Iamiu suete nangombo n darotongnga su tempo maranite n allo m panginsueanne. ⁴Iamiu tawe namaekka laḽantaku manga taumata apan mammanara su wawaiḽannu. Orassa indi paddaringikke sasaliomanni mangitou! Manga taumata apan nangammullu wua m bawaiḽannu, mangngintuḽi ma'iontolla wuḽḽu aintuḽi mangitou na'omate su taḽinga Mawu ruata, Mawu Ruata Lembon Mataḽḽino. ⁵Iamiu suete nabbiakka su aḽaḽuassa, wuḽḽu naatemmate apapia n runia indi. Iamiu paḽḽimaunnapa ere tantaḽanna mapaatawa m wadangnga ipaḽḽaddo allo pamamototanna. ⁶Iamiu maḽḽuumanna wuḽḽu mammate manga taumata apan tawe saḽane, wuḽḽu imangitou tawe lumawangnga siamiu.

Asasabare wuḽḽu aaliomanna

⁷Ana waugu udde, paasabarete manga tuḽḽangu, ma'oma n sara Mawu rumanta. Pa'ellege ereapa asabarene sangkatou mabbawaila ualaḽḽaddo ma'oma n sara letangnge mangonggolu hessine apan maarega sitou. Ringannu asasabare itou uaraḽḽaddo uranna su tempo manga rongnga matontonga wuḽḽu uranna su tempo maddongnga. ⁸Rinone iamiu lai masabare wuḽḽu pia naungnga wahewalla, ana waugu allo n daranta Mawu maranite.

⁹Arie sumamboḽḽe wuḽḽu mapapaḽḽansila, tadea'u iamiu tawe irḽḽuumannu Mawu Ruata. Paanaunge! Mallapḽḽuungnga maranite, wuḽḽu nasaddiate rumanta. ¹⁰Manga tuḽḽangnga, paanaunge manga nabi apan mabbisara ringannu arannu Mawu. Imangitou masabare wuḽḽu mataḽḽanga su asasusa. Nariaddi ola'e imangitou ere sambau tuḽada. ¹¹Imangitou nisago su laḽumanna'a ana waugu imangitou masabare.

Iamiu suete naaringikka su ola'u asasabare n Ayub, wuɽɽu iamiu masingkata lai ereapa panginsueanne Mawu nangaɭamatta sitou. Ana waugu Mawu lembon marangngu wuɽɽu naung-Nge mapia.

¹²Apan apianne eteudde: Arie massalu, mawae ringannu arannu langitta, ara'e arannu runia, ara'e ringannu manga apa lai. Waɭoa'e "Ore" amungkangu pandumannu ore, wuɽɽu "Tawe" amungkangu pandumannu tawe; tadea'u iamiu tawe maasomba ruumannu Mawu Ruata.

¹³Amungkangu su wallatti amiu pia sangkatou apan tantaɭanna massusa, ɽinone itou umaɭiomanna. Amungkangu piaddu lulluassa, ɽinone itou mangantari maddalo Mawu Ruata. ¹⁴Amungkangu piaddu marada'a ɽinone itou mamago manga piaɽɽa'u jamaatta. Wuɽɽu ɽinone manga piaɽɽa'u jamaatta udde umaɭiomannu taumata marada'a udde wuɽɽu mamuɽɽa n lana sulaɭummu arannu Mawu.

¹⁵Amungkangu aaliomanni mangitou niruitta ringannu pangangimanna, Mawu sarun mapaapia n taumata marada'a udde, wuɽɽu mangampunga manga rosa apan suete niolangnge. ¹⁶Ana waugu udde, ɽinone iamiu uaa'a'u pasasaɭa wuɽɽu uaa'aɭiomanna, tadea'u iamiu iapaapia. Aaliomannu taumata apan tuttuɽɽuta apulu Mawu Ruata, pia taɽɽino apan wahewalla. ¹⁷Elia taumata lai ere iite. Itou u'aɭiomanna ringannu atonna-tonna, tadea'u tawe manguranna, ne tawe nanguranna tallu tonna annumu wuɭanna aɭannune. ¹⁸Wua udde itou inumaɭiomanna apia, see langitta nanossokku uranna na'oma n sara leta'a nangonggolu hessine apia.

¹⁹Manga tuɽɽangku! Amungkangu wuassu wallatti amiu pia sangkatou apan maddirite tumuɽɽutta aɭaɽɽa'u Mawu Ruata, wua udde sangkatou waine napaawelengngu taumata udde ringannu Mawu Ruata, ²⁰naungete addoanne indi: Taumata apan na'ola'a taumata marosa mabelengnga wuassu laɭanne apan nassaɭa, taumata udde nanaɭamatta niawa n taumata marosa udde wuassu papate wuɽɽu na'ola'a manambo rosa niampunganna.

Tabea ng kami,
Yakobus

SURATTI PETRUS

PAARORONE

WISARA TALAANE

Suratti Petrus Paarorone indi tuddane su manga taumata n Sarṛani apan uasaḷiawukka su ahewallu wageanggu sawannakka wuassu leta'u Asia Adio'a. Imangitou nisaggo "walaga nipile Mawu Ruata". Pandumannu suratta indi paarorone eteudde mannohassa pangangimannu manga mabbawasane apan tantaḷanna uapendamma asasusa wuṛṛu sansara ana waugu mangngimanna si Kristus. Petrus napaanaungnga lai su mabbawasane ola'u Watti'u Aḷaḷuassa su ola'i Yesus Kristus apan maola'a atatoḥassu pangantimanni mangitou. Ana waugu Yesus Kristus natete, nabbiakka apia wuṛṛu naddiandi sarun rumanta apia. Wuassu pangangimanne udde imangitou ṛinone matataṛṛanga, lapiddu manutukka manungku asasusa mangitou maola'a sambau sasaḷu'atta tanne imangitou atonna-tonna mangngimanna si Kristus. Wuṛṛu ṛinone lai imangitou mangngimanna manungku imangitou sarun waḷisannu Mawu su tempo Mawu Yesus Kristus rumanta apia.

Wuassu lai mannohassa pangangimannu manga mabbawasane sulalummu asasusa udde, Petrus madorongnga tadea'u imangitou mabbiakka maola'a mallalaṛṛenggeni Kristus.

Lalorṛone

Panattaṛṛanne	1:1-2
Tatatiro tadea'u mannaungnga manungku	
Mawu Ruata manaḷamatta taumata	1:3-12
Tatatiro tadea'u mabbiakka tumba'u hunane su	
Mawu Ruata	1:13-2:10
Manara n taumata n Sarṛani sulalummu asasusa	2:11-4:19
Awawawo naungnga wuṛṛu pangangimbe	
taumata n Sarṛani	5:1-11
Panginsueanne	5:12-14

1¹⁻²Manga turrangnga pabbawalaga nipile Mawu Ruata, apan uasaliawukka su anambo n banua su leta'u Pontus, Galatia, Kapadokia, Asia wuṛru Bitinia! Ia'u, Petrus, rasulli Yesus Kristus, mangngantimma doronganna Mawu Ruata mangonggolu alamatta wuṛru padarame siamiu ringannu manambo-nambo.

Iamiu nipile maola'a alaṛṛana'u Mawu Ruata uasulungngu ere pandumannu Mawu Ruata lamangnga. Wuṛru Ghaṛraho Mawu Ruata suete na'ola'a siamiu pabbawalaga apan na'ukkassa, tumba'u su Mawu Ruata, tadea'u iamiu matuṛṛuta su Mawu Yesus Kristus wuṛru niukkassu ṛaṛra-Ne.

Antimma apan matohassa

³Wette iite maadiangkamanna su Mawu Ruata, lamangngu Mawu ng kite Yesus Kristus! Itou lembon marangngu siite, ana waugu udde Itou nangonggolu wiakka wakku siite, ringannu napaawiakku Mawu Yesus Kristus apia wuassu papate. Indi nangonggolu antimma apan matohassa siite. ⁴Iite mangngantimma maatahuanna manga alamatta apan suete nisaddia Mawu Ruata su alaṛṛanang-Nge, eteudde manga alamatta apan niadone su surga, na'oma n sara tawe maḷaḷeo, ara'e mawukku'a ara'e mawulle. ⁵Sarangkanambone udde ionggola siamiu, ana waugu iamiu mangngimanna Mawu Ruata. Ne iamiu rariagannu taṛṛino Mawu Ruata tadea'u iamiu manengkamma asasaḷamatta apan nasaddiate iapaaliatta'a su allo pangudusanne.

⁶Ana waugu udde ṛinone iamiu lumuassa, salaiwe orassa indi tumba'u taḷa ng kadio'a iamiu sarun masusa ana waugu iamiu naapendama anambo n hati m bawono'a. ⁷Tuddane eteudde mattiala manungku tanne atonna-tonna iamiu mangngimanna Mawu ara'e tawe. Wuḷawanna lai apan wotonge mahohakka, iannamma su putungnga. Ne pangangimanni amiu maareganne wuassu wuḷawanna, nariaddi ṛinone lai iannama tadea'u maola'a matohassa. Wuṛru ringannu aroddi iamiu sarun raloanna wuṛru addatanna lapiddu iruitta su allo Mawu Yesus Kristus rumanta apia. ⁸Iamiu marangngu Sitou, salaiwe dorone iamiu tawe naasilo Sitou. Wuṛru iamiu mangngimanna Sitou, manimbe orasa indi iamiu tawe maasila Sitou. Ana waugu udde iamiu lulluassa, wuṛru uapaendama laḷala'a apan mahewa wuṛru tawe iawisara. ⁹Ana waugu tudda m pangangimannu nia'omanna, eteudde asasaḷamattu niawanu.

¹⁰Asasaḷamatta indi apan a'inunuanna wuṛru sassaṛasirannu manga nabi, wuṛru imangitou ma'innau alamatta apan ionggolu Mawu Ruata siamiu. ¹¹Imangitou mammarikissa ereapa wuṛru angngerate olangnge udde sarun mariaddi, apan ipappandumu Ghaṛraho n Kristus sulaḷummu

wadangi mangitou. Su tempo udde Gharraho-Ne nabbało simangitou su ola'u manga asasusa apan řinone apendamanni Kristus wuřru su ola'u awawantu-Ge apan manansuna wua udde. ¹²Su manga nabi udde Mawu Ruata namasingkata manungku apa apan a'olaanni mangitou, wařine hunane simangitou, ewe'e hunane si'o; eteudde manga inolaanna apan orassa indi aaringirřani amiu ringannu masemakka wuassu mabbawatti'u Watti'u Alařuassa su ola'i Yesus Kristus. Imangitou namasingkatu manga olangnge udde siamiu ringannu tarřino Gharraho Mawu Ruata apan niapaapida wuassu surga. Wuřru lai manga mala'ekatta maapulu lai maasingkata watti'a apan iapaasingkati mangitou udde.

Bawaggo su pabbiarřana apan susi

¹³Ana waugu udde, řinone iamiu sidutu uariaga. Paatehamma wuřru pangantimpe atonna-tonna su alařatta apan sarun ionggola siamiu su tempo Mawu Yesus rumanta apia. ¹⁴Paaturřute Mawu Ruata wuřru arie mabbiakka tumuřrutta apulunu dorone, su tempo iamiu taambe naailařa Mawu Ruata. ¹⁵Arawe, řinone iamiu susi su alařo'u inolaanni amiu, ere lai Mawu Ruata apan namaggo siamiu udde susi. ¹⁶Sulařummu Wuke Susi uaworřetta, "Řinone iamiu susi, ana waugu la'u susi."

¹⁷Iamiu mannago Mawu Ruata udde lamangnga su tempo iamiu u'aliomanna Sitou. Ne, ete Mawu Ruata udde apan mamarikissa tau-mata tumuřrutu inolaannu sangkatou-sangkatou ringannu tawe pilene. Ana waugu udde tantařanna iamiu ta'e su runia indi, řinone iamiu mantuga Mawu Ruata sulařunimu wiakku. ¹⁸Iamiu masingkata apa apan buatte nipamaekka tadea'u ipamallo siamiu wuassu pabbiarřana apan tawe gunane apan tinantillu iupunggu alařonanu. Bawaekke wařinewe saranapa apan wotongnge mawulle ere inai sařa'a ara'e wuřawanna, ¹⁹ewe'e sambau saranapa apan lembon maarega; eteudde wadangi Kristus sassane, apan naola'a ere domba nionggolla sasamba su Mawu Ruata ringannu tawe angngone. ²⁰Kristus nipile Mawu Ruata ro'e n runia indi taambe niriaddi. Wuřru su miallo-miallo maddani m panginsueannu tempo indi, Itou nirumanta su runia tadea'u iamiu iapaasařamatta. ²¹Ete wuassi tou iamiu mangngimanna Mawu Ruata apan suete napaawiakki Tou apia wuassu papate wuřru namantuga Sitou. Nariaddi ete Mawu Ruata apan pangimananni amiu wuřru ete su Mawu Ruata lai apan pangantimanni amiu.

²²Ana waugu iamiu matuřrutta su alařa'u Mawu Ruata, ne iamiu namarisi wadanga wuřru iamiu tuttařantupu manga taumata pangangimanne sambau ringannu atonna-tonna. Ana waugu udde, řinone iamiu uararangngu sangkatou ringannu waine ringannu alařuassu naungngu.

²³ Ana waugu wuassu ñengetannu Mawu Ruata apan wiakka wuñru awasa udde, iamiu suete niola'a taumata wakku apan wañine inariadianne wuassu taumata, ewe'e wuassu Mawu Iamangnga apan awasa. ²⁴ Sulañummu Wuke Susi uaworretta arendi,

"Anambo n pabbawalagu taumata ere nannaño,
wuñru ahewallu awawantu-Ge ere wunga nannaño.

Nannaño tinumolangnga, wungane lai natontonga;

²⁵ arawe ñengetannu Mawu Ruata sidutu sarangkañoenge."

Ñengetanna udde Watti'u Añañuassa apan suete niapaasingkata siamiu.

Watu apan wiakka wuñru walaga apan susi

2 Ana waugu udde, rammea'e wuassu ririnu añawo'u añaleo; ariete lai pamahia, wuñru arie pallilangkamañe'a. Ariete mannaunga lañeo, wuñru arie pangngadio'a taumata waine. ² Rinone iamiu maola'a ere ana'a wakku niasungkanga, sidutu marou n susu gharraho apan waresi. Ringannu aroddi iamiu sarun tumuwo wuñru iapaasalamatta. ³ Sulañummu Wuke Susi uaworretta arendi, "Iamiu suete naappendama sassane aroddi apiane Mawu."

⁴ Ana waugu udde, rantate ringannu Mawu. Iton naañihida watu apan wiakka, watu apan niramme n taumata ana waugu sansunnanna tawe gunane; arawe nipile Mawu Ruata maola'a watu apan maarega. ⁵ Iamiu naañihida manga watu apan wiakka. Ana waugu udde ñinone iamiu pia apulu ipaatta ipa'ola'a Wañe Mawu Ruata apan pia gharraho. Ringannu aroddi iamiu naola'a manga imam, apan mabbiakka tumba'u hunane su Mawu Ruata, wuñru sulañummi Yesus Kristus mangonggola su Mawu Ruata, sasamba m pangangimanna apan ipaapulu Mawu Ruata. ⁶ Ana waugu sulañummu Wuke Susi uaworretta arendi,

"Ia'u suete namile samban watu maarega,
apan Ta'u niaddo su Sion maola'a watu apianne;
wuñru taumata apan mangngimanna Sitou tawe iapaasusa
naungne."

⁷ Watu udde lembon maarega siamiu apan mangngimanna. Arawe su taumata apan tawe mangngimanna, matipusse manga aradoanne su Wuke Susi ereindi,

"Watu apan tawe ipaattu manga ma'ola'a wañe udde
wutte'e naola'a watu apianne."

⁸ Wuñru

"Eteudde watu apan maataru taumata,
watu apan naaema'a simangitou."

Imangitou natara ana waugu imangitou tawe mangngimanna wisara Mawu Ruata. Ete aroddi suete tinantunu Mawu Ruata su ola'i mangitou.

⁹Arawe iamiu udde pabbawalaga apan niapile, manga imam apan mangngimbe ratu, pabbawalaga naukkassa, tumba'u huna Mawu Ruata, pabbawalagu Mawu Ruata sassane. Mawu Ruata namile siamiu wuṛru namago siamiu sinumabanga wuassu araranduma sumutta su asase-makke apan maḷendappa ringannu pandumma tadea'u iamiu mamasingkatu watti'a su ola'u manga inolaan-Ne apan wahewalla. ¹⁰Dorone iamiu waḷine pabbawalagu Mawu Ruata, arawe orassa indi iamiu nareengke alaṛṛana'u Mawu Ruata. Dorone iamiu tawe rangnguannu Mawu Ruata, arawe orassa indi iamiu manengkamma darangngu-Ne.

Manga allangngu Mawu Ruata

¹¹Manga tuṛrangnga apan arangnguanna! Iamiu uddewe taumata lu-maḷo'a wuṛru mattindaho su runia indi. Ana waugu udde ia'u sumaḷande siamiu tadea'u iamiu tawe tumuṛrutta apulu n taumata apan sidutu ua-papangalo lullawangnga ṛimuudda. ¹²Pallaḷagunu su wallatu taumata apan tawe maillaḷa Mawu ṛinone lembon mapia, na'oma n sara napawe imangitou mangngadio'a siamiu ere taumata laḷeo, imangitou lai sarun manga'u inolaannu apan mapia na'oma n sara imangitou sarun maddalo Mawu Ruata su allo daranta-Ne.

¹³Ringannu arannu Mawu, ṛinone iamiu matuṛrutta su manga tembonannu taumata: mapia su Kaisar apan naola'a tembonanne apan apianne, ¹⁴aroddi lai su gubernure apan niteho'u Kaisar iapaṛruumannu taumata apan ma'ola'a alaḷeo wuṛru mangngaddatta taumata apan ma'ola'a apapia. ¹⁵Ana waugu Mawu Ruata maapulu tadea'u ringannu manga inolaannu apan mapia iamiu maṛṛapinga moṛṛongu taumata apan wagga maggahatto. ¹⁶Ṛinone iamiu mabbiakka ere taumata walate apulune, arawe arie mappaatu apulu naungngu udde ipallindumma alaḷeo, ewe'e pabbiakke ere sangkatou allangngu Mawu Ruata. ¹⁷Pangadate anambo n taumata, paarangngu manga tuṛranggu apan sansuḷungnga Saṛṛani. Ata'utte Mawu Ruata, wuṛru pangadate Kaisar.

Asasusa n Kristus maola'a tuḷadda

¹⁸Manga tuṛrangnga apan naola'a mangangimbe, tuṛrute mawunu ringannu alaḷawo'u aadata; waḷine tumba'u simangitou apan naungnge mapia wuṛru masarṛionto'a, arawe simangitou lai apan maṛṛagisa.

¹⁹Mawu Ruata sarun mangalamatta siamiu, amungkangu iamiu ana waugu naatutukka apulu Mawu Ruata, masabare maataranga inolaanna apan wengkolla. ²⁰Ana waugu amungkangu iamiu masabare matatarangu ruumanna apan rinone marria'a siamiu ana waugu pasasala? Arawe amungkangu iamiu ringannu sabare matataranga asasusa apan narria'a siamiu ana waugu na'ola'a apapia, ne Mawu Ruata sarun mangalamatta siamiu. ²¹Ana waugu eteudde Mawu Ruata namago siamiu. Ana waugu Kristus sassane suete natataranga asasusa ana waugu iamiu, wuŕru ana waugu udde Itou nangongolu tulada siamiu, tadea'u iamiu mananturutta walada-Ne. ²²Tawe saran paassa Itou na'ola'a rosa, wuŕru taambe pia sangkatou taumata naaringikka Sitou namahia. ²³Su tempo Itou lallelanna, Itou tawe nabalissu laŕela. Su tempo Itou uatataranga, Itou tawe namansaga; Itou tumba'u nanantillu hatto-Ne su Mawu Ruata, Mallarungnga apan matulida udde. ²⁴Kristus sassane namasanna manga rosa ng kite su watangan-Ne roso su alu arussa, tadea'u iite mapallosa wuassu tarŕino n rosa, wuŕru mabbiakka tutturuta apulu Mawu Ruata. Ete manga lessa ng Kristus apan nangapia siamiu. ²⁵Dorone iamiu ere domba nilamammiranne, arawe orassa indi iamiu suete niapidda apia tumantalongnga Mallaŕu'adda wuŕru Mamamaduli niawanu.

Rua sangkawinganna

3 Aroddi lai iamiu, manga awingnga wawine, rinone tumurutta su awingngu tadea'u amungkangu su wallatti mangitou apan piaddu tawe mangngimanna watti'u Mawu Ruata, ete pallaŕagunu wotongne ma'ola'a simangitou mangngimanna. Wuŕru tawe wotonge iamiu mabbisara n apa-apa simangitou, ²ana waugu imangitou naasilote pallaŕagunu apan matulida wuŕru susi. ³Arie ararramagu tumba'u ararramaga su liudde, ere tuladane mallaukka uta'a ara'e mappaattu laŕoggakka, ara'e laubba apan maarega. ⁴Arawe rinone ararramagu lumapputa wuassu laŕummu naungngu, pallaŕagunu apan masarŕionto'a wuŕru matammuda; ana eteudde ararransanga apan tawe panginsueanne wuŕru lembon maarega su aellegu Mawu Ruata. ⁵Ringannu olangne indi su tempo rorone manga wawine pia agamane apan uantimma Mawu Ruata mallogaka ririne ringannu tutturuta awingngi mangitou. ⁶Sara lai aroddi, itou maturuta si Abraham wuŕru nanago n tou mawune. Turanga orassa indi naola'a alarŕana'i Sara, amungkangu iamiu ma'ola'a inolaanna apan mapia wuŕru tawe matta'uttu apa-apa.

⁷Wuŕru iamiu lai, manga awingnga esakka, rinone mabbiakka ringannu napene m pasasunna su saruannu awingngu, wuŕru ringannu

asingkata manungku ete imangitou udde pabbawalaga apan lome. Olaawe imangitou ringannu addata, ana waugu imangitou su sambau ringanni amiu, sarun manengkamma alamattu pabbiaŕrana apan tune wuassu Mawu Ruata. Olaawe indi, tadea'u tawedu maasaŕawa'a aaliomannu.

Nasusa ana waugu ma'ola'a apapia

⁸Panginsueanne eteudde: Rinone manga turŕangnga uasampinunutta wuŕru su apendama sambau. Rinone iamiu uararangngu ere sangkatuŕranganna. Wuŕru rinone iamiu uaa'akkana, wuŕru uasaŕŕionto'a. ⁹Arie mabbalissu alaŕeo ringannu alaŕeo, ara'e laŕela waŕisannu lai laŕela; arawe waŕisete ringannu madorongnga alamatta wuassu Mawu Ruata. Ana waugu Mawu Ruata namago siamiu tadea'u iamiu manengkamma alamatta wuassi Tou. ¹⁰Sulaŕummu Wuke Susi uaworŕetta arendi,

"Taumata apan maapulu mabbiakka

wuŕru maapulu mamendama miallo-miallo apan mapia,
rinone mandiaga morŕonge tadea'u tawe maggahatto manga
inolaanna laŕeo

wuŕru tawe maapabbisara m bawahia.

¹¹Itou rinone mangindau n alaŕeo wuŕru ma'ola'a apapia;
rinone itou marusahada atonna-tonna ana see maasomba
paddarame.

¹²Ana waugu Mawu sidutu ma'ellega manga taumata apan tuttuŕruta
apulu-Ne,

wuŕru Mawu sidutu maddaringikka manga aaliomanni mangitou;
arawe Mawu lullawangnga manga taumata apan ma'ola'a
alaŕeo."

¹³Isai maapulu mandaleo si'o, amungkangu iamiu maŕuassa ma'ola'a apapia? ¹⁴Arawe salaiwe iamiu uatataŕranga ana waugu ma'ola'a manga inolaanna mapia, iamiu naauntunga! Arie paata'utti sai-sai wuŕru arie suminggawangnga. ¹⁵Arawe sulaŕummu naungngu, rinone iamiu mangonggolu addatta si Kristus sassane ana waugu Itou Mawu. Wuŕru rinone iamiu sidutu uasaddia sumimbaka anambo n taumata apan maiwaŕo siamiu su ola'u antimma apan tatahuannanni amiu. ¹⁶Arawe olaawe udde ringannu masarŕionto'a wuŕru aaddata. Wuŕru rinone laŕummu naungngu waresi, tadea'u amungkangu iamiu aŕuandahanna ana waugu iarniu mabbiakka ringannu mapia ere tumatantalongngi Kristus, ne taumata apan manggaŕuandaga udde sarun masili sassane. ¹⁷Mappianne matataŕranga ana waugu ma'ola'a apapia - amungkangu

udde apulu Mawu Ruata – wuassu uatatařranga ana waugu ma'ola'a ałaleo. ¹⁸Ana waugu Kristus sassane nate tumba'u paassa, ma'oma sara małannu-łannu ana waugu rosa n taumata – sangkatou apan tawe sałane, nate huna n taumata apan nassała. Kristus na'ola'a udde tadea'u Itou wotongnge mangehetta siamiu ringannu Mawu Ruata. Itou nipate su ola'u wadanga arawe niaapawiakka apia su ola'u Ghařraho. ¹⁹Sulałummu Ghařraho Itou inai namasingkatu watti'u Mawu Ruata su manga ghařraho apan uarřuumanna: ²⁰eteudde ghařraho manga tau-mata apan maławangnga Mawu Ruata su tempo Nuh. Su tempo udde Mawu Ruata uarařraddo ringannu sabare tantałanna Nuh mallanginnu apalle. Tumba'u manga taumata apan sulałummu apalla – sarangkanam-bone sire ualu – apan nisałamatta wuassu manawangnga apan wahe-wallu udde. ²¹Ne riadianna udde naola'a sambau sasumandinga wuassu sasarřani apan orassa indi mannałamatta siamiu. Sasarřani indi wałine sambau lałagu ipammaresi wadanga wuassu anambo n luhuda, ewe'e maola'a sambau paairenu su Mawu Ruata wuassu lałummu naungnga apan mapia. Sasarřani udde mannałamatta siamiu ana waugu Yesus Kristus suete nabbiakka apia wuassu papate, ²²wurřu suete nasengkenga su surga. Orassa indi Itou uatařrino suadio'a ringannu Mawu Ruata wurřu uaparenta anambo n malaekatta, anambo n tembonanne see lai anambo n atatohassa.

Wiakka apan wakku

4 Ana waugu Kristus suete natatařranga su ola'u wadanga, iamiu lai řinone mannohassa ririnu ringannu apulu naungnga ereudde. Ana waugu taumata apan uatatařranga su ola'u wadanga, tate lai ma'ola'a rosa. ²Ana waugu udde, řinone iamiu sidutu mabbiakka su runia indi tuttuřruta apulu Mawu Ruata, wurřu wałine tuttuřruta apulu n taumata. ³Su tempo apan nałiu, iamu małannute maapulu ma'ola'a apa apan a'olaannu manga taumata apan tawe maailła Mawu. Iamiu mabbiakka su ałaleo. Iamiu tuttuřruta apulu naungnga, mabbu'anna, maddamea, ma'inumma wurřu massubba paałuanna apan maarantinna. ⁴Orassa indi taumata apan tawe maailła Mawu, tinumiangnga manungku iamiu tawe nabbiakka ere imangitou, ma'ola'a rosa walate apulune. Ana waugu udde imangitou manggałuandaga siamiu. ⁵Arawe imangitou řinone mangonggolu sasimbakke su Mawu Ruata apan nasaddiate mamarikissa taumata wiakka wurřu nate. ⁶Ana waugu udde Watti'u Ałaluassa suete niapaasingkata lai su manga taumata nate. Pandumanne tadea'u imangitou apan suete niparikisanna ere su ola'u wadanga – ere

lai anambo n taumata apan sarun parikisanna – wotongnge mabbiakka su ola'u gharraho, tumurutta apulu Mawu Ruata.

Mangangatokku aonggolu Mawu Ruata

⁷Sarangkanambone maranite m panginsueanne, ana waugu udde rinone iamiu ua'ulinna apulu m wadanga wurru uariaga, tadea'u iamiu wotongnge umañiomanna. ⁸Nangillembu wuassu sarangkanambone udde, rinone iamiu atonna-tonna uararangngu sangkatou ringanu waine, ana waugu ringannu uararangngu iamiu sarun uaa'ampunga lai. ⁹Rinone iamiu uasasañoho sangkatou ringannu waine sulalummu wañenu sambau-sambau, ringannu tawe sumamboñre. ¹⁰Iamiu sambau-sambau suete nanengkamma aonggola apan uapapaññala wuassu Mawu Ruata. Ana waugu udde ere sangkatou mangangatokka apan mapia wuassu manga aonggolu Mawu Ruata rinone iamiu mapaahuna n apande udde siamiu suadio'a. ¹¹Taumata apan namasingkatu watti'a, rinone mama-singkatu watti'a wuassu Mawu Ruata; taumata apan mangngimbe taumata waine, rinone mangimbe ringannu atato hassa wuassu Mawu Ruata, tadea'u aławo'u manara, Mawu Ruata wotonge wantuhanna sulalummi Yesus Kristus. Ete Itou apan uatarrino wurru rihone wantuhanna ma'oma sara mañannu-ñannu. Amin.

Asasusa n taumata n Sarñani

¹²Manga turangnga apan arangnguanna! Iamiu orassa indi lembon uatataranga susa ana waugu tantañanna iaannamma. Arawe arie tumiangnga, paññimaunnapa ere pia sambau riadianna apan wahe-walli mariaddi siamiu. ¹³Ewe'e rinone iamiu mamendama aławuassa ana waugu uatataranga suadio'a ringanni Kristus. Ne napawe awawantugi Kristus niapaaññatta'a, iamiu sarun lumuassa. ¹⁴Iamiu naauntunga amungkangu iamiu aañuandahanna ana waugu iamiu mallaaññenggeni Kristus. Udde atappasanne Gharraho apan mawantuga, eteudde Gharraho Mawu Ruata udde sulalummu naungngu. ¹⁵Arie pia sangkatou wuassu wallatti amiu uatataranga ana waugu itou tarra pate, ara'e tarra ta'o, ara'e taumata lañeo, ara'e ana waugu itou uañalo'a hatto n taumata waine. ¹⁶Arawe amungkangu iamiu uatataranga ana waugu iamiu taumata n Sarñani, ariewe masili ana waugu inolaanna udde. Paadiangkamante su Mawu Ruata, manungku iamiu uapiddu aranni Kristus.

¹⁷Nia'omante tempone Mawu Ruata mamarikissa runia. Wurru ete pabbawalagu Mawu Ruata sassane apan sarun parikisanna paarorone.

Ne, amungkangu Mawu Ruata manattakke mamarikissa siite, ereapate manga taumata apan tawe mangngimanna Wattu'u Aļaļuassa wuassu Mawu Ruata udde? ¹⁸Sulaļummu Wuke Susi uaworřetta arendi,

"Amungkangu manga taumata apan mapia lai ete masahadda iapaasaļamatta,

nangillembote lai mariaddi su manga taumata marosa apan tawe maaillaļa Mawu!"

¹⁹Ana waugu udde, amungkangu pia taumata apan uatatařřanga ana waugu Mawu Ruata mappandumma aroddi, řinone manga tumata udde mabbiakka ringannu mapia wuřřu manantillu watanganne su Mandariaddi mangitou. Itou sidutu mapaatipussu paaire-Ne.

Ammuļannu domba Mawu Ruata

5 Ia'u madorongnga aellegu manga piarřa'u jamaannu. Ia'u namorřeta indi, ere sangkatou tuřřanga piarřange wuřřu ere taumata apan suete naasilo sassane asasusa ng Kristus, wuřřu sarun wantuhanna lai suadio'a, napawe awawantugi Kristus niapaasilote su taumata. Ia'u sumaļande ²tadea'u iamiu mallu'adda ammuļannu domba apan tinantillu Mawu Ruata siamiu. Lu'arete imangitou ringannu aļaļuassu naungnga su ereapa ipaapulu Mawu Ruata, wuřřu arie ringannu ipabawata'a. Arie lai ma'ola'a manaranu ana see maasomba auntunganna, ewe'e ana waugu iamiu atonna-tonna maapulu mangimbe. ³Arie pa'ola'a ere tembonanne



Mallu'adda domba (5:2)

simangitou, apan tinantilla siamiu, ewe'e iamiu řinone maola'a tuļada simangitou. ⁴Wuřřu su tempo Mallaļu'adda Mawantuga udde rumanta apia, iamiu sarun manengkamma mahkota apan maļendapa wuřřu tawe sarun mawulle saļendame.

⁵Aroddi lai tuŕŕanga, manga umbasanna maŕŕuala. Paatuŕŕuta su manga timmade. Tuŕŕanga sarangkanambone rinone tawe mamara-bunga wuŕŕu uaa'imbe sangkatou ringannu sangkatou ringannu awa-wawo naungnga. Ana waugu sulaŕummu Wuke Susi uawoŕŕetta arendi, "Mawu Ruata mannompola taumata mawunga, arawe mandangngu tau-mata naungnge mawawo." ⁶Ana waugu udde panantille m watangannu su aŕungngu lima Mawu Ruata apan matohassa, tadea'u Itou mapaatang-gaki amiu napawe nia'omante tempone. ⁷Tantila'e anambo n asasingga-wangngu su Mawu Ruata, ana waugu Itou uapaduŕi siamiu.

⁸Rinone iamiu paatehamma wuŕŕu paariaga! Ana waugu Se-tanna udde seetti amiu. Itou ere singa u'amatta mammalintadu runia lapiddu mannuntingikka maddea'a pabbawiakke. ⁹Roopete itou ringannu pangangimanna apan matohassa, ana waugu iamiu masing-kata manungku manga tuŕŕangnga sansuŕungnga Saŕŕani apan waine su ahewallu runia uatataŕŕanga lai ere iamiu. ¹⁰Arawe napawe iamiu suete natataŕŕanga sangkatempo, Mawu Ruata sassane sarun manuung-nge amiu. Itou sarun mapaatagekki amiu wuŕŕu manohassa siamiu see mapaarisikki amiu. Ana waugu ete Itou udde Mawu Ruata apan naung-Nge lembon mapia, apan suete namago siamiu mamendama suadio'a awawantu-Ge sarangkaŕo'engnge sulaŕummi Kristus. ¹¹Ete Itou apan uataŕŕiŕo sara maŕannu-ŕannu. Amin.

Tabea su pangudusannu suratta

¹²Sura'u apan maautta indi ta'u niwoŕŕeta siamiu ringannu sasumbala n Silas, apan aantimangku sangkatou tuŕŕanga Saŕŕani apan matuŕŕuta. Ia'u maapul mangonggolu sasasa siamiu, wuŕŕu manohassa pangangi-manni amiu manungku apa apan ta'u niwoŕŕeta indi watti'a atonna su ola'u darangngu Mawu Ruata. Rinone iamiu mangke uaantimma su da-rangngu udde.

¹³Manga hawe jamaatta sambau su Babilon, apan nipile Mawu Ruata lai, napawawa n tabea siamiu; aroddi lai ana'u Markus apan arangnguanna. ¹⁴Paa'adate sangkatou ringannu waine ringannu napene n darangngu ere tuŕŕanga rundusa Saŕŕani.

Antimanna Mawu mangonggolu paddarame siamiu sarangkanam-bone apan naola'a pussa'a n Kristus.

Tabea ng kami,
Petrus

SURATTI PETRUS

ARUANE

WISARA TALAANE

Suratti Petrus Aruane indi tuddane su anambo n taumata n Saṛrani apan paarorone. Suratta indi niwoṛṛeta hunane ipandoopa manara manga huru mangngaṛṛa'u aḷaṛṛa'a nassaḷa, wuṛṛu lai ipaningadu manga pallaḷagu laḷeo apan suete niaṛṛa'u manga huru udde. Tadea'u tawe awono'annu aḷaṛṛa'a udde, taumata n Saṛrani ṛinone mangngimanna aḷaṛṛa'a apan atonna su ola'u Mawu Ruata wuṛṛu su ola'i Yesu Kristus – eteudde aḷaṛṛa'a apan niapassingkatu manga taumata apan suete naasilo wuṛṛu naaringikka sassane Mawu Yesu mangngaṛṛa'a.

Paarorone apan iassassila sulaḷummu suratta indi eteudde manga taumata apan mangngaṛṛa'a manungku Kristus tate rumanta apia su tempo aruane. Suratta indi mannaḷa'a manungku daranta n Kristus udde ere ola'u maḷiwue ana wagu Mawu Ruata "maddiri pia sangkatou apan mawinasa. Itou maapulu tadea'u anambo n taumata mawaḷu wuassu manga rosane."

Laḷorṛone

Panattaṛṛanne	1:1-2
Bawago Mawu Ruata su taumata n Saṛrani	1:3-21
Manga huru awusu	2:1-22
Daranta ng Kristus aruane	3:1-18

1 Manga tuŕrangnga apan atonna-tonna mangngimanna ere iami! Yesus Kristus, eteuddde Mawu Ruata wuŕŕu Ratu m Punnu Saŕamatti ite, namala ng kite mangngimanna Sitou, ana waugu Itou pia paa'ola'a apan su ŕinone.

Suratta indi wuassi Simon Petrus, sangkatou allangnga wuŕŕu rasullu Mawu Yesus Kristus. ²Doronganna Mawu Ruata mangonggolu aŕamatta wuŕŕu paddarame siamiu ringannu manambo-nambo, ana waugu iamiu maaillaŕa Mawu Ruata, wuŕŕu Yesus, Mawu ng kite.

Bawago wuŕŕu pamamile Mawu

³Mawu Ruata suete nappaattu taŕŕino-Ne sassane wuŕŕu nangonggolu aŕawo'u sarannapa siite apan ipappaatta su patataŕramawuanna. Inolaanni Tou indi wuassu apa apan niasingkatanni ite su ola'u Mawu Yesus Kristus, apan suete namago siite mamendamma awawantu-Ge wuŕŕu apapia-Ne. ⁴Ringannu olangnge udde Mawu Ruata nangonggolu manga aŕamatta apan wahewalla wuŕŕu maarega siite apan suete pina'ire n Tou. Ringannu manga aŕamatta udde iamiu wotongnge maŕŕiu wuassu manga apulu laŕeo apan manggohakku runia indi, wuŕŕu iamiu manengkamma pallaŕagu Mawu Ruata. ⁵Ana waugu udde, paŕŕusahade atonna-tonna tadea'u iamiu sidutu mangngimanna Mawu Yesus Kristus wuŕŕu pangangimannu udde rarundinganannu wiakka apan mapia. Su liuddu wiakka apan mapia iamiu wotonge maola'a taumata pia asingkata, ⁶wuŕŕu su liuddu pia asingkata, iamiu lai wotongnge maauiŕinna apulu naungngu. Wuŕŕu su liudde maauiŕinna apulu naungnga, ŕinone lai iamiu mandiaga ririnu ana see masabare sumaruanna aŕawo'u manimmala. Su liuddu masabare sumaruanna aŕawo'u manimmala, iamiu lai ŕinone mabbiaŕa tuttuŕŕuta apulu Mawu Ruata. ⁷Wuŕŕu mabbiaŕa tuttuŕŕuta su apulu Mawu Ruata ŕinone lai suungannu darangngu su manga manga tuŕrangnga apan su pangangimanna sambau. Wua udde ŕinone lai darangngunu su manga tuŕrangnga pangangimanna sambau suungannu darangngu su anambo n taumata. ⁸Sarangkanambone eteudde manga pallaŕagu apan pappandumanni amiu. Amungkangu manga pallaŕagu udde pia siamiu ringannu manambo-nambo, iamiu mabbali maŕŕimada wuŕŕu pia buane, wuŕŕu maaillaŕa Yesus Kristus Mawu ng kite ringannu lembon mapia lai. ⁹Arawe taumata apan tawe pallaŕagu ereudde, ŕingiranne maautta; itou tawe maasilo wuŕŕu itou naabuli manungku manga rosane apan naŕŕiu suete niwaresi.

¹⁰Ana waugu udde, manga tuŕrangnga, paŕŕusahade lembon maŕŕimada tadea'u bawago Mawu Ruata wuŕŕu pamamile-Ne su ririnu udde maola'a lembon matohassa. Amungkangu iamiu ma'ola'a udde,

iamiu tawe sumorrotta wuassu pangangimannu. ¹¹Ringanni aroddi iamiu sarun onggolannu tarrino sumutta su Araratuanna apan saran maļannu-ļannu wuassu Mawu wuřru Ratu m Punnu Saļamatti ite Yesus Kristus.

¹²Ana waugu udde, ia'u sidutu mapaanaungnga siamiu su olangnge udde, salaiwe iamiu masingkate wuřru mangke mangngimanna aļarŗa'u Mawu Ruata apan suete nisengkammi amiu udde. ¹³Tantaļanna ia'u ta'e wiakka, ia'u mangke mapaanaungngi amiu su olangnge udde. ¹⁴Ana waugu ia'u masingkata manungku tate maļannu lai ia'u sarun manantangngu runia indi, ana waugu Mawu ng kite Yesus Kristus suete namasingkata sia'u ringannu masemakka. ¹⁵Ne ia'u sarun mařrusahada tadea'u napawe ia'u natete lai, iamiu sidutu mannaungnga apia manga inolaanna indi.

Manga taumata apan naasilo awawantugi Kristus

¹⁶Su tempo iami namasingkata siamiu aroddi awantuge daranta Mawu ng kite Yesus Kristus, iami tawe uatundeetta su manga wa'e iaarŗa'u taumata. Awawantugi Kristus udde suete niasiloanni ami ringannu mata ng kami sassane. ¹⁷Iami poiaroddi su tempo Itou nia-datanna wuřru niwantuhannu Mawu Ruata lamangnga. Su tempo udde niaringiřřana tingikka wuassu Apan Lembon Mawantuga, nabbisara Sitou, "Ete indi Ana'u arangnguang-Ku. Itou maaļuassa naung-Ku!" ¹⁸Iami sassane naaringikka tingikka udde nirumanta wuassu surga su tempo iami su sambau ringanni Tou su wowone apan susi udde.

¹⁹Ana waugu udde iami lembon mangngimanna lai tanata Mawu Ruata apan ipaasingkatu manga nabi. Mappianne iamiu mangngimanna tanata udde, ana waugu tanata udde ere soļo apan mannemakka tampa maranduma madatingngu matannallo sumabanga, wuřru semakku ařřusuallo manemakka laļummu naungngu. ²⁰Lembonete lai iamiu řinone mannaungnga indi: Tanata Mawu Ruata apan ipappasingkatu manga nabi tawe wotongnge itaļa'a tumuřřuttu adapannu sassane. ²¹Ana waugu, tawe saran paassa tanata Mawu Ruata ipappasingkata tumba'u ana waugu apulu n taumata. Arawe Gharŗaho Mawu Ruata uatařřino su tamuata apan mammasingkatu tanata Mawu Ruata sassane.

Manga huru awusu

2 Su tempo apan naļiu su wallatu pabbawalagu Mawu Ruata suete nirumanta manga nabi awusu. Aroddi lai su wallatti amiu sarun rumanta lai manga huru awusu. Imangitou sarun mangarŗa'u manga

ałarřa'a nassała, apan maapate taumata. Wurru imangitou sarun maddandilu Tembonanne apan suete namallosi mangitou. Ringannu aroddi imangitou nandanta m papate su watanganni mangitou sassane, apan sarun marřia'a simangitou ringannu malihakka. ²Salaiwe aroddi, manambo taumata sarun tumantalongnga ola'u wiakku manga huru awusu udde apan tatařřinoannu apulu naungngi mangitou. Wurru inolaannu manga huru udde sarun mamolengnga manambo taumata mangałuandaga Lałanna Narřino mattuda Mawu Ruata. ³Ana waugu imangitou masarřia'u, ne manga huru awusu udde sarun mabatti'a siamiu manga watti'a iaarřangge sassane ana see maasomba auntunganna wuassi amiu. Arawe pamamarikisanna apan marřuumanni mangitou małannute nissaddia, wurru papate apan suete nitantuna simangitou tantałanna uararřaddo simangitou.

⁴Manga mala'ekatta apan marosa lai tawe iwala Mawu Ruata maļu wuassu řuumanna, ewe'e iramme sulałummu naraka. Imangitou iwontola sulałummu rampissa apan maranduma wurru tarřanganna poiaroddi madatingngu Allo m Pamarikisanna. ⁵Aroddi lai runia su tempo rorone Mawu Ruata tawe namala n tou maļu wuassu řuumanna. Mawu Ruata napaaranta n manawangnga wahewalla su runia manga taumata laleo su tempo udde. Tumba'u Nuh su sambau ringannu sire pitu waine apan niapaasałamatta, ana waugu Nuh namasingkatu watti'a su ola'u wiakka apan maaluaassa naungngu Mawu Ruata. ⁶Uasulungnga lai ere Sodom wurru Gomora: Mawu Ruata nanutungnga manga soa udde ringannu putungnga tadea'u maola'a tulada su ola'u apa apan sarun mariaddi su manga taumata laleo. ⁷Arawe Lot nipaasałamatta, ana waugu itou tinumurřuta apulu Mawu Ruata; itou lembon natatarřanga ana waugu pallałagu tawe matatarřino wuassu manga taumata laleo. ⁸Su pattangannu manga taumata udde, Lot apan mapia udde mabbiakka ringannu naungnga susa, ana waugu miallo-miallo itou maasilo wurru maaringikka pallałagu mangitou apan laleo. ⁹Nariaddi, Mawu masingkata ereapa manałamatta manga taumata tuttuřuta apulu-Ne su tempo imangitou uasaruanna manga wawono'a. Wurru Mawu masingkata ereapa manahipunna manga taumata laleo udde sansaranna su Allo m Pamarikisanna, ¹⁰lembonete su manga taumata apan tuttuřuta apulu naungngi mangitou apan laleo wurru mangałuandaga tarřino Mawu Ruata.

Aroddi awarřanine wurru awungane manga huru awusu udde na'oma n sara imangitou tawe go'ane mangałuandaga manga riadianna apan mawantuga sara lai su surga! ¹¹Arawe manga mala'ekatta apan mattohasanna marau wurru lembon tarřino wuassu manga huru awusu udde, tawe mangansila manga riadianna apan mawantuga udde ringannu wisara aaluandaga su saruannu Mawu. ¹²Arawe manga huru udde waline

hampa! Imangitou ere winatanga niasungkanga see sametanna wuṛru pateanna. Imangitou tawe marṛingidda, arawe tumba'u mammanara tuttuṛruta apulu naungnga, na'oma n sara imangitou mandoopa manga hatto apan tawe iasunna mangitou ringannu manga wisara aaluandaga. Ana waugu udde wuassu manga pallaḷagu mangitou sassane, imangitou sarun mate ere manga winatangnga maḷaṛṛaga. ¹³Maola'a wawaḷissu asaṣusa apan suete niola'i mangitou, imangitou sarun matataṛṛanga susa. Inolaanna apan maaluassa naungngi mangitou eteudde ma'ola'a alaḡo'u inolaanna su allo allattune maddea'a mapaawusa n apulu n wadangi mangitou. Amungkangu imangitou uaianna su sambau ringanni amiu sulaḷummu andeangngu anna, pallaḷagu mangitou maarantinna ana waugu imangitou niwu'annu apulu naungngi mangitou. ¹⁴Imangitou tawe illoḷone ma'ola'a rosa, wuṛru alutuanni mangitou ma'ellega wawine masandaga. Wuṛru taumata apan wakku mangngimanna wuṛru ta'e matuḷu pangangimanne, waḷonotanni mangitou. Naungngi mangitou ni-numarampe n awawaḷiu. Ete imangitou udde taumata apan niawontohante! ¹⁵Ana waugu imangitou maddiri umamatta su laḷanna matuḷida, ne imangitou niaḷiwune. Imangitou niumamatta su laḷanni Bileam ana'i Beor dorone. Bileam indi mangke maapulu maasomba roitta wuassu inolaanne apan laḷeo. ¹⁶Arawe itou naasomba tatagu su inolaane apan laḷeo udde, ne su tempo keledaine nabbisara ringannu tingikku taumata. Ne nabi udde niwata'a mangilloḷo m pallaḷagune apan naaḷihida ere wewa udde.

¹⁷Manga huru awusu udde naḷihida ere aḷimata ng kua'e apan namara wuṛru naaḷihida ere rallamma nitiuppu anginna aḷisusu. Mawu Ruata suete nanaddia tampane, sambau tampa apan tumanite maranduma. ¹⁸Imangitou na'ola'a manga papasingkata apan napene m papalo notta wuṛru tawe loṛrone; apulune sussandaga iapaati mangitou ipangaḷiwu manga taumata apan wakku napallosa wuassu tampa n taumata apan mahbiakka su alaḷeo. ¹⁹Manga huru awusu udde naddiandi n apapalossa su manga taumata udde, arawe imangitou sassane niallangngu manga inanaramanna apan mandaḷeo taumata. Ana waugu amungkangu taumata tawe naaroappa wawono'a, ne itou maola'a allangngu alaḷeo udde. ²⁰Taumata apan maailaḷa Mawu wuṛru Punnu Saḷamatti ite Yesus Kristus, napallose wuassu taṛṛino n runia apan maaluḡhuda taumata. Arawe amungkangu saḷimurine itou niasametta apia na'oma n sara tawe naaroapa manga taṛṛino udde, ne ola'u taumata udde panginsueanne maddaḷeoanne lai wuassu paarorone. ²¹Mappianne manga taumata ereudde tawe saran paassa naasingkata laḷannu apapia Mawu Ruata, wuassu imangitou masingkata, arawe wua udde maddiri tumuṛrutta manga parenta apan nionggolu Mawu Ruata simangitou. ²²Apa apan a'olaanni mangitou napaḷiatta'u sasanato'a indi, "Asu sarun

umanna apia anna apan buatte nimutane," wuṛṛu "Wawi apan buatte nireno, sarun mabelengnga apia tumalinggi su tona."

Paaire su ola'u daranta Mawu

3 Manga tuṛrangnga apan arangnguanna! Ete indi sura'u aruane siamiu. Sulaḷummu suratta darua indi, ia'u mangke mappandumma mapaasabangu manga ringiranna apan mapia siamiu. ²Ia'u mandolokka tadea'u iamiu mannaungnga manga wisara apan rorone suete niwisara manga nabi Mawu Ruata, wuṛṛu parenta n Mawu. Ratu m Punnu Saḷamatta apan niapassingkatu manga rasul siamiu. ³Paarorone, iamiu rinone masingkata manungku su allo-allo pangudusanne, sarun rumanta manga taumata apan pabbawiakke paparentannu apulu naungngi mangitou sassane. Imangitou sarun mangaḷuandaga siamiu, ⁴ringannu mabbisara arendi, "Anaude Mawu na'ire rumanta! Orassa indi suapa Itou? Manga iamangngu aḷamona ng kite natete arawe aḷawo'a mangke uasulungnga ere ro'e n runia indi niriaddi!" ⁵Imangitou atonna tawe manga'u manungku su aḷamonane Mawu Ruata nandiaddi langitta wuṛṛu runia wuassu ṛengtan-Ne. Runia niriaddi-Ne wuassu ua'e, wuṛṛu ringannu ua'e; ⁶wuṛṛu ringannu ua'e lai - eteudde ua'e manawangnga wahewa - runia ng kaḷamona udde nihohakka. ⁷Arawe langitta wuṛṛu runia apan sara orassa indi, nipaduḷianannu ṛengetannu Mawu Ruata udde lai, ana see tutungannu putungnga su tempo addantane. Orassa indi langitta wuṛṛu runia ta'e papaduḷiananna ma'oma n sara allo manga taumata apan laḷeo udde iṛruumanna wuṛṛu pateanna.

⁸Arawe manga tuṛrangku, hatto sambau indi arie paabuḷiane: manungku su aelleḡu Mawu, allo massallo tawe paṛḷalane ringannu saṛṛiwu su tonnane - itarua udde nassulungnga Sitou. ⁹Mawu tawe maḷiwue mangonggolu apa apan suete nipa'ire-Ne, salaiwe piaddu mas-sunna aroddi. Arawe Itou masabare siamiu, ana waugu Itou maddiru pia sangkatou apan mate. Itou maapulu tadea'u anambo n taumata mawaḷu wuassu manga rosane.

¹⁰Arawe Allo daranta Mawu sarun rumanta ere daranta n taṛṛa ta'o. Su Allo udde langitta sarun mawuḷi ringannu tingikka rudallu'a, wuṛṛu manga sarannapa su langitta sarun masue matutungnga, wuṛṛu runia ringannu aḷawo'u laḷoṛrone sarun mawuḷi. ¹¹Ana waugu sarangkanam-bone udde sarun ṛimunsanna ringannu olangnge apan aroddi, ereapate rinone iamiu mahbiakka? Iamiu mahbiakka susi wuṛṛu hunane tumba'u su Mawu Ruata sassane, ¹²tantaḷanna iamiu uaraṛṛaddo wuṛṛu luṛrintulu daranta n Allo Mawu Ruata. Su Allo udde langitta sarun masue matutungnga, wuṛṛu ana waugu saḷihangnge, ne manga sarannapa su langi-

tta sarun monossa. ¹³Arawe iite uarado apa apan suete pina'ire Mawu Ruata, eteudde langitta wakku wurru runia wakku, isudde mangke pia atatuidda.

¹⁴Ana waugu udde, manga turangnga apan arangnguanna, tanta'anna iamiu uarado Allo udde, pappandumpe atonna-tonna mabbia'akka susi wurru tawe pasasa'a su saruannu Mawu Ruata. Wurru paddu'ianete paa'aukka apan mapia ringannu Mawu Ruata. ¹⁵Pendamete manungku asasabare Mawu ng kite maola'a sambau tempo apan niong-goli Tou siamiu tadea'u wotongnge masalamatta. Paulus, turangi ite apan arangnguanna, suete namorreta aroddi lai siamiu. Itou namorretu udde ringannu apande apan nionggolu Mawu Ruata sitou. ¹⁶Sulalummu anambo n suranne, Paulus sidutu mamorretu ola'u hatto udde. Atonna pia manga pira hatto apan masahadda passunnanne sulalummu manga suratti tou udde. Wurru wageangnge udde iwaba'elengngu manga tau-mata apan waggan apa-apa wurru apan lome pangangimanne. Olangnge udde tawe maatiangnga, ana waugu manga wageangnge waine wuassu Wuke Susi a'olaanni mangitou aroddi lai. Apa apan a'olaanni mangitou udde tumba'u manongkaki mangitou sassane.

¹⁷Arawe iamiu manga turangu apan arangnguanna, maasingkate olangnge udde. Ana waugu udde, paatehamma, arie iamiu iawolengnga sulalummu ararandumu manga taumata la'leo, ma'oma n sara iamiu manawo wuassu tampa dararisirranu apan matohassa. ¹⁸Rinone iamiu lembon maappendamma alamattu Mawu Yesus Kristus, Mawu wurru Punnu Salamatti ite, wurru rinone iamiu lai lembon maailla'a Sitou. Daralo Sitou, orassa indi wurru ma'oma n sara malannu-lannu! Amin.

Tabea ng kami,
Petrus

SURATTI YOHANES

PAARORONE

WISARA TAŁAANE

Suratti Yohanes Paarorone indi niworřeta ringannu tuddane darua. Paarorone mangngonggolu sasasa su manga mabbawasane tadea'u imangitou mabbiakka uaukku Mawu Ruata wurřu Anang-Nge Yesus Kristus. Aruane eteudde mappanaungnga simangitou tadea'u tawe tumantalongnga manga ałarřa'a nassała apan maałaleo paa'aukki mangitou ringannu Mawu Ruata wurřu Yesus Kristus. Manga ałarřa'a nassała udde rapappake wuassu pangangimanna manungku aławo'u saranapa apan ua'erřettu runia, hessine ałaleo; nariaddi, Mawu Yesus Ana'u Mawu Ruata tawe mariaddi suete naola'a taumata. Manga huru apan mangangarřa'u manga ałarřa'a apan nassała udde mabbisara manungku niapasalamatta udde atappasanne nipallosa wuassu aławo'u manara m pabbawiakka su runia indi; imangitou mangngarřa'a lai manungku asalamatta tawe sampune ringannu inolaanna mapia ara'e darangngu su sandingananna taumata.

Uapaparřala manga ałarřa'a udde, mamamorřetu suratta indi namasingkata ringannu matualaga manungku Mawu Yesus Kristus atonna-tonna suete naola'a taumata tutune. Itou namasingkata lai manungku anambo n taumata apan mangngimanna Mawu Yesus lapiddu mandangu Mawu Ruata, řinone lai mandangu sangkatou ringannu sangkatou.

Laloꝛꝛone

Panattaꝛꝛanne	1:1-4
Asasemakka wuꝛꝛu araranduma	1:5-2:29
Aꝛaꝛꝛana'u Mawu Ruata wuꝛꝛu	
aꝛaꝛꝛana'u Setanna	3:1-24
Apan naꝛꝛino wuꝛꝛu nassaꝛa	4:1-6
Inolaannu taumata ipandangngu	4:7-21
Pangangimanna apan mangngapidu	
asasaꝛamatta	5:1-21

Rengetanna apan wiakka

1 Laŋorŋo n suratta indi mannaŋa'a ola'u Rengetanna apan mang-
 1 ngonggolu wiakka, eteudde Rengetanna apan plate ro'e n wuassu
 aŋamonane. Iami suete naaringikka, wuŋŋu suete naasilo mata ng kami
 sassane. Iami suete naellega, wuŋŋu suete nangagasu lima ng kami.
 2 Su tempo wiakka udde niapaaliatta'a, iami naasilo. Ana waugu udde
 iami nattiala su olange udde. Iami mammasingkata siamiu su ola'u
 wiakka tutune wuŋŋu saran maŋannu-ŋannu, apan su sambau ringannu
 Mawu Ruata Iamangnga, wuŋŋu apan suete niapaaliatta'a siami. 3 Apa
 apan suete niasiloanna wuŋŋu niaringirrani ami, eteudde lai apan iap-
 pasingkati ami siamiu, tadea'u iamiu suadio'a ringanni ami wotongnge
 maappendamma wiakka uauukka ringannu Iamangnga wuŋŋu ringannu
 Anang-Nge Yesus Kristus. 4 Iami namorretu indi tadea'u naungngi ite
 atonna-tonna maŋuassa.

Eteudde Mawu Ruata asasemakka

5 Ete indi watti'a apan suete niaringirrani ami wuassu Anang-Nge
 wuŋŋu apan iwabbatti'i ami siamiu: Mawu Ruata eteudde asasemakka,
 wuŋŋu Sitou tawe araranduma sara ng kadio'a. 6 Amungkangu iite
 mabbisara manungku iite mabbiakka uauukka ringanni Tou, arawe
 iite mabbiakka su araranduma, ne iite nangawusu mapia ringannu
 wisara ara'e lai ringannu pallaŋagu. 7 Arawe amungkangu iite mabbiakka
 sulaŋummu asasemakka ere lai Mawu Ruata sulaŋummu asasemakka, ne
 iite mabbiakka uauukka atonna, uasangkapia sangkatou ringannu waine,
 wuŋŋu Ɔaŋŋa Mawu Yesus, Anang-Nge, namaresi siite wuassu aŋawo'u
 rosa.

8 Amungkangu iite mabbisara manungku iite tawe paddarosa, iite
 nangawusu watanganni ite sassane; wuŋŋu Mawu Ruata tawe sulaŋummu
 naungngi ite. 9 Arawe amungkangu iite manga'u aŋawo'u rosa ng kite
 su Mawu Ruata, Itou sarun manipussa paaire-Ne wuŋŋu ma'ola'a ata-
 tulidda. Itou sarun mangampungu manga rosa ng kite wuŋŋu manguk-
 kasa siite wuassu aŋawo'u alaŋeo ng kite. 10 Arawe amungkangu iite
 mabbisara manungku iite tawe paddarosa, iite maŋrangngo manungku
 Mawu Ruata udde Ɔaŋŋa awusu wuŋŋu iite tawe uaraddo m wisara Mawu
 Ruata sulaŋummu naungngi ite.

Kristus mattatujungni ite

2 Aļarāna'u! Ia'u namorretu indi siamiu tadea'u iamiu tawe ma'ola'a rosa. Arawe amungkangu piaddu lai ma'ola'a rosa, ne iite pia sangkatou sumasimbake, eteudde Yesus Kristus apan matulida udde; Itou sarun sumaļande ng kite su saruannu lamangnga. ²Ringannu pamamana n Yesus Kristus uddewe manga rosa ng kite niampunganna. Wurru waline tumba'u manga rosa ng kite sassane, ewe'e rosa n anambo n tau-mata lai.

³Amungkangu iite maturruta su manga parenta Mawu Ruata, udde tatialane manungku iite maaillaļa Mawu Ruata. ⁴Taumata apan mabbisara, "Ia'u maaillaļa Mawu Ruata," arawe maddiri tumurrutta manga parenta-Ne, taumata udde tarra wahia, wurru Mawu Ruata tawe sulaļummu naungge. ⁵Arawe taumata apan maturruta wisara Mawu Ruata, taumata udde marangngu Mawu Ruata ringannu nasuungnga. Udde tatialane manungku iite mabbiakka uauukka ringannu Mawu Ruata. ⁶Isai-sai nabbisara manungku itou mabbiakka uauukka ringannu Mawu Ruata, itou rinone mabbiakka mananturrutta lempangi Kristus.

Parenta apan wakku

⁷Manga turrangnga apan arangnguanna! Apa niworre'u indi walineuwe sambau parenta apan wakku. Indi parenta tabbe apan suete niapaasingkata siamiu ro'e n iamiu nanattakka mangngimanna si Kristus; eteudde watti'a wuassu Mawu Ruata apan suete niaringirrani amiu ro'e n iamiu taambe nangimanna.

⁸Salaiwe aroddi, parenta apan ta'u niworreta indi wakku lai; ana waugu atatulide wotongnge aellehanna su wadangi Kristus wurru lai su wadangi amiu. Ana waugu araranduma mabbulite wurru asasemakka apan atonna mannatake lullansiangnga.

⁹Taumata apan nabbisara manungku itou sulaļummu asasemakka arawe taumata udde ta'e maddantinu turrange, taumata udde ta'e su araranduma sara orassa indi. ¹⁰Taumata apan marangngu turrange, mabbiakka sulaļummu asasemakka na'oma n sara wuassi tou tawe sarun mapaema'u taumata waine sulaļummu rosa. ¹¹Arawe taumata apan maddantinnu turrange, udde sulaļummu araranduma. Itou u'amatta sulaļummu araranduma, wurru wagga watukuapa amatanne, ana waugu araranduma udde naawuta sitou.

¹²Ia'u namorretu suratta indi siamiu, Aļarāna'u, ana waugu rosanu suete niampunganna ana waugu Kristus. ¹³Ia'u namorretu suratta indi

siamiu, manga iamangnga, ana waugu iamiu maaillaŋa Sitou apan uddete ro'e n aŋamonane. Ia'u namorretu suratta indi siamiu, manga umbasanna marŋuala, ana waugu iamiu suete nangema'i Aŋaŋleo.

¹⁴Ia'u namorretu suratta indi siamiu manga dario'a, ana waugu iamiu maaillaŋa Mawu Ruata Iamangnga. Ia'u namorretu suratta indi siamiu, manga iamangnga, ana waugu iamiu maaillaŋa Rengetanna apan uddete ro'e n aŋamonane. Ia'u namorretu suratta indi siamiu manga umbasanna marŋuala, ana waugu iamiu matohassa. Wisara Mawu Ruata uatana'a sulaŋummu naungngu, wuŋru iamiu suete nangema'i Aŋaŋleo.

¹⁵Ariete mandangngu runia indi, ara'e aŋawo'u sarannapa apan sulaŋummu runia indi. Amungkangu iamiu mandangngu runia, iamiu tawe mandangngu Iamangnga. ¹⁶Aŋawo'u sarannapa sulaŋummu runia indi – apan ipaapulu m pallaŋagu n taumata marosa, apan a'ellehanna see ian-nemma wuŋru ipamarabunga – sarangkanambone udde manga inolaanna apan tawe wuassu Mawu Ruata, ewe'e wuassu runia. ¹⁷Runia wuŋru aŋawo'u sarannapa sulaŋumme apan ipaapulu n taumata, tantaŋanna mabuli. Arawe taumata apan tuttuŋruta apulu Mawu Ruata, sidutu mabbiakka saran maŋannu-ŋannu.

Seetti Kristus

¹⁸Aŋarŋana'u panginsueannu tempo maranite! Suete niapaasingkata siamiu paarorone, manungku Seetti Kristus sarun rumanta; wuŋru orassa indi nirumantate anambo n taumata apan masseetti Kristus. Udde tatialane manungku panginsueannu runia maranite. ¹⁹Manga seetti Kristus eteudde manga taumata apan suete nanantangi ite, ana waugu imangitou su ŋinone waŋine taumata su sambau ringanni ite. Amungkangu imangitou taumata su sambau ringanni ite, imangitou mangke uaammulla ringanni ite. Arawe imangitou nanantangi ite, tadea'u matualage manungku tawe saran sangkatou wuassi mangitou apan atonna-tonna nasutta su reenganni ite.

²⁰Arawe iamiu suete nanengkamma Gharŋaho Mawu Ruata apan niwobboki Yesus Kristus wuŋru ana waugu udde iamiu sarangkanambone maaillaŋa aŋarŋa'a apan narŋino udde. ²¹Nariaddi ia'u namorretu suratta indi siamiu waŋinewe ana waugu iamiu waggan aŋarŋa'a apan narŋino, arawe ana waugu iamiu naaillaŋate wuŋru iamiu lai masingkate manungku tawe awusune sulaŋummu aŋarŋa'a apan narŋino udde.

²²Isai nangawusu eteudde taumata apan nabbisara manungku Mawu Yesus waŋinewe Ratu m Punnu Saŋamatta apan pina'ire Mawu Ruata. Taumata udde Seetti Kristus; itou tawe manga'u Iamangnga ara'e Ana'a. ²³Taumata apan tawe manga'u Ana'a, atappasanne tawe manengkamma

Iamangnga lai. Wufu taumata apan mangnga'u Ana'a, atappasanne mannengkama lai Iamangnga.

²⁴Ana waugu udde, watti'a apan suete niaringirani amiu ro'e n panattaranne iamiu mangngimanna, rinone rariaganni amiu mapia-pia sulaumu naungnga. Amungkangu watti'a udde, tatuturanni amiu mapia-pia, iamiu sarun mabbiakka sidutu uaukka ringannu Ana'a wufu Iamangnga. ²⁵Wufu ete indi apan pina'ire n Kristus sassane siite: wiakka tutune wufu saran malannu-lannu.

²⁶Ia'u namoretu suratta indi siamiu su ola'u manga taumata apan tantanna mangngawusu siamiu. ²⁷Arawe su ola'i amiu sassane, Kristus suete namobboku Gharraho-Ne siamiu. Wufu sulaumu Gharraho-Ne ta'e ringanni amiu, arie pia taumata waine mangarra'a siamiu. Ana waugu Gharraho-Ne manggarra'a siamiu su ola'u alawo'a; wufu apa apan ia'arra-Nge udde atonna, wafine wahia. Ana waugu udde, rinone iamiu tumurutta apa apan nia'ra'u Gharraho udde, wufu rinone iamiu sidutu mabbiakka uaukka ringanni Kristus.

²⁸Nariaddi, alarrana'u, paasidute mabbiakka uaukka ringanni Kristus, tadea'u su tempo Itou rumanta apia, iite sumaruanna Sitou ringannu napene ng kawawarani, wufu tawe ma'imbuni ana waugu massili. ²⁹Iamiu masingkate manungku Kristus mabbiakka tututuruta apulu Mawu Ruata. Ana waugu udde iamiu rinone masingkata lai manungku suapan taumata apan mabbiakka tututuruta apulu Mawu Ruata eteudde lai ana'u Mawu Ruata.

Manga alarrana'u Mawu Ruata

3 Pa'ellege, Mawu Ruata aroddi arangngune siite, na'oma n sara iite nia'u alarranang-Nge. Wufu atonna ete iite udde alarrana'u Mawu Ruata. Ana waugu udde runia apan laleo indi tawe maailala siite, ana waugu runia tawe maailala Mawu Ruata. ²Manga turangnga apan aranguanna! Ete iite orassa indi alarrana'u Mawu Ruata, arawe ola'i ite su tempo addantane taambe natualaga. Arawe iite masingkata manungku amungkangu Kristus rumanta, iite sarun maola'a ere Itou, ana waugu iite sarun maasilo Sitou sulaumu olang-Nge apan nasuungnga. ³Anambo n taumata apan pia antimma indi su saruanni Kristus, mandiaga ririne tadea'u atonna-tonna susi, waresi wuassu rosa ere lai Kristus udde lai susi.

⁴Taumata apan ma'ola'a rosa, nilumawangnga tita Mawu Ruata; ana waugu rosa uddewe lawawangnga su tita Mawu Ruata. ⁵Iamiu masingkata manungku Kristus nirumanta ana waugu mamappasa manga rosa n taumata, wufu paddarosa tawe sulaumu watangan-Ne. ⁶Anambo n

taumata apan mabbiakka uauukka ringanni Kristus, tawe sidutu ma'ola'a rosa. Taumata apan sidutu ma'ola'a rosa, saran paassa tawe maasilo si Kristus ara'e maailla Sitou.

⁷Manga alarřana'u, arie mamala n taumata mamono'a siamiu. Taumata apan tuttuřruta apulu Mawu Ruata, uddewe ana'u Mawu Ruata ere lai Kristus Ana'u Mawu Ruata. ⁸Arawe taumata apan matatana'a ma'ola'a rosa, ete itou uddewe ana'u Setanna, ana waugu Setanna marosa ro'e n alamonane. Ana waugu udde Ana'u Mawu Ruata nirumanta, eteudde makkimunsa'a manara n Setanna.

⁹Taumata apan naola'e Ana'u Mawu Ruata, tawe sidutu ma'ola'a rosa, ana waugu pallařagu Mawu Ruata sassane tatahuananni tou. Wuřru ana waugu Mawu Ruata udde Iamangnge, ne itou tawe sidutu ma'ola'a rosa. ¹⁰Ete indi paparřalane wuassu alarřana'u Mawu Ruata wuřru alarřana'u Setanna: suapan taumata apan tawe tumuřrutta apulu Mawu Ruata, ara'e tawe mandangngu tuřrange, itou wařine ana'u Mawu Ruata.

Paa'akkana sangkatou ringannu sangkatou

¹¹Ro'e n paarorone suete niapaasingkata watti'a indi siamiu: Iite řinone umakana sangkatou ringannu waine. ¹²Ariewe iite ere Kain, apan naola'a ana'u Setanna wuřru namate tuřrange sassane. Anio Kain namate tuřrange? Ana waugu manga inolaanna apan niolange udde nassala, arawe inolaannu tuřrange udde narřino.

¹³Ana waugu udde, manga tuřrangku, arie tumiangnga amungka-
ngu manga taumata su runia indi maddantini amiu. ¹⁴Iite masing-
kata manungku iite nařute wuassu papate, wuřru nabbiakke apia. Iite masingkatu udde, ana waugu iite u'akkanu sansuřungngu taumata. Taumata apan tawe umakkana, atappasanne ta'e tatařřinoannu papate. ¹⁵Taumata apan maddantinu tuřrange, eteudde tarřa pate, wuřru iamiu masingkata manungku sangkatou tarřa pate tawe maatahuanna wiakka tutune wuřru saran mařannu-řannu. ¹⁶Ringannu lařanne indi iite maasingkata ereapa mandangngu sansuřungnga taumata: Kristus suete nanantillu wiakke huna ng kite. Ana waugu udde, iite lai řinone manantillu wiakki ite huna manga tuřrangngi ite! ¹⁷Amungkangu sangkatou apan wiakke natimu naasilo tuřrange wiakke tawe natimu, arawe maddiri mantuřungngu tuřrange udde, ereapa taumata udde wotongnge mabbisara manungku itou mandangngu Mawu Ruata? ¹⁸Alarřana'u! Arie iite umakkana tumba'u su morřonga ara'e tumba'u ringannu wi-sara. Řinone iite umakkana ringannu aakkana apan tutune, apan nia-paaliatta'a ringannu inolaanni ite.

Awawarrani su saruannu Mawu Ruata

¹⁹Aroddiwe olangnge iite maasingkata manungku iite nareengnga alarrana'u Mawu Ruata apan atonna, wurru naungngi ite wotongnge matammuda su saruannu Mawu Ruata. ²⁰Iite masingkata, manungku amungkangu iite iapaasala naungngi ite, asingkatu Mawu Ruata magge-walanne wuassu asingkatu naungngi ite, wurru Itou masingkatu sarangkanambone. ²¹Nariaddi, manga turrangku apan arangnguanna, amungkangu naungngi ite tawe mapaasala ng kite, iite wotongnge sumaruanna Mawu Ruata ringannu awawarrani. ²²Wurru apa apan radoronganni ite wuassi Tou, iite sarun maasomba, ana waugu iite tutturuta manga parenta-Ne wurru ma'ola'a apa apan maaluaassa naung-Nge. ²³Parenta-Ne siite eteudde: Iite rinone mangngimanna Anang-Nge, eteudde Yesus Kristus, wurru iite rinone uararangngu, ere suete niparenta n Kristus siite. ²⁴Anambo n taumata apan tutturuta manga parenta Mawu Ruata, mabbiakka uauukka ringannu Mawu Ruata, wurru Mawu Ruata uauukka ringanni mangitou. Wurru iite masingkata manungku Mawu Ruata mabbiakka uauukka ringanni ite, ana waugu Itou suete nangong-golu Gharraho-Ne siite.

Gharraho rinone wurru gharraho mangngaliwu

4 Manga turrangnga apan arangnguanna! Arie pangimanna anambo n taumata apan mangnga'u Gharraho Mawu Ruata, arawe annama'a asuene imangitou tanne gharraho mangitou udde niarantanne wuassu Mawu Ruata ara'e tawe. Ana waugu manambo nabi awusu apan u'amatta su alawo'u tampa. ²Ereindi olangnge tadea'u iamiu maasingkata apa udde Gharraho Mawu Ruata ara'e tawe: Taumata apan mangnga'u Yesus Kristus nirumanta su runia naola'a taumata, taumata udde pia Gharraho apan darantane wuassu Mawu Ruata. ³Arawe taumata apan tawe manga'u olangnge indi su ola'u Mawu Yesus, tawe uatahuanna Gharraho Mawu Ruata. Taumata udde pia gharraho wuassu Setti Kristus. Turanga suete naaringikka manungku Gharraho udde sarun rumanta, wurru orassa indi itou uddete sulalummu runia indi.

⁴Arawe Alarrana'u, iamiu pussa'a Mawu Ruata, iamiu suete napaaema'u manga nabi awusu, ana waugu Gharraho 'apan tatahuananni amiu lembon matarrino wuassu gharraho apan su taumata tatahuanannu runia indi. ⁵Manga nabi awusu udde mabbisara su ola'u runia, wurru runia maddaringika wisara mangitou, ana waugu imangitou pussa'a n

runia. ⁶Arawe ete iite indi ałarřana'u Mawu Ruata; wuřru taumata apan maaillała Mawu Ruata, madingikka wisara ng kite. Taumata walıne pussa'a Mawu Ruata maddiri madingikka wisara ng kite. Aroddiwe olange iite maasingkatu pařalannu Gharřaho apan mangngonggolu ałarřa'a apan atonna, wuřru gharřaho apan mangngałiwu.

Mawu Ruata udde maakkana

⁷Manga tuřrangnga apan aranguanna! Wette iite maa'akkana sangkatou ringannu sangkatou, ana waugu aakkana darantane wuassu Mawu Ruata. Taumata apan u'akkana, eteudde ana'u Mawu Ruata wuřru itou maaillała Mawu Ruata. ⁸Taumata apan tawe umakkana, tawe maaillała Mawu Ruata; ana waugu Mawu Ruata udde maakkana. ⁹Mawu Ruata napaalıatta'a manungku Itou u'akkani ite ringannu nandolokku Anang-Nge tinggasa sulałummu runia tadea'u iite maasomba wiakka wuassu Anang-Nge udde. ¹⁰Ete indi aakkana: Walıne iite apan suete niuamakkanu Mawu Ruata, arawe Mawu Ruata apan niuamakkani ite wuřru nandolokku Anang-Nge tadea'u wuassi Tou iite maasomba aampungu rosa ng kite.

¹¹Manga tuřrangnga apan aranguanna, amungkangu Mawu Ruata aroddi aranguene siite, iite lai řinone marangu su sansułunga taumata. ¹²Tawe saran sangkatou apan suete naasilo Mawu Ruata, arawe amungkangu iite uararangu, Mawu Ruata uaukka ringanni ite wuřru darangu-Ne masungnga sulałummu watanganni ite.

¹³Ana waugu Mawu Ruata suete nangonggolu Gharřaho-Ne siite, ne iite madingkata manungku iite suete nabbiakka uaukka ringannu Mawu Ruata, wuřru Mawu Ruata mabbiakka uaukka ringanni ite. ¹⁴Iami sassane suete naasilo Ana'u Mawu Ruata, wuřru iami namasingkata manungku Itou nirolokku Iamangnga maola'a Ratu m Punnu Sałamattu runia indi. ¹⁵Isa-sai apan mangnga'u manungku Yesus udde Ana'u Mawu Ruata, Mawu Ruata mabbiakka uaukka ringannu taumata udde, wuřru taumata udde lai mabbiakka uaukka ringannu Mawu Ruata. ¹⁶Iite sassane madingkata wuřru mangngimanna darangu Mawu Ruata siite.

Mawu Ruata udde marangu. Taumata apan wiakke paparentannu darangu, taumata udde uaukka ringannu Mawu Ruata, wuřru Mawu Ruata uaukka ringanni tou. ¹⁷Darangu niola'a nasungnga sulałummu watanganni ite, tadea'u iite pia awařřani su Allo m Pamamarikisanna. Iite sarun pia awařřani, ana waugu wiakki ite sulałummu runia indi ere lai wiakki Kristus. ¹⁸Taumata apan uapendama darangu Mawu Ruata, tawe apendama matta'uta; ana waugu da-

rangngu apan nasuungnga mapaawuŋi n atata'uta. Nariaddi natualage manungku taumata apan taambe naapendama darangngu Mawu Ruata ringannu nasuungnga amungkangu taumata udde matta'utta sumaruanna Allo m Pamamarikisanna.

¹⁹Ite mandangngu, ana waugu Mawu Ruata doronete nandangngu siite. ²⁰Amungkangu pia sangkatou mabbisara, "Ia'u marangngu Mawu Ruata," arawe itou tawe mandangngu turŋange, taumata udde tarŋa wahia. Ana waugu taumata apan tawe mandangngu turŋange apan aa-siloanne, tawe mariaddi wotongnge mandangngu Mawu Ruata apan tawe asiloanne. ²¹Ana waugu udde, ete indi parenta apan nionggoli Kristus siite: Isai apan mandangngu Mawu Ruata, ŋinone lai mandangngu turŋange.

Auntunganni ite su wowo n runia

5 Taumata apan mangngimanna manungku Yesus udde Ratu m Punnu Saŋamatta apan pina'ire Mawu Ruata, taumata udde ana'u Mawu Ruata. Taumata apan mandangngu sangkatou lamangnga, marangngu lai anangnge. ²Ringannu laŋanne indi iite maasingkata manungku iite marangngu aŋaŋana'u Mawu Ruata: Iite mandangngu Mawu Ruata wuŋŋu tuttuŋŋuta manga parenta-Ne. ³Ana waugu, mandangngu Mawu Ruata atapasanne tuttuŋŋuta manga parenta-Ne. Wuŋŋu manga parenta-Ne tawe maawakkata siite, ⁴ana waugu suapan aŋaŋana'u Mawu Ruata wotongnge maaroappa runia apan laŋeo indi. Wuŋŋu iite mandoappa runia ringanu pangangimanni ite. ⁵Isai wotongnge maarooppa runia? Tumba'u taumata apan mangngimanna manungku Yesus udde Ana'u Mawu Ruata.

Tiala su ola'i Yesus Kristus

⁶Ete Yesus Kristus apan nirumanta su runia ringannu ua'e n Sasarŋani wuŋŋu ringannu ŋaŋŋa m papate-Ne. Itou nirumanta waŋine tumba'u ringannu ua'e sassane, arawe ringannu ua'e wuŋŋu ŋaŋŋa. Wuŋŋu Ghaŋŋaho Mawu Ruata sassane nangonggolu tialane manungku udde atonna, ana waugu Ghaŋŋaho taambe namahia. ⁷Pia tatallu mattatia-lane: ⁸Ghaŋŋaho Mawu Ruata, ua'e wuŋŋu ŋaŋŋa – imangitou n tallu udde mangngonggolu tatiala apan nasuŋungnga. ⁹Ite mangngimanna su tatiala n taumata, arawe tatiala wuassu Mawu Ruata mattohasanna lai. Wuŋŋu eteudde tatiala apan nionggolu Mawu Ruata su ola'u Anang-Nge. ¹⁰Ana waugu udde, taumata apan mangngimanna su Ana'u Mawu Ruata, suete nanengkamma tatiala udde sulaluŋmu naungnge; arawe taumata apan tawe mangngimanna Mawu Ruata, nassunnate manungku

Mawu Ruata tarra wahia, ana waugu itou tawe mangngimanna apa apan iwabaŋo Mawu Ruata su ola'u Anang-Nge. ¹¹Ete indi tatialane udde: Mawu Ruata suete nangonggolu wiakka tutune wuŋru maŋannu-ŋannu siite, wuŋru Anang-Nge uddewe punnu wiakka udde. ¹²Taumata apan uatahuanna Ana'u Mawu Ruata, uatahuanna wiakka udde; wuŋru tau-mata apan tawe uatahuanna Sitou, tawe uatahuanna wiakka udde.

Wiakka tutune wuŋru saran maŋannu-ŋannu

¹³Ia'u namorretu suratta indi siamiu apan mangngimanna Ana'u Mawu Ruata, tadea'u iamiu masingkata manungku iamiu plate biakka tutune wuŋru saran maŋannu-ŋannu. ¹⁴Wuŋru iite warrani sumaruanna Mawu Ruata, ana waugu iite mangngimanna manungku Itou naddaring-ikka aaljomanni ite, amungkangu iite madorongnga apa apan uaturruta su apulu-Ne. ¹⁵Ana waugu iite masingkata manungku Itou maddaring-ikka siite amungkangu iite madorongnga Sitou, ne iite masingkata lai manungku Itou nangonggolu apa apan radoronganni ite Sitou.

¹⁶Amungkangu iamiu naasilo sangkatou sansulungnga taumata n Sarrani ma'ola'a rosa apan tawe maaola'a taumata udde awuŋiannu wiakka tutune wuŋru saran maŋannu-ŋannu, rinone iamiu umaljomanna su Mawu Ruata; ne Mawu Ruata sarun mangonggolu wiakka udde sitou. Indi matatarriŋo simangitou apan rosane tawe maawuŋi m wiakki mangitou udde. Arawe pia lai rosa apan maawuŋi m wiakka udde su taumata. Su olangnge udde ia'u tawe mabbisara manungku iamiu rinone umaljomanna su Mawu Ruata. ¹⁷Anambo n inolaanna apan nassaŋa uddewe rosa, arawe pia rosa apan tawe maaola'a taumata awuŋiannu wiakka tutune wuŋru saran maŋannu-ŋannu udde.

¹⁸Iite masingkata manungku anambo n taumata apan suete naola'a alarŋana'u Mawu Ruata, tawe sidutu ma'ola'a rosa, ana waugu Ana'u Mawu Ruata uasirugnga sitou, wuŋru i Laŋeo tawe mapa'ola'a apa-apa sitou.

¹⁹Iite masingkata manungku iite pussa'a Mawu Ruata, salaiwe ahe-wallu runia indi su alungngu tarriŋo ng Kaŋaŋeo.

²⁰Iite masingkata manungku Ana'u Mawu Ruata suete nirumanta wuŋru suete nangonggolu pasasunna siite, tadea'u iite maaillaŋa Mawu Ruata apan narriŋo. Iite mabbiakka uaukka ringannu Mawu Ruata apan narriŋo wuŋru mabbiakka uaukka ringannu Anang-Nge Yesus Kristus. Ete indi Mawu Ruata apan narriŋo, wuŋru ete indi wiakka tutune wuŋru saran maŋannu-ŋannu.

²¹Manga alarŋana'u, paaraua'e watanganni amiu wuassu alawo'u paaŋuanna!

SURATTI YOHANES

ARUANE

WISARA TALAAANE

Suratti Yohanes Aruane indi niwoŕŕetu "piaŕŕa'u jamaatta" su "Inangnga apan nípíle Mawu Ruata" wuŕŕu su manga aŕaŕŕanangge apan arangnguanne. Asinungka pandumannu wisara "Inangnga wuŕŕu aŕaŕŕanangge" eteudde sambau jamaatta wuŕŕu manga anggotane.

Sulaŕummu suranne apan maautta indi mamamoŕŕetu suratta indi madorongnga darua inolaanna su mabbawasane. Paarorone tadea'u imangitou mandangngu sangkatou ringannu waine. Aruane, tadea'u imangitou paatehamma su saruannu manga huru awusu wuŕŕu manga aŕaŕŕa'u huru udde.

Laloŕŕone

Panattaŕŕanne	1-3
Hunane darangngu	4-6
lapaanaungnga su ola'u manga aŕaŕŕa'a apan saŕa	7-11
Panginsueanne	12-13

1 Su Inangnga apan suete nipile Mawu Ruata, wuṛṛu su manga aḷaṛṛana'u Inangnga. Suratta indi wuassia'u, piaṛṛa'u jamaatta apan atonna-tonna marangngu siamiu. Waḷine tumba'u ia'u, arawe anambo n taumata apan maaillaḷa Mawu Ruata apan naṛṛino, marangngu siamiu lai. ²Ana waugu Mawu Ruata uatana'a sulalummu naungngi ite, wuṛṛu sidutu uatana'a ringanni ite saran maḷannu-ḷannu.

³Antimanna iite ongoḷannu aḷamatta, aakkana wuṛṛu paddarame wuassu Mawu Ruata Iamangnga, wuṛṛu Yesus Kristus Ana'u Iamangnga udde. Antimanna sarangkanambone udde tatahuananni ite ringannu naungnga apan matuḷida wuṛṛu ringannu darangngu.

Atatuḷidda wuṛṛu darangngu

⁴Ia'u lembon lulluassa napawe naasingkata manungku pia aḷaṛṛana'u Inangnga apan mabbiakka tuttuṛṛuta aḷaṛṛa'u Mawu Ruata, ere lai suete nirolokku Mawu Ruata Iamangnga siite. ⁵Ana waugu udde, Inangku, ia'u sumalannde tadea'u iite sarangkanambone uararangngu. Apa ta'u iwabbaḷo indi waḷine sambau tita apan wakku; tita indi suete nionggolla siite ro'e n iite nanattakka mangngimanna. ⁶Mandangngu atappasanne mabbiakka tuttuṛṛuta manga parenta Mawu Ruata. Wuṛṛu manga parenta apan suete niaringiṛṛani amiu ro'e n paarorone eteudde manungku iamiu rinone mabbiakka uararangngu sangkatou ringannu sangkatou.

⁷Manambo taṛṛa wahia nassaliawukke su ahewallu runia. Imangitou eteudde manga taumata apan tawe manga'u manungku Yesus Kristus nirumanta su runia indi naola'a sangkatou taumata. Taumata ereudde uddewe taṛṛa wahia, wuṛṛu Seetti Kristus. ⁸Ana waugu udde, paariagaite arie ma'oma n sara iamiu awuḷiannu apa apan suete nionggoli ami siamiu. Paddea'e tadea'u iamiu manengkamma laḷantake wuassu Mawu Ruata.

⁹Taumata apan tawe uaaggasa aḷaṛṛa'i Kristus, arawe sinumewada wuassu apa apan niaṛṛa'i Kristus, taumata udde tawe maatuahanna Mawu Ruata. Taumata apan sidutu uatundeeta su aḷaṛṛa'i Kristus, atappasanne uatahuanna Mawu Ruata Iamangnga aroddi lai Ana'a. ¹⁰Ana waugu udde, amungkangu pia taumata rumanta wuṛṛu mabatti'a siamiu aḷaṛṛa'a apan tawe niaṛṛa'i Kristus, arie manarimmattu taumata udde sulalummu waḷenu ara'e mattabea sitou. ¹¹Ana waugu taumata apan mattabea su taumata ereudde suadio'a lai itou ma'ola'a aḷaḷeo ringannu taumata udde.

Manga wisara panginsueanne

¹²Ta'e manambo atonna apan ta'u iwaŋo siamiu, arawe pendamanna apianne tawe sulaŋummu suratta. Ia'u mangantimma wotongnge maa-tembo wuŋru maggahato ng kamiu, tadea'u naungngi ite atonna-tonna lulluassa.

¹³Manga aŋaŋrana'a wuassu tuŋraŋgi Inangnga wawine apan nipile Mawu Ruata lai, napaapiddu tabea su Inangnga.

SURATTI YOHANES

ATALLUNE

WISARA TALAANE

Suratti Yohanes Atallune indi niwoŕretu sangkatou "piaŕra'u jamaatta" aranne Gayus. Mamamoŕretu suratta indi maddalo si Gayus ana waugu sumbalane su manga taumata n Saŕrani waine. Itou lai napaanaungnga si Gayus su ola'u sangkatou esakka aranne Diotrefes.

Laŕoŕrone

Panattaranne	1-4
Gayus niraloanna	5-8
Diotrefes niapaasaŕa	9-10
Demetrius niraloanna	11-12
Panginsueanne	13-15

1 Turɽanga Gayus apan aranguanna!

Ia'u piarra'u jamaatta, apan atonna-tonna mandangu si'o, ²u'aliomanna tadea'u antimanna turɽanga tawe auranganne wuɽu saranganambone mapia-pia si'o, ere lai rimuudde mapia-pia lai. ³Ia'u lulluassa tassulungge, su tempo manga pira turɽanga Sarɽani na'oma wuɽu nabbatti'a sia'u manungku aroddi atuɽune turɽanga su Mawu Ruata apan su rinone udde, ana wugu atonna turɽanga wotongge sidutu mabbiakka tuttuɽuta alaɽra'u Mawu Ruata. ⁴Taweddu apan lembon maaluaassa naungku, wuassu ia'u maaringikka manungku manga alaɽrana'u mabbiakka tuttuɽuta alaɽra'u Mawu Ruata.

Gayus niraloanna

⁵Turɽangu! Turɽanga aroddi atuɽune sulalummu manara apan a'olaannu turɽanga su manga hawe labbisa taumata n Sarɽani; ewe'e lai manga taumata n Sarɽani apan taambe niasingkatannu lai, a'imbeanni amiu. ⁶Imangitou suete namasingkata su jamaatta apan pammanaranni ami su ola'u daranggunu udde. Tuɽunga'a imangitou tadea'u wotongge maasassu amatanni mangitou wuɽu ringannu aroddi maaluaassa naunggu Mawu Ruata, ⁷ana wugu sulalummu amatanna mabatti'u ola'i Kristus, imangitou tawe naasengkamma sasumbala sara ng kadio'a wuassu manga taumata apan tawe maailala Mawu Ruata. ⁸Ana wugu udde, iite manga taumata n Sarɽani rinone mantulunggu manga turɽangi ite apan labbisa taumata n Sarɽani ereudde, tadea'u iite wotongge su sambau sulalummu manara mangitou mabatti'u alaɽra'a su rinone wuassu Mawu Ruata.

Diotrefes wuɽu Demetrius

⁹Ia'u suete namorɽetu suratta apan maautta su jamaatta, arawe Diotrefes apan maapulu maola'a piarra'u jamaatta, maddiri tumuɽutta sia'u. ¹⁰Napawe ia'u rumanta, ia'u sarun mamasingkatu ala'awo'u inolaanne, eteudde inolaanna apan laɽe wuɽu awusu apan niwisara n tou su ola'i ami! Arawe saranganambone udde taambe nasuungga maola'a hunane. Su tempo manga hawe labissa taumata n Sarɽani udde nirumanta, itou maddiri manarimmatti mangitou. Ewe'e lai itou nangingadu manga taumata apan maapulu manarimmattu manga turɽanga udde, wuɽu itou nandolokku manga taumata udde sumabbanga wuassu jamaatta!

¹¹Turɽanga apan arangnguanna, ariewe mattanno apa apan laɽeo udde. Pattannote apa apan mapia. Taumata apan inolaanne mapia uddewe pussa'a Mawu Ruata. Wurru taumata inolaanne laɽeo taambe naaillaɽa Mawu Ruata.

¹²Anambo n taumata maddalo si Demetrius. Ewe'e Mawu Ruata lai maddalo sitou. Iamiu lai maddalo sitou wurru turɽanga masingkata manungku apa apan iwabbatti'i ami udde apangimananna.

Tabea ainsue n suratta

¹³Ta'e manambo atonna apan ta'u iwaɽo siamiu, arawe ia'u mam-mendama mappianne arie sulaɽummu suratta. ¹⁴Ia'u mangantimma lai tate maɽannu iite massomba, wurru iite wotongnge maggahatto suadio'a.

¹⁵Antimanna Mawu Ruata mangaɽamatta turɽanga.

Manga hawenu su tampa'u indi nandoho n tabea lai sio. Waɽoa'a tabea'u su anambo n manga hawe ng kite sambau-sambau.

SURATTI YUDAS

WISARA TAĻAANE

Suratti Yudas indi niworreta hunane iapaanaungnga su mabbawasane tadea'u maantaga su saruannu manga huru awusu apan mannago n watanganne Sarrani. Sulaġummu suratta apan maautta indi apan laġorrone ere lai suratti Petrus aruane, mamamorrene mangngonggolu sasasa su mabbawasane tadea'u sidutu mammanara maddea'a pangangimanna.

Laġorrone

Panattaranne	1-2
Pallaġagu, aġarra'a wuġru ola'u manga huru awusu	3-16
Tatantiro tadea'u sidutu mangngimanna	17-23
Aaġiomanna daralo	24-25

1 Manga turrangnga apan suete niwagoanna wurru lembon arangnguannu Mawu Ruata Iamangnga, see rariaganna ana waugu Mawu Yesus Kristus. Naola'a allangngi Yesus Kristus, ia'u - Yudas - turrangngi Yakobus, ²mangngantimma:

Antimanna Mawu Ruata mangonggolu alamatta, darangngu wurru paddarame siainiu ringannu manambo-nambo.

Manga huru awusu

³Manga turrangnga apan arangnguanna! Ia'u atonna-tonna pia pandumanna mamorrettu suratta siamiu su ola'u asalamatta apan suete niapendamanni ite suadio'a. Arawe orassa indi ia'u pia pandumma mangarra'a siamiu ringannu suratta indi tadea'u iamiu sidutu mamma-nara maddea'a pangangimanna apan paassate nionggolu Mawu Ruata ma'oma n sara malannu-lannu su alarranang-Nge. ⁴Ana waugu ringannu niawagananni ite, pia manga taumata waine apan sinumutta naijalo'a su pattangnganni ite. Imangitou manga taumata laleo, apan mam-malolongngu watti'a su ola'u darangngu m Mawu Ruata ng kite, tadea'u imangitou pia tempo mapaasabangngu apulu naungngi mangitou laleo. Wurru imangitou mannoja'u Mawu Yesus Kristus, eteudde sangkatou Tembonanne wurru Mawu ng kite. Roe n alamonane ruumanni mangitou suete niapaasingkata sulaummu Wuke Susi.

⁵Sarangkanambone udde iamiu masingkate. Arawe ia'u maapulu mapaanaungngi amiu su ola'u ereapa Mawu manalamatta pabbawalagu Israel wuassu leta'u Mesir, arawe wua udde namate manga taumata apan tawe mangngimanna su wallatti mangitou. ⁶Paanaunge lai manga mala'ekatta apan nalliu passerannu tarrino mangitou, naoman sara nanantangu tampa atatanaanni mangitou. Mawu Ruata namantungu manga mala'ekatta udde ringannu rate apan tawe mawu'a, sulaummu tampa apan maranduma su alungngu runia. Poiaroddi imangitou sidutu tatarranganna ma'oma n sara imangitou irru'umanna su Allo apan wahewalla udde. ⁷Naunge'o lai soa Sodom wurru Gomora wurru manga soa maranine, apan inolaannu tumanangnge ere lai inolaannu manga mala'ekatta udde. Imangitou sussandaga wurru ma'ola'a alaleo, na'oma n sara imangitou niramme sulaummu putungnga apan tawe panginsueanne, tadea'u maola'a sambau pannanaunganna su anambo n taumata.

⁸Aroddi lai manga taumata udde maringiddu baljawa na'oma n sara imangitou ma'ola'a rosa su wadangngi mangitou sassane. Imangitou mangngadio'a tarrino Mawu Ruata wurru mangngaluandaga manga inolaannu Mawu apan mawantuga su surga. ⁹Mikhael sassane, apan naola'a

tembonannu manga malaekatta, tawe pallaḷagu ereudde. Su tempo itou natatiakku Setanna sulaḷummu pabbawawuḷo su ola'u isai apan naa-somba winaḷunanni Musa, Mikhael tawe warḷani makkuumannu Setanna ringannu wisara ipangngadio'a. Mikhael tumba'u nabbisara, "Mawu sarun mamuḷo si'o"! ¹⁰Arawe ringannu manga aḷuandaga, manga tau-mata udde namangalo aḷawo'u apa apan tawe asunnanni mangitou. Imangitou nasuḷunga ere manga winatangnga apan tawe riṅgide, apan maasingkatu inolaanne wuassu nianaramanne. Arawe ete inolaanna udde naaḷaḷeo simangitou. ¹¹Nasilakate imangitou! Imangitou suete niu-mamatta su laḷanni Kain. Tadea'u maasomba roitta, imangitou namon-tollu wadangge su inolaanna laḷeo ere Bileam. Wuḷḷu imangitou lai nipate ana waugu nilumawanna ere Korah. ¹²Su tempo iamiu na'ola'a andeangnga, pallaḷagu manga taumata udde maarantinna su wal-latti amiu. Ana waugu imangitou u'anna manambo-nambo ringannu tawe masili, wuḷḷu tumba'u marṅingiddu watanganne sassane. Imangi-tou naaḷihida winabbawa iattalla'u anginna, arawe tawe manguranna. Imangitou lai ere alu apan tawe mabbua salaiwe su tempo m pabba-wua; manga alu apan suete niabutta ramunne wuḷḷu natete abbi. ¹³Ere lai lua'a maḷaraga su tahaḷoangnga lullupa, aroddi lai imangitou lullupa manga inolaanna apan maasili. Imangitou ere lai manga anumpitanna apan lullallele apan suete nisaddia Mawu Ruata tampane sulaḷummu araranduma apan masaddatta ma'oma n sara maḷannu-ḷannu.

¹⁴Henokh, pangangawanna appitune wuassi Adam, dorone suete namasingkatu ola'u manga taumata udde. Henokh nabbisara, "Pa'ellega, Mawu sarun rumanta ringannu su riwune mala'ekan-Ne apan susi, ¹⁵ana waugu makkuumannu anambo n taumata. Mawu sarun makkuumannu manga taumata laḷeo ana waugu manga inolaanni mangitou apan tawe matataḷṛino. Wuḷḷu Itou sarun makkuumannu taumata marosa wuḷḷu laḷeo, ana waugu anambo n manga wisarane apan ipangngaḷuandaga.

¹⁶Manga taumata udde sidutu sussungkuta wuḷḷu mapaasaḷa n tau-mata waine. Imangitou mabbiakka tuttuḷṛutta manga apulu naungngi mangitou apan marosa. Imangitou taḷṛa watti'u watanganni mangitou sassane, wuḷḷu massaḷo'u taumata ana see maasomba auntunganna."

Iappanaungnga wuḷḷu ipanantiro

¹⁷Arawe tuḷṛangu apan arangnguanna, paanaunge apa apan dorone niwisara manga rasulu Mawu ng kite Yesus Kristus. ¹⁸Imangitou nama-singkata paarorone siamiu manungku maddani n allo m panginsueanne sarun rumanta manga taumata apan sarun mangaḷuandaga siamiu, ete-udde manga taumata apan mabbiakka tuttuḷṛutta apulu mangitou apan

marosa. ¹⁹Ete imangitou indi apan mapaaranta m patatiakka. Imangitou tawe tatařřinoannu Gharřaho Mawu Ruata, ewe'e tatařřinoannu palalařu n runia. ²⁰Arawe iamiu manga turřangku, padduřianete sidutu wiakku sulařummu pangangimannu si Yesus Kristus. Pangangimannu udde lembon susi. Tantařanna udde aařiomante ringannu Tarřino Gharřaho Mawu Ruata, ²¹wurřu pabbiakke sidutu sulařummu darangngu Mawu Ruata tantařanna iamiu ualařřado alařatti Yesus Kristus Mawu ng kite, apan sarun mangongogolu wiakka tutune wurřu saran mařannu-řannu siamiu.

²²Matatarřino su manga taumata apan naungnge niuমাঁিৱু, řinone iamiu mappa'ellegu paa'akkana. ²³Wolengke taumata udde paasab-banga'a wuassu lařummu putungnga ana see imangitou masařamatta. Su saruannu manga taumata waine řinone iamiu mapaařiatta'u darangngu rarundinganannu apendama matta'utta, arawe arantinte n sara lai laubbi mangitou apan napene n luhudu alařeo mangitou apan marosa.

Aařiomanna daralo

²⁴Mawu Ruata, apan wotongnge mallu'adda siamiu ana see tawe manawo, wurřu wotongnge mangapiddu su araratuan-Ne apan mawantuga ringannu alařuassa apan tawe urangnge, ²⁵tumba'u Itou sassane Mawu Ruata, Punnu Sařamatti ite sulařummu Yesus Kristus Mawu ng kite. Ete Itou Mawu Ruata apan mawantuga, ahewařanne, pia tarřino, wurřu pia sařraungnge ro'e n alařonane ma'oma n sara orasa indi wurřu saran mařannu-řannu! Amin.

SONDAPPA

SI YOHANES

WISARA TALAANE

Sondappa Si Yohanes indi niwoŕŕeta su tempo n taumata n Saŕrani isa-ssingada wuŕru sassansaranna ana waugu mangngimanna Mawu Yesus Kristus sangkatou Mawu. Pandumannu mamamoŕrene paarorone ete-udde mangngonggolu antimma see atatohassa su mabbawasane, wuŕru lai ipannasa simangitou tadea'u sidutu mangngimanna su tempo sassan-saranna wuŕru isassingada.

Laŕoŕro m wuke indi su wageangnge ahewaŕanne natahia wuassu manga pira arariaddi n sondappa wuŕru aellega apan niwatti'a ringannu mappaattu sasumandinga apan atappasanne wotongnge asunnannu manga taumata n Saŕrani su tempo udde, arawe masahadda sunnannu manga taumata waine. Punnu ringidda apan iapaasingkatta sulaŕummu wuke indi masokka isule sulaŕummu aŕawo'u hati n inolaanna ringannu aŕawo'u wageangngu aellega. Salaiwe niasombanganna manambo adda-patta apan uapapaŕŕala su ola'u pananaŕa'a laŕoŕro n wuke indi, arawe laŕoŕro n ringiranne masemakka, eteudde sulaŕummi Kristus, Mawu Ruata panginsueanne sarun mallimbuakka anambo n seen-Ne, nasutta lai Setanna. Wuŕru amungkangu auntunganna udde inasombangante, Mawu Ruata sarun manantilu surga apan wakku wuŕru runia apan wakku maola'a sambau laŕantake su aŕaŕranang-Nge apan matuŕŕuta.

Laŕoŕrone

Panattaŕanne	1:1-8
Aellega paarorone wuŕru manga suratta	
su pitu jamaatta	1:9-3:22
Wuke laŕuŕunanna wuŕru pitu segele	4:1-8:1
Pitu trompeta	8:2-11:19
Naga wuŕru winatangnga rua m bua	12:1-13:18
Aŕawo'u hati n aellega	14:1-15:8
Pitu asasa'u Mawu Ruata	16:1-21

Ananawo m Babel, papate n winatangnga, nabi tarra	
wahia wurru Setanna	17:1-20:10
Ruumanna panginsueanne	20:11-15
Surga wakku, runia wakku, Yerusalem wakku	21:1-22:5
Panginsueanne	22:6-21

1 Laŋorŋo n wuke indi mabatti'a su ola'u apa apan suete niapaaliatta'u Mawu Yesus su ola'u manga arariaddianna apan sarun mariaddi. Mawu Ruata namasingkata Mawu Yesus tadea'u Itou mamasingkata su manga allangngu Mawu Ruata, apa apan ŋinone maŋihakke mariaddi. Kristus nandolokku mala'ekan-Ne si Yohanes, allang-Nge, iapapasingkatu manga arariaddianna udde sitou. ²Ne Yohanes nabbati'e n sarangkanambone apan niasiloanne udde; wuŋŋu ete indi watti'i tou su ola'u tanata n Mawu Ruata apan tinohassu Mawu Yesus Kristus wuassu tatialane. ³Laŋumanna'a su taumata apan mabbasa wuŋŋu maddaringikka watti'u papatta m wuke indi see tuttuŋŋuta apa apan uaworŋetta sulalummu wuke indi. Ana waugu tate maŋannu lai sarangkanambone indi sarun mariaddi.

Tabea su pitu jamaatta

⁴Manga tuŋŋanga apan uatana'a su pitu jamaatta su leta'u Asia! Ia'u Yohanes, mangngantimma iamiu onggolaŋnu alaŋmatta wuŋŋu alaŋuassa wuassu Mawu Ruata - eteudde Itou apan nirumanta, apan nirumantate wuŋŋu apan nirumanta sarangkaŋo'engnge - wuŋŋu lai wuassu pitu ghaŋraho apan uatana'a su saruannu addera n araratuannu Mawu Ruata, ⁵wuŋŋu wuassi Yesus Kristus, mattatjala apan maŋuŋŋuta. Ete Itou apan paarorone niapaawiakka apia wuassu papate wuŋŋu ete Itou ahebbalaŋne uaparenta manga ratu n runia.

Mawu Yesus mandangngu siite, wuŋŋu ringannu papate-Ne, Itou naŋaaliu ng kite wuassu manga rosa ng kite, ⁶wuŋŋu nandiadi siite sambau pabbawalagu manga imam, apan mangngimbe Mawu Ruata, lamang-Nge. Mawu Yesus Kristus eteudde awantuhanne wuŋŋu uataŋŋino sarangkaŋo'engnge. Amin!

⁷Pa'ellega Itou rumanta sulalummu winabbawa! Anambo n taumata sarun ma'ellega Sitou, nasutta imangitou lai apan nangusu'a Sitou. Anambo n pabbawalaga su runia sarun lumaŋo n Tou. Ore, Atonna! Amin!

⁸"Ete Ia'u apan paarorone wuŋŋu pangudusanne," wisara n Mawu Ruata, apan nirumanta, apan nirumantate, wuŋŋu nirumanta sarangkaŋo'engnge, Apan Lembon Taŋŋino.

Aellega su ola'i Kristus

⁹Ia'u Yohanes, tuŋŋangu apan maŋuassa wuŋŋu maŋsusa suadio'a ringanni amiu sulalummu asasusa apan naŋŋia'a su mallalaŋŋenggeni



Tarṛanusa m Patmos (1:9)


Kristus. Iite masabare matatarṛanga ana waugu pabbawalaga pussa'a-Ne. Ia'u niramime su Patmos ana waugu ia'u mammasingkatu tanata Mawu Ruata, apan tinohassu Mawu Yesus sulaḷummu tiala-Ne. ¹⁰Su allo Mawu, ia'u niasuttannu Gharṛaho Mawu Ruata, see ia'u naaringikka tingikka apan ma'ikkatta - nassuḷungngu tingikku trompeta - mabbisara su liu'u. ¹¹Tingikka udde nabbisara, "Worṛetta'a apa apan niasiloannu, wuṛṛu ongoḷa'a wuke udde su pitu jamaatta apan isassago indi: Efesus, Smirna, Pergamus, Tiatira, Sardis, Filadelfia, wuṛṛu Laodikia."

¹²Ia'u nanaile watukku liudde ma'ellega isai udde mabbisara sia'u. See ia'u naasilo pitu m bua ledda n soḷo apan niola'a wuassu wuḷawanna. ¹³Su pattangngannu manga ledda n soḷo udde uarisikka sangkatou apan niasiloanna naaḷihidda taumata. Itou uaḷurṛe n jubah alo'engnge na'oma n sara ledda. Su sabba-Nge, Itou uapaattu laḷindumu ro'o wuassu wuḷawanna. ¹⁴Utang-Nge mawira ere wambuḷu n domba, awirane ere sangarennna. Mata-Ne luṛṛenggama ere putungnga; ¹⁵ledda-Ne luṛṛenna naaḷihida witu'a ittattambuna. Tingik-Ke naaḷihidda tingikku ua'e mappampassa apan wahewalla. ¹⁶Lima uanan-Ne uaagassa anum-pitanna pitu, wuṛṛu wuassu moṛṛo-Nge sinumabangnga haḷele maṛṛoro sammata, apan roṛrone rua m ba'a. Hati-Ne lullansiangnga naaḷihidda matannallo su allo allattune. ¹⁷Su tempo ia'u naasilo, ia'u nassumaga su saruan-Ne ere taumata nate. Arawe Itou namita n lima-Ne aikkatanna sia'u see nabbisara, "Arie paata'utta! Ete Ia'u apan paarorone wuṛṛu pa-ngudusanne. ¹⁸Ete Ia'u Itou apan wiakka! Ia'u natete, arawe pa'elege, Ia'u wiakka saran maḷannu-ḷannu. Ia'u uatarṛino papate, wuṛṛu su wowo n runia n taumata nate. ¹⁹Ana waugu udde worṛetta'a manga ino-

laanna apan niasiloannu, eteudde manga inolaanna apan sarun mariaddi oiassa indi wuṛṛu manga inolaanna apan sarun mariaddi saḷimmurine. ²⁰Ete indi addapinga wuassu anumpitanna pitu apan niasiloannu su lima uanang-Ku, wuṛṛu wuassu pitu ledda n soḷo wuḷawanna udde: Anumpitanna pitu udde eteudde manga mala'ekatta su pitu jamaatta, wuṛṛu pitu ledda n soḷo udde eteudde pitu jamaatta udde."

Tanata su Efesus

2 "Su mala'ekattu jamaatta su Efesus, woṛṛetta'a arendi: Ete indi tanata wuassi Tou apan uaagassa anumpitanna pitu su lima uanan-Ne, wuṛṛu u'amatta su wallatu pitu ledda n soḷo wuḷawanna udde. ²Ia'u



Pitu ledda n soḷo wuḷawanna (2:1)

masingkatu apa apan a'olaanni amiu: Iamiu mammanara maṛṛimadda wuṛṛu iamiu matammuda atonna. Ia'u masingkata manungku iamiu tawe mangonggolu naungnga su taumata laḷeo. Wuṛṛu manga taumata mangnga'u watanganne rasul, wutte'e waḷine, suete niannamanni amiu wuṛṛu niasombanganni amiu, manungku imangitou taṛṛa awusu. ³Iamiu masabare wuṛṛu iamiu uatataṛṛanga ana waugu Ia'u, wuṛṛu naungngi amiu tawe maadio'a. ⁴Arawe indi sasimba-U siamiu: Iamiu tate mandangu Sia'u ere rorone. ⁵Ana waugu udde, paanaungete tumanite n marau iamiu nanawo! Awaḷute wuassu manga rosanu, wuṛṛu pa'ola'e ere inolaanni amiu rorone. Amungkangu tawe, ne Ia'u sarun rumanta ringanni amiu wuṛṛu manawutta ledda n soḷonu udde wuassu tampane. ⁶Arawe

pia sambau apapia siamiu, eteudde: Iamiu maddantinu pallaḷagu ma^l-laḷarṛenggenni Nikolaus apan iaaranting-Ku lai.

⁷Isai-sai apan maaringikka, ṛinone manutukka apa apan iapaasingkatu Ghaṛraho Mawu Ruata su manga jamaatta!

Imangitou apan naauntunga, sarun Ta'u iwala umanna wua wuassu punnu pabbawiakka apan tuttuwo su Waillu Mawu Ruata."

Tanata su Smirna

⁸"Su mala'ekattu jamaatta su Smirna, worṛetta'a arendi: Ete indi tanata wuassi Tou apan paarorone wuṛṛu pangudusanne – apan nate tete wuṛṛu nabbiakka apia. ⁹Ia'u masingkatu manga asasusanu; Ia'u masingkatu iamiu asiangnga arawe wutte'e iamiu ala! Ia'u masingkatu manga aaluandaga apan ipangaḷuandaga siamiu wuassu manga taumata apan mangnga'u ririne Yahudi, wutte'e waḷine; ete imangitou udde pabbawalagu Setanna! ¹⁰Arie matta'uttu asasusa apan tate maḷannu lai apendamanni amiu. Paanaunge, Setanna sarun mantarṛo n sangkawa-geanganna wuassi amiu sulaḷummu tuttupanna, ana waugu ipamono'a siamiu. Iamiu sarun matatarṛanga mapuḷo allo aḷannune. Ṛinone iamiu matuṛṛuta Sia'u ma'oma n sara mate, ne Ia'u sarun mangonggola siamiu wiakka tutune wuṛṛu saran maḷannu-ḷannu apan maola'a sambau laḷantaku naauntunga.

¹¹Isai-sai apan wotongnge maaringikka, ṛinone manutukka apa apan iapaasingkatu Ghaṛraho Mawu Ruata su manga jamaatta.

Imangitou apan naauntunga, saran paassa tawe matatarṛanga papate aruane."

Tanata su Pergamus

¹²"Su mala'ekattu jamaatta su Pergamus, worṛetta'a arendi: Ete indi tanata wuassi Tou apan uaagasa haḷele maṛṛoro apan ṛorone rua m ba'a. ¹³Ia'u masingkatu suapa iamiu uatana'a, eteudde su araratuannu Setanna. Iamiu matuṛṛuta Sia'u. Ewe'e su tempo Antipas, matatjala-U apan matuṛṛura udde, nipate su saruannu su tampa n Setanna, iamiu tawe naddandila manungku iamiu mangngimanna Sia'u. ¹⁴Salaiwe aroddi pia manga pira inolaani amiu apan tawe maaluassa Sia'u: Pia sangkadoanna taumata su wallatti amiu apan mangngimanna aḷarṛa'i Bileam. Bileam nangaṛra'a si Balak ereapa mangema'u taumata n Israel su rosa; ringannu nassaḷo'i mangitou umanna anna apan suete nionggolla su paaḷuanna wuṛṛu na'inolaanna sussandaga. ¹⁵Aroddi lai su wallatti amiu

fia manga taumata apan uaaggasa aḷaḷṛa'u manga mallalaḷṛenggenni Nikolaus. ¹⁶Ana waugu udde, awaḷute wuassu manga rosanu! Amungkanga tawe, tate maḷannu lai Ia'u sarun rumanta ringanni amiu wuḷṛu manangalo manga taumata udde ringannu haḷele apan uaraddo su moḷṛong-Ku.

¹⁷Isai-sai apan maaringikka, ṛinone manutukka apa apan iapaasingkatu Ghaḷṛaho Mawu Ruata su manga jamaatta!

Imangitou apan naauntunga, sarun Ta'u iwala umanna manna apan uawuni, wuḷṛu sambau-sambau sarun manengkama wuassia'u sambau watu mawira. Su watu udde uawoḷṛetta sambau aranna wakku, apan awagananni sai-sai, tumba'u taumata apan nanengkamma."

Tanata su Tiatira

¹⁸"Su mala'ekattu jamaatta su Tiatira, woḷṛetta'a arendi:

Ete indi tanata wuassu Ana'u Mawu Ruata, apan mata-Ne lukkeng-gama naaḷihida putungga, wuḷṛu ledda-Ne lukkena naaḷihidda witu'a nitambuna. ¹⁹Ia'u masingkatu anambo n apa apan a'olaanni amiu - Ia'u masingkata iamiu mandangu sansuḷunggu, iamiu matuḷṛuta, iamiu mammanara, wuḷṛu iamiu maaddana matataḷṛanga. Ia'u masingkata iamiu orassa indi mammanara mannamboanna wuassu paarorone. ²⁰Arawe indi sasimba-U siamiu: Iamiu nangonggolu naungga si Izebel, wawine apan mangnga'u watanganne daroloḷṛannu Mawu Ruata udde. Manambote manga allang-Ku niawusuanne wuḷṛu niaḷṛaanna sussandaga wuḷṛu u'anna anna apan suete pinassubba paaluanna. ²¹Suete Ta'u nionggolaḷṛannu tempone itou mawaḷu wuassu manga rosane, arawe itou maddiri mamallosu inolaanne sussandaga udde. ²²Paanaungete! Ia'u sarun mangema'i tou ma'oma n sara mataddu'a su tampa atatiḷṛanne. Isudde itou wuḷṛu manga taumata apan sussandaga ringanni tou sarun matataḷṛanga atonna. Sarangkanambone udde Ta'u olaanna orassa indi - tabbene'e amungkangu imangitou mangado manga inolaanna apan laḷeo su sambau ringanni tou. ²³Manga mallalaḷṛenggenne sarun Ta'u pateanna lai tadea'u anambo n jamaatta maatutukka manungku ete Ia'u, Itou apan masingkatu ringiranna wuḷṛu naunggu taumata. Iamiu sarun Ta'u waḷisanna tumuḷṛuttu inolaannu sangkatou-sangkatou.

²⁴Arawe iamiu waine su Tiatira apan maddiri tumuḷṛutta aḷaḷṛa'a laḷeo udde, wuḷṛu maddiri mangurumma aḷaḷṛa'u Setanna. Ia'u mabbisara manungku Ia'u tawe manamba winabbawanu apan mawak-kata. ²⁵Arawe ma'oma n sara Ia'u rumanta apia, ṛinone iamiu si-dutu tuttuḷṛuta apa apan suete niatahuananni amiu. ²⁶⁻²⁷Imangitou apan naauntunga, wuḷṛu saran pangudusanne ma'ola'a apa ipaapulu-U, sarun

Ta'u onngolannu tarřino apan uasulungnga ere Ta'u sinengkama wuassu Iamang-Ku. Imangitou sarun manengkama tarřino wuassia-U ipamarenta manga pabbawalaga ringannu ta'inna atta'a, wuřru ipakkimuna'a manga pabbawalaga udde ere urinna leta'a. ²⁸Imangitou sarun manengkama anumpitannu arřusuallo wuassia-U.

²⁹Isai-sai wotongnge maaringikka řinone manutukka apa apan iwabbisara Gharřaho Mawu Ruata su manga jamaatta!"

Tanata su Sardis

3 "Su mala'ekattu jamaatta su Sardis, worřetta'a arendi: Ete indi tanata wuassi Tou apan uatahuanna pitu gharřaho wuassu Mawu Ruata wuřru anumpitanna pitu udde. Ia'u masingkata apa apan a'olaanni amiu. Unni Tou iamiu wiakka, wutte'e nate! ²Ana waugu udde apu'ote, wuřru panohasse apa apan ta'e pia siamiu tantařanna udde taambe nate abbi. Ana waugu Ia'u naaratingnga manungku inolaanni amiu, taambe saran sambau apan nasuungnga su saruannu Mawu Ruata. ³Nariaddi, naungete apia apa apan suete niařra'a siamiu rorone wuřru apa apan suete niaringiřrani amiu. Ola'e udde wuřru awařute wuassu manga rosanu. Amungkangu iamiu tawe maatimpu'o, Ia'u sarun rumanta ringanni amiu ere sangkatou tarřa ta'o; wuřru iamiu wagga tingngerate tempone Ia'u rumanta. ⁴Arawe su pattangngani amiu su Sardis ta'e pia taumata uariaga tadea'u laungnge sidutu waresi. Imangitou udde sarun umamatta suadio'a ringang-Ku ringaannu uapedettu mawira, ana waugu imangitou su řinone mappaattu udde. ⁵Simangitou apan naauntunga sarun luřřeannu jubah mawira. Aranni mangitou tawe Ta'u pappasanna wuassu Wuke n Taumata Wiakka. Wuřru su saruannu Iamang-Ku wuřru manga mala'ekan-Ne Ia'u sarun manga'u manungku imangitou udde pussa'a-U.

⁶Isai-sai wotongnge maaringikka, řinone manutukka apa apan nia-paasingkatu Gharřaho Mawu Ruata su manga jamaatta!"

Tanata su Filadelfia

⁷"Su mala'ekattu jamaatta su Filadelfia, worřetta'a arendi:

Ete indi tanata wuassi Tou apan susi wuřru tutune. Ete Itou uaaggasa a'unsi apan tatahuananni Daud; amungkangu Itou mamu'a, tawe saran sangkatou wotongnge maarřuuda, wuřru amungkangu Itou mařruuda, tawe saran sangkatou wotongnge maawu'a. ⁸Ia'u masingkatu apa a'olaanni amiu. Ia'u masingkata manungku iamiu tawe tuma-

rite n matohassa; iamiu suete tinumurruta ałarřa-U wuřru matuřruta Sn'u. Siamiu suete Ta'u niwu'a sambau ngara, apan tawe iarřuudi sai-sai lai. ⁹Naungete indi: Manga taumata apan naola'a pabbawalaga Setanna udde, manga tarřa awusu apan mangnga'u watanganne Yahudi wutte'e wałine, sarun Ta'u olaanna ma'oma n sara imangitou rumanta umalıntudda su saruannu. Wuřru imangitou sarun maa-singkata manungku Ia'u marangngu siamiu. ¹⁰Ana waugu iamiu suete tinumurruta parenta-U tadea'u mangngimanna, Ia'u lai sarun manillumma siamiu wuassu tempo n asasusa apan sarun mariaddi su ahewallu runia. Olangnge udde sarun mariaddi ipamono'a anambo n taumata su runia. ¹¹Ia'u małihakke rumanta! Paariagai paapia-pia apa apan tatahuananni amiu, tadea'u tawe saran sangkatou mangarřo lałantaku auntungannu. ¹²Taumata apan naa'untunga, sarun Ta'u olaanna ere sambau diřri sulałummu Wałe Susi Mawu Ruata-U, wuřru itou sarun matana'a su tampa udde saran małannu-lałannu. Arannu Mawu Ruata-U, wuřru arannu soa Mawu Ruata-U - eteudde Yerusalem wakku apan sarun umonto'a wuassu surga, wuassu Mawu Ruata-U - sarun Ta'u iworřeta su wadangu taumata udde. Wuřru lai arang-Ku apan wakku sarun Ta'u iworřeta su waddange.

¹³Isai-sai wotongnge maaringikka, řinone manutukka apa apan nia-paasingkatu Gharřaho Mawu Ruata su manga jamaatta!"

Tanata su Laodikia

¹⁴"Su mala'ekattu jamaatta su Laodikia, worřetta'a arendi:

Ete indi tanata wuassu Awantuhanne Amin, Mattatjala apan matammuda wuřru narřino, punnu aławo'u sarannapa apan niola'u Mawu Ruata. ¹⁵Ia'u masingkatu apa a'olaanni amiu; Ia'u masingkata iamiu tawe masunge wuřru lai tawe lai małoso. Řinone iamiu sambau su wal-latu darua udde! ¹⁶Arawe iamiu ma'ihamma; tawe małoso, tawe lai masunge. Ana waugu udde iamiu sarun Ta'u imuta iapaasabanga wu-assu lałummu morřong-Ku. ¹⁷Iamiu mabbisara, 'Iami ala wuřru aławo'a mangke pia; iami tawe urangnge apa-apa.' Arawe iamiu wagga arod-di aasiangnge wuřru arod-di maasusa ririnu! Iamiu asiangnga, tantołe wuřru wuta. ¹⁸Ana waugu udde Ia'u manantiro siamiu tadea'u mamalli wuławanna wuassia-U, eteudde wuławanna apan apianne, tadea'u iamiu maola'a ala. Pamallite lai laubba mawira wuassia-U tadea'u iamiu pia peddeta wuřru ipami'unte wadangi amiu apan tantołe wuřru maasili. Wuřru pamallite lai undama ipamuřra matanu tadea'u iamiu wotongnge maasilo. ¹⁹Manga taumata apan arangnguang-Ku, ete imangitou apan Ta'u tagguanna wuřru wabbałanna. Ana waugu udde

ṛinone iamiu maṛṛimadda mammanara, wuṛṛu awaḷute wuassu manga rosanu. ²⁰Pa'ellega! Ia'u uarisikka su saruannu ngara wuṛṛu maneg-kela. Amungkangu pia taumata apan naaringikka tingi-U, wuṛṛu nanu'a ngara, Ia'u sarun sumutta maisasomba n tou; Ia'u sarun umanna suadio'a ringanni tou wuṛṛu itou umanna suadio'a ringang-Ku. ²¹Imangitou apan naauntunga, sarun Ta'u iwala uma'ianna su addera n araratuang-Ku su sambau ringang-Ku, ere Ia'u sassane lai suete na'auntunga wuṛṛu orassa indi ua'ianna suadio'a ringannu lamang-Ku su addera n araratuang-Ne.

²²Isai-sai wotongnge maaringikka, ṛinone manutukka apa apan nia-paasingkatu Ghaṛṛaho Mawu Ruata su manga jamaatta!"

Pasasubba su surga

4 Wua udde ia'u naasomba aellega lai. Ia'u naasilo sambau ngara nawu'a su surga. Wua udde inaringikka lai tingikka apan paarorone suete nabbisara sia'u ere tingikku trompeta. Tingikka udde nabbisara, "Wette rangante isindi. Ia'u sarun mamasingkata si'o apa apan sarun mariaddi murine." ²Ia'u lapiddu niintarṛoannu Ghaṛṛaho Mawu Ruata. See ia'u naasilo su surga pia sambau addera n araratuanna, wuṛṛu pia sangkatou ua'ianna su addera n araratuanna udde. ³Hati n taumata udde lullansiangnga naaḷihidda permata baiduri pandan wuṛṛu permata delima. Sambau randipakka ere zamrud uapaḷiwutta addera n araratuanna udde.

⁴Sulaḷummu atokke maḷimbulunna apan uapaḷiwutta addera n araratuanna udde, pia rua m puḷo appata addera n araratuanna waine. Isudde ua'ianna rua m puḷo appata piaṛrange apan uapedettu mawira, wuṛṛu ualṛṛe n araposa wuḷawanna. ⁵Wuassu addera n araratuanna udde lukkena semakku sawallō wuṛṛu sinumabanga tingikku rallu'a mappose. Wuṛṛu su saruannu addera n araratuanna udde pia pitu soḷo lukkeng-gama; eteudde pitu Ghaṛṛaho Mawu Ruata. ⁶Pia lai isudde su saruannu addera n araratuanna sambau apan aellehanna ere tahaḷoangnga kaca, matilangnga ere kristal.

Uapaḷiwutta addera n araratuanna, suapan sandiṛṛane, pia ap-pata riadianna, apan su saruanne wuṛṛu su liudde napene mata. ⁷Riadianna paarorone aellehanna naaḷihida singa, aruane naaḷihida sapi esakka. Atallune hatine naaḷihida hati n taumata. Aiappane aellehanna naaḷihida manu'a rajawali tantaḷanna tuttalla'a. ⁸Sire appata riadianna udde, sambau-sambau pia papaidde annuma, wuṛṛu su ahewallu wadange, wuṛṛu sulaḷumme napene mata. Allo ṛabbi manga riadianna udde tawe illoḷone mangngantari,

"Susi, susi, susi arannu Mawu, Mawu Ruata Lembon Tarřino;
apan nirumanta, suete nirumanta, wuřru nirumantate
sarangkaļo'engnge."

⁹Sire appata riadianna udde mangngantari antari n daralo, addata wuřru aadiangkamanna Sitou apan ua'ianna su addera n araratuanna udde, eteudde Itou apan wiakka saran maļannu-ļannu. Wuřru su tempo manga riadianna udde mangngantari, ¹⁰sire rua m puļo appata piařrange udde uaruutta su saruannu taumata apan ua'ianna su addera n araratuanna udde, see nassubba Sitou apan wiakka saran maļannu-ļannu. Wuia udde imangitou nanuntungngu manga araposa n araratuanni mangitou su saruannu addera n araratuanna udde lapiddu nabbisara,

¹¹"O Mawu, O Mawu Ruata ng kami!

Tumba'u I'o sassane apan wotongnge manengkama daralo,
addata wuřru tarřino.

Ana waugu ete I'o apan na'ola'a sarangkanambone,
wuřru wuassu apulu-Nu lai sarangkanambone udde suete
nariaddi wuřru wiakka."

Lulunnu wuke wuřru Ana'u Domba

5 Wuia udde ia'u naasilo sambau lulunnu wuke su lima n Tou apan ua'ianna su addera n araratuanna udde. Wuke udde napene m wořretta su rua m baane wuřru nireetannu pitu m bau segele. ²See ia'u naasilo sangkatou mala'ekatta apan matohassa u'aļiata ringannu tingikka apan ma'ikkatta. "Isai wotongnge mamesangnga manga segele indi wuřru mamu'a wuke indi?" ³Arawe mapia ete su surga ara'e su runia, ara'e su wanta n runia tawe niasombanganna saran sangkatou apan wotongnge maawu'a wuke udde, wuřru ma'ellega laļumme. ⁴Ne ia'u nilumuai atonna-tonna ana waugu tawe saran sangkatou apan wotongnge maawu'a wuke udde, wuřru ma'ellega laļumme. ⁵See sangkatou wuassu manga piařrange udde nabbisara sia'u, "Arie palluai! Pa'ellege! Singa wuassu pabbawalagu Yehuda, papapulunni Daud apan wahewalla, suete naauntunga! Itou wotongnge mamesangnga pitu segele udde wuřru mamu'a wuke udde."

⁶Wuia udde ia'u naasilo sambau Ana'u Domba apan uarisikka su-patangngannu addera n araratuanna udde, papaliwutannu sire appata riadianna wuřru anambo n piařrange. Ana'u Domba udde aellehanna naaļihida ere suete nipototta. Itou pia pitu tatandu'a wuřru pitu mata; eteudde pitu Gharraho Mawu Ruata apan suete nirolokka su ahe-wallu runia. ⁷Wuia udde Ana'u Domba udde inumamatta wuřru nanganu lulunnu wuke udde wuassu lima uanannu taumata apan ua'ianna su

addera n araratuanna udde. ⁸Tantaḷanna Ana'u Domba udde ma'ola'a aroddi, inumaruutta sire appata riadianna udde wuṛṛu sire rua m puḷo appata piaṛrange udde su saruan-Ne. Imangitou sangkatou-sangkatou uaaggasa kecapi wuṛṛu mangko wuḷawanna laḷoṛṛoannu amania, eteudde manga aḷḷoniannu pabbawalagu Mawu Ruata. ⁹Imangitou mangngantari n sambau antari apan wakku:

"Po wotongnge manganu wuke udde
wuṛṛu mamesangnga manga segelene.

Ana waugu Po suete nipate, wuṛṛu ringannu papate-Nu,
taumata wuassu aḷawo'u ruanganna wahasa, araratuanna, wuṛṛu
pabbawalaga suete niwallian-Nu hunane su Mawu Ruata.

¹⁰Po suete nandiaddi simangitou sambau pabbawalagu manga imam
sassane,
tadea'u imangitou mangimbe Mawu Ruata ng kite,
wuṛṛu mamarenta su wowo n runia."

¹¹Wua udde ia'u naasilo lai. Ia'u naaringikka tingikku mala'ekatta
su riwune wuṛṛu su jutane anambone. Imangitou uarisikka ua-
paḷiwutta addera n araratuanna wuṛṛu sire appata riadianna see manga
piaṛrange udde, ¹²Wuṛṛu imangitou mangngantari ringannu tingikka
apan ma'ikkatta,

"Ana'u Domba apan suete nipototta udde, rinone manengkama
tarrino,
paa'ala, apande wuṛṛu atattohassa;

Itou rinone addatanna, wantuhanna wuṛṛu raddaloanna!"

¹³See ia'u naaringikka aḷawo'u riadianna su langitta, su runia, su wanta
n runia wuṛṛu sulalummu tahaḷoangnga - aunne aḷawo'u riadianna su
uḷilim pati'uppa indi - mangngantari,

"Itou apan ua'ianna su addera n araratuanna, wuṛṛu Sangkatou
Ana'u Domba udde,

mangke raddaloanna wuṛṛu aaddatanna see awantuhanne wuṛṛu
uatarrino saran maḷannu-lannu!"

¹⁴Ne sire appata riadianna udde sinumimbakka, "Amin!" Wuṛṛu manga
piaṛra'a udde inumaruuta wuṛṛu nassubba.

Manga segele

6 Wua udde ia'u naasilo Ana'u Domba udde namesangnga segele
paarorone su wallatu segele pitu udde. See ia'u naaringikka sambau
su wallatu riadianna udde nabbisara, "Wette!" Tingikke naaḷihidda ere
tingikku rallu'a. ²Ne ia'u naasilo, see niasiloanna sambau awaḷo mawira.
Sumasa'ene uaaggasa sambau anaanna wuṛṛu itou nionggolannu sambau

mahkota. Itou u'amatta ere sangkatou apan naauntunga inai mangarɔo auntunganna.

³Wua udde Ana'u Domba udde namesangnga segele aruane, wuɾɾu ia'u naaringikka riadianna aruane nabbisara, "Wette!" ⁴See awaɔo waine sinumabanga lai. Awaɔo udde maɾɾamu wambuɔune. Sumasa'ene nionggolaɾnu taɾɾino ipammuɔi m paddarame su wowo n runia, tadea'u taumata mapapate. Ne itou nionggolaɾnu haɔele wahewa sammata.

⁵See Ana'u Domba udde namesangnga segele atallune. Wuɾɾu ia'u naaringikka riadianna atallune nabbisara, "Wette!" Ia'u na'ellega, ne niasiloangku sambau awaɔo ma'itumma sumasa'ene uaaggasa sampare tatimbanganna su limane. ⁶Wuɾɾu ia'u naaringikka sambau apan niaringiɾɾana ere tingikka apan u'ui wuassu pattangannu sire appata riadianna udde. Tingikka udde nabbisara, "Salliteɾɾe ganduma apan mapia, arega n laɔantaku allo massallo, wuɾɾu tallu n liteɾɾe gandumma paɾɾalane aregane ere laɔantaku allo massallo lai. Arawe imbaɾɾanga mandaleo manga alu n Zaitun wuɾɾu wailu anggore!"

⁷Wua udde Ana'u Domba udde namesangnga segele aiappane. Wuɾɾu ia'u naaringikka riadianna aippane nabbisara, "Wette!" ⁸Ia'u na'ellega, see niasiloangku sambau awaɔo hatine namillosa. Sumasa'ene aranne Papate. Wuassu liudde, itou tatantalongannu Runia m Papate marani-rani. Taɾɾino su wageangge aiappane su runia indi tinantilla simangitou, tadea'u imangitou wotongge mamate sulaɔummu pangalo, sulaɔummu ɾutumma, ara'e aɔaɾɾusa'itta wuɾɾu wuassu manga winatangnga maɔaɾɾaga.

⁹Wua udde Ana'u Domba udde namesangnga segele aɔimane. Ne ia'u naasilo su aɔunggu medda n sasamba pia ɾimuuddu manga taumata nate nipate ana waugu mannohassa tanata Mawu Ruata sulaɔummu tiala mangitou. ¹⁰Imangitou u'ui ringannu tingikki mangitou apan ma'ikkatta, "Oh Mawu Lembo n Taɾɾino, apan susi wuɾɾu naɾɾino! Pira ng katempo lai aɔannune Po mamarikissa laɔoɾɾo n runia wuɾɾu maɾɾuumanni mangitou ana waugu suete namate siami?" ¹¹Imangitou sangkatou-sangkatou nionggolaɾnu jubah mawira sambau. See imangitou nirolokka niapaillolaɔo taɔa ng kadio'a lai, ma'oma n sara masuungnga reengannu manga hawe sangkamanaranna wuɾɾu manga tuɾɾangi mangitou apan sarun pateanna lai ere imangitou.

¹²See ia'u naasilo Ana'u Domba udde namesangnga segele aianume. Nariaddite linukka apan masaddata. Matannallo nabbali ma'itumma ere maɔaɾɾenessa ma'itumma haɔagga, wuɾɾu wulaɾna nabbali maɾɾamu ere ɾaɾɾa. ¹³Manga anumpitanna mannawo wuassu langita su wowo n runia naaɔihidda wua ng kalu ara apan taambe naɔaha napuɔidda wuassu alune su tempo niio'u anginna ma'ikkatta. ¹⁴Langitta nawuɔi naaɔihidda ere suratta niluɔunna, wuɾɾu anambo n wowone

wurru manga taranusa niingkata wuassu tampane. ¹⁵See manga ratu n runia, manga tembonanne, manga tembonannu tantara, manga tau-mata ala wurru taumata pia tarino, wurru manga taumata waine lai, mapia allangnga ara'e tawe allangnga, sarangkanambone na'imbuni m watanganne sulalummu manga liangnga ara'e su wallatu watu su wowone. ¹⁶Su manga wowone wurru su manga watu udde, imangitou u'ui, "Aema'e siami! Wuniaawe iami wuassu aellegi Tou apan ua'ianna su addera n araratuanna, wurru wuassu asasa'u n Ana'u Domba udde! ¹⁷Allo maasansara nirumantate, orassa indi imangitou napaasabangu asasa'u mangitou, wurru tawe saran sangkatou apan wotongnge sumaruanna simangitou!"

Marasutta appatu pulo appata su riwune taumata wuassu pabbawalagu Israel

7 Wua udde, ia'u naasilo sire appata mala'ekatta uarisikka su apata pabbuuanu runia. Imangitou mannaranga anginna appata su runia tadea'u tawe anginna apan tumiuppa su ammaranne, ara'e su taha'langnga, ara'e su manga aaluanna. ²See ia'u naasilo sangkatou mala'ekatta waine nilumapputa wuassu samba'a ra'i. Itou uaapi-ddu segele wuassu Mawu Ruata apan wiakka. Ringannu tingikka ma'ikkatta mala'ekatta udde namaggo sire appata mala'ekatta apan suete naasomba tarino Mawu Ruata ipanggohakku ammaranne wurru taha'langnga. ³Mala'ekatta udde nabbisara, "Paaliwue'o manggohakku ammaranne ara'e taha'langnga, ara'e manga aaluanna amungkangu iami taambe nangonggolu tatiala segele su pakkanu manga allangngu Mawu Ruata ng kite." ⁴See ia'u niwaloanna manungku reenganne 144.000 su atoune apan nionggolannu tatiala n segelu Mawu Ruata su pakkani mangitou. Manga taumata udde nianu wuassu sire mapulo dua pabbawalagu Israel; ⁵wuassu pabbawalaga sambau, 12.000 su atoune. Eteudde wuassu walagi: Yehuda, Ruben, Gad, ⁶Asyer, Naftali, Manasye, ⁷Simeon, Lewi, Isakhar, ⁸Zebulon, Yusuf wurru Benjamin.

Taumata apan tumanite manambo

⁹Wua udde ia'u na'ellega apia, see niasiloanna taumata tumanite manambo – tawe saran sangkatou taumata apan wotongnge maareengngu anambone. Imangitou udde manga taumata wuassu alawo'u pabbawalaga, ruanganu, araratuanna, wurru wahasa. Ringannu uapeddetu jubah mawira-wira wurru ringannu uaaggasa manga ranna ng kalu pa-

lem su limane, manga taumata manambo udde dirumarisikka sinumaruanna addera n araratuanna wuṛṛu sinumaruanna Ana'u Domba udde.¹⁰ See ringannu tingikka ma'ikkatta imangitou u'ui, "Asasaḷamatti ite darentane wuassu Mawu Ruata ng kite, apan ua'ianna su addera n araratuanna, wuṛṛu wuassu Ana'u Domba udde!"¹¹ Anambo n mala'ekatta uarisikka uapaḷiwutta addera n araratuanna wuṛṛu manga piaṛrange see sire appata riadianna udde. Manga mala'ekatta udde uaruutta su saruannu addera n araratuanna see nassubba Mawu Ruata.¹² Imangitou u'ui, "Amin! Dalo su Mawu Ruata ng kite apan mawantuga wuṛṛu pande. Itou rinone onggolaṇnu alaḡo'u aadiangkamanna wuṛṛu addata. Itou uataṛṛino wuṛṛu matohassa saran maḷannu-ḷannu! Amin."

¹³ Sangkatou wuassu wallatu manga piaṛrange udde naiwaḷo sia'u, "Manga taumata apan ualaṛṛe n juba mawira indi, isai imangitou wuṛṛu wuassuapa imangitou nirumanta?"

¹⁴ "Ia'u wagga Tuangnga. Tuangnga sassane masingkata," sasimba'u.

Ne itou nabbisara sia'u, "Ete indi manga taumata apan suete ringannu saḷamatta naralukka wuassu pananansara apan wahewalla. Imangitou suete nabbansala jubah mangitou wuṛṛu niola'i mangitou nabbaḷi mawira ringannu ṛaṛṛa n Ana'u Domba udde.¹⁵ Ana waugu udde imangitou uarisikka su saruannu addera n araratuannu Mawu Ruata, wuṛṛu mattaṛṛamawu Sitou allo ṛabbi su Waḷe Mawu. Wuṛṛu Itou apan ua'ianna su addera n araratuanna udde sarun masemodda ringanni mangitou wuṛṛu manirungnga simangitou.¹⁶ Imangitou tate maapendama maḷunussa ara'e marou; matannallo ara'e paddisa mapalaṭta tate maaloḷo simangitou,¹⁷ ana waugu Ana'u Domba apan ua'ianna su pattangngannu addera n araratuanna udde sarun maola'a mallaḷu'addi mangitou. Itou sarun mangehetta simangitou watukku alaḡmata n ua'e m pabbawiakka. Wuṛṛu Mawu Ruata sarun mamedda alaḡo'u allo mata wuassu mata mangitou."

Segele appitune

8 Napawe Ana'u Domba udde namesangnga segele appitune, surga nabbaḷi maḷannaba, alaṇnune iraṛrangngo setenga ng ka'orassa.² See ia'u naasilo sire pitu mala'ekatta uarisikka su saruannu Mawu Ruata, wuṛṛu imangitou nionggolaṇnu pitu m bua trompeta.


³ Sangkatou mala'ekatta waine, apan uaapiddu sambau pananunganna amania wuḷawanna, nirumanta wuṛṛu dirumarisikka su saruannu medda n sasamba. Sitou nionggolaṇnu manambo amania ipanguntudu manga aalaḡomannu anambo n pabbawalagu Mawu Ruata wuṛṛu iaddo su medda n sasamba wuḷawanna apan uaraddo su saruannu

addera n araratuanna. ⁴Su sambau ringannu manga aaljomannu pabba-walagu Mawu Ruata, timbbulu dupa apan lurrenggama udde tuttimbula madduitta wuassu lima mala'ekatta apan uarisikka su saruannu Mawu Ruata udde. ⁵Wua udde mala'ekatta nanganu pananutunganna amania udde, wuṛṛu nilorṛoante m putungnga wuassu medda n sasamba, see ti-nuntunga su wowo n runia. Ne rallu'a naposete wuṛṛu sawallo ma'ilatte, wuṛṛu nariaddite linukka.

Manga trompeta

⁶Napawe wua udde, sire pitu mala'ekatta apan uaaggasa trompeta udde uasasaddiate mattiuppa.

⁷Mala'ekatta paarorone nattiuppe trompeti tou, ne uranna eisse wuṛṛu putungnga laḷo'annu ṛaṛṛa nangansala su runia. Sepertiga wuassu runia nasue natutungnga; aroddi lai sepertiga wuassu manga aaluanna, wuṛṛu aḷawo'u nannaḷo apan ma'elomma.



Trompeta (8:7)

⁸See mala'ekatta aruane nattiuppa trompeti tou, ne sambau apan tu-manite m wahewalla niasiloanna naalḥidda wowone apan lukkenggama niwontola su tahaḷoangnga. See sepertiga wuassu tahaḷoangnga, nawaḷu nabbali ṛaṛṛa, ⁹wuṛṛu natete lai sepertiga wuassu aḷawo'u winatangnga su tahaḷoangnga; aroddi lai narṛimunsa'a sepertiga wuassu manga apalla.

¹⁰Wua udde mala'ekatta atallune nattiuppa trompeti tou, ne sambau anumpitanna apan wahewalla, lukkenggama ere soḷo, nanawo wuassu langitta, see nema'a su sepertiga wuassu manga saḷukka wuṛṛu aḷimata n ua'e. ¹¹(Arannu anumpitanna udde "Mapetta".) Ne sepertiga wuassu ua'e nabbali mapetta, wuṛṛu natete lai anambo n taumata ana waugu na'inumma ua'e apan nabbali mapetta udde.

¹²See mala'ekatta aiappane nattiuppa trompeti tou. Ne niapuulle sepertiga wuassu matannallo, sepertiga wuassu wuḷanna, wuṛṛu sepertiga

wuassu manga anumpitanna, na'oma n sara nawulite sepertiga wuassu semakki mangitou. Wuṛṛu lai sepertiga wuassu allo tawe maasemakka wuṛṛu aroddi lai sepertiga wuassu ṛabbi.

¹³Ana see ia'u na'ellega, ne ia'u naaringikka sambau manu'a rajawali tantaḷanna tuttalla'a matanggakka su winalanganna, u'ui, "Silaka! Silaka! Nasilakate anambo n taumata su runia napawe niaringirante sire tallu mala'ekatta waine apan mattiuppa trompenne murine!"

9 See mala'ekatta alimane nattiuppa trompeti tou, wuṛṛu ia'u naa-silo sambau anumpitanna nanawo wuassu langitta su wowo n runia.

²Anumpitanna udde nionggolannu a'unsi n rampisu papate. Ne anumpitanna udde namu'a rampisu papate udde, see timbula sinumabbanga wuassu laḷumme ere timbula wuassu sunggila apan wahewalla. Matannallo wuṛṛu winalanganna nabbali maranduma ana wangu timbula wuassu rampisa udde. ³See wuassu laḷummu timbula udde sinumabbangke manga saṛṛappalanna apan sinumossoka watukku runia. Manga saṛṛappalanna udde nionggolannu taṛṛino apan uasulungnga ere lai nionggolla su kalajengking. ⁴Imangitou isassingadda umanna nannaḷo, ara'e aaluanna ara'e manga sinuananna waine. Imangitou tumba'u wotongnge mangenggena manga taumata apan su pakkane tawe segele wuassu Mawu Ruata. ⁵Manga saṛṛappalanna udde tawe wotongnge mamate manga taumata udde, ewe'e tumba'u manansara simangitou lima wuḷanna aḷannune. Taddu'a apan ni'uittu manga saṛṛappalanna udde naaḷihidda taddu'a ni'uittu kalajengking. ⁶Aḷannune lima wuḷanna udde, manga taumata maddea'a tadea'u mate, arawe imangitou tawe mate; imangitou maapululu mate arawe papate marau wuassi mangitou.

⁷Awa'u saṛṛappalanna udde naaḷihidda awaḷo apan uasaddia inai mappangalo. Su pua mangitou aellehanna pia sambau naaḷihidda araposa n aratuanna wuḷawanna. Hati mangitou naaḷihidda hati n taumata. ⁸Uta'i mangitou naaḷihidda uta'u wawine, wuṛṛu isi mangitou naaḷihidda isi n singa. ⁹Sabba'i mangitou laḷindumannu sambau saranapa naaḷihidda laubba atta'a. Tingikku papaidi mangitou naaḷihidda ammulannu roda wawolengannu awaḷo apan tantaḷanna inai mapapangalo. ¹⁰Imangitou pia toḷene wuṛṛu pia a'uinne naaḷihidda kalajengking. Wuṛṛu sulaḷummu toḷe mangitou udde pia atatohassi mangitou ipanan-sara taumata aḷannune lima wuḷanna. ¹¹Imangitou pia ratu apan uaparenta simangitou, wuṛṛu ratu udde eteudde mala'ekatta apan uatahuanna rampisu papate. Aranne sulaḷummu wisara n Ibrani Abadon; wuṛṛu sulaḷummu wisara n Yunani Apolion (atappasanne "Manggahakha").

¹²Silaka apan paarorone naḷiute. Nasue udde pia darua lai silaka apan sarun rumanta.

¹³Wua udde mala'ekatta ai'annume nattiuppa trompeti tou. Ne ia'u naaringikka tingikka nirumanta wuassu appatu pabbuannu Mezbah wuławanna apan uaraddo su saruannu Mawu Ruata. ¹⁴Tingikka udde nabbisara su mala'ekatta aiannume udde, "Pallosa'a sire appata mala'ekatta apan rarapusanna su Salukku Efrat udde!" ¹⁵See sire apata mala'ekatta udde nipallose. Imangitou suete nisaddia mandiaga orassa, allo, wuławanna wuřru tonna, udde hunane ipamate sepertiga wuassu anambo n taumata. ¹⁶Ia'u niwałoanna manungku reengannu tantara uasa'e awało udde dua řasutta su jutane anambone. ¹⁷Wuřru sulałummu aellega, ia'u naasilo manga awało udde wuřru manga sumasa'ene. Manga sumasa'ene ualurře n laubba atta'a marřamu lukkeng-gama, ma'elomma naalřihidda watu nilam, wuřru maririkka naalřihidda belerangnga. Pua manga awało udde naalřihidda pua n singa, wuřru wuassu morřonge sussabbanga putungnga, timbula, wuřru belerangnga. ¹⁸Sepertiga wuassu anambo n taumata, nipate n tatallu asasusa udde; eteudde putungnga, timbula, wuřru belerangnga apan sinumabbanga wuassu morřongu manga awało udde. ¹⁹Atatohassu manga awało udde uaraddo su morřonge wuřru lai su tołene. Manga tołene naalřihidda atoanna pia puane. Ringannu tołene udde, manga awało mannansara taumata.

²⁰Arawe lambe m walagu taumata apan tawe nipate manga asasusa udde, tawe lai manantangngu lanna'u lima mangitou sassane. Imangitou tawe illołone massubba manga gharřaho lałeo wuřru manga paałuanna wuławanna, sała'a, witu'a, watu wuřru alu apan tawe maasilo wuřru tawe maaringikka, ara'e lai maa'amatta. ²¹Imangitou lai tawe manantangngu manga inolaanni mangitou apan lałeo, eteudde pamamate, wałiimmata, pasasandaga wuřru panana'o.

Mala'ekatta wuřru lułunnu wuke adio'a

10 See ia'u naasilo sangkatou mala'ekatta matohassa waine sinumo-ssoka wuassu surga. itou papi'unannu winabbawa wuřru sambua randipakka uapaliwutta su puane. Hatine lullansiangnga naalřihida mattannallo, wuřru leddane naalřihidda palřarřanu putungnga. ²Su limane pia sambau lułunnu wuke adio'a apan wawu'anna. Ledda aikkatanne uarřinda tahałoangnga, wuřru leddane airři uarřinda ammaranne. ³See itou inumui ringannu tingikka ma'ikkatta naalřihidda tingikku manga singa. Napawe mala'ekatta udde suete niumui, pitu rallu'a sinumibakka ringannu tingikka mappose. ⁴Aroddi pitu rallu'a udde nattingikka, ia'u maapulu mamorřettu apa niwisarane, arawe ia'u naaringikka tingikka

wuassu surga nabbisara, "Arie pabbattia'a apa apan niwaļo m pitu rallu'a udde; arie pabbořřeta'al"

⁵See mala'ekatta apan ta'u niasiloanna uarřinda tahaļoangnga wuřřu ammaranne udde namatte n lima aikkatanne watukku langitta. ⁶Itou nassalu ringannu arannu Mawu Ruata apan wiakka saran maļannu ļannu, apan nandiaddi langitta wuřřu runia wuřřu tahaļoangnga see ļai manga aļawo'a apan mabbiakka sulaļumme. Mala'ekatta udde nabbisara, "Tempone tate lai iasorřota! ⁷Arawe napawe mala'ekatta appitune nattiuppa trompeti tou, Mawu Ruata sarun ma'ola'a řiin-Ne apan uawuni, ere suete niwatti'a su manga allang-Nge eteudde manga nabi."

⁸Wua udde tingikka apan ta'u niaringiřřana wuassu surga udde, nabbisara apia sia'u. Itou nabbisara, "Roote panganu luļunnu wuke apan wawu'anna su lima mala'ekatta apan uarřinda tahaļoangnga wuřřu ammaranne udde."

⁹Ne ia'u inaite nattuda mala'ekatta udde wuřřu nadorongnga tadea'u itou mangonggolu luļunnu wuke adio'a udde sia'u. Itou nabbisara, "Anute wuřřu ante indi. Sulaļummu tiannu itou sarun maola'a mapetta, arawe sulaļummu mořřongu itou matemangnga naaļihidda puļa."

¹⁰Ia'u nanganu luļunna adio'a udde wuassu limane see nianna. Sulaļummu mořřonga pendamanna ere temangngu puļa, arawe napawe ta'u niallupa, sulaļummu tianna itou nabbaļi mapetta. ¹¹Wua udde ia'u nirolokka, "Wattia'a paassa lai watti'u Mawu Ruata su ola'u manga pabbawalaga, manga araratuanna, manga wahasa, wuřřu manga ratu."

Rua ng katou tiala

11 Wua udde ia'u nionggolańnu alu sampaddi apan lihidde ere ta-tumma'inna auukka, see nirolokka, "Roote panguukka Waļe Mawu wuřřu Mezbah. Reenga'a pira anambo n taumata apan mattarřamawu sulaļumme. ²Arawe arie manguukka rallaka su samba'a n liuddu Waļe Mawu udde, ana waugu wageangnge udde suete tinan-tilla su manga taumata apan tawe maaillaļa Mawu. Imangitou sarun mařřinda soa apan susi udde appatu puļo dua su wuļanne aļannune. ³Ia'u sarun mandolokku rua ng katou tiala-U apan uaļuřře m peddeta ilallaļo, wuřřu imangitou sarun mamasingkatu watti'u Mawu Ruata aļannune 1260 su allone."

⁴Rua ng katou tiala udde, eteudde rua m bua alu n Zaitun wuřřu rua m bua ledda n soļo apan uaraddo su saruańnu Mawu uļilimpatu'uppa. ⁵Amungkangu taumata maannama ma'ola'a inolaanna

apan laleo simangitou, ne wuassu morrongi mangitou sumabbangke putungnga apan maapate manga seenne. Ringannu olangnge aroddi, anambo n taumata apan maapulu mannansara simangitou sarun iapate. ⁶Imangitou pia tarfino ipanutubba langitta tadea'u tawe manguranna tantaŋanna imangitou mammasingkatu watti'u Mawu Ruata. Imangitou uatahuanna lai tarfino su anambo n alimata n ua'e, ipamaŋu ua'e mabbali rarra. Wuru imangitou uatahuanna lai tarfino ipamuulla runia ringannu alawo'u hati ng kasasusa, suapan tempo ipaapulu mangitou.

⁷Napawe imangitou suete nabbatti'u watti'i mangitou, winatangnga apan sinumabanga wuassu rampisu papate sarun lumawanna simangitou. ⁸Wuru winalunanni mangitou sarun iapatalallada su amatannu soa wawalla, suapa Mawu mangitou niarussa. Aranna sasanato'u soa udde, eteudde Sodom ara'e Mesir. ⁹Manga taumata wuassu anambo n araratuanna, pabbawalaga, wahasa sarun maasilo winalunanni mangitou, tallu allo mattangnga alannune, wuru tawe mamala m winalunanna udde ilabbinga. ¹⁰Tumana'u runia sarun lumuassa ana waugu inapateannu tiala darua udde. Imangitou sarun maddamea wuru sarun maa'agilu aonggola, ana waugu rua ng katou nabi udde suete nandanta n anambo n asasusa su anambo n taumata su runia. ¹¹Napawe tallute allo mattangnga, nirumantate sasangngo ipabbiakka wuassu Mawu Ruata wuru sinumutta apia sulalummu nabi darua udde. Ne imangitou nabuatte dirumarisikka, na'oma n sara taumata apan naasilo simangitou nata'utta atonna. ¹²Wua udde rua ng katou nabi udde naaringikka tingikka ma'ikkatta namago si tarua wuassu surga, "Wette rangante isindi!" See su saruannu aellegu seetti mangitou, itarua nirumangante su surga, aopannu winabbawa. ¹³Ne su tempo udde nariaddite linukka apan masaddata. Sepermapulo wuassu soa udde narimuns'a, wuru pitu riwu taumata nate ana waugu linukka udde. Manga taumata waine lembon matta'utta, see imangitou nadalote awawantugu Mawu Ruata su surga.

¹⁴Silaka aruane naljudde. Arawe pa'ellege! Silaka atallune ete tala ng kadio'a lai sarun manansuna.

Trompete appitune

¹⁵See mala'ekatta appitune nattiuppe trompeti tou, ne su surga niaringirante manga tingikka ma'ikkatta apan mabbisara, "Tarfino ipamarenta runia orassa indi sulalummu lima Mawu ng kite wuru Ratu m Punnu Salamatta apan suete pina'ire-Ne. Itou sarun mamarenta saran malannu-lannu!" ¹⁶Ne sire rua m pulo appata piarange apan

ua'ianna su addera n araratuanni mangitou su saruannu Mawu Ruata, inumaruutta wuṛṛu nassubba Mawu Ruata.

¹⁷Imangitou nabbisara,

"Mawu, Ruata Lembon Taṛṛino,

apan nirumanta, wuṛṛu nirumantate!

Iami maadiangkamanna Si'o ana waugu I'o suete nappaattu

taṛṛino-Nu apan wahewalla,

wuṛṛu nanattakke mammarenta!

¹⁸Manga taumata apan tawe maaillaḷa Mawu, mammangalo

ana waugu temponete I'o mapaasabangu asasa'u-Nu,

wuṛṛu temponete lai I'o mamarikissa manga taumata nate.

Ete indi tempone ipangonggolu laḷantake su manga allang-Ngu,

manga nabi,

wuṛṛu su anambo n pabbawala-Gu, eteudde anambo n taumata apan

mattaṛṛamawu Si'o,

timmade ara'e dario'a

Ete indi tempone ipaṛṛimunsa'a manga taumata apan naṛṛimunsa'a

runia!"

¹⁹Ne, nawu'ate Waḷe Mawu Ruata su surga, wuṛṛu niasiloante Wantalu Paaire sulaḷumme. See nariaddite sawallo ma'ilatta wuṛṛu tingikku rallu'a mappose wuṛṛu ruddallu'a, see lai linukka wuṛṛu uranna eissa apan masassaga.

Wawine wuṛṛu naga

12 See niasiloanna su langitta sambau apan maṛṛindu'a wuṛṛu tumanite n maatiangnga. Sangkatou wawine ualūṛṛe n matannallo peddene, tantaḷanna uarisikka su wowo n wuḷanna. Su puane pia sambau araposa n araratuanna niola'a wuassu mapuḷo dua anumpitanna.

²Wawine udde, tantaḷanna pia illoṛṛo, wuṛṛu ana waugu temponete mangunsiwe, ne itou mangngintuḷi n atatauddu'a.

³See niasiloante apia su langitta sambau apan maṛṛindu'a. Pia sambau naga maṛṛamu apan wahewalla atonna pia puane pitu wuṛṛu tatan-dunge mapuḷo. Suapan puane pia araposa n araratuanna. ⁴Ringannu toḷene itou nanggemonnu sepertiga wuassu manga anumpitanna su langitta wuṛṛu nituntunga watukku runia. Naga udde uarisikka su saruannu wawine apan mangunsiwete udde ringannu panduma mangallupa anangnge, napawe itou niasungkange. ⁵See wawine udde nangunsiwete n sangkatou ana'a esakka apan sarun mamarenta anambo n pabbawalaga ringannu tatumma'inna atta'a. Arawe ana'a udde niaṛṛo wuassu

wawine udde, see niapidida ringannu Mawu Ruata wuṛṛu su saruannu addera n araratuan-Ne. ⁶Ne wawine udde tinumaḷangnga su wadda'a, su tampa apan suete nissaddia Mawu Ruata sitou. Su tampa udde itou sarun padduḷiananna 1260 allo aḷannune.

⁷See su surga nariaddite pangalo. Mikhael wuṛṛu manga mala'ekanne mapapangalo lumawanna naga udde. Wuṛṛu naga udde lai nilaḷimannu manga mala'ekanne, lumawanna si Mikhael. ⁸Arawe naga udde niapaarugi. Itou wuṛṛu manga mala'ekanne tate iwala matana'a su surga. ⁹Naga apan wahewalla udde niramme su liudde! Ete itou atoanna timmade udde apan aranne Setanna ara'e Ghaṛṛaho Laḷeo, apan nangawusu ahewallu runia. Itou niramme su runia su sambau ringannu manga mala'ekanne.

¹⁰See ia'u naaringikka tingikka apan ma'ikkatta su surga mabbisara, "Ete orassa indi tempone Mawu Ruata manaḷamatta pabbawala-Ge! Orassa indi Mawu Ruata napaḷiatta'u taṛṛino-Ne ere sangkatou Ratu! Orassa indi Ratu m Punnu Saḷamatta apan suete pina'ire udde suete napaḷiatta'u taṛṛino-Ne! Ana waugu apan nangansila manga tuṛṛangi ite su saruannu Mawu Ruata, allo wuṛṛu ṛabbi, suete niapaasabbanga wuassu surga. ¹¹Manga tuṛṛangi ite suete napaarugi n tou ringannu ṛaṛṛa n Ana'u Domba udde, wuṛṛu ringannu watti'a apan atonna wuassu Mawu Ruata apan niwatti'i mangitou. Imangitou maḷuassa nanantillu niawa mangitou ma'oma n sara mate. ¹²Ana waugu udde, ṛinone surga wuṛṛu sarangkanambone apan uatana'a suḷalumme, lumala'a! Arawe nasilakate runia wuṛṛu tahaḷoangnga, ana waugu Setanna sinumossokke ringanni amiu ringannu asasa'une apan wahewalla, ana waugu itou masingkata, manungku tempone tate maḷannu lai."

¹³Su tempo naga udde naatutukka manungku itou nirammete su runia, itou nanattakke mangngenggena wawine apan suete nangunsiwe n ana'a esakka udde. ¹⁴Arawe wawine udde niongoḷannu darua papaiddu manu'a rajawali apan maḷalakka, tadea'u itou tumalla'a su tampa atanaanne su wadda'a, suapa itou sarun padduḷiananna tallu tonna annumu wuḷanna aḷannune, maḷiuda wuassu aenggenu naga udde. ¹⁵Ne naga udde napaasabbangu ua'e wuassu moṛṛonge apan manambo atonna watukku wawine udde, tadea'u mapa'elekki tou. ¹⁶Arawe runia nassumbala wawine udde; runia namu'a moṛṛonge, wuṛṛu nangallupa ua'e apan sinumabbanga wuassu moṛṛongu naga udde. ¹⁷Naga mangke nasa'u atonna su wawine udde, na'oma n sara itou inaita namangalo pabbawalaga waine wuassu wawine udde, eteudde anambo n taumata apan tuttuṛṛuta manga parenta Mawu Ruata, wuṛṛu nattiala su ola'u Mawu Yesus wuṛṛu taṛṛino-Ne. ¹⁸See naga udde dirumarisikka sɿ apanne.

Winatangnga darua

13 Wua udde ia'u naasilo sambau winatangnga nilumapputa wu-assu laɭummu tahaɭoangnga. Itou pia tatandunge mapuɭo wuɾɾu puane pitu. Suapan tatandunge pia araposa n araratuanna, wuɾɾu suapan puane uaworɾetta sambau aranna aaɭuandaga su Mawu Ruata. ²Winatangnga apan ta'u niasiloanna udde oɭangnge naaɭihidda ere macan tutul, wuɾɾu leddane naaɭihidda beruangnga, wuɾɾu sasumigge naaɭihidda sasumiggu singa. See winatangnga udde nionggolannu naga atato hassi tou sassane, wuɾɾu addera n araratuanne, wuɾɾu taɾɾinone apan wahewalla. ³Sambau wuassu wallatu pitu pua m winatangnga udde aellehanna ere lessa apan wahewalla, arawe lessa udde napiate. Ahewallu runia uatantalongnga winatangnga udde ringannu tuttiangnga. ⁴Wuɾɾu imangitou maddalo naga udde ana waugu itou suete nangonggolu taɾɾinone su winatangnga udde. Wuɾɾu imangitou massubba winatangnga udde lai. Imangitou nabbisara, "Tawe suɭungnge winatangnga indi! Tawedu wotongnge mamangalo lumawanna sitou!"

⁵Winatangnga udde niwala mabbisara manga inolaanna apan ipammunga wuɾɾu ipangngaɭuandaga Mawu Ruata. Itou niwala mamma-renta appatu puɭo dua su wuɭanne aɭannune. ⁶See itou mannattakke mangangaɭuandaga Mawu Ruata, wuɾɾu arannu Mawu Ruata. Aroddi lai tampa atatanaannu Mawu Ruata, wuɾɾu sarangkanambone apan uatana'a su surga lai niaɭuandahanne. ⁷Itou niwala lai lullawanna pabbawalagu Mawu Ruata lapiddu mandugi simangitou. Wuɾɾu taɾɾino su aɭawo'u pabbawalaga, araratuanna, wahasa, wuɾɾu walaga nionggolla sitou. ⁸Winatangnga udde sarun subbannu anambo n taumata apan mabbia akka su wowo n runia indi, tabbene'e manga taumata apan aranne niworɾeta tantaɭanna runia indi taambe nariaddi, sulaɭummu wuke n taumata wiakka pussa'a n Ana'u Domba apan suete nipototta.

⁹Ana waugu udde, amungkangu iamiu wotongnge maddaringikka, paddaringikke watti'a indi: ¹⁰"Taumata apan ɾinone iɾɾuumanna, atonna itou sarun iɾɾuumanna. Wuɾɾu taumata apan ɾinone pateannu haɭele, atonna itou sarun pateannu haɭele. Ana waugu udde walagu Mawu Ruata ɾinone matammuda wuɾɾu matuɾɾuta."

¹¹See ia'u naasilo sambau winatangnga waine sinumabbanga wuassu laɭummu runia. Itou pia tatandunge darua ere tatandu'u ana'u domba. Tingikke ere tingikku naga. ¹²Su saruannu winatanga apan paarorone udde itou nappaattu taɾɾino apan wahewalla apan niasombanganne wuassu winatangnga udde lai. Ahewallu runia wuɾɾu anambo n apan uatana'a su wowone, niwata'a massubba winatangnga paarorone udde, apan lessane wahewalla napiate. ¹³Winatangnga aruane udde na'ola'a

manga ałarřindu'a apan wahewalla. Su saruannu awadaalla itou na'ola'a putungnga niumontu'a wuassu langitta watukku runia. ¹⁴Wurřu anambo n taumata apan mabbiakka su runia niawusuanne ringannu manga ałarřindu'a apan wotongnge olaanne su saruannu winatangnga apan paarorone udde. Wurřu imangitou sarangkanambone nirolokka mandarisikku sambau paałuanna wuassu winatangnga apan suete nilessa n halele, arawe ta'e wiakka. ¹⁵Winatangnga aruane udde niwala mangong-golu singangu su paałuanna udde, na'oma n sara paałuanna udde wotongnge mabbisara wurřu mamate anambo n taumata apan niaddiri massubba sitou. ¹⁶Anambo n taumata, timmade wurřu dario'a, ala wurřu asiangnga, allangnga wurřu tawe allangnga, niwata'u winatangnga udde iapaasengkama tatiala su lima aikkatanni mangitou ara'e su pakkani mangitou. ¹⁷Tawe saran sangkatou wotongnge mamalli ara'e mabbalu'u sarannapa, amungkangu itou tawe tatiala udde, eteudde arannu winatangnga udde sassane, ara'e worřetta papasingkatu aranna udde.

¹⁸Isindi řinone pia apande. Taumata apan masirřongnga wotongnge mandeengngu atappasanne wuassu anambo n winatangnga udde, ana waugu reenganna udde, eteudde arannu sangkatou taumata. Reenganne eteudde 666.

Ana'u Domba wurřu ałarřanang-Nge

14 Wua udde ia'u naasilo, see niasiloanna Ana'u Domba udde uari-sikka su wowo n Wuiddu Sion. Suadio'a ringanni Tou pia 144.000 su atoune taumata apan su pakkanu sangkatou-sangkatou uaworřetta aran-Ne wurřu arannu Mawu Iamang-Nge. ²See ia'u naaringikka tingikka wuassu langitta mangngelekka naalıhidda tingikku ua'e wahewalla apan mappampassa wurřu naalıhidda tingikku rallu'a apan ma-saddata. Tingikka udde niarřingirřana naalıhidda tingikku musikka wu-assu mananalangnga kecapi apan tantałanna mannengkella kecapine. ³Su saruannu addera n araratuanna wurřu sire appata riadianna wurřu manga piařrange uapalıwutta addera n araratuanna udde, 144.000 su atoune udde manggantari sambau antari wakku. Antari udde tawe aurumannu saran sangkatou, tumba'u sire 144.000 su atoune udde apan suete nipallosa wuassu runia. ⁴Imangitou udde manga taumata apan sidutu na'ukkassa ere marřuala susi, ana waugu tawe uauukka suadio'a ringannu wawine. Imangitou uatantalongnga Ana'u Domba udde suapan tampa Itou inai. Wuassu wallatu anambo n taumata, tumba'u imangitou apan suete nipallosa maola'a sasamba apan paarorone su Mawu Ruata wurřu su Ana'u Domba. ⁵Tawe saran paassa imangitou mangawusu; wurřu imangitou tawe anggone saran adio'a.

Sire tallu mala'ekatta

⁶See ia'u naasilo sangkatou mala'ekatta waine apan tuttalla'a matanggaka su langitta. Mala'ekatta udde uaapiddu watti'a su ola'u Watti'u Aļaļuassa apan awasa iapaasingkatta su taumata n runia ete-udde su anambo n pabbawalaga, ruanganna, wahasa wuŗru araratuanna. ⁷Mala'ekatta udde u'ui ringannu tingikka apan ma'ikkatta, "Aata'utte Mawu Ruata wuŗru paddalote awawantu-Ge! Ana waugu nia'omante tempone Mawu Ruata mamarikissa taumata. Subbaite Itou apan nandi-addi langitta, runia, tahaļoangnga wuŗru aļawo'u aļimata n ua'e!"

⁸Mala'ekatta aruane nanansuna mala'ekatta paarorone lapiddu inumui, "Nanawote! Soa m Babel apan wahewalla nanawote! Itou suete na'ola'a aļawo'u pabbawalaga niwu'annu anggore - eteudde anggore wuassu apulu n sasandage!"

⁹Sangkatou mala'ekatta atallune nanansuna darua mala'ekatta udde, lapiddu inumui ringannu tingikka ma'ikkatta, "Taumata apan massubba winatangnga udde ringannu paaļuanne, wuŗru pia tatiala m winatangnga udde su pakkane ara'e su limane, ¹⁰taumata udde sarun ma'inumma anggore wuassu Mawu Ruata, eteudde anggoru asasa'u-Ne apan suete nilaļinni Tou sulaļummu tampane, apan tawe nihaingnga sara ng kadio'a! Anambo n taumata udde sarun sansaranna sulaļummu putungnga wuŗru belerangnga su saruannu manga mala'ekatta susi wuŗru su saruannu Ana'u Domba udde. ¹¹Timbula wuassu putungnga apan mannan-sara manga taumata udde sidutu tuttimbula saran maļannu-ļannu. Allo rabbi tawe illoļone imangitou sassansaranna, eteudde imangitou apan massubba winatangnga udde wuŗru paaļuanne, anambo n taumata apan pia tatialan arannu winatangnga udde!"

¹²Sulaļummu olangge indi pabbawalagu Mawu Ruata apan matuŗruta su manga parenta Mawu Ruata wuŗru matuŗruta Mawu Yesus, rinone matammuda.

¹³See ia'u naaringikka tingikka wuassu surga mabbisara, "Woŗretta'a indi: Manattaka orassa indi, aļaļuassa su manga taumata apan nate tantaļanna mangngimbe Mawu!"

"Atonna!" sasimbaku Gharraho Mawu Ruata. "Imangitou sarun mangilloļo mammanara masahadda, ana waugu hessi m pangangimbe mangitou sidutu uatantalongnga simangitou."

Runia itinganna

¹⁴Wua udde ia'u na'ellega, ne niasiloanna sambau winabbawa apan mawira. Su wowo n winabbawa udde ua'ianna sangkatou apan

aellehanna ere taumata. Su pua-Ne pia sambau araposa n araratuanna wuławanna, wuŗru su lima-Ne pia sambau haļele marŗoro. ¹⁵Wua udde sangkatou mala'ekatta waine sinumabanga wuassu Waļe Mawu Ruata. Ringannu tingikka apan ma'ikkatta, itou inumui Sitou apan ua'ianna su wowo n winabbawa udde, "Limbea'e haļele-Nu udde wuŗru orassa indi pangitingke, ana waugu temponete m pangangitingnga; runia naļahate wotongnete itinganna!" ¹⁶See Itou apan ua'ianna su wowo n winabbawa udde nallimbete n haļele-Ne watukku runia, ne runia a'itingante.

¹⁷Wua udde ia'u naasilo lai sangkatou mala'ekatta waine lai sinumabanga wuassu Waļe Mawu su surga. Itou lai uaaggasa haļele sammata apan marŗoro.

¹⁸Napawe wua udde, sangkatou mala'ekatta waine, apan uatarrino putungnga, nirumanta wuassu mezbah. Ringannu tingikka ma'ikkatta itou inumui su mala'ekatta apan uaaggasa haļele marŗoro udde, "Limbea'e haļelenu udde wuŗru ti'ote manga wua n anggoru su runia, ana waugu manga wuane naļahate!" ¹⁹Ne mala'ekatta udde nallimbete n haļelene watukku runia wuŗru nani'o manga wua n anggoru wuassu alune, see nilombo sulalummu hahilingannu anggoru asasa'u Mawu Ruata apan wahewalla. ²⁰Manga wua n anggoru udde nihilingnga su liuddu soa, wuŗru wuassu hahilingannu anggoru udde mangngelekkke ŗarra naalihida saļukka, araune tallu ŗasutta kilometerre, wuŗru alaļumme marani n dua meterre.

Mala'ekatta ringannu asasusa apan panginsueanne

15 Wua udde ia'u naasilo su langitta sambau apan maatiangnga wuŗru tawe suļungge. Pia sire pitu mala'ekatta wuŗru pitu asasusa apan panginsueanne. Ete indi panginsueanne Mawu Ruata mappaaranta n asasa'u-Ne.

²Napawe wua udde ia'u naasilo sambau apan aellehanna naalihidda tahaļoangnga kaca uaļalo'a m putungnga. Ia'u naasilo lai manga taumata apan suete naauntunga su winatangnga wuŗru paaļuanne, wuŗru naauntunga su manga taumata apan aranne niialannu worŗetu reenganna. Manga taumata apan naa'untunga udde uarisikka su winggi n tahaļoangnga kaca lapiddu uaaggasa kecapi apan nionggolu Mawu Ruata simangitou. ³Wuŗru imangitou mangantari antari Musa, allangu Mawu Ruata, wuŗru antari n Ana'u Domba. Arendi tingikke,

"Mawu, Ruata Lembon Tarrino,

tumanite n wahewalla wuŗru maatiangnga manga inolaan-Nu!
Ratu n alaŗo'u pabbawalaga

tumanite n matuḷidda wuṛṛu tawe saḷane manga inolaan-Nu!

⁴Isai apan tawe matta'uttu, Mawu?

Isai maddiri mamasingkatu awawantu-Gu?

Tumba'u I'o apan na'ukkassa.

Aḷawo'u pabbawalaga sarun rumanta massubba Si'o

ana wangu manga parenta-Nu apan matuḷidda

suete niaasiloannu anambo n taumata."

⁵Napawe wua udde ia'u naasilo Waḷe Mawu su surga nawu'a, wuṛṛu Rasannu Mawu udde sulaḷumme. ⁶See sire pitu mala'ekatta wuṛṛu pitu asasusa udde sinumabbanga wuassu Waḷe Mawu Ruata. Peddeti mangitou wuassu linen apan waresi wuṛṛu sussaḷendapa. Wuṛṛu imangitou uaḷurṛe n laḷinduma sabba'a apan niola'a wuassu wuḷawanna. ⁷Wua udde sambau wuassu wallatu riadianna appata udde nangoggola su sire pitu mala'ekatta udde pitu m bau cawanna wuḷawanna apan napene n asasa'u Mawu Ruata, - Mawu Ruata apan wiakka saran maḷannu-ḷannu. ⁸Ne Waḷe Mawu Ruata udde napenete n timbulla wuassu awawantuga wuṛṛu taṛṛino Mawu Ruata. Wuṛṛu tantaḷanna pitu asasusa apan niapiddu sire pitu mala'ekatta udde taambe nasue, tawe saran sangkatou apan wotongnge maasutta sulaḷummu Waḷe Mawu Ruata.

Manga cawanna asasa'u Mawu Ruata

16 Ana see ia'u naaringikka tingikka wahewalla wuassu laḷummu Waḷe Mawu Ruata nabbisara su sire pitu mala'ekatta udde, "Roote wuṛṛu laḷina'e laḷorṛo n pitu cawanna asasa'u Mawu Ruata udde su wowo n runia!"

²Ne mala'ekatta paarorone inaite wuṛṛu nallaḷinnu laḷorṛo n cawanne su runia. Ne nilumappute manga pinsula apan mahiadda wuṛṛu tumanite n mataddu'a su anambo n taumata apan pia tatiala m winatangnga udde, wuṛṛu su manga taumata apan massubba paaluanne.

³Napawe wua udde mala'ekatta aruane nallaḷinnu laḷorṛo n cawanne su tahaḷoangnga. Ne ua'e n tahaḷoangnga nabbali ere ṛaṛṛa n taumata nate, wuṛṛu natete manga riadianna apan mabbiakka sulaḷummu tahaḷoangnga.

⁴Wua udde mala'ekatta atallune nallaḷinnu laḷorṛo n cawanne su manga saḷukka wuṛṛu manga aḷimata n ua'e, ne aḷawo'u ua'ene nabbali ṛaṛṛa. ⁵Ia'u naaringikka mala'ekatta apan uataṛṛino ua'e nabbisara, "Ruumannu apan niemangngu udde matuḷidda, I'o Lembon Susi, Mawu Ruata apan nirumanta, wuṛṛu nirumantate! ⁶Imangitou suete napaaturo n ṛaṛṛa m pabbawalagu Mawu Ruata wuṛṛu ṛaṛṛa manga nabi; orassa indi I'o mappa'inummu ṛaṛṛa simangitou. Atonna, naṛṛinote udde

maola'a simangitou!" ⁷Ana see ia'u naaringikka tingikka wuassu mezbah nabbisara, "Mawu, Mawu Ruata Lembon Tarrino, atonna wuṛṛu su atatūḍidda manga ruumanna apan niema'a siami!"

⁸Napawe wua udde mala'ekatta aippane nallaḷḡnnu laḷoṛṛo n cawanne su matannallo, ne matannallo niwala mannutungnga tau-mata ringannu saḷihangnge apan maḷoso udde. ⁹Taumata natutungngu saḷihangnge, wuṛṛu imangitou namontoga arannu Mawu Ruata, apan uataṛṛino manga asasusa udde. Salaiwe aroddi, imangitou maddiri mawaḷu wuassu manga rosa mangitou wuṛṛu maddiri maddalo awawantugu Mawu Ruata.

¹⁰See mala'ekatta aḷimane nallaḷḡnnu laḷoṛṛo n cawanne su addera n araratuannu winatangnga udde. Ne ahewallu araratuannu winatangnga udde nabbali maranduma, wuṛṛu taumata mangngi'i lila ana waugu atataddu'a. ¹¹See imangitou namontoge Mawu Ruata su surga ana waugu imangitou nataddu'a wuṛṛu ana waugu manga pinsuli mangitou. Arawe imangitou tawe mawaḷu lai wuassu pallaḷagu mangitou apan laḷeo.

¹²Napawe wua udde mala'ekatta aiannume nallaḷḡnnu laḷoṛṛo n cawanne watukku Saḷukku Efrat apan wahewalla udde. Ne saḷukka udde namara na'oma n sara manga ratu wuassu samba'a ra'i wotongnge sumabbi umamatta. ¹³See ia'u naasilo tatallu ghaṛṛaho laḷeo apan olangnge naaḷihidda aakka. Aakka udde sambau-sambau sussabbanga wuassu moṛṛongu naga, wuassu moṛṛongu winatangnga, wuṛṛu wuassu moṛṛongu nabi awusu. ¹⁴Imangitou eteudde manga ghaṛṛaho laḷeo apan ma'ola'a manga aḷaṛṛindu'a. Tatallu ghaṛṛaho udde inaite su anambo n manga ratu su ahewallu runia wuṛṛu nangammule mangitou mapapangalo su Allo apan wahewalla, eteudde Allo wuassu Mawu Ruata Lembon Tarrino.

¹⁵"Daringiṛrete! Ia'u rumanta ere taṛṛa ta'o! Aḷaḷuassa su taumata apan sidutu uataṛṛapa wuṛṛu uariaga peddene, ma'oma n sara itou tawe umamatta tantoḷe wuṛṛu masili su saruannu awadaalla!"

¹⁶Wua udde manga ghaṛṛaho udde nangammullu manga ratu udde su tampa apan sulaḷummu wisara n Ibrani isassaggo Harmagedon.

¹⁷Napawe wua udde mala'ekatta appitune nallaḷḡnnu laḷoṛṛo n cawanne su winalanganna. Ne niaringikke tingikka apan ma'ikkatta wuassu addera n araratuannu Waḷe Mawu, apan nabbisara, "Nasuete!"

¹⁸See nariaddite sawallo ma'ilatta wuṛṛu tingikku rallu'a mappose wuṛṛu ruddallu'a, lapiddu linukka apan wahewalla. Tawe saran paassa pia linukka aroddi ahewalle ro'e n taumata niriaddi. Ete indi linukka apan ahewaḷanne! ¹⁹Soa wahewalla udde natahia tallu ng kaadoanna, wuṛṛu naṛṛimuns'a'e lai manga soa su anambo n araratuanna su runia. See Mawu Ruata naanaungnga Babel apan wahewalla udde. Ne Mawu

Ruata napa'inummi tou anggoru wuassu cawannu Mawu Ruata – ete-udde anggoru asasa'u-Ne apan nangillembo. ²⁰Anambo n tarannusa nawontola, wuṛṛu anambo n wowone nawuḷussa. ²¹Uranna eisse apan wahewa, sambau-sambau awakkane lima m puḷo su kilone, nanawo wuassu langitta nangema'a manga taumata. Ne imangitou namontoga Mawu Ruata ana waugu asasusa n uranna eisse apan wahewalla udde.

Sumasandaga wahewalla

17 Wua udde sangkatou wuassu sire pitu mala'ekatta apan uaggasa cawanna pitu udde nirumanta ringanku wuṛṛu nabbisara, "Wette, ia'u sarun manta'e si'o ereapa sumasandaga apan wahewalla udde sarun irruumanna, eteudde soa wahewalla apan niapararisikka su winggi manga saḷukka. ²Manga ratu n runia ma'ola'a alaḷeo ringanni tou, wuṛṛu tumana'u runia nabbali wu'anna ana waugu na'inumma anggoru sasandage."

³See Ghaṛraho Mawu Ruata nangintarṛo sia'u, wuṛṛu mala'ekatta udde nangapi'u watukku wadda'a. Poiaroddi ia'u naasilo sangkatou wawine ua'ianna su wowo n sambau winatangnga wambuḷune maṛramu uaitumma, wuṛṛu napene m worṛetta ringannu manga aranna aaḷuandaga su Mawu Ruata. Winatangnga udde puane pitu wuṛṛu tatandunge mapuḷo. ⁴Wawine udde ualṛṛe n laubha ungu wuṛṛu maṛramu uaitumma, see laḷogaṛranu wuḷawanna, manga permata, wuṛṛu mutiara. Su limane itou uaaggasa sambau mangko wuḷawanna napene n inolaanne apan maaran-tina wuṛṛu laḷeo, hessi n sasandage. ⁵Su pakkane uaworṛetta sambau aranna apan iaaddappinga. Aranna udde eteudde, "Babel Apan Wahewalla, inangngu manga sumasandaga wuṛṛu taumata laḷeo su runia." ⁶See ia'u naasilo manungku wawine udde niwu'annu ṛaṛra m pabbawalagu Mawu Ruata wuṛṛu ṛaṛra manga taumata apan nipate ana waugu maturṛuta Mawu Yesus.

Su tempo ia'u naasilo wawine udde, ia'u tinumiangnga. ⁷See mala'ekatta udde nabbisara sia'u, "Anio i'o tinumiangnga? Mappianne ia'u mamasinkata si'o addapingu wawine udde wuṛṛu addapingu winatangnga apan sasa'eanne, eteudde winatangnga pitu puane wuṛṛu mapuḷo tatandunge. ⁸Winatangnga udde rorone suete nabbiakka, arawe orassa indi tate mabbiakka apia. Ete adio'a lai itou sumabbanga wuassu rampisu papate wuṛṛu inai mattuda n tampa m papatene. Manga taumata apan mabbiakka su runia, apan aranne tawe uaworṛetta sulalummu Wuke n Taumata Wiakka tantaḷanna runia taambe niriaddi sarun tumiangnga napawe maasilo winatangnga udde. Ana waugu winatanga udde rorone suete nabbiaka. Orassa indi itou tate nabbiaka lai, arawe itou sarun rumanta apia.

⁹Su olangnge indi rinone pia apande wurru pasasunna. Pua pitu udde eteudde pitu wuidda; eteudde manga wuidda tampa m wawine udde ua'ianna. Wurru pitu pua udde lai, eteudde sire pitu ratu: ¹⁰sire lima wuassi mangitou nanawote, sangkatou ta'e uaparenta, wurru sangkatou lai taambe nirumanta. Amungkangu itou rumantate, itou tumbau mamarenta tala ng kadio'a. ¹¹Wurru winatangnga apan rorone suete nabbiakka, arawe tempo indi tate nabbiakka lai; eteudde ratu aualune. Itou udde sangkatou wuassu wallatu sire pitu ratu udde lai, apan orassa indi tanta'anna mattuda n tampa apateanne.

¹²Mapulo tatandu'a apan aellehanna udde, eteudde sire mapulo ratu apan taambe nanattakka mamarenta. Arawe imangitou sarun ong-ogolannu tarfino mamarenta maola'a sangkatou ratu su sambau ringannu winatangnga udde sula'ummu sangka orassa alannune. ¹³Sire mapulo ratu udde sarangkanambone pia pandumanne apan uasulungnga; imangitou sarangkanambone nanantillu atatohassa wurru tarfino mangitou su winatangnga udde. ¹⁴Imangitou sarun mamangalo lumawanna Ana'u Domba udde. Arawe Ana'u Domba udde wurru malla'arenggen-Ne apan maturruta apan suete niwagoan-Ne wurru nipile-Ne udde sarun mapaarugi manga ratu udde, ana wangu ete Itou Mawu n alawo'u tuangnga, wurru Ratu n alawo'u ratu."

¹⁵Mala'ekatta udde nabbisara lai, "Ua'e apan aellehannu udde, tampa n aianannu sumasandaga udde, eteudde manga pabbawalaga, manga tumana'u soa, manga araratuanna wurru manga wahasa. ¹⁶Mapulo tatandu'a apan aellehannu udde wurru winatangnga udde sarun marantinu sumasandaga udde. Imangitou sarun mangarfo alawo'u sarannapa apan tatahuananne, wurru mapaatantole n tou. Imangitou sarun uminassa remessi tou wurru mamate sitou ringannu putungnga. ¹⁷Ana wangu Mawu Ruata suete nanga'ore naungngi mangitou mapaa-mattu pandumannu Mawu Ruata. Mawu Ruata suete na'ola'a simangitou sangkire ipanantillu tarfino mangitou su winatangnga udde, tadea'u winatangnga udde mamarenta ma'oma n sara matipussa apa apan suete niapaasingkatu Mawu Ruata.

¹⁸Wawine apan niasiloannu udde, eteudde soa apan wahewalla apan uaparenta manga ratu su runia."

Ananawo n soa Babel

18 Napawe wua udde ia'u naasilo sangkatou mala'ekatta waine sinumossoka wuassu surge. Itou uatahuanna tarfino apan wahewalla, wurru awawantuge naaola'a ahewallu runia nabba'i masemakka. ²Ringannu tingikka apan ma'ikkatta, itou inumui, "Nanawote! Ba-

bel wahewalla nanawote! Orassa indi itou nabbaļite tampa manga setanna wuṛṛu manga ghaṛraho laļeo. Sulaļumme mabbiakka aļawo'u hati manu'a apan laļeo wuṛṛu iaarantinu taumata. ³Ana waugu aļawo'u pabbawalaga suete na'inumma anggoru apulu m pasasandage. Manga ratu su runia sussandaga ringanni tou, wuṛṛu manga mabbawaļu'a su runia nabbaļi ala ringannu apulune apan tawe ia'uļinna udde."

⁴See ia'u naaringikka tingikka waine wuassu surga nabbisara,

"Sabbangke, aļarṛana-U! Sabbangke wuassu laļumme!

Imbaṛṛanga iamiu tumantalongnga manga rosane,

wuṛṛu tumuṛṛutta mamasanna ruumanne!

⁵Ana waugu rosane ua'ombo sara langitta,

wuṛṛu Mawu Ruata uanaungnga aļaleone.

⁶Ola'awe itou su ereapa itou suete na'ola'a siamiu;

waliṣete itou paarua wuassu anambo n pallaļagu apan suete

niolangnge.

Loṛroi mangkone ringannu ua'e inumanna apan paarua maattirṛana

wuassu ua'e inumanna

apan nasaddiate iapa'inumma siamiu.

⁷Onggoļ'a sitou paparṛanga wuṛṛu asasusa

apan anambone uasuļungngu awawantuga wuṛṛu paa'ala apan

nionggole su wadange sassane.

Ana waugu itou sidutu mabbisara su watanganne,

'Ia'u indi ratu apan mammarenta:

Ia'u waliṇe wawine waļu;

ia'u sarun tawe mamendama asasusa!

⁸Ana waugu ete olangnge udde, ne tumba'u sulaļummu allo massallo

itou sarun maasomba silaka

– radda'a, asasusa wuṛṛu aļarṛutumma.

Wuṛṛu itou sarun tutungannu putungnga,

ana waugu Mawu Ruata plate tarṛino ipakkuungngi tou udde."

⁹Manga ratu n runia apan suadio'a sulaļummu inolaanne sussandaga

wuṛṛu apulu naungngu wawine udde sarun lumuai wuṛṛu lumallu n

soa udde napawe imangitou naasilo timbulla sussaloṛi wuassu putungnga

apan mannutungnga sitou. ¹⁰Imangitou sarun rumarisikka wuassu marau

ana waugu imangitou matta'uttu asasusane. Imangitou nabbisara, "Uare,

waliṇe hampa silakane soa apan tinumelengke indi – soa m Babel

apan matohassa! Tumba'u sulaļummu sangka orassa ruumannu suete


niapaamatta!"

¹¹Manga mabbawaļu'a su runia lai lulluai wuṛṛu lullaļo ana waugu

wawine udde, ana waugu tate saran sangkatou lai apan mamalli manga

sarannapa waļu'anni mangitou. ¹²Tateddu mamalli wuļawanna, saļa'a,

permata, wuṛṛu mutiara mangitou; wuṛṛu lai maļarṛrenessa linen, ungu,



Manga sarannapa walū'anna (18:11)

sutera, wuṛṛu maḷarṛnessa maṛṛamu ua'itumma; alawo'u hati ng kalu apan maḷawa asombanganna, sarannapa wuassu gadinga wuṛṛu wuassu alu apan maarega, wuassu witu'a, atta'a, wuṛṛu pualam; ¹³pisi ng kalu matemangnga, manga rampa, setanggi, mur, wuṛṛu amania; anggore wuṛṛu lana, taponna wuṛṛu ganduma; sapi wuṛṛu domba, aḡaḷo wuṛṛu kereta, manga allangnga, see lai niawa n taumata. ¹⁴Manga mabbalu'a nabbisara su wawine udde, "Sarangkanambone apan ipaapulunu maola'a pussaanu nawuḷite lai, wuṛṛu aḷawo'u paa'alanu wuṛṛu araṛramagu nawuḷite. I'o tate maasomba apia!" ¹⁵Manga mabbawalu'a apan naalate ana waugu mabbalu'a su soa udde sarun rumarisikka wasu marau, ana waugu imangitou matta'utta aṛṛinoannu asasusane. Imangitou sarun lumuai wuṛṛu lumaḷo, ¹⁶see mabbisara, "Uare, waḷine hampa silakane soa apan tinumelengke indi! Inanaramanne itou ualurṛe m peddeta linen, maḷarṛnessa ungu wuṛṛu maḷarṛnessa maṛṛamu ua'itumma; inanaramanne itou napene n laḷoggaka wuḷawanna, permata wuṛṛu mutiara! ¹⁷Arawe tumba'u sulaḷummu sangka orassa, itou niawuḷiante m paa'alane udde!"

Anambo n apitenna, sumasa'ene, wuṛṛu mamamanara ng kapalla, see anambo n taumata apan manarane su tahaḷoangnga, uarisikka wasu marau. ¹⁸Wuṛṛu nangintuḷi su tempo imangitou naasilo timbula susapputta wuassu putungnga apan mannutungnga soa udde. Imangitou inumui, "Tawe saran paassa pia soa waine apan wahewalla ereindi!" ¹⁹Ne imangitou nangalasse n awu su pua mangitou maola'a tatiala

lullaŋo, see nilumuai wuŋŋu u'ui, "Uare, waŋine hampa silakane soa apan wahewalla indi! Paa'alane suete naaola'a anambo n taumata apan uatahuanna apalla su tahaŋoangnga nabbali ala! Arawe tumba'u sulaŋummu sangka orassa, itou inawuŋiante n ala'wo'u sarannapa!"

²⁰Ei surga, lala'e ana waugu aŋŋaŋŋimunsu'a soa udde! Ei, alaŋŋana'u Mawu Ruata, manga rasul, manga nabi, lala'e! Ana waugu Mawu Ruata suete naŋŋuumanni tou maola'a sambau bawalissu sarangkanambone apan niola'i mangitou siamiu!

²¹Napawe wua udde, sangkatou mala'ekatta apan matohassa namengketa sambau watu - ere ahewallu watu ng gahilinganna apan wahewalla - see tinuntunga watukku tahaŋoangnga lapiddu nabbisara, "Arendi olangnge soa m Babel apan tinumelengke udde sarun iramme ringannu ma'ikkatta ma'oma n sara tate asombanganna apia. ²²Tingikku musikka wuassu manalangnga kecapi, wuassu manga taŋŋa antari, wuassu manalangnga wansi wuŋŋu wuassu mananiuppa trompeta, tate lai ia-ringikka wuassu laŋummu soa m Babel! Tate lai asombanganna sangkatou mamanara apandeanne isudde, wuŋŋu tingikku watu ng gahilinganna lai tate aringirana. ²³Taumata tate lai maasilo semakku soŋo sulaŋummu soa; wuŋŋu tate aringirana lai ramea andeangngu awingnga isudde. Manga mabbawalu'i amiu eteudde manga taumata apan tinumelengke su runia, wuŋŋu ringannu manga apande m wali'i matanu i'o mangnga-wusu alawo'u pabbawalaga su runia!"

²⁴Babel niŋŋuumanna ana waugu sulaŋummu soa udde suete niasombanganna ŋaŋŋa manga nabi, ŋaŋŋa manga alaŋŋana'u Mawu Ruata - aunne ŋaŋŋa n anambo n taumata apan suete nipate su wowo n runia indi.

19 Napawe wua udde ia'u naaringikka sambau naalihidda tingikku taumata nambo wuassu surga apan u'ui, "Paddalote Mawu Ruata! Ruata ng kite eteudde Mawu Ruata apan mannaŋamatta; Itou Mawu Ruata awantuhanne wuŋŋu mataŋŋino! ²Pallaŋŋuung-Nge matulidda wuŋŋu masiŋŋonga! Itou suete naŋŋuumannu sumasandaga apan wahewalla, apan nandaŋeo runia ringannu sasandage. Mawu Ruata suete naŋŋuumannu sumasandaga udde, ana waugu ete itou namate manga alangngu Mawu Ruata." ³See tingikku taumata nambo udde niumui apia, "Paddalote Mawu Ruata! Timbulu putungnga apan nangepoddu soa wahewalla udde sarun tumimbula sarangkaŋo'engnge!" ⁴Ne sire rua m puŋo appata piaŋŋange wuŋŋu sire appata riadianna apan uapaŋiwutta addera n araratuanna udde inumaruutta wuŋŋu nassubba Mawu Ruata apan ua'ianna su addera n araratuanna, Imangitou nabbisara, "Amin! Paddalote Mawu Ruata!"

Andeangngu awingngu Ana'u Domba

⁵See niaringirrana wuassu addera n araratuanna udde tingikku wi-sara apan mabbisara, "Paddalote Mawu Ruata, ei manga allangngu Mawu Ruata, wuṛṛu anambo n taumata - timmade dario'a - apan ma-subba Mawu Ruata!" ⁶Napawe wua udde ia'u naaringikka sambau ere tingikku ammuḷannu taumata nambo atonna; tingikke naaḷihidda lua'a mabbasse wuṛṛu ere rallu'a mappose. Ia'u naaringikka imangitou mabbisara, "Paddalote Mawu Ruata! Ana waugu Mawu Ruata ng kite Lembon Taṛṛino udde, orassa indi uaparenta! ⁷Wette iite lumala'a wuṛṛu lumuassa; wette iite maddalo awawantu-Ge! Ana waugu nia'omante allo ng kawingnga apan uaaggasa arannu Ana'u Domba udde, wuṛṛu pare-Ne nasaddiate iawingnga Sitou. ⁸Peddeta lenan apan sussalendapa suete nionggolla sitou iapaaluṛṛe." (Peddeta lenanna udde eteudde manga inolaanna apan mapia apan niola'u alaṛṛana'u Mawu Ruata.)

⁹See mala'ekatta udde nabbisara sia'u, "Woṛṛetta'a indi: 'Laḷu-manna'a su tauṇata apan niwagoanna su andeangngu awingngu Ana'u Domba udde.' " See mala'ekatta udde nanamba apia, "Ete indi watti'a atonna wuassu Mawu Ruata."

¹⁰Ia'u nassuniaga su saruannu mala'ekatta udde ana waugu nassubba sitou, arawe itou nabbisara sia'u, "Arie! Arie passubba sia'u, passubbate Mawu Ruata! Ana waugu ia'u lai allangnga ere i'o wuṛṛu ere anambo n tuṛṛangu apan uaaggasa matohassa su watti'u Mawu Yesu!"

Ana waugu ete watti'u Mawu Yesu udde mannantiro manga tau-mata apan mabatti'u papatta.

Sumasa'e awaḷo mawira

¹¹Wua udde ia'u naasilo surga nawu'a, see niasiloanna sambau awaḷo mawira. Sumasa'e-Ne aranne Matuṛṛuta wuṛṛu Atonna. Itou matuḷidda sulaḷummu mangema'u ruumanna wuṛṛu sulaḷummu pangalo apan niolang-Nge. ¹²Mata-Ne naaḷihidda ṛenggamu putungnga wuṛṛu su pua-Ne Itou ualuṛṛe manambo araposa n araratuanna. Su wada-Nge uawoṛṛetta sambau aranna; wuṛṛu tumba'u Itou sassane masingkatu aranna udde. ¹³Jubah apan ualuṛṛe Sitou suete niammo sulaḷummu ṛaṛra. Wuṛṛu Itou nisaggo "Ṛengetannu Mawu Ruata". ¹⁴Tantara m pangalo wuassu surga uatantalongnga Sitou ringannu uasa'e manga awaḷo mawira, wuṛṛu uapeddetu lenan mawira wuṛṛu waresi. ¹⁵Wuassu moṛṛo-Nge sinumabanga sammata haḷele apan maṛṛoro wuṛṛu ringannu haḷele udde Itou sarun mapaarugi manga pabbawalaga, wuṛṛu Itou

sarun mamarenta simangitou ringannu tatumma'ina atta'a. Itou sarun mamakka n anggore sulaḷummu pamamakkannu anggoru asasa'u Mawu Ruata Apan Lembon Taḥḥino. ¹⁶Su jubah-Ne wuḥḥu su palang-Nge uawoḥḥetta aranna indi, "Ratu n aḷawo'u ratu, wuḥḥu Mawu n aḷawo'u tuangnga."

¹⁷Ana see ia'u naasilo sangkatou mala'ekatta uarisikka su wowo n matannallo. Ringannu tingikka ma'ikkata itou inumui su anambo n manu'u winalanganna, "Wette paammule, tadea'u iite inai su andeangnga wahewalla apan ilallaghu Mawu Ruata! ¹⁸Wette uminassa manga ḥemessu manga ratu, wuḥḥu ḥemessu manga tembonannu tantara, wuḥḥu ḥemessu taumata apan nate su pangalo; wette uminassa ḥemessu manga sumasa'e awaḷo wuḥḥu ḥemessu manga awaḷone wuḥḥu ḥemessu anambo n taumata, timmade ara'e dario'a, allangnga wuḥḥu tawe allangnga!"

¹⁹Wua udde ia'u naasilo winatangnga udde, wuḥḥu manga ratu n runia ringannu manga ammuḷannu tantara mangitou, uaammulla mapapangalo lumawanna Sitou apan uasa'e awaḷo mawira udde, wuḥḥu manga tantara-Ne. ²⁰Ne winatangnga udde niasametta suadio'a ringannu nabi awusu apan suete na'ola'a manga aḷaḥḥindu'a su saruannu winatangnga udde. (Ringannu manga aḷaḥḥindu'a uddewe winatangnga udde nangawusu manga taumata apan uatahuanna tatiala m winatangnga udde, wuḥḥu manga taumata apan massubba paaḷuannu winatangnga udde.) See winatangnga udde wuḥḥu nabi awusu udde niramme ta'e wiakka sulaḷummu tahaḷoangngu putungnga apan lukkenggama ringannu belerangnga. ²¹Wuḥḥu ammuḷannu tantara mangitou nipate n haḷele apan sinumabbanga wuassu moḥḥongu sumasa'e awaḷo mawira udde. Ne manga manu'u winalanganna lai nirumanta wuḥḥu niuminassa ḥemessi mangitou apan nipate udde.

Su ola'u tempo saḥḥiwu su tonnane

20 Napawe wua udde ia'u naasilo sangkatou mala'ekatta sinumo-ssoka wuassu surga. Su limane uaaggasa a'unsi' n rampisu papate wuḥḥu sambau ḥaḥḥapussa apan masallaka. ²See itou nanametta naga udde, atoanna timmade, - eteudde Setanna ara'e Ghaḥḥaho Laḷeo udde - wuḥḥu niḥḥapussa saḥḥiwu su tonanne aḷannune. ³Wua udde mala'ekatta udde nandamme n naga udde watukku rampisu papate, see nangunsi n rampisa udde, wuḥḥu nisegele tadea'u naga udde tate lai maapangawusu manga pabbawalaga tantaḷanna tempo saḥḥiwu su tonnane udde taambe nasue. Wua udde itou ḥinone ipallōsa sulaḷummu tempo apan maḥḥihakka.

⁴See ia'u naasilo manga addera n araratuanna, wuɽɽu manga tau-mata apan ua'ianna su manga addera n araratuanna udde inonggoɽannu taɽɽino ipangema'u ɽuumanna. Ia'u lai naasilo manga ɽimuuddu taumata apan suete niponggo'a puane ana waugu imangitou mattiala su ola'u Mawu Yesus, wuɽɽu mammasingkatu tanata Mawu Ruata. Manga tau-mata udde tawe massubba winatangnga, ara'e lai paaɽuanne. Imangitou lai tawe saran paassa nanengkama tatiala manga winatangnga udde su pakkana ara'e su lima mangitou. Ne imangitou nabbiakka apia wuɽɽu namarenta ere sangkatou ratu suadio'a ringanni Kristus saɽɽiwu su ton-nane aɽannune. ⁵Ete indi panattaɽɽannu taumata nate niapaawiakka apia. (Arawe manga taumata nate waine tawe niapaawiakka apia su-laɽummu saɽɽiwu su tonnane udde.) ⁶Laɽumanna'a su manga taumata apan niapaawangunna apia su panattaɽɽanne udde. Imangitou wotong-nge maola'a pussa'a Mawu Ruata. Papate aruane tawe maattaɽɽino si-mangitou. Imangitou sarun maola'a manga imammu Mawu Ruata wuɽɽu manga imammi Kristus; wuɽɽu imangitou sarun mamarenta suadio'a ringanni Tou saɽɽiwu su tonnane aɽannune.

Setanna niapaarugi

⁷Napawe nasuete tempo n saɽɽiwu su tonnane udde, Setanna sarun ipallosa wuassu tattupanne, ⁸wuɽɽu itou sarun inai mangawusu pabbawa-laga apan uasaliawukka su ahewallu runia, eteudde Gog wuɽɽu Magog. Setanna nangammuli mangitou inai mapapangalo, sambau ammuɽanna apan wahewalla atonna, ere anne su tahaɽoangnga. ⁹Ne imangitou nas-saliawukke su ahewallu runia, see nattalliwunte atatana'annu aɽaɽrana'u Mawu Ruata wuɽɽu soa arangnguannu Mawu Ruata. Arawe putungnga nonto'a wuassu langitta wuɽɽu namate simangitou. ¹⁰See Setanna apan nangawusu simangitou udde, tinuntunga sulaɽummu tahaɽoangngu putungnga wuɽɽu belerangnga. Ete isudde tampane winatangnga wuɽɽu nabi awusu udde niramme paarorone. Imangitou sarun sansaranna allo ɽabbi saran maɽannu-ɽannu.

ɽuumanna panginsueanne

¹¹Napawe wua udde ia'u naasilo sambau addera n araratuanna mawira apan wahewalla wuɽɽu Itou apan ua'ianna su wowone. Langitta wuɽɽu runia nawuɽi wuassu saruan-Ne na'oma n sara tate lai iasilo. ¹²Wuɽɽu ia'u naasilo manga taumata nate, timmade dario'a, uarisikka su saruannu addera n araratuanna udde. Ne manga wuke niwu'ate. See

sambau wuke apan waine niwu'ate, eteudde Wuke n Taumata Wiakka. Wua udde ruumanna niema'a su taumata nate, uasulunggu pallaḷagune tumurruttu apan uaworretta sulaḷummu manga wuke udde.

¹³See tahaḷoangnga nanantillu manga taumata nate sulaḷumme. Papate wuṛru Runia m Papate lai nanantillu manga taumata nate sulaḷummi tou. Wuṛru manga taumata nate sarangkanambone udde niṛruumanna uasulunggu pallaḷagu mangitou. ¹⁴Wua udde Papate wuṛru Runia m Papate tinuntunga sulaḷummu tahaḷoangngu putungnga. (Tahaḷoangngu putungnga indi eteudde papate aruane.) ¹⁵Manga taumata apan aranne tawe uaworretta sulaḷummu Wuke n Taumata Wiakka, iramme sulaḷummu tahaḷoangngu putungnga.

Langitta wakku wuṛru runia wakku

21 See ia'u naasilo langitta apan wakku wuṛru runia wakku. Langitta paarorone wuṛru runia paarorone nawulite, wuṛru tahaḷoangnga lai nawuli. ²Ne ia'u naasilo soa susi udde, eteudde Yerusalem wakku, nonto'a wuassu surga wuassu Mawu Ruata. Soa udde suete nissaddia ere sangkatou maa'awingnga wawine nipeddetanna iapasasomba maa'awingnga esakka. ³See ia'u naaringikka wuassu addera n araratuanna udde mabbisara ma'ikkatta, "Orassa indi tampa atatanaannu Mawu Ruata suadio'a ringannu taumata! Itou sarun mabbiakka suadio'a ringanni mangitou, wuṛru imangitou sarun maola'a aḷarṛanang-Nge. Mawu Ruata sassane sarun matana'a ringanni mangitou wuṛru maola'a Mawu Ruata mangitou. ⁴Itou sarun mamappasa alawo'u allo mata wuassu mata mangitou. Papate sarun tate lai, asasusa, laḷuai, ara'e aḷarṛusa'itta tate lai. Manga inolaanna tabbe nawulite!"

⁵See Itou apan ua'ianna su addera n araratuanna udde nabbisara, "Orassa indi sarangkanambone Ta'u olaanna wakku!" Itou nabbisara lai sia'u, "Worretta'a indi, ana waugu manga wisara indi atonna, wuṛru wotongnge apangimananna." ⁶See Itou nabbisara, "Nasuede! Ete Ia'u paarorone wuṛru pangudusanne; ete Ia'u Mawu apan wuassu Panattarṛanne ma'oma m Panginsueanne. Suapan taumata marou, Ta'u iapa'inumma ringannu tawe bawaekke, wuassu aḷimata n ua'e apan manggonggolu wiakka. ⁷Manga taumata apan naauntunga sarun manengkama manga wawaḷissu inolaanne udde wuassia-U. Ia'u sarun maola'a Mawu Ruatane, wuṛru itou sarun maola'a ana-U. ⁸Arawe taumata mataḷo, taumata mandalaḷeo, taumata mawunga, taṛra pāte, taumata masandaga, taumata apan mappaattu waḷi'i mata, massubba paaluanna, wuṛru taṛra wahia, sarun iramme sulaḷummu tahaḷoangngu

putungnga wuṛṛu belerangnga apan lukkenggama, eteudde papate aruane.”

Yerusalem wakku

⁹Sangkatou wuassu wallatu sire pitu mala'ekatta apan suete nanga-gassa manga cawanna napene m pitu asasusa panginsueanne udde niru-manta ringanku wuṛṛu nabbisara, "Wette! Ia'u sarun mamamtingiddu Maa'awingnga si'o eteudde awingngu Ana'u Domba." ¹⁰Ne Ghaṛṛaho Mawu Ruata nangintarṛo sia'u, wuṛṛu mala'ekatta udde nangapi'u watukku wowone apan tumanite n matanggaka. Itou namamtingiddu Yerusalem sia'u, soa susi udde, soa udde nonto'a wuassu surga, wuassu Mawu Ruata, ¹¹ringannu araṛṛamaga wuṛṛu awawantugu Mawu Ruata. Soa udde sussaḷendapa naaḷihidda watu permata, naaḷihidda watu baiduri pandan apan matilangnga naaḷihidda kristal. ¹²Darandunge uapaḷiwutta matanggaka wahewalla, ringannu ngarane mapuḷo dua, wuṛṛu rariagannu sire mapuḷo dua mala'ekatta. Suapan ngarane uawoṛṛetta manga arannu mapuḷo dua pabbawalagu Israel. ¹³Pia tatallu ngara apan uasaruanna suapan punnu anginna: tatallu su samba'a ra'i, tatallu su samba'a timukka, tatallu su samba'a sawannaka, wuṛṛu tatallu su samba'a waṛṛata. ¹⁴Darandungu soa udde niapararisikka su wowo mapuḷo dua watu rapappake. Su manga watu rapappake udde uawoṛṛetta manga arannu sire mapuḷo dua rasullu Ana'u Domba udde.

¹⁵Mala'ekatta apan uahahatto'u udde pia tatumma'inna auukka wuassu wuḷawanna, ipanguukka soa udde, manga ngarane wuṛṛu darandunge. ¹⁶Soa udde uatarṛa wu'u appata – aḷo'engnge nassuḷungngu aḷalakke. Ne mala'ekatta udde nanguukka soa udde ringannu tatumma'ina auukke; inauranna aḷo'engnge 2400 km; aḷalakke wuṛṛu atanggake nassuḷungngu aḷo'engnge. ¹⁷Su tempo mala'ekatta udde nanguukka darandunge, inauranna atanggaku darandunge udde annu puḷo su meterṛene. Uuṛṛana apan nipaattu mala'ekatta udde eteudde uuṛṛana apan ipappaattu taumata lai. ¹⁸Darandungu soa udde niola'a wuassu watu baiduri pandan, arawe soane sassane wuassu wuḷawanna tutune, matilangnga naaḷihidda kaca. ¹⁹Manga watu rapappaku soa udde niloggaku aḷawo'u watu permata. Watu rapappake apan paarorone niola'a wuassu watu baiduri pandan, aruane wuassu watu nilam, atallune wuassu watu yakut, aiappane wuassu watu zamrud, ²⁰aḷimane wuassu watu baiduri sepah, aiannume wuassu watu delima, appitune wuassu watu ratna cempaka, auaḷune wuassu watu pirus, assione wuassu watu topas, appuḷone wuassu watu krisopras, appuḷone assa wuassu watu lazuardi, wuṛṛu appuḷone dua wuassu watu kecubung. ²¹Mapuḷo dua

ngarane niola'a wuassu mapuḷo dua mutiara, sambau-sambau niola'a wuassu sambau mutiara. Laḷanna su soa udde niola'a wuassu wuḷawanna tutune, matilangnga naaḷihidda kaca apan sussaḷendapa.

²²Ia'u tawe naasilo Waḷe Mawu Ruata su soa udde, ana waugu Waḷe Mawune eteudde Mawu sassane, Mawu Ruata Lembon Taḷḷino, wuḷḷu Ana'u Domba udde. ²³Soa udde tate mappandumma semakku matanallo ara'e semakku wuḷanna, ana waugu awawantugu Mawu Ruata mananemakke, wuḷḷu eteudde Ana'u Domba soḷone. ²⁴Manga pabbawalaga su runia sarun umamatta sulaḷummu asasemakke, wuḷḷu manga ratu lai sarun mangapiddu paa'ala mangitou watukku soa udde. ²⁵Manga ngara n soa udde wawu'anna miallo-miallo; tawe iṛruuda, ana waugu isudde tawe ṛabbine. ²⁶Awawantuga wuḷḷu paa'ala manga pabbawalaga sarun iapiddu watukku laḷummu soa udde. ²⁷Arawe taumata apan ino-laanne maarantina, ara'e taumata taṛṛa wahia – aunne aḷawo'u alaḷeo, tawe maasutta sulaḷumme. Apan wotongnge maasutta tumba'u taumata apan aranne uawoṛṛetta sulaḷummu Wuke n Taumata Wiakka, Wuke n Ana'u Domba udde.

22 Mala'ekatta udde namantingida sia'u saḷukka apan ua'ene mang-ngonggolu wiakka. Saḷukka udde sussaḷendapa naaḷihidda kristal wuḷḷu mangngelekkka wuassu addera n araratuannu Mawu Ruata wuḷḷu Ana'u Domba udde, ²su pattangngannu laḷanna su soa udde. Su winggi n saḷukka udde, su rua m baane pia allu punnu wiakka, apan mabbua paapuḷo dua santonna, eteudde paassa sambuḷanna. Rongngane ipappaatta ipangngundama manga pabbawalaga. ³Sulaḷummu soa udde tawe saran sambau sarannapa apan niaṛṛinoannu wontogu Mawu Ruata.

Addera n araratuannu Mawu Ruata wuḷḷu Ana'u Domba udde sarun iaddo sulaḷummu soa udde. Manga allang-Nge sarun mattaṛṛamawu Sitou, ⁴wuḷḷu ma'ellega hati-Ne. Aran-Ne sarun iwoṛṛeta su pakkani mangitou. ⁵Imangitou tate mappandumma soḷo ara'e semakku matanallo, ana waugu tate ṛabbi lai, wuḷḷu Mawu Ruata sassane sarun manemakka simangitou. Ne imangitou sarun mamarenta ere sangkatou ratu saran maḷannu-ḷannu.

Daranta Mawu Yesus

⁶See mala'ekatta udde nabbisara sia'u, "Manga wisara indi atonna wuḷḷu wotongnge apangimananna. Mawu Ruata apan nangonggolu Ghaṛṛaho-Ne su manga nabi, suete nandolokku malaekan-Ne maman-tingidu su manga allang-Nge apa apan sarun maḷihakke mariaddi."

7"Panutukke indi!" wisara Mawu Yesus, "Ia'u sarun malihakka rumanta. Laalumanna'a su taumata apan tutturuta manga rengetanna sulaummu wuke indi!"

8Ia'u Yohanes, suete naaringikka wurru naasilo sarangkanambone indi. Napawe ia'u suete naaringikka wurru naasilo udde, ia'u inumaruutta su saruannu mala'ekatta apan suete namantingiddu sarangkanambone udde sia'u, wurru ia'u rinone massubba sitou, "arawe itou nabbisara si'u, "Arie! Arie massubba sia'u! Passubate Mawu Ruata! Ana waugu ia'u lai allangnga ere i'o, wurru ere manga turangnga manga nabi wurru anambo n taumata apan tutturuta manga tanata sulaummu wuke indi!" 10See ia'u nabbisara apia, "Imbarranga mangadappingu manga papatta sulaummu wuke indi, ana waugu tempone maranite sarangkanambone indi sarun mariaddi. 11Taumata apan laleo, sidutu ma'ola'a alaleo; taumata iaarantina wala'e itou mapaarantinu watanganne; taumata apan tutturuta apulu Mawu Ruata, wala'e sidutu itou tutturuta apulu Mawu Ruata, wurru taumata apan mabbiakka tumba'u hunane su Mawu Ruata sassane, wala'e sidutu mabbiakka hunane su Mawu Ruata sassane."

12"Panutukke indi" wisara Mawu Yesus, "Tate malannu lai Ia'u sarun rumanta ringannu uaapiddu lalantakke ipabbalissa alawo'u taumata tumurruttu inolaannu sambau-sambau. 13Ete Ia'u apan paarorone wurru pangudusanne; Ete Ia'u Mawu apan Panattaranne ma'oma n sara Panginsueanne."

14Laalumanna su taumata apan nabbansala jubahne na'oma n sara nawaresi, ana waugu imangitou wotongnge umanna wuassu alu m pabbawiakka wurru sumutta sulaummu soa udde sumabbi ngarane. 15Arawe manga taumata apan ma'ola'a pallalagu laleo, tarra wali'i mata, manga taumata sussandaga, tarra pate, masasubba paa'uanna, wurru manga taumata tarra wahia, mapia ringannu wisara ara'e lai ringannu pallalagu, anambo n taumata udde tampane su liuddu soa udde.

16Ia'u, Mawu Yesus, suete nandolokku malaeka-U siamiu tadea'u itou mamasingkatu manga olangnge indi su manga jamaatta. Ia'u indi papapulunni Daud; ete Ia'u arfusuallo apan masemakka udde."

17Gharraho Mawu Ruata wurru Maa'awingnga Wawine nabbisara, "Wette!" Suapan taumata apan naaringikka indi rinone lai mabbisara, "Wette!" Isai apan marou, rinone itou rumanta! Wurru isai apan maapulu, rinone itou manganu ua'e apan mangonggolu wiakka udde ringannu tawe bawaekke.

Pangudusanne

¹⁸Su aławo'u taumata apan naaringikka manga wisara papatta sulaľummu wuke indi, ia'u, Yohanes, mangonggolu pananaunganna indi: amungkangu pia taumata manamba manga wisara su papatta indi, ne Mawu Ruata sarun manamba lai řuumannu taumata udde ringannu manga asasusa apan niworřeta sulaľummu wuke indi. ¹⁹Wuřřu amungkangu taumata nanggaingnga salaiwe sampaddi wuassu manga wisara n papatta indi, ne Mawu Ruata lai sarun manggaingnga wageangnge apan niworřeta sulaľummu wuke indi – eteudde wageangnge wuassu punnu wiakka wuřřu wuassu soa susi udde.

²⁰Itou apan namasingkatu anambo n watti'a indi nabbisara, "Atonna, Ia'u maľihakke rumanta!" Amin!

Rantate, o Mawu Yesus!

²¹Saľandeanna Mawu Yesus sarun mangonggolu aľaman-Ne su anambo n aľařřana'u Mawu Ruata!